


Buk Baibel long
tokples Kandas



Portions of the New Testament in the Kandas Language of
Papua New Guinea

Buk Baibel long tokples Kandas
Portions of the New Testament in the Kandas Language of Papua
New Guinea
Sampela hap Nupela Testamen long tokples Kandas long Niugini

copyright © 2011-2019 Wycliffe Bible Translators, Inc.

Language: Kandas

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-04-02

PDF generated using Haiola and XeLaTeX on 11 Nov 2022 from source files dated 30 Nov 2021
c26408e7-0f52-572d-84cb-b9f49eb40621

Contents

Buk Baibel long tokples	
Kandas	1
Matiu	2
Mak	42
Luk	66
Jon	106
Aposel	135
Rom	173
1 Korin	192
2 Korin	209
Galesia	220
Epeses	227
Pilipai	234
Kolosi	239
1 Tesalonaika	244
2 Tesalonaika	248
1 Timoti	251
2 Timoti	256
Taitus	260
Pilimon	263
Ibru	264
Jems	278
1 Pita	283
2 Pita	288
1 Jon	292
2 Jon	297
3 Jon	298
Jud	299
Tamtama	301

**Buk Baibel long tokples
Kandas
The New Testament in the
Kandas language of Papua
New Guinea**

**Nupela Testamen long
tokples Kandas long Niugini**

Buk Baibel long tokples Kandas
The New Testament in the Kandas
Language of Papua New Guinea

Translation by Wycliffe Bible Translators

© 2012-2019, Wycliffe Bible Translators,
Inc.

Web version 2019
www.Wycliffe.org

<https://png.bible>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/4.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i

laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narepela buk i stap long dispela sait i gat tok orait long usim wantaim dispela samting tasol. Sapos yu laik narepela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/4.0/legalcode>.

Sapos yu gat askim long dispela, **plis askim mipela.**

A Wakak na Wasiso un o Iesu Karisito o Matiu i tumusi

A wasiso talapor mugu

O Matiu i tumus a buk ri, i ara tagun a noino ma aru nat na ususer anun o Iesu, ma ara risano kai o Liwai. Numugu i a tene los takis, ma i papam tomo nama gapman Rom. Numur o Iesu i kabo pasi, ra i wanpat a nat na ususer (tama Mt 9:9-13).

O Matiu i tumus a buk ri torom anun a taro, a taro Juda. Det kis langlang sur a inawan pat anun a musano ra o God i pilok pasi, sur in king anundet. Una wasiso Ibru di watungi nama Mesaia, ma una wasiso Grik di watungi nama Karisito.

O Matiu i nemi sur in inanos det lena, o Iesu ut a Karisito, a King anun a taro Juda. I mo ra i wasiso una inawan pat anun o Iesu ra i elar nama king.

Ma i watung puaso i kai a ramano kum wasiso tagun a Mugano Buk Tabu un o Karisito. A inawan pat anun o Iesu i ulingmulus a kum wasiso ri. O Matiu i tumusi kai a kum etowo anun o Iesu una matanitu anun o God, ra i ser watungi a matanitu tagisapat una langit.

A inawan ina buk Matiu:

Di usus o Iesu (1:1-2:23)

A pinapam anun o Jon a Tene Baptaiso (3:1-12)

Di baptaiso o Iesu ra numur o Satan i lari (3:13-4:11)

O Iesu i papam tong o Galili (4:12-18:35)

O Iesu i wan usapat o Jerusalem (19:1-20:34)

A ururop na wik ma a minatin o Iesu (21:1-27:66)

A katkatatur melet anun o Iesu gusun a minat (28:1-20)

A utatos ina kabotaro anun o Iesu Karisito

(Lk 3:23-38)

¹ Iri a risan a kabotaro tagun numugu ra o Iesu Karisito i wanpat tagun det. O Iesu, a nutun o Dewid, o Dewid a nutun o Abaram.

² O Abaram o taman o Aisak,

O Aisak o taman o Jokop,

ma o Jokop o taman o Juda ma a kum tistisino.

³ O Juda o taman o Peres der nam o Sera, ra a nander o Tamar.

O Peres o taman o Esrom,

o Esrom o taman o Ram,

⁴ ma o Ram o taman o Aminadap,

o Aminadap o taman o Nason,

ma o Nason o taman o Salmon,

⁵ o Salmon o taman o Boas, ma o nano a risano o Reap.

O Boas o taman o Obed, ma o nano a risano o Rut.

O Obed o taman o Jesi,

⁶ ma o Jesi o taman o Dewid, i ra a king.

O Dewid o taman o Solomon, ma o nano a ino ra i nolin pas nam o Uria.

⁷ O Solomon o taman o Roboam,

o Roboam o taman o Abia,

o Abia o taman o Asa,

⁸ o Asa o taman o Josapat,

o Josapat o taman o Joram,

ma o Joram o taman o Manase,

⁹ o Usia o taman o Jotam,

o Jotam o taman o Akas,

ma o Akas o taman o Esekia,

¹⁰ o Esekia o taman o Manase,

o Manase o taman o Amon,

ma o Amon o taman o Josaia,

¹¹ o Josaia i ulabo o Jekonia tomo nama kum tistisino. Numur tano, a taro Babilon det dat pas a taro Israel utong

o Babilon sur det in kis na karabus.

¹² Numur tan a inawan utong o Babilon:

O Jekonia i ulabo o Salatiel,

o Salatiel o taman o Serubabel,

¹³ o Serubabel o taman o Abiut,

o Abiut o taman o Eliakim,

ma o Eliakim o taman o Asor,

¹⁴ o Asor o taman o Sadok,

o Sadok o taman o Akim,

ma o Akim o taman o Eliut,

¹⁵ o Eliut o taman o Eliaser,

o Eliaser o taman o Matan,

ma o Matan o taman o Jokop,

¹⁶ o Jokop o taman o Josep, i ra i nolin nam o Maria. O Maria i usus o Iesu, ra di watungi o Karisito, i ra o God i tulu ru i.

¹⁷ A kum taun taro turpasi tagun o Abaram tuk un o Dewid i elar nama noino ma a wat det, ma tagun o Dewid tuk una inawan na karabus tong o Babilon, a noino ma a wat kai det, ma tagun a inawan na karabus tong o Babilon tuk un o Karisito, a noino ma a wat na taun taro kai.

A saksakutna un o Maria ra i usus o Iesu Karisito

(Lk 2:1-7)

¹⁸ Di usus pas o Iesu Karisito lenri: O nano, o Maria, di sa ubek bat tari sur in nolin nam o Josep, ikut numugu tan

anunder a nolin o Maria i sa tasmani lena i tianan tan a Tokodos na Nion. ¹⁹ O Josep ra di sa ubek bat tar o Maria toromi, i a tene tokodos, ma ke nemi sur in ban unaimai o Maria umatan a taro. Ra i nuki lena in kutus eno ru anunder a liliman tagun a nolin.

²⁰ Ra i nuknuk utmakai una utna ri, a ensel anun a Labino i wanpat toromi una ririon ra i watungi lena, “Josep, a nutun o Dewid, gong u wur nuknuk un o Maria, un ben pasi kut sur anum a ino. Uni a nat ra i tianan pasi, i wanpat tagun a Tokodos na Nion. ²¹ In usus pas a nat na musano, ma un pasor a risano nam o Iesu, uni in ulaun pas anun a taro gusun anundet a kum sakino petutna.”

²² A kum utna rop ri i wanpat sur din pam sot pas a kum wasiso anun a Labino ra anun a poropet i sa upuaso tari lenri, ²³ “Tama i, a toraro ra ke inep tomo utmakai nam tu musano in tianan, ma in usus pas a nat na musano ra din watungi nam o Emanuel,” *Ais 7:14* a kukuraino lena, “O God i kis tomo nam dat.”

²⁴ Ra o Josep i tuangun, i muri lenutra a ensel anun a Labino i sa inanos tari nami, ra i ben pas o Maria sur anun a ino. ²⁵ Ikut ka der inep tomo pas tuk ra o Maria i usus pas a nat na musano. Ma o Josep i pasor a risano nam o Iesu.

2

A kum tene mananos det etabor torom o Iesu

¹ Di usus o Iesu una tamon Betliem tiro una papor Judia, una kilalo ra o Erod i king. Numur a ramano kum tene mananos tagun a kum nangngang det wan tagitiro una nubual ra in matanas i pusu pat iai, ra det wanpat sapat o Jerusalem. ² Ra det iting lena, “Awai i a nat ra di ususi, sur in king anun a taro Juda? Uni met tama anun in nangngang tiro una nubual ra in matanas i pusu pat iai, ra iri met wan urin sur met in lotu toromi.”

³ Ra o king Erod i longoro i, i talara a nuknukino ma a nuknukin a taro Jerusalem rop kai. ⁴ Numur i ben tomo rop pas a kum lamlabino tene etabor torom o God ma a kum tene ususer tagun a Warkurai. Ra i ting det lena, “A Karisito ra o God in tulu ru i, din ususi awai?” ⁵ Det balu i lena, “Tong o Betliem una papor Judia, uni a poropet i sa tumus tari lenri,

⁶ Ma ui o Betliem una piso anun a kabotaro Juda,

Ui ko natino bing tan a kum mugu-mugu anun a kabotaro Juda, Uni a mugumugu in nanpat tagun ui, ra in mugu anung a taro Israel elar nama tene tamtamabat anun a kum sipsip.’” *Mai 5:2*

⁷ Numur o Erod i itula eno pas a kum tene mananos tagun a kum nangngang sur in talapor pas tandet lena, nangisin mulus ra in nangngang i wanpat. ⁸ I tulu ru det utong o Betliem nama wasiso lenri, “Mot nan ma mot in sisio wakak sur a natlik. Ra mot sa sio pasi, mot in inanos iau, sur iau bulung an nan ma an lotu toromi.”

⁹ Det sa longoro tar a king ra det wan. Det tama melet pas in nangngang ra det sa tama tari una nubual ra in matanas i pusu pat iai. I mugu nanan det tuk ra i tur sapat una nubual ra a natlik kura iai. ¹⁰ Ra det tama in nangngang ra, det taramo a labino gasgas. ¹¹ Det ruk una rumu, ra det tama pas a natlik, ma o nano, o Maria. Det kis butkeke ra det lotu torom a natlik. Numur det papos pas anundet a kum bek ma det tabori nama kum etabor ri: a gol, a paura di tuni ra a misino i sangnain wakak ra di watungi nama insens, ma a torok nin nanai sangsangnain kai ra di watungi nama mira. ¹² O God i sa utumarong tar det una ririon, sur gong det milet taru sur o Erod. Ra det milet sur anundet a tamon una se kisapi mukut.

A inawan eno utong o Ijip

¹³ Ra det sa wan taru, a ensel anun a Labino i wanpat torom o Josep una ririon ra i watungi lena, “Un katutur, un ben pas derano, ma motul in kalabor eno utong o Ijip. Ma motul in kis tong iai, tuk una bung ra an inanos melet ui, uni o Erod in sisio sur a natlik sur in um doko i.” ¹⁴ Ra i katutur, i ben pas derano una mirum, ma detul wan utong o Ijip. ¹⁵ Detul kis tiro iai tuk ra o Erod i mat. Una nundetul a kinkinis tiro, di pam sot pas a wasiso anun a Labino, ra a poropet i sa wasiso mugu taru uni lenri, “A kabo pas o nutunglik tagitong o Ijip.” *Os 11:1*

¹⁶ Ra o Erod i tama i lena a kum tene mananos tagun a kum nangngang det sa toro tari, i kankan doko ra i itula sur din um doko rop ru a kum nat musano tong o Betliem ma una kum tamon kai ra det kis milau. I pitar a warkurai sur din um doko det ra aru kilalo anundet, ma det kai ra ke ru kilalo utmakai anundet, uni a kum tene mananos det sa inanos tari una kilalo anun a natlik. ¹⁷ Ra di sa pam sot pasi maragom a wasiso ra o Jeremaia a poropet i wasiso mugu taru uni lena,

18 “Tong o Rama di longoro in nalngan ara, a tintinangis ma a unguagaia, O Raket i domos a kum nutnutunu liklik, uni det sa mat rop, ma ka di umarip lar pasi.” *Jer 31:15*

O Josep detul tamano millet melet utong o Nasaret

19 O Erod i sa mat, ra a ensel anun a Labino i wanpat torom o Josep una ririon tiro o Ijip. 20 Ma i watungi tano lena, “Un katutur, un ben pas derano, ma motul in nan utong o Israel, uni det ra det nem na um doko a natlik det sa mat.” 21 Numur i katutur, i ben pas derano, ra detul wan utong o Israel. 22 Ikut i longoro i lena, o Akelaus i keles o tamano o Erod, sur i bulung in king tong una papor Judia, ra o Josep i ngara sur in nan utong o Judia. Ra detul wan mukut utong una papor Galili, uni o God i turbat tar o Josep una ririon, sur gong detul wan utong una papor Judia. 23 Ra detul wan ma detul kis una tamon a risano o Nasaret. Una anundetul a kinkinis tiro, di pam sot pas a wasiso anun a kum poropet lena, “Din watungi lena i a te Nasaret.”

3

O Jon a Tene Baptaiso i warawai (Mk 1:1-8; Lk 3:1-18; Jn 1:19-28)

1 A ramano kum kilalo numur, o Jon a Tene Baptaiso i wanpat, ma i warawai una nubual kalako taro uni una papor Judia, 2 ra i watungi lena, “Mot in nukpukus, uni a matanitu tagisapat una langit i sa milau.” 3 O Jon ut, ra a poropet Aisaia i sa wasiso puaso mugu taru uni lena, “Una nubual kalako taro uni, in nalngan ara i kakabo lena,

‘Mot in waninar a kisapi anun a Labino, mot in pam kodos anun a kum kisapi.’ ” *Ais 40:3*

4 O Jon i ser emar namin namalu di pami nama iwu na kamel, ma i ser ker wati namin pino bulumakau. I ser wan a kum ko ma a polono tatos. 5 A taro tagisapat o Jerusalem, ma tagun a kum tamon rop una papor Judia, ma tagun a kum tamon ra det kis milau a danim Jodan, det wan toromi. 6 Det watung puaso anundet a kum sakino petutna, ra i baptaiso det una danim Jodan.

7 O Jon i tama a susut na Parisi tomo nama kum Sadusi det wan sur in baptaiso det, ra i watungi tandet lena, “Ai, mot a kum nutnutun a kum sui! Osi ra i inanos mot sur mot in kalabor eno gusun a warkurai na minabalu anun o God, ra in nanpat?”

Iau awu. 8 Mot in pam a kum utna ra in upuaso i lena, mot sa nukpukus. 9 Ma gong mot nuki lena, o God ken warkurai mot uni mot a kabotaro anun o Abaram. A inanos mot lena, o God in pet lari sur in pam pat pas a kabotaro anun o Abaram tagun a kum watat ri. 10 Di sa ubek tar a nawu nisan a kum kibino duwai, ma a kum duwai rop ra ka det wu lako wakak na windet, din tau ru det, ma din woro tar det una sungun. 11 Iau, a baptaiso mot nama danim sur in upuaso i lena mot sa nukpukus. Ikut o naro ra in mur tang a dekdekino i labo taun a dekdeking. Ka elar sur an los anun aru su, uni a natino doko tano. In baptaiso mot nama Tokodos na Nion ma a sungun. 12 I pam pas anun a pok nam aru lamano sur in lakro susuaro a pino wit gusun a wino wit. Numur in ubek tomo anun a wino wit una nun a rumu na wit, ikut in tun ru a kum pinino una sungun ra ke ser mat.”

O Jon i baptaiso o Iesu (Mk 1:9-11; Lk 3:21-22)

13 O Iesu i wan tagitong una papor Galili utiro una danim Jodan torom o Jon sur in baptaiso i. 14 O Jon i nem na turbati, ra i watungi tano lena, “Ilai ra u wan torom iau sur an baptaiso ui? In wakak sur ui in baptaiso iau.” 15 Ra o Iesu i balu i lena, “Un baptaiso iau kut. I wakak ra in pami, sur dar in pam sot pas asau rop ra i tokodos umatan o God.” Ra o Jon i mulaot kut tano.

16 Ra i baptaiso tari. Uniutra o Iesu i saur gusun a danim, ra a langit i papos, ma i tama a Nion o God i wan pirso elar namin natabun ma i kis taru netes uni. 17 Numur in nalngan ara tagisapat una langit i watungi lena, “Tri a Nutunglik, a nat na wakak, a gas doko nami.”

4

O Satan i lar o Iesu (Mk 1:12-13; Lk 4:1-13)

1 Numur a Tokodos na Nion i ben o Iesu usa una nubual kalako taro uni, sur o Satan in lari. 2 Ra i sa wewel pas a wat na noino bung na mirum ma a wat na noino bung na waspi, numur i murak. 3 Ra a tene ululam i wanpat toromi, ma i watungi tano lena, “Ra ui a Nutun o God, un inanos a kum watat ri sur det in nanpat a beret.” 4 O Iesu i balu i lena, “Di sa tumus tari una Buk Tabu lena, ‘A taro ka det ser laun nama utna na inangon kut, det ser laun nama kum wasiso rop ra i pirso gusun a wan o God.’ ” *Lo 8:3*

5 Numur o Satan i ben pasi usapat o Jerusalem, a tamon anun o God, ra i utur

tari sapat netes sakit una rumu na etabor.
⁶ Ma i watungi tano lena, “Ra ui a Nutun o God, un sirok pirso, uni di sa tumus tari una Buk Tabu lena,

‘In watungi torom anun a kum ensel sur det in tamtamabat ui.

Det in pam pas ui nama kum lamandet, sur gong u tuka a kikim un tu wat.’ ”
Sng 9:11-12

⁷ O Iesu i balu i lena, “Di sa tumus tari kai una Buk Tabu lena, ‘Gong u lar a Labino anum a God.’ ” *Lo 6:16*

⁸ O Satan i ben melet pasi usapat netes una labino tangai, ra i ese tar a kum tamon rop una rakrakon bual tomo nama kum minamarin det rop kai tano. ⁹ Ra i watungi tano lena, “Ra un kis butkeke ma un lotu torom iau, a kum utna rop ri an pitari tari tam.” ¹⁰ O Iesu i watungi tano lena, “Satan, un nan gisen, uni di sa tumus tari una Buk Tabu lena, ‘Un lotu torom a Labino anum a God, ma un papam kut toromi.’ ” *Lo 6:13*

¹¹ Numur o Satan i wan pas gusuni, ra a kum ensel det wanpat toromi, ma det waruti.

O Iesu i turpas anun a pinapam na warawai una papor Galili
(Mk 1:14-15; Lk 4:14-15)

¹² O Iesu i longoro i lena, di sa uruk tar o Jon una karabus, ra i milet melet utong una papor Galili. ¹³ Ra i wan tagitong o Nasaret, i kis tiro o Kapernaum, a tamon ra i kis una usalin nisan a du tasi Galili, una piso anun a kabotaro Sebulon ma a kabotaro Naptali, ¹⁴ sur in pam sot pas a wasiso anun o God ra o Aisaia a poropet i sa wasiso mugu taru uni lena,

¹⁵ “A piso anun a kabotaro Sebulon ma a piso anun a kabotaro Naptali, milau a kisapi ra i wan unago utasi, una papor danim Jodan utong, der kis una papor Galili, ra a taro ra awu sur a taro Juda det kis iai.

¹⁶ A taro ra det kis una dumirum det sa tama a labino talapor, ma det ra a dumirum na minat i pulus bat det, a talapor i sa wanpat torom det.” *Ais 9:1-2*

¹⁷ Turpasi una kilalo ra, o Iesu i warawai lena, “Mot in nukpukus, uni a matanitu tagisapat una langit i sa milau.”

O Iesu i kabo pas a wat na mugano nat na ususer
(Mk 1:16-20; Lk 5:1-11)

¹⁸ Ara bung o Iesu i usal una usalin ina du tasi Galili, ra i tama pas o Saimon, di watungi kai nam o Pita, ma o tisino o

Endru. Der woro a uben sa utasi, uni der aru tene woro uben. ¹⁹ I watungi tander lena, “Mur in mur iau, sur an ususer mur sur mur aru tene ben taro.” ²⁰ Uniutra, der katatur pas gusun anunder a kum uben, ma der muri.

²¹ Ra i wan tagitiro, i tama pas o Jems dersino nam o Jon, aru nutnutun o Sebedi. Detul tamano kis taru una pot ma detul mabon anundetul a kum uben. Ra o Iesu i kabo der. ²² Uniutra, der katatur pas ma der wan gusun a pot ma a tamander, ra der mur o Iesu.

O Iesu i ulangolango a kum misait
(Lk 6:17-19)

²³ O Iesu i wan tuptupukus una papor Galili rop, ma i ususer a taro una nundet a kum rumu na lotu. I warawai nama Wakak na Wasiso una matanitu anun o God. Ma i ulangolango pas a taro gusun a kum wur ngas na misait rop. ²⁴ Ma a wasiso un o Iesu i wan sarara una papor Siria rop. Ra det ben rop pas a taro ra a kum wur ngas na misait i ban laulau det, a taro ra a dekdek na ngunungut i ban laulau det, ma det ra a kum laulau na nion kura un det, det kai ra det ser mat lalang ma det ra a pinpinin det i ser. Ra o Iesu i ulangolango pas det rop. ²⁵ Ma a labino kunur na taro taginin una papor Galili ma tagitiro una papor Dekapolis, ma tagisapat o Jerusalem, ma tagun a papor Judia ma tagitong una ara papor danim Jodan det mur o Iesu.

5

O Iesu i warawai una taro ra det dan
(Lk 6:20-23)

¹ O Iesu i tama pas a kunur na taro, ra i wan toto una tangai, ma i kis. Anun a taro na ususer det wan toromi. ² Ma i ususer det lena,

³ “Det ra det tasmani lena det sibo una niondet, det dan, uni anundet a matanitu tagisapat una langit.

⁴ Det ra det domos nama tupunuk, det dan, uni o God in umarom det.

⁵ Det ra det unatino pas det, det dan, uni det in los pas a rakrakon bual sur anundet.

⁶ Det ra det murak ma det muruk sur a tokodos na petutna, det dan, uni numur det in masur.

⁷ Det ra a kum tene marmaris, det dan, uni o God in maris det kai.

⁸ Det ra a nuknukin det katu dur uni, det dan, uni det in tama o God.

⁹ Det ra det ser umalmaal a taro, det dan, uni o God in watung det a kum nutnutunu.

¹⁰ Det ra di ban laulau det uni det mur a tokodos na petutna, det dan, uni anundet a matanitu tagisapat una langit.

¹¹ “Mot dan ra di watung laulau mot, ma di ban laulau mot, ma di watung a kum torotoro na wasiso un mot lena mot pam a kum sakino petutna, uni mot tagun iau.

¹² Mot in gas, uni i labo sakit anumot a ikul sapat una langit. Uni di sa ban laulau mugu tar a kum poropet ra det laun numugu tamot, lenkutkai ra di pami un mot.

*A wasiso elelar una sol ma a talapor
(Mk 9:50; Lk 8:16; 14:34-35)*

¹³ “Mot a sol tagun a rakrakon bual. Ikut, ra a makasmanino i sa rop, din umakasman meleti mo pepetlai? Katu utna mo i gas uni. Din woro pirso ru i unago utamon, ma a taro det in papapas mukut netes uni.

¹⁴ “Mot a talapor tagun a rakrakon bual. Tu tamon ra i kis netes una tangai, ken parau lar pas. ¹⁵ Katutaio in ungangon tar tu lam ma in wop bat tari nama paket. Awu! Din ubek tari ut netes una nun a turtur, sur in talapor torom det rop ra det kis una rumu. ¹⁶ Lenkutkai ra, anumot a talapor in sisio umatan a taro, sur det in tama anumot a kum wakak na pinapam, ma det in watung ulabo pas a Tamamot ra i kis sapat una langit.

O Iesu i ususer a taro una kum Warkurai

¹⁷ “Gong mot nuki lena a wanpat sur an rakon ru a kum Warkurai anum o Moses ma a kum etowo anum a kum poropet, awu. Ka wanpat sur an rakon ru det, a wanpat sur an pam sot pas det. ¹⁸ A inanos mot nama lingmulus, katu nat na tumtumus lik o tu ukinalong lik tagun a kum Warkurai ri in rop, tuk ra a bakut ma a rakrakon bual der in rop. A kum Warkurai det in kis ut, tuk ra din pam sot pas det. ¹⁹ Osi ra in lakai tu nat na warkurai tagun a kum Warkurai ri, ma in ususer raro a taro sur det kai det in lakai i, din watungi lena, i natino doko una matanitu sapat una langit. Ikut osi ra in mur a kum Warkurai ri, ma in ususer a taro uni, din watungi lena, i labo una matanitu sapat una langit. ²⁰ Lenra, a watungi tamot, ra anumot a tokodos na petutna ken wakak taun a tokodos na petutna anum a kum tene ususer tagun a Warkurai ma a kum Parisi, mot in lagano ruk una matanitu sapat una langit.

A wasiso una kankan

²¹ “Mot sa longoro tari ra numugu di sa watung tari tan a taro lena, ‘Gong u um doko taio. Osi ra in um doko taio din warkurai i.’ ²² Ikut iau, a watungi tamot lena, osi ra in kankan torom tu tisino, din warkurai i, ma osi ra in watungi un tu tisino lena, ‘Katin lorim,’ din warkurai i umatan a taro na kiwung. Ma osi ra in watungi un tu musano lena, ‘A longlong ui,’ kutiro a warkurai toromi, ra din woro i una labino sungun.

²³ “Ra un nan sur un pitar anum a etabor una kabulu na tuntun etabor, ma u nuk pas tu utna ra o tisim i takun ui uni, ²⁴ un ubek tar anum a etabor tiro nisan a kabulu na tuntun etabor. Un nan munung, ma mur in emarom mugu pas nam o tisim. Numur un milet melet, ma un pitari maragom anum a etabor.

²⁵ “Ra taio in ubek tar ui una warkurai, mur in emarom mugu ra mur wan nanan utmakai una kisapi, sako in pitar tar ui torom a tene warkurai. Ra a tene warkurai in pitar ui torom a tene tamtamabat ra in uruk ru ui una karabus. ²⁶ A inanos ui nama lingmulus, kon pirso lar pas tuk ut ra un pitar rop ru a ururop na toia ina num a kunukul.

A wasiso una sakino nuknuk sur a ino

²⁷ “Mot sa longoro tari ra di sa watung tari lena, ‘Gong u pam a sakino nam tu ino anum taio o nam tu musano anum taio.’

²⁸ Ikut iau, a watungi tamot lena, ra tu musano in tama tar tu ino ma a nuknukino i laulau toromi, una nuknukino, i sa pam tar a sakino petutna tomo nama ino ra. ²⁹ Ra in nosot na matam in ben raro ui, liok ru i, ma un woro gisen ru i. In wakak ra ara du pinim kut din woro ru i, sur gong di woro a pinim rop una labino sungun. ³⁰ Ra a sot na lamam in ben raro ui sur a sakino, un kutus ru i, ma un woro gisen ru i. In wakak ra ara du pinim kut din woro ru i, sur gong di woro a pinim rop una labino sungun.

A wasiso una kutus a nolin

³¹ “Di sa watung tari kai lena, ‘Osi ra i lakro ru anum a ino, in pitar tari kai a dono buk na kutus nolin tano.’ ³² Ikut iau, a watungi tamot lena, ra a ino ke pam a sakino nam tu musano, ma anum a musano i lu oros ru i kut, ma a ino i nolin melet, i pam a sakino. Ikut anum a musano, i kibino una sakino ra. Ra tu musano in nolin nam

tu ino ra anun a musano i lu ru i, i kai i sa pam tar a sakino, uni a ino ra, i nolin ut.

A wasiso una liliman

³³ “Mot sa longoro tari kai ra numugu di sa watung tari tan a taro lena, ‘Gong u liliman torotoro. A utna ra u sa liliman taru uni torom a Labino, un pam soti ut.’
³⁴ Ikut iau, a watungi tamot lena, gong mot udekdek a liliman nam tu ngas na wasiso kai. Gong mot liliman nama langit, uni a langit, a kiskis na king anun o God.
³⁵ Gong mot liliman nama rakrakon bual, uni a rakrakon bual a nubual ra i ubek aru kikino uni. Gong mot liliman nam o Jerusalem, uni o Jerusalem a tamon anun a labino King. ³⁶ Gong u liliman namin lorim, uni kon pam pukus lar pas tin iwu na lorim sur in kabang, o in mirum. ³⁷ Mot in watungi kut lena ‘ma’ o ‘awu’. Uni, ra mot in watung tu ngas na wasiso melet, i ra i wanpat mukut tan a Tene Sakino.

Gong mot balu a sakino anun taio
(Lk 6:29-30)

³⁸ “Mot sa longoro tari ra di sa watung tari lena, ‘Ra taio in liok ru tin matan taio, din balu i toromi, din liok ru i kai tin matano. Ra taio in tubul pak ru tin lokon taio, din balu i toromi, din tubul pak ru i kai tin lokono.’
³⁹ Ikut iau, a watungi tamot lena, gong mot balu a sakino anun taio ra i pami torom mot. Ra taio in pasor tar a papor sot na wam, un pukus ara papor bulung toromi. ⁴⁰ Ra taio i nemi sur in dat tar ui una warkurai ma din pitar a warkurai tam sur un pitar anum a siot tano, un pitar tari kai anum a saket. ⁴¹ Ra taio i ungonos pas ui, sur mur in nan tomo, sur tu tamon ra i milau kut, un nan tomo nami sur a tamon ra i kis bakbak lilik. ⁴² Un tabor taio ra i saring ui. Ma ra taio in saring ui sur in los pasi munung tu utna gusun ui, un pitari kut munung tano.

A marmaris torom a kum ebar
(Lk 6:27-28, 32-36)

⁴³ “Mot sa longoro tari ra di sa watung tari lena, ‘Un nem o pasam, ma un nget anum a ebar’
⁴⁴ Ikut iau, a watungi tamot lena, mot in nem anumot a kum ebar, ma mot in wararing sur det ra det ban laulau mot. ⁴⁵ Ra mot in pami lenra in ese i lena mot a kum nutnutun a Tamamot, ra i kis sapat una langit. Uni i pitar tar a suan sur in talapor una kum tene sakino ma a kum wakak na taro kai, ma i pitar tar a bato torom a kum tene tokodos ma torom det kai ra ka det tokodos. ⁴⁶ Ra mot nem det kut

ra det nem mot, asau mo anumot a ikul? A kum tene los takis, ra ka det lason una marmaris det kai det ser pami lenra. ⁴⁷ Ra mot gas pas a kum paspasa mot kut, mot in wakak pepetlai taun ara taro? A taro kai ra ka det nurnur, det ser gas pas a kum paspasan det kut. ⁴⁸ I mo ra mot in tokodos mulus, elar nama Tamamot ra i kis sapat una langit, i tokodos mulus.”

6

A etowo una etabor

¹ “Mot in tumarong mot sur gong mot pam anumot a wakak na pinapam umatan a taro kut, sur det in tama i ma det in watung ulabo pas mot. Ra mot pami lenra, katu ikul anumot tan a Tamamot ra i kis sapat una langit. ² Ra un tabor a kum sibo na taro, gong u wasiso mugu sur a taro det in tama ui. A taro ra ka det etabor nama lingmulus una balandet, det ser wasiso mugu nam anundet a etabor una kum rumu na lotu ma una kum kisapi kai, sur a taro det in watung ulabo pas det uni. Gong mot pami elar nam det. A inanos mot nama lingmulus, ra a taro det ulabo pas det, i ut ra anundet a kudulano ikul. ³ Ra un tabor a kum sibo na taro, gong taio i tasman a utna ra u pami, un pam eno i kut. ⁴ Ra u pami lenra, o Tamam ra i tama a utna ra u pam eno i, in pitar a ikul tam.

A etowo una niaring
(Lk 11:2-4)

⁵ “Ra mot in wararing, gong mot elar nama kum tene torotoro. Det nem doko i sur det in tur ma det in wararing una kum rumu na lotu, ma una kum nubual ra a taro det wanan tomo iai, sur a taro det in tama det ma det in watung ulabo pas det. A inanos mot nama lingmulus, ra a taro det ulabo pas det, i ut ra anundet a kudulano ikul. ⁶ Ikut ui, ra un wararing, un ruk una num a rumu ma un tagar bat pas ui, ma un wararing torom o Tamam ra kataio i tama i. Ma o Tamam ra i tama a utna ra u pam eno i, in pitar anum a ikul.

⁷ “Ra mot in wararing, gong anumot a wasiso i walos ma mot wasiso oros kut, elar nama kum niaring anun a taro ra det lotu torom a kum torotoro na god. Uni det nuki lena, din longoro det ra det watung a susut na wasiso. ⁸ Gong mot elar nam det, uni a Tamamot i sa tasman tar asau rop ra mot sibo suri, ra ka mot wararing utmakai.

⁹ “Mot in wararing lenri,
‘Tamamet sapat netes una langit,

i wakak ra din ru a risam.

¹⁰ I wakak ra anum a matanitu in nanpat. I wakak ra din mur anum a nemnem nin una rakrakon bual, elar nami ra di ser muri sapat netes una langit.

¹¹ A bung ri un tabor met nam amet a utna na inangon.

¹² Un unus ru anumet a kum sakino petutna, elar nam met dumano ru anundet a kum sakino petutna torom met.

¹³ Gong u ben met una ululam.

Un ulaun met gusun a Tene Sakino.*

¹⁴ “Ra mot in dumano ru a kum sakino petutna ra a taro det pami un mot, a Tamamot, ra i kis sapat una langit, in unus ru anumot a kum sakino petutna kai.

¹⁵ Ikut, ra ka mot dumano ru a kum sakino petutna, ra a taro det pam tari un mot, a Tamamot kai ken unus ru anumot a kum sakino petutna.

A etowo una winewel

¹⁶ “Ra mot in wewel sur mot in wararing, gong mot tamtama na marmaris elar nama kum tene torotoro, uni det tamtama na marmaris sur a taro det in tama i lena det wewel. A inanos mot nama lingmulus, ra a taro det ulabo pas det lena det a kum tene lotu mulus, i ut ra anundet a kudulano ikul.

¹⁷ Ra un wewel, un kom in lorim, ma un gos in masarim, ¹⁸ sur gong a taro det tasmani lena u wewel. O Tamam kut, ra kataio i tama i, in tasmani. Ma o Tamam ra i tama a utna ra u pam eno i, in pitar anum a ikul.

A kum wakak na utna sapat una langit (Lk 12:33-34)

¹⁹ “Gong mot ubek tomo a kum wakak na ululeng nin upiso, uni a koropos ma a moroto der in ban laulau ru det kut, ma a kum tene wolong kai det in rege pas anumot a kum rumu ma det in los a kum ututna. ²⁰ Mot in mur a kum tokodos na petutna sur in elar nama wakak na ululeng sapat una langit, uni a koropos ma a moroto ka der in ban laulau i, ma a kum tene wolong kai ka det in wolong lar pasi. ²¹ Uni a nubual ra anum a wakak na ululeng i kis iai, anum a nilaun rop in kis uni.

A lam tagun a pinindat (Lk 11:34-36)

²² “Arin matandat der elar nama lam tagun a pinindat. Ra arin matam der

wakak, a pinim rop in bukus nama talapor. ²³ Ikut, ra arin matam der laulau, a pinim rop in bukus nama dumirum. Ra anum a talapor i dumirum kut, a dumirum ra in labo sakit!

Gong mot nuknuk doko sur tu utna (Lk 16:13; 12:22-31)

²⁴ “Katutaio in pet lar pasi sur in papam torom lako ru mugumugu. In nget ara pasander, ma in nem ara pasander, in nem doko ara, ma in rosumur gusun ara. Ka mot in papam lar pas torom o God ma torom a mani kai.

²⁵ “I mo ra a watungi tamot lena, gong mot nuknuk doko una numot a nilaun sur asau mot in nani, ma asau mot in inumi. Ma gong mot nuknuk doko una pinimot kai sur asau mot in emar nami. A nilaun i labo taun a utna na inangon, niko? Ma a pinindi kai i labo taun in namalu, niko? ²⁶ Mot in tama a kum piko. Ka det marut tu utna, ma ka det pasong tomo lako utna, ma ka det umubek tomo un tu rumu, ikut a Tamamot ra i kis sapat una langit, i ser tabor det. Ma mot, mot labo doko taun det. ²⁷ Ra taio tamot in nuknuk doko una nun a nilaun, pepetlai, in pet lari sur in tugus walos lilik anun a nilaun? Awu!

²⁸ “Ilai ra mot nuknuk doko sur a mal-malu? Mot in tama a kum purpur tagisa ubual, ra det lubung pepetlai. Ka det ser papam ma ka det ser pam malu. ²⁹ Ikut a watungi tamot, a ememar rop anun o king Solomon i tamtama wakak bing, ikut ke tamtama wakak elar nama kum purpur ra. ³⁰ O God i mar a kum wuliso sa ubual nama kum wakak na purpurindet, ra i puspus uniri, ra markan din tun ru i una sungun. Ra i pami lenra una kum wuliso, pepetlai, ken mar mot kai? Anumot a nurnur i natino doko. ³¹ Gong mot nuknuk doko ma mot watungi lena, ‘Asau ra dat in nani?’, o ‘Asau ra dat in inumi?’, o ‘Asau ra dat in emar nami?’ ³² Uni a taro ra ka det nurnur, det ser dedek sur a kum utna rop ri, ikut a Tamamot ra i kis sapat una langit i tasmani lena, mot sibo sur a kum utna rop ri. ³³ Mot in sisio mugu sur anun a matanitu ma anun a tokodos na petutna, ra in tabor mot kai nama kum utna rop ri. ³⁴ I mo ra gong mot nuknuk doko sur a bung markan, uni markan in nuknuk ut suri. A ninunuk sur ara bung taktakai i topasi ut a bung ra.”

6:12: Mt 6:14-15; 18:21-35 **6:13:** Lk 22:40; Jem 1:13; Jn 17:15; 2 Tes 3:3 * **6:13:** Una ramano kum du buk una wasiso Grik, a ramano kum wasiso kai i kis una vers ri. I lenri: *Uni anumi kut a matanitu ma a dedek ma a minamar, ma ken rop. Amen.* **6:14:** Mk 11:25-26 **6:16:** Ais 58:5-9 **6:19:** Jem 5:1-3 **6:20:** Mt 19:21; Lk 18:22
6:25: Pil 4:6; 1 Tim 6:6-8; 1 Pit 5:7 **6:26:** Mt 10:29-31; Lk 12:6-7 **6:29:** 1 Kin 10:4-7; 2 Sto 9:3-6 **6:32:** Mt 6:8 **6:33:** 1 Kin 3:13-14; Sng 37:4, 25; Rom 14:17 **7:1:** Rom 2:1; 1 Kor 4:5; Jem 4:11-12

7

*Gong mot takun taio**(Lk 6:37-38, 41-42)*

¹ “Gong mot takun tar taio, sako o God in takun mot. ² Uni a warkurai ra mot takun taio nami, i ut ra o God in takun mot melet nami. Asi na ngas na warkurai ra mot takun taio nami, ra i tokodos o ke tokodos, i ut ra o God kai in takun mot melet nami. ³ Ilai ra u tama pasi kut a burbururup kura unin matan o tisim, ikut ko nuk pas a nuduwai pi kura ut unin matam? ⁴ Ra a nuduwai pi kura kut unin matam, un watung pelani torom o tisim lena, ‘An rakon ru a burbururup gusun in matam?’ ⁵ Ui a tene torotoro, un los mugu ru a nuduwai pi gusun in matam, ra un tamtama wakak, sur un rakon ru a burbururup gusun in matan o tisim.

⁶ “Gong mot tabor a kum pap nama utna anun o God, sako det in tupukus ma det in karot ginogino mot. Ma gong mot woro anumot a dusaro tan a kum boro, sako det in pas ginogino i kut nama kum kikindet.

Mot in sasaring ma o God in tabor mot
(Lk 11:9-13)

⁷ “Mot in sasaring, ra din tabor mot, mot in sisio, ra mot in sio pasi, mot in pinpidik, ra din papos pas mot. ⁸ Uni det rop ra det sasaring din tabor det, ma osi ra i sisio in sio pasi, ma osi kai ra i pinpidik, din papos pasi.

⁹ “Osi na pasamot, ra o nutunulik in saringi sur tu beret, in tabori kut nama wat? ¹⁰ Ma ra in saringi kai sur tin kiripo, in tabori kut namin nusu? ¹¹ Mot a laulau na taro, ikut mot tasmani ut a kum wakak na etabor sur mot in tabor a kum nutnutu mot nami. Ra mot ser pami lenra, i lingmulus sakit lena, osi ra in saring a Tamamot ra i kis sapat una langit, in tabori ut nama kum wakak na utna. ¹² A kibin a wasiso na Warkurai anun o Moses, ma a kum etowo anun a kum poropet i lenri: A kum utna rop ra mot nemi sur a taro det in pami torom mot, mot kai, mot in ser pami torom det.

*A kisapi sur a nilaun ma a kisapi sur a iniru tukum**(Lk 13:24)*

¹³ “Mot in ruk una nat na matansako lik. Uni a matansako ma a kisapi ra i wan sur a iniru tukum, i perere ma i langolango, ma a susut na taro doko det ser ruk uni. ¹⁴ Ikut a matansako ma a kisapi ra i wan sur a nilaun, i natino, ma a pak na taro kut det ser sio pasi.

*In nanai ma a wino**(Lk 6:43-44)*

¹⁵ “Mot in tumarong mot gusun a kum torotoro na poropet. Det ser wan torom mot nama wakak na magirandet elar nama kum nipsis, ikut tiro ubalandet, det nem na ban laulau mot elar nama kum ngalngalia na pap. ¹⁶ Mot in tama lele a kum torotoro na poropet tagun a windet ut. Pepetlai, din git pas in niwino wain tagun in kadas, ma in niwino fig tagun in suksuk? Awu, ken elar! ¹⁷ Lenkutkai ra a kum wakak na duwai rop det ser wu a wakak na windet, ikut in laulau na duwai i ser wu a kum laulau na wino. ¹⁸ In wakak na duwai ken wu lako laulau na wino, ma in laulau na duwai kai ken wu lako wakak na wino. ¹⁹ A kum duwai rop ra ka det wu a wakak na windet, din tau ru det, ma din woro tar det una sungun. ²⁰ Ra mot in tama lele a kum torotoro na poropet tagun a windet ut.

A Labino in ipul lena, “Ka tasman mot”
(Lk 13:25-27)

²¹ “Det ra det watung iau, ‘Labino, Labino,’ awu sur det rop det in ruk una matanitu sapat una langit. Det sot kut, ra det ser mur a nemnem anun o Tita, ra i kis sapat una langit, det in ruk una nun a matanitu. ²² Una bung na warkurai a susut na taro, det in watungi tang lena, ‘Labino, Labino, met wasiso na poropet nama risam, ma met lakro ru a kum laulau na nion kai nama risam, ma met pam a susut na utna na ukisin nama risam.’ ²³ An balu det lena, ‘Ka tasman mot. Mot a kum tene sakino, mot in nan gisen gusun iau.’

*Aru tene pam rumu**(Lk 6:47-49)*

²⁴ “I mo ra det rop ra det longoro anung a kum wasiso ri, ma det muri, det elar nama tene mananos, ra i pam taro anun a rumu netes una wat. ²⁵ A bato i puku, ra a lomom i wanpat, ma a wuwu i ragoti ra i um a rumu, ra ikut ke toropo lar pas, uni di utur tari netes una wat. ²⁶ Det rop ra det longoro anung a kum wasiso ri, ikut ka det muri, det elar nama longlong, ra i utur taro anun a rumu netes kut una woio, ma ke poro dektek a kum pos. ²⁷ A bato i puku, ra a lomom i wanpat, ma a wuwu i ragoti ra i um a rumu, ra i toropo, ma i terege mut.”

²⁸ Ra o Iesu i sa watung rop tar a kum wasiso ri, a kunur na taro det kisin una nun a kum etowo, ²⁹ uni i ususer det elar nam ara, ra a warkurai kura ut tano. Ke ususer

det elar nam anundet a kum tene ususer tagun a Warkurai.

8

*O Iesu i ulangolango pas a lepra
(Mk 1:40-45; Lk 5:12-16)*

¹ Ra o Iesu i wan pirso tagisapat una tangai, a susut na taro det muri. ² Ara musano, i misait nama lepra, i wan toromi, i kis butkeke nisanano, ma i watungi lena, "Labino, ra u nemi, i topas ui sur un ulangolango pas iau." ³ O Iesu i kodos a lamano, ma i pam a pinino, ra i watungi tano lena, "A nemi ut, un langolango." Uniutra a lepra i rop gusuni. ⁴ Ra o Iesu i watungi tano lena, "Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a etabor torom o God elar nami ra o Moses i sa watung tari. Ra un pami lenra, a taro det in tasmani lena u sa langolango."

*A nurnur anun a mugumugu anun a kum tene inaim
(Lk 7:1-10)*

⁵ Ra o Iesu i sa wanpat tong o Kapernaum, ara mugumugu anun a kum tene inaim tagitong o Rom i wan toromi, ra i inanos sur in waruti. ⁶ I watungi lena, "Labino, ara tultul anung kurong ut una rumu i inep, a pinino rop i mat, ma i taramo a dekdek na ngunungut doko." ⁷ O Iesu i watungi tano lena, "An nan ma an ulangolango pasi." ⁸ A mugumugu ra i balu i lena, "Labino, ka tokodos sur un ruk una nung a rumu. Un watung tu wasiso kut, ra anung a tultul in langolango. ⁹ Uni iau a musano ra a ser mur a warkurai anundet ra det labo tang, ma di pitar tar a warkurai kai tagi sur a taro na inaim. Ra an watungi tan taio lena, 'Un nan,' in nan kut. Ma torom taio kai lenri, 'Un nan urin,' in nan kut urin. Ma torom anung a tultul lena, 'Un pam a utna ri,' in pami kut."

¹⁰ O Iesu i longoro anun a wasiso, ra i kisin doko uni, ma i watungi torom a taro ra det muri lena, "A inanos mot nama lingmulus, ka tama tar tu te Israel ra anun a nurnur i labo elar nama musano ri. ¹¹ A watungi tamot lena kura numur a susut na taro det in nan tagitiro na matmatano tobar ma a matmatano lubur, ra det in kis tomo nam o Abaram, o Aisak ma o Jepok una lukaro una matanitu sapat una langit. ¹² Ikut, a taro Israel ra numugu o God i pilok pas det sur det in kis una nun a matanitu, in lu pirso ru a susut tagun det utiro una dumirum. Ra det in tangtangis ma det in ungingit lokondet iai." ¹³ Ra o Iesu i

watungi tan a mugumugu anun a kum tene inaim lena, "Un nan kut. Din pam a utna ut ra u nurnur suri." Una du bung ut ra anun a tultul i langolango mut.

O Iesu i ulangolango pas a susut na misait

(Mk 1:29-34; Lk 4:38-41)

¹⁴ O Iesu i ruk una rumu anun o Pita, ra i tama a inumun o Pita, a ino, i misait nama pinino mararong, kura i inep taru una kabulu. ¹⁵ O Iesu i pam a lamano, ra a mararong i rop mut gusuni. A ino ra i katutur, ra numur i tabor o Iesu nama utna na inangon.

¹⁶ Ra in matanas i sa sup taru, di ben pat a susut na taro torom o Iesu ra a kum laulau na nion kura un det. I lakro ru a kum laulau na nion gusun det nama wasiso kut, ma i ulangolango pas det rop, ra det misait. ¹⁷ A utna ri i wanpat sur din pam sot pas a kum wasiso, ra a poropet Aisaia i sa wasiso taru uni lenri,

"I ut i los pas anundat a kum misait,
ma i rakon ru anundat a kum ngunungut." Ais
53:4

Det ra det nem na mur o Iesu

(Lk 9:57-62)

¹⁸ Ra o Iesu i tama a kunur na taro ra det tur talilis pasi, i watungi tan anun a kum nat na ususer lena, "Dat nan utong una ara papor tasi." ¹⁹ Ma ara tene ususer tagun a Warkurai i wan toromi, ra i watungi tano lena, "Tene Ususer, an mur ui una kum nubual rop ra un nan iai." ²⁰ Ra o Iesu i watungi tano lena, "A kum lomlom na pap anundet a kum tung ut, ma a kum piko kai anundet a kum pios ut, ikut a Nutun a Musano katu rumu na ininep." ²¹ Ma ara musano kai, tagun anun a taro na ususer i watungi tano lena, "Labino, un mulaot ru iau munung sur an nan, an por ru tar o tita." ²² Ikut o Iesu i watungi tano, "Un mur iau, ma un maked ru a kum minat det in por anundet a kum minat."

O Iesu i turbat a wuwu ma a top

(Mk 4:35-41; Lk 8:22-25)

²³ Ra o Iesu i kas una pot, anun a kum nat na ususer det kas numurunu. ²⁴ Numur a dekdek na wuwu doko i wanpat kisin ma i ragoti una du tasi. A top i tapak sapat netes una pot. Ikut o Iesu i inep dumun, ²⁵ ra det wan toromi, det wangun pasi, ma det inanos lena, "Labino, un ulaun dat. Dat na iru." ²⁶ Ma i watungi torom det lena, "Anumot a nurnur i natino doko. Sur asau ra mot ngara?" I katutur ra i turbat a wuwu ma a top, ra i mililo rop. ²⁷ Ra a kum nat na

ususer det kisin uni, ma det watungi lena, “Osi na ngas na musano mulus ri? A wuwu ma a top der mur anun a wasiso!”

O Iesu i lakro ru a kum laulau na nion gusun aru musano

(Mk 5:1-20; Lk 8:26-39)

²⁸ O Iesu i sot una ara papor tasi, una papor anun a taro Gadara. Aru musano ra a kum laulau na nion kura un der, der wan tagitong una kum kulam na minat, ra der wan barato i. Der ngalngalia doko, ma kataio i ser wan sakit tiro una kisapi ra. ²⁹ Der woiwoi lena, “Nutun o God, asau ra u nem na pami un mir? Pepetlai, u wan urin sur un ukadik met? Ke sot utmakai a bung na warkurai.” ³⁰ A kabo liur na boro det wangon milau kut tiro iai. ³¹ Ra a kum laulau na nion det saring o Iesu lena, “Ra un lakro ru met, un tulu ruk tar met utiro una kum boro.” ³² O Iesu i watungi tandet lena, “Mot wan!” Ra a kum laulau na nion det pirso gusun aru musano ra, ma det ruk taru una kum boro. A kum boro det kalabor pirso una palis sur a du tasi, ra det kongo rop.

³³ A taro ra det ser tabor a kabo liur na boro ra, det kalabor eno pas utiro utamon. Ra det wanpat, det inanos una kum utna rop ra i wanpat, ma un der kai, ra a kum laulau na nion numugu kura un der. ³⁴ A taro rop tagun a tamon ra, det wan sur det in tama o Iesu. Ra det tama pasi, det saring sur in nan gisen gusun anundet a papor.

9

O Iesu i ulangolango pas a musano ra a pinino i mat

(Mk 2:1-12; Lk 5:17-26)

¹ O Iesu i kas una pot, ra i wan kutus utiro una ara papor du tasi sur anun a tamon. ² Ra a ramano kum musano det los pat ara musano toromi, a pinino i mat, ma i inep taru kut una lu. O Iesu i tama anundet a nurnur, ra i inanos a musano ra lena, “Nutunglik, gong u ngara, di sa unus ru anum a kum sakino petutna.” ³ A ramano kum tene ususer tagun a Warkurai det wasiso etalai torom det ut lena, “A musano ri i watung laulau o God, uni i wasiso lar i o God.”

⁴ Ma o Iesu i tasman a nuknukin det, ra i ting det lena, “Sur asau ra mot nuknuk laulau?” ⁵ Osi na wasiso ra ke ngangitin sur an watungi? Pepetlai, an watungi lena, ‘Di sa unus ru anum a kum sakino petutna,’ o, an lena, ‘Un katutur, ma un nan?’ ⁶ A wasiso ra an watungi, an watungi sur mot in tasmani lena, o God i pitar a warkurai

torom a Nutun a Musano, sur in unus ru a kum sakino petutna nin upiso.” Ra i watungi torom a musano a pinino i mat lena, “Un katutur, un los anum a lu, ra un nan sur anum a rumu.” ⁷ I katutur mut, ra i wan sur anum a rumu. ⁸ A kunur na taro det tama i, ra det kisin doko uni, ma det rakon lekeleke pas o God, uni i pitar a dekdek lenri torom a taro.

O Iesu i kabo pas o Matiu

(Mk 2:13-17; Lk 5:27-32)

⁹ Ra o Iesu i wan nanan tagitiro iai, i tama pas ara musano, a risano o Matiu, i kis una rumu na los takis. O Iesu i inanos lena, “Un mur iau.” Ra o Matiu i katutur ma i muri.

¹⁰ Numur o Iesu ma anun a kum nat na ususer, det wangon tiro una rumu anum o Matiu. A susut na tene los takis ma a kum tene sakino det wan torom o Iesu, ra det wangon tomo nam det. ¹¹ Ra a kum Parisi det tama i, det ting anum a kum nat na ususer lena, “Sur asau ra anumot a tene ususer i wangon tomo nama kum tene los takis ma a kum tene sakino?”

¹² O Iesu i longoro i ra i watungi lena, “A dokta ke wanpat sur det ra det langolango. Awu! I wanpat sur det kut ra det misait. ¹³ Mot in nan, ma mot in sisio sur a kukurai ina wasiso ri tagun a Buk Tabu, ‘A nem a marmaris, ma ka nem a etabor ra di ser tuni.’ *Os 6:6* Uni ka wanpat sur an kabo pas a kum tene tokodos, awu. A wanpat sur an kabo pas a kum tene sakino.”

A iting una winewel

(Mk 2:18-22; Lk 5:33-39)

¹⁴ A kum nat na ususer anum o Jon det wan torom o Iesu, ra det tingi lena, “Sur asau ra met ma a kum Parisi met wewel, ikut anum a kum nat na ususer awu?” ¹⁵ O Iesu i balu det lena, “A kum paspasan a musano ra i nolin matok, det in domos pepetlai, ra kura utmakai i tomo nam det? Ikut tu bung in nanpat, ra din ben ru i gusun det, ra det in wewel maragom.

¹⁶ “Katutaio in mabon a du matok na malu tomo nama turaino ra i tararos, uni a du matok na malu in raros a turai na malu, ra in tararos bing. ¹⁷ Kataio in titior a matok na wain utiro unin turai na koto ra di pami namin pino meme, sako in nokoto in tupurus ma in laulau, ra a wain in tilingis. Din titior a matok na wain ut utiro unin matok na koto na wain, sur der rop der in kis wakak.”

O Iesu i ulaun pas a inolik, ma i ulangolango pas ara ino

(Mk 5:21-43; Lk 8:40-56)

¹⁸ Ra o Iesu i wasiso utmakai torom det, ara mugumugu i wan toromi, ra i kis butkeke sa numugu tano, ra i watungi lena, “A nutunglik a ino, unikutri i mat. Aiap, dar in nan ma un ubek a lamam sapat netes uni, sur in laun.” ¹⁹ Ra o Iesu i katuttur ra der wan, det tomo nam anun a kum nat na ususer.

²⁰⁻²¹ Ara ino ra i misait nama gap elar nama noino ma aru kilalo, i nuki lena, “Ra an tulani kut anun a saket, an langolango.” Ra i wan numur tan o Iesu, ma i tulan tar a sinisir ina saket anunu. ²² O Iesu i tur tupukus ra i tama a ino ra, ra i watungi tano lena, “Nutunglik, gong u ngara, anum a nurnur i sa ulangolango pas ui.” Ra una du bung ut ra, a ino ra i langolango mut.

²³ O Iesu i wanpat una rumu anun a mugumugu, ra i tama a taro ra det ese anundet a tupunuk una minat. Det wup a kum tual, ma a susut na taro kai det domos. ²⁴ I watungi tandet lena, “Mot in pirso saro i. A inolik ri awu sur i mat, i inep dumun kut.” Ra det urongon kut uni. ²⁵ Ra di sa tulu pirso ru tar a taro, o Iesu i ruk ra i pam a laman a inolik, ra i katuttur mut. ²⁶ A wasiso una utna ri i wan sarara una papor rop ra.

O Iesu i utamtama pas aru pulu

²⁷ O Iesu i wan tagitiro, ra aru musano, aru pulu, der muri, der kakabo sapat lena, “Nutun o Dewid, un maris mir.” ²⁸ Ra i ruk una rumu, aru pulu der wan toromi, ma i ting der lena, “Pepetlai, mur nurnur ut un iau sur an pam sot pas a utna ri?” Der balu i lena, “Ma, Labino.” ²⁹ Ra i pam arin matander ma i watungi lena, “Din pami torom mur, elar ut nama numur a nurnur.” ³⁰ Uniutra der tamtama. Ra o Iesu i sakbat dekdek tar der lena, “Gong mur inanos tar taio nami.” ³¹ Ikut, der wan ra der inanos nanan nam o Iesu una papor rop ra.

O Iesu i lakro ru a laulau na nion gusun ara ngat

³² Ra aru pulu der wan nanan utmakai gusun o Iesu, di ben tar ara musano bulung toromi, i ngat, ma a laulau na nion kura uni. ³³ O Iesu i lakro ru a laulau na nion gusuni, ra a musano ra i wasiso maragom. Ma a kunur na taro det kisin, ra det watungi lena, “Telek ri di tama a utna lenri nin o Israel.” ³⁴ Ikut a kum Parisi det watungi lena, “I ser lakro ru a kum laulau na nion nama dekdekin a labino anun a kum laulau na nion.”

A kum tene pasong ka det susut

³⁵ O Iesu i wan nanan una kum lamlabino tamon ma a kum natnat na tamon rop. Ra i ususer a taro una nundet a kum rumu na lotu, ma i warawai nama Wakak na Wasiso una matanitu anun o God, ma i ulangolango pas a taro gusun a kum wur ngas na misait rop. ³⁶ Ra i tama a kunur na taro, i maris doko det, uni i talara a nuknukin det, ma det pot na marmaris, elar kut nama kum sipsip ra katu tene tamtamabat anundet. ³⁷ Ra i watungi tan anun a kum nat na ususer lena, “A kinobot i sa makus, ma i sa labo doko, ikut kalako susut na tene pasong. ³⁸ I mo ra mot in saring a Labino, i ra a taman a kinobot, sur in tulu ru a kum tene pasong sur ana kinobot.”

10

A noino ma aru nat na ususer anun o Iesu

(Mk 3:13-19; Lk 6:12-16)

¹ O Iesu i kabo pas anun a noino ma aru nat na ususer ra i pitar a dekdek tandet sur det in lakro ru a kum laulau na nion, ma sur det in ulangolango pas a taro gusun a wur ngas na misait rop.

² Iri a kum risan a noino ma aru aposel: A mugano, o Saimon ara risano kai o Pita, dersino nam o Endru, o Jems ma o Jon dersino, aru nutnutun o Sebedi, ³ o Pilip, o Batolomiu, o Tomas, o Matiu a tene los takis, o Jems a nutun o Alpius, ma o Tadius, ⁴ ma o Saimon ara tagun a kum Silot, * ma o Judas Iskariot, i ra i usobor tar o Iesu.

O Iesu i tulu ru a noino ma aru nat na ususer

(Mk 6:7-13; Lk 9:1-6)

⁵ O Iesu i tulu ru a noino ma aru nat na ususer, ra i watungi tandet lena, “Gong mot wan torom a taro ra awu sur a taro Israel, ma gong mot wan una kum tamon anun a kum te Samaria. ⁶ Mot in nan kut torom a taro Israel, ra det raro elar nama kum sipsip. ⁷ Ra mot nan, mot in warawai nanan lenri, ‘A matanitu tagisapat una langit i sa milau.’ ⁸ Mot in ulangolango pas a kum misait, ma mot in ulaun pas a kum minat, mot in ulangolango pas a kum lepra, ma mot in lakro ru a kum laulau na nion. Di tabor oros mot kut, lenkai ra, mot in etabor oros kut. ⁹ Gong mot silapo tu mani una numot a kum malu. ¹⁰ Gong mot los tu rat una numot a inawan, gong tin namalu na kelkeles, gong tu su, ma gong tin nubuku.

9:20-21: Mt 14:36 **9:27:** Mt 20:29-34 **9:30:** Mt 8:4 **9:33:** Mk 2:12 **9:34:** Mt 12:24; Mk 3:22; Lk 11:15
9:35: Mt 4:23; Mk 1:39 **9:36:** Mt 14:14; Nam 27:17; 1 Kin 22:17; Sek 10:2; Mk 6:34 **9:37:** Lk 10:2 **10:1:** Mk 6:7; Lk 9:1 * **10:4:** Silot i a risan a taro, ra det tur tomo, uni det nemi sur det in lakro ru a gapman Rom. **10:6:** Jer 50:6 **10:7:** Mt 3:2; 4:17; Lk 10:9, 11 **10:9:** Lk 10:4 **10:10:** Lk 10:7; 1 Kor 9:14

Uni i tokodos sur din tabor a tene pinapam nama ana utna.

¹¹ “Ra mot in nanpat una kum lamlabino tamon, ma a kum natnat na tamon, mot in sisiso sur taio ra i wakak, ma mot in kis nisanos tuk una bung ra mot in nan gusun a tamon ra. ¹² Ra mot in nanpat tiro un tu rumu, mot in wasiso na ugasgas pas det. ¹³ Ra a taro tagun a rumu ra det in gas pas mot, mot in ruk ma mot in watungi lena, ‘A malmal in kis torom mot.’ Ikut, ra ka det in gas pas mot, anumot a malmal, mot in los melet pasi. ¹⁴ Ra taio ken gas pas mot, ma ken longoro anumot a wasiso, ra mot in nan gusun anun a rumu, o a tamon ra, mot in tang ru a kubus gusun a kikumot.† ¹⁵ A inanos mot nama lingmulus, una bung na warkurai, a warkurai torom a tamon ra, in laulau doko taun a warkurai torom a taro Sodom ma o Gomora.

A kum ngas na ngunungut ra in nanpat (Mk 13:9-13; Lk 21:12-17)

¹⁶ “Tama i, a tulu ru mot elar nama kum sipsip epotor tan a kum ngalngalia na pap. I mo ra mot in mananos wakak elar nama kum sui, sur gong taio i ben raro mot, ma mot in tokodos elar nama kum tabun, sur gong taio i takun mot. ¹⁷ Mot in tumarong mot, uni a taro det in pitar mot ulaman a kum tene warkurai, ma det in miras mot una nundet a kum rumu na lotu. ¹⁸ Ma din dat pas mot sur a warkurai sa numugu umatan a kum lamlabino mugumugu ma a kum king, uni mot anungi. Mot in wasiso talapor un iau torom det ma torom a taro ra awu sur a taro Juda. ¹⁹ Ra din dat pas mot, gong mot nuknuk bing sur asau ra mot in watungi, ma mot in wasiso pepetlai, uni una du bung ut ra, o God in unuk tar mot nama wasiso ra mot in watungi. ²⁰ Awu sur mot ra mot in wasiso, a Nion a Tamamot ut in unuk tar mot nama sau ra mot in watungi.

²¹ “Taio in mulaot ru tu tisino sur din un doko i, ma tu musano in mulaot ru tu nutunu sur din un doko i. Ma a kum nat det in tur na inaim torom a tamandet ma a nandet ma det in mulaot ru a tamandet ma a nandet sur din un doko der. ²² Ma a taro rop det in nget mot uni mot anungi, ikut osi ra in tur dekdek tuk anun a nilaun in rop, o God in ulauni. ²³ Ra det in ban laulau mot un tu tamon, mot in kalabor utiro un tu tamon gisen. A inanos mot nama

lingmulus, ra ka mot in nan rop utmakai utiro una kum tamon nin o Israel, a Nutun a Musano in nanpat.

²⁴ “A nat na ususer ke labo taun anun a tene ususer, ma a tultul kai, ke labo taun anun a labino. ²⁵ I topasi sur a nat na ususer in elar kut nam anun a tene ususer ma a tultul in elar nam anun a labino. Ra di sa watung iau nam o Belsebul,† mot kai ra mot kis tomo nam iau, din watung mot nama kum rising i sakino taun a rising ri.

Mot in ngara sur o God kut (Lk 12:2-7)

²⁶ “Gong mot ngaran a taro. A kum utna rop ra di rakup bat tari, numur in kis talapor, ma a kum utna rop ra i kis eno, numur in nanpat puaso. ²⁷ A wasiso ra a inanos mot nami una dumirum, mot in inanos nami una waspi, ma a wasiso ra di wasisik kut nami torom mot, mot in tur sapat netes una rumu, ma mot in watung puaso i. ²⁸ Gong mot ngaran det ra det um doko i kut a pinindi, ikut ka det in um doko lar pas a niondi. Mot in ngara sur o naro ra in pet lar pasi sur in ban laulau a pinindi ma a niondi kai una labino sungun. ²⁹ Di ser kul arin nipiko liklik nama nat na mani kut, niko? Ikut ka tinolik tagun der in iru, ra a Tamamot ke mulaot uni. ³⁰ I lingmulus sakit, o God i sa luk rop tar a kum tekteken iwu na lorimot, ma i sa tasman tari. ³¹ I mo ra gong mot ngara, uni mot labo sakit umatan o God, taun a susut na piko.

Osi ra i watung puaso o Iesu ma osi ra i ipul ru i

(Lk 12:8-9)

³² “Osi ra in watung puaso i umatan a taro lena, i tagun iau, iau kai an watung puaso i umatan o Tita ra i kis sapat una langit lena, i tagun iau. ³³ Ikut osi ra in ipul ru iau umatan a taro, iau kai an ipul ru i umatan o Tita, ra i kis sapat una langit.

O Iesu ke wanpat sur in pitar a malmal (Lk 12:51-53; 14:26-27)

³⁴ “Gong mot nuki lena a wanpat sur an pitar a malmal una rakrakon bual. Awu, ka wanpat sur an pitar a malmal, a wanpat namin totok na inaim. ³⁵ A wanpat sur a taro det in kis na inaim, kibino un iau.

‘A nat musano in nget o tamano, ma a nat na ino in nget o nano, ma a nolin na ino in nget o tubunu.

³⁶ Det tamano det in ebar etetalai tomo nam det.’ *Mai 7:6*

10:12: Lk 10:5-6 **10:14:** Lk 10:10-12; Ap 13:51 † **10:14:** A petutna ra di tang ru a kubus gusun a kikindi, i a utumarong torom det, ra ka det nurun una wasiso anun o God, det in tur una nun a warkurai. **10:15:** Mt 11:24; Jud 1:7 **10:16:** Lk 10:3; Rom 16:19 **10:17:** Mk 13:9-11; Lk 12:11-12; 21:12-15 **10:19:** Jn 14:26 **10:21:** Mai 7:6; Mt 10:35; Mk 13:12; Lk 21:16 **10:24:** Lk 6:40; Jn 13:16; 15:20 **10:25:** Mt 9:34; 12:24; Mk 3:22; Lk 11:15 † **10:25:** Belsebul i ara risan o Satan. **10:26:** Mk 4:22; Lk 8:17 **10:28:** Jem 4:12 **10:31:** Mt 6:26 **10:33:** Mk 8:38; Lk 9:26; 2 Tim 2:12

³⁷ “Osi ra i nem doko o tamano ma o nano, ikut anun a marmaris torom iau ke labo, ke topasi sur i anung a nat na ususer. In wakak ra anun a marmaris torom iau in labo taun anun a marmaris torom o tamano ma o nano. Ma osi ra i nem doko o nutunulik, a nat na musano o a ino, ikut anun a marmaris torom iau ke labo, ke topasi sur i anung a nat na ususer. In wakak ra anun a marmaris torom iau in labo taun anun a marmaris torom o nutunulik. ³⁸ Osi ra ke rakon pas anun in nanai kutus sur in mur iau, ke topasi sur i anung a nat na ususer. ³⁹ Osi ra i maris bat anun a nilaun, in iru, ma osi ra ke maris bat anun a nilaun uni i tagun iau, in laun.

Osi ra in gas pas tu nat na ususer anun o Iesu in los a ikul

(Mk 9:41)

⁴⁰ “Osi ra in gas pas mot, i gas pas iau utkai, ma osi ra i gas pas iau, i gas pasi utkai o naro ra i tulu ru iau urin. ⁴¹ Osi ra in gas pas a poropet uni i tasmani lena, i a poropet, in losi utkai a ngas na ikul elar nama poropet in losi. Ma osi ra in gas pas a tene tokodos, uni i tasmani lena, i a tene tokodos, in losi utkai a ngas na ikul elar nama tene tokodos in losi. ⁴² Osi ra in tabor anung tu nat na ususer, ra ke sot umatan a taro, nam lakalik kotokoto na danim, uni i tasmani lena, i anung a nat na ususer, a inanos mot nama lingmulus, i kai in losi ut anun a ikul.”

11

O Iesu ma o Jon a Tene Baptaiso

(Lk 7:18-35)

¹ Ra o Iesu i sa wasiso rop taru torom anun a noino ma aru nat na ususer, i wan tagitiro sur in ususer a taro ma in warawai una kum tamon, tong una papor Galili. ² O Jon i kis una karabus ma i longoro a kum pinapam anun o Karisito. Ra i tulu ru anun a kum nat na ususer sur det in tingi lena, ³ “Ui mo, ra di wasiso mugu taru un ui lena, un nanpat, o met in kis langlang utmakai sur taio?” ⁴ Ra o Iesu i balu det lena, “Mot in milet melet, ma mot in inanos o Jon una sau ri mot sa longoro i ma mot sa tama tari: ⁵ A kum pulu det sa tamtama, det ra a kikindet i mat det sa wan tokodos, a kum lepra det sa langolango, a kum kutkut det sa longoro, a kum minat det sa laun, ma di warawai nama Wakak na Wasiso torom a kum sibo na taro. ⁶ Osi ra i tama a kum utna ri a pami, ma anun a nurnur ke puku, i sa dan.”

⁷ Ra a kum nat na ususer anun o Jon det wan, o Iesu i inanos a kunur na taro un o Jon lena, “Una bung ra mot wan una nubual kalako taro uni torom o Jon, asau ra mot tamtama suri? Kutiro in nere ra i erere una wuwu? Awu. ⁸ Asau ra mot wan sur mot in tama i? A musano ra i emar nama kum wakak na malu? Awu. Tama i, det ra det ser emar nama kum wakak na malu det ser kis una kum rumu na king. ⁹ Asau ra mot wan sur mot in tama i? A poropet? Ma! A watungi tamot, o Jon i labo sakit taun a kum poropet. ¹⁰ Di sa tumtumus taru uni una Buk Tabu lena,

“Tama i, iau an tulu ru anung a tene los wasiso sur in mugu tam, i ra in waninar anum a kisapi numugu tam.” *Mal 3:1*

¹¹ A inanos mot nama lingmulus, o Jon a Tene Baptaiso i labo sakit taun a taro rop taginin upiso. Ikut osi ra i natino sakit una matanitu tagisapat una langit, i labo taun o Jon.

¹² “Turpasi una kilalo ra o Jon a Tene Baptaiso i turpas a warawai ma tuk uniri, a matanitu tagisapat una langit i dedek sur in lubang, ma a dedek na taro det dedek doko nama inaim sur det in turbati. ¹³ A kum poropet ma a Warkurai anun o Moses det upuaso a wasiso anun o God, tuk una kilalo ra o Jon i turpas anun a pinapam uni. ¹⁴ Det wasiso una poropet Elaija ra in nanpat. Ra mot nem na nurnur una wasiso ra, uniri, o Jon i sa pam sot pasi, uni i a poropet Elaija ra in nanpat. ¹⁵ Osi ra arin talngano kura, i wakak sur in longoro nami.

¹⁶ “An elaro a taro tagun uniri nama sau? Det elar nama kum nat liklik ra det kis una balano tamon ma det kakabo torom a kum paspasan det lena,

¹⁷ “Met wup tual,

ikut ka mot lagori,

ma met kele a kelekele na tupunuk,

ikut ka mot tangis.”

¹⁸ O Jon i wanpat, ke wan tu wakak na utna ma ke inum a wain, ra det watungi uni lena, ‘A laulau na nion kura uni.’ ¹⁹ A Nutun a Musano i wanpat, i wangon ma i inum, ra det watungi uni lena, ‘Tama i, a musano ri a tene inangon ma a tene ininum, a pasan a kum tene los takis ma a kum tene sakino.’ Ikut a kum pinapam anun o God i upuaso i lena, anun a mananos i a mananos mulus.”

A warkurai na minabalu torom det ra ka det nukpukus

(Lk 10:13-15)

²⁰ O Iesu i wasiso na kankan torom a taro una kum tamon ra i sa pam tar anun a susut na utna na ukisin doko tiro iai, uni ka det nukpukus. ²¹ I watungi lena, "In laulau torom mot a taro Korasin, ma in laulau kai torom mot a taro Betsaida. Ra gunuk di sa pam tar a kum utna na ukisin ri torom a taro Tair ma o Saidon, elar nami ra a sa pam tari torom mot, kanapi det in nukpukus lakit ma det in tobo, det in emar nama kum malu na tupunuk ma det in talus a pinindet nama kubus na sungun. Ikut mot, ka mot nukpukus. ²² A watungi tamot lena, una bung na warkurai, a warkurai torom mot a taro Korasin ma o Betsaida, in laulau doko taun a warkurai torom a taro Tair ma o Saidon. ²³ Ma mot kai a taro Kapernaum, pepetlai, mot nuki lena din ulabo pas mot usapat netes? Awu, din woro pirso ru mot kut una labino sungun. Gunuk ra di sa pam tar a kum utna na ukisin torom a taro Sodom, elar nami ra di sa pam tari torom mot, kanapi o Sodom kuri utmakai i. ²⁴ A watungi tamot lena, una bung na warkurai, a warkurai torom mot a taro Kapernaum in laulau doko taun a warkurai torom a taro Sodom."

Dat in nan torom o Iesu sur in umana dat

(Lk 10:21-22)

²⁵ Una du bung ra, o Iesu i watungi lena, "Tita, ui a Labino tagun a langit ma a rakrakon bual rop. A watung ulabo pas ui, uni u munu a kum utna ri tan a kum tene mananos ma det ra det tastasman, ma u upuaso i kut, torom det ra det elar nama kum nat liklik. ²⁶ A lingmulus, Tita, uni anum a nemnem i lenutra.

²⁷ "O Tita i sa pitar tar a kum utna rop torom iau. Katutaio i tasman o Nutunu, o Tamano kut i tasmani, ma kataio kai i tasman o Tamano, o Nutunu kut i tasmani, ma det kai ra o Nutunu i nemi sur in upuaso o Tamano torom det.

²⁸ "Mot rop ra pinimot i ngoro ma a kum mamaut i monong mot, mot in nan torom iau, sur an umana mot. ²⁹ Mot in los anung in nikip, ma mot in ususer tang, uni a magirang i wowowon ma a ser unatino pas iau. Mot in los in nikip ri sur a niomot in mana. ³⁰ Uni in nikip ri an pitari tamot ke ngangitin, ma a niloposino ke maot."

12

O Iesu i a Labino tagun a Bung na Sabat (Mk 2:23-28; Lk 6:1-5)

¹ Numur, un ara Bung na Sabat, o Iesu i wan potur una kum kinobot na wit. Anun a kum nat na ususer det murak, ra det turpas a kumut a ramano kum turunu wit ma det wani. ² Ra a kum Parisi det tama i, det watungi tano lena, "Tama i, anum a kum nat na ususer det pam a utna ri, ra ke tokodos elar nama warkurai tagun a Bung na Sabat." ³ O Iesu i balu det lena, "Pepetlai, ka mot luki utmakai asau ra o Dewid i pami? Det nama taro ra det wan tomo det murak, ⁴ ra i ruk una rumu anum o God, ra i wan a beret ra di sa pitar tari torom o God. Ma det kai ra det wan tomo nami det wangon taguni. A beret ra, a warkurai taguni, i lenri, a kum tene etabor kut torom o God det in nangan taguni, ma a taro oros awu. ⁵ Pepetlai, ka mot luki utmakai a wasiso tagun a Buk na Warkurai? I watungi lena, a kum tene etabor torom o God det ser papam una rumu na etabor una Bung na Sabat, ikut ka det raro uni. ⁶ A watungi tamot lena, ara kuri nin i labo taun a rumu na etabor. ⁷ Di sa tumus tari una Buk Tabu lenri, 'A nem a marmaris, ma ka nem a etabor ra di ser tuni.' *Os 6:6* Ra gunuk mot sa tasman a kukurai ina wasiso ri, ka mot in takun det ra ka det raro. ⁸ Uni a Nutun a Musano i a Labino tagun a Bung na Sabat."

O Iesu i ulangolango pas a musano ra a lamano i kong

(Mk 3:1-6; Lk 6:6-11)

⁹ Numur o Iesu i wan tagitiro, ra i ruk una nundet a rumu na lotu. ¹⁰ Ara musano kura iai, a lamano i kong. Det sisio sur tu utna det in takun o Iesu nami, ra det tingi lena, "Pepetlai, i tokodos ut elar nam anundat a Warkurai sur din ulangolango pas taio una Bung na Sabat o awu?" ¹¹ Ma i balu det lena, "Ra taio tagun mot anunu tu sipsip in puku taru unin nutung una Bung na Sabat, pepetlai, ken pam ukai pasi, ma ken dat toto melet pasi? ¹² A musano i labo taun a sipsip. Lenra i tokodos sur din pam a wakakino una Bung na Sabat." ¹³ Ra i inanos a musano lena, "Kodos a lamam." I kodosi, ra a lamano i tokodos melet, elar nam ara lamano ra i wakak. ¹⁴ A kum Parisi det pirso, ma det wasiso tomo sur tu kisapi ra det in um doko o Iesu uni.

A tutul ra o God i pilok pasi

¹⁵ Ra o Iesu i tasmani lena det wasiso tomo sur det in um doko i, i wan tagitiro iai. A labino kunur na taro det muri, ma i ulangolango pas det rop ra det misait. ¹⁶ Ma

i turbat det, sur gong det inanos tar taio lena, i osi. ¹⁷ I watungi lenra sur in pam sot pas a wasiso anun o God ra o Aisaia a poropet i sa wasiso mugu taru uni lena,

¹⁸ "Iri anung a tultul ra a sa pilok pasi, anung a nat na wakak, a gas doko nami.

An uruk tar a Niong uni, ra in upuaso a warkurai ra i tokodos torom a taro tagun a kum gapman.

¹⁹ Ken wasiso na kankan, ma ken ugaia, ma ka din longoro in nalngano una kum kisapi.

²⁰ Ken pak in nere ra i tulukun, ma ken wup doko a lam ra ke kunabor wakak.

In pami lenra tuk ra a tokodos na warkurai in winim pas a sakino.

²¹ A taro tagun a kum gapman det in nurnur una risano ma det in kis langlang sur in ulaun det." Ais 42:1-4

O Iesu ma o Belsebul
(Mk 3:20-30; Lk 11:14-23)

²² Det ben pat ara musano torom o Iesu, i ngat ma i pulu, ma a laulau na nion kura uni. O Iesu i ulangolango pasi, ra a musano ra, i wasiso ma i tamtama kai. ²³ Ra a taro rop det kisin, ma det iting lena, "Kutiro a Nutun o Dewid* ut ri?" ²⁴ Ikut a kum Parisi det longoro i ra det watungi lena, "A musano ri, i ser lakro ru a kum laulau na nion nama dekdekin o Belsebul, a labino anun a kum laulau na nion."

²⁵ O Iesu i sa tasman a nuknukin det, ra i watungi tandet lena, "Ra tu gapman det melet ut det in waim etalai, a gapman ra in rop kut. Ra tu tamon, o lako taro tagun tu rumu, det in waim etalai melet kut, ka det in kis tomo melet mo. ²⁶ Ra o Satan in lakro ru anun a kum tultul, det in nan sarara. Ra i lenra, anun a gapman in tur dekdek pepetlai? ²⁷ Ra iau an lakro ru a kum laulau na nion nama dekdekin o Belsebul, anumot a taro det ser lakro ru a kum laulau na nion nama dekdekin osi? Anundet a pinapam ut in upuaso i lena, anumot a etakun ke lingmulus. ²⁸ Ikut, ra an lakro ru a kum laulau na nion nama dekdekin a Nion o God, in ese i lena a matanitu anun o God i sa wanpat torom mot.

²⁹ "Kataio in pet lar pasi sur in ruk una rumu anun tu dekdek na musano, ma in los pas a kum utna tagitiro una nun a rumu, ra ken ker ukai mugu tari. Ra ut in ker

ukai mugu tari, in los a kum utna maragom anun a musano ra.

³⁰ "O naro ra ka mir tar pasano mir ebar. Ma o naro ra ke warut iau u eben, i lu sarara ru a taro kut. ³¹ Ra a watungi tamot lena, din unus ru a kum sakino petutna rop anun a taro, ma anundet a kum sakino wasiso kai un o God, ikut ra det in wasiso laulau una Tokodos na Nion ka din unus lar pasi. ³² Osi kai ra in watung tar tu sakino wasiso una Nutun a Musano, din unus ru i kut, ikut osi ra in wasiso laulau una Tokodos na Nion, ka din unus lar pasi, una nilaun uniri ma una nilaun numur kai.

In nanai ma a wino
(Lk 6:43-45)

³³ "In wakak na duwai, i ser wu a wakak na wino, ma in laulau na duwai, i ser wu a laulau na wino. Din tama lele in nanai tagun a wino. ³⁴ Mot a kum nutnutun a kum sui! Mot ra a laulau na taro, mot in watung petlan tu wakak na wasiso? Uni a wan a taro i watung puaso a petutna ra i bukus una nundet a nilaun. ³⁵ A wakak na musano i ese anun a wakak na petutna tagun a wakakino ra i kis una nun a nilaun, ma a laulau na musano kai, i ese anun a sakino petutna tagun a sakino ra i kis una nun a nilaun. ³⁶ A watungi tamot lena, a kum wasiso laulau rop ra a taro det sa watung tatari, kura numur din ting det uni una bung na warkurai. ³⁷ Ra una bung ra, anum a wasiso ut in ulangolango pas ui, o in ban laulau ui."

Det saring o Iesu sur in pam tu ukinalong

(Mk 8:11-12; Lk 11:29-32)

³⁸ Numur ara taro tagun a kum tene ususer tagun a Warkurai ma a kum Parisi det watungi tano lena, "Tene Ususer, un pam tu ukinalong sur met in tama i." ³⁹ I balu det lena, "A taro tagun uniri, a sakino taro, anundet a nilaun i bakbak gusun o God. Det sasaring sur tu ukinalong, ikut ka din pam taio torom det. Din pam a ukinalong kut elar nami ra di sa pam tari un o Jona a poropet. ⁴⁰ Uni o Jona i laun a tulu bung unin balan a labino kiripo, ma lenkutkai ra a Nutun a Musano in inep pas a tulu bung ubalan a piso. ⁴¹ Una bung na warkurai, a taro Niniwe det in tur ma det in takun dekdek a taro tagun uniri, uni det nukpukus una warawai anun o Jona, ma o naro ra i labo taun o Jona kuri ut nin, ikut ka mot longoro i. ⁴² Una bung na warkurai, a kwin tagitong una matmatano tobar in

12:18: Mt 3:17 * **12:23:** A taro Juda det ser watung a Mesaia a Nutun o Dewid. **12:24:** Mt 9:34; 10:25
12:28: Ap 10:38; 1 Jon 3:8 **12:30:** Mk 9:40; Lk 9:50 **12:31:** Ibr 6:4-6 **12:33:** Mt 7:16-20 **12:34:** Mt 3:7; 15:18; Lk 3:7; 6:45 **12:38:** Mt 16:1; Lk 11:16; Jn 6:30 **12:39:** Mt 16:4; Mk 8:12 **12:40:** Jna 1:17 **12:41:** Jna 3:5 **12:42:** 1 Kin 10:1-10

tur ma in takun dekdek a taro tagun uniri, uni i wan ut tagitiro bakkak sur in longoro a mananos anun o king Solomon, ma o naro ra i labo taun o Solomon kuri ut nin, ikut ka mot longoro i.

A laulau na nion i millet melet
(Lk 11:24-26)

⁴³ “Ra tu laulau na nion in pirso pas gusun tu musano, in nan una kum nubual ra kalako danim iai, sur in mana, ikut ken sio pas tu nubual sur in mana uni. ⁴⁴ Ra in watungi lena, ‘An millet melet sur anung a rumu, ra a sa pirso pas gusuni.’ Ra in nanpat, in tama i ra i sa belbel, di sa surupu tari, ma di sa ukodos tari. ⁴⁵ Numur in nan ra in ben melet pas a wonom mawit na laulau na nion, ra det laulau sakit tano, ma det in ruk rop taru una rumu ra, ma det in kis uni. Ma a nilaun anun a musano ra in laulau sakit taun a nilaun ra numugu i utur ukai i. In lenkutkai ra torom a laulau na taro tagun uniri.”

O nan o Iesu ma a kum tistisino
(Mk 3:31-35; Lk 8:19-21)

⁴⁶ Ra o Iesu i wasiso utmakai torom a kunur na taro, o nano ma a kum tistisino det wanpat, ma det tur taru kut nago upiso, uni det nem na wasiso tomo nami. ⁴⁷ Ma ara i inanos o Iesu lena, “O nam ma a kum tistisim kunago det tur nago upiso. Det nem na wasiso tomo nam ui.”[†] ⁴⁸ Ra i balu i lena, “Osi o nang, ma osi det a kum tistising?” ⁴⁹ Ra i kodos a lamano torom anun a taro na ususer ma i watungi lena, “Tama i, det ri o nang ma a kum tistising!” ⁵⁰ Uni osi ra i ser mur a nemnem anun o Tita ra i kis sapat una langit, i ra o tising a musano, ma o tising a ino, ma o nang.”

13

A wasiso elelar una tene minarut
(Mk 4:1-9; Lk 8:4-8)

¹ Una bung ra, o Iesu i pirso gusun a rumu ra i wan ma i kis tiro una usalin ina du tasi Galili. ² A labino kunur na taro det tur tallis pasi. Ra i kas una pot ra i kis taru uni, ma a taro rop det tur nago korot una usalin. ³ I wasiso torom det una susut na utna nama kum wasiso elelar. I watungi lena, “A tene minarut i wan sur in sapro a kum pitino wit. ⁴ Ra i sapro nanan a kum pitino wit, a ramano det puku una kisapi, ra a kum piko det ro pat ma det wan ru i. ⁵ A ramano kai det puku una nubual na watat, ra kalako susut na piso uni. Det lubung pat lakit, uni a piso ke but. ⁶ Ikut ra a suan i sisio pat, i rang det ra

det main ma det marang rop, uni kalako wakakorin det. ⁷ A ramano kum pitino wit det puku epotor una kum kuikui, ra a kum kuikui det lubung ma det rau bat pas det. ⁸ Ikut a ramano kum pitino kai det puku una wakak na piso ra det wu. A ramano det wu ara mar na windet, a ramano kai a wonom na noino, ma a ramano a tulu noino. ⁹ Osi ra arin talngano kura, i wakak sur in longoro nami.”

A kibino ra o Iesu i wasiso nama kum wasiso elelar
(Mk 4:10-12; Lk 8:9-10)

¹⁰ Anun a kum nat na ususer det wan toromi ma det tingi lena, “Sur asau ra u ususer a taro nama kum wasiso elelar?” ¹¹ Ma i balu det lena, “O God i sa pitar tar a mananos tamot, sur mot in talapor una kum wasiso na pidik una matanitu tagisapat una langit. Ikut, ke pitari torom a taro rop. ¹² Uni osi ra i pam ukai a mananos uni, din tabor meleti nama labino, ma in mananos bing. Ma osi ra ke pam ukai tu mananos uni, din rakon ru i utkai asau lik ra kura i pam ukai i. ¹³ A ususer det nama kum wasiso elelar, uni

det tamtama ma det tamtama, ikut ka det tama lele i,

det longoro ma det longoro, ikut ka det longoro lele i, ma ka det tasmani.

¹⁴ A wasiso na poropet anun o Aisaia i sa sot un det, ra i watungi lena,

‘Mot in longoro ma mot in longoro, ikut ka mot in longoro lele i,

mot in tamtama ma mot in tamtama, ikut ka mot in tama lele i.

¹⁵ Uni a balan a taro ri i dekdek, ma a taltalngan det i kutkut,

ma a matmatan det i pulu.

Ra gunuk det in tamtama lele nama matmatan det,

ma det in longoro lele nama taltalngan det,

ma det in tastasman nama nuknukin det,

sako det in tupukus torom iau, ma iau ut, an ulaun pas det.’ *Ais 6:9-10*

¹⁶ Ikut mot, mot dan, uni mot tamtama ut nama kum matmata mot, ma mot longlongoro ut nama kum taltalnga mot kai.

¹⁷ A inanos mot nama lingmulus, numugu a susut na poropet ma a susut na tene tokodos det kalkal doko sur det in tama a kum utna ri a pami umatamot, ikut ka det tama i. Ma det kalkal doko kai sur det in longoro a kum utna ri mot longoro i, ikut ka det longoro i.

O Iesu i palos a kukurai ina wasiso elelar ina tene minarut

(Mk 4:13-20; Lk 8:11-15)

¹⁸ “Mot in longoro a kukurai ina wasiso elelar ina tene minarut. ¹⁹ Osi ra i longoro a wasiso una matanitu tagisapat una langit, ma ke mananos uni, i elar nama kum pitino wit ra det puku una kisapi. A Laulau na Musano i wanpat ra i rakon ru a wasiso ra di sa marut tari unin balano. ²⁰ Ma a kum pitino ra det puku una nubual na watat, det elar nama musano ra i longoro a wasiso, ra uniutra, i pam ukai i nama gasgas. ²¹ Ikut a wasiso ke kis unin balano, ma a musano ra ken tur suano i, elar namin wit ra kalako wakakorino. I turpasi i wakak, ikut in puku lakit una du bung ra a kum mamaut in nanpat, ma din ban laulau i, uni i nurnur una wasiso anun o God. ²² A kum pitino ra det puku epotor una kum kui kui, i elar nam ara musano ra i longoro a wasiso, ikut a labino nuknuk sur a wakak na kinkinis nin upiso, ma a kum usobor tagun a kum ululeng taginin una rakrakon bual, i rau bat a wasiso anun o God, ra ke wu lako wino. ²³ Ikut a kum pitino ra det lubang sapat una wakak na piso, det elar nam ara musano ra i longoro a wasiso, ma i mananos uni. In wu ara mar, o a wonom na noino, o a tulu noino wino.”

A wasiso elelar una wit ma a karapa

²⁴ O Iesu i watung ara wasiso elelar bulung torom det lena, “A matanitu tagisapat una langit i elar nama musano ra i sapro a kum wakak na pitino wit una nun a kinobot. ²⁵ Ra a taro det inep, anun a ebar i wanpat ra i sapro tar a kum pitino karapa ubalan a kum wit, ra i wan. ²⁶ A pitino wit i lubang pat ma i ling na wu, ra di tama i utkai a karapa i lubang ubalano. ²⁷ A kum tultul anun a taman a kinobot det wan toromi, ma det watungi tano lena, ‘Labino, pepetlai, a kum wakak na pitino wit rop kut, ra u sapro tari una num a kinobot? Tagai kai a kum karapa?’ ²⁸ I balu det lena, ‘A ebar i pam a petutna ra.’ Ra det tingi lena, ‘U nemi sur met in nan, ma met in gat rop ru det?’ ²⁹ I turbat det lena, ‘Gong munung, sako mot in gat tomo ru i nama kum wit. ³⁰ Madek ru i, det in lubang tomo tuk una kalang na pasong. Una bung ra, an watungi tan a kum tene pasong lena: Mot in rakon mugu ru a kum karapa, mot in ker tomo tar a kum kimkibino sur din tun ru det una sungun. Ra numur mot in los tomo i bulung a kum wit una nung a rumu na ululeng.’”

A wasiso elelar unin pitino mastad ma a is

(Mk 4:30-32; Lk 13:18-21)

³¹ O Iesu i watung ara wasiso elelar bulung tandet lena, “A matanitu tagisapat una langit i elar namin pitino mastad, ra ara musano i los pasi, ma i marut tari una nun a kinobot. ³² I natino taun a kum pitino duwai rop, ikut ra i lubang, i labo taun a kum duwai na inangon rop. Ma a kum piko det ser pam pios una kum kanokano.”

³³ O Iesu i watung ara wasiso elelar bulung tandet lena, “A matanitu tagisapat una langit i elar nama is, ra ara ino i rakon pasi, ma i pam tomo tari nama labino palawa, ra a palawa rop i mubus nami.”

³⁴ O Iesu i ususer a kunur na taro nama kum wasiso elelar, ma ke wasiso torom det nam tu se wasiso, a wasiso elelar rop kut.

³⁵ I watungi lenra sur din pam sot pas a wasiso anun a poropet lena,

“An wasiso nama kum wasiso elelar,

an watung a kum utna ra i kis eno, turpasi numugu utmakai, ra o God i ukis a rakrakon bual.” *Sng 78:2*

O Iesu i palos a kukurai ina wasiso elelar una wit ma a karapa

³⁶ Numur o Iesu i wan gusun a kunur na taro, ra i ruk una rumu. Anun a kum nat na ususer det ruk toromi ma det inanos lena, “Un palos a kukurai ina wasiso elelar ri tamet una karapa ra i lubang ubalan a kinobot.” ³⁷ I balu det lena, “O naro ra i sapro a kum pitino wit i a Nutun a Musano. ³⁸ A kinobot, i a rakrakon bual, ma a kum wakak na pitino wit, det a taro tagun a matanitu tagisapat una langit, ma a kum karapa, det a kum nutnutun a Laulau na Musano, ³⁹ ma a ebar ra i sapro det, i o Satan. A kalang na pasong, i a ururop ina rakrakon bual, ma a kum tene pasong, a kum ensel. ⁴⁰ A kum tene pasong det los tomo a kum karapa ra det tun ru det una sungun. In lenkutkai ra din pami una ururop ina rakrakon bual. ⁴¹ A Nutun a Musano in tulu ru anun a kum ensel, ma det in rakon rop ru a kum utna ra i ben raro a taro, ma det kai ra det ser pam a sakino. ⁴² Ma det in woro det una labino sungun. Det in tangtangis ma det in ungingit lokondet iai. ⁴³ Ma a kum tene tokodos det in sisio elar namin nusuan una matanitu anun a Tamandet. Osi ra arin talngano kura, i wakak sur in longoro nami.

A wasiso elelar una utna ra a matano i ka

⁴⁴ “A matanitu tagisapat una langit i elar nama utna ra a matano i ka doko, ra di munu tari una kinobot. Ma ara musano i sio pasi ma i munu melet tari. Ra i wan nama gasgas, ma i siuru rop ru anun a kum utna, ra i kul pas a kinobot ra nami.

⁴⁵ “A matanitu tagisapat una langit i elar kai nam ara tene siuru, i sisio sur a kum wat kura ubalan a kabokabol, ra a matandet i ka. ⁴⁶ Ra i sio pas ara wat ra a matano i ka doko, i siuru rop ru anun a kum utna, ma i kul pas a wat ra nami.

A wasiso elelar una uben

⁴⁷ “A matanitu tagisapat una langit i elar kai nama uben, ra di woro tari sa utasi, ma a wur ngas na kiripo det iru taru uni. ⁴⁸ Ra i bukus a uben, a kum tene woro uben det dat mamaso tari una usalin. Det kis ra det timilo ru a kum kiripo utiro una kum rat, ma a kum laulau ino det woro ru det. ⁴⁹ Una ururup ina rakrakon bual din pami ut lenri: A kum ensel det in nanpat ma det in isuaro ru a kum tene sakino gusun a kum tene tokodos. ⁵⁰ Ra det in woro ru a kum tene sakino una labino sungun. Det in tangtangis ma det in ungingit lokondet iai.

⁵¹ “Pepelai, mot sa mananos una kum kukurai ina kum utna rop ri, o awu?” Anun a kum nat na ususer det balu i lena, “Ma! Met sa tasmani.” ⁵² Ra o Iesu i watungi tandet lena, “I mo ra a kum tene ususer rop tagun a Warkurai, ra det sa ususer pas una matanitu tagisapat una langit, det elar nam ara musano ra i uleng a kum wakak na utna una nun a rumu. Ra i upirso a kum wakak na utna ra, gusun anun a rumu sur in papam nami, a ramano kum utna, a kum matokino, ma a ramano kai, a kum turaino.”

A poropet ra ka di ru i

(Mk 6:1-6; Lk 4:16-30)

⁵³ Ra o Iesu i sa watung rop tar a kum wasiso elelar ri, i wan tagitiro iai, ⁵⁴ ra i wanpat una nun a tamon, tong o Nasaret. I turpasi sur in ususer a taro tiro una nundet a rumu na lotu, ma det kisin doko ra det watungi lena, “A musano ri i los a mananos tagai? Ma tagai kai a dekdek ra i pam a kum utna na ukisin ri nami?” ⁵⁵ O Tamano a tene pam rumu kut, ma o nano o Maria. A kum tistisino kai, o Jems, o Josep, o Saimon ma o Judas ⁵⁶ ma a kum bunu kai ano kuri ut dat laun tomo nin. Ma tagai a dekdek ra a musano ri i pam a kum utna ri nami?” ⁵⁷ Ra ka det nemi ut mo. Ra o Iesu i watungi tandet lena, “Di ser ru a poropet una kum se tamon, ikut det ut una nun a tamon ma anun a rumu ka det ru i.” ⁵⁸ Ra ke pam lako

susut na utna na ukisin tiro iai, uni ka det nurnur uni.

14

O Erod i nuki lena o Iesu i o Jon a Tene Baptaiso

(Mk 6:14-29; Lk 9:7-9)

¹ Una kilalo ra, o Erod a mugumugu tagun a gapman i longoro a wasiso un o Iesu, ² ra i watungi tan anun a kum tultul lena, “A musano ra, i o Jon a Tene Baptaiso, i sa laun melet gusun a minat. I mo ra i pam a kum utna na ukisin.”

³⁻⁴ Numugu o Erod i tulu ru anun a kum tene inaim sur det in dat pas o Jon. Ra det sa dat pasi, det ker pasi, ma det uruk tari una karabus. O Erod i pami lenri, uni o Jon i inanos lena, “Ke tokodos ra u nolin nam o Erodias, a urim.” I watungi lenri, uni o Erod i sa sal pas o Erodias, a ino anun o tisino, o Pilip, ra i nolin nami. ⁵ Ma o Erod i nemi sur din un doko o Jon, ikut i ngaran a taro, ra det tasmani lena o Jon a poropet.

⁶ Una bung ra di ukinalong a bung na usus anun o Erod, a nutun o Erodias a ino, i lagor umatandet. O Erod i gas doko nami, ⁷ ma i uliliman dekdek tar a nutun o Erodias lena, “Asau mukut ra un saringi tang an pitari ut tam.” ⁸ Ra i inanos lena, “Un tabor iau namin lorin o Jon a Tene Baptaiso un tu pelet.” I watungi lenri uni o nano i sa inanos tari nami.

⁹ A king i tupunuk doko. Ikut i tulu a kum tene inaim sur det in pam sot a sasaring anun a toraro ra, uni i sa uliliman tari lena asau mukut ra in saringi tano in tabori ut nami, ma a taro ra det kis tomo nami una inangon, det sa longoro tar anun a wasiso. ¹⁰ A kum tene inaim det wan utong una rumu na karabus ma det tau kutus pas in kabaran o Jon. ¹¹ Det ubek pas in lorino una pelet ma det pitari torom a toraro, ra i losi torom o nano.

¹² Ra a kum nat na ususer anun o Jon det wanpat ma det los pas a minatino, ra det pori. Numur det wan torom o Iesu ra det inanos nami.

O Iesu i tabor a limo na arip na musano
(Mk 6:30-44; Lk 9:10-17; Jn 6:1-14)

¹³ Ra o Iesu i longoro i lena o Jon i sa mat, i kas una pot ra i wan tagitiro sur a nubual kalako taro uni, sur i sot kut in kis. Ra a taro tagun a kum tamon det longoro i, det wan murmuri una kisapi sur a nubual ra. ¹⁴ Ra i sot, i tama a labino kunur na taro. I maris doko det, ma i ulangolango pas det rop ra det misait.

¹⁵ Ra i sa lirop anun a kum nat na ususer det wan toromi, ra det inanos lena, “A

nubual ri i bakbak gusun a kum tamon, ma i sa lirop kai. Un tulu ru a kunur na taro sur det in nan sur a kum tamon, sur det in kul pas andet lako utna na inangon.”¹⁶ O Iesu i balu det lena, “Det in nan sur asau? Mot ut mot in tabor det.”¹⁷ Det watungi tano lena, “A limanin beret sot kut, ma arin kiripo kai kuri met losi.”¹⁸ I watungi tandet lena, “Mot in losi urin torom iau.”

¹⁹ Ra i itula sur a kunur na taro det in kis una wuliso. I los pas a limanin beret ma arin kiripo, i tamtama usapat una langit, i watung wakak pas torom o God uni, i tibik a limanin beret, ra i pitari tan anun a kum nat na ususer. Ra det tibo a kunur na taro nami.²⁰ Det rop det wangon ma det masur. Numur det song bukus pas a noino ma aru rat nama utna ra det wangon kopos pas uni.²¹ A wardain ma a kum nat liklik ma a kum musano det rop det wangon. Ikut a niluluk ina kum musano kut, i elar nama limo na arip.

O Iesu i wan sapat netes una tasi
(Mk 6:45-52; Jn 6:15-21)

²² Uniutra, o Iesu i tulu ru anun a kum nat na ususer, sur det in kas una pot, ma det in mugu utong sur ara papor tasi. Ma i, i kis utmakai sur in tulu ru tar a taro.²³ Ra i sa tulu rop ru det, i sot mukut i wan tito usapat una tangai sur in wararing. Ra i sa lirop matano mirum i sot mukut i kis.²⁴ A pot i sa wan bakbak gusun a usalin ra i tinako nanan una top, uni a wuwu i waim tagisa numugu.²⁵ Una lar, o Iesu i wan sapat netes una tasi torom det.²⁶ Ra anun a kum nat na ususer det tama pasi ra i wan sapat netes una tasi, det ngara doko ma det watungi lena, “A nion kut ra!” Ra det woiwoi nama ngingara.²⁷ Uniutra o Iesu i watungi tandet lena, “A kosom taru tamot, iau kut ri. Gong mot ngara.”

²⁸ O Pita i watungi tan o Iesu lena, “Labino, ra ui ut ra, un inanos iau sur iau kai an nan sapat netes una tasi torom ui.”

²⁹ O Iesu i inanos i lena, “Un nan urin.” Ra o Pita i sirok gusun a pot, ra i wan sapat netes una tasi torom o Iesu.³⁰ Ikut, ra i tama a kum lamlabino top, i ngara. Ra i murung nanan, i kakabo lena, “Labino, un ulaun iau.”³¹ Uniutra, o Iesu i kodos a lamano toromi, i dat toto pasi, ra i watungi tano lena, “Anum a nurnur i natino doko. I lai ra u nuknuk larlar?”³² Ra der kas una pot, a wuwu i mana mut.³³ Ra det, ra det kis taru una pot det lotu torom o Iesu, ma det watungi lena, “I lingmulus ut, ra ui a Nutun o God.”

O Iesu i ulangolango pas a kum misait tong una papor Genesaret
(Mk 6:53-56)

³⁴ Ra det sa wan kutus un ara papor tasi, det sot tiro una papor Genesaret.³⁵ Ra a taro tagitiro det tama lele pas o Iesu, det pitar a wasiso utiro una kum tamon. Numur det ben rop pas a kum misait toromi.³⁶ Ma det saringi sur a kum misait det in pami kut a sinisir ina nun a saket. Ra det rop ra det pami, det langolango mut.

15

A taro det unatino pas a wasiso anun o God

(Mk 7:1-13)

¹ A ramano kum Parisi ma a kum tene ususer tagun a Warkurai det wan tagisapat o Jerusalem torom o Iesu, ma det tingi lena,² “I lai sur anum a kum nat na ususer ka det ser mur a kum etowo anun anundat a taro tagun numugu? Ra det wangon, ka det ser gos mugu pas a lamandet.”³ Ma i balu det lena, “Sur asau ra ka mot mur a Warkurai anun o God? Mot muri kut a kum etowo anun anumot a taro tagun numugu.”⁴ Uni o God i watungi lena, “Un ru o tamam ma o nam,”
Kis 20:12
ra i watungi kai lena, “Osi ra in wasiso laulau un o tamano ma o nano, din um doko i.”
Kis 21:17

⁵ Ikut mot, mot ususer a taro lena, i wakak kut ra taio in watungi tan o tamano ma o nano lena, “Asau ra an warut mur nami, a sa tabor tar o God nami.”⁶ Ikut ra ke warut o tamano, ke ru i. Ra mot pami lenra, mot unatino pas a wasiso anun o God sur mot in muri kut a kum etowo anun anumot a taro tagun numugu.⁷ Mot a kum tene torotoro. A wasiso anun o Aisaia i lingmulus ut, ra i wasiso na poropet mugu taru un mot lena,⁸ “A taro ri det ru iau kut nama wandet, ikut a balandet i bakbak doko gusun iau.”

⁹ Det lotu oros kut torom iau, uni det ususer nama kum warkurai kut anun a taro.”
Ais 29:13

A kum utna ra in udur a taro umatan o God

(Mk 7:14-23)

¹⁰ O Iesu i kabo pas a kunur na taro toromi, ra i watungi tandet lena, “Mot in longoro iau ma mot in tasman lele anung a wasiso.¹¹ Asau ra in ruk una wan tu musano, ken uduri umatan o God. Ikut, asau ra i watungi nama wano, i ra in uduri umatan o God.”

¹² Numur anun a kum nat na ususer det wan toromi ra det tingi lena, "Pepetlai, u sa tasmani lena a kum Parisi det balano mamaut una num a wasiso?" ¹³ I balu det lena, "A kum duwai ra o Tita, ra i kis sapat una langit, ke marut det, din gat rop ru det. ¹⁴ Mot in madek ru a kum Parisi. Det a kum pulu na mugumugu. Ra tu pulu in ben tu pulu, der rop der in puku dorong un tin nutung."

¹⁵ Ma o Pita i tingi lena, "Un palos a wasiso elelar ri torom met." ¹⁶ Ra o Iesu i watungi lena, "Pepetlai, mot kai ka mot talapor utmakai?" ¹⁷ Pepetlai, ka mot tasmani lena, a kum utna rop ra i ruk una wan a musano, i ruk unin balano ma i upirso melet ru i? ¹⁸ Ikut a kum wasiso rop ra i watungi nama wano, i wanpat gusun a nuknukino, i ra in uduri. ¹⁹ Iri a kum utna ra i ser wanpat tagun a nuknukino: a kum sakino nuknuk, a petutna ra di um doko a taro, a petutna ra di pam a sakino nam tu ino anun taio o nam tu musano anun taio, a kum petutna na pamuk, a wolong, a etakun torotoro, ma a petutna ra di mang laulau ara. ²⁰ A kum utna ri det udur a taro umatan o God. Ikut ra det wangon ma ka det gos mugu pas a lamandet, awu sur in udur det umatan o God."

A nurnur anun a ino ra awu sur a ino Israel

(Mk 7:24-30)

²¹ O Iesu i wan tagitiro, ra i wanpat milau a tamon Tair ma o Saidon. ²² Ara ino Kenan tagitiro una papor ra, i wanpat ma i kabo o Iesu lena, "Labino, a Nutun o Dewid un maris iau. A nutunglik a ino, a laulau na nion kura uni, ra i ser ban laulau i." ²³ Ikut o Iesu ke balu i. Anun a kum nat na ususer det wan toromi, ma det inanos dekdeki lena, "Un tulu ru i mukut, uni i woiwoi murmur dat."

²⁴ O Iesu i watungi lena, "O God i tulu ru iau urin sur a taro Israel kut, ra det raro elar nama kum sipsip." ²⁵ Ikut a ino ra i wan torom o Iesu, i kis butkeke numugu tano ra i watungi tano lena, "Labino, un warut iau." ²⁶ Ra o Iesu i balu i lena, "Ke tokodos sur din los a utna ana kum nat, ma din woro i tan a kum pap." ²⁷ A ino ra i balu i lena, "Labino, a lingmulus ut ra. Ikut, a kum pap kai det ser wan a kum mumumut na utna ra i ser puku tagun a kabulu na inangon anun a kum tamtaman det." ²⁸ Ra o Iesu i balu i lena, "Le, i labo doko anum a nurnur! A utna ra u nemi, an pami ut torom ui." Ma una du bung ut ra, o nutunulik i langolango.

O Iesu i ulangolango a kum misait

²⁹ O Iesu i wan tagitiro, ma i usal nanan una usalin una du tasi Galili. Numur i wan toto una tangai ra i kis sapat. ³⁰ Ma a labino kunur na taro det wan toromi. Det los det ra a kikindet i mat, ma det ben a kum pulu, a kum pio, a kum ngat, ma a susut na misait utkai toromi. Ma det inep tar det nisanu, ra i ulangolango pas det. ³¹ A kunur na taro det tama a kum ngat det wasiso, ma a kum pio det tur, ma det ra a kikindet i mat det wan tokodos, ma a kum pulu kai det tamtama. Det kisin doko ra det watung ulabo pas a God anun a taro Israel.

O Iesu i tabor a wat na arip na musano (Mk 8:1-10)

³² O Iesu i kabo pas anun a kum nat na ususer toromi ma i watungi tandet lena, "A maris doko a taro ri, uni det sa kis tomo nam iau nin a tulu bung, ma kalako utna na inangon sur det in nani. Ka nemi sur an tulu ru det kut nama munurak, sako det in bengbeng nanan una kisapi." ³³ Anun a kum nat na ususer det inanos lena, "A nubual ri, kalako taro uni. Tagai mo lako utna na inangon sur dat in tabor a kunur na taro ri nami?" ³⁴ O Iesu i ting det lena, "A isin beret kura mot losi?" Det balu i lena, "A wonom mawit na beret ma a kabanin natnat na kiripo."

³⁵ Ra i inanos a taro rop sur det in kis. ³⁶ I los pas a wonom mawit nin beret ma a kabanin kiripo ra, i watung wakak pas uni torom o God, i tibiki ma i pitari torom a kum nat na ususer sur det in tabor a taro nami. ³⁷ A taro rop det wangon ma det masur. Numur det song bukus pas a wonom mawit na rat nama kum utna ra det wangon kopos pas uni. ³⁸ A kum ino tomo nama kum nat liklik ma a kum musano det rop det wangon. A niluluk ina kum musano kut i elar nama wat na arip.

³⁹ Numur o Iesu i tulu ru a kunur na taro, i kas pas una pot, ra i wan sur a papor Magadan.

16

Det saring o Iesu sur in pam tu ukinalong

(Mk 8:11-13; Lk 12:54-56)

¹ A kum Parisi ma a kum Sadusi det wan torom o Iesu, ra det lari sur in pam tu ukinalong umatandet, sur in ese i lena, i tagisapat una langit. ² Ra i watungi tandet lena, "Ra i ser lirop mot ser watungi lena, 'Markan ken bato, uni a bakut i sa merek rop.' ³ Ma una kobot mot ser watungi kai lena, 'Uniri in bato, uni a bakut i sa merek, ma i sa bagubagu rop.' Mot mananos sur mot in palos a tamtama ina bakut, ikut ka

mot mananos sur mot in palos a kukurai ina kum ukinalong tagun uniri.* 4 A taro tagun uniri, a sakino taro, anundet a nilaun i bakbak gusun o God. Det sasaring sur tu ukinalong, ikut ka din pam taio torom det. Din pam a ukinalong kut elar nami ra di sa pam tari un o Jona.” Ra o Iesu i wan gusun det.

A utumarong una is anun a kum Parisi ma a kum Sadusi
(Mk 8:14-21)

5 O Iesu tomo nam anun a kum nat na ususer det wan kutus a du tasi, ma a kum nat na ususer ka det los lako beret, det dumano ru i kut. 6 O Iesu i watungi tandet lena, “Mot in tumarong una is anun a kum Parisi ma a kum Sadusi.” 7 Ra det wasiso etetalai torom det una kukurai ina wasiso anun o Iesu, ma det lena, “I watungi lenra uni ka dat los lako beret.” 8 O Iesu i tasman anundet a wasiso ra i watungi tandet lena, “I natino doko anumot a nurnur. Ilai ra mot wasiso etalai un mot ra ka mot los lako beret? 9 Pepetlai, ka mot mananos utmakai? Ka mot nuk pas a limanin beret ra a tibiki torom a limo na arip na musano? Ma ka mot nuk pasi kai a iso rat ra mot song bukus pasi? 10 Ma mot nuk pas a wonom mawit na beret ra a tibiki torom a wat na arip na musano? Ma ka mot nuk pasi kai a iso rat ra mot song bukus pasi? 11 Ilai ra ka mot mananos? Ka wasiso una beret. Mot in tumarong mot una is anun a kum Parisi ma a kum Sadusi.” 12 Ra det tasmani maragom lena ke turbat det gusun a is ra i kis una beret, ikut i watungi lenra, sur det in tumarong det una etowo anun a kum Parisi ma a kum Sadusi.

O Pita i wasiso talapor un o Iesu
(Mk 8:27-30; Lk 9:18-21)

13 O Iesu i wanpat milau a tamon Sisaria Pilipai. Ra i ting anun a kum nat na ususer lena, “A taro det watung a Nutun a Musano nam osi?” 14 Det balu i lena, “Ara taro det watung ui o Jon a Tene Baptaiso. Ara taro det watung ui o Elaija, ara taro det watung ui o Jeremaia, ma ara taro kai det watung ui, ara tagun a kum poropet.” 15 I ting det lena, “Ma mot, mot watung iau nam osi?” 16 Ra o Saimon Pita i balu i lena, “Ui a Karisito, a Nutun o God ra i laun.”

17 Ra o Iesu i watungi tano lena, “Saimon, a nutun o Jon, u sa dan, uni kataio i inanos ui nama wasiso ra. O Tita ut ra i kis sapat una langit i unuk tar ui nami. 18 Ra a

watungi tam lena, ui o Pita,† a wat kis. An utur anung a taro na lotu una wat ri. A dekdekin a minat ken winim pas anung a taro na lotu. 19 An pitar a kum ki tagun a matanitu tagisapat una langit torom ui, ma asau ra u kubusi nin upiso, din kubusi kai sapat netes una langit, ma asau ra u palosi nin upiso, din palosi kai sapat netes una langit.” 20 Ra o Iesu i turbat anun a kum nat na ususer sur gong det inanos tar taio lena i a Karisito.

O Iesu i inanos mugu nam anun a minat
(Mk 8:31-9:1; Lk 9:22-27)

21 Turpasi una bung ra, o Iesu i utalapor anun a kum nat na ususer lena, in nan ut usapat o Jerusalem. Ra in taro a susut na mamaut ulaman a kum mugumugu, a kum lamlabino tene etabor torom o God, ma a kum tene ususer tagun a Warkurai, ma din um doko i. Ra a tulu bung in rop in katuttur melet. 22 Ra o Pita i ben gisen pas o Iesu ma i turbat dekdeki lena, “Gong Labino! Gong ut di pam tar a utna ri un ui.” 23 O Iesu i tupukus torom o Pita ra i watungi tano lena, “Satan, un nan unago numur tang! U ubatbat iau, uni, u muri kut a nuknukin a taro, ma ko mur a nuknukin o God.”

24 Ra o Iesu i watungi tan anun a kum nat na ususer lena, “Ra taio i nemi sur in mur iau, gong i mur a nuknukino. In los pas anun in nanai kutus ma in mur iau. 25 Osi ra i maris bat anun a nilaun, in iru, ikut osi ra ke maris bat anun a nilaun uni i tagun iau, in laun. 26 Osi ra in utur ukai a kum ututna rop taginin una rakrakon bual, ma a niono in iru, in wakak pepetlai toromi? In kul keles a niono nama sau? 27 Uni a Nutun a Musano in nanpat nama minamar anun o Tamano, det nam anun a kum ensel, ma in pitar a ikul torom arara taktakai elar nam anun a pinapam. 28 A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a Nutun a Musano in nanpat tomo nam anun a matanitu.”

17

A pinin o Iesu i tamtama senene
(Mk 9:2-13; Lk 9:28-36)

1 Numur tan a wonom na bung, o Iesu i ben pas o Pita, o Jems na o Jon, i ra a tisin o Jems, ra i ben gisen pas detul usapat una tangai ra i tur toto bing. 2 Tiro iai, detul tama a pinin o Iesu i wanpat senene.

* 16:3: Una ramano kum du buk una wasiso Grik, aru vers 2 ma 3 ka der kis. 16:4: Mt 12:39; Lk 11:29 16:6: Lk 12:1 16:9: Mt 14:17-21 16:10: Mt 15:34-38 16:14: Mt 14:1-2; Mk 6:14-15; Lk 9:7-8 16:16: Jn 6:69 16:17: Gal 1:15-16 16:18: Jn 1:42; Ep 2:20 † 16:18: Pita a kukuraino a wat. 16:19: Mt 18:18; Jn 20:23 16:24: Mt 10:38; Lk 14:27 16:25: Mt 10:39; Lk 17:33; Jn 12:25 16:26: Mt 4:8-9 16:27: Mt 25:31; Sng 62:12; Snd 24:12; Rom 2:6; Tam 22:12 17:2: 2 Pit 1:16-18

In masarino i sisio elar namin matanas, ma anan a kum malu kai i kabang doko elar nama talapor. ³ Uniutra, a tulu nat na ususer detul tama pas o Moses der nam o Elaija der wanpat ra detul wasiso tomo nam o Iesu. ⁴ O Pita i watungi tan o Iesu lena, "Labino, i wakak ra dat in kis nin. Ra u nemi, an pam lako tulu turturup, ara anumi, ara anun o Moses, ma ara kai anun o Elaija."

⁵ Ra i wasiso utmakai, a du bakut ra i talapor doko i pulus bat pas det. Ma in nalngan ara tagisapat una du bakut ra, i watungi lena, "Iri a Nutunglik, a nat na wakak, a gas doko nami. Mot in longoro i." ⁶ Ra a tulu nat na ususer detul longoro i, detul ngara doko, ra detul puku pirso nama mandetul una piso. ⁷ Ikut o Iesu i wan torom detul, ra i pam detul ma i watungi lena, "Motul katutur, gong motul ngara." ⁸ Ra detul tamtama toto, ka detul tama melet taio, o Iesu sot mukut kura i.

⁹ Ra det wan pirso nanan tagisapat una tangai, o Iesu i turbat tar detul lena, "Gong motul inanos tar taio un asau ri motul sa tama tari, tuk una bung ra a Nutun a Musano in katutur melet gusun a minat."

¹⁰ Ma anun a tulu nat na ususer detul tingi lena, "Sur asau ra a kum tene ususer tagun a Warkurai det watungi lena o Elaija in nanpat mugu?" ¹¹ I balu detul lena, "A lingmulus ut, o Elaija in nanpat mugu ma in ukodos melet a kum utna rop. ¹² Ikut uniri a watungi torom motul lena, o Elaija i sa wanpat taru, ma ka det tasman lele i, det pam a kum sakino petutna uni, elar ut nam anundet a nemnem. Lenkutkai ra torom a Nutun a Musano, in taramo a ngunungut ulaman a taro." ¹³ Ra a tulu nat na ususer detul tasmani maragom lena, i wasiso torom detul un o Jon a Tene Bap-taiso.

O Iesu i lakro ru a laulau na nion gusun ara natlik

(Mk 9:14-29; Lk 9:37-43)

¹⁴ O Iesu ma a tulu nat na ususer det wan-pat nisan a kunur na taro, ra ara musano i wan torom o Iesu, i kis butkeke numugu nisano, ¹⁵ ma i watungi lena, "Labino, un maris a nutunglik a nat musano, i ser mat lalang, ma i ser taramo a labino ngunungut. A susut na bung i ser puku una sungun, o una danim. ¹⁶ A sa ben tari munung torom anum a kum nat na ususer, ikut ka det pet lar pasi sur det in ulangolango i."

¹⁷ O Iesu i balu i lena, "Mot a taro tagun uniri, ka mot nurnur ma mot a kum tene sakino. A sa kis suano i torom mot. Nangisin mo mot in nurnur? Mot in ben a nat ra urin torom iau." ¹⁸ O Iesu i wasiso dekdek torom a laulau na nion, ra i pirso mut gusun a natlik. Ra una du bung utra i langolango.

¹⁹ Numur a kum nat na ususer det wan torom o Iesu, ma det ting eno i lena, "Ilai ra ka met lakro lar pas a laulau na nion gusuni?" ²⁰⁻²¹ Ma i balu det lena, "Uni anumot a nurnur i natino doko. A inanos mot nama lingmulus, ra anumot a nurnur in natino elar namin pitino mastad, mot in pet lar pasi sur mot in watungi tan a tangai ri lena, "Un karai taginin utong," ra in karai kut. Katu utna in ngangitin torom mot."*

O Iesu i wasiso melet una nun a minat ma a katkatutur melet

(Mk 9:30-32; Lk 9:43-45)

²² O Iesu ma anun a kum nat na ususer det wan tomo tong una papor Galili, ra i watungi tandet lena, "Din pitar a Nutun a Musano ulaman a taro ²³ ma det in um doko i. Numur tan a tulu bung o God in ulaun melet pasi." Ra a kum nat na ususer det longoro i, det tupunuk doko uni.

A takis sur a rumu na etabor

²⁴ O Iesu ma anun a kum nat na ususer det wanpat tong o Kapernaum, ra det ra det ser los takis sur a rumu na etabor, det wan torom o Pita ma det tingi lena, "Anumot a tene ususer i ser pitar a takis sur a rumu na etabor o awu?" ²⁵ Ra i mulaot lena, "Ma."

O Pita i ruk una rumu, ra o Iesu i wasiso mugu mut, ra i tingi lena, "Saimon, asau u nuki, a kum king taginin upiso det ser los a takis ma a ikul tan osi? Tan a kum nutnutun det o tan a taro gisen?" ²⁶ Ra i balu i lena, "Tan a taro gisen." O Iesu i watungi tano lena, "Ra i lenra, a kum nutnutun det, det langolango, ka det ser kul a takis. ²⁷ Ikut, sur gong dar ban ukankan det, un nan usa utasi ma un boko. In mugano kiripo ra un dat pasi, un pagom a wano, ra un los pas a mani gusuni. Ma un los tari torom det sur a takis anundar rop."

18

Osi ra i labo sakit?

(Mk 9:33-37, 42-48; Lk 9:46-48; 17:1-2)

¹ Una du bung ra, anun a kum nat na ususer det wan torom o Iesu, ma det tingi

17:5: Sng 2:7; Ais 42:1; Mt 3:17; Mk 1:11; Lk 3:22; Lo 18:15 17:10: Mal 4:5 17:12: Mt 11:14 17:13: Lk 1:17 17:19: Mt 10:1 17:20-21: Mt 21:21; Mk 11:23; Lk 17:6; 1 Kor 13:2 * 17:20-21: Una ramano kum du buk una wasiso Griik, a ramano kum wasiso kai i kis una vers ri. I lenri: *Ikut, a ngas na laulau na nion lenri in pirso kut una niring ma a winewel, awu sur un tu utna kai.* 17:22: Mt 16:21 17:24: Kis 30:13; 38:26 18:1: Lk 22:24 18:3: Mt 19:14; Mk 10:15; Lk 18:17

lena, “Osi ra i labo sakit una matanitu tagisapat una langit?”² I kabo pas ara natlik toromi, i utur tari epotor tandet,³ ma i watungi lena, “A inanos mot nama lingmulus, ra ka mot in nukpukus sur mot in elar nama kum nat liklik, ka mot in ruk lar pas una matanitu tagisapat una langit.”⁴ I mo ra osi ra i unatino pasi, elar nama natlik ri, i ut ra i labo sakit una matanitu tagisapat una langit.

⁵ “Osi ra in gas pas tu natlik lenri una risang, i gas pas iau ut. ⁶ I kut, osi ra in ben raro ara tagun a kum nat liklik ri*[†], ra det nurnur un iau, a warkurai toromi, in laulau doko tan taio, ra din kubus tar tu labino wat unin kabarano, ma din woro murungi sa umadu.

⁷ “In laulau torom a taro tagun a rakrakon bual, kibino una kum utna ra i dat a taro sur det in puku una sakino. A kum utna ra in nanpat ut, ikut in laulau doko torom o naro ra i pam pat pasi. ⁸ Ra a lamam, o a kikum in ben raro ui, un kutus ru i ma un woro gisen ru i. In wakak ra un ruk una nilaun tukum a tumul kut ui, sur gong di woro ui tomo nama ru lamam, o aru kikum rop, una labino sungun ra ke ser mat. ⁹ Ra in matam in ben raro ui, un liok ru i ma un woro gisen ru i. In wakak ra un ruk una nilaun tukum namin teken matam kut, sur gong di woro ui tomo nam arin matam rop una labino sungun ra ke ser mat.

A wasiso elelar un ara sipsip ra i raro
(Lk 15:3-7)

¹⁰⁻¹¹ “Gong mot nuk natino pas taio tagun a kum nat liklik ri. A inanos mot, anundet a kum ensel sapat una langit det ser tama in masarin o Tita ra i kis sapat una langit.†

¹² “Asau a nuknuki mot? Ra tu musano anunu tu mar na sipsip, ma ara tagun det in raro. Pepetlai, ken nan pas gusun a lisu na noino ma lisu tiro una kum tangai, ma in sisio sur ara ra i raro? ¹³ A inanos mot nama lingmulus, ra i sa sio pasi, anun a gasgas uni, in labo taun anun a gasgas una lisu na noino ma lisu ra ka det raro. ¹⁴ Lenkutkai ra, a Tamamot ra i kis sapat una langit, ke nemi sur taio tagun a kum nat liklik ri in iru.

Asau ra un pami torom o tisim ra i pam a sakino torom ui

¹⁵ “Ra o tisim i pam a sakino un ui† un nan toromi, ma mur kut mur in kis. Ra un watung puaso anun a niraro toromi. Ra in longoro ui, u sa umarom melet pasi. ¹⁶ Ra ken longoro ui, un ben melet pas taio o lako ru sur der in warut ui. Uni a Buk Tabu i watungi lenri, ‘Ra lako ru o lako tul anundetul a wasiso i takai kut un tu utna, anundetul a wasiso i lingmulus.’ ¹⁷ Ra ken longoro der, un upuaso i torom a taro na lotu. Ra ken longoro i bulung a taro na lotu, i wakak sur un tama i elar nam o naro ra awu sur a tene nurnur, o elar nam o naro ra a tene los takis.

¹⁸ “A inanos mot nama lingmulus, asau ra mot kubusi nin upiso, din kubusi kai sapat netes una langit, ma asau ra mot palosi nin upiso, din palosi kai sapat netes una langit. ¹⁹ A watungi kai tamot, ra lako ru tagun mot nin upiso der mulaot un tu utna ra der sasaring suri, o Tita ra i kis sapat una langit in pam soti ut torom der. ²⁰ Ra lako ru o lako tul detul kis tomo una risang, iau an kis tomo nam detul.”

A wasiso elelar una tultul ra ke ser marmaris

²¹ O Pita i wan torom o Iesu, ra i tingi lena, “Labino, an man iso u dumano ru a sakino ra o tising i pami un iau? Lako wonom mawit na dino ut?” ²² O Iesu i balu i lena, “Awu sur a watungi tam lena a wonom mawit na dino kut. A watungi lena a wonom mawit na noino ma a wonom mawit na dino.

²³ “I mo ra a matanitu tagisapat una langit i elar nam ara king, ra i nemi sur anun a kum tultul det in ukodos a mani ra det los papasi tano. ²⁴ Ra i turpas a iting, di ben pat ara tultul toromi. A tultul ra i los pas a noino arip na mani§, ²⁵ ikut katu mani sur in balu i nami. Ra anun a labino i pitar a warkurai sur din siuru pas a musano ra, tomo nam anun a ino, ma a kum nutnutunu, ma anun a kum ututna rop, sur din balu a mani ra nami. ²⁶ Ra a tultul ra i kis butkeke umatan anun a labino, ra i saringi lena, ‘Un madek ru iau munung, numur an balu rop tar anum a mani.’ ²⁷ Ma a labino anun a tultul ra i marisi, ra i watungi tano lena, ‘Un nan. Gong mukut u balu i.’

²⁸ “A tultul ra i pirso unago utamon, ra i barato pas ara tultul ra numugui i los pas

18:5: Mt 10:40; Lk 10:16; Jn 13:20 * **18:6:** A wasiso Grik i watungi lena “a kum natnatino”, a kukuraino lenri: a kum nat liklik, o det ra anundet a nurnur ke dekdek, o det ra a taro det tama pisipiso det. **18:8:** Mt 5:29-30

18:10-11: Ibr 1:14 † **18:10-11:** Una ramano kum du buk una wasiso Grik, a ramano kum wasiso kai i kis una vers ri. I lenri: *Uni a Nutun a Musano i wanpat sur in ulaun det ra det sa raro.* **18:15:** Lk 17:3; Gal 6:1 ‡ **18:15:** Una ramano kum du buk una wasiso Grik, a du wasiso ri: *un ui* ke kis. **18:16:** Lo 19:15; Jn 8:17 **18:18:** Mt 16:19; Jn 20:23 **18:19:** Mk 11:24; Jn 15:7 **18:22:** Lk 17:4 § **18:24:** A noino arip na mani i elar nama iso milien na kina. **

18:28: A noino arip na mani i elar nama iso milien na kina.

a noino mani** kut tano. I pam ukai pasi, i bing in kabaranu, ra i watungi tano lena, 'Un balu tar anung a mani ra u los pasi.'²⁹ A pasano ra i kis butkeke umatano ra i saringi lena, 'Un madek ru iau munung, numur an balu melet tar anum a mani.'³⁰ Ikut ke longoro pasi. I beni kut ra i uruk tari una karabus, tuk una bung ra in balu tar a mani ra i los pasi.³¹ Ra a kum paspasano det tama a kum petutna ra, det taramo laulau det. Det wan torom anundet a labino, ra det inanosi una kum utna ra a tultul ra i sa pam tari.

³² "Anun a labino i kabo pasi, ma i watungi tano lena, 'Ui, a sakino tultul ui. A madek ru ui sur gong mo u balu a mani ra u los pasi tang, uni u saring iau.³³ Ilai ra ko nem a pasam elar nam iau a nem ui?'³⁴ Anun a labino i kankan toromi, ra i pitar tari tan a kum tene tamtamabat tagun a karabus sur det in ukadik laulau i tuk in balu tari ut a mani ra i los pasi.

³⁵ "Ra ka mot in dumanu ru a sakino petutna ra a kum tistisi mot det pam tari un mot, o Tita ra i kis sapat una langit in pami kai lenra torom mot taktakai."

19

Gong taio i kutus a nolin (Mk 10:1-12)

¹ Ra o Iesu i sa watung rop tar a kum wasiso ri, i wan tagitong o Galili, utong una papor Judia, un ara papor danim Jodan.² Ma a labino kunur na taro det muri, ma i ulangolango pas a kum misait tiro iai.³ A ramano kum Parisi det wan toromi sur det in lari. Det tingi lena, "I tokodos ut elar nam anundet a Warkurai sur a musano in lakro ru anun a ino un tu utna oros kut, o awu?"⁴ I balu det lena, "Pepeitai, ka mot luki utmakai a wasiso una Buk Tabu? I watungi lenri: Una turturkibin a ukukis, a Tene Ukukis 'i ukis a taro, sur det in musano ma det in ino,'
Stat 1:27

⁵ ma i watungi lena, 'Tri a kibino ra a musano in nan gusun o tamano ma o nano, ma in kis tomo nam anun a ino, sur der in takai mukut.'
Stat 2:24

⁶ Ra awu mo sur der aru, der takai mukut. I mo ra asau ra o God i sa kubus tomo tari, gong melet mo taio i kutusi."

⁷ Det ting meleti lena, "Ilai sur o Moses i pitar a warkurai sur a musano in pitar a dono buk na kutus nolin torom anun a ino, sur din palos ru a kinkinis na nolin?"⁸ I balu det lena, "O Moses i mulaot ru mot sur mot in lakro ru anumot a kum wardain, uni a balamot i dekdek doko. Ikut una

turturkibin a ukukis awu sur i lenra.⁹ A watungi tamot, osi ra in lu ru anun a ino ra ke pam tu sakino tomo nam tu musano gisen, ma a musano ra i nolin melet nam tu ino, a musano ra i pam a sakino."

¹⁰ Ra anun a kum nat na ususer det watungi tano lena, "Ra i lenra, i wakak sur gong di nolin."¹¹ I balu det lena, "Awu sur a taro rop ka det in nolin. Det kut ra o God i sa pitar tar a dekdek tandet."¹² Iri a kum kibino ra lako taro ka det in nolin: Ara taro di usus det lenutra. Ara taro, a taro det ban laulau det, ma ara taro kai, ka det nolin uni det balon una pinapam una matanitu tagisapat una langit. Osi ra in pet lar pasi, in mur a wasiso ri."

O Iesu i ubek aru lamano netes una kum nat liklik

(Mk 10:13-16; Lk 18:15-17)

¹³ Di ben a kum nat liklik torom o Iesu sur in ubek aru lamano sapat netes un det ma in wararing un det. Ikut a kum nat na ususer det turbat det.¹⁴ O Iesu i watungi lena, "Mot in madek ru a kum nat liklik sur det in nan torom iau. Gong mot turbat det, uni a matanitu tagisapat una langit anundet ra det lenri."¹⁵ Ra i ubek tar aru lamano netes un det, numur i wan tagitiro.

A tene gongon na barman (Mk 10:17-31; Lk 18:18-30)

¹⁶ Ara barman i wan torom o Iesu, ra i tingi lena, "Tene Ususer, osi na wakak na utna ra an pami sur an rakon a nilaun tukum?"¹⁷ O Iesu i balu i lena, "Sur asau ra u ting iau un asau ra i wakak? Ara sot kut i wakak. Ra u nemi sur un ruk una nilaun tukum, un mur a kum Warkurai."¹⁸ Ra i tingi lena, "Osi na kum Warkurai?" O Iesu i balu i lena, "Gong u um doko taio, gong u pam a sakino nam tu ino anun taio o nam tu musano anun taio, gong u wolong, gong u etakun torotoro,¹⁹ un ru o tamam ma o nam,'
Kis 20:12-16
ma 'un nem o pasam elar nami ra u nem ui ut.'"
Wkp 19:18

²⁰ A barman ra i watungi tano lena, "A kum Warkurai rop ri a sa mur sot pasi. Asau melet mo an pami?"²¹ O Iesu i balu i lena, "Ra u nemi sur un tokodos mulus, un nan ma un siuru ru anum a kum ululeng rop, ra a mani taguni, un tabor a kum sibo na taro nami. Ra un pami lenra, anum a wakak na ululeng kusapat una langit. Numur un nan urin ma un mur iau."²² Ra a barman i longoro a wasiso ri, i wan ma ikut ke gasgas, uni i labo doko anun a ululeng.

²³ Ra o Iesu i watungi tan anun a kum nat na ususer lena, "A inanos mot nama

lingmulus, i ngangitin doko torom a tene gongon sur in ruk una matanitu tagisapat una langit. ²⁴ A watungi kai tamot lena, in ngangitin sur a kamel in ruk una mato na sur na susuk, ikut, i ngangitin doko ut sur a tene gongon in ruk una matanitu anun o God.” ²⁵ Ra anun a kum nat na ususer det longoro i, det kisin doko ma det watungi lena, “Ra i lenra, osi mo ra din ulauni?” ²⁶ O Iesu i tamtama torom det ra i watungi lena, “A taro ka det in pet lar pasi, ikut o God sot kut in pet lar pas a kum utna rop.”

²⁷ O Pita i balu i lena, “Tama i, met sa wan gusun anumet a kum utna rop, ra met mur ui. Asau ra met in rakoni numur?” ²⁸ O Iesu i watungi tandet lena, “A Nutun a Musano in kis na king una nun a kiskis na minamar ra din umatok a kum utna rop. A inanos mot nama lingmulus, una du bung ra, mot ra mot sa mur iau, mot in kis una noino ma aru kiskis na king, ma mot in warkurai sur a noino ma aru kabotaro Israel. ²⁹ Ma det rop taktakai ra det sa wan gusun anundet a kum rumu, o gusun a kum tistisin det a kum musano ma a kum ino, o gusun a kum tamtama det, o a kum nanan det, o a kum nutnutun det, o gusun anundet a kum piso, uni det mur iau, din pitar a marmar na utna lenri tandet, ma det in rakoni kai a nilaun tukum. ³⁰ Ikut a susut ra det mugu uniri, numur det in mur, ma det ra det mur uniri, numur det in mugu.”

20

A wasiso elelar una kum tene pinapam una kinobot na wain

¹ “A matanitu tagisapat una langit i elar nama taman a kinobot na wain, i pirso una kobot raut sur in iting sur lako kum tene pinapam sur det in papam una nun a kinobot na wain. ² Det kubus wasiso tomo pas nama kum tene pinapam sur det in los a ikul tagun ara bung na pinapam, ra i tulu det sur anun a kinobot na wain. ³ Una lisu na pakano bung, i wan melet ra i tama pas ara taro bulung det tur ororos kut una nubual na inawan tomo. ⁴ Ra i watungi tandet lena, ‘Mot kai, mot in nan, ma mot in papam una nung a kinobot na wain, ma an tokom mot nama sau ra i tokodos.’ ⁵ Ra det wan.

“Una labino suan i wan ra i iting melet sur lako kum tene pinapam, ma una tulu pakano bung una lirop i wan melet sur lako taro. ⁶ Una limo na pakano bung una lirop i wan melet, ma i tama pas ara taro bulung det tur ororos kut. Ra i watungi tandet lena, ‘Iai ra mot tur ororos kut nin, a kudulano

bung rop ri?’ ⁷ Det balu i lena, ‘Katutaio i ben met sur tu pinapam.’ I watungi tandet lena, ‘Mot kai mot in nan ma mot in papam una nung a kinobot na wain.’

⁸ “Ra i sa lirop matano mirum, a taman a kinobot na wain, i watungi tan a mugumugu tagun anun a kum tene pinapam lena, ‘Kabo pas a kum tene pinapam urin, ma un tokom det. Det ra det wanpat murmur sakit un tokom mugu det. Numur un tokom imurmur a kum tene pinapam tuk un det ra det mugu pat.’ ⁹ A kum tene pinapam ra di ben pas det una limo na pakano bung det wanpat, ra di tokom det taktakai nama ikul tagun ara bung na pinapam. ¹⁰ Det ra di ben mugu pas det, det wanpat. Det nuki lena det in los a labino ikul. Ikut, awu! Det kai di tokom det taktakai nama ikul tagun ara bung na pinapam kut. ¹¹ Ra det sa lolos pas, det ururai torom a taman a kinobot na wain, ¹² det watungi lena, ‘Det ri ka det papam suano i, ma met, met pam a dekdek na pinapam ma a suan i rang met, ikut u tokom det utkai elar nam met.’ ¹³ Ra i balu ara tandet lena, ‘Pasang, awu sur a ban laulau ui. Pepetlai, ka dar kubus pas a wasiso sur a ikul tagun ara bung na pinapam?’ ¹⁴ Los pas anum a mani, ma un nan. Iau ut a nemi sur an tokom det ra det wanpat murmur elar nam ui ra u mugu. ¹⁵ Pepetlai, ke sot sur an pam asau ra a nemi nam anung a mani? Pepetlai, u nuknuk laulau un iau, uni a maris a taro ri?’ ¹⁶ I lenri, det ra det mur uniri, numur det in mugu, ma det ra det mugu uniri, numur det in mur.”

O Iesu i mantulu wasiso una nun a minat (Mk 10:32-34; Lk 18:31-34)

¹⁷ Ra o Iesu i wan nanan usapat o Jerusalem, i ben gisen pas anun a noino ma aru nat na ususer, ma i watungi tandet lena, ¹⁸ “Tama i, iri dat wan nanan usapat o Jerusalem. Din pitar a Nutun a Musano torom a kum lamlabino tene etabor torom o God ma a kum tene ususer tagun a Warkurai. Det in warkurai i sur in iru, ¹⁹ ma det in pitar tari torom det, ra awu sur a taro Juda sur det in urongon laulau uni, det in mirasi, ma det in sak wati unin nanai kutus. Ra a tulu bung in rop in katutur melet.”

O nan o Jon ma o Jems i saring o Iesu (Mk 10:35-45)

²⁰ Numur o nan aru nutnutun o Sebedi i wan torom o Iesu nam aru nutnutunu. I kis butkeke umatano ma i saringi sur in mur anun a nemnem. ²¹ Ma o Iesu i

tingi lena, "Asau ra u nemi?" Ra i balu i lena, "Un mulaot sur aru nutnutung ri, der in kis tomo nam ui una num a matanitu, ara una sot na lamam, ma ara pasander kai una kair, ma motul in warkurai tomo."

²² O Iesu i balu i lena, "Ka motul tasman asau ra motul sasaring suri. Pepetlai, in topasi sur mur kai mur in inum tagun a kap na mamaut ra an inum taguni?" Der balu i lena, "Mir in pet lar pasi kut." ²³ I watungi tander lena, "A lingmulus ut, a kap na mamaut ra an inum taguni, mur kai mur in inum taguni. Ikut a kinkinis una sot na lamang ma una kair, awu sur iau, a warkurai sur an pitari. O Tita in pitari torom det ra i sa waninar tari sur det."

²⁴ A noino nat na ususer det longoro i, ra det kankan torom dersino. ²⁵ Ra o Iesu i kabo tomo pas det, ra i watungi lena, "Mot tasmani lena a kum tene warkurai anun a taro ra awu sur a taro Juda, det kuro laulau a taro. Ma anundet a kum mugumugu kai det pitar a kum dekdek na warkurai torom anundet a taro. ²⁶ Ikut torom mot ken lenra. Osi ra i nemi sur in labo taun mot, in unatino pasi ut sur in tultul anumot. ²⁷ Ma osi ra i nemi sur in mugumugu anumot, in papam oros kut torom mot ma ka din kuli. ²⁸ Lenkutkai ra a Nutun a Musano ke wanpat sur din papam toromi. I wanpat sur i ut in papam oros a taro, ma in pitar tar anun a nilaun, a ikul, sur in kul langolango pas a susut na taro."

O Iesu i utamtama pas aru pulu
(Mk 10:46-52; Lk 18:35-43)

²⁹ Ra o Iesu ma anun a kum nat na ususer det wan tagitong o Jeriko, a labino kunur na taro det mur det. ³⁰ Aru musano aru pulu der kis taru una papor ina kisapi. Ra der longoro i lena o Iesu i wan nanan milau, der kakabo sapat lena, "Labino, a Nutun o Dewid, un maris mir." ³¹ Ma a kunur na taro det turbat der sur der in kis wowowon. Ikut der kakabo dekdek makai usapat lena, "Labino, a Nutun o Dewid, un maris mir." ³² O Iesu i tur sikot, ra i kabo pas der, ma i ting der lena, "Asau ra mur nemi sur an pami un mur?" ³³ Der balu i lena, "Labino, mir nemi sur mir in tamtama." ³⁴ O Iesu i maris doko der, ra i pam arin matander. Uniutra der tamtama, ma der muri.

21

O Iesu i wan usapat o Jerusalem elar nama king
(Mk 11:1-11; Lk 19:28-40; Jn 12:12-19)

20:22: Mt 26:39; Jn 18:11

20:25: Lk 22:25-26

20:26: Mt 23:11; Mk 9:35

20:28: Lk 22:27; Pil 2:7

*** 21:12:**

A mani anun a gapman Rom det ser ruk nami una rumu na etabor, ra det kelesi sur a mani sur det in kul a takis nami tagun a rumu na etabor.

¹ Ra det wan milau o Jerusalem, det wanpat sapat o Betpage una Tangai na Oliw, o Iesu i tulu aru nat na ususer. ² I watungi tander lena, "Mur in nan sur a tamon kusa numugu tamur. Ra mur in nanpat, uniutra mur in tama ara dongki kura di sa ker ukai tari, tomo nam o nutunulik. Mur in palos pas der, ma mur in ben der urin torom iau. ³ Ra taio in ting mur un der, mur in watungi lena, 'A Labino i nem der,' ra uniutra in madek ru der torom mur." ⁴ Di pam a utna ri sur din pam sot pas a wasiso anun o God ra a poropet i sa watung tari numugu lena, ⁵ "Mot in inanos a taro Saion lena,

'Tama i, anumot a king i mo ra pat i wan nanan torom mot, i unatino pasi, ma i kas una dongki, a barman na dongki.'" *Sek 9:9*

⁶ Aru nat na ususer der wan, ma der pami elar nama wasiso ra o Iesu i sa watung tari tander. ⁷ Der ben pas a dongki tomo nam o nutunu, der rakon ru anunder aru saket, ma der ubek tari netes una aru dongki, ra o Iesu i kas un der. ⁸ A labino kunur na taro kai det rakon ru anundet a kum saket, ma det talaso i una kisapi. Ma ara taro kai det tau pas a kum turunu duwai ma det ubek tari una kisapi. ⁹ A kunur na taro ra det mugu tano, ma det kai ra det mur, det kukukuk lena,

"Osana torom a Nutun o Dewid!
O naro ra i wanpat nama risan a Labino i dan!" *Sng 118:25-26*

"Osana usapat netes sakit!"

¹⁰ Ra o Iesu i wanpat sapat o Jerusalem, a taro Jerusalem rop det kisin ra det iting lena, "Osi ra?" ¹¹ Ra a taro ra det wan tomo nami, det watungi lena, "A musano ri i o Iesu, a poropet tagitong o Nasaret una papor Galili."

O Iesu i ruk una rumu na etabor

(Mk 11:15-19; Lk 19:45-48; Jn 2:13-22)

¹² O Iesu i ruk unin noworo ina rumu na etabor, ra i lu pirso ru a taro rop ra det siuru, ma det kai ra det kukul tiro iai. I bulus ru a kum kabulu anun a kum tene keles mani*, ma a kum kiskis anundet ra det siuru a kum tabun. ¹³ Ma i watungi tandet lena, "Di sa tumus tari una Buk Tabu lenri, 'Din watung anung a rumu nama rumu na niaring.'" *Ais 56:7*

Ikut mot pukusi sur in elar mukut nama 'nubual na parparau anun a kum tene wolong.'" *Jer 7:11*

¹⁴ A kum pulu ma det ra a kinkindet i mat det wan toromi ubalan in noworo ina rumu na etabor ma i ulangolango pas det. ¹⁵ Ra a kum lamlabino tene etabor

torom o God, ma a kum tene ususer tagun a Warkurai, det tama a wakak na utna sakit ri i pami, ra det longoro i kai a kum nat liklik det kukukuk ubalan in noworo ina rumu na etabor lena, "Osana torom a Nutun o Dewid," det kankan doko. ¹⁶ Ra det ting o Iesu lena, "Pepetlai, u sa longoro tar a kum wasiso ri anun a kum nat liklik?" O Iesu i balu det lena, "Ma! Pepetlai, ka mot luki utmakai a wasiso tagun a Buk Tabu? I watungi lena, 'U sa ususer tar a kum nat liklik sur det in watung ulabo pas ui.'" *Sng 8:2*

¹⁷ Ra i wan gusun det tiro iai, ra i wan utong o Betani ra i inep pas ara bung na mirum tong.

*O Iesu i bor in nanai na fig
(Mk 11:12-14, 20-24)*

¹⁸ Una kobot raut o Iesu i milet melet usapat o Jerusalem, ra i murak. ¹⁹ I tama in nanai na fig i tur taru una papor ina kisapi, ra i wan milau i. Ikut ke tama lako wino, a kum dono rop kut. Ra i watungi torom in nanai ra lena, "Turpasi uniri ma numur, kon wu melet mo." Uniutra, in nanai i marang.

²⁰ Ra a kum nat na ususer det tama i, det kisin, ra det tingi lena, "In nanai na fig ri, i marang lakit lai?" ²¹ O Iesu i balu det lena, "A inanos mot nama lingmulus, ra mot nurnur, ma ka mot in wur nuknuk, mot in pam a pinapam ri a pami unin nanai na fig. Awu sur i kut ri ra mot in pami, awu. Ra mot in watungi kai torom a tangai ri lena, 'Un taragot ma un sirok losop usa utasi,' in pami kut. ²² Ra mot nurnur, a kum utna rop ra mot wararing suri, din pitari ut torom mot."

A iting una dekdek ra o Iesu i ser papam nami

(Mk 11:27-33; Lk 20:1-8)

²³ O Iesu i ruk ubalan in noworo ina rumu na etabor, ma i ususer a taro. A kum lamlabino tene etabor torom o God ma a kum mugumugu anun a taro det wan toromi. Ra det tingi lena, "Asi na ngas na dekdek ra u pam a kum utna ri nami? Osi ra i pitar tar a dekdek ri tam?" ²⁴ Ra o Iesu i balu det lena, "Iau kai an ting mot nam ara iting. Ra mot in balu i, an inanos mot una dekdek ra a ser pam a kum utna ri nami. ²⁵ Tagai a dekdek ra o Jon i baptaiso a taro nami? Tan o God, o tan a taro kut?"

Ra det wasiso etetalai torom det lena, "Ra dat in watungi lena, 'Tan o God,' in balu dat kut lena, 'Sur asau ra ka mot nurnur uni?' ²⁶ Ikut ra dat in watungi lena, 'Tan a taro,' dat ngaran a taro, uni det rop det nurnur

un o Jon lena, i a poropet." ²⁷ Ra det balu o Iesu kut lena, "Ka met tasmani." Numur o Iesu i watungi tandet lena, "Iau kai, kan inanos mot una dekdek ra a ser pam a kum utna ri nami."

A wasiso elelar una ru nutnutun a musano

²⁸ O Iesu i inanos det lena, "Asau mot nuki? Ara musano aru nutnutunu, aru nat musano. I wan torom a mugano, ra i watungi tano lena, 'Nutunglik, uniri un nan sur a kinobot na wain ma un pamam.'" ²⁹ Ra o nutunulik i watungi lena, 'Iau kan nan,' ikut numur i pukus melet a nuknukino, ra i wan. ³⁰ Ra o tamano i wan bulung torom ara pasander, ra i inanos utkai lenra, ra o nutunulik i balu i lena, 'I wakak kut tita, an nan ut,' ikut ke wan. ³¹ Osi na pasander ra i mur a wasiso anun a tamander?" Det balu i lena, "A mugano."

O Iesu i watungi tandet lena, "A inanos mot nama lingmulus, a kum tene los takis ma a kum pamuk na ino, kuri det ruk mugu nanan tamot, una matanitu anun o God. ³² O Jon i wanpat ra i ususer mot una tokodos na petutna, ra ka mot nurnur uni, ikut a kum tene los takis ma a kum pamuk na ino det nurnur uni. Mot tama tar det ut, ikut ka mot nukpukus kai sur mot in nurnur uni."

A wasiso elelar una kum tene pinapam una kinobot na wain

(Mk 12:1-12; Lk 20:9-19)

³³ "Mot in longoro ara wasiso elelar bulung ri: Ara musano i marut tar a kinobot na wain, ra i pam bat tari namin noworo. Tiro ubalan a kinobot, i kil tar in nutung sur din pas reseng a wino wain uni, sur a polono in nanpat. Ma i pam tar a nat na rumu lekeleke sur a tene tamtamabat. Numur i pitar tar a kinobot munung tan a ramano kum tene pinapam sur det in tamtamabati, ra i wan sur ara tamon gisen. ³⁴ Ra i milau a kalang sur din git tomo a wino wain, i tulu ru anun a kum tultul torom a taro na pinapam, sur det in los pas anunu lako kum kur wain. ³⁵ A taro na pinapam ra, det pam ukai pas anun a kum tultul, det um ara, det um doko ara ma ara kai det duku doko i nama kum watat. ³⁶ I tulu melet anun a ramano kum tultul, det susut tandet ra det mugu, ikut a taro na pinapam det pam meleti kut lenra un det. ³⁷ Numur i tulu ru o nutunulik ut torom det, uni i nuki lena det in urur uni. ³⁸ Ikut, ra a taro na pinapam det tama pas o nutunulik det wasiso tomo pas lena, 'I ra in keles o tamano, i mo ra i wan urin. Mot iap, dat

in um doko i, sur anundat mo a kinobot.’
³⁹ Ra det pam ukai pasi, det sugut pirso ru i tagun a kinobot, ma det um doko ru i.”

⁴⁰ Numur o Iesu i ting a taro lena, “Ra a taman a kinobot na wain in nanpat, asau ra in pami torom a taro na pinapam?” ⁴¹ Det balu i lena, “In um doko rop ru a sakino taro ra, ma in pitar tar a kinobot ra torom lako taro na pinapam gisen, sur det in tamtamabati. A taro na pinapam maragom ra, det in pitar tar anunu lako kum kur wain toromi una kalang na nginigit.”

⁴² O Iesu i watungi tandet lena, “Pepetlai, ka mot luk a wasiso ri una Buk Tabu? I watungi lena,

‘A wat ra a kum tene pam rumu det lakro ru tari,
 i ut ra, i wanpat a wakak na wat ra i udekdek a rumu.

A utna ri, a Labino ut i sa pam tari,
 ma i wakak sakit una numet a tam-tama.’ *Sng*
 118:22-23

⁴³ I mo ra a watungi tamot lena, din rakon ru a matanitu anun o God gusun mot, ma din pitari tan ara taro ra det in wu a wakak na windet.” ⁴⁴ Osi ra in puku taru una wat ri, in tiginogino, ma osi ra a wat ri in puku taru uni, in tiginogino rop elar nama kubus.†

⁴⁵ Ra a kum lamlabino tene etabor torom o God ma a kum Parisi det longoro a kum wasiso elelar anun o Iesu, det tasmani ut lena i wasiso kut un det. ⁴⁶ Ra det sisio sur tu kisapi sur det in pam ukai pasi, ikut det ngaran a kunur na taro, uni a taro det nurnur uni lena i a poropet.

22

A wasiso elelar una lukaro na unolin *(Lk 14:15-24)*

¹ O Iesu i wasiso melet torom det nama wasiso elelar lenri, ² “A matanitu tagisapat una langit i elar nama king ra i sa waninar tar a lukaro na unolin sur o nutunu, a musano. ³ Ra i tulu ru anun a kum tultul torom det, ra di sa inanos mugu tar det, sur det in ben pas det sur a lukaro. Ikut det putut rop kut. ⁴ I tulu ru i bulung anun a ramano kum tultul gisen nama wasiso lena, “Mot in inanos det ra di sa inanos mugu tar det lena, “A sa waninar rop tar a utna na inangon. A sa um doko tar a kum bulumakau ma a kum matok na butbut na bulumakau, a kum utna i sa waninar rop. Mot in nan urin una lukaro na unolin.” ’

⁵ “Ikut ka det tarom, det wan gisgisen kut. Ara i wan sur anun a du piso, ara kai sur anun a rumu na siuru. ⁶ Ma ara taro kai ra di wan sur det, det pam ukai pasi kut a kum tultul, ma det ban laulau det ma det um doko det. ⁷ A king ra, in balano i sungun doko, i tulu ru anun a taro na inaim, ra det um doko ru a kum tene umum doko taro ra, ma det tun ru anundet a tamon.

⁸ “I watung meleti tan anun a kum tultul lena, ‘Di sa waninar tar a lukaro na unolin, ikut det ra di sa inanos mugu tar det, ka det tokodos sur det in kis una lukaro. ⁹ Mot nan una kum kisapi ma osi ra mot in etoromi, mot in inanos lena in nan urin sur a lukaro.’ ¹⁰ Ra a kum tultul det wan una kum kisapi, ma det ben tomo det rop ra det etorom det, a kum sakino taro ma a kum wakak na taro kai, ma a lukaro na unolin i bukus nam det.

¹¹ “Ra a king i ruk sur in tama a taro, i tama torom pas ara musano ra ke emar nam tin namalu na lukaro na unolin. ¹² Ma i tingi lena, ‘Le, u ruk lai taru urin? Uni ka tin namalu na lukaro na unolin anum.’ A musano ra ke balu i. ¹³ Ra a king i watungi tan anun a kum tultul lena, ‘Mot in ker pas aru kikino ma aru lamano ma mot in woro pirso ru i unago utamon una dumirum. Tiro iai di tangtangis ma di ungingit lokondi iai.’

¹⁴ “Di sa kabo pas a susut, ikut di pilok pas a pak na taro kut.”

A iting una takis *(Mk 12:13-17; Lk 20:20-26)*

¹⁵ Numur a kum Parisi det wan tomo taru, ra det epak pas lena det in lar o Iesu sur tu wasiso anunu, sur det in takuni nami. ¹⁶ Det tulu ru anundet a kum nat na ususer tomo nama kum paspasan o Erod torom o Iesu, ma det watungi lena, “Tene Ususer, met tasmani lena ui a tokodos na musano, ma u ser ususer a taro una kisapi anun o God nama lingmulus. Ko nuknuk bing un asau ra a taro det watungi un ui, uni a magiram i takai kut torom a taro rop. ¹⁷ Un inanos met, asau a nuknukim? I tokodos sur din pitar a takis torom a Sisa* o awu?”

¹⁸ Ikut, o Iesu i tasmani lena, a nuknukin det i laulau, ra i watungi tandet lena, “Mot a kum tene torotoro, ilai ra mot nemi sur mot in lar iau? ¹⁹ Mot in ese iau nam tu mani na takis.” Ra det pitar tar a mani tano. ²⁰ Ma i ting det lena, “In masarin osi ri, ma a tumtumus ri uni anun osi?” ²¹ Det balu i lena, “Anun a Sisa.” Ra i watungi tandet

21:42: Rom 9:33; 1 Pit 2:6-8 † **21:44:** Una ramano kum du buk una wasiso Grik, katu vers 44. **22:6:** Mt 21:35

22:13: Mt 8:12; 25:30; Lk 13:28 **22:15:** Mk 3:6 * **22:17:** A Sisa i a labino mugumugu tagun a gapman Rom,

ma a taro Israel kai det kis utuntudu in anun a warkurai.

22:21: Rom 13:7

lena, "Asau ra anun a Sisa, mot in pitari torom a Sisa. Ma asau ra anun o God, mot in pitari torom o God." ²² Ra det longoro i, det kisin doko ma det wan gusuni.

A iting una nilaun melet gusun a minat
(Mk 12:18-27; Lk 20:27-40)

²³ Una bung ut ra a kum Sadusi, ra det ser ipul kut lena katu nilaun melet gusun a minat, det wan torom o Iesu, ma det tingi lena, ²⁴ "Tene Ususer, o Moses i watungi lena, ra tu musano in mat pas gusun anun a ino, ma katu nutunder, o tisinolik in ben pasi ra in nolin nami, sur in ulabo tar lako kum nat una risan o tisino ra i sa mat. ²⁵⁻²⁶ Ara kabo tisino, a wonom mawit na musano det, det kis epotor tamet. A mugano i nolin, ra i mat pas gusun anun a ino, ma katu nutunder. Ra a murmur tano bulung i nolin nama ino ra, ma i bulung i mat kut gusuni. Numur a mantul nami bulung. Ra i lenra torom a wonom mawit, det rop det nolin pas nami, ikut katu nutun tu pasandet. ²⁷ Ra numur a ino bulung i mat.

²⁸ "Una nilaun melet gusun a minat, a ino ra, anun osi na pasandet mo tagun a wonom mawit ra? Uni det rop det sa nolin pas nami."

²⁹ O Iesu i balu det lena, "Mot raro doko, uni ka mot tasman a Buk Tabu ma a dekdekin o God kai. ³⁰ Una nilaun melet gusun a minat, ka det in nolin melet mo, det in elar mukut nama kum ensel sapat una langit. ³¹ Ra mot ipul lena a kum minat ka det in katutur melet gusun a minat, pepetlai, ka mot luki utmakai a wasiso ra o God i sa watung tari tamot? I watungi lena, ³² 'Iau a God anun o Abaram, a God anun o Aisak ma a God anun o Jekop†.' Kis 3:6 O God awu sur a God anun a kum minat, i a God anundet ra det laun." ³³ Ra a kunur na taro det longoro i, det kisin doko una nun a ngas na etowo.

A warkurai ra i labo sakit
(Mk 12:28-34; Lk 10:25-28)

³⁴ A kum Parisi det longoro i lena, o Iesu i sa duku sot pas a kum Sadusi, ra det wan tomo toromi. ³⁵ Ma ara pasandet, a tene mananos tagun a Warkurai, i lari nama iting lena, ³⁶ "Tene Ususer, asi na warkurai ra i labo sakit taun det rop?" ³⁷ Ma i balu i lena, "Un nem a Labino anum a God namin balam rop, a niom rop, ma a nuknukim rop." Lo 6:5

³⁸ A warkurai ri i labo sakit tandet rop, ma i a mugano warkurai. ³⁹ Ma iri i a manru na warkurai, ra i ling na elar nami, 'Un nem o

pasam elar nami ra u nem ui ut.' Wkp 19:18

⁴⁰ Aru warkurai ri, der a kimkibin a kum wasiso na Warkurai rop anun o Moses ma a kum etowo anun a kum propopet."

A Karisito i a Labino anun o Dewid
(Mk 12:35-37; Lk 20:41-44)

⁴¹ Ra a kum Parisi det kis tomo, o Iesu i ting det lena, ⁴² "Asau ra mot nuki una Karisito? I a nutun osi?" Det balu i lena, "A nutun o Dewid." ⁴³ O Iesu i watungi tandet lena, "Ra i lenra, ilai ra a Tokodos na Nion i mugu o Dewid ra i watung a Karisito lena 'anung a Labino'? Uni o Dewid i watungi lena,

⁴⁴ 'A Labino i watungi torom anung a Labino lena,

"Un kis una papor sot na lamang,

tuk ra an winim pas anum a kum ebar

sur det in kis ututudu in anum a warkurai." ' Sng 110:1

⁴⁵ O Dewid i watung a Karisito lena, i anun a Labino. Ra i lenra, der tamano pepetlai?"

⁴⁶ Ma kataio i nuk pas tu wasiso melet sur in balu i nami. Turpasi una bung ra, kataio melet mo i wan toromi nam tu iting, uni det ngara.

23

A magiran a kum Parisi ma a kum tene ususer tagun a Warkurai

(Mk 12:38-39; Lk 11:43, 46; 20:45-46)

¹ Numur o Iesu i watungi tan a kunur na taro ma anun a kum nat na ususer lena,

² "A kum tene ususer tagun a Warkurai ma a kum Parisi det ususer a taro nama kum Warkurai elar nami ra o Moses i pami. ³ I

mo ra a kum utna rop ra det ususer mot uni, mot in muri, ma mot in pami. Ikut,

gong mot mur anundet a ngasino, uni ka det pam asau ra det watung tari. ⁴ Det pitar tar a kum warkurai ra i ngangitin sur a

taro det in muri, ikut det ut, ka det warut det uni. ⁵ Anundet a kum pinapam rop,

det pami kut, sur a taro det in tama det. I perere bing anundet a kum boks liklik ra

det ser uruk tar a kum du Buk Tabu uni ma det keru una kum masarindet. I walos bing

anundet a kum kulo ra kura una sinisir ina nundet a kum malu na niaring. ⁶ Det nem

a kinkinis na labino sa numugu una kum lukaro, ma a kinkinis kai sa numugu una

kum rumu na lotu. ⁷ Ma det nemi sur a taro det in pitar a labino urur torom det

una kum nubual na inawan tomo, ma det in watung det kai nama kum tene ususer.

22:23: Ap 23:8 **22:24:** Lo 25:5 **22:32:** Mt 8:11

wasiso ri i ese i lena, uniri detul laun. **22:39:** Mt 7:12

Mt 26:64 **23:3:** Mal 2:7-8 **23:5:** Mt 6:1; Kis 13:9; Lo 6:8; Nam 15:38-39

† **22:32:** O Abaram, o Aisak ma o Jekop detul mat, ikut a

22:40: Rom 13:10; Gal 5:14 **22:42:** Jn 7:42 **22:44:**

Mt 26:64 **23:3:** Mal 2:7-8 **23:5:** Mt 6:1; Kis 13:9; Lo 6:8; Nam 15:38-39

⁸ “Ikut, gong di watung mot a kum tene ususer, uni ara Tene Ususer sot kut anumot. Ma mot, mot nisnisino. ⁹ Ra gong mot tar tamamot un taio taginin upiso, uni ara Tamamot sot kut, ra i kis sapat una langit. ¹⁰ Ma gong di watung mot kai a kum mugumugu, uni ara sot kut anumot a mugumugu, a Karisito kut. ¹¹ Ma osi ra i labo tamot, in unatino pasi, ma in taromlu mot. ¹² Uni osi ra i ulabo pasi, din unatino i. Ma osi ra i unatino pasi, din ulabo i.”

O Iesu i wasiso una magiran a kum Parisi ma a kum tene ususer tagun a Warkurai

(Mk 12:40; Lk 11:39-42, 44, 47-52; 20:47)

¹³⁻¹⁴ O Iesu i watungi lena, “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot tagar bat a taro sur gong det ruk una matanitu tagisapat una langit. Ma mot ut, ka mot ruk uni, ma ka mot mulaot a taro ra det nem na ruk, sur det in ruk.*

¹⁵ “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot wan tuptupukus sa utasi ma sa ubual, sur mot in dat pukus taio, sur in nanpat a nat na ususer anumot. Ra i sa mulaot, mot sa tarai taru uni, sur in nan sur a labino sungun, ma anun a sakino petutna in labo taun anumot a sakino petutna.

¹⁶ “In laulau doko torom mot a kum pulu na mugumugu, uni mot watungi lena, ‘Ra taio i liliman nama rumu na etabor, ke maut, ikut ra taio i liliman nama gol una rumu na etabor, i ra i lingmulus.’ ¹⁷ Mot a kum longlong na pulu! Asau ra i labo tander? A gol, o a rumu na etabor? A rumu na etabor! Uni a gol ra i kis una rumu na etabor in nanpat a utna anun o God, uni a rumu na etabor i utalapor. ¹⁸ Mot watungi kai lena, ‘Ra taio i liliman nama kabulu na tuntun etabor, ke maut, ikut ra taio i liliman nama etabor ra di ubeki uni, i ra i lingmulus.’ ¹⁹ Mot a kum pulu! Asau ra i labo tander? A etabor, o a kabulu na tuntun etabor? A kabulu na tuntun etabor! Uni a etabor ra i kis una kabulu na tuntun etabor in nanpat a utna anun o God, uni a kabulu na tuntun etabor i utalapor. ²⁰ I mo ra osi ra i liliman nama kabulu na tuntun etabor, i liliman utkai nama kum utna rop ra kura uni. ²¹ Osi ra i liliman nama rumu na etabor, i liliman utkai nam o God ra i

kis uni. ²² Ra taio i liliman nama langit, i liliman ut nama kiskis na king anun o God, ma i liliman utkai nam o naro ra i kis uni.

²³ “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot nuknuk doko sur a kum natnat na warkurai lenri, mot pitar in tekteken nanai torom o God tagun a noino natnat na duwai ra i sangsangnain wakak tagun anumot a kinobot, ikut ka mot nuk pas a kum lamlabino utna una kum warkurai. Iri a kum lamlabino utna: a tokodos na warkurai, ma a marmaris torom a taro, ma a lingmulus na petutna. I wakak sur mot in pam a kum utna ra, ma gong kai mot dumano ru in tektekene tagun a noino, sur mot in pitari torom o God. ²⁴ Mot a kum pulu na mugumugu! Ra mot inum, mot rakon ru a sinip gusun a kap, ikut, a kamel ra kura una kap, mot inumi kut!

²⁵ “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot ser gos pasi kut a surun a kap ma a pelet, ikut a balander i bukus nama petutna na ungonos pas a utna tan taio, ma a ngasino ra ara i nuk pasi ut. ²⁶ Ui a pulu na Parisi! Un dur mugu pas a balan a kap ma a pelet, sur in talapor kai a surunder.

²⁷ “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot elar nama kum kulam na minat ra di pen tar det. Ra di tama det taginago upiso det wakak, ikut tiro ubalandet i bukus nama kum sursur na minat ma a kum utna rop ra i dur. ²⁸ Lenkutkai ra, a taro det tama a pinimot lena, mot a kum tene tokodos, ikut a balamot i bukus nama torotoro, ma a kum sakino petutna.

²⁹ “In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot utur a kum aim nisan a kum kulam na minat anun a kum poropet, ma mot mar a kum tung na minat anun a kum tene tokodos. ³⁰ Ma mot watungi lena, ‘Gunuk ra met sa laun tomo numugu nama kum tumtubu met, ka met in warut det ra det um doko a kum poropet.’ ³¹ Ikut uniri mot upuaso mot ut lena, mot a kum tumtubun det ra det um doko a kum poropet. ³² Mot mo, mot in urop a kum sakino petutna ra a kum tumtubu mot det sa ukatutur tari numugu.

23:11: Mt 20:26; Mk 9:35; Lk 22:26 **23:12:** Jop 22:29; Snd 29:23; Lk 14:11; 18:14 * **23:13-14:** Una ramano kum du buk una wasiso Grik, a ramano kum wasiso kai i kis una vers ri. I lenri: *In laulau doko torom mot a kum tene ususer tagun a Warkurai ma a kum Parisi, mot a kum tene torotoro. Mot wrop a kum ululeng anun a kum ula, ma mot pam a kum walalos na niaring sur a taro det in tama mot. I mo ra in labo sakit a warkurai na minabalu anun o God torom mot.*

23:16: Mt 15:14 **23:22:** Ais 66:1; Mt 5:34 **23:23:** Wkp 27:30; Mai 6:8 **23:25:** Mk 7:4 **23:27:** Ap 23:3
23:28: Lk 16:15 **23:31:** Ap 7:52 **23:33:** Mt 3:7; 12:34; Lk 3:7

³³ “Mot a kum sui! Mot a kum nutnutun a kum laulau na sui! Mot in kalabor eno pepetlai gusun a warkurai na minabalu una labino sungun?” ³⁴ I mo ra an tulu ru a kum poropet, a kum tene mananos, ma a kum tene ususer torom mot. Lako taro tagun det, mot in um doko det, ma lako taro, mot in sak wat det una kum nanai kutus, ma lako taro kai, mot in um det una numot a kum rumu na lotu, ma mot in lu ru det gusun anumot a kum tamon, ma det in kalabor sur a kum tamon gisen. ³⁵ Din pitar a warkurai na minabalu torom mot, una gapin a kum tene tokodos rop, ra di sa um doko tar det. Turpasi ra di um doko o Abel, a tene tokodos, ma i wan tuk ra di um doko o Sekaraia, a nutun o Berekia, i ra mot um doko i epotor nisan a kabulu na tuntun etabor ma a rumu na etabor. ³⁶ A inanos mot nama lingmulus, din pitar a warkurai na minabalu torom a taro tagun uniri una kum utna rop ri.

*O Iesu i maris o Jerusalem
(Lk 13:34-35)*

³⁷ “Jerusalem, Jerusalem, ui ra u ser um doko a kum poropet, ma det ra di tulu ru det torom ui, u duku doko ru det kut nama watat. A susut na dino a nem na ben tomo a kum nutnutun elar nama kereke ra i rakup bat tomo a kum nutnutunu utuntudu ina ru mebene, ikut ka mot nemi. ³⁸ Tama i! O God i sa wan gusun anumot a tamon. ³⁹ A inanos mot, ka mot in tama melet iau mo, tuk una bung ra mot in watungi lena, ‘O naro ra i wanpat nama risan a Labino i dan.’” *Sng 118:26*

24

A kum ukinalong ra in ese a uruurop na bung

(Mk 13:1-13; Lk 21:5-19)

¹ O Iesu i pirso gusun in noworo ina rumu na etabor. Ra i wan nanan, anun a kum nat na ususer det wan toromi, ma det inanos sur in tama a kum rumu nisan a rumu na etabor. ² Ra i watungi tandet, “Mot tama i ut a kum rumu ri, niko? A inanos mot nama lingmulus, numur din rege ginogino det rop, ma katu wat in inep netes un tu wat.”

³ Ra o Iesu i kis sapat netes una Tangai na Oliw, a kum nat na ususer det wanpat eno toromi, ma det watungi tano lena, “Un inanos met, nangisin mo a kum utna ri in nanpat? Ma asi na ukinalong ra in ese anum a milmilet ma a uruurop ina rakrakon

bual?” ⁴ O Iesu i balu det lena, “Mot in tumarong, sako taio in toro pas mot. ⁵ Uni a susut na taro det in nanpat nama risang, ma det in warango det lena, ‘Tau a Karisito,’ ra det in toro lako susut na taro. ⁶ Mot in longoro a kum inaim ma a kum inarang na inaim, ikut gong mot lai taru. A kum utna lenri det in nanpat, ikut a ururop ina rakrakon bual kura utnakai. ⁷ A kum kabotaro det in tur na inaim torom a kum se kabotaro, ma ara gapman in tur na inaim torom ara gapman. A kum lamlabino munurak, ma a kum guri in nanpat una kum tamon. ⁸ A kum utna rop ri, i elar nama kum mugano ngunungut, ra i ser wanpat una ino ra i ling na usus.

⁹ “Kura numur, din pitar mot sur din ban laulau mot, ma din um doko mot, ma a taro tagun a kum gapman rop det in nget mot, uni mot anungi. ¹⁰ Una kum bung ra, a susut det in nan gisen gusun a nurnur. Det in pitar etetalai det torom a kum ebar, ma det in nget etetalai det. ¹¹ A susut na torotoro na poropet kai det in nanpat, ma det in toro pas a susut na taro. ¹² A marmaris anun lako susut in rop, uni a kum sakino petutna in labo nanan. ¹³ Ikut osi ra in tur dekdek tuk anun a nilaun in rop, o God in ulauni. ¹⁴ Din warawai nama Wakak na Wasiso una matanitu anun o God torom a taro tagun a rakrakon bual rop, sur a wasiso talapor in nan torom a taro tagun a kum gapman rop, ra numur a ururop na bung in nanpat maragom.

A utumarong una sakino utna ra in nanpat

(Mk 13:14-23; Lk 21:20-24)

¹⁵ “Mot in tama ara sakino utna sakit in nanpat, in kis una rumu anun o God ra in ban udur a rumu ra. A utna ra, o Daniel a poropet i sa wasiso mugu taru uni. Osi ra in luk a kum wasiso ri, i wakak sur in mananos uni. ¹⁶ Una bung ra, det ra det kis una papor Judia, det in kalabor eno usapat una kum tangai. ¹⁷ Ra taio in kis sapat netes una nun a rumu*, ra in pirso, gong i ruk sur in los pas tu utna tagisa urumu. ¹⁸ Ma ra taio in kis sa ukinobot, gong i milet melet unago utamon sur anun a saket. ¹⁹ Una kum bung ra, in laulau doko torom a kum tianan, ma torom a kum ino kai ra a kum nutnutun det, det sus utmakai. ²⁰ Mot in wararing sur gong mot kalabor song una kum kalang na kotokoto, o una Bung na Sabat. ²¹ Uni una kum bung ra, in labo sakit a ngunungut. In labo

23:35: Stat 4:8; 2 Sto 24:20-21 **23:38:** 1 Kin 9:7-8; Jer 22:5 **24:2:** Lk 19:44 **24:5:** Mt 24:23-24; 1 Jon 2:18
24:9: Mt 10:22 **24:11:** Mt 24:5, 24; 1 Jon 4:1 **24:13:** Mt 10:22 **24:14:** Mt 28:19 **24:15:** Dan 9:27;
 11:31; 12:11 **24:17:** Lk 17:31 * **24:17:** A ngas na rumu anun a taro Israel, sapat na lur na rumu i elaro kut, ma det ser kis utkai uni. **24:21:** Dan 12:1

taun a kum ngunungut ra i ser wanpat una rakrakon bual. Turpasi una turturkibin ina rakrakon bual tuk uniri, ma numur kai, katu ngunungut in elar nami. ²² Ra gunuk o God ken kutus pirso a kum bung ra, katai ut in laun. Ikut in kutus pirso ru i sur det ra i sa pilok pas det, det in laun.

²³ “Una kum bung ra, ra taio in watungi torom mot lena, ‘Tama i, a Karisito kuri i,’ o ‘Kurong i,’ gong mot nurnur. ²⁴ Uni lako kum torotoro na Karisito, ma lako kum torotoro na poropet det in nanpat. Det in pam lako kum labino ukinalong ma lako kum utna na ukisin sur det in toro pas a taro ra o God i sa pilok pas det, raut ko det in pet lar pasi. Ikut ka det in pet lar pasi. ²⁵ Tama i, a sa inanos mugu tar mot uni.

²⁶ “Ra det in watungi tamot lena, ‘Kura i kis una nubual kalako taro uni,’ gong mot wan suri, ma ra det in watungi kai lena, ‘Kuri una rumu,’ gong mot nurnur. ²⁷ Uni una bung na inawan pat anun a Nutun a Musano, a taro rop det in tama i. In elar namin nememe, ra i meme i tagitong una matmatano tobar, tuk una matmatano lubur. ²⁸ A nubual ra a minat i inep uni, a kum kotkot det in nan tomo iai.

A Nutun a Musano in nanpat
(Mk 13:24-27; Lk 21:25-28)

²⁹ “Uniutra, ra i sa rop a kum mamaut ma a kum ngunungut una kum bung ra, ‘in matanas in dumirum, a kalang ken talapor, a kum nangngang det in puku pirso tagisapat una bakut,

ma a kum utna sapat netes una bakut det in tugunugunu.’ *Ais 13:10; 34:4*

³⁰ “Una bung ra, a ukinalong ina Nutun a Musano in nanpat una bakut. Ma a taro tagun a kum gapman rop una rakrakon bual det in domos. Ma det in tama a Nutun a Musano in nanpat una kum du bakut tagisapat una langit, nama dekdek ma a labino minamar. ³¹ In tuwuru in tangis bing, ra a Nutun a Musano in tulu pirso anun a kum ensel, sur det in ben tomo anun a taro na pipilok tagun a wat na matmatano wuwu, tagun ara papor rakrakon bual tuk tong una ara papor rakrakon bual.

A wasiso elelar unin nanai na fig
(Mk 13:28-31; Lk 21:29-33)

³² “Mot in ususer unin nanai na fig. Ra a kum kanokano in sibal pat melet, ma a kum dono in tapalos, mot tasmani lena a kum kalang na mararong i sa milau. ³³ Lenkutkai ra mot in tama a kum utna

rop ra a wasiso taru uni in nanpat, mot in tasmani lena, a du bung i sa milau. ³⁴ A inanos mot nama lingmulus, a kum utna rop ri in nanpat ra a taro tagun uniri det laun utmakai. ³⁵ A langit ma a rakrakon bual der in rop, ikut anung a kum wasiso ken rop.

Katutaio i tasman a bung ra a Nutun a Musano in nanpat

(Mk 13:32-37; Lk 17:26-30, 34-36)

³⁶ “Katutaio i tasman a bung o a du bung ra a kum utna ri in nanpat. A kum ensel sapat una langit ka det tasmani, ma o Nutunu kai ke tasmani, o Tamano sot kut i tasmani. ³⁷ A inawan pat melet anun a Nutun a Musano, in elar nama kum bung anun o Noa. ³⁸ Una kum bung ra in nolomom ke wanpat utmakai, det wangon, det inum, ma det unolin det, tuk una bung ra o Noa i kas una sip. ³⁹ Ma ka det tasman asau ra in nanpat, tuk in nolomom i wanpat, ra i los rop ru det. In lenkutkai ra una inawan pat melet anun a Nutun a Musano. ⁴⁰ Una bung ra, ra lako ru musano der in papam sa ukinobot, din los pas tu pasander kut, ma ara pasander awu. ⁴¹ Ra lako ru ino kai der in gino a wit nama wat sur in nanpat a palawa, din los pas tu pasander kut, ma ara pasander awu.

⁴² “I mo ra mot in tumarong, uni ka mot tasman a bung ra anumot a Labino in nanpat uni. ⁴³ Mot in tasmani: Ra a taman a rumu in tasman a du bung una mirum ra a tene wolong in nanpat uni, in kis ma in tamtamabat anun a rumu. Ken madek ru anun a rumu sur din wolongi. ⁴⁴ Mot kai, mot in koikoi taru, uni a Nutun a Musano in nanpat una du bung ra ka mot nuki lena in nanpat uni.

A lingmulus na tultul ma a tultul ra ke lingmulus

(Lk 12:41-48)

⁴⁵ “A tultul ra i lingmulus una nun a pinapam ma i mananos kai, anun a labino in ukis tari sur in mugumugu anun a kum tultul una nun a rumu, sur in ser tabor det nama andet a utna na inangon una kum du bung na inangon. ⁴⁶ A tultul ra, in dan ra anun a labino in nanpat ma in tama i ra i pam sot pas anun a pinapam. ⁴⁷ A inanos mot nama lingmulus, anun a labino in ubek tari sur in tene tamtamabat una nun a kum utna rop. ⁴⁸ Ikut ra a tultul ra, i a sakino tultul, ma i nuki lena, anun a labino ken nanpat lakit, ⁴⁹ in turpasi sur in um a kum tultul ra det papam tomo nami. Ma in

nangon ma in inum tomo nama kum tene ininum. ⁵⁰ Anun a labino in nanpat un tu bung o tu du bung ra a tultul ke tasmani, ma ke nuki lena in nanpat uni. ⁵¹ Ra a labino in tau kutkutusi, ma in pitar tar a warkurai na minabalu toromi, sur in kis tomo nama kum tene torotoro, una nubual ra di tangtangis ma di ungingit lokondi iai.

25

A wasiso elelar una noino toraro

¹ “Una du bung ra, a matanitu tagisapat una langit in elar nama noino toraro, ra det los pas anundet a kum lam, ma det wan sur det in barato a musano ra i nolin matok. ² A limo tagun det, det mananos, ma a limo kai tandet, ka det mananos. ³ Det ra ka det mananos det los anundet a kum lam, ikut ka det los lako kum koto na wel kai tomo nam det. ⁴ Ikut, det ra det mananos det los anundet a kum lam ma det losi utkai a kum koto na wel tomo nam det. ⁵ A musano ra i nolin matok ke wanpat lakit, ra a matandet i sunu, ma det inep dumun rop.

⁶ “Ra una labino mirum di kakabo lena, ‘Wo, a musano ra i nolin matok i sa wanpat! Mot iap, mot in barato i.’ ⁷ A kum toraro rop det tuangun, ma det waninar anundet a kum lam. ⁸ Det ra ka det mananos, det saring det ra det mananos lena, ‘Mot in tabor met nam lakalik wel, uni anumet a kum lam det sa ling na mat.’ ⁹ Det balu det lena, ‘Awu, sako ken elar nam dat rop. Mot in nan torom det ra det siuru wel ma mot in kukul pas.’ ¹⁰ Ikut ra det wan sur det in kukul, a musano ra i nolin matok i wanpat. A limo ra det sa waninar, det wan tomo nami sur a lukaro na unolin, ra di tagar bat a matansako.

¹¹ “Numur a limo ra ka det mananos det wanpat, ma det kakabo lena, ‘Labino, labino, un papos pas met.’ ¹² I balu det lena, ‘A inanos mot nama lingmulus, ka tasman mot.’

¹³ “I mo ra mot in tumarong, uni ka mot tasman a bung o a du bung ra a Labino in nanpat uni.

A wasiso elelar una tulu tultul (Lk 19:11-27)

¹⁴ “A matanitu tagisapat una langit i elar utkai nam ara musano ra i waninar sur in nan utiro una ra tamon gisen. I kabo pas anun a tulu tultul, ra i isuaro tar anun a kum ululeng tandet sur detul in papam nami. ¹⁵ I pitar tar a limo na arip na mani tan ara, ma aru arip tan ara, ma ara arip kai tan ara. I pitar tari torom detul taktakai elar ut nam anundetul a mananos.

Ra numur i wan una nun a inawan. ¹⁶ O naro ra di pitar tar a limo na arip na mani tano, i wan lakit ma i papam nami, ma i ulabo melet pas a limo na arip taguni. ¹⁷ Lenkutkai ra torom o naro ra di pitar tar aru arip na mani tano, i ulabo melet pas aru arip taguni. ¹⁸ Ikut, o naro ra di pitar tar ara arip na mani tano, i wan, i kil pas in nutung, ma i por eno tar a mani anun a labino anunu.

¹⁹ “Ra i sa suano i, a labino anun a tulu tultul, i wanpat ma i kabo pas detul sur detul in inanos kapo i una nun a mani. ²⁰ O naro ra di pitar tar a limo na arip na mani tano i wan toromi nama limo na arip melet, ra i watungi tano lena, ‘Labino, u pitar tar a limo na arip na mani tang. Tama i, a sa ulabo melet pas a limo na arip taguni.’ ²¹ Anun a labino i balu i lena, ‘Wakak sakit, ui a wakak na tultul, u lingmulus una num a pinapam. An ubek tar ui sur un tamtamabat lako susut na utna, uni u lingmulus una kum nat na utna ri. Ra uniri dar in nan ma dar in gas tomo.’

²² “O naro ra di pitar tar aru arip na mani tano i wan toromi, ma i watungi lena, ‘Labino u pitar tar aru arip na mani tang. Tama i, a sa ulabo melet pas aru arip taguni.’ ²³ Anun a labino i balu i lena, ‘Wakak sakit, ui a wakak na tultul, u lingmulus una num a pinapam. An ubek tar ui sur un tamtamabat lako susut na utna, uni u lingmulus una nat na utna ri. Ra uniri dar in nan ma dar in gas tomo.’

²⁴ “Numur, i ra di pitar tar ara arip na mani tano i wan toromi, ra i watungi lena, ‘Labino, a tasmani lena ui a tene ngalngalia. U ser pasong pas a utna ra ko marut tari, ma u git pasi kai, a win a utna ra ko marut tari. ²⁵ A ngaran ui, ra a wan, a por eno tar anum a mani. Iri melet mi anum a mani.’ ²⁶ Anun a labino i balu i lena, ‘Ui a laulau na tultul, a tabalamat na musano ui. U sa tasman tari lena, a pasong a utna ra ka marut tari, ma a git pasi kai a wino utna ra ka marut tari. ²⁷ I lai ra ko ubek tar anung a mani una beng sur an los pas anung a mani ma tu sibano kai una bung ra an nanpat uni? ²⁸ Mot in los ru a mani gusuni, ma mot in pitar tari torom o naro ra anun a noino arip na kina. ²⁹ Uni, osi ra i utur ukai a labino, din tabor meleti sur anun a utna in labo bing, ma osi ra ke utur ukai tu utna, din rakon ru asau lik ra kura i pam ukai i. ³⁰ Ra mot in woro piro ru a tultul ri, ra ke gas un tu utna, una dumurum, a nubual ra di tangtangis ma di ungingit lokondi iai.’

A Nutun a Musano in isuaro a taro una bung na warkurai

³¹ “A Nutun a Musano in nanpat nama nun a minamar, tomo nama nun a kum ensel, ra in kis una nun a kiskis na king. A kiskis ra a labino minamarino. ³² A taro tagun a kum gapman rop det in nan tomo umatano, ma in isuaro det, elar nama tene tamtamabat anun a kum sipsip i isuaro a kum sipsip gusun a kum meme. ³³ In tulu a kum sipsip sur a papor sot na lamano, ma a kum meme sur a papor kair. ³⁴ A king in watungi tandet ra kura una papor sot na lamano lena, ‘Mot wan urin, mot ra o Tita i sa watung udan tar mot. Mot in rakon pas a matanitu di sa waninar tari sur anumot, tagun numnumugu utmakai una turturkibin ina rakrakon bual. ³⁵ Uni a murak ra mot tabor iau, a muruk ra mot inum iau, a usiro ra mot ben ruk iau una rumu. ³⁶ Ka tin namalu anung ra mot pitar in namalu tang, a misait ra mot tamtamabat iau, ma a kis una karabus ra mot lumu iau.’

³⁷ “A kum tene tokodos det in tingi lena, ‘Labino, nangisin met tama ui ra u murak ma met tabor ui, o u muruk ra met tabor ui nam lako danim? ³⁸ Nangisin met tama ui ra u usiro ra met ben ruk ui una rumu, o ka tin namalu anum ra met pitar in namalu tam? ³⁹ Nangisin met tama ui ra u misait, o u kis una karabus, ra met lumu ui?’

⁴⁰ “A king in balu det lena, ‘A inanos mot nama lingmulus, asau ra mot sa pam tari torom tu musano oros kut tagun a kum tisting ri, mot sa pam tari ut un iau.’

⁴¹ “In watungi bulung torom det una papor kair na lamano lena, ‘Mot wan gisen gusun iau. A dekdekin a warkurai na minabalu i sa kis un mot. Mot nan una labino sungun ra ken mat, ra di sa waninar tari sur o Satan ma anun a kum ensel. ⁴² Uni a murak ra ka mot tabor iau, a muruk ra ka mot inum iau. ⁴³ A usiro ra ka mot ben ruk iau una rumu, ka tin namalu anung ra ka mot pitar tin namalu tang, a misait ma a kis una karabus ra ka mot lumu iau.’

⁴⁴ “Det bulung det in tingi lena, ‘Labino, nangisin met tama ui ra u murak, o u muruk, o u usiro, o ka tin namalu anum, o u misait, o u kis una karabus, ra ka met warut ui?’

⁴⁵ “In balu det lena, ‘A inanos mot nama lingmulus, asau ra ka mot pam tari torom tu musano oros kut, ka mot pami kai un iau.’ ⁴⁶ Ra det in nan sur a ngunungut tukum. Ikut a kum tene tokodos det in nan sur a nilaun tukum.”

26

Det wasiso tomo pas sur det in um doko o Iesu

(Mk 14:1-2; Lk 22:1-2; Jn 11:45-53)

¹ Ra o Iesu i sa watung rop tar a kum wasiso ri, i inanos anun a kum nat na ususer lena, ² “Mot tasmani ut, ra aru bung in rop, din turpas a labino bung na lotu na Wanlakai, ra din pitar tar a Nutun a Musano sur din sak wati unin nanai kutus.”

³ Una du bung ut ra a kum lamlabino tene etabor torom o God ma a kum mugumugu anun a taro, det kis tomo una labino rumu anun o Kaiapas, a mugumugu na tene etabor. ⁴ Det wasiso tomo pas sur det in pam ukai eno pas o Iesu, ma det in um doko i. ⁵ Det watungi lena, “Gong dat pami una labino bung na lotu, sako a taro det in kankan ma det in ukatutur tu inaim.”

Ara ino i lingis in nopolo sangsangnain unin lorin o Iesu

(Mk 14:3-9; Jn 12:1-8)

⁶ O Iesu i kis tong o Betani, una rumu anun o Saimon, i ra numugu i misait nama lepra. ⁷ Ara ino i wan torom o Iesu namin nokoto ra di pami nama wat. Tiro ubalan nin nokoto, a polo sangsangnain kura uni, ma a matano i ka doko. I lingisi unin lorin o Iesu, ra kura utmakai o Iesu i wangon. ⁸ A kum nat na ususer det tama i, ra det kankan doko uni, ma det watungi lena, “Sur asau ra di lingis orosi kut in nopolo sangsangnain ri? ⁹ I lai ra ka di siuru pasi sur lako labino mani sur din tabor a kum sibo na taro nami?”

¹⁰ O Iesu i sa tasman asau ra det wasiso uni, ra i watungi tandet lena, “I lai ra mot pitar a maut torom a ino ri? I sa pam tar a wakak na pinapam sakit un iau. ¹¹ A kum sibo na taro det in laun bolbolos tomo ut nam mot. Ikut iau, kan kis tukum nisamot. ¹² I sa lingis tar in nopolo sangsangnain ri una pining sur in waninar iau sur a bung ra an mat ma din uruk a minating una kulum na minat. ¹³ A inanos mot nama lingmulus, una kum tamon una rakrakon bual rop, ra din warawai nama Wakak na Wasiso ri, din inanos utkai an asau ra a ino ri i sa pam tari, sur a risano in tur na aim.”

O Judas i nemi sur in pitar tar o Iesu ulaman a kum mugumugu

(Mk 14:10-11; Lk 22:3-6)

¹⁴ O Judas Iskariot, ara tagun a noino ma aru nat na ususer, i wan torom a kum lamlabino tene etabor torom o God. ¹⁵ Ma i ting det lena, “Ra an pitar tar o Iesu ulamamot, asau mot in kul iau nami?” Ma det pitar

tar a tulu noino silwa tano. ¹⁶ Turpasi una bung ra i nuknuk sur tu wakak na du bung ra in pitar tar o Iesu ulamandet.

O Iesu tomo nama nun a kum nat na ususer det wan a utna na Wanlakai

(Mk 14:12-21; Lk 22:7-14, 21-23; Jn 13:21-30)

¹⁷ Una mugano bung una kum lamlabino bung na lotu na beret ra kalako is uni, a kum nat na ususer det wan torom o Iesu, ma det tingi lena, "U nemi sur met in waninar andat a utna sur a labino bung na lotu na Wanlakai awai?" ¹⁸ Ra i balu det lena, "Mur in nanpat sapat o Jerusalem, mur in etorom nam ara musano, ra mur in watungi tano lena, 'A Tene Ususer i watungi lena: Anung a bung i sa milau. Met nam anung a kum nat na ususer met in ukinalong a labino bung na lotu na Wanlakai munung una num a rumu.'" ¹⁹ A ru nat na ususer der pam soti ut asau ra o Iesu i sa watung tari tander, ma der waninar a utna na Wanlakai.

²⁰ Ra i sa lirip, o Iesu tomo nama nun a noino ma aru nat na ususer det kis una inangon. ²¹ Det wangon ra i watungi lena, "A inanos mot nama lingmulus, ara tagun mot in pitar tar iau ulaman a kum ebar." ²² Det tupunuk doko ra det rop taktakai det turpas a iting toromi lena, "Labino, awu sur iau niko?" ²³ O Iesu i balu det lena, "O naro ra mir puk tomo amir aru du beret una dis, i ut ra in pitar tar iau ulaman a kum ebar." ²⁴ A Nutun a Musano in mat elar nami ra di sa tumus tari una Buk Tabu. Ikut in laulau sakit torom a musano ra in pitar tari torom a kum ebar. In wakak toromi ra ka din ususi, sur gong i taramo a dekdek na warkurai ra uni." ²⁵ O Judas, i ra in pitar tari torom a kum ebar, i tingi lena, "Tene Ususer, awu sur iau niko?" I balu i lena, "Ui ut ra."

A ururop na inangon anun a Labino

(Mk 14:22-26; Lk 22:14-20; 1 Kor 11:23-25)

²⁶ Det wangon utmakai, ra o Iesu i los pas a beret, i watung wakak pas uni, i tibiki, ma i tabor anun a kum nat na ususer nami, ra i watungi lena, "Mot in rakoni ma mot in nani. Iri a pining." ²⁷ Numur i los pas a kap, i watung wakak pas uni ra i pitari tandet. I watungi lena, "Mot rop mot in inum taguni." ²⁸ Iri a gaping, a konubus ra i dat tomo tar a taro nam o God. A gaping ri, i tilingis sur in unus ru a kum sakino petutna anun a susut na taro. ²⁹ A watungi tamot lena, kan inum meleti mo lako wain, tuk ra dat in inum a matok na wain una matanitu anun o Tita."

³⁰ Ra det sa kele tar a kekeleke na lotu, det wan tito usapat una Tangai na Oliw.

O Iesu i wasiso mugu taru un o Pita ra in ipul

(Mk 14:27-31; Lk 22:31-34; Jn 13:36-38)

³¹ O Iesu i watungi tandet lena, "Miri umirum, mot rop mot in nan pas kut gusun iau, i kibino una kum utna ra in nanpat un iau. Elar nami ra di sa tumus tari una Buk Tabu lena,

O God i watungi lena, 'An um a tene tamabat anun a kum sipsip, ra a kum sipsip det in kalabor susuaro.'
Sek 13:7

³² Ikut, ra a sa katatur melet gusun a minat, an mugu utong o Galili." ³³ O Pita i watungi tano lena, "Ra det rop det in nan pas gusun ui, ikut iau awu." ³⁴ O Iesu i watungi tano lena, "A inanos ui nama lingmulus, miri umirum, a kereke ken kurkurirakuk utmakai, ra un ipul a tulu dino lena, ko tasman iau." ³⁵ O Pita i watungi tano lena, "Kan ipul ru ui. Ra iau kai an iru tomo nam ui, i wakak kut." Ma a kum nat na ususer rop kai det watungi lenutra.

O Iesu i wararing tiro o Getsemani

(Mk 14:32-42; Lk 22:39-46)

³⁶ O Iesu tomo nam anun a kum nat na ususer det wanpat una nubual a risano o Getsemani, ra i watungi tandet lena, "Mot in kis kut nin, ma iau an nan lilik utong, sur an wararing pas." ³⁷ Ra i ben pas o Pita tomo nama ru nutnutun o Sebedi. Una du bung ut ra, i tupunuk ma i maut doko a nuknukino. ³⁸ I watungi tandetul lena, "Anung a nilaun i maut doko nama tupunuk, milau mo an mat nami. Motul in kis kut nin, ma motul in koikoi taru ut tomo nam iau." ³⁹ I wan lilik taru usa numugu, i puku tuntuding taru una piso, ma i wararing lena, "Tita, ra gunuk in sot, un los ru a kap na mamaut ri gusun iau. Ikut gong u mur anung a nemnem, un muri ut anum a nemnem."

⁴⁰ I milet melet torom a tulu nat na ususer, ra i tama detul, detul sa inep dumun. I ting o Pita lena, "Pepetlai, ka motul in pet lari sur motul in koikoi tomo nam iau un tu du bunglik kut?" ⁴¹ Motul in koikoi, ma motul in wararing, sur gong motul puku una ululam. A niomotul i nemi, ikut a pinimotul i tungulu kut."

⁴² A manru na dino melet i wan gusun detul, ma i wararing lena, "Tita, ra ken sot sur un los ru a kap na mamaut ri gusun iau, an inumi ut. An muri ut anum a nemnem."

⁴³ I milet melet, ra i tama detul, detul sa inep dumun melet, uni a matandetul i sa

sunu doko. ⁴⁴ Ra i wan melet gusun detul, i mantulu wararing, ra i watung melet a niaring ra i sa watung tari munung.

⁴⁵ Ra i milet melet torom a tulu nat na ususer, i watungi tandetula lena, "Pepetlai, motul in inep liklik mukut ma motul in mana? Tama i, a du bung i sa milau, ra din pitar tar a Nutun a Musano ulaman a kum tene sakino. ⁴⁶ Motul katutur, dat na wan! Tama i, a musano ra in pitar tar iau ulaman a kum ebar, i sa wanpat."

Di dat pas o Iesu

(Mk 14:43-50; Lk 22:47-53; Jn 18:3-12)

⁴⁷ Ra o Iesu i wasiso utmakai, o Judas, ara tagun a noino ma aru nat na ususer, i wanpat, det nama kunur na taro. Det los a kum totok na inaim ma a kum nalnal. A kum lamlabino tene etabor torom o God ma a kum mugumugu anun a taro, det tulu ru det. ⁴⁸ O naro ra in pitar tar o Iesu ulaman a kum ebar i sa inanos mugu tar a kunur na taro una ukinalong ra in pami lenri, "O naro ra an gom a pangpagor na wano, i ut ra. Mot in pam ukai i."

⁴⁹ Uniutra o Judas i wan torom o Iesu ra i watungi lena, "Wakak na mirum, Tene Ususer!" Ra i gom a pangpagor na wano. ⁵⁰ O Iesu i watungi tano lena, "Pasang, un pami kut asau ra u wan urin suri." Ma a taro ra, det wan torom o Iesu, det pam ukai i ma det dat pasi.

⁵¹ Ara tagun det ra det wan tomo nam o Iesu, i dat pas anun in totok na inaim, ra i tau kutus ru in talngan a tultul anun a mugumugu na tene etabor torom o God. ⁵² O Iesu i watungi tano lena, "Uruk melet anum in totok una bano, uni det rop ra det etau nama kum totok na inaim, det in iru nama kum totok na inaim. ⁵³ Pepetlai, u nukki lena, in ngangitin sur an saring o Tita sur lako susut na arip na ensel, ra uniuutri in tulu ru det torom iau? ⁵⁴ Ikut, ra an pami lenra, ka din pam sot pas a kum wasiso na Buk Tabu una kum utna ri ra i sot sur din pami iau."

⁵⁵ Una du bung ra, o Iesu i watungi tan a kunur na taro lena, "Pepetlai, kutiro iau a tene inaim ma a tene wolong, sur i mo ri mot wanpat nama kum totok na inaim ma a kum nalnal sur mot in pam ukai pas iau? Una kum bung rop a ser kis ubalan in noworo ina rumu na etabor, a ser ususer a taro, ma ka mot pam ukai iau. ⁵⁶ Ikut a kum utna rop ri i wanpat sur din pam sot pas a kum tumtumus anun a kum poropet." Numur anun a kum nat na ususer rop det kalabor susuaro pas gusuni.

O Iesu i tur una warkurai umatan a taro na kiwung

(Mk 14:53-65; Lk 22:54-55, 63-71; Jn 18:13-14, 19-24)

⁵⁷ Det ra det sa pam ukai pas o Iesu, det beni utiro una rumu anun o Kaiapas a mugumugu na tene etabor torom o God. A kum tene ususer tagun a Warkurai ma a kum mugumugu kura det sa wan tomo. ⁵⁸ O Pita i mur nanan o Iesu, ikut i bakbak ut gusuni, tuk una nubual anun a mugumugu na tene etabor torom o God. I ruk una nubual ra, ma i kis tomo nama kum tene tamtamabat sur in tama asau ra din pami un o Iesu.

⁵⁹ A kum lamlabino tene etabor torom o God, tomo nama taro na kiwung rop, det sisio sur tu torotoro na wasiso un tu sakino utna ra o Iesu i sa pam tari, sur det in takuni nami, ma det in um doko i uni. ⁶⁰ A susut na tene torotoro det wanpat, ikut ka det sio lar pas tu utna ra det in takuni nami. Aru ra der wanpat murmur, ⁶¹ der watungi lena, "A musano ri i watungi lena, 'An rege ru a rumu na etabor ri anun o God, ma an pam melet pasi una tulu bung kut.'" ⁶² A mugumugu na tene etabor torom o God i tur, ra i ting o Iesu lena, "Pepetlai, kon balu det? Asau ra un balu a kum wasiso na etakun ri nami?" ⁶³ Ikut o Iesu ke wasiso. A tene etabor ra, i watungi tano lena, "Una risan o God, ra i laun, un inanos met ra ui a Karisito a Nutun o God, o awu."

⁶⁴ O Iesu i watungi tano lena, "I ut ra u sa watungi. Ma a watungi tamot lena, turpasi uniri, mot in tama a Nutun a Musano in kis una papor sot na laman o God, i ra i dekdek sakit, ma numur mot in tama i ra in nanpat una kum du bakut tagisapat una langit." ⁶⁵ A mugumugu na tene etabor i kankan ra i raros anun in namalu ut, ra i watungi lena, "I sa wasiso laulau un o God. Dat nem melet lako wasiso na etakun sur asau? Tama i! Mot sa longoro tar anun a kum wasiso laulau un o God. ⁶⁶ Asau mot nukki?" Ra det balu i lena, "I wakak sur in iru."

⁶⁷ Ma det ibis in masarino, ma det tubuli, ra ara taro det pasori, ⁶⁸ ra det watungi lena, "Karisito, ui a poropet, un inanos met. Osi ra i takalo ui?"

O Pita i ipul ru o Iesu

(Mk 14:66-72; Lk 22:56-62; Jn 18:15-18, 25-27)

⁶⁹ Ra o Pita i kis utmakai nago upiso una rumu ra, ara toraro, a tultul i wan toromi ra i watungi lena, "Ui kai ara tagun det ra mot ser wan tomo nam o Iesu a te Galili." ⁷⁰ Ikut

i ipul umatandet rop, i watungi lena, “Ka tasman asau ra u wasiso uni.” ⁷¹ Ra i wan utong nisan a matansako ina in noworo, ara toraro bulung i tama pasi, ra i watungi tan a taro tiro iai lena, “A musano ri, der ut nam o Iesu a te Nasaret.” ⁷² Ma i ipul melet, i liliman lena, “A lingmulus ut, ka tasman a musano ra.”

⁷³ Numur lilik, det ra det tur tiro iai det wan torom o Pita, det watungi tano lena, “A lingmulus ut ra ui kai ara tagun det. Met longoro lele ui kut una num a liu na wasiso.” ⁷⁴ Ma i liliman torom det lena, “Ra an toro o God in warkurai dekdek iau. Ka tasman a musano ra.” Ra uniutra a kereke i kurkurirakuk mut. ⁷⁵ Ma o Pita i nuk pas a wasiso ra o Iesu i sa watung tari tano lena, “A kereke ken kurkurirakuk utmakai, ra un ipul a tulu dino lena, ko tasman iau.” Ra i pirso gusun a nubual ra, ma i tangis dokodoko i.

27

Di pitar tar o Iesu torom o Pailat
(Mk 15:1; Lk 23:1-2; Jn 18:28-32)

¹ Una kobot raut, a kum lamlabino tene etabor rop torom o God ma a kum mugumugu anun a taro, det wasiso tomo pas un o Iesu sur din um doko i. ² Det ker pas aru lamano, det beni ra det pitari ulaman o Pailat, a labino mugumugu tagun a gapman.

O Judas i popos
(Ap 1:18-19)

³ O Judas, i ra i pitar tar o Iesu ulaman a kum ebar, i tasmani lena di sa warkurai tar o Iesu sur in mat, ra a labino tupunuk i losi. I millet ra i pitar melet ru a tulu noino silwa torom a kum lamlabino tene etabor torom o God ma a kum mugumugu. ⁴ Ma i watungi lena, “A sa pam tar a sakino petutna, uni a sa usobor tar o naro ra ke pam tu sakino.” Ra det balu i lena, “Met, met lai? Ui ut!” ⁵ I woro ru a tulu noino silwa una rumu na etabor, ra i wan ma i popos.

⁶ A kum lamlabino tene etabor torom o God det los pas a kum silwa, ra det watungi lena, “Ke tokodos una Warkurai sur dat in ubek a mani ri una ululeng na mani, uni a mani ri a ikul tagun a musano ra di um doko i.” ⁷ Ra det wasiso tomo pas uni, ma det kul pas a du piso gusun a tene pam kuro nama piopap, sur din porpor a kum minat ina kum usiro tiro iai. ⁸ I mo ra di watung a nubual ra nam “A piso na gap,” ma a taro det watungi ut lenra tuk uniri. ⁹ Lenra di pam sot pas a wasiso ra o Jeremaia a poropet i sa watung tari numugu lena, “Det

los pas a tulu noino silwa, a matano ra a taro Israel det ubek tari una musano ra. ¹⁰ Ma a tulu noino silwa ra di kul pas a du piso anun a tene pam kuro nama piopap, elar nama Labino i watung tari tang.”

O Pailat i ting o Iesu
(Mk 15:2-5; Lk 23:3-5; Jn 18:33-38)

¹¹ O Iesu i tur umatan o Pailat, a mugumugu tagun a gapman, ma a mugumugu i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.” ¹² A kum lamlabino tene etabor torom o God ma a kum mugumugu det takuni, ikut ke balu det. ¹³ Ra o Pailat i tingi lena, “Ko longoro a susut na utna ri det takun ui nami?” ¹⁴ Ke balu det un tu etakun ra det takuni nami, awu. Ra a mugumugu tagun a gapman i kisin doko uni.

Di pitar a warkurai sur o Iesu in mat
(Mk 15:6-15; Lk 23:13-25; Jn 18:39-19:16)

¹⁵ Una kum kilalo rop una kum lamlabino bung na lotu na Wanlakai, a mugumugu tagun a gapman i ser palos ru ara karabus ra a taro det sasaring suri. ¹⁶ Una kilalo ra, ara musano a risano o Barabas i kis una karabus una nun a kum lamlabino sakino petutna, ma a taro rop det tasmani. ¹⁷ A kunur na taro det wanpat tomo torom o Pailat, ra i ting det lena, “Osi ra mot nemi sur an palos ru i torom mot? O Barabas o o Iesu, i ra di watungi nama Karisito?” ¹⁸ I watungi lenri, uni i sa tasmani lena, a kum mugumugu anun a taro Juda, det pitar tar o Iesu toromi una sakino nuknukin det. ¹⁹ Ra o Pailat kura utmakai i pam a warkurai, anun a ino i pitar ru a wasiso toromi lena, “Gong u pam tu utna una tene tokodos ra, katu niraro anunu. Uni nanganong mirum, a ririon, ma a kum utna a tama i una musano ra, i ban laulau anung a nilaun.”

²⁰ Ikut a kum lamlabino tene etabor torom o God ma a kum mugumugu det ukatutur a balan a kunur na taro sur det in sasaring sur o Barabas, ma sur din um doko o Iesu. ²¹ A mugumugu tagun a gapman i ting det lena, “Osi na pasander ra mot nemi sur an palos ru i torom mot?” Det balu i lena, “O Barabas.” ²² O Pailat i ting det lena, “Asau ra an pami un o Iesu, i ra di watungi nam o Karisito?” Det rop det balu i lena, “Sak wati unin nanai kutus!” ²³ Ma i ting det lena, “Sur asau? Asi na sakino utna ra i sa pam tari?” Ikut det kukukuk dekdek lena, “Sak wati unin nanai kutus!”

²⁴ O Pailat i tama i lena, ke pet lar pas tu utna mo, ma a labino purpuruon milau in nanpat. Ra i los pas a danim, i gos pas

aru lamano umatan a kunur na taro, ra i watungi lena, "A langolango gusun a gapin a tene tokodos ri. Mot ut din warkurai mot uni." ²⁵ A taro rop det balu i lena, "I wakak kut, a warkurai na minabalu una gapino in kis un met ma una kum nutnutumet kai." ²⁶ O Pailat i palos ru o Barabas torom det. Ra di sa takalo tatar o Iesu, i pitar tari tan a kum tene inaim sur det in sak wati unin nanai kutus.

A kum tene inaim det urongon laulau un o Iesu

(Mk 15:16-20; Jn 19:2-3)

²⁷ A kum tene inaim anun a mugumugu tagun a gapman det dat pas o Iesu utiro urumu una labino rumu anun anundet a mugumugu. Ra det ben tomo pas a kum tene inaim rop toromi. ²⁸ Det palos ru anun a kum malu, ma det mar tari namin merek na malu. ²⁹ Ra det liko pas in narus a loklokono ma det ubek tari unin lorino elar nama kukup anun a king. Det upampam tari namin nubuku una sot na lamano* ma det kis butkeke umatano, ma det urongon laulau uni lena, "Ui a king anun a taro Juda!" ³⁰ Ma det ibisi, det rakon pas in nubuku gusuni, ma det raprapus in lorino nami. ³¹ Ra det sa urongon laulau papas uni, det palos ru in namalu gusuni. Det mar tari melet nama nun a kum malu, ma det ben pirso i sur din sak wati unin nanai kutus.

Di sak wat o Iesu unin nanai kutus

(Mk 15:21-32; Lk 23:26-43; Jn 19:17-27)

³² Det pirso ra det barato pas ara te Sairini, a risano o Saimon, ma det ungon-gos tari sur in los in nanai kutus anun o Iesu. ³³ Det wanpat una nubual ra di watungi nam o Golgota, a kukuraino a "Nubual na Lor na Minat." ³⁴ Det pitar tar a wain tan o Iesu, ra di sa pam tomo tari nam ara utna ra i mapak. I inum tama i, ikut ke nemi sur in inumi. ³⁵ Ra det sa sak wat tari unin nanai kutus, det pilai laki sur det in isuaro anun a kum malu torom det taktakai. ³⁶ Numur det kis ma det tamtamabat o Iesu. ³⁷ Sapat netes tan in lorin o Iesu unin nanai kutus, det ubek tar a wasiso na etakun uni, di tumus tari lena, "IRI O IESU, A KING ANUN A TARO JUDA."

³⁸ Ma di sak wat tari kai aru tene wolong tomo nami una arin nanai kutus, ara una papor sot, ma ara kai una kair. ³⁹ Det ra det wanan sakit o Iesu, det watung laulau i ma det lele lorindet toromi. ⁴⁰ Ma det watungi

lena, "Ui mo ra u watungi lena un rege ru a rumu na etabor ma un pam melet pasi una tulu bung kut, uniri un ulaun pas ui mo. Ra ui a Nutun o God, un pirso gusun in nanai kutus." ⁴¹ A kum lamlabino tene etabor torom o God ma a kum tene ususer tagun a Warkurai ma a kum mugumugu, det kai det urongon laulau un o Iesu, det watungi lena, ⁴² "I ulaun pas a taro gisen, ikut ken ulaun lar pasi ut. Ra i a King anun a taro Israel, uniutri in pirso gusun in nanai kutus ma dat in nurnur uni. ⁴³ I nurnur ut un o God. Ra o God i nemi, uniutri in ulaun pasi, uni i ut i sa watung tari lena, 'Iau a Nutun o God.'" ⁴⁴ Aru tene wolong ra der kete tomo nami, der kai der watung laulau i.

O Iesu i mat

(Mk 15:33-41; Lk 23:44-49; Jn 19:28-30)

⁴⁵ Turpasi una noino ma aru pakano bung una suan, tuk una tulu pakano bung una lirup, a bual rop i dumirum. ⁴⁶ Ra i tulu pakano bung, o Iesu i kukukuk dekdek lena, "Eloi, Eloi, lema sabakatani?" A kukurai ina wasiso ra i lenri, "Anung a God, anung a God, ilai ra u wan gusun iau?" Sng 22:1

⁴⁷ Ara taro tagun det ra det tur milau det longoro i, ra det watungi lena, "O naro ri i kakabo sur o Elaija." ⁴⁸ A iapiap kut, ara tagun det i kalabor, ra i los pas ara utna ra i ser dop a polo. I puk pasi una wain ra i mititir, i ubek pasi unin nanai ra i tulsu toto i usapat sur o Iesu in inumi. ⁴⁹ Ara taro kai tagun det, det watungi lena, "Te, dat in maked tari munung. Dat in tama i ra o Elaija in nan pirso sur in ulaun pasi, o awu." ⁵⁰ O Iesu i kukuk dekdek melet pas, ra i ubek ru anun a nilaun.

⁵¹ Una du bung ut ra, in namalu ra di mabat kutus nami sa urumu una rumu na etabor i tararos potor, turpasi tagisapat netes tuk unago piso. A guri i wanpat, ma a kum watat det tapagol. ⁵² A kum kulam na minat det papos, ma a susut na taro anun o God ra det sa mat, det katatur melet. ⁵³ Det pirso gusun a kum kulam na minat. Ma numur tan a katkatatur melet anun o Iesu, det wanpat sapat o Jerusalem, a tamon anun o God, ma det tur pat torom a susut na taro. ⁵⁴ A mugumugu anun a kum tene inaim, ma det kai ra kura tomo nami ra det tamtamabat o Iesu, det taramo a guri, ma det tama a kum utna ra i wanpat, ra det ngara doko. Det watungi lena, "I lingmulus ut, a musano ri a Nutun o God."

^{27:25:} Ap 5:28 ^{27:28:} Lk 23:11 * ^{27:29:} In merek na malu, a kukup ma in nubuku detul tamtama elar nama ememar anun a king. ^{27:30:} Ais 50:6 ^{27:34:} Sng 69:21 ^{27:35:} Sng 22:18 ^{27:38:} Ais 53:12 ^{27:39:} Sng 22:7; 109:25 ^{27:40:} Mt 26:61; Jn 2:19 ^{27:43:} Sng 22:8 ^{27:48:} Sng 69:21 ^{27:51:} Kis 26:31-33; Ibr 10:19-20 ^{27:55:} Lk 8:2-3

⁵⁵ A susut na wardain kai ra det mur o Iesu tagitong o Galili sur det in waruti, det tur bakbak taru ut, ma det tama a kum utna ri. ⁵⁶ Kura epotor tandet, a tulu ino kai ri, o Maria Magdalen, ma o Maria a nan o Jems ma o Josep, ma a nan aru nutnutun o Sebedi.

*Di inep tar o Iesu una kulam na minat
(Mk 15:42-47; Lk 23:50-56; Jn 19:38-42)*

⁵⁷ Ra i sa lirop, ara tene gongon, a te Arimatia, a risano o Josep, i kai ara nat na ususer anum o Iesu, ⁵⁸ i wan torom o Pailat ma i saring pas a minatin o Iesu tano. Ra o Pailat i itula sur din pitar tari tano. ⁵⁹ O Josep i los pas a minatino, ma i pulus pasi namin wakak na matok na malu. ⁶⁰ ra i inep tari una nun a matok na kulam na minat, ra i sa kil tari una papor wat. I bulus bat tar a matansako na kulam ra nama labino wat, ra i wan gusuni. ⁶¹ O Maria Magdalen ma o Maria kai, a nan o Jems ma o Josep, der kis taru numugu tan a kulam na minat.

Det tamtamabat a kulam na minat

⁶² Una bung numur, a Bung na Sabat, a kum lamlabino tene etabor torom o God ma a kum Parisi det wan tomo torom o Pailat. ⁶³ Det watungi tano lena, “Labino, met nuk pas a wasiso anum a tene torotoro ri. Ra i laun utmakai, i watungi lena, ra a tulu bung in rop, in laun pat melet. ⁶⁴ Un tulu ru lako taro sur det in tamtamabat wakak a kulam na minat, elar nama tulu bung, sako anum a taro na ususer det in nanpat ma det in wolong pas a minatino, ra det in inanos a taro lena i sa laun melet gusun a minat. Ra a torotoro ri anundet, in labo taun a torotoro ra numugu o Iesu i sa watung tari.” ⁶⁵ O Pailat i watungi tandet lena, “Uniutri mot in ben pas a kum tene tamtamabat ma mot in nan. Mot in tamtamabat wakak a kulam na minat elar ut nam anumot a mananos.” ⁶⁶ Ra det wan, ma det udekdek bat tar a kulam na minat. Det ubek a ngas na ukinalong sur det in tasman pasi kut lena taio i sa papos tari. Ma det utur tar a kum tene tamtamabat sur det in tamtamabati.

28

*O Iesu i katuttur melet gusun a minat
(Mk 16:1-10; Lk 24:1-12; Jn 20:1-10)*

¹ Numur tan a Bung na Sabat, una kobot raut una mugano bung una wik, o Maria Magdalen, ma ara Maria kai der wan sur der in tama a kulam na minat. ² Ma a labino guri i wanpat, uni ara ensel anum a Labino i wan pirso tagisapat una langit sur a kulam na minat, ma i bulus gisen ru

a wat, ra i kis taru netes uni. ³ In masarino i talapor elar namin nememe, ma anum in namalu i kabang elar nama busu na top. ⁴ A kum tene tamtamabat det ngaran doko i, det neneder, ra det elar mukut nama kum minat.

⁵ A ensel i watungi tan a aru ino ra lena, “Gong mur ngara. A tasmani lena, mur sisio sur o Iesu, i ra di sak wat tari unin nanai kutus. ⁶ Ke kis mo nin. I sa katuttur melet elar nama nun a wasiso. Mur wan urin, ma mur in tama a nubual ra i inep taru uni. ⁷ Numur mur in nan lakit, ma mur in inanos anum a kum nat na ususer lena, ‘I sa laun melet gusun a minat. Uniri in mugu utong o Galili. Mot in tama i tong.’ Uniri a sa inanos mur nami.”

⁸ Der wan lakit gusun a kulam na minat. Der ngara, ikut a labino gasgas kai i los der. Der kalabor sur anum a kum nat na ususer sur der in inanos det. ⁹ Ra der wan nanan, o Iesu i wanpat kisin torom der. Ma i watungi tander lena, “Wakak na kobot torom mur.” Der wan toromi, der pam aru kikino ma der lotu toromi. ¹⁰ Ma o Iesu i watungi tander lena, “Gong mur ngara. Mur in nan ma mur in inanos a kum tistising, sur det in nan utong o Galili, ma det in tama iau tong.”

A wasiso anum a kum tene tamtamabat

¹¹ Ra aru ino der sa wan taru, a ramano kum tene inaim ra det tamtamabat a kulam na minat, det wan usapat o Jerusalem. Ma det inanos a kum lamlabino tene etabor torom o God una kum utna rop ra i wanpat tong una kulam na minat. ¹² Ra a kum lamlabino tene etabor ma a kum mugumugu det kis tomo, ma det wasiso tomo sur tu kisapi ra det in muri. Numur det pitar tar a labino mani torom a kum tene inaim, ¹³ ra det watungi lena, “Mot in watungi kut lenri, ‘Una mirum ra met inep dumun, anum a kum nat na ususer det wanpat, ma det wolong pas a minatino.’ ¹⁴ Ra a mugumugu tagun a gapman in longoro a utna ri, ra in iting uni, met in warut mot, ma met in palos pas mot gusun a warkurai.” ¹⁵ Ra a kum tene inaim det los pas a mani, ma det pami elar nami ra di sa inanos tar det uni. Ma a wasiso ri i wan sarara torom a taro Juda tuk uniri.

O Iesu i wanpat torom anum a kum nat na ususer

(Mk 16:14-18; Lk 24:36-49; Jn 20:19-23; Ap 1:6-8)

¹⁶ A noino ma ra nat na ususer anum o Iesu det wan utong o Galili una tangai ra o Iesu i sa inanos tar det uni. ¹⁷ Det tama o

Iesu, ra det lotu toromi, ikut ara taro tagun det ka det nurnur. ¹⁸ O Iesu i wan milau det, ma i watungi tandet lena, “O God i sa pitar rop tar a warkurai tang, sur an warkurai sur a kum utna rop sapat una langit ma nin kai upiso. ¹⁹ I mo ra mot in nan, mot in ususer a taro tagun a kum gapman rop, sur det kai anung a kum nat na ususer. Mot in baptaiso det nama risan o Tita, ma o Nutunu, ma a Tokodos na Nion. ²⁰ Ma mot in ususer det sur det in mur a kum wasiso rop ra a sa watung tari tamot. Ma i lingmulus lena iau, an kis tomo nam mot tuk una ururop ina rakrakon bual.”

A Wakak na Wasiso un o Iesu Karisito o Mak i tumusi

A wasiso talapor mugu

O Mak, ara risano kai o Jon, i tumus a buk ri. I a mugano musano ra i tumtumus una Wakak na Wasiso. O Mak, i awu sur ara tagun a noino ma aru nat na ususer anun o Iesu. A taro det nuki lena, o Mak i los a wasiso un o Iesu gusun o Pita, ra numur i tumusi. O Mak i labo pat sapat o Jerusalem. I kai i tama a kum utna ra o Iesu i pami. Ra dat luk a buk Mak 14:51-52 kutiro i wasiso uni ut.

Numur i wanpat a tene warut anun o Pol ma o Banabas una nunder a pinapam (tama Ap 12:25).

O Mak i tumtumus torom a taro Rom sur det in tasman a Wakak na Wasiso un o Iesu. Una buk ri, i inanos det lena, o Iesu kut ra a dekdekino i labo ma i utur ukai a warkurai. I nemi sur a taro Rom ma dat kai dat in tasmani lena o Iesu a Nutun o God.

O Mak i tumus a susut na utna na ukisin ra o Iesu i pami, ma a kum mamaut ra i taramo i, ikut ke tumus sikot a ramano wasiso na ususer anun o Iesu. Ara utna kai ra o Mak i tumusi, i lenri, o Iesu a dekdekino i labo sakit taun o Satan, ma i a Tene Ulaun anundat.

A tumtumus anun o Mak i tuk taru kut una 16:8. Ma a buk Mak 16:9-20 ara musano gisen ut i tumusi.

A inawan ina buk Mak:

- O Iesu i turpas anun a pinapam (1:1-13)
- O Iesu i papam tong o Galili (1:14-9:50)
- O Iesu i wan usapat o Jerusalem (10:1-52)
- A ururop na wik ma a minatin o Iesu (11:1-15:47)
- A katkatatur melet anun o Iesu gusun a minat (16:1-20)

O Jon a Tene Baptaiso i warawai

(Mt 3:1-12; Lk 3:1-18; Jn 1:19-28)

¹ Iri a Wakak na Wasiso un o Iesu Karisito, a Nutun o God.

² I turpasi elar nama wasiso anun o God ra a poropet Aisaia i sa tumus tari lena, "Tama i, iau an tulu ru anung a tene los wasiso sur in mugu tam, i ra in waninar anum a kisapi.

³ Una nubual kalako taro uni, in nalngan ara i kakabo lena,

'Mot in waninar a kisapi anun a Labino,

mot in pam kodos anun a kum kisapi.' "

Ais 40:3

⁴ A musano ra, i o Jon a Tene Baptaiso. I kis una nubual kalako taro uni, ra i ser warawai lena, a taro det in nukpukus ma din baptaiso det, sur o God in unus ru anundet a kum sakino petutna. ⁵ A taro rop tagisapat o Jerusalem ma tagun a kum tamon rop kai una papor Judia, det wan toromi. Det watung puaso anundet a kum sakino petutna, ra i baptaiso det una danim Jodan. ⁶ O Jon i ser emar namin namalu di pami nama iwu na kamel, ma i ser ker wati namin pino bulumakau. I ser wan a kum ko ma a polono tatos. ⁷ I ser watungi lena, "O naro ra in mur tang, a dekdekino i labo taun a dekdeking. Ka elar sur an par piso, ma an palos aru su gusun aru kokino, uni a natino doko tano. ⁸ Iau, a baptaiso mot nama danim, ikut i, in baptaiso mot nama Tokodos na Nion."

O Jon i baptaiso o Iesu, ra numur o Satan i lari

(Mt 3:13-4:11; Lk 3:21-22; 4:1-13)

⁹ Una ara bung, o Iesu i wan tagitong o Nasaret una papor Galili, ra o Jon i baptaiso i tiro una danim Jodan. ¹⁰ Uniutra o Iesu i saur gusun a danim, ra i tama a langit i papos, ma a Tokodos na Nion i wan pirso toromi elar namin natabun. ¹¹ In nalngan ara tagisapat una langit i watungi lena, "Ui a Nutunglik, a nat na wakak, a gas doko nam ui."

¹² Uniutra a Tokodos na Nion i tulu ru o Iesu usa una nubual kalako taro uni, ¹³ ra i kis tiro a wat na noino bung, ra o Satan i lari. I kis tomo nama kum kuabor ma a kum ensel det waruti.

O Iesu i kabo pas a wat na musano ra a kum tene woro uben

(Mt 4:12-22; Lk 4:14-15; 5:1-11)

¹⁴ Ra di sa uruk tar o Jon una karabus, o Iesu i wan utiro una papor Galili, i warawai nama Wakak na Wasiso anun o God. ¹⁵ I watungi lena, "A du bung i sa sot, ma a matanitu anun o God i sa milau. Mot in nukpukus, ma mot in nurnur una Wakak na Wasiso."

¹⁶ O Iesu i usal una usalin ina du tasi Galili, ra i tama pas o Saimon dersino nam o Endru. Der woro a uben sa utasi, uni der aru tene woro uben. ¹⁷ I watungi tander lena, "Mur in mur iau, sur an ususer mur sur mur aru tene ben taro." ¹⁸ Uniutra der katatur pas gusun anunder a kum uben, ma der muri.

¹⁹ I wan lilik melet, ra i tama pasi bulung o Jems dersino nam o Jon, aru nutnutun o

Sebedi. Der kis taru una pot ma der mabon anunder a kum uben. ²⁰ Uniutra, o Iesu i kabo der, ma der wan gusun a tamander ma a kum tultul kura una pot, ra der muri.

O Iesu i lakro ru a laulau na nion gusun ara musano

(Lk 4:31-37)

²¹ Det wan utong o Kapernaum. Ra una Bung na Sabat o Iesu i ruk utiro una rumu na lotu, ma i ususer a taro. ²² Ra det kisin una nun a kum etowo, uni i ususer det elar nam ara, ra a warkurai kura ut tano. Ke ususer det elar nama kum tene ususer tagun a Warkurai.

²³ Uniutra ara musano, a laulau na nion kura uni, i ruk utiro una nundet a rumu na lotu, ma i kakabo lena, ²⁴ "Iesu, a te Nasaret u ling na pam asau un met? U wanpat sur un ban laulau met? A tasman ui, ui a Tasur na Musano anun o God." ²⁵ O Iesu i sakbati lena, "Gong u wasiso! Pirso gusun a musano ra!" ²⁶ Ma a laulau na nion i gunu dekdek tari, ra i kukukuk ma i pirso gusuni.

²⁷ A taro rop det kisin doko, ra det ting etetalai det lena, "Asau ri? A matok na ususer. A musano ri i ususer nama dekdek, ma a warkurai kura ut tano. I ser wasiso tan a kum laulau na nion, ra det ser mur anun a wasiso." ²⁸ Ra a wasiso un o Iesu i wan sarara lakit utiro una kum tamon rop una papor Galili.

O Iesu i ulangolango pas a susut na misait

(Mt 8:14-17; Lk 4:38-41)

²⁹ O Iesu tomo nama nun a kum nat na ususer, det pirso gusun a rumu na lotu. Uniutra, det wan tomo nam o Jems ma o Jon ra det wan utiro una rumu anun o Saimon der nam o Endru. ³⁰ Ara ino a inumun o Saimon, i misait nama pinino mararong, kura i inep. Uniutra det inanos o Iesu uni. ³¹ Ra o Iesu i wan toromi, i pam a lamano, ma i ukatutur pasi, ra a mararong i rop mut gusuni. Numur a ino ra i tabor det mo nama utna na inangon.

³² Ra in matanas i sa sup taru, a taro det ben pat a kum misait rop torom o Iesu, ma det kai ra a kum laulau na nion kura un det. ³³ A taro rop tagun a tamon ra, det wanpat ma det bukus una matansako. ³⁴ Ra i ulangolango a susut ra det misait nama kum wur ngas na misait. I lakro ru a susut na laulau na nion gusun det, ma i turbat a kum laulau na nion sur gong det wasiso, uni det tasmani ut o Iesu.

O Iesu i warawai tiro una papor Galili
(Lk 4:42-44)

³⁵ Una lar, o Iesu i tuangun ra i pirso. I wan sur a nubual kalako taro uni, ma i wararing tiro iai. ³⁶ O Saimon ma det ra det wan tomo nami, det sisio suri. ³⁷ Ra det sa sio pasi, det inanos lena, "A taro rop det sisio sur ui." ³⁸ Ra o Iesu i balu det lena, "Dat in nan gisen bulung utiro un lako kum tamon milau, sur an warawai kai torom det. Uni i a kibino ra a wanpat suri." ³⁹ Ra i wan tuptupukus una papor Galili rop. I warawai una nundet a kum rumu na lotu, ma i lakro ru a kum laulau na nion gusun a taro.

O Iesu i ulangolango pas ara lepra

(Mt 8:1-4; Lk 5:12-16)

⁴⁰ Ara musano, i misait nama lepra, i wan torom o Iesu, ra i kis butkeke, ma i saring dekdeki lena, "Ke ngangitin torom ui. Ra u nemi, un ulangolango pas iau." ⁴¹ O Iesu i maris doko i. I kodos a lamano, ma i pam a pinino ra i watungi tano lena, "A nemi ut, un langolango." ⁴² Uniutra, a lepra i rop mut gusuni, ra i langolango melet. ⁴³ Uniutra, o Iesu i tulu ru i, ma i pak dekdek tari lena, ⁴⁴ "Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a kum etabor torom o God elar nami ra o Moses i sa watung tari, sur un talapor umatan o God. Ra un pami lenra, a taro det in tasmani lena u sa langolango." ⁴⁵ Ikut a musano ri, i wan ma i wasiso tuptupukus, ra a wasiso uni, i wan sarara. I mo ra, o Iesu ke wan puaso melet un tu tamon. I wan ra i ser kis tuptupukus mukut tiro una kum nubual kalako taro uni. Ikut a taro tagun a kum tamon det ser wan toromi.

2

O Iesu i ulangolango ara musano a pinino i mat

(Mt 9:1-8; Lk 5:17-26)

¹ A iso bung bat tari, ra o Iesu i wanpat melet tiro una tamon Kapernaum. A taro det longoro i lena i sa wanpat tiro urumu. ² A susut det wanpat, ra katu kolo sa urumu ma tiro upiso una matansako, ra i warawai torom det nama wasiso anun o God. ³ Ra a wat na musano det los ara musano a pinino i mat. Det losi torom o Iesu. ⁴ Ikut ka det pet lar pasi, uni a taro det bukus doko. Ra det wan tito usapat una lur na rumu, ma det papok saro pas a nubual taltalai nam o Iesu i tur iai, ra det unoro pirso a misait tomo nama lu ra i inep uni. ⁵ O Iesu i tama anundet a nurnur, ra i inanos a musano a pinino i mat lena, "Nutunglik, di sa unus ru anum a kum sakino petutna."

⁶ A ramano kum tene ususer tagun a Warkurai kura det kis taru, det nuknuk doko lena, ⁷ “Ilai sur a musano ri i wasiso lenra? I watung laulau o God uni i wasiso lar i o God. Osi i elar sur in unus ru a kum sakino petutna? O God sot kut.”

⁸ Uniutra, tiro una nion o Iesu i tasman a nuknukin det. Ra i ting det lena, “Sur asau ra mot nuknuk lenra?” ⁹ Osi na wasiso ra ke ngangitin sur an watungi tan a musano ri? Pepetlai, an watungi lena, ‘Di sa unus ru anum a kum sakino petutna,’ o, an lena, ‘Un katutur, un los anum a lu ma un nan?’ ¹⁰ A wasiso ra an watungi, an watungi sur mot in tasmani lena, o God i pitar a warkurai torom a Nutun a Musano, sur in unus ru a kum sakino petutna nin upiso.” Ra i watungi torom a musano a pinino i mat lena, ¹¹ “A inanos ui, un katutur, un los anum a lu, ra un nan sur anum a rumu.” ¹² I katutur, ma i los pas anum a lu, ra i wan pirso umatandet rop. A taro rop det kisin ra det rakon lekeleke pas o God lena, “Telek ri, met tama a ngas na utna lenri.”

O Iesu i kabo pas o Liwai
(Mt 9:9-13; Lk 5:27-32)

¹³ O Iesu i wan melet utiro una papor ina du tasi Galili. A labino kunur na taro det wanpat toromi, ra i ususer det. ¹⁴ Ra i wan nanan, i tama pas o Liwai a nutun o Alpius, i kis una rumu na los takis. O Iesu i inanos lena, “Un mur iau.” Ra o Liwai i katutur ma i muri.

¹⁵ Numur o Iesu ma anum a kum nat na ususer, det wangon tiro una rumu anum o Liwai. A susut na tene los takis, ma a kum tene sakino kai det wangon tomo nam det, uni a susut na taro lenri det ser mur o Iesu. ¹⁶ A kum tene ususer tagun a Warkurai ra det Parisi utkai, det tama o Iesu i wangon tomo nama kum tene sakino ma a kum tene los takis, ra det ting anum a kum nat na ususer lena, “Sur asau o Iesu i wangon tomo nama kum tene los takis ma a kum tene sakino?” ¹⁷ O Iesu i longoro i, ra i watungi lena, “A dokta ke wanpat sur det ra det langolango. Awu! I wanpat sur det kut ra det misait. Ka wanpat sur an kabo pas a kum tene tokodos, awu. A wanpat sur an kabo pas a kum tene sakino.”

Det ting o Iesu una winewel torom o God
(Mt 9:14-17; Lk 5:33-39)

¹⁸ A kum nat na ususer anum o Jon ma a kum Parisi det wewel. Ara taro det wanpat torom o Iesu ra det tingi lena, “Sur asau ra a kum nat na ususer anum o Jon ma a kum nat na ususer anum a kum Parisi det wewel, ikut anumi awu?” ¹⁹ O Iesu i balu det lena, “A kum paspasan a musano ra i

nolin matok, det in wewel pepetlai, ra kura utmakai i tomo nam det? Ke sot sur det in wewel, uni a musano ra kura utmakai i tomo nam det. ²⁰ Ikut tu bung in nanpat, ra din ben ru i gusun det, ra det in wewel maragom.

²¹ “Katutaio in mabon a du matok na malu tomo nama turaino ra i tararos. Ra in pami lenra, a du matok na malu in raros a turai na malu, ra in tararos bing. ²² Ma kataio in titior a matok na wain utiro unin turai na koto, ra di pami namin pino meme, sako a wain in busu ma in mubus ma in purus in nokoto na wain, ra a wain ma in nokoto der in laulau. Din titior a matok na wain ut utiro unin matok na koto na wain.”

O Iesu i wasiso talapor una Bung na Sabat

(Mt 12:1-8; Lk 6:1-5)

²³ Un ara Bung na Sabat, o Iesu i wan nanan epotor una kum kinobot na wit. Anun a kum nat na ususer det wan tomo nami, ra det turpas a kumut a ramano kum turunu wit. ²⁴ A kum Parisi det ting o Iesu lena, “Tama i! Ilai sur anum a kum nat na ususer det pam a utna ri, ra ke tokodos elar nama warkurai tagun a Bung na Sabat?” ²⁵⁻²⁶ O Iesu i balu det lena, “Pepetlai, ka mot luki utmakai asau ra o Dewid i pami? Una kilalo ra o Abiata i mugumugu na tene etabor torom o God, o Dewid tomo nama kum paspasano det murak, ma kalako utna. O Dewid i ruk tiro una rumu anum o God, ra i wan a beret di sa pitar tari torom o God. Ma i tabori kai a kum paspasano nami. Ikut a beret ra, a warkurai taguni, i lenri, a kum tene etabor kut torom o God det in nangan taguni, ma a taro oros awu.” ²⁷ Ra o Iesu i watungi tandet lena, “A Bung na Sabat di pami sur in warut a taro. Ka di pami sur a taro det in warut a Sabat. ²⁸ Lenkutkai ra, a Nutun a Musano i a Labino utkai tagun a Bung na Sabat.”

3

O Iesu i ulangolango pas ara musano una Bung na Sabat

(Mt 12:9-14; Lk 6:6-11)

¹ Numur o Iesu i ruk melet utiro una rumu na lotu. Ara musano kura iai, a lamano i kong. ² Ara taro kura det sisio sur tu utna det in takun o Iesu nami. Ra det tamtama wakak taru ut uni, ra in ulangolango pas a musano ra una Bung na Sabat, o awu. ³ Ra o Iesu i inanos a musano ra a lamano i kong lena, “Un tur tiro numugu tan a taro rop.” ⁴ Numur o Iesu i ting det lena, “Assau i tokodos sur

din pami una Bung na Sabat? Din pam a wakakino, o a laulau ino? Din ulaun taio, o din um doko taio?" Ikut det kis wowowon ma ka det balu i. ⁵ O Iesu i nas pukpukus det, in balano i sungun nam det, ikut i maris det, uni a balandet i dekdek doko. I inanos a musano ra a lamano i kong lena, "Kodos a lamam." I kodosi, ra a lamano i tokodos melet. ⁶ Uniutra a kum Parisi det pirsu ra det wasiso tomo nama taro anun o Erod, sur tu kisapi ra det in um doko o Iesu uni.

A labino kunur na taro det wan torom o Iesu

⁷ O Iesu tomo nam anun a kum nat na ususer, det wan utiro una papor ina du tasi Galili. Ma a labino kunur na taro taginin una papor Galili det muri. ⁸ A taro det longoro a kum sau ra i pami, ra a susut det wanpat toromi tagitong una ru papor Judia ma Idumea ma tagisapat o Jerusalem, ma tagitong una ara papor danim Jordan ma tagitong o Tair ma o Saidon. ⁹ Ra a kunur na taro det sa bukus, i inanos anun a kum nat na ususer, sur det in waninar tar tu pot. Ra a taro det in bukus talilis pasi, in kas uni. ¹⁰ I sa ulangolango tar a susut munung, ra a ramano kum misait bulung, det sugut saro det utiro toromi, sur det in pam a pinino. ¹¹ A taro ra a kum laulau na nion kura un det, ra det in tama i, det in puku piso sa numugu tano, ma det in woiwoi lena, "Ui a Nutun o God." ¹² Ikut i turbat dekdek det, sur gong det inanos tar taio lena, i osi.

O Iesu i kabo pas a noino ma aru aposel (Mt 10:1-4; Lk 6:12-16)

¹³ O Iesu i wan usapat una tangai, ra i kabo pas ara taro ra i ling sur det, ra det wan toromi. ¹⁴ I pilok pas a noino ma aru musano, ra i urising det a kum aposel. I pilok det sur det in nan tomo nami, ma sur in tulu det sur det in warawai. ¹⁵ Ma i pitar a dekdek torom det, sur det in lakro ru a kum laulau na nion. ¹⁶ Iri a kum risan a noino ma aru musano ra i pilok pas det: O Saimon, i ra o Iesu i urisingi nam o Pita, ¹⁷ o Jems ma o Jon dersino, aru nutnutun o Sebedi, der ra o Iesu i urising der nam o Boanerges, i kukuraino, aru nutnutun a pungpugur, ¹⁸ ma o Endru, o Pilip, o Batolomiu, o Matiu, o Tomas, o Jems a nutun o Alpius, o Tadius, o Saimon ara tagun a kum Silot*, ¹⁹ ma o Judas Iskariot, i ra i usobor tar o Iesu.

Det watungi un o Iesu lena a laulau na nion kura uni

(Mt 12:22-32; Lk 11:14-23; 12:10)

²⁰ Numur ra o Iesu i sa ruk taru una rumu, ara kunur na taro bulung det wanpat toromi, ra katu du bung sur o Iesu ma anun a kum nat na ususer det in nangon uni. ²¹ A kum kukunu, det longoro a wasiso ra uni, ra det wanpat sur det in ben pasi, uni a taro det watungi uni lena ke tokodos mo a nuknukino.

²² Ra a kum tene ususer tagun a Warkurai, ra det wan tagisapat o Jerusalem, det watungi lena, "O Belsebul, a labino anun a kum laulau na nion, kura un o Iesu, ra i ser lakro ru a kum laulau na nion nama dekdekin o Belsebul."

²³ Ra o Iesu i kabo pas det toromi, ma i wasiso torom det nama kum wasiso elelar lenri, "Pepetlai sur o Satan in lakro melet ru o Satan?" ²⁴ Ra tu gapman det melet ut det in waim etalai, a gapman ra in tur dekdek pepetlai? ²⁵ Ma ra lako taro tagun tu rumu det in waim etalai melet kut, ka det in kis tomo melet mo. ²⁶ Ra o Satan in tur na inaim melet kut nam anun a kum tultul, ma ka det in tur tomo, o Satan ken tur dekdek, in rop kut.

²⁷ "Kataio in pet lar pasi sur in ruk una rumu anun tu dekdek na musano, ma in los pas a kum utna tagitiro una nun a rumu, ra ken ker ukai mugu tari. Ra ut in ker ukai mugu tari, in los a kum utna maragom anun a musano ra. ²⁸ A inanos mot nama lingmulus, din unus ru a kum sakino petutna rop anun a taro, ma anundet a kum sakino wasiso kai un o God. ²⁹ Ikut ra taio in wasiso laulau una Tokodos na Nion, katutaio melet mo in unus lar pasi. Anun a sakino petutna ra, in kis tukum." ³⁰ O Iesu i wasiso lenri, uni det watungi uni lena, "A laulau na nion kura uni."

O nan o Iesu tomo nama kum tistisino (Mt 12:46-50; Lk 8:19-21)

³¹ Numur o nan o Iesu ma a kum tistisino det wanpat. Det tur taru kut nago upiso ra det tulu ara sur in ben pasi torom det. ³² A kunur na taro kura det kis talilis pasi, det inanos lena, "O nam ma a kum tistisim kunago det upiso. Det nem na tama ui." ³³ Ra i ting det lena, "Mot nuki osi o nang, ma osi det a kum tistising?" ³⁴ Numur i tamtama torom det rop ra det kis talilis pasi, ra i watungi lena, "Tama i, det ri o nang ma a kum tistising!" ³⁵ Uni osi ra i ser mur a nemnem anun o God, i ra o tising a musano, ma o tising a ino, ma o nang."

3:6: Mt 22:15-16 3:10: Mt 14:36 3:11: Lk 4:41 3:12: Mk 1:34 3:16: Jn 1:42 3:17: Lk 9:54

* 3:18: Silot i a risan a taro, ra det tur tomo, uni det nemi sur det in lakro ru a gapman Rom. 3:22: Mt 9:34; 10:25

3:31: Mk 6:3; Jn 2:12; Ap 1:14

4

O Iesu i wasiso elelar una wat na ngas na piso

(Mt 13:1-9; Lk 8:4-8)

¹ Numur o Iesu i tur melet pas a etowo tiro una usalin ina du tasi Galili. A labino kunur na taro det tur talilis pasi. Ra i kas una pot ra i kis taru uni sa utasi, ma a taro rop det tur nago korot una usalin. ² I ususer det una susut na utna nama kum wasiso elelar. I ususer det lena, ³ “Mot longoro i! A tene minarut i wan sur in sapro a kum pitino wit. ⁴ Ra i sapro nanan a kum pitino wit, a ramano det puku una kisapi, ra a kum piko det rop pat ma det wan ru i. ⁵ A ramano kai det puku una nubual na watat, ra kalako susut na piso uni. Det lubang pat lakit, uni a piso ke but. ⁶ Ikut ra a suan i sisio pat, i rang det ra det main ma det marang rop, uni kalako wakakorin det. ⁷ A ramano kum pitino wit det puku epotor una kum kuikui, ra a kum kuikui det lubang ma det rau bat pas det. Ra ka det wu lako windet. ⁸ Ikut a ramano kum pitino kai, det puku una wakak na piso. Det lubang pat, det labo ra det wu. A ramano det wu a tulu noino, a ramano kai a wonom na noino, ma a ramano ara mar na windet.” ⁹ Ra o Iesu i len tandet lena, “Osi ra arin talngano kura, i wakak sur in longoro nami.”

O Iesu i ususer nama wasiso elelar

(Mt 13:10-17; Lk 8:9-10)

¹⁰ O Iesu mukut kura i kis taru, ra a noino ma aru nat na ususer ma ara taro kai det tingi una kum wasiso elelar. ¹¹ Ra i inanos det lena, “O God i utalapor a wasiso na pidik una nun a matanitu torom mot. Ikut torom det a taro gisen, a ususer det una ututna rop nama kum wasiso elelar, ¹² sur, ‘det in tamtama ma det in tamtama, ikut ka det in tama lele i, ma det in longoro ma det in longoro, ikut ka det in tasmani.

Ra gunuk det in tasman lele i,

sako det in tupukus torom o God ma in unus ru anundet a kum sakino.’” *Ais 6:9-10*

O Iesu i utalapor a kukurai ina wasiso elelar una wat na ngas na piso

(Mt 13:18-23; Lk 8:11-15)

¹³ O Iesu i inanos det lena, “Pepetlai, ka mot talapor una wasiso elelar ri? Mot in talapor lai un tu wasiso elelar kai? ¹⁴ A tene minarut i elar nam ara musano ra i ususer det nama wasiso anun o God. ¹⁵ A kum pitino wit ra det puku una kisapi, det elar

nama taro ra det longoro a wasiso anun o God, ra uniutra o Satan i wanpat ma i rakon ru a wasiso. ¹⁶ A kum pitino ra det puku una nubual na watat det elar nama taro ra det longoro a wasiso anun o God, ra uniutra det pam ukai i nama gasgas. ¹⁷ Ikut a wasiso anun o God ke kis ubalandet, ra ka det in tur suano i, elar nama wit ra kalako wakakorin det. Det turpasi det wakak, ikut det in puku lakit una du bung ra a kum mamaut in nanpat, ma din ban laulau det, uni det nurnur una wasiso anun o God. ¹⁸ A kum pitino ra det puku epotor una kum kuikui, det elar nama taro ra det longoro a wasiso, ¹⁹ ikut a labino nuknuk sur a wakak na kinkinis nin upiso, ma a kum usobor tagun a kum ululeng taginin a rakrakon bual, ma a nemmem kai sur a ramano kum utna, i rau bat a wasiso anun o God, ra ka det wu lako windet. ²⁰ Ikut a ramano taro det elar nama kum pitino, ra det lubang sapat una wakak na piso. Det longoro a wasiso ma det muri, ra det wu. A ramano det wu a tulu noino, a ramano a wonom na noino, ma a ramano ara mar na windet.”

A wasiso elelar una lam

(Lk 8:16-18)

²¹ O Iesu i watungi tandet lena, “Katutaiao in los pas tu lam ma in wop bat tari nama paket, o in ubek tari kai nago utuntudu ina kabulu. Awu! Din ubek tari ut netes una nun a turtur. ²² A kum utna rop ra i kis eno, numur in nanpat puaso. Ma a kum utna rop ra kura i parau, numur in kis talapor, ma din tasmani. ²³ Osi ra arin talngano kura, i wakak sur in longoro nami.”

²⁴ O Iesu i wasiso liklik utmakai ra i lena, “Mot nuknuk wakak un asau ra mot longoro i. Ra mot in longoro wakak, o God in pitar a labino tastasman torom mot. Mot in utur ukai a tastasman ra i labo sakit. ²⁵ Osi ra i longoro anung a kum etowo, o God in pitar a labino tastasman toromi. Ikut osi ra ke longoro, din rakon ru i utkai asau lik ra kura i pam ukai i.”

A wasiso elelar una kum wino wit ra i lubang

²⁶ O Iesu i watungi kai lena, “A matanitu anun o God i elar nam ara musano ra i sapro a kum wino wit una piso. ²⁷ I ser inep una mirum ra una waspi i ser tuangun ma i papam, ma a kum wino wit det lubang pat ma det labo, ikut a musano ke tasmani ra det lubang pepetlai. ²⁸ A piso ut i ser ulubung a kum wit lenri: Numugu in ubek in gomono, numur in nanai ino in labo tito, ra numur in ubek in gilino tomo nama wino. ²⁹ Ra a kum wino det sa taka, a

4:1: Mk 3:7-9; Lk 5:1-3 4:2: Mt 13:34; Mk 4:33-34

5:15; Lk 11:33

4:22: Mt 10:26; Lk 12:2

4:24: Mt 7:2

4:12: Ap 28:26-27

4:18: Mt 19:23-24

4:21: Mt

4:25: Mt 13:12; 25:29; Lk 19:26

4:29: Jol 3:13;

Tam 14:15

musano ra, in nan tomo nam anun in totok, ma in pirat pas det, uni a kalang sur din pasong a wit i sa sot.”

*A wasiso elelar unin pitino mastad
(Mt 13:31-32, 34; Lk 13:18-19)*

³⁰ O Iesu i watungi lena, “A matanitu anun o God i elar nama sau? Ma asi na wasiso elelar ra an utalapor nami?” ³¹ I elar namin pitino mastad. I natino taun a kum pitino duwai rop, ra di maruti una piso. ³² Ikut ra di sa marut tari, ma i lubang, i labo taun a kum duwai na inangon rop. I ubek a kum lamlabino kanokano, ma a kum piko det ser pam pios una kum kanokano ra kura una kabosoro ino.”

³³ O Iesu i ususer det nama susut na wasiso elelar kai, ra i elar nam anundet a tastasman. ³⁴ Ke wasiso torom det nam tu se wasiso, a wasiso elelar rop kut. Ikut, ra i mukut tomo nam anun a kum nat na ususer det kis, i utalapor maragom a kukurai ina kum wasiso elelar.

*O Iesu i turbat a wuwu ma a top
(Mt 8:23-27; Lk 8:22-25)*

³⁵ Una bung na lirop ut ra, o Iesu i inanos anun a kum nat na ususer lena, “Dat nan utong una ara papor tasi.” ³⁶ A kum nat na ususer det kas utiro una pot ra o Iesu kura uni, ra det wan gusun a kum na taro. A ramano kum pot utkai det wan tomo nam det. ³⁷ A dekdek na wuwu doko i ragoti, ma a top i tapak sapat netes una pot, ra i milau sur in bukus nama tasi. ³⁸ O Iesu i inep dumun nago numur una pot, ma i ulalong taru una pilo. A kum nat na ususer det wangun pasi ma det inanos lena, “Tene Ususer, dat na iru! Ko nuk pas met mo?” ³⁹ I katutur, i turbat a wuwu ma i turbat a top lena, “Mana, un mililo.” Ra a wuwu i rop ma i mililo mut. ⁴⁰ Numur i watungi torom a kum nat na ususer lena, “Sur asau ra mot ngara? Awai kuti anumot a nurnur?” ⁴¹ Det ngara doko ma det ting etetalai det lena, “Osi na ngas na musano mulus ri? A wuwu ma a top der mur anun a wasiso!”

5

O Iesu i lakro ru a laulau na nion gusun ara musano

(Mt 8:28-34; Lk 8:26-39)

¹ O Iesu tomo nam anun a kum nat na ususer det wan kutus una du tasi Galili utong una ara papor sur a papor anun a taro Gerasa. ² Ra o Iesu i sirok gusun a pot, ara musano, a laulau na nion kura uni, i wan tagitong una kum kulam na minat sur in nan barato i. ³ A musano ra, i ser kis una kum kulam na minat. Ma kataio ut i pet lar pasi sur in pam ukai i, ma a sen kai

ke sot sur din ker ukai i nami. ⁴ A susut na dino mo, di ser ker ukai aru lamano ma aru kikino nama sen, ikut i ser rubut a sen ma i ser sak ginogino a kum sen gusun aru kikino. Katutaio ut i dekdek sur in umarom lar pasi. ⁵ Una kum mirum ma a waspi, i ser kukukuk abit tiro una kum kulam na minat ma una kum tangai, ma i ser tok a pinpinino nama watat.

⁶ Ra i bakkak utmakai, i tama o Iesu, i kalabor ma i kis butkeke nama urur numugu tano. ⁷ A musano ra i kukukuk namin labino walngano lena, “Iesu, a Nutun o God, a Labino Sakit, asau ra u nem na pami un iau? Un lililan umatan o God sur gong u ukadik iau.” ⁸ I wasiso lenri, uni o Iesu i sa watung tari lena, “A laulau na nion, un pirso gusun a musano ri.” ⁹ Numur o Iesu i tingi lena, “A risam osi?” Ma i balu i lena, “A risang A Kabo Liur, uni a susut met.” ¹⁰ Ra i saring liklik o Iesu sur gong i lakro ru tar det gusun a nubual ra.

¹¹ A kabo liur na boro kura det wangon tiro milau kut una tangai. ¹² Ra a kum laulau na nion det saring o Iesu lena, “Un tulu met utiro una kabo liur na boro, sur met in ruk utiro un det.” ¹³ O Iesu i mulaot ru det. A kum laulau na nion det pirso gusun a musano, ma det ruk taru una kum boro. A kum boro det kalabor pirso una palis sur a du tasi, ra det kongo rop. Det rop det elar nama ru arip.

¹⁴ A taro ra det ser tabor a kabo liur na boro ra, det kalabor ma det inanos tiro utamon na tiro utkai una kum natnat na tamon. Ra numur a taro det wan sur det in tama asau ra i wanpat. ¹⁵ Ra det wanpat torom o Iesu, det tama a musano ra a kabo liur na laulau na nion numugu det sisiop taru uni. Kura mukut i kis taru, i sa pipis pas ma a nuknukino i sa talapor melet. Ma a taro ra det ngara doko. ¹⁶ Det ra det sa tama tari, det inanos a taro una kum utna ra i wanpat una musano ra a kum laulau na nion kura uni, ma una kum boro kai. ¹⁷ Numur a taro det saring o Iesu sur in nan gisen gusun anundet a papor.

¹⁸ O Iesu i kas melet una pot, ra a musano ra numugu a kum laulau na nion kura uni, i saring o Iesu sur in nan tomo nami. ¹⁹ O Iesu ke mulaoti, ikut i lena, “Un nan utiro una num a tamon torom a kum kukum, ma un inanos det una labino utna ra a Labino i sa pam tari un ui, ma una nun a marmaris torom ui.” ²⁰ Ra a musano ra i wan, ma i inanos a taro tiro o Dekapolis*, una labino utna ra o Iesu i sa pam tari uni. Ra a taro rop det kisin.

O Iesu i ulaun pas a nutun o Jairus ma i ulangolango ara ino

(Mt 9:18-26; Lk 8:40-56)

²¹ O Iesu i kas una pot ma i wan melet utiro una ara papor du tasi. A kunur na taro det wan tomo ma det tur talilis pasi tiro una usalin. ²² Ara mugumugu tagun a rumu na lotu, a risano o Jairus, i wanpat tiro. I tama o Iesu, ra i kis butkeke sa numugu tano, ²³ ma i saring dekdeki lena, "A nutunglik, a ino, i sa ling na mat. Aiap, dar in nan ma un ubek a lamam sapat netes uni, sur in langolango ma in laun."

²⁴ Ra o Iesu i wan tomo nami, a kunur na taro det muri, ma det bukus talilis pasi.

²⁵ Ma ara ino kura, i misait nama gap elar nama noino ma aru kilalo. ²⁶ I taramo a labino ngunungut ulaman a kum dokta, ma i urop tar anun a kum utna ra i ulengi un det. Ikut ke langolango, a misait i labo nanan kut. ²⁷ I longoro a saksakutna un o Iesu, ra i wan tiro ubalan a kunur na taro, numur tan o Iesu, ma i tulana tar anun a saket. ²⁸ I pami lenra, uni i nuki lena, "Ra an tulani kut anun a saket, an langolango." ²⁹ Uniutra a gap i tuk, ra a ino i taramo a pinino i langolango ma ke taramo melet a ngunungut.

³⁰ Uniutra, o Iesu i taramo a dekdek i wan gusuni, i tupukus torom a kunur na taro ra i iting lena, "Osi ra i tulana anung a saket?" ³¹ Anun a kum nat na ususer det balu i lena, "U tama a kunur na taro ri det talilis bat pas ui, ra u iting pepetlai, lena, "Osi ra i tulana iau?" ³² Ikut o Iesu i tamtama utmakai sur osi ra i tulana tari. ³³ A ino ra, i tasman a misait i sa rop gusuni, i wan ra i puku sa numugu tan o Iesu. I ngara ma i neneder, ra i inanos nama sau ra i sa pam tari. ³⁴ O Iesu i watungi tano lena, "Nutunglik, anum a nurnur i sa ulangolango pas ui. Un nan nama malmal. Anum a misait i sa rop gusun ui."

³⁵ Ra o Iesu i wasiso utmakai, a ramano kum musano ra det wan tagitiro una rumu anun o Jairus, a mugumugu tagun a rumu na lotu, det wanpat. Det watungi lena, "O nutumlik i sa mat. Gong mo u ubalon a tene ususer." ³⁶ O Iesu ke nuk pas asau ra det watungi, ikut i inanos a mugumugu tagun a rumu na lotu lena, "Gong u ngara. Un nurnur kut."

³⁷ Ke madek taio sur in muri, ikut i mulaot sur o Pita, ma o Jems dersino nam o Jon detul in muri. ³⁸ Ra det wanpat tiro una rumu anun a mugumugu ra, o Iesu i tama det ra det tala, det ugaia ma det domos. ³⁹ I ruk ra i watungi tandet lena, "Ilai ra mot tala ma mot ugaia nama tinangis? A inolik

ri awu sur i mat, i inep dumun kut." ⁴⁰ Ra det urongon kut uni.

I tulu pirso ru det rop, ikut i ben pas a taman a inolik ma o nano ma anun a tulu nat na ususer, ra detul wan tomo nami. Ra det ruk torom a inolik. ⁴¹ O Iesu i pam a laman a inolik ra i inanos lena, "Talita kum!" A kukuraino i lenri, "A inolik, a watungi tam, un katuttur!" ⁴² Uniutra, a inolik i katuttur ma i wan. Det tama i ra det kisin doko. I elar nama noino ma aru kilalo anunu. ⁴³ O Iesu i turbat dekdek det sur gong det inanos tar taio un asau ra i sa pam tari. Ma i inanos det sur det in tabor a inolik nam lako utna na inangon.

6

A taro Nasaret ka det nurnur un o Iesu
(Mt 13:53-58; Lk 4:16-30)

¹ O Iesu tomo nam anun a kum nat na ususer det wan tagitong o Kapernaum, ra det wanpat tong o Nasaret, a tamon anun o Iesu. ² Una Bung na Sabat, i turpasi sur in ususer a taro tiro una rumu na lotu. A susut na taro ra det longoro i, det kisin doko, ra det watungi lena, "A musano ri i tasman lan a kum utna ri? A ngas na mananos sau ri di pitari tano, ra i pam a kum lamlabino utna na ukisin nami? ³ I a tene pam rumu kut, o nutun o Maria. A kum tistisino kai, o Jems, o Josep, o Judas ma o Saimon, ma a kum bunu kai ano kuri ut dat laun tomo nin." Ra a taro ka det nemi ut mo.

⁴ O Iesu i watungi tandet lena, "Di ser ru a poropet una kum se tamon, ikut det ut una nun a tamon, a kum kukunu ma det kai una nun a rumu ka det ru i." ⁵ O Iesu ke pam lar pas lako susut na utna na ukisin tiro iai, ikut i ubek aru lamano una pak na misait, ra i ulangolango pas det. ⁶ I kisin, uni ka det nurnur uni.

O Iesu i tulu ru a noino ma aru nat na ususer

(Mt 10:5-15; Lk 9:1-6)

Numur o Iesu i wan nanan una kum tamon, ra i ususer a taro. ⁷ I kabo pas a noino ma aru nat na ususer, ra i tulu ru det aruru, ma i pitar a dekdek tandet sur det in lakro ru a kum laulau na nion. ⁸ I watungi tandet lena, "Gong mot los tu utna una numot a inawan, mot in losi kut in nubuku. Gong mot los lako utna na inangon, gong tu rat ma gong mot silapo tu mani una numot a kum malu. ⁹ Mot in pas aru su, ikut gong mot los tar tin namalu na kelkeles. ¹⁰ Ra mot in nanpat tiro un tu rumu, mot in kis ut tiro iai tuk una bung ra mot in nan gusun a tamon ra. ¹¹ Ra a taro tagun tu tamon ka

det in gas pas mot, ma ka det in longoro anumot a wasiso, ra mot in nan gusun a tamon ra, mot in tang ru a kubus gusun a kikimot. Mot in tang ru a kubus sur a ukinalong na utumarong torom det*.”

¹² Ra det wan ma det warawai torom a taro, sur det in nukpukus. ¹³ Ma det lakro ru a susut na laulau na nion, ma det talus a susut na misait nama wel, ma det ulangolango pas det.

O Erod i nuki lena o Iesu i o Jon a Tene Baptaiso

(Mt 14:1-2; Lk 9:7-9)

¹⁴ O king Erod i longoro a wasiso un o Iesu, uni a taro rop det sa tasmani. Ara taro det watungi uni lena, “A musano ra, i o Jon a Tene Baptaiso, i sa laun melet gusun a minat. I mo ra, i pam a kum utna na ukisin.” ¹⁵ Ara taro kai det watungi un o Iesu lena, “I, a poropet Elaija.” Ara taro kai det watungi uni lena, “O Iesu, i ara poropet elar nama kum poropet tagun numugu.” ¹⁶ O Erod i longoro a kum wasiso ri un o Iesu, ra i lena, “A sa tau kutus ru tar in kabaran o Jon, ra uniri i sa laun pat melet gusun a minat!”

O Erod i itula sur din tau kutus in lorin o Jon a Tene Baptaiso

(Mt 14:3-12)

¹⁷⁻¹⁸ Numugu o Erod i tulu ru anun a kum tene inaim sur det in dat pas o Jon. Ra det sa dat pasi, det ker pasi, ma det uruk tari una karabus. O Erod i pami lenri, uni o Jon i inanosi lena, “Ke tokodos ra u nolin nam o Erodias, a urim.” I watungi lenri, uni o Erod i sa sal pas o Erodias, a ino anun o tisino, o Pilip, ra i nolin nami. ¹⁹ O Erodias i nget laulau o Jon ma i nemi sur in um doko i. Ikut ke pet lar pasi, ²⁰ uni o Erod i ngaran o Jon ra i tamtamabati. I pami lenra uni i tasmani lena, o Jon a tene tokodos ma a musano anun o God. O Erod i gas sur in longoro anun a kum wasiso, ikut a nuknukino i ser talara nami.

²¹ Numur o Erodias i nuk pas ara kisapi sur din um doko o Jon. Una bung ra di ukinalong a bung na usus anun o Erod, o Erod i pam a labino inangon sur a kum mugumugu tagun anun a gapman, ma a kum mugumugu anun a kum tene inaim, ma a kum mugumugu tagitong una papor Galili. ²² Ra kura det wangon, a nutun o Erodias a ino, i ruk ra i lagor umatandet. O Erod ma a taro ra det wangon tomo nami, det gas doko nami. Numur i inanos a toraro ra lena, “Asau ra u nemi tang, an tabor ui

nami.” ²³ Ra i uliliman dekdek tari lena, “Asau mukut ra un saringi tang, an pitari tam. Ra un saring iau kai sur tu kukur tagun a kum utna ra a warkurai suri, an pitari ut tam.” ²⁴ Ra i wan torom o nano ma i tingi lena, “Asau ra an saringi tano?” O nano i balu i lena, “Un saringi sur in lorin o Jon a Tene Baptaiso.” ²⁵ Uniutra, a toraro ra i wan lakit torom a king, ra i watungi tano lena, “Uniutri, un tabor iau namin lorin o Jon a Tene Baptaiso un tu pelet.”

²⁶ A king i tupunuk doko. Ikut ke nemi mo sur in ipul, uni i sa uliliman tari lena, asau mukut ra in saringi tano in tabori ut nami, ma a taro ra det kis tomo nami una inangon, det sa longoro tar anun a wasiso. ²⁷ Uniutra, i tulu ru a tene inaim sur in los tar in lorin o Jon toromi. A tene inaim i ruk una rumu na karabus, ra i tau kutus pas in kabaran o Jon. ²⁸ I ubek pas in lorino una pelet, ra i pitari torom a toraro, ra i bulung i pitari torom o nano.

²⁹ A kum nat na ususer anun o Jon det longoro i, ra det wan ma det los pas a minatino, ma det uruk tari una kulam na minat.

O Iesu i tabor a limo na arip na musano
(Mt 14:13-21; Lk 9:10-17; Jn 6:1-14)

³⁰ A kum aposel det kis tomo nam o Iesu, ra det inanosi una kum utna rop ra det sa pam tari, ma det sa ususer tar a taro kai nami. ³¹ Ra o Iesu i watungi tandet lena, “Dat in nan sur tu nubual kalako taro uni, sur mot in mana pas.” I watungi lenri, uni a susut na taro det wanpat liklik kut, ma katu du bung sur o Iesu tomo nam anun a kum aposel det in nangon uni. ³² Ra det kut, det kas una pot ra det wan sur a nubual kalako taro uni.

³³ A susut na taro ra det tama det ra det soi, det tama lele pas o Iesu tomo nam anun a kum aposel. Det kalabor gusun a kum tamon ra det mugu pat una nubual ra o Iesu det in sot iai. ³⁴ Ra det sot, o Iesu i tama a labino kunur na taro. I maris doko det, uni det elar mukut nama kum sipsip ra katu tene tamtamabat anundet. Ra i turpas a towo det nama susut na utna.

³⁵ Ra i sa lirop, anun a kum nat na ususer det wan toromi, ra det inanosi lena, “A nubual ri i bakbak gusun a kum tamon, ma i sa lirop kai. ³⁶ Un tulu ru a taro sur det in nan sur a kum natnat na tamon milau, ma a kum lamlabino tamon kai. Det in kul pas lako utna sur det in nani.” ³⁷ O Iesu i balu det lena, “Mot ut mot in tabor det.” Det watungi tano lena, “Kalako ru mar na

* **6:11:** A ukinalong ra a kum Parisi det ser muri, ra det wan gusun a nubual anun a taro ra awu sur a kum te Juda. Iri a utumarong torom det ra det rosumur gusun a wasiso anun o God. **6:13:** Jem 5:14 **6:14:** Mt 16:14; Mk 8:28; Lk 3:19-20 **6:17-18:** Wkp 18:16 **6:30:** Lk 10:17 **6:34:** Nam 27:17; Mt 9:36 **6:35:** Mk 8:1-9

denaria† sur dat in kul tabor det nami.”

³⁸ Ra o Iesu i ting det, “Lako isin beret kura mot losi? Mot in nan ma mot in tamtama.” Ra det sa tama tari, det inanos o Iesu lena, “A limanin beret kut ma arin kiripo kai kuri met losi.”

³⁹ Ra o Iesu i tulu anun a kum nat na ususer sur det in tibo susuaro a taro sur det in kis unin wuliso. ⁴⁰ A ramano det kis arara mar, ma a ramano kai a limlimo na noino.

⁴¹ Ra o Iesu i los pas a limanin beret, ma arin kiripo, i tamtama usapat una langit, i watung wakak pas torom o God uni, i tibik a limanin beret, ra i pitari tan anun a kum nat na ususer sur det in tibo a taro nami. I tibo det rop kai nam arin kiripo. ⁴² Det rop det wangon ma det masur. ⁴³ Numur det song bukus pas a noino ma aru rat nama beret ma a kiripo ra det wangon kopos pas uni. ⁴⁴ A kunur na taro ra det wangon, a niluluk ina kum musano sot kut i elar nama limo na arip.

*O Iesu i wan sapat netes una tasi
(Mt 14:22-23; Jn 6:15-21)*

⁴⁵ Uniutra, o Iesu i tulu ru anun a kum nat na ususer, sur det in kas una pot, ma det in mugu utong o Betsaida una ara papor tasi. Ma i, i kis utmakai sur in tulu ru tar a taro. ⁴⁶ Ra i wan gusun det, i wan tito usapat una tangai sur in wararing. ⁴⁷ Ra i sa lirop matano mirum, a pot i sa wan potora una du tasi, ma o Iesu mukut i kis nago una usalin. ⁴⁸ I tama det ra i sa tekes det a ulusu, uni a wuwu i waim tagisa numugu. Una lar, o Iesu i wan sapat netes una tasi torom det, ra i ling na wan sakit det. ⁴⁹ Det tama pasi ra i wan sapat netes una tasi, det nuki lena a nion. Ra det woiwoi, ⁵⁰ uni det rop det tama i, ra det ngara doko. Uniutra o Iesu i watungi tandet lena, “A kosom taru tamot, iau kut ri. Gong mot ngara.” ⁵¹ Ra o Iesu i kas torom det una pot, ra a wuwu i mana mut. Det kisin doko, ⁵² uni ka det tasman wakak a utna na ukisin ra o Iesu i sa pam tari una beret ma a kiripo. Uni a balandet i dekdek doko.

⁵³ Ra det sa wan kutus un ara papor tasi, det sot tiro una papor Genesaret, ra det ega tar a pot. ⁵⁴ Det sirok gusun a pot, ra uniutra, a taro det tama lele pas o Iesu. ⁵⁵ Det kalabor una kum tamon una papor ra, sur det in los a kum misait torom o Iesu. Det los det una kum lu utiro toromi, un asi na tamon ra det longoro i lena, kura i iai. ⁵⁶ O Iesu i wan utiro una kum natnat na tamon ma a kum lamlabino tamon kai, ra a taro det los pat a kum misait ma det inep

det tiro una nubual ra a taro det ser wan tomo uni. A kum misait det saringi sur det in pami kut a sinisir ina nun a saket. Ra det rop ra det pami, det langolango mut.

7

*A kum Parisi det muri kut a wasiso anun a taro, ma awu sur a wasiso anun o God
(Mt 15:1-9)*

¹ A kum Parisi ma a kum tene ususer tagun a Warkurai ra det wan tagisapat o Jerusalem, det wan tomo torom o Iesu. ² Det tama a ramano kum nat na ususer anunu ra det wangon kut nama dur na lamandet, ma ka det gos mugu pas a kum lamandet. ³ A kum Parisi tomo nama taro Juda rop det mur a wasiso anun a taro tagun numugu, lena ka det nangon, ra ka det gos mugu pas a kum lamandet. ⁴ Ra det in milet tagitiro una nubual na siuru, det in gos lamandet mugu pas ut, numur det in nangon. Ma a ramano kum etowo kai anun a taro tagun numugu det ser muri, i lenri, det ser gos a kum kap, a kum kuro, ma a kum ketel.

⁵ A kum Parisi ma a kum tene ususer tagun a Warkurai det ting o Iesu lena, “Ilai sur anum a kum nat na ususer ka det ser mur a kum etowo anun anundat a taro tagun numugu? Det ser wangon kut nama kum dur na lamandet.” ⁶ Ra o Iesu i balu det lena, “A wasiso anun o Aisaia i lingmulus ut, ra i wasiso na poropet mugu taru un mot a kum tene torotoro. I tumusi un mot lena,

‘A taro ri det ru iau kut nama wandet, ikut a balandet i bakbak doko gusun iau.

⁷ Det lotu oros kut torom iau, uni det ususer nama kum warkurai kut anun a taro.’ *Ais 29:13*

⁸ Mot sa wan gusun a kum Warkurai anun o God, ma mot muri mukut a kum etowo anun a taro.”

⁹ O Iesu i watungi tan a kum Parisi ma a kum tene ususer tagun a Warkurai lena, “A lingmulus ut, mot sa rosumur gusun a Warkurai anun o God, sur mot in muri kut a kum etowo anun anumot a taro tagun numugu. ¹⁰ Uni o Moses i watungi lena, ‘Un ru o tamam ma o nam,’ *Kis 20:12* ra i watungi kai lena, ‘Osi ra in wasiso laulau un o tamano ma o nano, din un doko i.’ *Kis 21:17*

¹¹ Ikut mot, mot ususer a taro lena, i wakak kut, ra taio in watungi tan o tamano ma o nano lena, ‘Asau ra an warut mur nami, a sa tabor tar o God nami.’ ¹² Mot turbati kut

† **6:37:** Anundet a mani det ser watungi nama denaria. Ara denaria i elar nama ikul anun ara musano una ra bung na pinapam. **6:46:** Lk 5:16 **6:49:** Lk 24:37 **6:51:** Mk 4:39 **7:2:** Lk 11:38 **7:4:** Mt 23:25 **7:10:** Lo 5:16

sur gong i warut o tamano ma o nano. ¹³Ra mot pami lenra, mot unatino pas a wasiso anun o God, ma mot muri kut a kum etowo ra mot los pasi tan anumot a taro tagun numogu. Ma a susut na utna kai lenri ra ke tokodos, mot ser pami.”

A kum utna ra i udur a taro umatan o God

(Mt 15:10-20)

¹⁴O Iesu i kabo melet pas a kunur na taro toromi, ra i watungi tandet lena, “Mot rop mot in longoro iau, ma mot in tasman lele anung a wasiso. ¹⁵⁻¹⁶Tu utna ra taio in nan pasi ma in ruk unin balano, ken uduri umatan o God. Ikut, a kum utna ra in pirso gusun a nuknukino, i ra in uduri umatan o God.”*

¹⁷O Iesu i wan gusun a kunur na taro, ma i ruk una rumu. Anun a kum nat na ususer det tingi una wasiso elelar ri. ¹⁸Ra i watungi tandet lena, “Pepetlai, mot kai, ka mot talapor utmakai? Pepetlai, ka mot tasmani lena a kum utna rop ra i ruk unin balan taio, ken uduri umatan o God? ¹⁹Uni ke ruk una nuknukino, i ruk pas kut unin balano ra i pirso melet.”

Ra una nun a wasiso ra, i upuaso i lena, a kum utna na inangon rop i wakak. ²⁰I watungi kai lena, “A utna ra in pirso gusun a nuknukin a taro, i ra in udur det. ²¹Iri a kum utna ra i ser wanpat tagun a nuknukin a taro: a kum sakino nuknuk, a kum petutna na pamuk, a wolong, a petutna ra di um doko a taro, a petutna ra di pam a sakino nam tu ino anun taio o nam tu musano anun taio, ²²a nemnem sur a susut na utna, a kum sakino petutna, a kum torotoro, a kum sakino nemnem na pinindi, a nuknuk laulau sur tu utna anun taio, a petutna ra di mang laulau ara, a petutna ra taio i ulabo pasi ut, ma a kum tuptup na petutna. ²³A kum sakino utna rop ri, det wanpat tagun a nuknukin a taro, ma i udur det umatan o God.”

A nurnur anun a ino ra awu sur a ino Juda

(Mt 15:21-28)

²⁴O Iesu i wan tagitiro, ra i wanpat milau a tamon Tair, ma i ruk un ara rumu. Ke nemi sur taio in tasmani ra kura i, ikut ke pet lar pasi sur gong det tasmani. ²⁵Ara ino, a nutunu a inolik, a laulau na nion kura uni. I longoro a wasiso un o Iesu, uniuutra i wan ra i kis butkeke nisan a kokino. ²⁶A ino ra, a ino Ponisia tagun a papor Siria, i awu sur a ino Juda. I saring o Iesu sur in lakro ru a laulau na nion gusun o nutunulik. ²⁷Ra o

Iesu i watungi tano lena, “Din tabor masur mugu tar a kum nat. Ke tokodos sur din los a utna ana kum nat, ma din woro i tan a kum pap.” ²⁸Ra a ino i balu i lena, “Labino, a lingmulus ut ra. Ikut, a kum pap kai det ser wan a kum mumumut na utna nago utuntudu ina kabulu na inangon ana kum nat.” ²⁹Ra o Iesu i watungi tan a ino ra lena, “Una num a wakak na minabalu, un nan kut. A laulau na nion i sa pirso gusun o nutumlik.” ³⁰A ino i millet melet, ra i tama o nutunu kura i inep taru una bano. A laulau na nion i sa pirso taru gusuni.

O Iesu i ulangolango pas ara musano ra i kutkut ma i ngat

³¹O Iesu i wan gusun a tamon Tair ma i wan sakit o Saidon sur a du tasi Galili, ra i wanpat una papor Dekapolis†. ³²Ara taro det ben ara musano i kutkut ma i ngat torom o Iesu, ma det saring sur in ubek aru lamano netes uni. ³³O Iesu i ben gisen pasi kut gusun a kunur na taro, ra i ubek arin kaskas na lamano una arin talngan a musano ra. I ibis taru ra i pam in karmen a musano. ³⁴I tatado usapat una langit, i los wuwu pas, ra i watungi tano lena, “Epata!” a kukuraino lena: “Un papos!” ³⁵Uniuutra, in talngano i talapor, ma in karmene i tapalos ra i wasiso pat. ³⁶Ra o Iesu i turbat dekdek a taro sur gong det inanos tar taio uni. Ikut ka det longoro i, ma a wasiso uni, i wan sarara kut. ³⁷Det ra det longoro a utna ri, det kisin doko uni, ma det watungi lena, “O Iesu i pam wakak pas a kum utna rop. I uwakak pas a kum kutkut sur det in longoro, ma a kum ngat sur det in wasiso!”

8

O Iesu i tabor a wat na arip na musano (Mt 15:32-39)

¹Ara bung ubalan a kum bung ra, a labino kunur na taro det wanpat tomo, ma kalako utna na inangon sur det in nani. O Iesu i kabo pas anun a kum nat na ususer toromi, ma i watungi tandet lena, ²“A maris doko a taro ri, uni det sa kis tomo nam iau nin, a tulu bung, ma kalako utna na inangon sur det in nani. ³Ra an tulu ru det sur anundet a kum tamon nama munurak, det in bengbeng nanan una kisapi, uni ara taro tagun det, det wan ut tagitiro bakbak.” ⁴Anun a kum nat na ususer det inanos lena, “A nubual ri, kalako taro uni. Tagai mo lako utna na inangon sur dat in tabor det nami?” ⁵Ra o Iesu i ting det lena, “A isin beret kura mot losi?” Det balu i lena, “A wonom mawit kut.”

7:15-16: Ap 10:14-15 * 7:15-16: Una ramano kum du buk una wasiso Grik, a ramano kum wasiso kai i kis una vers ri. I lenri: Ra taio arin talngano kura, i wakak sur in longoro nami. † 7:31: O Dekapolis a kukuraino a noino lamlabino tamon. 7:36: Mk 1:43-45 7:37: Ais 35:5 8:1: Mk 6:34-44

⁶ O Iesu i inanos a taro rop sur det in kis. I los pas a wonom mawit nin beret, i watung wakak pas uni torom o God, i tibiki ma i pitari torom anun a kum nat na ususer sur det in tabor a taro nami. Ra det pami lenutra. ⁷ Det los pas a kabanin natnat na kiripo kai, ra i watung wakak pas uni, ma i pitari sur det in tibo a taro nami. ⁸ A taro det wangon ma det masur. Numur det song bukus pas a wonom mawit na rat nama kum utna ra det wangon kopos pas uni. ⁹ A kum ino tomo nama kum nat liklik ma a kum musano, det rop det wangon. A niluluk ina kum musano kut, i elar nama wat na arip. Ra numur o Iesu i tulu ru det. ¹⁰ I kas pas una pot tomo nam anun a kum nat na ususer, ma det wan sur a papor Dalmanuta.

A kum Parisi det ting o Iesu sur in pam tu ukinalong

(Mt 16:1-4)

¹¹ A kum Parisi det wanpat torom o Iesu, ma det wasiso na engaras tomo nami. Det ling sur det in lari. Ra det saringi sur in pam tu ukinalong sur in ese i lena, i tagisapat una langit. ¹² O Iesu i taramo a mamaut ma i rungasotuk, ra i watungi lena, "Ilai ra a taro tagun uniri, det tamtama sur tu ukinalong? A inanos mot nama lingmulus, ka din pam tu ukinalong torom mot." ¹³ Ra i kas melet una pot, ra i wan gusun det utong un ara papor tasi.

A utumarong una is anun a kum Parisi ma anun o Erod

(Mt 16:5-12)

¹⁴ A kum nat na ususer det dumanu i sur det in los lako beret. In tekene sot kut ra det losi tomo nam det una pot. ¹⁵ Ra o Iesu i utumarong det lena, "Mot in tumarong una is anun a kum Parisi, ma anun o Erod." ¹⁶ Ra det wasiso tomo una kukurai ina wasiso anun o Iesu, ra det lena, "I watungi lenra uni ka dat los lako beret." ¹⁷ O Iesu i tasman anundet a wasiso ra i watungi tandet lena, "Ilai ra mot wasiso lena ka mot los lako beret? Pepetlai ka mot mananos ma ka mot talapor utmakai? Pepetlai, a balamot i dekdek?" ¹⁸ A kum matmata mot i kis, ikut ka mot tamtama nami. Ma a kum talngamot i kis, ikut ka mot longoro nami. Pepetlai, ka mot nuk pas asau ra a sa pam tari? ¹⁹ Ra a tibik a limanin beret torom a limo na arip na musano, a iso rat ra mot song bukus pasi nama utna na inangon ra di wangon kopos pas uni?" Det balu i lena, "A noino ma aru." ²⁰ "Ma i kai, ra a tibik a wonom mawit na beret torom a wat na arip na musano, a iso rat ra mot bukus pasi

nama utna ra di wangon kopos pas uni?" Ra det balu i lena, "A wonom mawit." ²¹ Ra i ting det lena, "Ka mot talapor utmakai?"

O Iesu i utamtama pas a pulu tong o Betsaida

²² O Iesu tomo nam anun a kum nat na ususer det wanpat tong o Betsaida, ra ara taro det ben pat ara pulu toromi, ma det saringi sur in ubek a lamano uni, sur in tamtama. ²³ I pam a laman a pulu, ra i ben gisen pasi gusun a tamon, i ibis tar arin matan a pulu, ma i ubek aru lamano uni, ra i tingi lena, "U sa tama tu utna?" ²⁴ A musano ra i tamtama tokodos, ra i lena, "A tama a taro det elar kut nama kum duwai ra det wan nanan." ²⁵ O Iesu i ubek melet aru lamano una arin matan a pulu, ra arin matano der talapor wakak maragom, ra i tama a kum utna rop. ²⁶ O Iesu i tulu ru a musano ra, ma i watungi tano lena, "Un nan tokodos sur anum a rumu. Gong u wan ubalan a tamon."

O Pita i wasiso talapor un o Iesu

(Mt 16:13-20; Lk 9:18-21)

²⁷ O Iesu tomo nam anun a kum nat na ususer det wan sur a kum tamon milau o Sisaria Pilipai. Ra det wan nanan, i ting det lena, "A taro det watung iau nam osi?" ²⁸ Det balu i lena, "Ara taro det watung ui o Jon a Tene Baptaiso. Ara taro det watung ui o Elaija, ma ara taro kai det watung ui, ara tagun a kum poropet." ²⁹ Ra i ting det lena, "Ma mot, mot watung iau nam osi?" Ra o Pita i balu i lena, "Ui a Karisito." ³⁰ Ra i turbat dekdek det sur gong det inanos tar taio nami.

O Iesu i wasiso mugu una nun a minat

(Mt 16:21-28; Lk 9:22-27)

³¹ O Iesu i turpasi sur in towo anun a kum nat na ususer lena, "A Nutun a Musano in taramo a susut na mamaut. A kum mugumugu, a kum lamlabino tene etabor torom o God, ma a kum tene ususer tagun a Warkurai det in rosumur gusuni ma din um doko i. Ra a tulu bung in rop, in katatur melet." ³² A wasiso ri anun o Iesu i talapor kut. Ra o Pita i ben gisen pasi ma i turbat dekdeki. ³³ O Iesu i tupukus, ma i tamtama torom anun a kum nat na ususer, ra i wasiso dekdek torom o Pita lena, "Satan, un nan unago numur tang! Uni u muri kut a nuknukin a taro, ma ko mur a nuknukin o God."

³⁴ O Iesu i kabo pas a kunur na taro tomo nam anun a kum nat na ususer toromi, ma i watungi tandet lena, "Ra taio i nemi sur in mur iau, gong i mur a nuknukino. In los pas anun in nanai kutus ma in mur iau.

³⁵ Osi ra i maris bat anun a nilaun, in iru, ikut osi ra ke maris bat anun a nilaun uni i tagun iau ma a Wakak na Wasiso, in laun. ³⁶ Osi ra in utur ukai a kum ututna rop taginin una rakrakon bual, ma a niono in iru, in wakak pepetlai toromi? ³⁷ In kul keles a niono nama sau? ³⁸ A taro tagun uniri, anundet a nilaun i bakkak gusun o God, ma det a kum tene pam sakino. Osi ra in maimai un iau ma una nung a kum wasiso epotor tan a taro ri, a Nutun a Musano kai in maimai uni, ra in nanpat tomo nama kum ensel anun o Tamano ma a minamar anun o Tamano.”

9

¹ Ma i watungi tandet lena, “A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a matanitu anun o God ra in nanpat nama dekdek.”

A pinin o Iesu i tamtama senene
(Mt 17:1-13; Lk 9:28-36)

² Numur tan a wonom na bung, o Iesu i ben pas o Pita, o Jems ma o Jon, ra i ben gisen pas detul usapat una tangai ra i tur toto bing. Tiro iai detul tama a pinin o Iesu i wanpat senene. ³ Anun a kum malu i kabang doko ma i pilpil, ra kataio taginin upiso in gos talapor pas tin namalu lenra. ⁴ Ma a tulu nat na ususer detul tama pas o Elaija der nam o Moses der wanpat, ra detul wasiso tomo nam o Iesu. ⁵⁻⁶ A tulu nat na ususer detul ngara doko, ma o Pita ke tasman asau ra in watungi. Ra i watungi mukut tan o Iesu lena, “Tene Ususer, i wakak ra dat in kis nin. Metul in pam lako tulu turturup, ara anumi, ara anun o Moses, ma ara kai anun o Elaija.” ⁷ Ra a du bakut i wanpat ma i pulus bat pas det. Ma in nalngan ara tagisapat una bakut i watungi lena, “Iri a Nutunglik, a nat na wakak. Mot in longoro i.” ⁸ Uniutra, detul tamtama tuptupukus, ikut ka detul tama melet mo taio, o Iesu sot mukut kura i tomo nam detul.

⁹ Ra det wan pirso nanan tagisapat una tangai, o Iesu i turbat tar detul sur gong detul inanos tar taio un asau ra detul sa tama tari, tuk una bung ra a Nutun a Musano in katatur melet gusun a minat. ¹⁰ Detul mur a wasiso ra, ma ka detul inanos taio nami, ikut detul ting etalai detul lena, “Asau a kukurai ina katatur melet gusun a minat?”

¹¹ Ra detul ting o Iesu lena, “Sur asau ra a kum tene ususer tagun a Warkurai det watungi lena, o Elaija in nanpat mugu?” ¹² I balu detul lena, “A lingmulus ut, o Elaija in nanpat mugu ma in ukodos melet

a kum utna rop. Ma ilai ra di sa tumus tari una Buk Tabu lena, a Nutun a Musano in taramo a susut na ngunungut ma din ipul ru i?” ¹³ Ikut uniri a watungi torom motul lena, o Elaija i sa wanpat taru, ma det pam a kum sakino petutna uni, elar ut nam anundet a nemnem. A kum utna ri un o Elaija, i elar nama wasiso ra di sa tumus tari una Buk Tabu.”

O Iesu i lakro ru a laulau na nion gusun ara natlik

(Mt 17:14-21; Lk 9:37-43)

¹⁴ O Iesu tomo nama tulu nat na ususer det wanpat nisan a kum nat na ususer. Det tama a labino kunur na taro kura det tur talilis pas a kum nat na ususer, ma a kum tene ususer tagun a Warkurai kura det engaras tomo nam det. ¹⁵ A taro det tama pas o Iesu, ra det kisin doko, ma det kalabor ra det gas pasi. ¹⁶ Ra o Iesu i ting det lena, “Asau ra mot engaras uni?” ¹⁷ Ara musano tagun a taro ra, i balu i lena, “Tene Ususer, a ben a nutunglik a nat musano torom ui, uni a laulau na nion kura uni ma ke wasiso. ¹⁸ A laulau na nion ri i ser solsolongi, i ser woro puku i utiro upiso. A wano i ser busu ma i ser ungingit a kabo lokono ma i ser udekdek a pinpinino. A saring anum a kum nat na ususer sur det in lakro ru a laulau na nion gusuni, ikut ka det pet lar pasi.”

¹⁹ O Iesu i balu i lena, “Mot a taro tagun uniri, ka mot nurnur! A sa kis suano i tomo nam mot. Nangisin mo mot in nurnur? Mot in ben a nat ra urin torom iau.” ²⁰ Det beni torom o Iesu. Ra a laulau na nion i tama pas o Iesu, uniutra i woro pirso tar a natlik. Ra a natlik i puku piso, i tubulus tuptupukus, ma i busubusu a wano.

²¹ Ra o Iesu i ting a taman a nat lena, “Nangisin ra i turpasi?” Ma i balu i lena, “Ra i natlik utmakai. ²² A susut na bung, a laulau na nion i ser woro tari una sungun, o una danim sur in um doko i. Ra un pet lari sur un lakro ru a laulau na nion gusuni, un maris mir, ma un warut mir.” ²³ O Iesu i watungi tano lena, “Ilai ra u watungi lenri, ‘Ra un pet lari?’ Osi ra i nurnur, in pet lar pas a kum utna rop.” ²⁴ Uniutra a taman a natlik i balu i lena, “A nurnur! Warut iau una nung a lik nurnur.” ²⁵ O Iesu i tama a kunur na taro ra det kalabor tomo torom det, ra i wasiso dekdek torom a laulau na nion lena, “Ui a laulau na nion, u ngat ma u kutkut. A sakbat ui, un pirso gusun a natlik, ma gong melet mo u sisiop uni.” ²⁶ A laulau na nion i woiwoi pas, i gunu dekdek tar a natlik, ra i pirso gusuni. A natlik ra, i tamtama mukut elar nama minat, ma a susut na taro det lena i sa mat. ²⁷ Ikut, o

Iesu i pam pas a laman a natlik, ra i dat ukatutur pasi, ma i tur.

²⁸ Numur det ruk un ara rumu, ra anun a kum nat na ususer det ting eno i lena, "I lai ra ka met lakro lar pas a laulau na nion gusuni?" ²⁹ O Iesu i balu det lena, "A ngas na laulau na nion lenri, in pirso kut una niaring."

O Iesu i wasiso melet una nun a minat (Mt 17:22-23; Lk 9:43-45)

³⁰ Det wan tagitiro iai, ma det wan sakit potora una papor Galili. O Iesu ke nemi sur taio in tasman a nubual ra det in kis iai, ³¹ uni i nemi sur in ususer anun a kum nat na ususer. Ra i watungi tandet lena, "Din pitar a Nutun a Musano ulaman a taro, ma det in um doko i. Numur tan a tulu bung, in laun melet." ³² Ka det talapor una kukurai ina wasiso ri, ma det ngara sur det in tingi.

Osi ra i labo sakit (Mt 18:1-5; Lk 9:46-48)

³³ Det wanpat tong o Kapernaum. Ra det ruk una rumu, o Iesu i ting det lena, "Asau ra mot engaras uni ra mot wan nanan una kisapi?" ³⁴ Ikut ka det balu i, uni det engaras sur osi ra i labo taun det. ³⁵ O Iesu i kis ra i kabo pas anun a noino ma aru nat na ususer, ra i watungi tandet lena, "Ra taio i nemi sur in mugumugu, i wakak sur in unatino pasi ut, ma in tultul kut anun a taro rop." ³⁶ Ra i los pas ara natlik, ma i utur tari epotor tandet. Numur i romo pasi, ma i watungi tandet lena, ³⁷ "Osi ra in gas pas tu natlik lenri una risang, i gas pas iau ut. Ma osi ra in gas pas iau, awu sur i gas pas iau kut, i gas pasi utkai o naro ra i tulu ru iau rin."

Osi ra ke turbat dat, i warut dat kut (Lk 9:49-50)

³⁸ O Jon i watungi tan o Iesu lena, "Tene Ususer, met tama ara musano i lakro ru a kum laulau na nion nama risam, ra met turbati, uni i awu sur tagun dat." ³⁹ O Iesu i balu i lena, "Gong mot turbati. Ra taio in pam tu utna na ukisin nama risang, ken watung lakit tu sakino wasiso un iau." ⁴⁰ Uni osi ra ke turbat dat, i warut dat. ⁴¹ A inanos mot nama lingmulus, osi ra in tabor mot nam lakalik danim uni mot anun o Karisito, in losi ut anun a ikul.

A utna ra i ben raro a taro sur a sakino petutna (Mt 18:6-9; Lk 17:1-2)

⁴² "Osi ra in ben raro ara tagun a kum nat liklik ri,* ra det nurnur un iau, a warkurai toromi in laulau doko tan taio ra din kubus tar tu labino wat unin kabarano, ma din woro murungi usa utasi. ⁴³⁻⁴⁴ Ra a lamam in ben raro ui, un kutus ru i. In wakak ra un ruk una nilaun tukum a tumul kut ui, sur gong di woro ui tomo nama ru lamam rop una labino sungun ra ke ser mat. ⁴⁵⁻⁴⁶ Ra a kikum in ben raro ui, un kutus ru i. In wakak ra un ruk una nilaun tukum a tumul kut ui, sur gong di woro ui tomo nama ru kikum rop una labino sungun.† ⁴⁷ Ra in matam in ben raro ui, un liok ru i. In wakak ra un ruk una matanitu anun o God namin teken matam kut, sur gong di woro ui tomo nam arin matam rop una labino sungun. ⁴⁸ Tiro iai

'a kum suisui liklik ka det ser mat, ma a sungun kai ke ser mat.' *Ais 66:24*
⁴⁹ A taro Juda det ser ubek a sol una etabor ra di pitari torom o God, sur gong det dur umatano. Lenkutkai ra a sungun in tun a taro rop sur gong det dur umatano o God. ⁵⁰ A sol i wakak, ikut ra a makasmanino i sa rop, mot in umakasan meleti mo pepetlai? Ken elar! I wakak ra a sol in kis un mot, ma mot in kis na emarom tomo."

10

Gong taio i kutus a nolin (Mt 19:1-12; Lk 16:18)

¹ O Iesu i wan tagitiro utong una papor Judia, ma un ara papor danim Jordan kai. A kunur na taro det wan melet toromi, ra i ususer melet det elar nama ngasino anunu. ² A ramano kum Parisi det wan toromi sur det in lari. Det tingi lena, "I tokodos ut elar nam anundat a Warkurai sur a musano in lakro ru anun a ino, o awu?" ³ Ra o Iesu i balu det lena, "Asi na warkurai ra o Moses i pitar tari tamot?" ⁴ Ma det balu i lena, "O Moses i mulaot tari kut sur a musano in tumus a dono buk na kutus nolin, sur din palos ru a kinkinis na nolin." ⁵ O Iesu i watungi tandet lena, "O Moses i tumus a warkurai ra sur mot, uni a balamot i dekdek doko. ⁶ Ikut una turturkibin a ukukis, O God 'i ukis a taro, sur det in musano ma det in ino'. *Stat 1:27*
⁷ 'Iri a kibino ra a musano in nan gusun o tamano ma o nano, ma in kis tomo nam anun a ino, ⁸ sur der in takai mukut.' *Stat 2:24*

9:30: Jn 7:1 **9:31:** Mk 8:31; 10:32-34 **9:32:** Lk 9:45 **9:35:** Lk 22:24; Mt 20:25-27; Mk 10:43-44 **9:37:** Mt 10:40 **9:40:** Mt 12:30; Lk 11:23 **9:41:** Mt 10:42 * **9:42:** A wasiso Griki i lena "a kum natnatino", a kukuraino lenri: a kum nat liklik, o det ra anundet a nurnur ke dekdek, o det ra a taro det tama pisopiso det. **9:43-44:** Mt 5:30
† **9:45-46:** Una ramano kum du buk una wasiso Griki, a ramano kum wasiso kai i kis una ru vers 44 ma 46. I lenri: Tiro iai 'a kum suisui liklik ka det ser mat, ma a sungun kai ke ser mat.' **9:47:** Mt 5:29 **9:50:** Mt 5:13; Lk 14:34
10:4: Lo 24:1-4; Mt 5:31 **10:6:** Stat 5:2 **10:7:** Ep 5:31-33

Ra awu mo sur der aru, der takai mukut. ⁹ I mo ra asau ra o God i sa kubus tomo tari, gong melet mo taio i kutusi."

¹⁰ Ra det kis sa urumu, a kum nat na ususer det ting melet o Iesu una wasiso ri. ¹¹ Ma i watungi tandet lena, "Osi ra in lu ru anun a ino, ma in nolin melet nam tu ino, a musano ra i pam a sakino torom anun a mugano ino. ¹² Ma ra tu ino in nan gusun anun a musano, ma in nolin melet nam tu taio, a ino ra, i kai i pam a sakino."

*O Iesu i wasiso udan a kum nat liklik
(Mt 19:13-15; Lk 18:15-17)*

¹³ A taro det ben a kum nat liklik torom o Iesu sur in ubek aru lamano sapat netes un det. Ikut a kum nat na ususer det turbat det. ¹⁴ O Iesu i tama i, i kankan ra i watungi tandet lena, "Mot in madek ru a kum nat liklik sur det in nan torom iau. Gong mot turbat det, uni a matanitu anun o God anundet ra det lenri. ¹⁵ A inanos mot nama lingmulus, osi ra ken ruk una matanitu anun o God elar nama natlik, ken ruk lar pas." ¹⁶ Ra i romo pas a kum nat liklik, ma i ubek aru lamano netes un det, ma i wasiso udan det.

*A tene gongon
(Mt 19:16-30; Lk 18:18-30)*

¹⁷ Ra o Iesu i wan nanan melet, ara musano i kalabor pat toromi, i kis butkeke umatano, ma i tingi lena, "Wakak na Tene Ususer, asau ra an pami sur an rakon a nilaun tukum?" ¹⁸ O Iesu i balu i lena, "Sur asau ra u watung iau a wakak? Katutaio i wakak, o God sot kut. ¹⁹ U tasman a kum Warkurai: 'Gong u um doko taio, gong u pam a sakino nam tu ino anun taio o nam tu musano anun taio, gong u wolong, gong u etakun torotoro, gong u toro pas tu utna anun taio ma u los pasi, un ru o tamam ma o nam.'" *Kis 20:12-16*

²⁰ A musano ra i balu i lena, "Tene Ususer, turpasi ra a natlik utmakai tuk uniri, a ser mur a kum Warkurai rop ri." ²¹ O Iesu i tamtama toromi, i marisi ra i watungi tano lena, "Ara utna mukut ra kabaut u pami. Un nan ma un siuru ru anum a kum utna rop, ra a mani taguni, un tabor a kum sibo na taro nami. Ra un pami lenra, anum a wakak na ululeng kusapat una langit. Numur un nan urin ma un mur iau." ²² I longoro a wasiso ri, ra i tamtama na tumul, ra i wan ma ikut ke gasgas, uni i labo doko anun a ululeng. ²³ O Iesu i ger tuptupukus torom anun a kum nat na ususer ra i watungi tandet lena, "I ngangitin doko torom a kum tene gongon sur det in ruk una matanitu anun o God." ²⁴ A kum nat na ususer det kisin

doko una wasiso ri. O Iesu i watung meleti tandet lena, "A kum nutnutung liklik, in ngangitin doko torom a taro sur det in ruk una matanitu anun o God. ²⁵ In ngangitin sur a kamel in ruk una mato na sur na susuk, ikut, i ngangitin doko ut, sur a tene gongon in ruk una matanitu anun o God." ²⁶ A kum nat na ususer det kisin doko, ra det ting etalai det lena, "Ra i lenra, osi mo ra din ulauni?" ²⁷ O Iesu i tamtama torom det ra i watungi lena, "A taro ka det in pet lar pasi, ikut o God sot kut in pet lar pas a kum utna rop."

²⁸ O Pita i watungi tan o Iesu lena, "Tama i, met sa wan gusun anumet a kum utna rop, ra met mur ui." ²⁹ O Iesu i watungi lena, "A inanos mot nama lingmulus: Ra taio in nan gusun anun a rumu, o gusun a kum tistisino a kum musano ma a kum ino, o gusun o nano, o gusun o tamano, o gusun a kum nutnutunu o gusun anun a piso, uni i mur iau ma a Wakak na Wasiso, ³⁰ una nilaun ri, din pitar arara mar tagun a kum ututna ri tano: a kum rumu, a kum tistisino a kum musano ma a kum ino, a kum nanano, a kum nutnutunu ma a piso, ma a kum ngunungut utkai. Ma una nilaun numur din tabori nama nilaun tukum. ³¹ Ikut a susut ra det mugu uniri, numur det in mur, ma det ra det mur uniri, numur det in mugu."

*O Iesu i mantulu wasiso una nun a minat
(Mt 20:17-19; Lk 18:31-34)*

³² O Iesu tomo nam anun a kum nat na ususer det wan nanan usapat o Jerusalem. O Iesu i mugu nanan tandet, ra a kum nat na ususer det nuknuk doko, ma a taro kai ra det muri det ngara. O Iesu i ben gisen melet pas anun a noino ma aru nat na ususer; ra i inanos det una kum utna ra in nanpat uni. ³³ I watungi lena, "Tama i, iri dat wan nanan usapat o Jerusalem. Din pitar a Nutun a Musano torom a kum lamlabino tene etabor torom o God, ma a kum tene ususer tagun a Warkurai. Det in warkurai i sur in iru, ma det in pitar tari torom det ra awu sur a taro Juda. ³⁴ Det in urongon lalau uni, det in ibisi, det in mirasi ma det in um doko i. Ra a tulu bung in rop in katatur melet."

*A sasaring anun o Jems mo Jon
(Mt 20:20-28)*

³⁵ Aru nutnutun o Sebedi, o Jems ma o Jon, der wan torom o Iesu ra der inanos lena, "Tene Ususer, mir saring ui sur un pam asau ra mir nemi tam." ³⁶ Ra i ting der lena, "Asau ra mur nemi tang?" ³⁷ Der balu i lena, "Un ukis mir una num a minamar,

ma datul in warkurai tomo, ara una sot na lamam ma ara pasamir kai una kair.”

³⁸ O Iesu i inanos der lena, “Ka mur tasman asau ra mur sasaring suri. Pepetlai, in topasi sur mur kai mur in inum una kap na mamaut ra an inum uni? Ma in topasi kai sur din baptaiso mur nama baptais na ngunungut ra din baptaiso iau nami?”
³⁹ Ma der balu i lena, “Mir in pet lar pasi kut.” O Iesu i watungi tander, “A kap na mamaut ra an inum uni, mur kai mur in inum uni, ma a baptais ra din baptaiso iau nami, din baptaiso mur kai nami.
⁴⁰ Ikut a kinkinis una sot na lamang ma una kair, awu sur iau, a warkurai sur an pitari. O God ut in pitari torom det ra i sa waninar tari sur det.”

⁴¹ A noino nat na ususer det longoro i, ra det kankan torom o Jems ma o Jon.
⁴² O Iesu i kabo tomo pas det, ra i watungi lena, “Mot tasmani lena, det ra di watung det a kum tene warkurai anun a taro ra awu sur a taro Juda, det kuro laulau a taro. Ma anundet a kum mugumugu kai det pitar a kum dekdek na warkurai torom anundet a taro.
⁴³ Ikut torom mot ken lenra. Osi ra i nemi sur in labo taun mot, in unatino pasi ut sur in tultul anumot.
⁴⁴ Ma osi ra i nemi sur in mugumugu anumot, in papam oros kut torom a taro rop ma ka din kuli.
⁴⁵ A Nutun a Musano kai, ke wanpat sur din papam toromi. I wanpat suri ut in papam torom a taro, ma in pitar tar anun a nilaun, a ikul, sur in kul langolango pas a susut na taro.”

O Iesu i utamtama pas o Batimaus a pulu

(Mt 20:29-34; Lk 18:35-43)

⁴⁶ Det wanpat tiro o Jeriko. Numur, o Iesu tomo nam anun a kum nat na ususer ma a kunur na taro det wan tagitiro. Ara musano kura i kis taru una papor ina kisapi, a musano ra a pulu, a risano o Batimaus (a kukuraino a nutun o Timaus) ma i ser saring utna.
⁴⁷ I longoro i lena o Iesu a te Nasaret i wan sakit, ra i turpas a kakabo sapat lena, “Iesu, a Nutun o Dewid, un maris iau!”
⁴⁸ A susut na taro det turbati sur in kis wowowon. Ikut i kakabo dekdek makai usapat lena, “Nutun o Dewid, un maris iau!”
⁴⁹ O Iesu i tur sikot ra i lena, “Mot kabo i urin.” Ra det kabo pas a pulu, ma det watungi tano lena, “Kosom taru tam! Tur! O Iesu i kabo ui.”
⁵⁰ O Batimaus i woro pirso ru anun a saket, i tur, ra i wan torom o Iesu.
⁵¹ O Iesu i tingi lena, “Asau ra u nemi sur an pami un ui?” A pulu i balu i lena, “Tene Ususer, a nemi sur an tamtama.”
⁵² O Iesu i watungi lena, “Un

nan! Anum a nurnur i sa utamtama pas ui.” Uniutra i tamtama, ma i mur o Iesu una kisapi.

11

O Iesu i wan usapat o Jerusalem elar nama king

(Mt 21:1-11; Lk 19:28-40; Jn 12:12-19)

¹ Ra det wan milau o Jerusalem, det wanpat sapat o Betpage ma o Betani una Tangai na Oliw, o Iesu i tulu aru tagun anun a kum nat na ususer.
² Ma i inanos der lena, “Mur in nan sur a tamon kusa numugu tamur. Ra mur in nanpat, uniutra mur in tama ara barman na dongki kura di sa ker ukai tari, ma katutaio utmakai i kas taru uni. Mur in palos pasi ma mur in beni urin.
³ Ra taio in ting mur lena, ‘Mur pami lenra sur asau?’ mur in watungi lena, ‘A Labino i nemi kut munung, ra numur in tulu melet tari urin.’”
⁴ Der wan ra der pastorom a barman na dongki ra di ker tari nisan a matansako ina ra rumu, milau a kisapi, ra der palos pasi.
⁵ Ara taro kura det tur taru tiro iai, det ting der lena, “Ai, mur palos a barman na dongki ra sur asau?”
⁶ Der balu det nama wasiso ra o Iesu i sa watung tari, ra det mulaot ru i tander.
⁷ Der ben tar a barman na dongki torom o Iesu, ma der rakon ru anunder aru saket, ma der ubek tari netes uni, ra o Iesu i kas uni.
⁸ A susut na taro kai det rakon ru anundet a kum saket, ma det talaso i una kisapi. Ma ara taro kai det tau pas a kum turunu duwai sa ubual ma det ubek tari una kisapi.
⁹ Det ra det mugu ma det kai ra det mur, det kukukuk lena,

“Osana! O naro ra i wanpat nama risan a Labino i dan!” *Sng 118:25-26*

¹⁰ “Dat in watung ulabo pas a matanitu anun a tamandat o Dewid ra in nanpat!

Osana usapat netes sakit!”

¹¹ Ra o Iesu i wanpat sapat o Jerusalem, i ruk ubalan in noworo ina rumu na etabor. Ra i sa tama tar a kum utna rop, i milet melet utong o Betani tomo nam anun a noino ma aru nat na ususer, uni i sa lirop.

O Iesu i bor in nanai na fig

(Mt 21:18-19)

¹² Una bung numur, ra det wan tagitong o Betani, o Iesu i murak.
¹³ I tama in nanai na fig tagitiro bakbak i lubulubu wakak. I wan sur in tama i sur lako wino. Ra i wanpat tiro, ke tama lako wino, a kum dono rop kut, uni ke taun fig utmakai.
¹⁴ Ra i watungi torom in nanai ra lena, “Turpasi uniri ma numur, kataio melet mo in nangan tagun

ui.” Ma anun a kum nat na ususer det longoro anun a wasiso ri.

O Iesu i ruk una rumu na etabor
(Mt 21:12-17; Lk 19:45-48; Jn 2:13-22)

¹⁵ Ra det wanpat sapat o Jerusalem, o Iesu i ruk unin noworo ina rumu na etabor, ma i lu pirso ru a taro ra det siuru, ma det kai ra det kukul tiro iai. I bulus ru a kum kabulu anun a kum tene keles mani* ma a kum kiskis anundet ra det siuru a kum tabun. ¹⁶ Ma ke madek tar taio sur in los a kum utna na siuru epotor ubalan in noworo ina rumu na etabor. ¹⁷ Ra i ususer det, i watungi lena, “Di sa tumus tari una Buk Tabu lenri,

‘Din watung anung a rumu nama rumu na niaring sur a taro tagun a kum gapman rop.’ *Ais 56:7*

Ikut mot sa pukus pasi sur in elar mukut nama ‘nubual na parparau anun a kum tene wolong.’ *Jer 7:11*

¹⁸ A kum lamlabino tene etabor torom o God ma a kum tene ususer tagun a Warkurai det longoro i, ra det nuknuk sur tu kisapi sur det in um doko o Iesu uni, uni det ngarani. Det ngara uni a taro rop det kisin una kum etowo anunu.

¹⁹ Ra i sa lirop, o Iesu tomo nam anun a kum nat na ususer det pirso melet gusun in noworo ina tamon Jerusalem.

A etowo tagun in nanai na fig
(Mt 21:20-22)

²⁰ Una kobot raut, det milet melet usapat o Jerusalem, ra det tama in nanai na fig i sa marang, tagisapat netes tuk unago una wakakorino. ²¹ Ma o Pita i nuk pas a wasiso anun o Iesu, ra i watungi tano lena, “Tama i! Tene Ususer, in nanai na fig ra u bor tari, i sa marang rop.” ²² Ma o Iesu i balu i lena, “Mot in nurnur un o God. ²³ A inanos mot nama lingmulus, ra taio in watungi tan a tangai ri lena, ‘Un taragot ma un sirok losop usa utasi,’ ma ke wur nuknuk, i nurnur kut lena din pam a utna ra i sa watung tari, din pam soti ut. ²⁴ Lenra, a inanos mot, a kum utna rop ra mot wararing suri, mot in nurnur kut lena di sa pitar tari tamot, ma din pitari ut torom mot.

²⁵⁻²⁶ “Ra mot tur ma mot wararing, ma mot nuk torom tu utna ra taio i pam sako tari un mot, mot in dumano ru i, sur a Tamamot kusapat una langit in unus ru anumot a kum sakino petutna kai.”†

Det iting una dekdek ra o Iesu i ser papam nami

(Mt 21:23-27; Lk 20:1-8)

²⁷ Det wanpat melet sapat o Jerusalem. Ra o Iesu i wan nanan ubalan in noworo ina rumu na etabor, a kum lamlabino tene etabor torom o God, ma a kum tene ususer tagun a Warkurai, ma a kum mugumugu det wan toromi. ²⁸ Ra det tingi lena, “Asi na ngas na dekdek ra u pam a kum utna ri nami? Osi ra i pitar tar a dekdek ri tam sur un pam a kum utna ri?” ²⁹ O Iesu i balu det lena, “Iau kai an ting mot nam ara iting. Ra mot in balu i, an inanos mot una dekdek ra a ser pam a kum utna ri nami. ³⁰ Tagai a dekdek ra o Jon i baptaiso a taro nami? Tan o God, o tan a taro kut? Mot inanos iau.” ³¹ Ra det wasiso etetalai torom det lena, “Ra dat in watungi lena, ‘Tan o God,’ in balu dat kut lena, ‘Sur asau ra ka mot nurnur uni?’ ³² Ikut in pepetlai ra dat in watungi lena, ‘Tan a taro?’” Det ngaran a taro, uni det rop det nurnur un o Jon lena i a poropet. ³³ Ma det balu o Iesu kut lena, “Ka met tasmani.” Numur o Iesu i watungi tandet lena, “Iau kai kan inanos mot una dekdek ra a ser pam a kum utna ri nami.”

12

A wasiso elelar una taro na pinapam una kinobot na wain

(Mt 21:33-46; Lk 20:9-19)

¹ O Iesu i ususer det nama wasiso elelar lena, “Ara musano i marut tar a kinobot na wain, ra i pam bat tari namin noworo. Tiro ubalan a kinobot, i kil tar in nutung sur din pas reseng a wino wain uni, sur a polono in nanpat. Ma i pam tar a nat na rumu lekeleke sur a tene tamtamabat. Numur i pitar tar a kinobot munung tan a ramano kum tene pinapam sur det in tamtamabati, ra i wan sur ara tamon gisen. ² Ra a kalang i sa sot sur din git tomo a wino wain, i tulu ru ara tultul torom a taro na pinapam, sur lako kum kur wain tagun anun a kinobot sur anunu kai. ³ Ikut a taro na pinapam ra, det pam ukai pasi ma det umi, ra det tulu oros melet ru i kut. ⁴ Ra i tulu melet ara tultul torom det, det rapus in lorino, ma det ban umaimai tari. ⁵ Ma a taman a kinobot i tulu i bulung ara tultul, ma det um doko i kut. Ra i tulu melet a susut, det um ara taro tagun det ma det um doko ara taro kai. ⁶ Ara sot mukut i kis toromi, o nutunulik ut, a nat na wakak. I tulu ru i bulung torom det, uni i nuki lena det in urur uni. ⁷ Ikut a

* **11:15:** A mani anun a gapman Rom det ser ruk nami una rumu na etabor, ra det kelesi sur a mani sur det in kul a takis nami tagun a rumu na etabor. **11:18:** Mk 14:1 **11:22:** Mt 17:20 **11:24:** Mt 7:7 **11:25-26:** Mt 6:14-15 † **11:25-26:** Una ramano kum du buk una wasiso Grik, a ramano kum wasiso kai i kis una vers ri. I lenri: Ra ka mot in nuk dumano ru i, a Tamamot kai kusapat una langit ken unus ru anumot a kum sakino petutna. **12:1:** Ais 5:1-2 **12:8:** Ibr 13:12

taro na pinapam det wasiso tomo pas lena, 'I ra in keles o tamano, i mo ra i wan urin. Mot iap, dat in um doko i, sur anundat mo a kinobot.'⁸ Ra det pam ukai pasi ma det um doko ru i, ra det sugut pirso ru i tagun a kinobot.

⁹ "Asau mo a taman a kinobot na wain ra in pami? In nanpat ma in um doko ru a taro na pinapam, ma in pitar tar a kinobot ra torom lako taro gisen, sur det in tamtamabati. ¹⁰ Pepetlai, ka mot luk a wasiso ri una Buk Tabu? I watungi lena, 'A wat ra a kum tene pam rumu det lakro ru tari,

i ut ra, i wanpat a wakak na wat ra i udekdek a rumu.

¹¹ A utna ri, a Labino ut i sa pam tari, ma i wakak sakit una numet a tam-tama.'" *Sng*
118:22-23

¹² A kum mugumugu anun a taro Juda det sisio sur tu kisapi sur det in pam ukai pas o Iesu, uni det tasmani ut lena i watung a wasiso elelar ri un det. Ikut det ngaran a kunur na taro. Ra det wan mut gusuni.

Det iting una takis

(Mt 22:15-22; Lk 20:20-26)

¹³ Det tulu a kum Parisi, ma a kum paspasan o Erod torom o Iesu, sur det in lari sur tu wasiso ra in watung tari ra det in takuni nami. ¹⁴ Ra det wanpat toromi, det watungi lena, "Tene Ususer, met tasmani lena ui a tokodos na musano. Ko nuknuk bing un asau ra a taro det watungi un ui, uni a magiram i takai kut torom a taro rop, ma u ser ususer det una kisapi anun o God nama lingmulus. Pepetlai, i tokodos sur din pitar a takis torom a Sisa* o awu? ¹⁵ Dat in pitari, o gong?" I tasman lele anundet a torotoro, ra i ting det, "Ilai ra mot nemi sur mot in lar iau? Tu mani urin sur an tama i." ¹⁶ Ra det pitar tar a mani tano. Ma i ting det lena, "In masarin osi ri, ma a tumtumus ri uni anun osi?" Ra det balu i lena, "Anun a Sisa." ¹⁷ O Iesu i watungi tandet lena, "Asau ra anun a Sisa, mot in pitari torom a Sisa. Ma asau ra anun o God, mot in pitari torom o God." Ra det longoro i, det kisin doko.

Det iting una nilaun melet gusun a minat
(Mt 22:23-33; Lk 20:27-40)

¹⁸ A kum Sadusi, ra det ser ipul kut lena katu nilaun melet gusun a minat, det wan torom o Iesu, ma det tingi lena, ¹⁹ "Tene Ususer, o Moses i tumus tari tandat lena, ra tu musano in mat pas gusun anun a ino, ma katu nutunder, o tisinolik in ben pasi

ra in nolin nami, sur in ulabo tar lako kum nat una risan o tisinolik ra i sa mat. ²⁰ Ara kabo tisinolik, a wonom mawit na musano det. A mugano i nolin, ra i mat pas gusun anun a ino, ma katu nutunder. ²¹ Ra a murmur tano bulung i nolin nama ino ra. I bulung i mat kut gusuni, ma katu nutunder. I lenkutkai ra, ²² a wonom mawit, det nolin pas nami. Ikut a ino ra, ke usus tar tu nat un det. Ra numur a ino bulung i mat. ²³ Una nilaun melet gusun a minat, a ino ra, anun osi na pasandet mo? Uni a wonom mawit rop, det sa nolin pas nami."

²⁴ O Iesu i balu det lena, "Mot raro doko, uni ka mot tasman a Buk Tabu ma a dekdakin o God kai. ²⁵ Ra a taro det in katutur melet gusun a minat, ka det in nolin melet mo, det in elar mukut nama kum ensel sapat una langit. ²⁶ Ra mot ipul lena, a kum minat ka det in katutur melet gusun a minat, pepetlai, ka mot luki utmakai a Buk anun o Moses, ra i wasiso unin nanai ra i kunabor? O God i watungi torom o Moses lena, 'Iau a God anun o Abaram, a God anun o Aisak ma a God anun o Jekop†.'" *Kis 3:6*

²⁷ Mot raro doko. O God awu sur a God anun a kum minat, i a God anundet ra det laun."

A warkurai ra i labo sakit

(Mt 22:34-40; Lk 10:25-28)

²⁸ Ara tagun a kum tene ususer tagun a Warkurai i wanpat torom o Iesu, ma i longoro i ra i wasiso tomo nama kum Sadusi. I longoro o Iesu ra i balu wakak det, ma i tingi lena, "Asi na warkurai ra i labo sakit taun det rop?" ²⁹ O Iesu i balu i lena, "Iri a warkurai ra i labo sakit, 'Mot a taro Israel, mot in longoro i! A Labino anundet a God, i ara sot kut. ³⁰ Mot in nem a Labino anumot a God nama balamot rop, a niomot rop, a nuknuki mot rop, ma a dekdaki mot rop.'" *Lo 6:4-5*

³¹ Ma a manru na warkurai i lenri, "Un nem o pasam elar nami ra u nem ui ut.'" Katu warkurai melet mo i labo tan aru warkurai ri." *Wkp 19:18*

³² A tene ususer tagun a Warkurai i watungi tan o Iesu lena, "A lingmulus ut, Tene Ususer! I tokodos anum a wasiso lena o God i ara sot kut, ma kataio melet mo. ³³ Dat in nem o God nama balandat rop, a nuknukin dat rop ma a dekdakin dat rop, ma dat in nem a kum paspasan dat elar nami ra dat nem dat ut. Ra dat in mur aru warkurai ri, i labo taun a kum etabor ma a kum etabor kai ra di tuntuni torom o God."

12:13: Mk 3:6 * **12:14:** A Sisa i a labino mugumugu tagun a gapman Rom, ma a taro Israel kai det kis utuntudu in anun a warkurai. **12:17:** Rom 13:7 **12:18:** Ap 23:8 **12:19:** Lo 25:5 **12:26:** Kis 3:2 † **12:26:** O Abaram, o Aisak ma o Jekop detul mat, ikut a wasiso ri i ese i lena, uniri detul laun. **12:28:** Lk 10:25-28 **12:33:** Lo 4:35; 1 Sml 15:22; Os 6:6

³⁴ Ra o Iesu i tama i ra i wasiso na mananos, i watungi tano lena, “Ko bakbak mo gusun a matanitu anun o God.” Numur kataio melet mo i wan toromi nam tu iting, uni det ngara.

A Karisito i a Labino anun o Dewid
(Mt 22:41-46; Lk 20:41-44)

³⁵ Ra o Iesu i ususer det ubalan in noworo ina rumu na etabor, i watungi lena, “Ilai ra a kum tene ususer tagun a Warkurai det watungi lena, a Karisito i a nutun o Dewid?”

³⁶ A Tokodos na Nion i mugu o Dewid ra i watungi lena,

‘A Labino i watungi torom anung a Labino lena,

“Un kis una papor sot na lamang, tuk ra in winim pas anum a kum ebar sur det in kis utuntudu in anum a warkurai.”’ *Sng 110:1*

³⁷ O Dewid ut i watung a Karisito lena, i anun a Labino. Ra i lenra, der tamano pepetlai?”

O Iesu i utumarong a taro una petutna anun a kum tene ususer tagun a Warkurai
(Mt 23:1-36; Lk 20:45-47)

A labino kunur na taro det gas doko ra det longoro a wasiso anun o Iesu.

³⁸ Ra i ususer det, i watungi lena, “Mot in tumarong mot gusun a kum tene ususer tagun a Warkurai. Det nemi sur det in nan tuptupukus nama kum wakak na ememar, ma det nemi kai sur a taro det in pitar a labino urur torom det una kum nubual na inawan tomo. ³⁹ Ma det nem a kinkinis sa numugu una kum rumu na lotu, ma a kinkinis na labino sa numugu una kum lukaro. ⁴⁰ Det ser urop a kum ululeng anun a kum ula, ma det ser pam a kum walalos na niaring sur a taro det in tama det. In labo doko a warkurai na minabalu anun o God torom det.”

A etabor anun a sibo na ula
(Lk 21:1-4)

⁴¹ O Iesu i kis milau taru nisan a dino ra di ser woro mani uni, tiro na rumu na etabor. I tama a taro ra det woro anundet a kum mani. A susut na tene gongon kai, det woro a labino mani. ⁴² Ikut, ara sibo na ula, i woro tar aru toia kut. ⁴³ Ra o Iesu i kabo pas anun a kum nat na ususer toromi, ma i watungi tandet lena, “A inanos mot nama lingmulus, a sibo na ula ri, i woro a labino mani taun det rop ra det woro anundet a kum mani. ⁴⁴ Det woro tari kut a sibano tagun anundet a kum mani, ikut a sibo na ula ri, i sa woro rop ru asau ra in topas anun a kinkinis.”

13

A kum ukinalong ra in nanpat numugu tan a bung na warkurai
(Mt 24:1-14; Lk 21:5-19)

¹ Ra o Iesu i pirso gusun in noworo ina rumu na etabor, ara pasan anun a kum nat na ususer i inanos lena, “Tama i, Tene Ususer! A kum wakak na rumu ri, di pami nama kum lamlabino watat!” ² O Iesu i balu i lena, “U tama i ut a kum lamlabino rumu ri, niko? Numur din rege ginogino det rop, ma katu wat in inep netes un tu wat.”

³ O Iesu i kis sapat netes una Tangai na Oliw una papor ra i tamtama lakai sur a rumu na etabor. O Pita, Jems, Jon ma o Endru det ting eno i lena, ⁴ “Un inanos met, nangisin mo a kum utna ri in nanpat? Ma asi na ukinalong ra in ese i lena i sa milau sur det in nanpat?” ⁵ O Iesu i inanos det lena, “Mot in tumarong, sako taio in toro pas mot. ⁶ A susut na taro det in nanpat nama risang, ma det in warango det lena, ‘Iau a Karisito,’ ra det in toro lako susut na taro. ⁷ Ra mot in longoro a kum inaim ma a kum inarang na inaim, gong mot lai taru. A kum utna lenri det in nanpat, ikut a ururop ina rakrakon bual kura utmakai. ⁸ A kum kabotaro det in tur na inaim torom a kum se kabotaro, ma ara gapman in tur na inaim torom ara gapman. A kum guri ma a kum lamlabino munurak in nanpat una kum tamon. A kum utna ri i elar nama kum mugano ngunungut ra i ser wanpat una ino ra i ling na usus.

⁹ “Mot in tumarong mot. A taro det in pitar mot ulaman a kum tene warkurai, ma det in miras mot una kum rumu na lotu. Mot in tur una kum warkurai numugu umatan a kum lamlabino mugumugu ma a kum king, uni mot anungi. Mot in wasiso talapor un iau torom det. ¹⁰ Din warawai mugu nama Wakak na Wasiso torom a taro tagun a kum gapman rop. ¹¹ Ra din dat pas mot sur a warkurai, gong mot nuknuk mugu sur asau ra mot in watungi. Una du bung ra, mot in watungi kut a wasiso ra di sa unuk tar mot nami. Uni awu sur mot ra mot in wasiso, a Tokodos na Nion ut.

¹² “Taio in mulaot ru tu tisino sur din um doko i, ma tu musano in mulaot ru tu nutunu sur din um doko i. Ma a kum nat det in tur na inaim torom a tamandet ma a nandet, ma det in mulaot ru a tamandet ma a nandet sur din um doko der. ¹³ Ma a taro rop det in nget mot uni mot anungi, ikut osi ra in tur dekdek tuk anun a nilaun in rop, o God in ulauni.

A utumarong una sakino utna ra in nanpat

(Mt 24:15-28; Lk 21:20-24)

¹⁴ “Mot in tama ara sakino utna sakit in nanpat, in kis una dino ra ke topasi sur in kis iai, ma in ban udur a dino ra. Osi ra in luk a kum wasiso ri, i wakak sur in mananos uni. Una bung ra, det ra det kis una papor judia, det in kalabor eno usapat una kum tangai. ¹⁵ Ra taio in kis sapat netes una nun a rumu, ra in pirso, gong i ruk sur in los pas tu utna tagisa urumu.* ¹⁶ Ma ra taio in kis sa ukinobot, gong i millet melet unago utamon sur anun a saket. ¹⁷ Una kum bung ra, in laulau doko torom a kum tianan, ma torom a kum ino kai ra a kum nutnutun det, det sus utmakai. ¹⁸ Mot in wararing sur gong a utna ri i wanpat una kum kalang na kotokoto. ¹⁹ Uni una kum bung ra, in labo sakit a ngunungut. In labo taun a kum ngunungut ra i ser wanpat una rakrakon bual. Turpasi ra o God i ukis a rakrakon bual tuk uniri, ma numur kai, katu ngunungut in elar nami. ²⁰ Ra gunuk a Labino ken kutus pirso a kum bung ra, kataio ut in laun. Ikut in kutus pirso ru i sur det ra i sa pilok pas det, det in laun.

²¹ “Una kum bung ra, ra taio in watungi torom mot lena, ‘Tama i, a Karisito kuri i,’ o ‘Kurong i,’ gong mot nurnur. ²² Uni lako kum torotoro na Karisito, ma lako kum torotoro na poropet det in nanpat. Det in pam lako kum ukinalong ma lako kum utna na ukisin sur det in toro pas a taro ra o God i sa pilok pas det, raut ko ra det in pet lar pasi. Ikut, ka det in pet lar pasi. ²³ Mot in tumarong mot! A sa inanos mugu tar mot una kum utna rop ra in nanpat.

A Nutun a Musano in nanpat

(Mt 24:29-31; Lk 21:25-28)

²⁴ “Ra i sa rop a kum mamaut ma a kum ngunungut una kum bung ra, ‘in matanas in dumirum, a kalang ken talapor,

²⁵ a kum nangngang det in puku pirso tagisapat una bakut,

ma a kum utna sapat netes una bakut det in tugunugunu.’ *Ais 13:10; 34:4*

²⁶ “Una bung ra, a taro det in tama a Nutun a Musano in nanpat una kum du bakut nama labino dekdek ma a minamar. ²⁷ Ma in tulu pirso anun a kum ensel, sur det in ben tomo anun a taro na pipilok tagun a wat na matmatano wuwu, tagun ara papor rakrakon bual tuk tong una ara papor rakrakon bual.

A wasiso elelar unin nanai na fig

(Mt 24:32-35; Lk 21:29-33)

²⁸ “Mot in tamtama ususer unin nanai na fig. Ra a kum kanokano in sibul pat melet, ma a kum dono in tapalos, mot tasmani lena a kum kalang na mararong i sa milau. ²⁹ Lenkutkai ra mot in tama a kum utna ra a wasiso taru uni in nanpat, mot in tasmani lena a du bung i sa milau. ³⁰ A inanos mot nama lingmulus, a kum utna rop ri in nanpat ra a taro tagun uniri det laun utmakai. ³¹ A langit ma a rakrakon bual der in rop, ikut anung a kum wasiso ken rop.

Katutaio i tasman a bung o a du bung

(Mt 24:36-44)

³² “Katutaio i tasman a bung o a du bung ra a kum utna ri in nanpat. A kum ensel sapat una langit ka det tasmani, ma o Nutunu kai ke tasmani, o Tamano sot kut i tasmani. ³³ Mot in nuknuk wakak, ma mot in tumarong, uni ka mot tasmani ra nangisin a kum utna ri in nanpat. ³⁴ I elar nam ara musano ra i waninar sur in nan utiro una ra tamon gisen. I pitar tar anun a rumu tan anun a kum tultul, sur det in tamtamabati. I tibo susuaro a kum pinapam tandet rop taktakai, ma i inanos tar ara musano sur in tamtamabat a matansako.

³⁵ “I mo ra mot in tumarong, uni ka mot tasmani ra nangisin a taman a rumu in millet, una lirop, o una labino mirum, o una lar ra a kum kereke det kurkurirakuk, o una kobot, ³⁶ sako in nanpat kisin, ra in nan taru un mot ra kura mot inep dumun kut. ³⁷ Asau ra a watungi tamot, a watungi kai torom a taro rop lena, mot in tumarong.”

14

Det wasiso tomo pas sur det in um doko o Iesu

(Mt 26:1-5; Lk 22:1-2; Jn 11:45-53)

¹ Aru bung numugu tan a labino bung na lotu na Wanlakai, ma a labino bung na lotu na beret ra kalako is uni, a kum lamlabino tene etabor torom o God, ma a kum tene ususer tagun a Warkurai det nuknuk sur tu ngas na kisapi sur det in pam ukai eno pas o Iesu, ma det in um doko i. ² Det watungi lena, “Gong dat pami una labino bung na lotu, sako a taro det in kankan ma det in ukatatur tu inaim.”

A ino i lingis in nopolo sangsangnain unin lorin o Iesu

(Mt 26:6-13; Jn 12:1-8)

13:14: Dan 9:27; 11:31; 12:11 **13:15:** Lk 17:31 * **13:15:** A ngas na rumu anun a taro Israel, sapat na lur na rumu i elaro kut, ma det ser kis utkai uni. **13:17:** Lk 23:29 **13:18:** Dan 12:1; Tam 7:14 **13:22:** Tam 13:13

13:24: Jol 2:10, 31; 3:15; Tam 6:12-13 **13:26:** Tam 1:7 **13:27:** Mt 13:41; Mk 13:32 **13:35:** Lk 12:38 **14:3:** Lk 7:37-38

³ O Iesu i kis tong o Betani, una rumu anun o Saimon, i ra numugu i misait nama lepra. Ra kura o Iesu i wangon, ara ino i wan toromi namin nokoto ra di pami nama wat. Tiro ubalan nin nokoto, a polo sangsangnain kura uni. Di watungi nama nad, ma a matano i ka doko. I sak kutus ru in kabaran nokoto, ra i lingisi unin lorin o Iesu. ⁴ A ramano taro ra det kis tiro iai det kankan ma det wasiso etalai lena, “Sur asau ra di lingis orosi kut in nopolo sangsangnain ri? ⁵ Ilai ra ka di siuru pasi sur lako tulu mar na denaria* sur din tabor a kum sibo na taro nami?” Ma det wasiso na kankan torom a ino ra.

⁶ Ra o Iesu i watungi tandet lena, “Mot in madek ru a ino ri. Ilai ra mot pitar a maut toromi? I sa pam tar a wakak na pinapam sakit iau. ⁷ A kum sibo na taro det in laun bolbolos tomo ut nam mot. Ma nangisin mot nem na pam a wakakino torom det, mot in pami kut. Ikut iau, kan kis tukum nisamot. ⁸ A ino ri i sa pam sot pas a utna ra i elar sur in pami. I sa lingis tar in nopolo sangsangnain ri una pining, sur in waninar mugu iau sur a bung ra an mat ma din uruk a minating una kulam na minat. ⁹ A inanos mot nama lingmulus, una kum tamon una rakrakon bual rop, ra din warawai nama Wakak na Wasiso iai, din inanos utkai un asau ra a ino ri i sa pam tari, sur a risano in tur na aim.”

*O Judas i mulaot sur in pitar tar o Iesu
(Mt 26:14-16; Lk 22:3-6)*

¹⁰ O Judas Iskariot, ara tagun a noino ma aru nat na ususer, i wan torom a kum lamlabino tene etabor torom o God, sur in pitar tar o Iesu ulamandet. ¹¹ Ra det longoro i, det gas, ma det uliliman tari sur det in kuli nam lako mani. Ra o Judas i nuknuk sur tu wakak na du bung ra in pitar tar o Iesu ulamandet.

*O Iesu tomo nama kum nat na ususer det wan a utna na Wanlakai
(Mt 26:17-25; Lk 22:7-14, 21-23; Jn 13:21-30)*

¹² Una mugano bung una kum lamlabino bung na lotu na beret ra kalako is uni, ra di ser um doko a kum sipsip uni sur a labino bung na lotu na Wanlakai, a kum nat na ususer anun o Iesu det tingi lena, “U nemi sur met in nan urai, ma met in waninar andat a utna sur a labino bung na lotu na Wanlakai?” ¹³ I tulu aru tagun anun a kum nat na ususer, ma i watungi tander lena, “Mur in nanpat sapat o Jerusalem. Ra mur sa wanpat, mur in etorom nam ara

musano i los in labino koto na danim, ra mur in muri. ¹⁴ Ra in ruk un tu rumu, mur in watungi tan a taman a rumu lena, ‘A Tene Ususer i watungi lena: Awai i a kukur rumu ra met nam anung a kum nat na ususer, met in nan a utna na Wanlakai iai?’ ¹⁵ Ma in ese tar mur una labino kukur rumu sapat netes, ra di sa waninar tari. Mur in waninar andat a utna tiro iai.” ¹⁶ Aru nat na ususer der wanpat sapat o Jerusalem, ma der pastoromi ut a kum utna rop ra o Iesu i sa watung tari tander. Ra der waninar a utna na Wanlakai.

¹⁷ Ra i sa lirop, o Iesu tomo nama nun a noino ma aru nat na ususer det wanpat. ¹⁸ Det wangon ra i watungi lena, “A inanos mot nama lingmulus, ara tagun mot ri dat wangon tomo, in pitar tar iau ulaman a kum ebar.” ¹⁹ Ra det tupunuk, det rop taktakai det tingi lena, “Awu sur iau, niko?” ²⁰ Ra o Iesu i balu det lena, “Ara tagun mot ut a noino ma aru, ra mir puk tomo amir aru du beret una dis. ²¹ A Nutun a Musano in mat elar nami ra di sa tumus tari una Buk Tabu. Ikut in laulau sakit torom a musano ra in pitar tari torom a kum ebar. Gunuk ra ka din ususi, in wakak toromi, sako in taramo a dekdek na warkurai na minabalu.”

*A ururop na inangon anun a Labino
(Mt 26:26-30; Lk 22:14-20; 1 Kor 11:23-25)*

²² Det wangon utmakai, ra o Iesu i los pas a beret, i watung wakak pas uni, i tibiki, ma i tabor anun a kum nat na ususer nami, ra i watungi lena, “Mot in rakoni, iri a pining.” ²³ Numur i los pas a kap, i watung wakak pas uni, ra i pitari tandet, ma det rop det inum taguni. ²⁴ Ra i watungi tandet lena, “Iri a gaping, a kunubus ra i dat tomo tar a taro nam o God. A gaping ri, i tilingis sur a susut na taro. ²⁵ A inanos mot nama lingmulus, kan inum meleti mo lako wain, tuk ra an inum a matok na wain una matanitu anun o God.”

²⁶ Ra det sa kele tar a kelekele na lotu, det wan tito usapat una Tangai na Olii.

O Iesu i wasiso mugu una ipul anun o Pita

(Mt 26:31-35; Lk 22:31-34; Jn 13:36-38)

²⁷ O Iesu i watungi tandet lena, “Mot rop mot in nan pas kut gusun iau, uni di sa tumus tari una Buk Tabu lenri, O God i watungi lena, ‘An um a tene tam-tamabat anun a kum sipsip, ra a kum sipsip det in kalabor susuaro.’ *Sek 13:7*

* **14:5:** Anundet a mani det ser watungi nama denaria. Ara denaria i elar nama ikul anun ara musano una ra bung na pinapam. **14:7:** Lo 15:11 **14:8:** Jn 19:40 **14:12:** Kis 12:6 **14:18:** Sng 41:9 **14:24:** Kis 24:8; Sek 9:11; Jer 31:31-34; 1 Kor 10:16; Ibr 9:20 **14:28:** Mt 28:16; Mk 16:7

²⁸ Ikut, ra a sa katuttur melet gusun a minat, an mugu utong o Galili.” ²⁹ O Pita i watungi tano lena, “Ra det rop det in nan pas gusun ui, ikut iau awu.” ³⁰ O Iesu i watungi tano lena, “A inanos ui nama lingmulus, miri umirum, a kereke ken manru utmakai u kurkurirakuk, ra un ipul a tulu dino lena, ko tasman iau.” ³¹ Ra o Pita i wasiso dekdek toromi lena, “Kan ipul ru ui. Ra iau kai an iru tomo nam ui, i wakak kut.” Ma a kum nat na ususer rop kai det watungi lenutra.

*O Iesu i wararing tiro o Getsemani
(Mt 26:36-46; Lk 22:39-46)*

³² O Iesu tomo nam anun a kum nat na ususer det wanpat una nubual a risano o Getsemani, ra i watungi tandet lena, “Mot in kis kut nin, ma iau an wararing pas.” ³³ Ra i ben pasi kut o Pita, Jems ma o Jon ra detul wan tomo nami. Una du bung ut ra, i turpas a taramo a labino tupunuk ma i maut doko a nuknukino. ³⁴ I watungi tandetul lena, “Anung a nilaun i maut doko nama tupunuk, milau mo an mat nami. Motul in kis kut nin, ma motul in koikoi taru ut.” ³⁵ I wan lilik taru usa numugu, i puku na urur tiro una piso, ma i wararing sur a du bung na minat in nan sakiti, ra gunuk a nemnem anun o God. ³⁶ I wararing lena, “Tita, Tita, a kum utna rop i topas ui un pami, un los ru a kap na mamaut ri gusun iau. Ikut gong u mur anung a nemnem, un muri ut anum a nemnem.”

³⁷ I milet melet torom a tulu nat na ususer, ra i tama detul, detul sa inep dumun. I ting o Pita lena, “Saimon, pepetlai, u inep dumun kut? Kon pet lari sur un koikoi un tu du bunglik kut?” ³⁸ Motul in koikoi, ma motul in wararing, sur gong motul puku una ululam. A niomotul in nemi, ikut a pinimotul i tungulu kut.”

³⁹ Ra i wan gusun detul, i wararing melet nama niaring ra i sa watung tari numugu. ⁴⁰ I milet melet, ra i tama detul, detul sa inep dumun melet, uni a matandetul i sa sunu doko. Ka detul tasman asau ra detul in balu i nami. ⁴¹ Ra i mantulu milet torom detul, i watungi lena, “Pepetlai, motul in inep liklik mukut, ma motul in mana? Gong mo! A du bung i sa sot. Tama i, di sa pitar tar a Nutun a Musano ulaman a kum tene sakino. ⁴² Motul katuttur, dat na wan! Tama i, a musano ra in pitar tar iau ulaman a kum ebar, i sa wanpat.”

*Di dat pas o Iesu
(Mt 26:47-56; Lk 22:47-53; Jn 18:3-12)*

⁴³ Ra o Iesu i wasiso utmakai, o Judas, ara tagun a noino ma aru nat na ususer, i wanpat, det nama kunur na taro. Det los

a kum totok na inaim, ma a kum nalnal. A kum lamlabino tene etabor torom o God ma a kum tene ususer tagun a Warkurai ma a kum mugumugu det tulu ru det. ⁴⁴ O naro ra in pitar tar o Iesu ulaman a kum ebar, i sa inanos mugu tar a kunur na taro una ukinalong ra in pami lenri, “O naro ra an gom a pangpagor na wano, i ut ra. Mot in pam ukai pasi, mot in ben gisen pasi ma mot in tamtamabati.”

⁴⁵ Uniutra o Judas i wan torom o Iesu ra i watungi lena, “Tene Ususer!” Ra i gom a pangpagor na wano. ⁴⁶ Ra a taro ra, det pam ukai o Iesu ma det dat pasi.

⁴⁷ Ara tagun det ra det tur milau, i dat pas anun in totok na inaim, ra i tau kutus ru in talngan a tultul anun a mugumugu na tene etabor torom o God. ⁴⁸ Ra o Iesu i watungi tandet lena, “Pepetlai, kutiro iau a tene inaim ma a tene wolong, sur i mo ri mot wanpat nama kum totok na inaim, ma a kum nalnal sur mot in pam ukai pas iau? ⁴⁹ Una kum bung rop dat ser kis tomo ubalan in noworo ina rumu na etabor, a ser ususer a taro, ma ka mot pam ukai iau. Ikut di pami lenri sur din pam sot pas a wasiso na Buk Tabu.” ⁵⁰ Numur a taro na ususer rop anun o Iesu det kalabor susuaro pas gusuni.

⁵¹ Ma ara barman ra i ser mur o Iesu, i rakup pasi kut namin namalu. Det pam ukai pasi, ⁵² ra i kalabor gusun anun in namalu, ma i mengere mukut.

O Iesu i tur una warkurai umatan a taro na kiwung

(Mt 26:57-68; Lk 22:54-55, 63-71; Jn 18:13-14, 19-24)

⁵³ Det ben pas o Iesu torom a mugumugu na tene etabor torom o God. Ma a kum lamlabino tene etabor rop torom o God, a kum mugumugu, ma a kum tene ususer tagun a Warkurai det wanpat tomo tiro iai. ⁵⁴ O Pita i mur nanan o Iesu, ikut i bakbak ut gusuni. I ruk una nubual anun a mugumugu na tene etabor torom o God, ra i minor nisan a sungun tomo nama kum tene tamtamabat.

⁵⁵ A kum lamlabino tene etabor torom o God, tomo nama taro na kiwung rop det sisio sur tu sakino utna ra o Iesu i sa pam tari, sur det in takuni nami, ma det in um doko i uni, ikut ka det sio lar pas tu utna. ⁵⁶ A susut det watung a kum torotoro na wasiso un o Iesu, ikut anundet a kum wasiso ke takai. ⁵⁷ A ramano taro det tur ma det watung a kum torotoro na wasiso uni lena, ⁵⁸ “Met longoro i, i watungi lena, ‘An rege ru a rumu na etabor ri, ra a taro det pam tari, ma una tulu bung kut, an pam

pas taio ra awu sur a taro det pami.’”⁵⁹ Ikut anundet a kum wasiso kai ke takai.

⁶⁰ A mugumugu na tene etabor torom o God i tur taru numugu tandet ra i ting o Iesu lena, “Pepetlai, kon balu det? Asau ra un balu a kum wasiso na etakun ri nami?”⁶¹ Ikut o Iesu ke wasiso. A tene etabor ra, i ting meleti lena, “Ui a Karisito, a Nutun o God ra i dan tukum, o awu?”⁶² Ra o Iesu i watungi lena, “Tau ut ra. Ra numur mot in tama a Nutun a Musano in kis una papor sot na laman o God, i ra i dekdek sakit, ma mot in tama i ra in nanpat una kum du bakut tagisapat una langit.”⁶³ A mugumugu na tene etabor i kankan ra i raras anun in namalu ut ma i iting lena, “Dat nem melet lako wasiso na etakun sur asau?”⁶⁴ Mot sa longoro tar anun a kum wasiso laulau un o God. Asau mot nuki?” Ra det rop det mulaot sur o Iesu in iru.⁶⁵ Ara taro, det turpas a ibis o Iesu, det pulus bat pas arin matano, det tubuli ma det watungi tano lena, “Ui a poropet, un inanos met. Osi ra i tubul ui?” Ra a kum tene tamtamabat det ben pasi ma det umi.

O Pita i ipul ru o Iesu

(Mt 26:69-75; Lk 22:56-62; Jn 18:15-18, 25-27)

⁶⁶ Ra o Pita i kis utmakai nago upiso una rumu ra, ara toraro, a tultul anun a mugumugu na tene etabor torom o God i wanpat.⁶⁷ Ra i tama o Pita kura i minor, i nas dekdeki ra i lena, “Ui kai u ser wan tomo nam o Iesu a te Nasaret.”⁶⁸ Ikut, i ipul lena, “Ka tasman asau ra u wasiso uni, ma ka talapor uni.” I wan utong nisan a matansako ina in noworo, ra a kereke i kurkurirakuk mut.⁶⁹ A toraro i tama melet pasi, ra i inanos det ra det tur tiro iai lena, “A musano ri, i kai ara ut tagun det ri.”⁷⁰ O Pita i ipul melet.

Numur lilik tano, det ra det tur milau o Pita, det watungi tano lena, “A lingmulus ut ra ui kai ara tagun det, uni ui a te Galili.”⁷¹ Ra i liliman torom det lena, “Ra an toro, o God in warkurai dekdek iau. Ka tasman a musano ra mot wasiso uni.”⁷² Ra uniuatra a kereke i manru mut u kurkurirakuk. O Pita i nuk pas a wasiso ra o Iesu i sa watung tari tano lena, “A kereke ken manru utmakai u kurkurirakuk, ra i ipul a tulu dino lena, ko tasman iau.” Ra i tangis sakit pas mut.

15

O Iesu i tur umatan o Pailat

(Mt 27:1-2, 11-14; Lk 23:1-5; Jn 18:28-32)

¹ Una kobot raut, a kum lamlabino tene etabor torom o God, a kum mugumugu, ma

a kum tene ususer tagun a Warkurai ma a taro na kiwung rop, det wasiso tomo pas. Det ker pas aru laman o Iesu, det beni, ra det pitari ulaman o Pailat.² O Pailat i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.”³ A kum lamlabino tene etabor torom o God det takun o Iesu una susut na utna.⁴ O Pailat i ting melet o Iesu lena, “I lai, katu minabalu anumi? Tama i, a susut na utna ri det takun ui nami.”⁵ Ikut, o Iesu ke balu i nam tu wasiso, ra o Pailat i kisin doko uni.

Det mulaot ru o Iesu sur in mat

(Mt 27:15-26; Lk 23:13-25; Jn 18:39-19:16)

⁶ Una kum kilalo rop una kum lamlabino bung na lotu na Wanlakai, o Pailat i ser palos ru ara karabus ra a taro det sasaring suri.⁷ Una kilalo ra, ara musano a risano o Barabas i kis una karabus. I ara tagun det ra det waim nama gapman. Det ukatutur a inaim, ra det ser um doko a taro.⁸ Ra a kunur na taro det wanpat torom o Pailat, ma det saring sur in palos melet ru tu karabus.⁹ Ra o Pailat i ting det lena, “Mot nemi sur an palos ru a ‘king anun a taro Juda’ torom mot?”¹⁰ I watungi lenri uni i sa tasmani lena, a kum lamlabino tene etabor torom o God det pitar tar o Iesu toromi una sakino nuknukin det.¹¹ Ikut a kum lamlabino tene etabor torom o God det ukatutur a balan a kunur na taro sur det in saring o Pailat, sur in palos ru o Barabas torom det.¹² O Pailat i ting det lena, “Asau ra an pami un o naro ra mot watungi nama king anun a taro Juda?”¹³ Ra det kukukuk kut lena, “Sak wati unin nanai kutus!”¹⁴ O Pailat i ting det lena, “Sur asau? Asi na sakino utna ra i sa pam tari?” Ikut det kukukuk dekdek lena, “Sak wati unin nanai kutus!”¹⁵ O Pailat i nemi sur in ugagasa a taro, ra i palos ru o Barabas torom det. Ra di sa takalo tatar o Iesu, o Pailat i pitar tari tan a kum tene inaim sur det in sak wati unin nanai kutus.

A kum tene inaim det urongon un o Iesu
(Mt 27:27-31; Jn 19:2-3)

¹⁶ A kum tene inaim det dat pas o Iesu utiro urumu una labino rumu anun anundet a mugumugu, ra det kabo tomo pas a kum tene inaim rop.¹⁷ Det mar tari namin pepol na malu, det liko pas in narus a loklokono, ma det ubek tari unin lorino elar nama kukup anun a king.*¹⁸ Det kakabo toromi lena, “Ui a king anun a taro Juda!”¹⁹ Det raprapus in lorino namin nubuku, det ibisi, det kis butkeke nisan, ma det urur toromi.²⁰ Ra det sa urongon

^{14:64:} Wkp 24:16; Jn 19:7 ^{15:1:} Lk 22:66 ^{15:5:} Ais 53:7; Mk 14:61 ^{15:11:} Ap 3:13-14 * ^{15:17:} In pepol na malu ma a kukup der tamtama elar nama ememar anun a king.

laulau papas uni, det palos ru in pepol na malu gusuni. Det mar tari melet nama nun a kum malu, ma det ben pirso i sur din sak wati unin nanai kutus.

Di sak wat o Iesu unin nanai kutus
(Mt 27:32-44; Lk 23:26-43; Jn 19:17-27)

²¹ Tiro una kisapi a kum tene inaim det ling sur det in nan sakit ara te Sairini, a risano o Saimon, a taman o Aleksanda mo Rupus, i wan tagitong un ara tamon sur in nan usapat o Jerusalem. Det ungonos tari sur in los in nanai kutus anun o Iesu. ²² Det ben o Iesu sur a nubual ra di watungi nam o Golgota, a kukuraino a “Nubual na Lor na Minat.” ²³ Det pitar tar a wain tano ra di sa pam tomo tari nama mira, ikut ke nemi sur in inumi. ²⁴ Det sak wat tari unin nanai kutus, ra det pilai laki sur det in isuaro anun a kum malu sur osi tagun det in los tin namalu. ²⁵ Ra i lisu na pakano bung una kobot, det sak wati unin nanai kutus. ²⁶ Det tumus tar a wasiso na etakun uni, sapat netes unin nanai kutus lena,

“A KING ANUN A TARO JUDA.”

²⁷⁻²⁸ Det sak wat tari kai, aru tene wolong tomo nami una arin nanai kutus, ara una papor sot, ma ara kai una kair.† ²⁹ Det ra det wanan sakit o Iesu, det watung laulau i ma det lele lorindet toromi. Ma det watungi lena, “Ui mo ra u watungi lena, un rege ru a rumu na etabor, ma un pam melet pasi una tulu bung kut, ³⁰ uniri un ulaun pas ui mo, ma un pirso gusun in nanai kutus.” ³¹ A kum lamlabino tene etabor torom o God ma a kum tene ususer tagun a Warkurai det kai det urongon laulau un o Iesu, det wasiso etalai torom det lena, “I ulaun pas a taro gisen, ikut ken ulaun lar pasi ut. ³² Ra i a Karisito, a King anun a taro Israel, uniutri in pirso gusun in nanai kutus, sur dat in tama i, ma dat in nurnur uni.” Ma der ra der kete tomo nami, der kai, der watung laulau i.

O Iesu i mat
(Mt 27:45-56; Lk 23:44-49; Jn 19:28-30)

³³ Ra i noino ma aru pakano bung una suan, a bual rop i dumirum tuk una tulu pakano bung una lirop. ³⁴ Ra i tulu pakano bung, o Iesu i kukukuk dekdek lena, “Eloi, Eloi, lema sabakatani?” A kukurai ina wasiso ra i lenri, “Anung a God, anung a God, ilai ra u wan gusun iau?” Sng 22:1

³⁵ Ara taro tagun det ra det tur milau, det longoro i, ra det watungi lena, “Tama i, i kakabo sur o Elaija.” ³⁶ Ara tagun det i kalabor ra i los pas ara utna ra i ser dop a

polo. I puk pasi una wain ra i mititir, i ubek pasi unin nanai ra i tuluso toto i usapat sur o Iesu in inumi. Ma i inanos det lena, “Te, dat in madek tari munung. Dat in tama i ra o Elaija in nan pirso sur in los pirso pasi, o awu.” ³⁷ O Iesu i kukuk dekdek pas, ra i mat.

³⁸ Ra in namalu ra di mabat kutus nami sa urumu una rumu na etabor i tararos potor, turpasi tagisapat netes tuk unago piso. ³⁹ A mugumugu anun a kum tene inaim ra i tur taru nisan in nanai kutus, i longoro o Iesu ra i kukuk ma i tama a ngas na minat ra i wanpat uni, i watungi lena, “I lingmulus ut, a musano ri a Nutun o God.”

⁴⁰ A ramano wardain kai det tur bakhak taru ut, ma det tama a kum utna ri. Kura epotor tandet, a tulu ino kai ri, o Maria Magdalen, ma o Salomi ma o Maria kai a nan o Joses ma o Jems ra a barman. ⁴¹ Detul ri, detul ser mur o Iesu ra i kis sa o Galili, ma detul ser waruti. Ma a susut na wardain, ra det wan tomo nami usapat o Jerusalem, kura det kai iai.

Di inep a minatin o Iesu una kulam na minat

(Mt 27:57-61; Lk 23:50-56; Jn 19:38-42)

⁴²⁻⁴³ Ara musano a te Arimatia, a risano o Josep. I ara tagun a taro na kiwung, a labino musano ra a taro det ser ru i, ma i ser kis langlang sur a matanitu anun o God. Ra i sa lirop una bung na waninar, a bung numugu tan a Bung na Sabat, i wan torom o Pailat, ke ngara, ra i saring pas a minatin o Iesu tano. ⁴⁴ Ra o Pailat i kisin ra i longoro i lena o Iesu i sa mat. I kabo pas a mugumugu anun a kum tene inaim, ra i tingi lena, “Petelai, o Iesu i sa mat?”

⁴⁵ Ra i sa mananos pas tan a mugumugu ri, i mulaot ru a minatin o Iesu torom o Josep. ⁴⁶ Ra o Josep i kul pas in wakak na malu, i los pirso pas a minatin o Iesu, ra i pulus pasi namin namalu ra. Numur i inep tari una kulam na minat ra di sa kil tari una papor wat, ra i bulus bat tar a matansako na kulam ra nama labino wat. ⁴⁷ O Maria Magdalen ma o Maria, o nan o Joses, der tama tar a nubual ra di inep o Iesu uni.

16

O Iesu i katutur melet gusun a minat
(Mt 28:1-8; Lk 24:1-12; Jn 20:1-10)

¹ Ra a Bung na Sabat i sa rop, o Maria Magdalen, ma o Salomi ma o Maria o nan o Jems, detul kul pas a kum utna ra i sangsangnain sur detul in mar a minatin o Iesu nami. ² Ra in nusuan i wanpat

15:21: Rom 16:13 15:24: Sng 22:18 † 15:27-28: Una ramano kum du buk una wasiso Grik, a ramano kum wasiso kai i kis una vers ri. I lenri: *Di pami lenri sur din pam sot pas a wasiso uni una Buk Tabu ra i lenri, “Di luk tomo pasi nama kum tene sakino.”* 15:29: Sng 22:7; 109:25; Mk 14:58 15:36: Sng 69:21 15:40: Lk 8:2-3

una kobot raut una mugano bung una wik, detul wan sur a kulam na minat. ³ Ra detul wan nanan, detul ting etalai detul, “Osi mo in warut datul sur in bulus gisen ru a wat gusun a matansako na kulam na minat?” ⁴ Ikut ra detul tamtama tokodos usa, detul tama i ra di sa bulus gisen ru a labino wat ra. ⁵ Ra detul ruk una kulam, detul tama ara barman, i kis taru una papor sot na lamandetul, i emar pas namin kabang na malu. Ra detul tama pasi, detul kisin ma detul ngara.

⁶ A musano ra i watungi lena, “Gong motul ngara. A tasmani lena, motul sisio sur o Iesu a te Nasaret, i ra di sak wat tari unin nanai kutus. I sa katuttur melet, ma ke kis mo nin. Motul in tama a nubual ra di inep tari uni. ⁷ Motul nan, ma motul in inanos anun a kum nat na ususer ma o Pita kai lena, ‘O Iesu in mugu utong o Galili. Mot in tama i tong, elar nami ra i sa inanos mugu tar mot.’”

⁸ Detul kisin ma detul neneder, ra detul kalabor gusun a kulam na minat. Ma ka detul inanos taio nam tu wasiso, uni detul ngara doko.*

O Iesu i wanpat torom o Maria Magdalen ma aru nat na ususer kai

(Mt 28:9-10; Lk 24:13-35; Jn 20:11-18)

[⁹ O Iesu i katuttur melet gusun a minat una kobot raut una mugano bung una wik. Ra i wanpat mugu torom o Maria Magdalen, i ra numugu o Iesu i lakro ru tar a wonom mawit na laulau na nion gusuni. ¹⁰ O Maria Magdalen i wan ra i inanos det ra det ser mur o Iesu, ra kura det tupunuk ma det tangtangis suri. ¹¹ Ra det longoro i lena, o Iesu i sa laun melet gusun a minat ma o Maria i sa tama tari, ka det nurnur uni.

¹² Numur o Iesu i wanpat torom aru nat na ususer ra der wan nanan una kisapi, ma a pinino i tamtama senene. ¹³ Der millet melet, ra der inanos a kum nat na ususer rop. Ikut, ka det nurnur kai un der.

O Iesu i wanpat torom a noino ma ra nat na ususer

(Mt 28:16-20; Lk 24:36-49; Jn 20:19-23; Ap 1:6-8)

¹⁴ Numur i wanpat torom a noino ma ra nat na ususer ra det kis na inangon. Ra i bor det, uni a balandet i dekdek ma ka det nurnur un det ra det sa tama tari ra i sa laun melet. ¹⁵ Ma i watungi tandet lena, “Mot in nan una rakrakon bual rop, ma mot in warawai nama Wakak na Wasiso torom a taro rop. ¹⁶ Osi ra i nurnur ma di baptaiso

i, din ulauni. Ikut i ra ke nurnur, din pitar a dekdek na warkurai na minabalu toromi. ¹⁷ A kum tene nurnur det in pam a kum utna na ukisin ri: Det in lakro ru a kum laulau na nion nama risang, ma det in wasiso nama kum matok na ngas na wasiso, ¹⁸ det in pam a kum sui ra i ser karot doko a taro, ikut ken ban laulau det, ma ra det in inum a sangsagor, ken ban laulau det, ma det in ubek a kum lamandet una kum misait, ra det in langolango.”

O Iesu i wan usapat una langit
(Lk 24:50-53; Ap 1:9-11)

¹⁹ Ra a Labino o Iesu i sa wasiso taru tandet, o God i ben toto pasi usapat una langit, ma o Iesu i kis una papor sot na laman o God. ²⁰ Anun a kum nat na ususer det wan, ma det warawai tuptupukus. Ma a Labino i papam tomo nam det, ma i ulingmulus anun a wasiso nama kum utna na ukisin.]

16:7: Mt 26:32; Mk 14:28 * **16:8:** Una ramano kum du buk una wasiso Grik, katu vers 9-20. **16:14:** 1 Kor 15:5
16:15: Ap 1:8 **16:16:** Ap 2:38 **16:17:** Ap 2:4; 8:7 **16:18:** Lk 10:19; Ap 28:3-6 **16:19:** Ap 1:9-11; 2:33-34
16:20: Ap 14:3; Ibr 2:3-4

A Wakak na Wasiso un o Iesu Karisito o Luk i tumusi

A wasiso talapor mugu

O Luk i tumus a buk ri. Awu sur i ara tagun a noino ma aru nat na ususer anun o Iesu. Ma awu sur i a te Juda, i a te Grik. A ramano kum tene mananos tagun a Buk Tabu, det nuki lena, anun a tamon o Antiok una papor Siria. O Luk ke tama tar a kum utna ra o Iesu i pami. Ikut i los a mananos tandet ra det wasiso un o Iesu. Una ramano kum inawan anun o Pol, o Luk i wan tomo nami. (Ap 16:10-17; 20:5-21; 27:1-28:16).

Numugu anun a pinapam a dokta, ma i tasman wakak a wasiso Grik.

A buk ri a mugano buk ra o Luk i tumusi, ma i tumusi kai a buk Aposel. I tumus a buk ri sur a taro Grik det in tasman wakak a wasiso un o Iesu ma det in nurnur uni. Det in tasmani lena o Iesu i wan pirso urin sur in ulaun a taro rop. O Luk i tumtumus kai un o Iesu lena, i wanpat a musano mulus, ma i wasiso una nun a marmaris torom a sibo na taro, ma torom dat rop taktakai.

I tumusi kai a kum utna ri: A watung ulabo torom o God, a dekdekin a Tokodos na Nion, a niaring, ma a nilaun anun a kum sibo na taro ma a kum tene gongon.

A inawan ina buk Luk:

A turturkibin ina buk ri (1:1-4)

A usus anun o Iesu ma o Jon a Tene Baptaiso (1:5-2:52)

A pinapam anun o Jon a Tene Baptaiso (3:1-20)

Di baptaiso o Iesu ra numur o Satan i lari (3:21-4:13)

O Iesu i papam tong o Galili (4:14-9:50)

O Iesu i wan usapat o Jerusalem (9:51-19:27)

A ururop na wik ma a minatin o Iesu (19:28-23:56)

A katkatatur melet anun o Iesu gusun a minat (24:1-49)

A inawan toto anun o Iesu (24:50-53)

O Luk i tumus a buk ri torom o Tiopilus

¹ Torom o Tiopilus,

A susut det lari ra det sa pam sot pas a tumtumus una kum utna ra i wanpat epotor tamet. ² A taro ra det sa tama tar a kum utna ri numugu, ma det ser ususer a taro una Wakak na Wasiso, det ut det inanos met una kum utna ri. ³ I mo ra iau

kai, a sa tikin pas a kum utna ri tagun a turturkibino, ra a nuki lena, i wakak ra an tumus tari torom ui, o Tiopilus a labino. Ra a tumus a kum utna ri, a tumus murmuri ut a inawan pat indet, ⁴ sur un tasmani lena, a kum utna ra di sa ususer tar ui nami, i lingmulus ut.

A wasiso talapor mugu ra din usus o Jon a Tene Baptaiso

⁵ Una kilalo ra o Erod i king una papor Judia, ara tene etabor torom o God a risano o Sekaraia. I ara tagun a kabotaro anun o Abia, ra det rop a kum tene etabor. O Sekaraia, anun a ino a risano o Elisabet, der rop tagun a kabotaro anun o Aron. ⁶ Der aru tene tokodos umatan o God, der mur wakak a kum Warkurai rop anun a Labino. ⁷ Ikut katu nutunder, uni o Elisabet ke ser usus, ma der sa takano laulau kai.

⁸ Ara bung una kum bung na etabor anun a kabotaro anun o Sekaraia, o Sekaraia ut i pam a pinapam na etabor umatan o God. ⁹ A kum tene etabor torom o God det pilok pas o Sekaraia sur i ut in ruk una rumu na etabor anun a Labino, ma in tun a paura ra a misino i sangnain wakak ra di watungi nama insens. Anundet a pipilok ra, i elar nama ngasino ra det ser muri*. ¹⁰ Una du bung ra i tun a insens, a taro na lotu rop ra det tur tomo nago upiso det wararing.

¹¹ A ensel anun a Labino i wanpat torom o Sekaraia, ra i tur taro una papor sot na kabulu na tuntun etabor, ra di ser tun a utna ra i sangsangnain wakak uni. ¹² Ra o Sekaraia i tama pasi, a pinino i surin, ma i ngara doko uni. ¹³ Ikut a ensel i watungi tano lena, "Sekaraia, gong u ngara, o God i sa longoro anum a niaring, ma anum a ino o Elisabet in usus pas tu nutumlik a musano, ra un pasor a risano nam o Jon. ¹⁴ Un gas doko nami, ma a susut kai det in gas una nun a usus, ¹⁵ uni in labo umatan a Labino. Ken inum a wain, o a dekdek na ininum. Ra ka din ususi utmakai i sa bukus nama Tokodos na Nion. ¹⁶ Ma in ben pukus tar a susut na taro Israel torom a Labino anundet a God. ¹⁷ In dekdek elar nama poropet Elaija ma a magirano kai in elar ut nami. In mugu tan a Labino, sur in ben tomo melet a kum tamtaman a kum nat torom a kum nutnutun det sur det in emarom melet, ma in ben pas a taro na pitarngat melet sur a wakak na ninunuk anun a kum tokodos na taro, sur in waninar a taro anun a Labino sur anun a inawan pat."

1:1: Ap 1:1 1:9: Kis 30:7 * 1:9: Det pam ara pinapam sur in ese det lena, osi ra in pam a pinapam na etabor. Ara taro det nuki lena, i elar nami ra di tumus a risan a taro taktakai una kum watat, ra osi ra a risano i wanpat in los a pinapam ra. 1:15: Nam 6:3 1:17: Mal 3:1; 4:5-6; Mt 17:11-13 1:19: Dan 8:16; 9:21

¹⁸ O Sekaraia i ting a ensel lena, “An tasman petlani lena a utna ri in nanpat? Uni mir, mir sa takano rop.” ¹⁹ Ra a ensel i balu i lena, “Iau o Gebriel, a ser tur umatan o God. I ut i tulu ru iau sur an inanos ui, ma an los a wakak na wasiso ri torom ui. ²⁰ Tama i! Ko nurnur una nung a wasiso. In nanpat mulus ut una kalangino. Tama i, turpasi uniri kon wasiso, uni ko nurnur. Un ngat tuk una du bung ra a utna ri in nanpat uni.”

²¹ Una du bung ra a taro det kis langlang sur o Sekaraia, det nuknuk doko, uni i sa suano i tiro una rumu na etabor. ²² Ra i wan pirso, ke wasiso lar pas mo torom det. Det tasmani lena o Sekaraia i sa tama tar tu tamtama tiro una rumu na etabor, uni i tustusu mukut torom det nama ru lamano.

²³ Ra i sa rop anun a du bung na pinapam, i millet melet sur anun a tamon. ²⁴ Ma numur, o Elisabet anun a ino i tianan, ma a limo na kalang ke wan gisen pas gusun a rumu. ²⁵ Ra i watungi lena, “A Labino i sa warut tar iau, ma uniri maragom i los ru asau ra a maimai nami umatan a taro.”

Di inanos o Maria lena in usus o Iesu

²⁶ Ra i sa wonomnin kalang anun o Elisabet, o God i tulu ru a ensel Gebriel utong o Galili un ara tamon a risano o Nasaret. ²⁷ I wan torom ara toraro ra ke inep tomo nam tu musano. A risano o Maria, ra di sa ubeke bat tari sur anun o Josep, i tagun a kabotaro anun o Dewid. ²⁸ A ensel i ruk torom o Maria ma i watungi tano lena, “Un gas, u dan doko! A Labino i kis tomo nam ui.” ²⁹ A nuknukin o Maria i purpuruon ma i nuknuk doko una wasiso ri lena asau a kukuraino. ³⁰ Ikut a ensel i watungi tano lena, “Maria, gong u ngara, uni o God i gas doko nam ui. ³¹ Tama i! Un tianan, un usus pas a nat musano, ra un pasor tar a risano nam o Iesu. ³² Ma a risano in rereng, ma din watungi a Nutun o God a Labino Sakit. Ma a Labino o God, in ukis tari una kiskis na king anun o tubunur o Dewid, ³³ ma in warkurai tukum sur a kabotaro anun o Jekop, ma anun a matanitu ken rop.” ³⁴ O Maria i ting a ensel lena, “In pepetlai ri? Uni ka nolin utmakai nam tu musano.” ³⁵ A ensel i balu i lena, “A Tokodos na Nion in kis un ui, ma a dekdekin o God a Labino Sakit in pulus bat ui. Ra a Tasur na Musano ra un usus pasi, din watungi a Nutun o God. ³⁶ Tama i, a kukum o Elisabet i sa takano laulau, ra di watungi lena ken usus mo, ikut uniri i sa tianan, ma i sa wonomnin kalang anunu. ³⁷ Uni katu utna i ngangitin torom o God.” ³⁸ Ra o Maria i watungi lena, “Iau

a tultul anun a Labino. I wakak ut sur din pami un iau elar ut nama num a wasiso.” Ra a ensel i wan gusuni.

O Maria i wan torom o Elisabet

³⁹ Numur o Maria i waninar pas, ra i wan lakit usapat una kum tangai sur ara tamon ra i kis una papor Judia. ⁴⁰ I ruk una rumu anun o Sekaraia, ra i kabo na gasgas pas o Elisabet. ⁴¹ Ra o Elisabet i longoro pas a kakabo na gasgas anun o Maria toromi, a nat i milu unin balano, ma o Elisabet i bukus nama Tokodos na Nion. ⁴² Ra i watungi namin labino walngano lena, “Ui u dan tan a kum wardain rop, ma a nat kai ra un ususi i dan. ⁴³ Iau osi na ngas na ino ri, ra a nan anung a Labino i wan torom iau? ⁴⁴ Ra a longoro anum a kakabo na gasgas torom iau, a nat i gas, ma i milu unin balang. ⁴⁵ U dan, uni u nurnur lena, a wasiso anun a Labino torom ui in nanpat mulus.”

O Maria i watung ulabo pas o God

⁴⁶ O Maria i watungi lena, “A niong i watung ulabo pas a Labino, ⁴⁷ ma in balang i gas un o God, anung a Tene Ulaun, ⁴⁸ uni i maris iau anun a tultul na ino, a ino oros kut iau. Turpasi uniri a kum taun taro rop det in watungi un iau lena a dan, ⁴⁹ uni i ra i Dekdek, i sa pam tar a kum labino utna un iau, a risano i tasur. ⁵⁰ Anun a marmaris i kis torom det ra det ngara suri, a kum taun taro rop. ⁵¹ I pam a kum dekdek na pinapam nama lamano, i lu susuaro ru det ra det uman labino una nuknukin det. ⁵² I woro pirso ru a kum king gusun anundet a kum kiskis na labino, ma i ulabo pas det ra det unatino pas det. ⁵³ I tabor masur a taro ra det murak nama kum wakak na utna, ikut i tulu ru a kum tene gongon nama gowono lamandet. ⁵⁴ I warut anun a kum tultul, a taro Israel, ra i nuk pas anun a marmaris ⁵⁵ torom o Abaram ma anun a kabotaro tukum, elar nami ra i sa watung tari torom anundat a kabotaro tagun numugu.” ⁵⁶ Ra o Maria i kis nisan o Elisabet elar nama tulin kalang, ra numur i millet melet sur anun a tamon.

O Elisabet i usus o Jon a Tene Baptaiso

⁵⁷ Ra a bung anun o Elisabet i sot sur in usus uni, i usus pas a nat musano. ⁵⁸ A kum paspasano ma a kum kukunu det longoro i lena a Labino i maris doko o Elisabet, ma det gas tomo nami.

⁵⁹ Ra i sa tiwal na bung anun a nat, det waninar sur din tok talilis a pinino, ma det nemi sur det in pasor tar a risan o tamano o Sekaraia uni. ⁶⁰ Ikut o nano i watungi lena, "Gong! Din pasori ut nam o Jon." ⁶¹ Det watungi tano lena, "Katu kukum i los a rising ra." ⁶² Numur det pam a kum ukinalong nama lamandet torom o tamano, ra det tingi lena, "Osi na rising u nemi sur din pasor a nat ri nami?" ⁶³ Ra i ukinalong nama lamano sur tu utna ra in tumtumus uni, ma i tumusi lena, "A risano o Jon." Det rop det kisin. ⁶⁴ Uniutra a wan o Sekaraia i papos, ma in karmene i milu, ra i wasiso mut, i watung ulabo pas o God. ⁶⁵ Ma a kum paspasan der rop, det ngara. A wasiso una utna ri, i wan sarara una kum tamon sapat una kum tangai una papor Judia. ⁶⁶ Det rop ra det longoro i, det nuknuk doko uni, ma det watungi lena, "A nat ri in nanpat asi na ngas na musano?" Uni det tama i lena a dekdekin a Labino i kis uni.

O Sekaraia i wasiso na poropet

⁶⁷ O Sekaraia o taman o Jon, i bukus nama Tokodos na Nion, ma i wasiso na poropet lenri,

⁶⁸ "Dat in watung ulabo pas a Labino, a God anun a taro Israel, uni i sa wanpat taru torom anun a taro, ma i sa ulangolango tar det.

⁶⁹ I sa pitar tar a dekdek na Tene Ulaun torom dat, tagun a kabotaro anun o Dewid, a tultul anun a Labino,

⁷⁰ elar nami ra i sa watung tari numugu utmakai una wan anun a kum tasur na poropet.

⁷¹ I sa pitar tari sur in ulaun pas dat gusun anundat a kum ebar, ma gusun a lamandet rop ra det nget dat,

⁷² ma sur in maris anundat a kabotaro tagun numugu ma in pam sot pas anun a tokodos na kunubus.

⁷³ I liliman taru torom a tubundat o Abaram lena,

⁷⁴ in ulaun pas dat gusun a laman anundat a kum ebar,

sur dat in papam toromi ma ka dat in ngara.

⁷⁵ Dat in papam toromi nama petutna ra i talapor ma i tokodos umatano, una nundat a kum bung na nilaun rop.

⁷⁶ Ma ui, nutunglik, din watung ui, a poropet anun o God a Labino Sakit, uni un mugu nanan tan a Labino, sur un pam saro mugu anun a kisapi,

⁷⁷ sur din utalapor anun a taro lena o God in ulaun pas det, una nun a pinapam ra in unus ru anundet a kum sakino petutna,

⁷⁸ kibino una labino marmaris anun anundat a God.

Ma una nun a marmaris, a talapor tagisapat netes in sisio pat torom dat.

⁷⁹ In sisio un det ra det kis una dumirum, ma una dumirum na minat, sur in mugu dat una kisapi na malmal."

⁸⁰ Ra a nat i labo pat nanan ma o God i udekdek a niono. Ma i kis una nubual kalako taro uni tuk ra i tur pat torom a taro Israel.

2*O Maria i usus o Iesu (Mt 1:18-25)*

¹ Una kilalo ra, o Sisa Augustus, a mugu-mugu tagun a gapman Rom, i ubek a warkurai sur din tumus a risan a taro rop una kum tamon ra o Rom i warkurai sur det. ² Iri a mugano dino ra di tumus a risandi una kum kilalo ra o Kwirinius i mugumugu tong o Siria. ³ Ma a taro rop det wan sur anundet a kum tamon mulus sur din tumus a risandet.

⁴ O Josep kai i wan tagitiro una tamon Nasaret una papor Galili utong o Betliem una papor Judia. O Betliem, a tamon ra di usus o Dewid iai, ma o Josep i wan utong, uni i tagun a kabotaro anun o Dewid. ⁵ I wan sur din tumus a risano, tomo nama risan o Maria ra di sa ubek bat tari sur anunu. Ra der wan o Maria i sa tianan. ⁶ Ra der kis tong o Betliem, i sa sot a du bung sur o Maria in usus uni, ⁷ ra i usus pas a mugano nutunu, a nat musano. Ma i pulusi* nama kum malu anun a nat, ma i inep tari una boks na inangon ana kum wewegua, uni a rumu na usiro i sa bukus pas gusun detul.

A ensel i pitar a wasiso torom a kum tene tamtamabat anun a kum sipsip

⁸ A ramano kum tene tamtamabat anun a kum sipsip det tamtamabat anundet a

1:59: Stat 17:12; Wkp 12:3; Lk 2:21 1:68: Sng 72:18

Sng 105:8-9 1:73: Stat 22:16-17 1:75: Tai 2:12-14

* 2:7: A magiran a taro Juda det rau a nat miso nama kum du malu. Det rau i sur a ru lamano ma a ru kikino in tokodos ma gong a pinino i kotokoto.

1:69: Sng 18:2 1:71: Sng 106:10 1:72: Stat 17:7;

1:76: Ais 40:3 1:77: Jer 31:34 1:78: Ais 60:1-2

kum sipsip una mirum sa ubual milau una tamon ra. ⁹ Ma a ensel anun a Labino i wanpat torom det, ma a minamar anun a Labino i sisio tallis det, ra det ngara doko. ¹⁰ Ikut a ensel i watungi tandet lena, “Gong mot ngara. Mot tama i, a wanpat torom mot nama wakak na wasiso ra in ugagas a taro rop. ¹¹ Uniri, una tamon anun o Dewid, di sa usus pas anumot a Tene Ulaun, i a Karisito, a Labino. ¹² Ma mot in tama a ukinalong lenri: A nat di pulus tari nama kum malu na nat, ma di inep tari una boks na inangon ana kum wewegua.”

¹³ Uniutra a labino kunur na ensel tagisapat una langit det wanpat torom a ensel ra, ma det watung ulabo pas o God lena, ¹⁴ “Dat in watung ulabo pas o God sapat netes sakit, ma a malmal una rakrakon bual rop torom det

ra o God i gas sur det.”

¹⁵ Ra a kum ensel det sa wan gusun det usapat netes una langit, a kum tene tamtamabat anun a kum sipsip det watungi lena, “Uniuttri dat in nan utong o Betliem, dat in tama a utna ri i sa wanpat, ra a Labino i sa inanos tar dat nami.”

¹⁶ Ra det wan lakit, ra det sio pas o Maria ma o Josep ma a nat miso ra di inep tari una boks na inangon ana kum wewegua. ¹⁷ Ra det sa tama tar a nat, det watung puaso a wasiso ra a ensel i sa inanos tar det nami una nat ra. ¹⁸ Det rop ra det longoro a wasiso anun a kum tene tamtamabat anun a kum sipsip, det kisin doko uni. ¹⁹ Ra o Maria i longoro a kum wasiso ri, i pam ukai i unin balano ma i nuknuk doko uni. ²⁰ A kum tene tamtamabat anun a kum sipsip det millet melet, det ulabo pas o God ma det rakon lekeleke pasi una kum utna det longoro i ma det sa tama tari, elar ut nama wasiso anun a ensel.

Di pasor a risan o Iesu

²¹ Ra i tiwal na bung anun a nat, ma i sa sot sur din tok tallis a pinino, di pasor tar a risano nam o Iesu, elar nama wasiso ra a ensel i sa watung tari ra o Maria ke tianan utmakai.

Di pitar tar o Iesu torom a Labino

²²⁻²⁴ Numur tan a bung ra o Maria i usus o Iesu, o Maria ma o Josep der kis ru a kum bung na utalapor sur o Maria in talapor melet umatan o God[†]. Ra a kum bung ra, i sa rop, der wan usapat o Jerusalem, sur der in pitar a etabor, elar nama Warkurai anun o Moses. Der in etabor nama “arin

natabun o arin barman na balus,” *Wkp 12:8*

elar nama Warkurai anun a Labino. Der los o Iesu utkai usapat o Jerusalem, sur der in pitar tari torom a Labino, elar nami ra di sa tumus tari una Warkurai anun a Labino lena, “A kum mugano nat musano rop ma a kum mugano loko na wewegua, din pitar tar det torom a Labino.” *Kis 13:2, 12*

²⁵ Ara musano i kis sapat o Jerusalem a risano o Simion, a tene tokodos ma a tene urur kai torom o God. I ser kis langlang sur o God in ulaun a taro Israel, ma a Tokodos na Nion i kis uni. ²⁶ A Tokodos na Nion i sa upuaso tari toromi lena ken mat lakit, tuk ut ra in tama tar a Karisito anun a Labino. ²⁷ A Tokodos na Nion i mugu i sur in ruk unin noworo na rumu na etabor. Ra i tama pas der suano der wanpat nama nat, o Iesu, sur der in pitar tari torom a Labino, elar nami ra di sa tumus tari una Warkurai. ²⁸ O Simion i los pas o Iesu nama ru lamano, ra i watung wakak torom o God lenri,

²⁹ “Labino, uniri un ulangolango ru iau, anum a tultul, sur an nan nama malmal, elar ut nama num a liliman torom iau.

³⁰ A sa tama tar a Tene Ulaun namin matang, a Tene Ulaun ra u tulu ru i.

³¹ U sa waninar tari umatan a kum kabotaro rop.

³² I a talapor sur in utalapor anum a kisapi torom det ra awu sur a taro Israel, ma sur a minamar torom anum a taro Israel.”

³³ O tamano ma o nano der kisin doko una kum wasiso ra o Simion i watungi un o Iesu. ³⁴ O Simion i watung udan detul, ra i watungi tan o Maria, o nan o Iesu, lena, “Tama i, a nat ri, o God i pilok pasi sur a susut na te Israel det in iru uni, ma a susut kai det in laun uni, ma sur a ukinalong ra a susut na taro det in rosumur gusuni. ³⁵ Ra det in rosumur gusuni, in upuaso a kum nuknuk tagun a balandet. Ma ui, a tupunuk ra un taramo i in elar namin totok na inaim ra in so anum a nilaun.”

³⁶⁻³⁷ Ara ino bulung, a propet, a risano o Ana, a nutun o Panuel, tagun a kabotaro Aser. I sa takano laulau, i sa tiwal na noino ma wat na kilalo anunu ma i ula mukut. Der nolin pas kut a wonom mawit na kilalo, ra numur anun a musano i mat. A ino ri ke wan taru gusun a rumu na etabor, i ser lotu una kum mirum ma a waspi, i ser wewel ma i ser wararing. ³⁸ Una du bung utra, i

2:14: Lk 19:38

2:19: Lk 2:51

2:21: Lk 1:31

2:22-24: Wkp 12:1-8

†

2:22-24: Una Warkurai anun o

Moses, a ino ra i usus in pam sot pas a ru pinapam sur in talapor melet umatan o God. A mugano, in kis ru a wat na noino bung, ma a manru nami, in pitar a etabor torom o God.

2:30: Ais 52:10; Lk 3:6; Tai 2:11

2:32: Ais 42:6;

49:6; 52:10

2:34: Ais 8:14; Mt 21:42; 1 Pit 2:8

wanpat torom detul, i watung wakak pas torom o God, ra i wasiso puaso una nat torom det rop ra det ser kis langlang sur o God in ulangolango pas a taro Jerusalem.

Detul millet melet utong o Nasaret

³⁹ O Josep ma o Maria der sa pam sot pas a kum utna rop elar nama Warkurai anun a Labino, ra numur detul millet melet utong o Galili, sur anundetul a tamon, o Nasaret. ⁴⁰ Ra a nat i labo pat nanan, ma i dekdek nanan, ma i bukus nama mananos, ma a marmaris anun o God i kis uni.

O Iesu i kis sikot una rumu na etabor

⁴¹ Una kum kilalo rop o taman o Iesu ma o nano der ser wan usapat o Jerusalem una labino bung na lotu na Wanlakai. ⁴² Ra i sa noino ma aru kilalo anun o Iesu, detul wan usapat o Jerusalem sur a labino bung na lotu na Wanlakai, elar ut nami ra det ser pami. ⁴³ Ra a labino bung na lotu na Wanlakai i sa rop, det turpas a inawan sur det in millet melet, ma o Iesu i kis sikot kut sapat o Jerusalem, ikut o tamano ma o nano ka der tasmani. ⁴⁴ Der nuki lena, det wan tomo nama taro. Ra det sa wan ara bung una nundet a milmilet, der turpasi sur der in sisio sur o Iesu nisan a kum kukundetul, ma a kum paspasan detul.

⁴⁵ Ra der lagano sisio taru suri, der millet melet usapat o Jerusalem, ra der sisio mo suri sapat. ⁴⁶ Ra der sa sisio pas a tulu bung, der tama torom pasi ubalan in noworo ina rumu na etabor. I kis tomo nama kum tene ususer tagun a Warkurai, i longoro det, ma i ting det. ⁴⁷ Det rop ra det longoro i, det kisin una nun a mananos, ma anun a kum minabalu torom det. ⁴⁸ Ra der tama pasi, der kisin, ma o nano i watungi tano lena, "Nutunglik, ilai ra u pami lenri un mir? Mir nam o tamam mir sa sisio doko pas sur ui, ma mir ngara doko sur ui." ⁴⁹ Ra i watungi tander lena, "Asau ra mur sisio sur iau suri? Ka mur tasmani lena i tokodos sur an kis una rumu anun o Tita?" ⁵⁰ Ikut ka der talapora una nun a wasiso.

⁵¹ Numur detul millet melet utong o Nasaret, ra i ser mur a wasiso anunder, ma o nano i nuk ukai a kum utna rop ri. ⁵² O Iesu i labo pat nanan una pinino ma una nun a mananos, ma o God ma a taro kai det gas doko nami.

3

*O Jon a Tene Baptaiso i warawai
(Mt 3:1-12; Mk 1:1-8; Jn 1:19-28)*

¹ Ra i sa noino ma limo na kilalo una warkurai anun o Sisa Taiberius, o Pontias

Pailat a labino mugumugu i warkurai sur a papor Judia, ma o Erod i mugumugu una papor Galili, ma a tisino o Pilip i mugumugu una aru papor Ituria ma o Trakonitis, ma o Lisanias i mugumugu una papor Abilene ² ma o Anas ma o Kaiapas der los a pinapam na mugumugu na tene etabor torom o God. Una kilalo ra, a wasiso anun o God i wanpat torom o Jon, a nutun o Sekaraia ra i kis una nubual kalako taro uni. ³ Ma i wan una kum nubual rop milau a danim Jodan, i ser warawai lena, a taro det in nukpukus ma din baptaiso det, sur o God in unus ru anundet a kum sakino petutna. ⁴ Elar nami ra di sa tumus tari una buk anun a poropet Aisaia lena,

"Una nubual kalako taro uni, in nalngan ara i kakabo lena,

'Mot in waninar a kisapi anun a Labino, mot in pam kodos anun a kum kisapi.

⁵ A kum lala rop din por det ma a kum du tulur rop ma a kum tangai din kil elaro det.

A kum kisapi ra i kiloklok din ukodos det, ma a kum nubual i tungtung, din por kodos det.

⁶ Ra a taro rop det in tama i ra o God in ulaun a taro.' " *Ais 40:3-5*

⁷ A kunur na taro det wanpat torom o Jon sur in baptaiso det, ra i watungi tandet lena, "Ai, mot a kum nutnutun a kum sui! Osi ra i inanos mot sur mot in kalabor eno gusun a warkurai na minabalu anun o God, ra in nanpat? Iau awu. ⁸ Mot in pam a kum utna ra in upuaso i lena mot sa nukpukus. Ma gong mot nuki lena, o God ken warkurai mot uni mot a kabotaro anun o Abaram. A inanos mot lena, o God in pet lari sur in pam pat pas a kabotaro anun o Abaram tagun a kum watat ri. ⁹ Di sa ubek tar a nawu nisan a kum kibino duwai, ma a kum duwai rop ra ka det wu lako wakak na windet, din tau ru det, ma din woro tar det una sungun."

¹⁰ A kunur na taro det tingi lena, "Asau ra met in pami?" ¹¹ I balu det lena, "Osi ra anunu lako rin namalu na kelkeles, in pitar tar tino tan taio ra ka tin namalu na ememar anunu, lenkutkai ra una utna na inangon." ¹² Ma a ramano kum tene los takis det wanpat sur in baptaiso det. Ma det tingi lena, "Tene Ususer, asau ra met in pami?" ¹³ Ra i balu det lena, "Gong mot los a takis i labo tauni ra di sa kubus tari." ¹⁴ Ma a ramano kum tene inaim det tingi lena, "Ma met, asau ra met in pami?" Ra i balu det lena, "Gong mot los na kankan oros pasi kut a mani gusun a taro, ma gong

mot etakun torotoro, mot in gas kut sur a ikul ra din pitari tamot.”

¹⁵ A taro det kiskis langlang sur a Karisito in nanpat. Ra det longoro o Jon, det nuki lena kutiro a Karisito mo. ¹⁶ Ra o Jon i watungi tandet rop lena, “Iau, a bap-taiso mot nama danim. Ikut o naro ra a dekdekino i labo taun a dekdeking in nanpat. Ka elar sur an palos aru su gusun aru kikino, uni a natino doko tano. In bap-taiso mot nama Tokodos na Nion ma a sungun. ¹⁷ I pam pas anun a pok nam aru lamano sur in lakro susuaro a pino wit gusun a wino wit*.” Numur in ubek tomo anun a wino wit una nun a rumu na wit, ikut in tun ru a kum pinino una sungun ra ke ser mat.” ¹⁸ Ra o Jon i warawai torom det nama Wakak na Wasiso i udekdek det nama susut na wasiso sur det in pukus anundet a nilaun.

¹⁹ Ma o Jon i wasiso dekdek torom o Erod a mugumugu, uni i nolin melet nam o Erodias, a ino anun o tisiso. Ma i wasiso dekdek una kum sakino utna rop kai ra o Erod i sa pam tari. ²⁰ Ma o Erod i wot melet ara sakino petutna ra i uruk tar o Jon una karabus.

*O Jon i bap-taiso o Iesu
(Mt 3:13-17; Mk 1:9-11)*

²¹ Ra o Jon i bap-taiso a taro rop, i bap-taiso i kai o Iesu. Ma una du bung ra i wararing, a langit i papos, ²² ma a Tokodos na Nion i wan pirso, i ubek pas a pinino lar in natabun ma i kis taru netes un o Iesu. Ma in nalngan ara tagisapat una langit i watungi lena, “Ui a Nutunglik, a nat na wakak, a gas doko nam ui.”

*A utatos ina kabotaro anun o Iesu
(Mt 1:1-17)*

²³ O Iesu i turpas anun a pinapam ra kutiro i tulu noino kilalo anunu. I a nutun o Josep, a nuknukin a taro kut lenra.

O Josep a nutun o Eli,

²⁴ o Eli a nutun o Matat,

o Matat a nutun o Liwai,

o Liwai a nutun o Melki,

o Melki a nutun o Janai,

o Janai a nutun o Josep,

²⁵ o Josep a nutun o Matatias,

o Matatias a nutun o Amos,

o Amos a nutun o Naum,

o Naum a nutun o Esli,

o Esli a nutun o Nagai,

²⁶ o Nagai a nutun o Mat,

o Mat a nutun o Matatias,

o Matatias a nutun o Semein,

o Semein a nutun o Josek,

o Josek a nutun o Joda,

²⁷ o Joda a nutun o Joanan,

o Joanan a nutun o Resa,

o Resa a nutun o Serubabel,

o Serubabel a nutun o Salatiel,

o Salatiel a nutun o Neri,

²⁸ o Neri a nutun o Melki,

o Melki a nutun o Adi,

o Adi a nutun o Kosam,

o Kosam a nutun o Elmadam,

o Elmadam a nutun o Er,

²⁹ o Er a nutun o Josua,

o Josua a nutun o Eliaser,

o Eliaser a nutun o Jorim,

o Jorim a nutun o Matat,

o Matat a nutun o Liwai,

³⁰ o Liwai a nutun o Simion,

o Simion a nutun o Juda,

o Juda a nutun o Josep,

o Josep a nutun o Jonam,

o Jonam a nutun o Eliakim,

³¹ o Eliakim a nutun o Melea,

o Melea a nutun o Mena,

o Mena a nutun o Matata,

o Matata a nutun o Natan,

o Natan a nutun o Dewid,

³² o Dewid a nutun o Jesi,

o Jesi a nutun o Obed,

o Obed a nutun o Boas,

o Boas a nutun o Salmon,

o Salmon a nutun o Nason,

³³ o Nason a nutun o Aminadap,

o Aminadap a nutun o Atmin,

o Atmin a nutun o Arni,

o Arni a nutun o Esrom,

o Esrom a nutun o Peres,

o Peres a nutun o Juda,

³⁴ o Juda a nutun o Jekop,

o Jekop a nutun o Aisak,

o Aisak a nutun o Abaram,

o Abaram a nutun o Tera,

o Tera a nutun o Naor,

³⁵ o Naor a nutun o Seruk,

o Seruk a nutun o Reu,

o Reu a nutun o Pelek,

o Pelek a nutun o Eber,

o Eber a nutun o Sela,

³⁶ o Sela a nutun o Kainan,

o Kainan a nutun o Arpaksat,

o Arpaksat a nutun o Sem,

o Sem a nutun o Noa,

o Noa a nutun o Lamek,

³⁷ o Lamek a nutun o Metusela,

o Metusela a nutun o Enok,

o Enok a nutun o Jaret,

o Jaret a nutun o Malelel,

o Malelel a nutun o Kenan,

³⁸ o Kenan a nutun o Enos,

3:16: Ap 13:25 * **3:17:** A ngasino ra di ser lakro ru a pinino wit gusun a wino i lenri: Di woro toto a wit ra a wuwu i wup ru a pinino ra a wino i puku pirso. **3:19:** Mt 14:3-4; Mk 6:17-18 **3:22:** Jn 1:32 **3:23:** Lk 4:22; Jn 6:42 **3:32:** Rut 4:17-22 **3:36:** Stat 11:10-26 **3:38:** Stat 4:25-26

o Enos a nutun o Set,
o Set a nutun o Adam,
o Adam a nutun o God.

4

*O Satan i lar o Iesu
(Mt 4:1-11; Mk 1:12-13)*

¹ O Iesu i bukus nama Tokodos na Nion. Ra i wan tagitong una danim Jordan, a Tokodos na Nion i mugu i utiro una nubual kalako taro uni. ² I kis tiro iai a wat na noino bung ra o Satan i lari. Ke wan tu utna ubalan a kum bung ra. Numur i murak. ³ Ra o Satan i watungi tano lena, "Ra ui a Nutun o God, un inanos a wat ri sur in nanpat a beret." ⁴ O Iesu i balu i lena, "Di sa tumus tari una Buk Tabu lena, 'A taro ka det ser laun nama utna na inangon kut.'" *Lo 8:3*

⁵ O Satan i ben pasi sur ara nubual sapat netes, ra i ese tar a kum tamon rop una rakrakon bual tano una nat na du bunglik kut. ⁶ Ra i watungi tano lena, "An tabor ui nama dekdekin det rop ma a kum minamarin det rop, uni di sa pitar tari tang, ma an pitari torom taio ra a nemi. ⁷ Ra un lotu torom iau, a kum utna ri, anum rop kut." ⁸ O Iesu i balu i lena, "Di sa tumus tari una Buk Tabu lena, 'Un lotu torom a Labino anum a God, ma un papam kut toromi.'" *Lo 6:13*

⁹ Numur o Satan i ben pasi usapat o Jerusalem, ma i utur tari sapat netes sakit una rumu na etabor. Ma i watungi tano lena, "Ra ui a Nutun o God, un sirok pirsu taginin, ¹⁰ uni di sa tumus tari una Buk Tabu lena, 'In inanos anum a kum ensel sur det in tamtamabat wakak ui.'

¹¹ Ma, 'Det in pam pas ui nama kum laman-det, sur gong u tuka a kikim un tu wat.'" *Sng 91:11-12*

¹² O Iesu i balu i lena, "Di sa watung tari una Buk Tabu lena, 'Gong u lar a Labino anum a God.'" *Lo 6:16*

¹³ Ra o Satan i sa lar tari nama kum ululam rop ri, i wan munung gusunu.

*O Iesu i turpas anum a pinapam tong o Galili
(Mt 4:12-17; Mk 1:14-15)*

¹⁴ O Iesu i milet melet utong una papor Galili nama dekdekin a Tokodos na Nion, ma a wasiso uni, i wan sarara una papor rop ra. ¹⁵ O Iesu i ususer a taro una nundet a kum rumu na lotu, ma det rop det watung ulabo pasi.

*Di lu ru o Iesu tagitong o Nasaret
(Mt 13:53-58; Mk 6:1-6)*

¹⁶ O Iesu i wanpat tiro o Nasaret, a tamon ra i labo pat iai, ma i ruk una rumu na lotu una Bung na Sabat, elar nama nun a petutna ut, ma i tur sur in luluk. ¹⁷ Ra di pitar tar a buk anum a poropet Aisaia toromi. I palos pas a buk ra di sa pul tari, ma i tama a dino ra di sa tumus tari lenri,

¹⁸ "A Nion a Labino i kis un iau, uni i sa pilok pas iau sur an warawai nama wakak na wasiso torom a kum sibo na taro.

I tulu ru iau sur an warawai lenri, din palos ru det ra di sa ker ukai tar det, din utamtama melet a kum pulu,

din ulangolango ru det ra det taramo a mamaut ra di sa pam tari un det,

¹⁹ ma an wasiso puaso una kilalo na marmaris anum a Labino, ra uniri i sa wanpat." *Ais 61:1-2*

²⁰ I pul melet tar a buk ra, i pitar tari torom a tene pinapam tagun a rumu na lotu, ma i kis melet. A taro rop una rumu na lotu det tama dekdeki, ²¹ ma i watungi tandet lena, "A wasiso ri mot longoro i, uniri a sa pam sot pasi."

²² Det rop det watung ulabo pasi, ma det kisin una nun a wakak na wasiso. Ra det iting lena, "A musano ri, a nutun o Josep, niko?" ²³ Ra i watungi tandet lena, "Kutiro mot in watung a wasiso elelar ri un iau: 'Dokta, un ulangolango pas ui ut! A kum utna rop ra met longoro i lena u sa pam tari tiro o Kapernaum, i wakak ra un pami utkai nin una num a tamon.'" ²⁴ Ra o Iesu i watungi kai tandet lena, "A inanos mot nama lingmulus, katu poropet di ser gas pasi una nun a tamon ut. ²⁵ A lingmulus ut ra a susut na ula det kis tiro o Israel una kilalo ra o Elaija i kis tong, ra a tulu kilalo ma wonom na kalang ke bato, ma a labino munurak i monong a kum tamon rop. ²⁶ Ikut o God ke tulu o Elaija torom tu ino Israel, torom ara ula kut tagun a tamon Sarepat una papor Saidon. ²⁷ A susut na lepra det kis tong o Israel una kilalo anum a poropet Elisa, ikut o God ke ulangolango taio tagun det, o Neman kut a te Siria."

²⁸ Ra det longoro a kum wasiso ri, a taro rop ra det kis una rumu na lotu, det kankan doko. ²⁹ Det katutur, ra det lu ru o Iesu tagun anundet a tamon. Det dat pasi usapat una tangai ra di pam tar anundet a tamon uni, sur det in woro pirsu i una papor wat. ³⁰ Ikut i wan kut epotor tan a kunur na taro, ra i wan mut gusun det.

O Iesu i lakro ru a laulau na nion gusun ara musano

(Mk 1:21-28)

³¹ Numur o Iesu i wan utong o Kaper-naum, una papor Galili, ma una Bung na Sabat, i ususer a taro. ³² Ra det kisin una nun a kum etowo, uni i ususer det elar nam ara, ra a warkurai kura ut tano. ³³ Una rumu na lotu ara musano, a laulau na nion kura uni, i kakabo dekdek lena, ³⁴ "Ai! Iesu, a te Nasaret, u ling na pam asau un met? U wanpat sur un ban laulau met? A tasman ui, ui a Tasur na Musano anun o God." ³⁵ O Iesu i sabbati lena, "Gong u wasiso! Pirso gusun a musano ra!" Ma a laulau na nion i woro pirso tari epotor tandet rop, i pirso gusuni, ma katu du pinino i laulau.

³⁶ A taro rop det kisin doko, ra det ting etetalai det lena, "A ngas na wasiso sau ri? A warkurai ma a dekdek kura ut tano, ra i ser wasiso tan a kum laulau na nion, ra det ser pirso mut."

³⁷ Ra a wasiso un o Iesu i wan sarara utiro una kum tamon rop una papor ra.

O Iesu i ulangolango pas a susut na misait

(Mt 8:14-17; Mk 1:29-39)

³⁸ O Iesu i pirso gusun a rumu na lotu, ra i wan sur a rumu anun o Saimon. Ara ino a inumun o Saimon kura urumu, a pinino i mararong doko, ra det saring o Iesu sur in waruti. ³⁹ Ra o Iesu i tur taru nisan a bano, ma i wasiso torom a misait, ra a mararong i rop gusuni. Ra i tur mut, ra i tabor det mo nama utna na inangon.

⁴⁰ Ra in matanas i ling na sup, a taro det ben pat det rop ra det misait nama kum wur ngas na misait torom o Iesu. Ma i ubek aru lamano netes un det taktakai, ra i ulangolango det rop. ⁴¹ Ma a kum laulau na nion kai det pirso gusun a susut, ra det kakabo lena, "Ui a Nutun o God." Ra o Iesu i turbat det, sur gong det wasiso, uni det tasmani ut lena i a Karisito.

⁴² Ra i sa waspi, o Iesu i wan gusun a tamon ra, sur a nubual kalako taro uni. A kunur na taro det sisio suri. Ra det sa sio pasi, det ling na turbati sur gong mo i wan gusun det. ⁴³ Ikut i balu det lena, "An warawai nama Wakak na Wasiso una matanitu anun o God una ramano kum tamon gisen kai. Uni i a kibino ra di tulu ru iau urin." ⁴⁴ Ra i warawai nanan una kum rumu na lotu una papor Judia.

5

A kum mugano nat na ususer anun o Iesu

(Mt 4:18-22; Mk 1:16-20)

¹ Ara bung o Iesu i tur nago na usalin una du tasi Genesaret, a taro det tur talilis bat pasi, sur det in longoro a wasiso anun o God. ² Ra i tama pas aru pot tiro iai una usalin, ra a kum tene woro uben det sa wan pas gusun der, kura det gos anundet a kum uben. ³ I kas taru un ara tagun der, a pot anun o Saimon, ra i inanos sur in sugut lilik tar a pot usa utasi. Ra o Iesu i kis taru uni, ma i ususer a kunur na taro.

⁴ Ra i sa wasiso rop, i watungi tan o Saimon lena, "Mot in nan usa una dino ra i lamano, ma mot in woro anumot a kum uben sur lako kiripo." ⁵ O Saimon i balu i lena, "Labino, met sa tol panai taru una kudulano mirum, ma ka met dat pas tin kiripo, ikut an woro melet tar a kum uben, uni ui u itula." ⁶ Ra det sa woro tar a kum uben, det dat pas a susut na kiripo, ra anundet a kum uben milau in tararas. ⁷ Det kalu pas a kum paspasan det tagun ara pot kai sur det in warut det. Ra det wan torom det, ma det ubukus pas aru pot rop, ra der ling na murung mo. ⁸⁻¹⁰ O Saimon ma det ra det wan tomo nami det kisin una kum kiripo ra det dat pasi, lenkutkai ra torom aru paspasano, Jems ma o Jon, aru nutun o Sebedi. Ra o Saimon Pita i tama a utna ri, i puku nama urur tiro na kikin o Iesu ra i watungi tano lena, "Labino, wan gusun iau, iau a tene sakino." O Iesu i balu i lena, "Gong u ngara. Turpasi uniri, un tene ben taro." ¹¹ Ra det sa dat toto tar aru pot, det wan gusun anundet a kum utna rop, ma det mur o Iesu.

O Iesu i ulangolango pas a lepra

(Mt 8:1-4; Mk 1:40-45)

¹² O Iesu i kis un ara tamon, ma ara musano a pinino rop i bukus nama lepra, i wan toromi. Ra i tama pas o Iesu, i kis butkeke ma in masarino unago upiso, ma i saring dekdeki lena, "Labino, ke ngangitin torom ui. Ra u nemi, un ulangolango pas iau, sur an talapor umatan o God." ¹³ O Iesu i kodos a lamano, ma i pam a pinino ra i watungi tano lena, "A nemi ut, un langolango." Uniuira a lepra i rop gusuni. ¹⁴ Ra o Iesu i wasiso dekdek taru toromi lena, "Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a etabor torom o God elar nami ra o Moses i sa watung tari, sur un talapor umatan o God. Ra un pami lenra, a taro det in tasmani lena u sa

langolango.”¹⁵ Ikut a wasiso un o Iesu i wan sarara makai, ra a susut na taro det wan tomo sur det in longoro i, ma sur in ulangolango pas det gusun anundet a kum misait.¹⁶ Ikut a susut na bung o Iesu i ser wan gisen, una nubual kalako taro uni, sur in wararing.

O Iesu i ulangolango pas a musano a pinino i mat

(Mt 9:1-8; Mk 2:1-12)

¹⁷ Ara bung ra o Iesu i ususer a taro, a kum Parisi ma a kum tene ususer tagun a Warkurai, kura det kis tomo nami. Det wanpat tagun a kum tamen rop una papor Galili ma una papor Judia, ma tagisapat o Jerusalem kai. Ma a dekdekin a Labino i kis un o Iesu sur in ulangolango a kum misait.¹⁸ A ramano kum musano det los pat ara musano a pinino i mat, i inep taru kut una lu. Det lari sur det in ruk nami, ma det in inep tari numugu nisan o Iesu.¹⁹ Ikut ka det ruk lar pas nami, uni a taro det bukus doko. Ra det ka nami usapat netes una rumu, det papok saro pas a nubual sapat netes, ra det unoro piroso tari tomo nama lu epotor nisan a kunur na taro sa numugu tan o Iesu.²⁰ O Iesu i tama anundet a nurnur, ra i inanos a musano a pinino i mat lena, “Pasang, di sa unus ru anum a kum sakino petutna.”

²¹ A kum tene ususer tagun a Warkurai ma a kum Parisi, det nuknuk doko lena, “Osi na ngas na musano ri? I watung laulau o God uni i wasiso lar i o God. Osi i elar sur in unus ru a kum sakino petutna? O God sot kut.”²² O Iesu i tasman a nuknukin det, ra i ting det lena, “Sur asau ra mot nuknuk lenra?”²³ Osi na wasiso ra ke ngangitin sur an watungi? Pepetlai, an watungi lena, ‘Di sa unus ru anum a kum sakino petutna,’ o, an lena, ‘Un katutur, ma un nan?’²⁴ A wasiso ra an watungi, an watungi sur mot in tasmani lena, o God i pitar a warkurai torom a Nutun a Musano, sur in unus ru a kum sakino petutna nin upiso.” Ra i watungi torom a musano a pinino i mat lena, “A inanos ui, un katutur, un los anum a lu, ra un nan sur anum a rumu.”²⁵ Uniutra i tur umatandet rop, i los pas anum a lu, ra i wan sur anum a rumu. Ra i wan i rakon lekeleke pas o God.²⁶ Det rop det kisin doko, ra det rakon lekeleke pas o God. Det ngara doko, ra det watungi lena, “Uniri, dat tama a kum se utna i wanpat una nundat a tamtama.”

O Iesu i kabo pas o Liwai
(Mt 9:9-13; Mk 2:13-17)

²⁷ Numur tan a kum utna ri, o Iesu i wan tagitiro, ra i tama pas ara tene los takis, a risano o Liwai, ra i kis una rumu na los takis. O Iesu i watungi tano lena, “Un mur iau.”²⁸ Ra o Liwai i katutur ma i wan gusun anum a kum utna rop, ra i muri.

²⁹ Numur o Liwai i pam a labino inangon un o Iesu una nun a rumu. A susut na tene los takis ma ara taro kai det kis tomo nam o Iesu una inangon ra.³⁰ Ikut a kum Parisi tomo nam anundet a kum tene ususer tagun a Warkurai, det pukus anum a kum nat na ususer ra det watungi lena, “Sur asau ra mot wangon ma mot inum tomo nama kum tene los takis ma a kum tene sakino?”³¹ O Iesu i balu det lena, “A dokta ke wanpat sur det ra det langolango. Awu! I wanpat sur det kut ra det misait.”³² Ka wanpat sur an kabo pas a kum tene tokodos, awu! A wanpat sur an kabo pas a kum tene sakino sur det in nukpukus.”

A iting una winewel

(Mt 9:14-17; Mk 2:18-22)

³³ Ara taro det watungi tan o Iesu lena, “A kum nat na ususer anum o Jon det ser wewel ma det ser wararing, ma lenkutkai lar a kum nat na ususer anum a kum Parisi. Ikut anum a kum nat na ususer det wangon ma det inum kut.”³⁴ O Iesu i balu det lena, “A kum paspasan a musano ra i nolin matok, det in wewel pepetlai, ra kura utmakai i tomo nam det?”³⁵ Ikut tu bung in nanpat, ra din ben ru i gusun det. Una kum bung ra, det in wewel maragom.”

³⁶ O Iesu i watungi kai ara wasiso elelar tandet lenri, “Katutao in raros pas tu du malu tagun in matok na malu, sur in mabon tomo tari namin turai na malu. Ra in pami lenra, in raros laulau ru in matok na malu, ma a du matokino ka der in tamtama elar nama du turaino.”³⁷ Ma kataio in titior a matok na wain utiro unin turai na koto, ra di pami namin pino meme, sako a matok na wain in busu ma in mubus ma in purus in nokoto na wain, ra a wain in tilingis, ma in nokoto na wain kai in laulau.³⁸ Din titior a matok na wain utiro unin matok na koto na wain.³⁹ Kataio ra in inum pas a turai na wain, in nem melet a matok na wain, in watungi kut lena, ‘A turaino ut i wakak.’”

6

O Iesu i a Labino tagun a Bung na Sabat
(Mt 12:1-8; Mk 2:23-28)

¹ Un ara Bung na Sabat, o Iesu i wan nanan epotor una kum kinobot na wit. Anun a kum nat na ususer det kumut pas a ramano kum turunu wit, det gisgis pasi

ma det wani. ² A ramano kum Parisi det iting lena, "Ilai sur mot pam a utna ri, ra ke tokodos elar nama warkurai tagun a Bung na Sabat?" ³ O Iesu i balu det lena, "Pepetlai, ka mot luki utmakai asau ra o Dewid i pami? Det nama taro ra det wan tomo det murak, ⁴ ra i ruk una rumu anun o God, i los pas a beret ra di sa pitar tari torom o God, i wani, ra i tabor det kai ra det wan tomo nami. A beret ra, a warkurai taguni, i lenri, a kum tene etabor kut torom o God det in nangon taguni, ma a taro oros awu." ⁵ Ma o Iesu i watungi tandet lena, "A Nutun a Musano i a Labino tagun a Bung na Sabat."

O Iesu i ulangolango pas a musano ra a lamano i kong

(Mt 12:9-14; Mk 3:1-6)

⁶ Un ara Bung na Sabat bulung, o Iesu i ruk una rumu na lotu, ma i ususer a taro. Ara musano kura iai, a sot na lamano i kong. ⁷ A kum Parisi ma a kum tene ususer tagun a Warkurai det sisio sur tu utna det in takun o Iesu nami. Det tamtama wakak taru ut uni, ra in ulangolango pas a musano ra una Bung na Sabat, o awu. ⁸ Ma o Iesu i tasman a nuknukin det ra i watungi tan a musano ra a lamano i kong lena, "Un tur! Ra un nan usa numugu tan a taro rop." I katutur, ra i tur taru sa numugu tandet. ⁹ Ra o Iesu i watungi tandet lena, "An ting mot: Asau i tokodos sur din pami una Bung na Sabat? Din pam a wakakino o a laulau ino? Din ulaun taio, o din ban laulau taio?" ¹⁰ Ma i nas pukpukus det rop, ra i inanos a musano lena, "Kodos a lamam." I kodosi, ra a lamano i tokodos melet. ¹¹ Ikut in balandet i sungun, ma det wasiso tomo sur tu ngas na utna det in pami un o Iesu.

O Iesu i pilok pas a noino ma aru aposel

(Mt 10:1-4; Mk 3:13-19)

¹² Ara bung, o Iesu i wan usapat una tangai sur in wararing. A bung na mirum rop ra, i wararing torom o God. ¹³ Ra i sa waspi, i kabo pas anun a taro na ususer toromi, ma i pilok pasi kut a noino ma aru tagun det, ra i urising det a kum aposel. ¹⁴ Iri a kum risandet: O Saimon, i ra o Iesu i urising nam o Pita, dersino nam o Endru, o Jems, o Jon, o Pilip, o Batolomiu, ¹⁵ o Matiu, o Tomas, o Jems a nutun o Alpius, o Saimon ara tagun a kum Silot, ¹⁶ o Judas a nutun o Jems, ma o Judas Iskariot i ra i usobor tar o Iesu.

O Iesu i ususer a taro ma i ulangolango det

(Mt 4:23-25)

¹⁷ Ra o Iesu tomo nama nun a taro na ususer det wan pirso tagisapat una tangai, i tur una elaro na nubual, tomo nam anun a kunur na taro na ususer. Ma a labino kunur na taro tagitong una papor Judia ma tagisapat o Jerusalem ma tagun a kum tamon nago korot utasi milau o Tair ma o Saidon kai, ¹⁸ det wanpat sur det in longoro i, ma sur in ulangolango pas det gusun anundet a kum misait. Ma i lakro ru a kum laulau na nion gusun det rop ra a kum laulau na nion det ban laulau det. ¹⁹ Ra a taro rop, det nemi sur det in pam a pinin o Iesu, uni a dekdek i pirso gusuni, ma i ulangolango pas det rop.

A gasgas ma a tupunuk

(Mt 5:1-12)

²⁰ O Iesu i tama anun a taro na ususer ra i watungi lena,

"Mot ra mot sibo, mot dan, uni a matanitu anun o God, anumot!

²¹ Mot ra uniri mot murak, mot dan, uni numur mot in masur.

Mot ra uniri mot tangis, mot dan, uni numur mot in nongon.

²² Mot dan ra a taro det nget mot, o det pilok ru mot

ma det watung laulau mot, ma det ban laulau a risamot,

uni mot tagun a Nutun a Musano.

²³ "Una bung ra din pam a kum utna ri torom mot, mot in gas, mot in sirsirok nama gasgas, uni i labo sakit anumot a ikul sapat una langit. Uni a kum utna ri, a kum tumtubun det tagun numugu det sa pam tari torom a kum poropet.

²⁴ "Ikut in laulau torom mot a kum tene gongon,

uni mot sa rakon pas anumot a wakakino.

²⁵ In laulau torom mot ra uniri mot masur, uni numur mot in murak.

In laulau torom mot ra uniri mot nongon, uni numur mot in tupunuk ma mot in tangis.

²⁶ In laulau torom mot ra a taro rop det watung ulabo pas mot,

uni a kum tumtubun det tagun numugu, det pami lenri torom a kum torotoro na poropet.

A petutna na marmaris torom a kum ebar

(Mt 5:38-48)

²⁷ "An watungi tamot ra mot longoro iau, mot in nem anumot a kum ebar, ma mot in pam a wakakino torom det ra det nget mot. ²⁸ Mot in watung udan det ra det saring o God sur in ban laulau mot, ma

mot in wararing un det ra det ban laulau mot. ²⁹ Ra taio in pasor tar a papor wam, un pukus ara papor bulung toromi. Ra taio in ras pas anum a saket, un madek tari kai anum a siot tano. ³⁰ Un tabor det rop ra det saring ui. Ra taio in los pas tu utna anum, gong u saring meleti suri. ³¹ Asau ra mot nemi sur a taro det in pami torom mot, mot kai, mot in ser pami torom det.

³² “Ra mot nem det kut ra det nem mot, din watung ulabo pas mot pepetlai? Uni a kum tene sakino kai det nem etetalai det ut. ³³ Ra mot in pam a wakakino torom det ra det pam a wakakino torom mot, din watung ulabo pas mot pepetlai? Uni a kum tene sakino kai det ser pami lenra. ³⁴ Ra a taro det saring mot sur tu utna, ma mot pitari kut torom det, ra mot tasmani lena, det in balu i ut torom mot, din watung ulabo pas mot pepetlai? Uni a kum tene sakino kai det pitar tar a utna tan a kum tene sakino, ma det nuki lena det in balu i. ³⁵ Ikut mot in nem anumot a kum ebar, ra mot in pam a wakakino torom det. Ra a taro det nemi sur det in los pas tu utna munung gusun mot, mot in pitari kut, ma gong mot nemi sur det in balu i. Ra mot in pami lenra, anumot a ikul in labo sakit, ma mot a kum nutnutun o God a Labino Sakit, ra i ser maris det ra ka det ser watung wakak toromi, ma a kum tene sakino kai. ³⁶ Mot in lason una marmaris, elar nama Tamamot a tene marmaris.

Gong mot kuro tar taio
(Mt 7:1-5)

³⁷ “Gong mot takun tar taio, sako o God in takun mot. Gong mot kuro tar taio sur in los a warkurai na minabalu, sako o God in kuro mot ra mot in los a warkurai na minabalu. Mot in dumano ru a kum sakino petutna ra a taro det pami un mot, ma o God in unus ru anumot a kum sakino petutna. ³⁸ Mot in etabor, ma o God in tabor mot. Ikut a etabor anum o God torom mot in labo doko, ma din sogori, ma in bukus melet, ma in tilingis. Uni asi na ngas na etabor ra mot pitari, i labo o i natino, i kut kai ra o God in pitar meleti torom mot.”

³⁹ O Iesu i watungi kai a wasiso elelar torom det lenri, “Tu pulu in ben lan taio kai ra i pulu? Pepetlai, der rop ka der in puku dorong un tin nutung? ⁴⁰ A nat na ususer ke labo taun anum a tene ususer. Ikut o naro ra i sa urop pas anum a etowo, in elar kut nam anum a tene ususer.

⁴¹ “Ilai ra u tama pasi kut a burbururup kura unin matan o tisim, ikut ko nuk pas a nuduwai pi kura ut unin matam? ⁴² Ra ko tama pas a nuduwai pi kura kut unin

matam, un watung petlani torom o tisim lena, “Tising, an rakon ru a burbururup gusun in matam? Ui a tene torotoro, un los mugu ru a nuduwai pi gusun in matam, ra un tamtama wakak, sur un rakon ru a burbururup gusun in matan o tisim.

A wasiso elelar una arin ngas na wino duwai

(Mt 7:16-20; 12:33-35)

⁴³ “In wakak na duwai ken wu lako laulau na wino, ma in laulau na duwai kai ken wu lako wakak na wino. ⁴⁴ Din tama lele a kum duwai tagun a windet. Ka din git pas tin niwino fig tagun in kadas, ma in niwino wain tagun in sukses. ⁴⁵ A wakak na musano i pam pat anum a wakak na petutna tagun a wakakino ra i kis una nun a nilaun, ma a laulau na musano kai, i pam pat anum a sakino petutna tagun a sakino ra i kis una nun a nilaun. Uni a wan a taro i watung puaso a petutna ra i bukus una nundet a nilaun.

A wasiso elelar una aru ngas na tene pam rumu

(Mt 7:24-27)

⁴⁶ “Ilai ra mot watung iau ‘Labino, Labino,’ ma ka mot pam asau ra a watungi tamot? ⁴⁷ Osi ra i wan torom iau ma i longoro anung a kum wasiso, ma i muri, i elar nama musano ra an inanos mot nami. ⁴⁸ I elar nama musano ra i pam tar a rumu. I kil dordorong a kum tung, ma i utur tar a kum pos ina rumu netes una wat. A lomom i wanpat, ma i sal tiro na rumu, ikut ke gunu lar pasi, uni di sa pam wakak tari. ⁴⁹ Ikut osi ra in longoro anung a kum wasiso ma ke muri, i elar nama musano ra i utur tar anum a rumu netes kut una piso, ma ke pam mugu tar a kibin a rumu. A lomom i sal taru uni, i toropo, ma i terege mut!”

7

A nurnur anum ara mugumugu anum a kum tene inaim tagitong o Rom

(Mt 8:5-13)

¹ Ra o Iesu i sa watung rop tar a kum wasiso ri torom a taro, i wanpat tong o Kapernaum. ² Ara mugumugu anum a kum tene inaim tagitong o Rom i kis tiro iai. Ara tagun anum a kum tultul i misait, milau mo sur in mat. A tultul ri, i labo umatan anum a mugumugu. ³ A mugumugu anum a kum tene inaim i longoro a wasiso un o Iesu, ra i tulu ru a ramano kum mugumugu anum a taro Juda sur det in saringi, sur in nan toromi, ma in ulangolango pas anum a tultul. ⁴ Ra det wanpat torom o Iesu, det saring dekdeki lena, “A musano ra, a wakak

na musano, i wakak ra un longoro i, ⁵ uni i maris dat a taro Juda, ma i kul tar anundat a rumu na lotu.” ⁶ Ra o Iesu i wan tomo nam det.

Det sa milau a rumu, ra a mugumugu anun a kum tene inaim i tulu ru a ramanu kum paspasano torom o Iesu nama wasiso lena, “Labino, gong a utikidis ui, uni ka tokodos sur un ruk una nung a rumu. ⁷ Ka nuki kai lena a tokodos sur an nan torom ui. Ikut, un watung tu wasiso kut, ra anung a tultul in langolango. ⁸ Uni iau a musano ra a ser mur a warkurai anundet ra det labo tang, ma di pitar tar a warkurai kai tang sur an warkurai sur a taro na inaim. Ra an watungi tan taio lena, ‘Un nan,’ in nan kut. Ma torom taio kai lenri, ‘Un nan urin,’ in nan kut urin. Ma torom anung a tultul lena, ‘Un pam a utna ri,’ in pami kut.”

⁹ O Iesu i longoro anun a wasiso, ra i kisin doko uni, ma i tupukus torom a taro ra det muri, ra i watungi lena, “A watungi tamot lena, ka tama tar tu te Israel ra anun a nurnur i labo elar nama musano ri.” ¹⁰ Ma det ra di tulu tar det, det millet melet sur a rumu, ra det tama i lena a tultul ra, i sa langolango melet.

O Iesu i ulau pas a nutun a ula

¹¹ Ke suano i kut, ra o Iesu i wan utong una tamon di watungi nam o Nain, ma anun a kum nat na ususer ma a labino kunur na taro kai det wan tomo nami. ¹² Ra i wanpat milau una matansako ina tamon, a taro Nain det los pirso ara minat, a barman, i ara sot kut a nutun ara ula. A susut na taro tagitong una tamon ra det wan tomo nama ula. ¹³ Ra a Labino i tama a ino ra, i marisi ma i watungi lena, “Gong mo u tangis.” ¹⁴ I wan milau, ma i pam a lu ra di los a minat nami, ma a taro ra det los a minat det tur sikot. I watungi lena, “Barman, a watungi tam, un katutur.” ¹⁵ Ra a minat i katutur ma i wasiso. Numur o Iesu i pitar melet tari torom o nano.

¹⁶ A taro rop det kisin ma det ngara, ma det watung ulabo pas o God, ma det watungi lena, “A labino poropet i sa wanpat epotor tandat. O God i sa wanpat sur in warut dat, anun a taro.” ¹⁷ Ra a wasiso ri un o Iesu i wan sarara tong una papor Judia rop, ma a kum tamon milau kai.

*O Iesu ma o Jon a Tene Baptaiso
(Mt 11:2-19)*

¹⁸ A kum nat na ususer anun o Jon a Tene Baptaiso det inanos i una kum utna rop ri o Iesu i pami. O Jon i kabo pas aru tagun det, ¹⁹ ra i tulu ru der torom a Labino sur der in tingi lena, “Ui mo ra di wasiso mugu taru

un ui lena, un nanpat, o met in kis langlang utmakai sur taio?”

²⁰ Ra der wanpat torom o Iesu, der watungi lena, “O Jon, a Tene Baptaiso i tulu ru mir torom ui, sur mir in ting ui lena, ‘Ui mo ra di wasiso mugu taru un ui lena, un nanpat, o met in kis langlang utmakai sur taio?’”

²¹ Una du bung ut ra, o Iesu i ulangolango pas a susut gusun anundet a kum ngunungut ma a kum misait, ma i lakro ru a kum laulau na nion gusun det, ma i utamtama pas a susut na pulu. ²² Ma i balu der lena, “Mur in millet melet, ma mur in inanos o Jon una sau ri mur sa tama tari, ma mur sa longoro tari: A kum pulu det sa tamtama, det ra a kikindet i mat det sa wan tokodos, a kum lepra det sa langolango, a kum kutkut det sa longoro, a kum minat det sa laun, ma di warawai nama Wakak na Wasiso torom a kum sibo na taro. ²³ Osi ra i tama a kum utna ri a pami ma anun a nurnur ke puku, i sa dan.”

²⁴ Ra aru nat na ususer anun o Jon der wan, o Iesu i inanos a kunur na taro un o Jon lena, “Una bung ra mot wan una nubual kalako taro uni torom o Jon, asau ra mot tamtama suri? Kutiro in nere ra i erere una wuwu? Awu. ²⁵ Asau ra mot wan sur mot in tama i? A musano ra i emar nama kum wakak na malu? Awu. Tama i, det ra det ser emar nama kum wakak na malu, ma det dan nama kum wakak na utna, det ser kis una kum rumu na king. ²⁶ Asau ra mot wan sur mot in tama i? A poropet? Ma! A watungi tamot, o Jon i labo sakit taun a kum poropet. ²⁷ Di sa tumtumus taru uni, una Buk Tabu lena,

“Tama i, iau an tulu ru anung a tene los wasiso sur in mugu tam, i ra in waninar anum a kisapi numugu tam.” *Mal 3:1*

²⁸ A watungi tamot, o Jon i labo sakit taun a taro rop taginin upiso. Ikut osi ra i natino sakit una matanitu anun o God, i labo taun o Jon.”

²⁹ Ra a taro rop det longoro i, ma a kum tene los takis kai, det mulaot una tokodos na kisapi anun o God, uni det sa los pas a baptais anun o Jon. ³⁰ Ikut a kum Parisi ma a kum tene ususer tagun a Warkurai det rosumur gusun a kisapi ra o God i pitari torom det, uni ka det los a baptais anun o Jon.

³¹ Ma o Iesu i watungi lena, “An elaro a taro tagun uniri nama sau? Det elar nama sau? ³² Det elar nama kum nat liklik ra det kis una balano tamon ma det kakabo torom det etetalai lena,

‘Met wup tual,

ikut ka mot lagori,
ma met kele a kelekele na tupunuk,
ikut ka mot tangis.’

³³ O Jon a Tene Baptaisio i wanpat, ke wan tu wakak na utna ma ke inum a wain, ra mot watungi uni lena, ‘A laulau na nion kura uni.’ ³⁴ A Nutun a Musano i wanpat, i wangon ma i inum, ra mot watungi uni lena, ‘Tama i, a musano ri a tene inangon ma a tene ininum, a pasan a kum tene los takis, ma a kum tene sakino.’ ³⁵ Ikut a taro rop ra det mur a mananos anun o God, det upuso i lena, anun a mananos i a mananos mulus.”

Ara ino i lingis in nopolo sangsangnain una ru kikin o Iesu

³⁶ Ara Parisi i ben pas o Iesu sur det in nangon tomo. O Iesu i ruk una rumu anun a Parisi, ma i kis sur der in nangon. ³⁷ Ma ara ino tagitiro una tamon ra, a tene sakino. Ra i sa tasmani lena, o Iesu kura i wangon una rumu anun a Parisi, i ruk namin nopolo sangsangnain ra kura unin nokoto ra di pami nama wat. ³⁸ Ma i tur taru numur tan o Iesu, nisan aru kikin. I tangis, ra a lurlur na matano i puku una ru kikin o Iesu, ma i wus der nama iwu na lorino, i gom der, ma i lingis in nopolo sangsangnain un der.

³⁹ A Parisi ra i ben pas o Iesu i tama a utna ri, i nuki lena, “Ra a musano ri a poropet mulus, in tasman a ino ri ra i pam aru kikin, ma in tasmani kai a magirano, lena i a sakino ino.” ⁴⁰ O Iesu i watungi tano lena, “Saimon, a nem na watung ara utna tam.” Ma i balu i lena, “Tene Ususer, un watungi kut.”

⁴¹ O Iesu i watungi tano lena, “Aru musano der dinau pas a mani tan ara musano, ara pasander i dinau pas a limo na mar ma ara kai a limo na noino. ⁴² Ka der balu lar pas a dinau, uni katu mani tander. Ra a musano ra, i watungi tander lena, ‘Gong mukut mur balu anumur a dinau.’ Osi na pasander anun a marmaris in labo sakit torom o naro ra i pitar tar a mani tander?” ⁴³ O Saimon i balu i lena, “Kutiro i ra i dinau pas a labino mani sakit gusuni.” O Iesu i watungi tan o Saimon lena, “I tokodos anum a minabalu.”

⁴⁴ O Iesu i ger unago numur torom a ino, ma i watungi tan o Saimon lena, “Tama a ino ri. Ra a ruk una num a rumu ko pitar tar a danim sur din gos aru kiking nami. Ikut, a ino ri, i gos aru kiking nama lurlur na matano, ma i wus sengesenge der nama iwu na lorino. ⁴⁵ Ko ukinalong anum a gaggas nama egom torom iau, ikut a ino

ri ke mana u gom aru kiking turpasi ut ra a wanpat nin. ⁴⁶ Ko talus in loring nam lako wel, ikut a ino ri i lingis tar in nopolo sangsangnain una ru kiking. ⁴⁷ I mo ra a watungi tam lena, anun a labino marmaris torom iau i ese i lena, o God i sa unus ru anun a susut na sakino petutna. Ikut osi ra o God i unus ru i kut anun a nat na sakino petutna, anun a marmaris kai in natino.”

⁴⁸ Ra o Iesu i watungi tan a ino ra lena, “Di sa unus ru anum a kum sakino petutna.” ⁴⁹ A taro ra det kis tomo una inangon, det wasiso torom det etetalai lena, “Osi na ngas na musano ri, i pet lar pasi sur in unus ru a kum sakino petutna?” ⁵⁰ O Iesu i watungi tan a ino ra lena, “Una num a nurnur ut, di sa ulaun pas ui. Un nan nama malmal.”

8

A wardain ra det wan tomo nam o Iesu

¹ Numur o Iesu i wan nanan una kum lamlabino tamon ma a kum natnat na tamon rop, ma i warawai nama Wakak na Wasiso una matanitu anun o God. I wan tomo nama nun a noino ma aru nat na ususer, ² ma a kum wardain kai, ra i sa lakro ru tar a kum laulau na nion gusun det, ma i sa ulangolango pas det gusun a kum misait. Iri a kum risandet: O Maria, ara risano kai o Magdalen, i ra a wonom mawit na laulau na nion det pirso pas gusuni, ³ ma o Joana a ino anun o Kusa, i a mugumugu anun a kum tultul anun o Erod, ma o Susana, ma a susut kai. A wardain ri det warut o Iesu ma anun a kum nat na ususer, nam anundet a kum ululeng ut.

A wasiso elelar una tene minarut (Mt 13:1-17; Mk 4:1-12)

⁴ Ra a labino kunur na taro tagun a kum tamon det wanpat tomo torom o Iesu, i watung ara wasiso elelar torom det lena, ⁵ “A tene minarut i wan sur in sapro a kum pitino wit. Ra i sapro nanan a kum pitino wit, a ramano det puku una kisapi, ra a taro det papas netes uni, ma a kum piko kai det wan ru i. ⁶ A ramano kai det puku una nubual na watat. Det lubang pat, ra det main melet kut, uni a piso i sengesenge doko. ⁷ A ramano kum pitino wit det puku epotor una kum kuikui, ra a kum kuikui det lubang tomo nam det, ma det rau bat pas det. ⁸ A ramano kum pitino kai det puku una wakak na piso. Det lubang pat ra det wu. Tekteneke i wu ara mar na wino.”

Ra i sa watung tar a kum wasiso ri tandet, i watungi lena, “Osi ra arin talngano kura, i wakak sur in longoro nami.”

⁹ Anun a kum nat na ususer det tingi sur a kukurai ina wasiso elelar ri. ¹⁰ Ma i watungi tandet lena, “O God i sa pitar tar a mananos tamot, sur mot in talapor una kum wasiso na pidik una nun a matanitu. Ikut torom a taro gisen a ususer det nama kum wasiso elelar, sur ‘det in tamtama ma det in tamtama, ikut ka det in tama lele i, det in longoro ma det in longoro, ikut ka det in tasmani.’ Ais 6:9

O Iesu i palos a kukurai ina wasiso elelar una tene minarut

(Mt 13:18-23; Mk 4:13-20)

¹¹ “A kukurai ina wasiso elelar ri i lenri, a pitino wit i elar nama wasiso anun o God. ¹² A kum pitino wit ra det puku una kisapi, det elar nama taro ra det longoro a wasiso, ra o Satan i wanpat, ma i rakon ru a wasiso gusun in balandet, sur gong det nurnur, ma gong di ulaun det. ¹³ Ra a kum pitino ra det puku una nubual na watat, det elar nama taro ra det longoro a wasiso, ra det pam ukai i nama gasgas. Ikut kalako wakakorin det, anundet a nurnur ke tur suano i. Ra a kum larlar i wanpat torom det, det puku. ¹⁴ A kum pitino ra det puku epotor una kum kuikui, det elar nama taro ra det longoro a wasiso, ikut a labino nuknuk una kinkinis anundet, a kum ululeng, ma a gasgas tagun a nilaun nin upiso, det rau bat a wasiso anun o God, ra ka det wu lako windet. ¹⁵ Ikut a kum pitino ra det puku una wakak na piso, det elar nam ara taro ra det longoro a wasiso, ma a balandet i wakak ma i tokodos, ra det pam ukai dekdek a wasiso ra det muri tuk det wu a windet.

A wasiso elelar una lam
(Mk 4:21-25)

¹⁶ “Katutaio in ungangan tar tu lam ma in wop bat tari nama paket, o in ubek tari kai nago utuntudu ina kabulu. Awu! In ubek tari ut netes una nun a turtur, sur det ra det ruk det in tama a talapor. ¹⁷ Uni a kum utna rop ra i kis eno, numur in nanpat puaso. Ma a kum utna rop ra kura i parau, numur din tasmani ma in kis talapor. ¹⁸ I mo ra mot in nuknuk wakak una wasiso ra mot longoro i. Osi ra i pam ukai a mananos una wasiso anun o God, din tabor meleti nama labino. Ma osi ra ke pam ukai tu mananos una wasiso anun o God, din rakon ru i utkai asau lik ra i nuki lena i pam ukai i.”

O nan o Iesu ma a kum tistisino
(Mt 12:46-50; Mk 3:31-35)

¹⁹ O nan o Iesu ma a kum tistisino det wanpat sur det in tama i, ikut ka det pet lar pasi, uni a kunur na taro det tur talilis bat

pasi. ²⁰ Ra di inanos o Iesu lena, “O nam ma a kum tistisim kunago det tur nago upiso. Det nem na tama ui.” ²¹ Ra i balu det lena, “Det ra det longoro a wasiso anun o God ma det muri, det ra o nang ma a kum tistising.”

O Iesu i turbat a wuwu ma a top
(Mt 8:23-27; Mk 4:35-41)

²² Ara bung o Iesu tomo nama nun a kum nat na ususer, det kas una pot, ra i watungi tandet lena, “Dat nan utong una ara papor tasi.” Ra det wan. ²³ Ra det kalabor nanan nama sel, o Iesu i inep dumun. A dekdek na wuwu i ragoti una du tasi, ra a top i walwalkas, ma milau det in iru. ²⁴ A kum nat na ususer det wan toromi, det wangun pasi, ma det inanos lena, “Tene Ususer, Tene Ususer, dat na iru!” I katutur, i turbat a wuwu ma a dekdek na top, ma der mana, ra i mililo rop. ²⁵ Ma i watungi torom a kum nat na ususer lena, “Awai kuti anumot a nurnur?” Det ngara, ma det kisin, det ting etetalai det lena, “Osi na ngas na musano mulus ri? I wasiso torom a wuwu ma a top, ra der mur anun a wasiso!”

O Iesu i lakro ru a kum laulau na nion gusun ara musano

(Mt 8:28-34; Mk 5:1-20)

²⁶ O Iesu ma a kum nat na ususer det wan tagitong una papor Galili, ra det sot una papor anun a taro Gerasa, tiro un ara papor du tasi Galili. ²⁷ Ra o Iesu i sirok gusun a pot, ara musano tagun a tamon ra i wan barato i. A kum laulau na nion kura uni. I sa suano i, ma ke ser pipis, ma ke kis kai un tu rumu, i ser kis kut una kum kulam na minat. ²⁸ Ra i tama pas o Iesu, i kukukuk, ma i puku pirso taru nisan aru kikino, ma i kukukuk namin labino walngano lena, “Iesu, a Nutun o God a Labino Sakit, asau ra u nem na pami un iau? A saring ui, gong u ukadik iau.” ²⁹ I wasiso lenri, uni o Iesu i sa wasiso dekdek taru torom a laulau na nion sur in pirso gusun a musano ri. A susut na dino a laulau na nion i solsolongi. A taro ra det ser tamtamabati, det ser ker ukai aru lamano ma aru kikino nama sen, ikut i ser rubut det kut, ma a laulau na nion i ser unngong pasi usapat una kum nubual kalako taro uni.

³⁰ O Iesu i tingi lena, “A risam osi?” Ma i balu i lena, “A risang A Kabo Liur,” uni a susut na laulau na nion det sa ruk taru uni. ³¹ Ma det saring o Iesu sur gong i tulu ruk tar det unin labino tung ra katu tuktukino.

³² A kabo liur na boro kura det wangon tiro una tangai. Ra a kum laulau na nion det saring o Iesu sur det in ruk taru una kum boro. Ra i mulaot ru det. ³³ Ma a kum laulau na nion det pirso gusun a musano

ra, ma det ruk taru una kum boro. A kum boro det kalabor pirso una palis sur a du tasi, ra det kongo rop.

³⁴ A taro ra det ser tabor a kabo liur na boro, det tama a utna ri, det kalabor ma det inanos tiro utamon ma tiro utkai una kum natnat na tamon. ³⁵ Ra a taro det wan sur det in tama asau ra i wanpat. Det wanpat torom o Iesu, det tama a musano ra a kabo liur na laulau na nion det pirso pas gusuni. Kura mukut i kis taru nisan aru kikin o Iesu, i sa pipis pas ma a nuknukino i sa talapor melet. Ma a taro ra det ngara doko. ³⁶ Det ra det sa tama tari, det inanos a taro lena, o Iesu i sa lakro ru a kum laulau na nion gusun a musano ra. ³⁷ Ma a taro rop tagitiro una papor anun a kum Gerasa det saring o Iesu sur in nan gisen gusun det, uni det ngara doko. Ra o Iesu i kas melet una pot ma i wan.

³⁸ A musano ra a kum laulau na nion det sa pirso taru gusuni, i saring o Iesu sur in nan tomo nami. Ikut o Iesu i tulu ru i kut lena, ³⁹ "Un milet melet sur anum a tamon, ma un wasiso una labino utna ra o God i sa pam tari un ui." Ra i milet melet, i wasiso una tamon ra, una labino utna ra o Iesu i sa pam tari uni.

O Iesu i ulaun pas a nutun o Jairus ma i ulangolango pas ara ino

(Mt 9:18-26; Mk 5:21-43)

⁴⁰ O Iesu i milet melet, a kunur na taro det gas pasi, uni det rop det kis langlang ut suri. ⁴¹ Ara musano, a risano o Jairus, a mugumugu tagun a rumu na lotu, i wanpat ra i kis butkeke sa numugu tan o Iesu. I saring dekdeki sur in nan usa una nun a rumu, ⁴² uni ara nutunulik kut, a ino, anun a kilalo a noino ma aru, i sa ling na mat.

Ra o Iesu i wan, a labino kunur na taro det talilis bat pasi. ⁴³ Ara ino kura i misait nama gap elar nama noino ma aru kilalo,* ikut kataio i ulangolango lar pasi. ⁴⁴ I wan numur tan o Iesu, ma i tulana tar a sinisir ina saket anunu, ma uniuutra a gap i tuk. ⁴⁵ Ma o Iesu i iting lena, "Osi ra i tulana iau?" Ra det rop det ipul, o Pita i watungi lena, "Labino, ko tama a labino kunur na taro ri det talilis bat pas ui?" ⁴⁶ Ikut o Iesu i watungi lena, "Ara pasandet i sa tulana tar iau, uni a tasmani lena, a dekdek i sa wan gusun iau." ⁴⁷ A ino i tasmani lena di sa sio pasi, ra i neneder pat, i wan ma i puku sa numugu tan o Iesu. Umatan a kunur na taro rop, i inanos o Iesu una kibino ra i tulana tari, ma i inanos kai lena

uniutra i langolango. ⁴⁸ Ma o Iesu i watungi tano lena, "Nutunglik, anum a nurnur i sa ulangolango pas ui. Un nan nama malmal."

⁴⁹ Ra o Iesu i wasiso utmakai, ara i wan tagitiro una rumu anun o Jairus, a mugumugu tagun a rumu na lotu, ra i watungi tan o Jairus lena, "O nutumlik i sa mat. Gong mo u ubalon a tene ususer." ⁵⁰ Ra o Iesu i longoro a wasiso ra, i watungi tan o Jairus lena, "Gong u ngara. Un nurnur kut, ra din ulaun melet pasi."

⁵¹ Ra i wanpat una rumu, ke madek taio sur in ruk tomo nami. I ben pasi kut o Pita, o Jon ma o Jems, ma a taman a inolik ma o nano kai. ⁵² A taro rop det kukukuk ma det domos, ra o Iesu i watungi tandet lena, "Gong mot domos. A inolik ri awu sur i mat, i inep dumun kut." ⁵³ Ikut det urongon kut un o Iesu, uni det tasmani lena, i sa mat. ⁵⁴ Ra o Iesu i pam a laman a inolik, ra i inanos lena, "Nutunglik, un katuttur." ⁵⁵ Ra a niono i milet melet toromi, uniuutra i katuttur. Ra o Iesu i inanos det sur det in tabor a inolik nam lako utna na inangon. ⁵⁶ O tamano ma o nano der kisin doko, ikut o Iesu i turbat der sur gong der inanos tar taio un asau ra i wanpat.

9

O Iesu i tulu ru a noino ma aru nat na ususer

(Mt 10:5-15; Mk 6:7-13)

¹ O Iesu i kabo tomo pas a noino ma aru nat na ususer, ra i pitar a dekdek ma a warkurai tandet sur det in lakro ru a kum laulau na nion rop, ma sur det in ulangolango pas a taro gusun a kum misait. ² Ma i tulu ru det sur det in warawai una matanitu anun o God, ma det in ulangolango pas a kum misait. ³ Ma i watungi tandet lena, "Gong mot los tu utna una numot a inawan, gong tin nubuku, gong tu rat, gong lako utna na inangon, gong lako mani ma gong kai tin namalu na kelkeles. ⁴ Ra mot in nanpat tiro un tu rumu, mot in kis ut tiro iai tuk una bung ra mot in nan gusun a tamon ra. ⁵ Ra lako taro ka det in gas pas mot, ra mot in nan gusun anundet a tamon, mot in tang ru a kubus gusun a kikimot, sur a ukinalong na utumarong torom det.*"

⁶ A kum nat na ususer det wan tupupukus una kum tamon, det warawai nama Wakak na Wasiso, ma det ulangolango pas a taro una kum tamon rop.

* **8:43:** Una ramano kum du buk una wasiso Grik, a ramano kum wasiso kai i kis una vers ri. I lenri: *ma i sa urop tar anun a mani una kum dokta.* **8:48:** Lk 7:50 **9:3:** Lk 10:4-11 * **9:5:** A ukinalong ra, a kum Parisi det ser muri, ra det wan gusun a nubual anun a taro ra awu sur a taro Juda. Iri a utumarong torom det ra det rosumur gusun a wasiso anun o God. **9:7:** Mt 16:14; Mk 8:28; Lk 9:19

*A nuknukin o Erod i talara un o Iesu
(Mt 14:1-2; Mk 6:14-16)*

⁷ O Erod a mugumugu tagun a gapman i longoro a kum utna ri i wanpat, ra i talara a nuknukino uni, uni ara taro det watungi lena o Jon i sa laun melet gusun a minat. ⁸ Ma ara taro kai det watungi lena o Elaija i sa wanpat. Ara taro kai det watungi lena ara tagun a kum poropet tagun numugu i sa laun melet. ⁹ Ikut o Erod i watungi lena, “A sa tau kutus ru tar in kabaran o Jon, ma iri, osi na musano melet ri, a longoro a kum utna ri uni?” Ra i nem doko i sur in tama o Iesu.

*O Iesu i tabor a limo na arip na musano
(Mt 14:13-21; Mk 6:30-44; Jn 6:1-14)*

¹⁰ A kum aposel det milet melet, ra det inanos o Iesu una kum utna ra det sa pam tari. I ben pas det kut, ra det wan gisen sur a tamon a risano o Betsaida. ¹¹ Ikut, a kunur na taro det longoro i, ra det muri. I gas pas det, ra i wasiso torom det una matanitu anun o God, ma i ulangolango pas det ra det misait.

¹² Ra i sa lirop, a noino ma aru nat na ususer det wan torom o Iesu, ra det inanos i lena, “Un tulu ru a kunur na taro sur det in nan sur a kum lamlabino tamon milau, ma a kum natnat na tamon kai, sur det in nangan ma det in inep iai, uni a nubual ri i bakbak gusun a kum tamon.” ¹³ O Iesu i balu det lena, “Mot ut mot in tabor det.” Ra det balu i lena, “A limanin beret sot kut, ma arin kiripo kuri met losi. Kutiro u nemi sur met in kul pas lako utna sur in elar nama kunur na taro rop ri?” ¹⁴ A kunur na taro ra, a niluluk ina kum musano kut i elar nama limo na arip.

I watungi tan anun a kum nat na ususer lena, “Mot in tulu det sur det in kis tomo a limlimo na noino det.” ¹⁵ Ra a kum nat na ususer det pami lenutra, ma a taro rop det kis. ¹⁶ O Iesu i los pas a limanin beret ma arin kiripo, i tamtama usapat una langit, i watung wakak pas torom o God uni, i tibiki ra i pitari tan a kum nat na ususer, sur det in tibo a taro nami. ¹⁷ Det rop det wangon ma det masur. Numur det song bukus pas a noino ma aru rat nama utna ra det wangon kopos pas uni.

*O Pita i wasiso talapor un o Iesu
(Mt 16:13-19; Mk 8:27-29)*

¹⁸ Ara bung ra o Iesu sot kut i wararing, a kum nat na ususer det kis milau tari, ra i ting det lena, “A taro det watung iau nam osi?” ¹⁹ Det balu i lena, “Ara taro det watung ui o Jon a Tene Baptaiso. Ara taro det watung ui o Elaija, ma ara taro kai det

watung ui, ara tagun a kum poropet tagun numugu, ra i sa laun melet.” ²⁰ Ra i ting det lena, “Ma mot, mot watung iau nam osi?” Ra o Pita i balu i lena, “Ui a Karisito ra o God i tulu ru ui.” ²¹ Ra i turbat dekdek det sur gong det inanos tar taio nami.

*O Iesu i wasiso mugu una nun a minat
(Mt 16:20-28; Mk 8:30-9:1)*

²² O Iesu i watungi lena, “A Nutun a Musano in taramo a susut na mamaut. A kum mugumugu, a kum lamlabino tene etabor torom o God, ma a kum tene ususer tagun a Warkurai det in rosumur gusuni ma din um doko i. Ra a tulu bung in rop, in katutur melet.”

²³ Ra i watungi tandet rop lena, “Ra taio i nemi sur in mur iau, gong i mur a nuknukino. In los pas anun in nanai kutus una kum bung rop ma in mur iau. ²⁴ Uni osi ra i maris bat anun a nilaun in iru, ikut osi ra in iru, uni i tagun iau, in laun. ²⁵ Osi ra in utur ukai a kum ututna rop taginin una rakrakon bual, ma in ban laulau anun a nilaun uni, ma in iru tukum, in wakak pepetlai toromi? ²⁶ Osi ra in maimai un iau ma una nung a kum wasiso, a Nutun a Musano kai in maimai uni, ra in nanpat tomo nama nun a minamar, ma a minamar anun o Tamano ma anun a kum ensel anun o God. ²⁷ A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a matanitu anun o God.”

*A pinin o Iesu i senene
(Mt 17:1-8; Mk 9:2-8)*

²⁸ Ra i sa tiwal na bung bat tar a wasiso ri, o Iesu i ben pas o Pita, o Jon ma o Jems, ma det wan toto usapat una tangai sur det in wararing. ²⁹ I wararing, ra in masarino i tamtama senene, ma anun a kum malu kai i kabang doko ma i pilpil. ³⁰ Ma i wasiso tomo nam aru musano, o Moses der nam o Elaija. ³¹ Der wanpat nama minamar, ma detul wasiso una minat anun o Iesu, ra in etoromi sapat o Jerusalem, sur in pam sot pas a nemnem anun o God. ³² O Pita detul, detul inep dumun. Ra detul tuangun pat, detul tama a minamar anun o Iesu, ma aru musano kai ra der tur tomo nami. ³³ Aru musano der nem na wan mo gusun o Iesu, ra o Pita i watungi tano lena, “Tene Ususer, i wakak ra dat in kis nin. Metul in pam lako tulu turturup, ara anumi, ara anun o Moses, ma ara kai anun o Elaija”. Ikut o Pita ke tasman asau ra i watungi.

³⁴ Ra i wasiso utmakai, a du bakut i wanpat ma i pulus bat pas det, ra detul ngara ra a bakut i pulus bat det. ³⁵ Ma in

nalngan ara tagisapat una bakut i watungli lina, “Iri a Nutunglik, ra a sa pilok pasi. Mot in longoro i.”³⁶ Ra i wasiso rop pas, o Iesu sot mukut kura i. Ma ka detul wasiso uni. Ma una kum bung ra, ka detul inanos tar taio una kum utna ra detul sa tama tari.

O Iesu i lakro ru a laulau na nion gusun ara natlik

(Mt 17:14-18; Mk 9:14-27)

³⁷ Una bung numur, o Iesu ma a tulu nat na ususer det wan pirso tagisapat una tangai, ma a labino kunur na taro det etorom nam o Iesu.³⁸ Ra ara musano tagun det i kakabo lina, “Tene Ususer, a saring ui sur un tama o nutunglik a nat musano, i ara sot kut.”³⁹ A laulau na nion i ser solsolongi, ma a nat i ser kisin ma i kukukuk. A laulau na nion i ser gunu dekdeki, ma a wano i ser busu. A laulau na nion ke wan gusuni, ma i ungunut laulau a pinino.⁴⁰ A saring anum a kum nat na ususer sur det in lakro ru i, ikut ka det pet lar pasi.”

⁴¹ O Iesu i balu i lina, “Mot a taro tagun uniri, ka mot nurnur ma mot a kum tene sakino. A sa kis suano i tomo nam mot. Nangisin mo mot in nurnur? Un ben a nutumlik urin.”

⁴² Ra a nat i wan nanan utmakai torom o Iesu, a laulau na nion i woro piso tari una piso ma i gunu dekdeki. O Iesu i wasiso dekdek torom a laulau na nion ra i lakro ru i, ra a nat i langolango melet. Numur i pitar melet tari torom o tamano.⁴³ Ma det rop det kisin una dekdekin o God.

O Iesu i wasiso melet una nun a minat
(Mt 17:22-23; Mk 9:30-32)

Ra det kisin utmakai una kum utna ra o Iesu i sa pam tari, i watungli tan anun a kum nat na ususer lina,⁴⁴ “Mot in longoro wakak a wasiso ri: Din pitar a Nutun a Musano ulaman a taro.”⁴⁵ Ikut ka det talapor una kukurai ina wasiso ri. Di munu i kut gusun det, sur gong det talapor uni. Ma det ngara sur det in ting o Iesu uni.

Osi ra i labo sakit
(Mt 18:1-5; Mk 9:33-37)

⁴⁶ A kum nat na ususer det engaras epotor tandet sur osi tagun det ra in labo taun det.⁴⁷ O Iesu i sa tasman a nuknukin det, i los pas ara natlik ma i utur tari tiro nisano.⁴⁸ Ma i watungli tandet lina, “Osi ra in gas pas a natlik ri una risang, i gas pas iau ut. Ma osi ra in gas pas iau, i gas pasi utkai o naro ra i tulu ru iau urin. Uni i ra i natino tamot rop, i ut ra i labo sakit.”

Osi ra ke turbat mot i warut mot
(Mk 9:38-40)

⁴⁹ O Jon i watungli tan o Iesu lina, “Tene Ususer, met tama ara musano i lakro ru a kum laulau na nion nama risam, ra met lari sur met in turbati, uni i awu sur tagun dat.”

⁵⁰ O Iesu i balu i lina, “Gong mot turbati, uni osi ra ke turbat mot, i warut mot.”

A taro Samaria ka det nem o Iesu

⁵¹ Ra i sa milau a du bung sur din los pas o Iesu usapat una langit, a nuknukino i dekdek sur in nan usapat o Jerusalem, ma i turpas a inawan.⁵² I tulu ru ara taro, sur det in mugu tano. Det wanpat un ara tamon una papor Samaria, sur det in waninar sur o Iesu.⁵³ Ikut a kum tet Samaria ka det nemi sur in ruk una nundet a tamon, uni in nan ut usapat o Jerusalem.[†]⁵⁴ Ra anun aru nat na ususer, o Jems ma o Jon der tama a petutna ri, der iting lina, “Labino, u nemi sur mir in saring o God sur in pitar ru a sungun sur in nan rop ru det?”⁵⁵ O Iesu i ger tupukus, ma i turbat der.⁵⁶ Ra o Iesu tomo nama nun a kum nat na ususer det wan sur ara tamon gisen.

Det ra det nem na mur o Iesu
(Mt 8:19-22)

⁵⁷ Ra o Iesu ma anun a kum nat na ususer det wan nanan a kisapi, ara musano i watungli tano lina, “An mur ui una kum nubual rop ra un nan iai.”⁵⁸ Ra o Iesu i watungli tano lina, “A kum lomlom na pap anundet a kum tung ut, ma a kum piko kai anundet a kum pios ut, ikut a Nutun a Musano katu rumu na ininep.”⁵⁹ I watungli tan ara musano bulung lina, “Un mur iau.” Ikut i balu i lina, “Labino, un mulaot ru iau munung sur an nan, an por ru tar o tita.”⁶⁰ Ikut o Iesu i watungli tano, “Un madek ru a kum minat det in por anundet a kum minat. Ikut ui, un nan ma un warawai nama matanitu anun o God.”⁶¹ Ara melet i inanos o Iesu lina, “Labino, an mur ui, ikut un mulaot ru iau munung sur an nan, ma an wasiso na itula taru munung torom det una nung a rumu.”⁶² O Iesu i watungli tano lina, “Osi ra in turpas a pinapam na kilkil piso, ma i ger unago numur, ke topasi a pinapam una matanitu anun o God.”

10

O Iesu i tulu ru a wonom mawit na noino ma aru musano

¹ Numur a Labino i pilok pasi bulung a wonom mawit na noino ma aru musano kai, ma i tulu ru det aruru sur det in mugu

9:44: Lk 9:22 9:45: Lk 18:34 9:46: Lk 22:24 9:48: Mt 10:40 9:50: Mt 12:30; Lk 11:23 † 9:53:

A kum tet Samaria det ser lotu torom o God una nundet a rumu na etabor sapat una Tangai Gerasim. Ikut o Iesu i wan usapat o Jerusalem sur in lotu. 9:54: 2 Kin 1:9-16 9:61: 1 Kin 19:20 10:1: Mk 6:7 10:2: Mt 9:37-38; Jn 4:35

tano una kum labino tamon, ma una kum tamon liklik, ra numur in nan iai. ² Ra i watungi tandet lena, “A kinobot i sa makus, ma i sa labo doko, ikut kalako susut na tene pasong. I mo ra mot in saring a Labino, i ra a taman a kinobot, sur in tulu ru a kum tene pasong sur ana kinobot. ³ Mot in nan! A tulu ru mot elar nama kum sipsip epotor tan a kum ngalgalia na pap. ⁴ Gong mot los tu paus na umubek mani, gong tu rat, ma gong tu su. Gong kai mot wasiso taio ra mot etoromi una kisapi.

⁵ “Ra mot in nanpat tiro un tu rumu, mot in inanos mugu det lena, ‘A malmal torom mot.’ ⁶ Ra tu tene malmal in kis tiro iai, anumot a malmal in kis uni. Ra awu, anumot a malmal in milet melet torom mot. ⁷ Mot in kis ut tiro iai una rumu ra, mot in nangon ma mot in inum una utna ra di tabor mot nami, uni i tokodos sur din tabor a tene pinapam. Gong mot inep karkarai.

⁸ “Ra mot in nanpat un tu tamon, ma din ben ruk mot, mot in nan a utna ra di tabor mot nami. ⁹ Mot in ulangolango a kum misait tiro iai, ma mot in inanos tar a taro lena, ‘A matanitu anun o God i sa milau nisamot!’ ¹⁰ Ra mot in nanpat un tu tamon, ra ka di ben ruk mot, mot in tur kut una kisapi ma mot in watungi lena, ¹¹ ‘A kubus tagun anumot a tamon, ra kuri una kum kikimet, met tang melet ru i sur a utumarong torom mot. Ikut mot in tasmani lena, a matanitu anun o God i sa milau.’ ¹² A watungi tamot, una bung na warkurai, a warkurai torom a tamon ra, in laulau doko taun a warkurai torom a taro Sodom.

A warkurai na minabalu torom det ra ka det nukpukus

(Mt 11:20-24)

¹³ “In laulau torom mot a taro Korasin, ma in laulau kai torom mot a taro Betsaida. Ra gunuk di sa pam tar a kum utna na ukisin ri torom a taro Tair ma o Saidon, elar nami ra a sa pam tari torom mot, kanapi det in nukpukus lakit ma det in tobo, det in emar nama kum malu na tupunuk ma det in talus a pinindet nama kubus na sungun. Ikut mot, ka mot nukpukus. ¹⁴ A warkurai torom mot a taro Korasin ma o Betsaida, in laulau doko taun a warkurai torom a taro Tair ma o Saidon. ¹⁵ Ma mot kai a taro Kapernaum, pepetlai, mot nuki lena din ulabo pas mot usapat netes? Awu, din woro pirso ru mot kut una labino sungun.

¹⁶ “Osi ra in longoro mot, i longoro iau ut. Ma osi ra in rosumur gusun mot, i rosumur

gusun iau utkai. Ma osi ra i rosumur gusun iau, i rosumur utkai gusun o naro ra i tulu ru iau urin.”

A wonom mawit na noino ma aru det milet melet

¹⁷ A wonom mawit na noino ma aru det milet melet nama gasgas ma det watungi lena, “Labino, ra met lakro ru a kum laulau na nion nama risam, det pirso kut.” ¹⁸ O Iesu i watungi tandet lena, “A tama o Satan i puku tagisapat una langit elar namin nememe. ¹⁹ Tama i, a sa pitar tar a dekdek tamot sur mot in pas watwat a kum sui ma a kum bukalo kai, ma sur mot in winim pas a dekdekin a ebar, ma katu utna in ban laulau mot. ²⁰ Ikut, gong mot gas, uni a kum laulau na nion det mur anumot a wasiso. Mot in gas, uni di sa tumus tar a risamot sapat una langit.”

O Iesu i gas

(Mt 11:25-27; 13:16-17)

²¹ Una du bung ra, o Iesu i bukus nama gasgas tan a Tokodos na Nion ma i watungi lena, “Tita, ui a Labino tagun a langit ma a rakrakon bual rop. A watung ulabo pas ui, uni u munu a kum utna ri tan a kum tene mananos ma det ra det tastaman, ma u upuaso i kut, torom det ra det elar nama kum nat liklik. A lingmulus, Tita, uni anum a nemnem i lenutra.

²² “O Tita i sa pitar tar a kum utna rop torom iau. Katutaio i tasman o Nutunu, o Tamano kut i tasmani, ma kataio kai i tasman o Tamano, o Nutunu kut i tasmani, ma det kai ra o Nutunu i nemi sur in upuaso o Tamano torom det.”

²³ Ra o Iesu ma anun a kum nat na ususer mukut det kis, i tupukus torom det ra i watungi lena, “Mot dan ra mot tama a kum ututna ri! ²⁴ A inanos mot, numugu a susut na poropet ma a susut na king det nem doko i sur det in tama a kum utna ri a pami umatamot, ikut ka det tama i. Ma det nem doko i kai sur det in longoro a kum utna ri mot longoro i, ikut ka det longoro i.”

A wasiso elelar una wakak na te Samaria

²⁵ Ara tene mananos tagun a Warkurai i katuttur ra i lar o Iesu, ra i tingi lena, “Tene Ususer, asau ra an pami sur an rakon a nilaun tukum?” ²⁶ Ra o Iesu i balu i lena, “Asau ra di sa tumus tari una Warkurai? Asau u nuki uni?” ²⁷ I balu i lena, “Un nem a Labino anum a God namin balam rop, a niom rop, a dekdekim rop, ma a nuknukim rop.”

Lo 6:5

Ma ‘Un nem o pasam elar nami ra u nem ui ut.’”

Wkp 19:18

²⁸ O Iesu i watungi tano lena, “I tokodos ut anum a minabalu, un pami ut lenra, ra un laun.” ²⁹ Ikut a tene ususer tagun a Warkurai i nemi sur in ukodos pasi umatan o Iesu, ra i tingi lena, “Osi ra a pasang?”

³⁰ O Iesu i balu i lenri, “Ara musano i wan tagisapat o Jerusalem utong o Jeriko. Ra i wan nanan, a kum tene wolong det kalabor bat pasi. Det palos ru anum a kum malu, ma det um laulau tari, ra det wan pas gusuni ma milau mo sur in mat. ³¹ Ara tene etabor torom o God i wan una kisapi ra, i tama pas a musano ra, ra i wan liliias kut gusuni una ara papor. ³² Lenkutkai, ara musano bulung tagun a kabotaro Liwai, i wan taru una musano ra, ra i wan liliias kut gusuni una ara papor kisapi.

³³ “Ikut ara te Samaria i wan nanan, i wan taru una musano ra, ra i tama i, i maris doko i. ³⁴ I wan toromi, i lingis tar a wel ma a wain una nun a kum inangon ma i pulus bat tar det. I ukas pasi una nun a dongki, ra i usirok tari una rumu na usiro, ra i tamtamabati. ³⁵ Una bung numur tano, i los pas aru denaria*, i pitar tari torom a taman a rumu, ma i watungi tano lena, “Un tamtamabati. Ra an milet melet, an balu melet asau kai ra u tabor tari nami.”

³⁶ “Osi tagun a tulu musano ri der pasano nama musano ra a kum tene wolong det um tari?” ³⁷ Ra a tene ususer tagun a Warkurai i balu i lena, “O naro ra i marisi.” Ra o Iesu i watungi tano lena, “Un nan ma un pami lenutra.”

O Iesu i kis una rumu anum o Maria ma o Mata

³⁸ O Iesu ma anum a kum nat na ususer det wan nanan, ra det wanpat un ara tamon, ra ara ino, a risano o Mata, i ben pas o Iesu utiro una nun a rumu. ³⁹ Ma ara tisino kai, a ino, a risano o Maria, i kis nisan aru kikin a Labino, ma i longoro anum a wasiso. ⁴⁰ Ikut o Mata i taramo i ra i dekdek toromi a kum pinapam ra i pami, i wan torom o Iesu ra i watungi tano lena, “Labino, ko nuk pas iau? Tama i, a tising a ino ke warut iau. Iau mukut a pam a kum pinapam. Tulu ru i sur in warut iau.” ⁴¹ A Labino i balu i lena, “Mata, Mata, u nuknuk doko sur a susut na utna! ⁴² Ara utna kut i labo sakit sur a nuknukim in kis uni. O Maria i sa pilok pasi, ma katutaio ut in los ru i gusuni.”

11

*A etowo anun o Iesu una niaring
(Mt 6:9-13; 7:7-11)*

¹ Ara bung o Iesu i wararing un ara nubual. Ra i sa wararing rop, ara tagun anum a kum nat na ususer i watungi tano lena, “Labino, un ususer met nama niaring, elar nam o Jon i ususer anum a kum nat na ususer.” ² Ra o Iesu i watungi tandet lena, “Ra mot in wararing, mot in wararing lenri, “Tamamet,

i wakak ra din ru a risam.

I wakak ra anum a matanitu in nanpat.

³ A kum bung rop un tabor met nam amet a utna na inangon.

⁴ Un unus ru anumet a kum sakino petutna, uni met kai met dumano ru anundet a kum sakino petutna torom met.

Gong u ben met una ululam.’”

⁵ O Iesu i watungi tan anum a kum nat na ususer lena, “Ra taio tagun mot in nan torom tu pasano una labino mirum, ma in saringi lena, ‘Pasang, a nem lako tulin beret munung, ⁶ uni ara pasang i wanpat torom iau una nun a inawan ut, ra kalako utna sur an tabori nami.’ ⁷ Ra a pasano kura urumu in watungi lena, ‘Gong u ubalon iau! Met sa tagar, ma met nama kum nutnutung liklik met sa inep. Kan pirso melet mo sur an los tar tu utna tam.’ ⁸ A inanos mot, in pirso sur in pitar tar a beret tano, awu sur i kibino ra der pasano, awu, i kibino uni i sasaring liklik ut.

⁹ “A watungi tamot, mot in sasaring, ra din tabor mot, mot in sisio, ra mot in sio pasi, mot in pinpidik, ra din papos pas mot.

¹⁰ Uni det rop ra det sasaring din tabor det, ma osi ra i sisio in sio pasi, ma osi kai ra i pinpidik, din papos pasi. ¹¹ Osi na pasamot a kum tamtaman a kum nat liklik, ra o nutunulik in saringi sur tin kiripo, in tabori kut namin nusui? ¹² O, ra in saringi sur tin nikiau, in tabori kut nama bukalo? ¹³ Mot a laulau na taro, ikut mot tasmani ut a wakak na etabor sur mot in tabor a kum nutnutu mot nami. Ra mot ser pami lenra, i lingmulus sakit lena, osi ra in saring a Tamamot ra i kis sapat una langit, in tabori ut nama Tokodos na Nion.”

*O Iesu ma o Belsebul
(Mt 12:22-30; Mk 3:20-27)*

¹⁴ O Iesu i lakro ru a laulau na nion ra i ngat gusun ara musano. Ra a laulau na nion ra i pirso gusuni, a musano ra i wasiso maragom. Ma a kunur na taro det kisin. ¹⁵ Ikut ara taro tagun det, det watungi lena, “I ser lakro ru a kum laulau na nion nama

10:28: Wkp 18:5 * **10:35:** Ara denaria i elar nama ikul anum ara musano tagun ara bung ra i papam. **10:39:** Jn 11:1; 12:2-3 **10:41:** Mt 6:33 **11:15:** Mt 9:34; 10:25 **11:16:** Mt 12:38

dekdekin o Belsebul, a labino anun a kum laulau na nion.”

¹⁶ A ramano taro kai det lar o Iesu sur in pam tu ukinalong sur in ese i lena, i tagisapat una langit. ¹⁷ Ikut o Iesu i sa tasman a nuknukin det, ra i watungi tandet lena, “Ra tu gapman det melet ut det in waim etalai, a gapman ra in rop kut. Ma ra lako taro tagun tu rumu det in waim etalai melet kut, det in nan sarara. ¹⁸ Ra o Satan in waim melet kut nam anun a kum tultul, anun a gapman in tur dekdek pepetlai? A watungi lenri, uni mot watungi un iau lena, a lakro ru a kum laulau na nion nama dekdekin o Belsebul. ¹⁹ Ikut, ra iau, an lakro ru a kum laulau na nion nama dekdekin o Belsebul, anumot a taro, det ser lakro ru a kum laulau na nion nama dekdekin osi? Anundet a pinapam ut in upuaso i lena anumot a etakun ke lingmulus. ²⁰ Ikut, ra an lakro ru a kum laulau na nion nama dekdekin o God, in ese i lena a matanitu anun o God i sa wanpat torom mot.

²¹ “Ra ara dekdek na musano i sa emar pas nam anun a kum utna na inaim, ra i tamtamabat anun a rumu, anun a kum utna in kis wakak. ²² Ikut, ra taio ra i dekdek tauni in nanpat toromi ma in winim pasi, in ras ru anun a kum utna na inaim ra i nurnur taru uni, ma in los pas anun a kum utna rop, ma in tabor a taro nami.

²³ “O naro ra ka mir tar pasano mir ebar. Ma o naro ra ke warut iau u eben, i lu sarara ru a taro kut.

*A laulau na nion i millet melet
(Mt 12:43-45)*

²⁴ “Ra tu laulau na nion in pirso pas gusun tu musano, in nan una kum nubual ra kalako danim iai, sur in mana, ikut ken sio pas tu nubual sur in mana uni. Ra in watungi lena, ‘An millet melet sur anung a rumu, ra a sa pirso pas gusuni.’ ²⁵ Ra in nanpat, in tama i ra di sa surupu tari, ma di sa ukodos tari. ²⁶ Numur in nan, ra in ben melet pas a wonom mawit na laulau na nion, ra det laulau sakit tano, ma det in ruk rop taru una rumu ra, ma det in kis uni. Ma a nilaun anun a musano ra in laulau sakit taun a nilaun ra numugu i utur ukai i.”

Det ra det dan

²⁷ Ra o Iesu i wasiso utmakai, ara ino tagun a kunur na taro ra, i watungi lena, “A ino ra i usus pas ui ma i ugu ui, i dan.” ²⁸ O Iesu i balu i lena, “Ikut det ra det longoro a wasiso anun o God ma det muri, det dan sakit.”

*A taro det sasaring sur tu ukinalong
(Mt 12:38-42)*

²⁹ Ra a kunur na taro det bukusanan, o Iesu i watungi tandet lena, “A taro tagun uniri, a sakino taro. Det tamtama sur tu ukinalong, ikut ka din pam taio torom det. Din pam a ukinalong kut elar nami ra di sa pam tari un o Jona. ³⁰ Uni o Jona i a ukinalong torom a taro Niniwe, ma lenkutkai ra a Nutun a Musano in nanpat a ukinalong torom a taro tagun uniri. ³¹ Una bung na warkurai, a kwin tagitong una matmatano tobar in tur ma in takun dekdek a taro tagun uniri, uni i wan ut tagitiro bakkak sur in longoro a mananos anun o king Solomon, ma o naro ra i labo taun o Solomon kuri ut nin, ikut ka mot longoro i. ³² Una bung na warkurai, a taro Niniwe det in tur ma det in takun dekdek a taro tagun uniri, uni det nukpukus una warawai anun o Jona, ma o naro ra i labo taun o Jona kuri ut nin, ikut ka mot longoro i.

*A lam tagun a pinindat
(Mt 5:15; 6:22-23)*

³³ “Katutaio in ungangon tar tu lam ma in munu tari, o in wop bat tari nama paket. Awu! In ubek tari ut netes una nun a turtur, sur det ra det ruk det in tama a talapor. ³⁴ Arin matam der elar nama lam una pinim. Ra arin matam der wakak, a pinim rop in bukusan nama talapor. Ikut ra der laulau, a pinim rop in bukusan nama dumirum. ³⁵ Un tumarong, sako a talapor ra kura un ui in dumirum. ³⁶ Ra a pinim rop in bukusan nama talapor, ma katu dumirum uni, in talapor rop, elar nama lam ra a talaporino i sisio un ui.”

O Iesu i upuaso a kum niraro anun a kum Parisi ma a kum tene ususer tagun a Warkurai

(Mt 23:1-36; Mk 12:38-40; Lk 20:45-47)

³⁷ Ra o Iesu i sa wasiso rop, ara Parisi i ben pasi sur det in nangon tomo. O Iesu i ruk ma i kis sur in nangon. ³⁸ Ma a Parisi ra, i tama i lena o Iesu ke gos mugu pas a lamano, ra i kisin uni. ³⁹ Ra a Labino i watungi tano lena, “Mot a kum Parisi mot ser gos pasi kut a surun a kap ma a pelet, ikut a balamot i bukusan nama petutna na unongos pas a utna tan taio ma a kum sakino petutna. ⁴⁰ Mot a kum longlong! Ka mot tasmani lena, o naro ra i pam a surun a kum utna, i pami utkai a balandet? ⁴¹ Mot in tabor a kum sibo na taro nama utna ra kura ubalan anumot a kum kap ma a kum pelet, sur katu dur kura un mot umatan o God.

⁴² “In laulau doko torom mot a kum Parisi. Mot nuknuk doko sur a kum natnat na warkurai lenri, mot pitar in tekteken nanai torom o God tagun a noino natnat na duwai ra i sangsangnain wakak tagun anumot a kinobot, ikut ka mot pam a tokodos na warkurai torom a taro ma ka mot nem o God. I wakak sur mot in pam a tokodos na warkurai torom a taro ma mot in nem o God, ma gong kai mot dumano ru in tektekene tagun a noino, sur mot in pitari torom o God. ⁴³ In laulau doko torom mot a kum Parisi, uni mot nem a kinkinis na labino sa numugu una kum rumu na lotu. Ma mot nemi kai sur a taro det in pitar a labino urur torom mot una kum nubual na inawan tomo. ⁴⁴ In laulau doko torom mot, uni mot elar nama kum tung na minat ra katu ukinalong un det, ma a taro det wanan sapat netes un det ma ka det tasmani*.”

⁴⁵ Ara tagun a kum tene ususer tagun a Warkurai i watungi tan o Iesu lena, “Tene Ususer, ra u watungi lenri, u watung laulau met kai.” ⁴⁶ Ra o Iesu i balu i lena, “In laulau doko kai torom mot a kum tene mananos tagun a Warkurai, uni mot pitar tar a kum warkurai ra i ngangitin sur a taro det in muri, ma mot ut, ka mot warut det uni. ⁴⁷ In laulau doko torom mot, uni a kum tumtubu mot tagun numugu det um doko ru a kum poropet, ma mot utur a kum aim nisan a kum kulam na minat anundet, ikut ka mot mur anundet a wasiso. ⁴⁸ Lenra mot upuaso i lena, mot mulaot tomo nama kum tumtubu mot tagun numugu una nundet a pinapam ra det um doko a kum poropet, uni det um doko det, ma mot, mot utur a kum aim nisan a kum kulam na minatindet. ⁴⁹ I mo ri a kibino, o God ra i mananos doko i watungi lena, ‘An tulu ru a kum poropet ma a kum aposel torom a taro. A taro det in um doko lako taro tagun det, ma det in ukadik lako taro kai tagun det.’ ⁵⁰ I mo ra mot a taro tagun uniri, din pitar a warkurai na minabalu torom mot, una gapin a kum poropet rop, ra di sa um doko tar det, turpasi ut una turturkibin a rakrakon bual. ⁵¹ Turpasi ra di um doko o Abel ma i wan tuk ra di um doko o Sekaraia†, i ra i iru epotor nisan a kabulu na tuntun etabor ma a rumu na etabor. A watungi tamot, din pitar a warkurai na minabalu torom a taro tagun uniri una kum utna rop ri. ⁵² In laulau doko torom mot a kum tene mananos tagun a Warkurai, uni mot rakon ru a ki tagun a

matansako sur a mananos. Mot ut ka mot ruk uni, ma mot turbat det ra det nem na ruk uni.”

⁵³ Ra o Iesu i pirso gusun a rumu ra, a kum tene ususer tagun a Warkurai ma a kum Parisi det kankan doko ma det ting pukpukusi una susut na utna. ⁵⁴ Ra det kis langlang o Iesu sur tu ngas na wasiso sur det in takuni nami.

12

O Iesu i utumarong det gusun a torotoro (Mt 10:26-27)

¹ A ararip na taro det sa wanpat tomo, ra det isugut etalai det mukut, ra o Iesu i watung mugu i torom anun a kum nat na ususer lena, “Mot in tumarong una is anun a kum Parisi. A wasiso una nundet a petutna na torotoro. ² A kum utna rop ra di rakup bat tari, numur in kis talapor, ma a utna rop ra i kis eno, numur in nanpat puaso. ³ Asau ra mot sa watung tari una dumirum, numur din longoro i una waspi, ma asau ra mot wasisik eno taru nami tiro urumu, numur din tur sapat netes una rumu, ma din watung puaso i.

Mot in ngara kut sur o God (Mt 10:28-31)

⁴ “A watungi tamot a kum paspasang: Gong mot ngaran det ra det um doko i kut a pinindi. Ra det sa pam len tari ra, ka det in pet lar pasi sur det in pam melet tu utna kai. ⁵ Ikut an inanos kapo mot un o naro ra mot in ngara suri: Mot in ngara sur o naro ra a dekdekino i labo sur in um doko mot, ma in woro ru mot una labino sungun kai. A lingmulus a watungi tamot, o God kut ra mot in ngara suri. ⁶ Di ser kul a limanin nipiko liklik nama nat na mani kut, niko? Ikut o God ken dumano ru tinolik tagun det. ⁷ I lingmulus sakit, o God i sa luk rop tar a kum tekteken iwu na lorimot, ma i sa tasman tari. Gong mot ngara, uni mot labo sakit umatan o God taun a susut na piko.

Osi ra i upuaso o Iesu ma osi ra i ipul ru i (Mt 10:32-33; 12:32; 10:19-20)

⁸ “A watungi tamot, osi ra in watung puaso i umatan a taro lena, i tagun iau, a Nutun a Musano kai in watung puaso i umatan a kum ensel anun o God lena, i tagun iau. ⁹ Ikut osi ra in ipul ru i iau umatan a taro, a Nutun a Musano kai in ipul ru i umatan a kum ensel anun o God. ¹⁰ Det ra det in watung tar tu sakino wasiso una Nutun a Musano, din unus ru i kut,

* **11:44:** A Warkurai anun a taro Juda i watungi lena, ra taio in nan sapat netes una tamon na minminat, in dur umatan o God. † **11:51:** O Sekaraia i ara poropet tagun numugu. Kutiro i a poropet ra di tumtumus uni un 2 Stori 24:20-22. Awu sur a taman o Jon a Tene Baptaiso. **12:2:** Lk 8:17 **12:7:** Lk 12:24; Ap 27:34 **12:11:** Mk 13:11; Lk 21:12-15

ikut osi ra in wasiso laulau una Tokodos na Nion, ka din unus lar pasi. ¹¹ Ra din dat pas mot sur a warkurai una kum rumu na lotu, ma umatan a kum tene warkurai ma a kum mugumugu, gong mot nuknuk bing sur asau ra mot in balu lako kum etakun nami, o asau ra mot in watungi. ¹² Uni una du bung ut ra, a Tokodos na Nion ut in ususer mot un asau ra mot in watungi.”

A wasiso elelar una tene gongon ra ke mananos

¹³ Ara tagun a kunur na taro i watungi tan o Iesu lena, “Tene Ususer, un inanos o tisinglik sur in isuaro a kum ululeng un mir, ra a tamamir i sa mat pas gusuni.”

¹⁴ Ra o Iesu i balu i lena, “Le, osi ra i ubek tar iau sur an tene warkurai ma sur an isuaro anumur a kum ululeng torom mur?”

¹⁵ Ra i watungi tandet, “Mot in nuk pasi, ma mot in tumarong mot gusun a nemnem sur a susut na ululeng, uni a nilaun anun taio ken kibino pas tagun anun a susut na ululeng.”

¹⁶ Ra i inanos det una ara wasiso elelar lenri, “A kinobot anun ara tene gongon i wu a susut na wino. ¹⁷ Ma i nuknuk lena, ‘Asau an pami? Uni katu rumu ra an ubek a win anung a kinobot uni.’ ¹⁸ Ra i watungi lena, ‘An pami lenri, an rege ru anung a kum rumu na umubek tomo, ma an pam melet lako kum lamlabino, ra an ubek rop a win anung a kinobot ma anung a ululeng uni. ¹⁹ Ra an watungi tan a niong lena, ‘A niong, anum a kum ululeng i susut doko, sur in kis lako susut na kilalo. Un mana, un nangon, un inum ma un gas.’” ²⁰ Ikut o God i watungi tano lenri, ‘Ui a longlong! Uniutri una mirum, un mat! Osi mo in los a kum ululeng ra u sa ubek tomo tari sur ui?’ ²¹ In lenra torom det ra det ubek tomo a ululeng sur det ut, ikut ka det gongon umatan o God.”

*A nurnur un o God
(Mt 6:25-34)*

²² O Iesu i watungi torom anun a kum nat na ususer lena, “I mo ra a watungi tamot lena, gong mot nuknuk doko una numot a nilaun sur asau ra mot in nani, ma una pinimot kai sur asau ra mot in emar nami. ²³ Uni a nilaun i labo taun a utna na inangon, ma a pinindi kai i labo taun in namalu. ²⁴ Mot in tama a kum kotkot. Ka det marut tu utna, ma ka det pasong tomo lako utna, katu rumu na umubek anundet, ikut o God i ser tabor det. Ma mot, mot labo doko taun a kum piko. ²⁵ Ra taio tamot in nuknuk doko una nun a nilaun, pepetlai, in pet lari sur in tugus walos lilik anun a nilaun? Awu! ²⁶ Ra ka mot in pam lar pas

a utnalik ri, sur asau ra mot nuknuk doko sur lako kum utna kai?

²⁷ “Mot in tama a kum purpur tagisa ubual, ra det lubung pepetlai. Ka det papam ma ka det ser pam malu. Ikut a watungi tamot, a ememar rop anun o king Solomon ut i tamtama wakak bing, ikut ke tamtama wakak elar nama kum purpur ra. ²⁸ O God i mar a kum wuliso sa ubual nama kum wakak na purpurindet, ra i puspun uniri, ra markan din tun ru i una sungun. Ra i pami lenra una kum wuliso, i lingmulus ut ra in mar mot utkai. Anumot a nurnur i natino doko. ²⁹ Gong mot nuknuk doko sur asau ra mot in nani, ma asau ra mot in inumi, ma gong mot ngara suri. ³⁰ Uni a taro nin a rakrakon bual ra ka det nurnur, det ser dekedek sur a kum utna rop ri, ikut a Tamamot i tasmani lena mot sibo sur a kum utna ri. ³¹ Mot in sisio sur anun a matanitu, ra in tabor mot nama kum utna ri.

*A wakak na ululeng sapat una langit
(Mt 6:19-21)*

³² “A nat na kunur na sipsip, gong mot ngara, uni a Tamamot i sa gas sur in pitar tar a matanitu torom mot. ³³ Mot in siuru anumot a kum ututna sur a mani, ma mot in tabor a kum sibo na taro nami. Mot in waninar pas anumot lako kum paus ra ken moroto, a wakak na ululeng sapat una langit ra ke ser rop, ma katu tene wolong in nan milau i, ma a koropos ken ban laulau i. ³⁴ Uni a nubual ra anumot a wakak na ululeng i kis iai, anumot a nilaun rop in kis uni.

A kum tultul ra det waninar

³⁵ “Mot sa emar pas, ma mot sa ungangon pas anumot a kum lam, gong mot dumun, mot in kis na waninar mukut. ³⁶ Ma mot in elar nama kum tultul ra det kis langlang sur anundet a labino ra in milet melet tagun a lukaro na nolin. Ra in nanpat ma in pinpidik, uniutra det in papos pasi. ³⁷ Ra a labino in nanpat, ma anun a kum tultul det sa waninar, det dan. A inanos mot nama lingmulus, in emar pas sur in pam anun a pinapam, ma in ukis tar det nisan a kabulu na inangon ma in tabor det. ³⁸ Ra in nanpat kai torom det una labino mirum, o una lar, ma det in kis langlang ut suri, a kum tultul ra det in dan. ³⁹ Mot in tasman a utna ri: Ra a taman a rumu in tasman a du bung ra a tene wolong in nanpat uni, ken maked ru anun a rumu sur din wolongi. ⁴⁰ Mot kai, mot in koiko taru, uni a Nutun a Musano in nanpat una du bung ra ka mot nuki lena in nanpat uni.”

A lingmulus na tultul ma a tultul ra ke lingmulus

(Mt 24:45-51)

⁴¹ O Pita i ting o Iesu lena, "Labino, u watung a wasiso elelar ri un met kut, o una taro rop?" ⁴² A Labino i balu i lena, "A tene tamtamabat ra i lingmulus una nun a pinapam ma i mananos kai, anun a labino in ukis tari sur in mugumugu anun a kum tultul, sur in ser tabor det nama andet a utna na inangon una kum du bung na inangon. ⁴³ A tultul ra, in dan ra anun a labino in nanpat ma in tama i ra i pam sot pas anun a pinapam. ⁴⁴ A inanos mot nama lingmulus, anun a labino in ubek tari sur in tene tamtamabat una nun a kum utna rop.

⁴⁵ "Ikut, ra a tultul i nuki lena, anun a labino ken nanpat lakit, ra i turpasi sur in um a kum tultul na musano ma a kum tultul na ino, ma in nangon, ma in inum ma in sipak. ⁴⁶ Anun a labino in nanpat un tu bung o tu du bung ra a tultul ke tasmani, ma ke nuki lena in nanpat uni. Ra a labino in tau kutkutusi, ma in pitar tar a warkurai na minabalu toromi, sur in kis tomo nam det ra ka det nurnur.

⁴⁷ "Tu tultul ra i sa tasman tar a nemnem anun a labino anunu, ikut ke waninar, ma ke papam elar nami ra a anun a labino i nemi, din taktakalo dekdeki. ⁴⁸ Ikut tu tultul ra ke tasman asau ra anun a labino i nemi, ma i pam a utna ra ke tokodos, din rapus liliki kut. Ma torom taio ra di pitar tar a susut tano, din nemi kai lako susut ut gusuni, ma osi ra di ubek tar a susut ulamano, din tingi ut sur lako susut.

A kinkinis sarara

(Mt 10:34-36)

⁴⁹ "A wanpat sur an tagol tar a sungun una rakrakon bual, ma a nem doko i lena i sa wangon. ⁵⁰ Anung a baptais na ngunungut kura utmakai sur din baptaiso iau nami, ma iri a los a tarai na maot tuk ut ra din pam sot pasi. ⁵¹ Pepetlai, mot nuki lena a wanpat sur an pitar a malmal una rakrakon bual? Awu, a wanpat sur a taro det in kis sarara. ⁵² Turpasi uniri, a limo det una ara rumu det in kis sarara, atul detul ut, ma aru tander ut. ⁵³ Det in kis sarara, a musano gusun o nutunulik a musano, ma a nat musano gusun o tamano. A ino gusun o nutunulik a ino, ma a inolik gusun o nano, ma a nolin na ino gusun o tubunu, ma a tubunu gusun o tubunu."

A taro ka det mananos una kum utna ra i wanpat uniri
(Mt 16:2-3)

⁵⁴ O Iesu i wasiso melet torom a kunur na taro lena, "Ra mot tama a bakut una matmatano lubur, uniuotra mot watungi lena, 'Milau mo sur in bato,' ma i lingmulus ut. ⁵⁵ Ra a tobar i wuwu pat, mot watungi lena, 'A suan in dekdek,' ma i lingmulus ut. ⁵⁶ Mot a kum tene torotoro! Mot mananos sur mot in palos a tamtama ina rakrakon bual ma a bakut. Ma pepetlai ra ka mot mananos sur mot in palos a kukurai ina kum utna ra i wanpat una kum bung ri?"

Un umarom pas anum a ebar

(Mt 5:25-26)

⁵⁷ "Ilai ra mot ut ka mot tamtama wakak sur asau ra i tokodos? ⁵⁸ Ra anum a ebar in ben pas ui sur a warkurai, un dekdek sur mur in emarom mugu ra mur wan nanan utmakai una kisapi, sako in dat pas ui torom a tene warkurai. Ra a tene warkurai in pitar tar ui torom a polis, ma a polis in uruk tar ui una karabus. ⁵⁹ A inanos ui, kon pirso lar pas tuk ut ra un pitar rop ru a ururop na toia ina num a kunukul."

13

Un nukpukus sako un iru

¹ Una bung ra, ara taro det inanos o Iesu un ara taro Galili ra a kum tene inaim anun o Pailat det um doko det, ra kura ut det tun a etabor torom o God. ² O Iesu i balu det lena, "Pepetlai, mot nuki lena, det a kum tene sakino doko taun a taro Galili rop, uni det iru lenra? ³ Awu! Ikut an inanos mot, ra ka mot in nukpukus gusun anumot a kum sakino petutna, mot kai mot in iru rop.

⁴ "Ma asau mo mot nuki una noino ma tiwal na taro sapat o Jerusalem ra a rumu lekeleke tiro o Siloam i toropo ma i um doko rop ru det? Pepetlai, det a kum tene sakino doko taun det rop ra det kis sapat o Jerusalem? ⁵ Awu! Ikut an inanos mot, ra ka mot in nukpukus gusun anumot a kum sakino petutna, mot kai mot in iru rop."

A wasiso elelar unin nanai na fig ra kalako wino

⁶ Numur o Iesu i watung a wasiso elelar ri torom det, "Ara musano anunu in nanai na fig i tur epotor una ana kinobot na wain. I wan ra i tamtama sur lako wino, ikut kalako wino. ⁷ Numur i inanos a tene tamtamabat tagun a kinobot ra lena, 'Una tulu kilalo ri a tamtama sur lako win in nanai na fig ri ma kalako. Un tau ru! Uni i urop a inangon tagun a piso.' ⁸ Ikut a tene tamtamabat ra i balu i lena, 'Labino, un madek tari munung ara kilalo melet ri, sur an kil talilis in kibino, ma an ubek a wakak

na piso uni. ⁹ Ra in wu una kilalo sapat, in wakak. Ra awu, un tau ru i mo.”

O Iesu i ulangolango ara ino una Bung na Sabat

¹⁰ Un ara Bung na Sabat o Iesu i ususer a taro un ara rumu na lotu. ¹¹ Ara ino kura iai, a laulau na nion kura uni. In surunu i tulukun a noino ma tiwal na kilalo, ma ke tur tokodos lar pas. ¹² O Iesu i tama i, ma i watungi toromi lena, “Le, u sa langolango gusun anum a misait.” ¹³ Ra o Iesu i ubek tar aru lamano sapat netes uni, uniuira i tur tokodos mut, ra i watung ulabo pas o God.

¹⁴ A mugumugu tagun a rumu na lotu i kankan, uni o Iesu i ulangolango pas a ino ra una Bung na Sabat. Ra i watungi tan a taro lena, “A wonom na bung kura sur din papam. Mot in nan urin una kum bung ra, sur din ulangolango pas mot, ma una Bung na Sabat gong.” ¹⁵ A Labino i balu i lena, “Mot a kum tene torotoro! Mot rop arara, mot ser palos ru anumot a kum bulumakau ma a kum dongki gusun anundet a kum rumu, ra mot ben pirso det una Bung na Sabat sur det in inum. ¹⁶ A ino ri, tagun a kabotaro anun o Abaram, o Satan i kerker tari a noino ma tiwal na kilalo. I lai ra ka din palos a kineker ri gusuni una Bung na Sabat?” ¹⁷ Ra i sa watung tari lenri tandet, det rop ra det pukus a pinapam anun o Iesu, det maimai, ikut a kunur na taro det gas una kum wakak na utna ra o Iesu i pami.

A wasiso elelar unin wino mastad ma una is

(Mt 13:31-33; Mk 4:30-32)

¹⁸ O Iesu i iting lena, “A matanitu anun o God i elar nama sau? Asau an elaro i nami? ¹⁹ I elar namin pitino mastad, ra ara musano i los pasi, ma i marut tari una nun a kinobot. I lubung, ra in nanai ino i labo pat, ma a kum piko det ser pam pios una kum kanokano.”

²⁰ O Iesu i iting melet lena, “Asau kai an elaro a matanitu anun o God nami? ²¹ I elar nama is ra ara ino i rakon pasi ma i pam tomo tari nama labino palawa, ra a palawa rop i mubus nami.”

A nat na matansako lik

(Mt 7:13-14, 21-23)

²² Ra o Iesu i wan nanan usapat o Jerusalem, i ususer a taro una kum lam-labino tamon ma una kum natnat na tamon. ²³ Ara i ting o Iesu lena, “Labino, pepetlai, a pak na taro kut din ulaun pas det?” Ra i watungi tandet lena, ²⁴ “Mot in dekdek sur mot in ruk una nat na

matansako lik, uni a susut na taro det in lari sur det in ruk uni, ikut ka det in pet lar pasi. ²⁵ A taman a rumu in tur ra in tagar bat a matansako, ma mot in tur nago upiso, mot in pinpidik ma mot in watungi lena, ‘Labino, un papos pas met.’ In watungi kut tamot lena, ‘Ka tasman mot ma tagai mot.’ ²⁶ Numur mot in watungi tano lena, ‘Met ser wangon ma met ser inum tomo nam ui, ma u ser towo met una numet a kum nubual na inawan tomo.’ ²⁷ Ikut in balu mot lena, ‘Ka tasman mot ma tagai mot. Mot a kum tene sakino, mot in nan gisen gusun iau.’ ²⁸ Ra mot in tama o Abaram, o Aisak ma o Jekop ma a kum poropet rop una matanitu anun o God, mot in tangtangis, ma mot in ungingit lokomot iai. Ikut din lu pirso ru mot. ²⁹ Ma a taro tagun a wat na matmatano wuwu det in nanpat, ma det in kis una lukaro una matanitu anun o God. ³⁰ Tama i, ara taro ra det mur uniri, numur det in mugu, ma ara taro ra det mugu uniri, numur det in mur.”

O Iesu i maris o Jerusalem

(Mt 23:37-39)

³¹ Una du bung ra, a kum Parisi det wanpat, ma det watungi tan o Iesu lena, “Un nan taginin ma un nan sur tu tamon gisen, uni o Erod i nem na um doko ui.” ³² O Iesu i balu det lena, “Mot in nan ma mot in inanos a lomlom na pap ra lenri, uniri ma markan an lakro ru a kum laulau na nion ma an ulangolango a taro, ma a tulu bung nami an urop anung a pinapam. ³³ An nan uniri ma markan ma a bung palu kai, uni katu poropet in iru un tu tamon gisen, sapat ut o Jerusalem.

³⁴ “Jerusalem, Jerusalem, ui ra u ser um doko a kum poropet, ma det ra di tulu ru det torom ui, u duku doko ru det kut nama watat. A susut na dino a nem na ben tomo a kum nutnutum, elar nama kereke ra i rakupbat tomo a kum nutnutunu utuntudu ina ru mebene, ikut ka mot nemi. ³⁵ Tama i! O God i sa wan gusun anumot a tamon. A inanos mot, ka mot in tama melet iau mo, tuk una bung ra mot in watungi lena, ‘O naro ra i wanpat nama risan a Labino i dan.’”

Sng 118:26

14

O Iesu i ulangolango pas ara musano

¹ Un ara Bung na Sabat, o Iesu i ruk sur in nangon una rumu anun ara mugumugu anun a kum Parisi, ra a taro det tama sursuri kut sur tu utna ra in pam raro i. ² Ara musano ra i misait, a pinpinino i

sursurung, i kis taru sa numugu tan o Iesu.
³ O Iesu i ting a kum tene ususer tagun a Warkurai ma a kum Parisi lena, “Pepetlai, i tokodos una Warkurai sur din ulangolango a taro una Bung na Sabat o awu?”
⁴ Ikut ka det balu i. O Iesu i pam pas a musano ra, i ulangolango pasi, ra i tulu ru i.
⁵ Ra o Iesu i ting det lena, “Osi tagun mot ra o nutunulik, o anunu tu bulumakau in puku taru unin nutung na danim una Bung na Sabat ra ken dat toto lakit pasi?”
⁶ Ma ka det balu lar pas anun a wasiso ri.

Un unatino pas ui, ma un maris a sibo na taro

⁷ Ra o Iesu i kis una inangon ri, i tama a taro ra det wanpat, det pilok pasi ut a kum kiskis sa numugu. Ma i watung ara wasiso elelar tandet lena,
⁸ “Ra taio in ben pas ui una lukaro na nolin, gong u kis una kiskis sa numugu, sako in ben pas taio ra i labo tam.
⁹ Ma o naro ra i eben una lukaro in nanpat ra in watungi tam lena, ‘Un katutur saro o naro ri.’ Ra un nan nama maimai sur a kiskis kunago numur.
¹⁰ Ikut, ra din ben pas ui, un nan ma un kis una kiskis nago numur sakit. Ra o naro ra i eben in nanpat, in watungi tam lena, ‘Pasang, un tur ra un nan urin numugu.’ Ma din ulabo pas ui umatandet ra mot kis tomo una inangon.
¹¹ Uni det rop ra det ulabo pas det, din unatino det. Ma osi ra i unatino pasi, din ulabo i.”

¹² Numur o Iesu i watungi tan a Parisi ra i ben pasi sur a inangon lena, “Ra u waninar pas a inangon, gong u ben pas a kum paspasam, ma a kum tistisim, ma a kum kukum, ma a kum tene gongon ra det kis milau nisam. Uni det ri det in ben pas ui ma det in balu i torom ui.
¹³ Ra u waninar pas a inangon, un ben pasi kut a kum sibo na taro, det ra a pinindet i mat, det ra det kaukawar kut, ma a kum pulu.
¹⁴ Ra un pami lenri, un dan. Uni, kalako utna anundet sur det in balu i tam, o God in balu i tam una bung ra a kum tene tokodos det in laun melet.”

A wasiso elelar una labino lukaro (Mt 22:1-10)

¹⁵ Ara tagun det ra det wangon tomo nam o Iesu i longoro a kum wasiso ri, i watungi tano lena, “Det ra det in nangon una lukaro una matanitu anun o God, det dan.”
¹⁶ Ra o Iesu i watungi tano lena, “Ara musano i waninar pas a tarai na lukaro, ma i inanos mugu tar a susut na taro sur det in nanpat.
¹⁷ Ma una bung na lukaro mo, i tulu ru anun a tultul torom det, ra di sa inanos mugu tar det, nama wasiso lenri, ‘Mot in

nan mo urin, uni a kum utna i sa waninar rop.’
¹⁸ Ikut det rop det wasiso batbat det kut. A mugano i watungi kut tano lena, ‘A sa kul tar a du piso. An nan munung sur an tama i. A saring ui sur un madek ru iau mukut.’
¹⁹ Ra ara kai i watungi lena, ‘A sa kul pas a noino karabau. An nan munung sur an lar tar det. A saring ui sur un madek ru iau mukut.’
²⁰ Ma ara kai i watungi lena, ‘Unikutri a nolin, ma kan pet lar pasi sur an nan.’

²¹ “A tultul i millet melet ra i inanos anun a labino una kum wasiso ra. A labino ra, in balano i sungun doko, ra i watungi tan anun a tultul lena, ‘Un nan lakit sur a kum tartarai na kisapi ma a kum natnat na kisapi una tamon, ra un ben pas a kum sibo na taro, det ra a pinindet i mat, a kum pulu, ma det kai ra det kaukawar kut.’
²² Numur a tultul i watungi lena, ‘Labino, a sa pam tar a kum utna rop ra u itula suri, ikut a ramano kum kolo liklik kura utmakai una rumu.’
²³ A labino i watungi tan a tultul lena, ‘Un nan sur a kum tartarai na kisapi ma a kum natnat na kisapi sa ubual, ma un ungonos pas a taro sur det in ruk, sur anung a rumu in bukus wakak.
²⁴ A watungi tamot, katutaio tagun det, ra di sa inanos mugu tar det, in nangon tagun anung a lukaro.’”

A kum wasiso elelar un osi ra i nem na mur o Iesu

(Mt 10:37-38)

²⁵ A labino kunur na taro det wan tomo nam o Iesu. I tupukus torom det ra i watungi lena,
²⁶ “Ra taio i nem na mur iau, ma i nem doko o tamano, o nano, anun a ino, a kum nutnutunu, a kum tistisino ma anun a nilaun kai, ikut anun a marmaris torom iau ken labo taun anun a marmaris torom det ri, i awu sur anung a nat na ususer.
²⁷ Ma osi ra ke los pas anun in nanai kutus ma i mur iau, ken pet lari sur in nanpat anung a nat na ususer.

²⁸ “Ra taio tagun mot i nemi sur in pam tu tarai na rumu, in kis munung ra in pam mugu pas a matan a rumu rop, sur in tasmani ra anun a mani in elar sur in urop pasi, o awu.
²⁹ Sako in utur kibin tari kut a rumu, ma ken urop lar pasi. Ra a taro rop ra det in tama i, det in urongon laulau uni,
³⁰ ra det in watungi lena, ‘A musano ri i utur kibin tari kut a rumu, ikut ke urop lar pasi.’

³¹ “Ra tu king tomo nama noino arip na taro na inaim anunu in nan una inaim tomo nam ara king gisen kai ra anun aru noino arip na taro na inaim, i wakak sur in kis ma in nuknuk mugu pas lena, pepetlai, det topas aru noino arip na taro o awu.

³² Ra awu, in tulu ru anun a kum tultul sur det in ukodos a wasiso tomo nama king sur a malmal, ra det bakbak utmakai. ³³ Lenkutkai ra torom mot, ra taio tagun mot ken madek ru anun a kum utna rop, i awu sur anung a nat na ususer.

*A sol ra ke topas tu utna
(Mt 5:13; Mk 9:50)*

³⁴ “A sol i wakak, ikut ra a makasmanino i sa rop, din unakasman meleti mo pepetlai? ³⁵ Ke topasi sur din ubeki una kinobot ma ken uwakaki kai a piso, din woro ru i mukut. Osi ra arin talngano kura, i wakak sur in longoro nami.”

15

*A wasiso elelar un ara sipsip ra i raro
(Mt 18:12-14)*

¹ Ara bung a kum tene los takis ma a kum tene sakino det wan torom o Iesu sur det in longoro i. ² Ikut a kum Parisi ma a kum tene ususer tagun a Warkurai det ururai un o Iesu lena, “A musano ri, i lason kut tomo nama kum tene sakino, ma i wangon tomo nam det.”

³ Ra o Iesu i watung a wasiso elelar tandet lena: ⁴ “Ra taio tagun mot anunu tu mar na sipsip, ma ara tagun det in raro. Pepetlai, ken nan pas gusun a lisu na noino ma lisu tiro una nubual ra det wangon iai, ma in sisio sur ara ra i raro, tuk ra in sio melet pasi? ⁵ Ra i sa sio pasi, in ubek pasi unin kabaran, ra in nan nama gasgas. ⁶ In millet melet nami, ra in kabo tomo pas a kum paspasano ma det ra det kis milau, ra in watungi tandet lena, ‘Dat in gas, uni a sa sio melet pas anung a sipsip ra i raro.’ ⁷ A watungi tamot, i lenkutkai ra sapat una langit, a gasgas una tene sakino ra i nukpukus in labo taun a gasgas una lisu na noino ma lisu ra det sa tokodos, ma ka det in nukpukus melet.

A wasiso elelar un ara mani ra i raro

⁸ “Ra tu ino anunu tu noino mani, ra i sa ban raro ru ara. Pepetlai, ken ungangon pas a lam, ra in surupu a rumu, ma in sisio wakak ut suri, tuk ra in sio melet pasi? ⁹ Ra i sa sio pasi, in kabo tomo pas a kum paspasano ma det ra det kis milau, ra in watungi tandet lena, ‘Dat in gas, uni a sa sio melet pas ara mani ra a ban raro tari.’ ¹⁰ A watungi tamot, i lenkutkai ra a gasgas epotor nisan a kum ensel anun o God un ara tene sakino ra i nukpukus.”

A wasiso elelar una musano aru nutnutunu

¹¹ O Iesu i watungi lena, “Ara musano aru nutnutunu, aru nat musano. ¹² A murmur

i watungi tan o tamano lena, ‘Tita, un pitar tar anung a tinibo tagun anum a kum ululeng.’ Ra a tamander i isuaro tar anun a kum ululeng tander. ¹³ A iso bung bat tari kut, a murmur i ubek tomo pas anun a ululeng rop, ra i wan sur a tamon bakbak, ma i urop ru anun a ululeng una ngas na nilaun ra ke wakak. ¹⁴ Ra i sa urop ru a ututna, a labino munurak i wanpat una tamon ra, ra i murak mo. ¹⁵ Ra i wan, ma i papam torom ara musano tagun a tamon ra. Ra a musano ra i tulu tari una nun in noworo na boro sur in tamtabor det. ¹⁶ I nemi sur in nan a kum pinino bin ra a kum boro det wanani sur in masur, ikut katutaio i tabori.

¹⁷ “Ra a wakak na nuknuk i wanpat melet toromi, i watungi lena, ‘A kum tultul rop anun o tita det wangangon ma det masmasur pas kut gusun a kum utna. Ikut iau, kuri a mat nama munurak! ¹⁸ Uniri an katuttur pas ra in millet melet sur o tita. An watungi tano lena, ‘Tita, a sa pam tar a sakino petutna torom o God ma torom ui kai. ¹⁹ Iau ka wakak mo sur un watung iau a nutumlik. Un ubek tar iau mukut sur an elar nam ara tagun anum a kum tultul.’ ²⁰ Ra i katuttur pas ma i wan sur o tamano.

“Ra i bakbak utmakai, o tamano i sa tama pasi, ra in balano i tupukus nami. I kalabor toromi, i tal pasi ra i gom a wano. ²¹ Ra o nutunulik i watungi tano lena, ‘Tita, a sa pam tar a sakino petutna torom o God ma torom ui kai. Ka wakak mo sur un watung iau a nutumlik.’ ²² Ikut o tamano i watungi tan anun a kum tultul lena, ‘Aiapiapi! Mot in los lakit tin namalu ra i wakak doko urin, ma mot in upipis tari nami. Mot in ubek tar a ring una lamano, ma mot in pas tari kai aru su un aru kikino. ²³ Mot in nan, ma mot in dat pas tu barman na bulumakau ra i butbut urin, mot in um doko pasi, sur dat in nangon ma dat in gas tomo. ²⁴ Uni o nutunglik ri i sa mat, ma uniri i sa laun melet, i raro pas ma uniri i sa wanpat melet.’ Ra a lukaro i turpasi.

²⁵ “Una bung ra a mugano nutunulik, i kis ut tiro una kinobot. Ra i wanpat tiro utamon milau a rumu, i longoro a tinangis na kaur ma a kelekele na nilagor, ²⁶ ra i kabo pas ara tultul, ra i tingi una kum utna ri. ²⁷ Ra a tultul i inanos i lena, ‘O tisimlik i sa wanpat, ra o tamam i um doko pas a barman na bulumakau ra i butbut, uni der tamtama tomo melet, nama wakak na nilaun.’ ²⁸ Ra o tisino a mugano i kankan, i putut kut, ke nemi sur in ruk. Ra o tamano i pirso toromi, ra i umaromi. ²⁹ Ikut i watungi tan o tamano lena, ‘Tama i! A susut na kilalo a sa papam torom ui elar

nama tultul, ka rosumur una num a kum itula, ikut ko tabor tar iau mukut nam tu nat na memelik, sur met in gas tomo nama kum paspasang. ³⁰ Ikut ra a nutumlik ri i wanpat, i ra i ban laulau ru anum a kum utna una kum pamuk na ino, u um doko pasi ut a barman na bulumakau ra i butbut suri.’ ³¹ Ra o Tamano i balu i lena, ‘Nutunglik, ui kuri ut u kis nisang, ma anung a kum ululeng rop, anumi ut. ³² I wakak sur dat in gas ma dat in nangon, uni o tisimlik ri i sa mat ma uniri i sa laun melet, i raro pas, ma uniri i sa wanpat melet.’ ”

16

A wasiso elelar una tene tamtamabat ra i mananos

¹ O Iesu i watung meleti tan anun a taro na ususer lena, “Ara tene gongon anun ara tultul i tamtamabat anun a kum utna, ra di takuni lena i papam oros kut una kum utna anun a tene gongon ra. ² I kabo pasi, ma i tingi lena, ‘Asau ra a longoro i un ui? Un tumus a wasiso talapor una num a pinapam na tamtamabat ma un pitari tang, uni kon tene tamtamabat melet mo anungi.’ ³ Ra a tene tamtamabat ra i nuki lena, ‘Asau mo ra an pami uniri, ra anung a mugumugu in rakon ru iau gusun a pinapam ri? Kalako dekdeking sur an kikir, ma an maimai kut kai ra an saring utna. ⁴ O! A sa nuk pas ara utna ra an pami, sur a taro det in gas pas iau una nundet a kum rumu, ra di sa lu ru tar iau gusun a pinapam ri.’

⁵ “Ra i itula sur det rop taktakai ra det sa dinau pas tan anun a mugumugu. Ra i ting a mugano musano lena, ‘A iso ra u dinau pasi tan anung a mugumugu?’ ⁶ Ra i balu i lena, ‘Ara mar na lamlabino koto na wel na oliw.’ Ma a tultul i watungi lena, ‘Un los anum a buk na dinau urin. Un kis ma un tumus lakit tar a limo na noino mukut uni.’ ⁷ Ra i tingi bulung ara, ‘A iso ra u dinau pasi?’ Ra i balu i lena, ‘Ara mar na bek na wit.’ Ra i watungi tano lena, ‘Un los anum a buk na dinau urin. Un tumus tari mukut a tiwal na noino uni.’

⁸ “Anun a labino i tasmani lena a tultul ri ke lingmulus una nun a pinapam, ikut i watung ulabo pasi kibino una nun a mananos ra i pam a torotoro ri nami. Uni a taro tagun a rakrakon bual, det mananos doko sur anundet a pinapam tomo nama taro tagun a rakrakon bual, ikut a taro tagun a talapor ka det mananos. ⁹ A watungi tamot, mot in umarom pas lako taro nama kum ululeng taginin upiso. Numur ra a kum

ululeng ken gas mo sur tu utna, din gas pas mot sur mot in kis una kum rumu ra det in tur tukum.

¹⁰ “Osi ra i lingmulus una nat na utna kut, in lingmulus kai una kum lamlabino utna, ma osi ra ke lingmulus una nat na utna, ken lingmulus utkai una kum lamlabino utna. ¹¹ Ra ka mot lingmulus sur mot in papam wakak nama kum utna taginin upiso, osi kai in nurnur un mot sur mot in papam wakak nama kum utna tagisapat netes? ¹² Ra ka mot tamtama wakak taru un tu utna anun taio, osi kai in pitar tar anumot tu utna torom mot? ¹³ Katu tultul in pet lar pasi sur in papam torom lako ru mugumugu. In nget ara pasander, ma in nem ara pasander, in nem doko ara ma in rosumur gusun ara. Ka mot in papam lar pas torom o God ma torom a mani kai.”

A kum Warkurai anun o God ken rop (Mt 5:31-32; 19:9; Mk 10:11-12)

¹⁴ A kum Parisi det longoro a kum wasiso ri, ra det urongon laulau kut un o Iesu, uni det nem doko a mani. ¹⁵ Ra o Iesu i watungi tandet lena, “Mot, mot ukodos pas mot kut umatan a taro. Ikut o God i tasman a balamot. Uni a utna ra i labo doko umatan a taro i laulau doko umatan o God.

¹⁶ “A kum Warkurai ma a kum etowo anun a kum poropet i tuk taru ut un o Jon. Turpasi una kilalo ra, di warawai nama Wakak na Wasiso una matanitu anun o God ma a taro rop det raras sur det in ruk uni. ¹⁷ Ke ngangitin sur a bakut ma a rakrakon bual der in rop, ikut i ngangitin doko sur tu nat na tumtumus lik in rop gusun a kum Warkurai anun o God.

¹⁸ “Osi ra in lu ru anun a ino ma in nolin melet nam tu ino, a musano ra i pam a sakino torom anun a ino, uni i nolin melet nama se ino. Ma osi ra in nolin nam tu ino ra anun a musano i lu ru i, i kai i pam a sakino, uni awu sur a ino anunu.

O Lasarus ma a tene gongon

¹⁹ “Ara tene gongon, i ser emar nama kum wakak na malu, ma i ser wangon wakak una kum bung rop. ²⁰ Di inep tar ara musano, a nat na soi, a tene sasaring, tiro umatansako tano, a risano o Lasarus, a pinpinino i wangangon. ²¹ I nemi sur in nan a kum mumumut na utna ra det puku taru gusun a kabulu na inangon anun a tene gongon. Ma a kum pap det ser dami kai a kum inangon una pinpinino.

²² “Numur a nat na soi ra i mat, ra a kum ensel det los pasi ma det ukis tari upaporin o Abaram. Ra a tene gongon bulung i mat, ma di por ru i. ²³ I kis una labino sungun, i taramo a labino ngunungut. I

tatado usapat netes, ra i tama o Abaram i bakbak doko, ma o Lasarus kai kura una paporino. ²⁴ Ra i kakabo lena, "Tita Abaram, un maris iau, un tulu ru o Lasarus sur in puk pas in kaskas na lamano una danim sur in ukotokoto tar in karmeng nami, uni a taramo a labino ngunungut nin una sungun.'

²⁵ "O Abaram i balu i lena, 'Nutunglik, un nuk pasi, ra u laun utmakai, in pam ukai anum a kum wakak na utna, lenkutkai ra torom o Lasarus, i pam ukai a kum laulau na utna. Ikut uniri i utur ukai a gasgas nin, ma ui, u taramo a labino ngunungut. ²⁶ Ma ara utna kai, in tarai nin nala kuri epotor tamot ma met. Katutaio taginin in pet lar pasi sur in nan utiro torom mot, ma katutaio kai in nan tagitiro gusun mot urin torom met.'

²⁷ "Ra a tene gongon i watungi lena, "Tita, a saring ui sur un tulu ru o Lasarus sur a rumu anum o tamang. ²⁸ Uni a limo na tistising a kum musano kura det uni, ma in utumarong tar det, sako det bulung det in nan urin una nubual na ngunungut ri.' ²⁹ Ra o Abaram i balu i lena, 'A wasiso anum o Moses ma a kum poropet kura i kis torom det. I wakak sur 'det in longoro i.' ³⁰ A tene gongon i watungi lena, 'Awu, Tita Abaram, ra ut ra taio tagun a kum minat in nanpat torom det, det in nukpukus.' ³¹ Ra o Abaram i balu meleti lena, 'Ra ka det longoro o Moses ma a kum poropet, ra taio kai in katutur melet gusun a minat, ken ukatutur pas anundet a nurnur.'

17

A sakino petutna

(Mt 18:6-7, 21-22; Mk 9:42)

¹ O Iesu i watungi tan anum a taro na ususer lena, "A kum utna in nanpat ut, ra in upuku a taro una sakino, ikut in laulau doko torom o naro ra i pam pat pasi. ² Gunuk ra di sa kubus tar tu labino wat unin kabarano, ma di sa woro murung tari usa utasi, in wakak toromi, sako in ben raro ara tagun a kum nat liklik ri* un tu sakino, ra kura numur in los a labino warkurai.

³ "Mot in tumarong mot! Ra o tisimlik i pam a sakino, un wasiso dekdek toromi, ma ra i sa nukpukus, un dumano ru anum a sakino. ⁴ Ra i pam a sakino torom ui a wonom mawit na dino un ara bung, ma i wan torom ui a wonom mawit na dino ma i watungi tam lena, 'A sa pam tar a sakino

torom ui. Uniri a nukpukus,' un dumano ru anum a sakino."

A nurnur

⁵ A kum aposel det watungi torom a Labino lena, "Un ulabo pas anumet a nurnur." ⁶ Ma a Labino i watungi lena, "Ra anumot a nurnur in natino elar namin pitino mastad, mot in pet lar pasi sur mot in watungi tan in nanai ri lena, 'Un taragot, ma un tur sa utasi,' in muri kut anumot a wasiso.

A pinapam anum a tultul

⁷ "Ra taio tagun mot anum a tultul i papam pas tiro ukinobot, o i tamtamabat tar a kum sipsip, ra i wanpat tagisa usual, pepetlai, un watungi mut tan anum a tultul lena, 'Un nan urin, un kis ma un nangun?' Awu. ⁸ Un watungi tano lenri, 'Un emar pas, un waninar anga utna na inangon, ma un tabor iau, ra an nangun ma an inum. Ra numur ui bulung un nangun ma un inum.' ⁹ Pepetlai, a mugumugu in watung wakak torom a tultul ra i tarom toromi? Awu, uni anum a pinapam utra. ¹⁰ Lenkutkai ra torom mot, ra mot sa pam sot pas a kum utna di pitar tari tamot, mot in watungi lena, 'Met a kum tultul oros kut, met pami kut anumet a pinapam.' "

O Iesu i ulangolango pas a noino lepra

¹¹ Ra o Iesu i wan nanan usapat o Jerusalem, i wan epotor tan aru papor Samaria ma o Galili. ¹² I ruk una matansako ina tamon, ma det etorom nama noino musano ra det misait nama lepra. Det tur bakbak taru ut, ¹³ ma det kakabo dekdek lena, "Iesu, a Labino, un maris met." ¹⁴ Ra o Iesu i tama det, i watungi tandet lena, "Mot in nan, ma mot in ese tar mot torom a kum tene etabor torom o God†." Ra det wan nanan, det langolango mut. ¹⁵ Ara tagun det i tama i lena i sa langolango, i milet melet, ma i watung ulabo pas o God namin labino walngano. ¹⁶ Ma i kis but keke nisan aru kikin o Iesu ra i watung wakak toromi. A musano ra, a te Samaria. ¹⁷ O Iesu i tingi lena, "Pepetlai, ka di ulangolango pas a noino rop? A lisu kai awai det mo? ¹⁸ Ilai ra katutaio i milet melet sur in watung ulabo pas o God? Ikut a usirolik ri." ¹⁹ Ra i watungi tano, "Un katutur, ma un nan. Anum a nurnur i sa ulangolango pas ui."

A inawan pat anum a matanitu anum o God

(Mt 24:23-28, 37-41)

* **17:2:** A wasiso Grik i lena "a kum natnatino", a kukuraino lenri: a kum nat liklik, o det ra anundet a nurnur ke dekdek, o det ra a taro det tama pisopiso det. **17:3:** Mt 18:15 **17:6:** Mt 17:20; 21:21 **17:13:** Wkp 13:45-46

17:14: Wkp 14:2-3; Jn 3:3; 18:36 † **17:14:** A ngasino anum a kum Juda i lenri: Osi ra a misait i rop gusuni, in nan in ese i torom a tene etabor torom o God, sur a tene etabor in tama i ra in upuaso i lena i sa langolango.

²⁰ A ramano kum Parisi det ting o Iesu lena, “Nangisin a matanitu anun o God in nanpat?” Ra i balu det lena, “A matanitu anun o God ken nanpat nama kum ukinalong ra din tama i. ²¹ Ma ka din watungi lena, ‘Iri mi!’ o, ‘I mo ra i!’ Uni a matanitu anun o God kura ut un mot.”

²² O Iesu i watungi tan anun a kum nat na ususer lena, “A du bung in nanpat ra mot in nemi sur mot in tama tar a bung tagun a kum bung anun a Nutun a Musano, ikut ka mot in tama i. ²³ Lako taro det in watungi tamot lena, ‘Tama i, i mo ra i!’ o, ‘Kuri i nin!’ Gong mot mur tar det. ²⁴ Uni una bung ra a Nutun a Musano in nan pat, a taro rop det in tama i. In elar namin nememe, ra i meme i tagitong un ara papor maino, tuk un ara papor kai. ²⁵ Ikut a Nutun a Musano in taramo mugu a susut na ngunungut, ma a taro tagun uniri det in rosumur gusuni.

²⁶ “A kum bung anun a Nutun a Musano in elar nama kum bung anun o Noa. ²⁷ A taro det wangon, det inum, ma det unolin det, tuk una bung ra o Noa i kas una sip, ra in nabato i puku ma in nolomom i wanpat ma det iru rop. ²⁸ Lenkutkai ra una kum bung anun o Lot. A taro det wangon, ma det inum, det kukul, ma det siuru, det marut utna, ma det pam rumu. ²⁹ Ikut una bung ra o Lot i wan gusun a tamon Sodom, a sungun ma a salfa i puku tagisapat una bakut elar namin nabato, ra det rop det iru uni.

³⁰ “In lenkutkai ra una bung ra a Nutun a Musano in nanpat puaso uni. ³¹ Una bung ra, ra taio in kis sapat netes una nun a rumu, gong i pirso sur in los pas anun a kum ututna tagisa urumu. Lenkutkai, ra taio in kis sa ukinobot, gong i milet melet unago utamon sur tu utna. ³² Mot in nuk pas a ino anun o Lot. ³³ Osi ra i nem doko i sur in maris bat anun a nilaun, in iru. Ikut osi ra ke maris bat anun a nilaun, in laun. ³⁴ A watungi tamot, una bung na mirum ra, ra lako ru der in inep un ara bat, din los pas tu pasander kut, ma ara pasander awu. ³⁵⁻³⁶ Ra lako ru ino kai der in papam tomo u gino a wit sur in nanpat a palawa, din los pas tu pasander kut, ma ara pasander awu.”[†] ³⁷ Ma a kum nat na ususer det tingi lena, “Labino, a kum utna ri in nanpat awai?” Ra i balu det lena, “A nubual ra a minat i inep uni, a kum kotkot det in nan tomo iai.”

18

A wasiso elelar una ula ma a tene

17:23: Mk 13:21; Lk 21:8 **17:28:** Stat 18:20; 19:25 **17:31:** Mt 24:17-18 **17:33:** Lk 9:24 [†] **17:35-36:** Una ramano kum du buk una wasiso Griik, a ramano kum wasiso kai i kis una vers ri. I lenri: *Ra lako ru musano der in papam sa ukinobot, din los pas tu pasander kut, ma ara pasander awu.* **18:1:** Kol 4:2; 1 Tes 5:17 **18:12:** Ais 58:2-3; Mt 23:23 **18:13:** Sng 51:1 **18:14:** Mt 23:12

warkurai

¹ O Iesu i watung a wasiso elelar torom anun a kum nat na ususer sur in ese det lena, det in wararing bolbolos, ma gong a pinindet i ngoro. ² I watungi lena, “Ara tene warkurai i kis una ara tamon, ke ngara sur o God, ma ke nuk pas a taro kai. ³ Ara ula tagun a tamon ra, i wan liklik mukut toromi, ma i ser saringi lena, ‘Un ukodos tar iau tomo nama nung a ebar una numir a maut.’ ⁴ I sa suano i ma ke mulaot tano, ra numur i nuki lena, ‘A lingmulus, ka ngara sur o God, ma ka ser nuk pas a taro, ⁵ ikut, an tama i sur an ukodos a ula ri, uni i utikidis liklik iau, sako in ungoro iau nama inawan pat liklik nin.’”

⁶ A Labino i watungi tan a kum nat na ususer lena, “Mot in longoro a wasiso anun a tene warkurai ra ke lingmulus una nun a pinapam. ⁷ Pepetlai, o God ken ukodos anun a taro na pipilok, ra det tangis toromi una kum waspi ma una kum mirum kai? Pepetlai, ken warut lakit det? ⁸ A watungi tamot, in ukodos lakit det. Ikut, ra a Nutun a Musano in nanpat, pepetlai, in etorom pas lako taro ut nin upiso ra det nurnur ni o awu?”

A wasiso elelar una Parisi ma a tene los takis

⁹ O Iesu i watung a wasiso elelar ri torom det ra det nurnur ut un det lena, det a kum tene tokodos, ma det tama pisopisa a taro rop. ¹⁰ “Aru musano der wan usapat una rumu na etabor sur der in wararing. Ara pasander a Parisi, ma ara pasander kai a tene los takis. ¹¹ A Parisi i tur ma i wararing suri ut lenri, ‘God, a watung wakak torom ui, uni ka elar nam ara taro kai, a kum tene wolong, det ra ka det tokodos, ma det ra det pam a sakino nam tu ino anun taio o nam tu musano anun taio, ma ka elar kai nama tene los takis iri i. ¹² A ser wewel aru bung un ara wik, ma a ser pitar arara utna tagun ara noino utna ra a pam pat pasi.’ ¹³ Ikut a tene los takis i tur gisen taru, ke tatado usapat netes una langit, uni i maimai. I raprapusi kut a romrobono nama tupunuk, ma i watungi lena, ‘God, un maris iau, a tene sakino iau.’ ¹⁴ A watungi tamot, a musano ri, ra i milet melet sur anun a rumu, i sa tokodos umatan o God, ma ara pasander awu. Uni det rop ra det ulabo pas det, din unatino det. Ma osi ra i unatino pasi, din ulabo pasi.”

Det turbat a kum nat liklik gusun o Iesu (Mt 19:13-15; Mk 10:13-16)

¹⁵ A taro det los a kum nat liklik torom o Iesu sur in ubek aru lamano sapat netes un det. Ra a kum nat na ususer det tama i lenra, det turbat det. ¹⁶ Ikut o Iesu i kabo pas a kum nat liklik toromi, ra i watungi lena, “Mot in madek ru a kum nat liklik sur det in nan torom iau. Gong mot turbat det, uni a matanitu anun o God anundet ra det lenri. ¹⁷ A inanos mot nama lingmulus, osi ra ken ruk una matanitu anun o God elar nama natlik, ken ruk lar pas.”

A tene gongon
(Mt 19:16-30; Mk 10:17-31)

¹⁸ Ara mugumugu i ting o Iesu lena, “Wakak na Tene Ususer, asau ra an pami sur an rakon a nilaun tukum?” ¹⁹ O Iesu i balu i lena, “Sur asau ra u watung iau a wakak? Katutaio i wakak, o God sot kut. ²⁰ U tasman a kum Warkurai: ‘Gong u pam a sakino nam tu ino anun taio o nam tu musano anun taio, gong u um doko taio, gong u wolong, gong u etakun torotoro, un ru o tamam ma o nam.’” *Kis 20:12-16*
²¹ A musano ra i balu i lena, “Turpasi ra a natlik utmakai tuk uniri, a ser mur a kum Warkurai rop ri.” ²² Ra o Iesu i longoro i, i watungi tano lena, “Ara utna mukut ra kabaut u pami. Un siuru ru anum a kum utna rop, ra a mani taguni, un tabor a kum sibo na taro nami. Ra un pami lenra, anum a wakak na ululeng kusapat una langit. Numur un nan urin ma un mur iau.”

²³ Ra i longoro a wasiso ri i tupunuk doko, uni i a tene gongon sakit. ²⁴ O Iesu i tama i, ra i watungi lena, “I ngangitin doko torom a kum tene gongon sur det in ruk una matanitu anun o God. ²⁵ In ngangitin sur a kamel in ruk una mato na sur na susuk, ikut, i ngangitin doko ut, sur a tene gongon in ruk una matanitu anun o God.”

²⁶ Ra det longoro a wasiso ri, det iting lena, “Ra i lenra, osi mo ra din ulauni?” ²⁷ O Iesu i balu det lena, “Asau ra a taro ka det pet lar pasi, o God in pet lar pasi.”

²⁸ O Pita i watungi tano lena, “Tama i, met sa wan gusun anumet a kum utna rop, ra met mur ui.” ²⁹ O Iesu i watungi tandet lena, “A inanos mot nama lingmulus: Ra taio in nan gusun anun a rumu, o gusun anun a ino, o a kum tistisino, o gusun o nano, o gusun o tamano, o a kum nut-nutunu, kibino una matanitu anun o God, ³⁰ una nilaun ri, din tabori nama susut na utna lenri ra i sa wan pas gusuni. Ma una nilaun numur din tabori nama nilaun tukum.”

O Iesu i mantulu wasiso una nun a minat
(Mt 20:17-19; Mk 10:32-34)

³¹ O Iesu i ben gisen pas anun a noino ma aru nat na ususer, ra i watungi tandet lena, “Tama i, iri dat wan nanan usapat o Jerusalem, ma din pam sot pas a kum utna rop ra a kum poropet det sa tumus tari una Nutun a Musano. ³² Uni din pitar tari torom det ra awu sur a taro Juda. Det in urongon laulau uni, det in ban laulau i, det in ibisi, det in mirasi, ma det in um doko i. ³³ Ra a tulu bung in rop, in katuttur melet.” ³⁴ A kum nat na ususer ka det talapor una kum utna rop ri. A kukuraino kura i parau, ma ka det tasman asau ra o Iesu i wasiso uni.

O Iesu i utamtama pas a pulu
(Mt 20:29-34; Mk 10:46-52)

³⁵ Ra o Iesu i wan milau o Jeriko, ara musano a pulu i kis taru una papor ina kisapi, i ser saring utna. ³⁶ I longoro a kunur na taro det wan nanan milau, ra i iting lena, “Asau ra?” ³⁷ Ra det inanos lena, “O Iesu a te Nasaret ri i wan sakit dat.” ³⁸ Ra i kakabo sapat lena, “Iesu, a Nutun o Dewid, un maris iau.” ³⁹ Det ra det mugu, det turbati sur in kis wowowon. Ikut i kakabo dekdek makai usapat lena, “Nutun o Dewid, un maris iau.” ⁴⁰ O Iesu i tur sikot, ra i itula sur din ben pasi toromi. Ra a pulu i sa wan milau i, i tingi lena, ⁴¹ “Asau ra u nemi sur an pami un ui?” I balu i lena, “Labino, a nemi sur an tamtama.” ⁴² Ra o Iesu i watungi tano lena, “Un tamtama! Anum a nurnur i sa utamtama pas ui.” ⁴³ Uniuira i tamtama, i mur o Iesu, ra i watung ulabo pas o God. Ma a taro rop kai ra det tama i, det watung ulabo pas o God.

19

O Iesu ma o Sakias

¹ O Iesu i ruk utiro una tamon Jeriko, sur in nan sakit usapat o Jerusalem. ² Ra ara musano i kis tiro iai, a risano o Sakias, a mugumugu anun a kum tene los takis, ma i a tene gongon. ³ I nemi sur in tama o Iesu, ikut o Sakias a kukur na musano kut, ma ke pet lar pasi sur in tama i, kibino una kunur na taro. ⁴ Ra i kalabor usa numugu, ra i ka toto unin nanai, sur in tama o Iesu, uni in nan sakit una kisapi ra.

⁵ Ra o Iesu i wanpat tiro iai, i tatado usapat netes unin nanai, ra i watungi tano lena, “Sakias, un pirso lakit urin. Uniri an kis tomo nam ui una num a rumu.” ⁶ Ra i pirso lakit, ra i ben pas o Iesu utiro una nun a rumu nama gasgas. ⁷ A taro rop det tama i, ra det ururai uni lena, “A musano ri i wan sur in kis tomo nama tene sakino una nun a rumu.”

⁸ O Sakias i tur ra i watungi tan a Labino lena, "Tama i, Labino, ara kukur utna tagun anung a ululeng an tabor a kum sibo na taro nami. Ra a sa toro pas lako utna tan taio, an balu meleti toromi a wat na dino." ⁹ Ra o Iesu i watungi tan o Sakias lena, "Uniri, di sa ulaun pas det ra det kis una rumu ri, uni o Sakias kai tagun a kum tumtubun o Abaram." ¹⁰ Uni a Nutun a Musano i wanpat sur in sisio sur det ra det raro ma in ulaun pas det."

A wasiso elelar una kum tultul ra di pitar tar a mani torom det
(Mt 25:14-30)

¹¹ A taro det longoro a kum wasiso ri, ra det nuki lena a matanitu anun o God in nanpat lakit, uni o Iesu i sa milau o Jerusalem. Ra i watungi kai ara wasiso elelar ¹² lena, "Ara mugumugu i wan sur ara tamon bakbak, sur din mulaot tari sur in king, ra numur in milet melet." ¹³ Numugu tan anun a inawan, i kabo pas anun a noino tultul toromi, ra i pitar tar ara noino mani tandet, ra i watungi lena, 'Mot in ulabo i, tuk ra an milet melet.' ¹⁴ Ikut a taro tagun anun a tamon det ngeti, ra det tulu ru ara taro sur det in muri, ma det watungi lena, 'Ka met nem a musano ri sur in king anumet.'

¹⁵ "Ra di sa ukis tari sur in king, i milet melet. I itula sur anun a kum tultul ra i pitar tar a mani tandet, sur in mananos un asau ra i sa wanpat una anundet a pinapam." ¹⁶ Ma a mugano i wan toromi ra i watungi lena, 'Labino, a sa ulabo melet pas a noino tagun anum a mani.' ¹⁷ I balu i lena, 'Wakak sakit, ui a wakak na tultul! An ubek tar ui sur un tamtamabat a noino lamlabino tamon, uni u lingmulus una nat na utna.' ¹⁸ Ara bulung i wan toromi ra i watungi lena, 'Labino, a sa ulabo melet pas a limo tagun anum a mani.' ¹⁹ Ra i balu i lena, 'Ui kai un tamtamabat a limo na lamlabino tamon.' ²⁰ Ma ara tultul bulung i wan toromi ra i watungi tano lena, 'Labino, anum a mani i melet mo ri, a pulus tari namin namalu ra a ubek eno wakak tari.' ²¹ A ngaran ui, uni ui a tene ngalngalia. U los a utna ra awu sur u ubek tari, ma u ser pasong pas a utna ra ko marut tari.' ²² A labino i watungi tano lena, 'Ui a laulau na tultul, an warkurai ui elar nama num a wasiso ut. U sa tasman tari lena iau a tene ngalngalia. A ser los a utna ra awu sur a ubek tari, ma a pasong a utna ra ka marut tari.' ²³ Ilai ra ko ubek tar anung a mani una beng sur an los pas anung a mani ma tu sibano kai una bung ra an nanpat uni?"

²⁴ "Ra i watungi tandet ra det tur milau taru tiro iai lena, 'Mot in los ru a mani gusuni, ma mot in pitar tari torom o naro ra anun ara noino.' ²⁵ Ma det watungi tano lena, 'Labino, i anun ara noino kura mo tano.' ²⁶ I balu det lena, 'A watungi tamot, osi ra a susut kura tano, din tabor meleti nama susut. Ikut osi ra kalako, din rakon ru i utkai asau lik ra kura tano."

²⁷ "Ra mot in ben pas anung a kum ebar ra ka det nemi sur an king anundet, mot in um doko det nin ut umatang.'"

O Iesu i wan usapat o Jerusalem elar nama king

(Mt 21:1-11; Mk 11:1-11; Jn 12:12-19)

²⁸ Ra o Iesu i sa watung tar a wasiso elelar ri, i mugu melet usapat o Jerusalem. ²⁹ Ra i wan milau o Betpage ma o Betani una tangai di watungi nama Tangai na Oliw, i tulu aru tagun anun a kum nat na ususer, nama wasiso lenri, ³⁰ "Mur in nan sur a tamon kusa numugu tamur. Ra mur in nanpat, mur in tama ara barman na dongki kura di sa ker ukai tari, ma katutaio utmakai i kas taru uni. Mur in palos pasi ma mur in beni urin." ³¹ Ra taio in ting mur lena, 'Mur palosi sur asau?' mur in watungi tano lena, 'A Labino i nemi.'"

³² Der wan ra der pastorom a kum utna rop ra o Iesu i sa watung tari tander. ³³ Ra der palos pas a barman na dongki, det ra anundet a dongki, det ting der lena, "Ai, mur palos a barman na dongki ra sur asau?" ³⁴ Der balu det lena, "A Labino i nemi." ³⁵ Der beni torom o Iesu, ma der rakon ru anunder aru saket, ma der ubek tari netes una barman na dongki ma der ukis tar o Iesu netes uni. ³⁶ Ra i wan nanan, ara taro det rakon ru anundet a kum saket, ma det talaso i una kisapi. ³⁷ Ra i sa milau una kisapi ra i wan pirso una Tangai na Oliw, a labino gasgas i los a taro na ususer rop ma det watung ulabo pas o God una kum utna na ukisin ra det sa tama i. Det watung ulabo pasi nama labino walngandet lena,

³⁸ "A king ra i wanpat nama risan a Labino i dan! Sng 118:26

A malmal sapat netes una langit, ma a minamar sapat netes sakit!"

³⁹ A ramano kum Parisi epotor una kunur na taro ra, det watungi lena, "Tene Ususer, un turbat anum a taro na ususer."

⁴⁰ Ra o Iesu i balu det lena, "A watungi tamot, ra a taro ri ka det in ugaia, a kum watat ut det in kukukuk."

O Iesu i tangis sur o Jerusalem

⁴¹ Ra o Iesu i sa milau o Jerusalem ra i tama i, i tangis suri, ra i watungi lena, ⁴² “Gunuk ra uniri, mot sa tasman tar a kisapi ra i topas a malmal! I parau umata-mot! ⁴³ Tu bung in nanpat, ra anumot a kum ebar det in utur in noworo talilis bat anumot a tamon, det in tur talilis mot ma det in turbat anumot a kum kisapi na rukruk ma pispiso, ma det in um mot gusun a kum paporino. ⁴⁴ Ma det in rege ginogino ru a tamon, ma det in um doko mot kai ra mot kis uni. Ma ka det in madek tar tu wat in inep netes un tu wat, uni ka mot tasman lele a du bung ra o God i wanpat uni torom mot.”

O Iesu i ruk una rumu na etabor
(Mt 21:12-17; Mk 11:15-19; Jn 2:13-22)

⁴⁵ O Iesu i ruk unin noworo ina rumu na etabor, ra i lu pirso ru a taro ra det siuru. ⁴⁶ Ra i watungi tandet lena, “Di sa tumus tari una Buk Tabu lenri, ‘Din watung anung a rumu nama rumu na niaring.’ *Ais 56:7* Ikut, mot sa pukus pasi sur in elar mukut nama ‘nubual na parparau anun a kum tene wolong.’” *Jer 7:11*

⁴⁷ Una kum bung rop, o Iesu i ser ususer a taro ubalan in noworo ina rumu na etabor. Ikut a kum lamlabino tene etabor torom o God, ma a kum tene ususer tagun a Warkurai ma a kum mugumugu anun a taro, det nuknuk sur tu kisapi sur det in um doko i uni. ⁴⁸ Ikut det lagano nuknuk taru sur tu utna ra det in pami, uni a labino kunur na taro det nem doko i sur det in longoro a wasiso anun o Iesu.

20

Det ting o Iesu una dekdek ra i ser papam nami

(Mt 21:23-27; Mk 11:27-33)

¹ Ara bung o Iesu i ususer a taro ubalan in noworo ina rumu na etabor, ma i warawai nama Wakak na Wasiso, ra a kum lamlabino tene etabor torom o God, ma a kum tene ususer tagun a Warkurai tomo nama kum mugumugu det wan toromi. ² Ra det watungi tano lena, “Un inanos met, asi na ngas na dekdek ra u pam a kum utna ri nami? Osi ra i pitar a dekdek ri tam?” ³ O Iesu i balu det lena, “Iau kai an ting mot nam ara iting. Mot inanos iau. ⁴ Tagai a dekdek ra o Jon i baptaiso a taro nami? Tan o God, o tan a taro kut?” ⁵ Ra det wasiso etetalai torom det lena, “Ra dat in watungi lena, ‘Tan o God,’ in balu dat kut lena, ‘Sur asau ra ka mot nurnur uni?’ ⁶ Ikut ra dat in watungi lena, ‘Tan a taro,’ a taro rop det in duku doko dat, uni det nurnur un o Jon lena i a poropet.” ⁷ Ra det balu i kut lena,

“Ka met tasmani tagai i.” ⁸ Numur o Iesu i watungi tandet lena, “Iau kai kan inanos mot una dekdek ra a ser pam a kum utna ri nami.”

A wasiso elelar una taro na pinapam una kinobot na wain

(Mt 21:33-46; Mk 12:1-12)

⁹ O Iesu i watung a wasiso elelar ri tan a taro lena, “Ara musano i marut tar a kinobot na wain, ra numur i pitar tari munung tan a ramano kum tene pinapam sur det in tamtamabati, ra i wan taru gusun det, ma i sa suano bat pasi tiro iai. ¹⁰ Ra a kalang i sa sot sur din git tomo a wino wain, i tulu ru ara tultul torom a taro na pinapam, sur lako kum kur wain tagun anun a kinobot sur anunu kai. Ikut a taro na pinapam det umi, ma det tulu oros melet ru i kut. ¹¹ I tulu melet ara tultul torom det, ikut det um meleti, det ban umaimai tari, ma det tulu oros melet ru i kut. ¹² Numur i tulu melet a mantul na tultul, ra det um laulau tari, ma det woro pirso ru i. ¹³ Ra a taman a kinobot i watungi lena, ‘Asau mo ra an pami? An tulu ru o nutunglik ut, a nat na wakak. Kutiro det in urur uni.’ ¹⁴ Ikut, ra a taro na pinapam det tama pasi, det wasiso tomo pas lena, ‘O naro ra in keles o tamano, i mo ra i wan urin. Mot iap, dat in um doko i, sur anundat mo a kinobot.’ ¹⁵ Ra det sugut pirso ru i tagun a kinobot, ma det um doko ru i.

“Asau mo a taman a kinobot na wain in pami un det? ¹⁶ In nanpat ma in um doko ru a taro na pinapam, ma in pitar tar a kinobot torom lako taro gisen, sur det in tamtamabati.” Ra a taro det longoro a wasiso ri, det watungi lena, “Awu, ken lenra!” ¹⁷ Ikut o Iesu i nas det, ra i watungi lena, “Asau mo a kukurai ina wasiso ri ra di sa tumus tari una Buk Tabu?”

‘A wat ra a kum tene pam rumu det lakro ru tari,

i ut ra, i wanpat a wakak na wat ra i udekdek a rumu.’ *Sng 118:22*

¹⁸ Det rop ra det puku taru una wat ri, det in tiginogino, ma osi ra a wat ri in puku taru uni, in tiginogino rop elar nama kubus.”

¹⁹ A kum tene ususer tagun a Warkurai ma a kum lamlabino tene etabor torom o God det sisio sur tu kisapi sur det in pam ukai pas o Iesu una du bung utra, uni det tasmani ut lena i watung a wasiso elelar ri un det. Ikut det ngaran a taro.

A iting una takis

(Mt 22:15-22; Mk 12:13-17)

²⁰ A kum tene ususer tagun a Warkurai ma a kum lamlabino tene etabor torom o God det tama sursuri, ma det tulu ru a

kum tene torotoro ma det toro lena det a lingmulus na taro. Ra det kis na usobor sur tu wasiso ra o Iesu in watung tari ra det in takuni nami, sur det in pitar tari una warkurai ma una dekdekin a mugumugu tagun a matanitu Rom. ²¹ Ra det watung i lena, “Tene Ususer, met tasmani lena i tokodos anum a wasiso ma anum a etowo. A magiram i takai kut torom a taro rop, ma u ser ususer det una kisapi anum o God nama lingmulus. ²² PePETlai, i tokodos sur dat in pitar a takis torom a Sisa * o awu?” ²³ O Iesu i sa tasman ru anundet a torotoro, ra i watungi tandet lena, ²⁴ “Mot in ese iau nam tu mani. In masarin osi ri, ma a tumtumus ri uni anum osi?” Det balu i lena, “Anun a Sisa.” ²⁵ Ra i watungi tandet lena, “Asau ra anum a Sisa, mot in pitari torom a Sisa. Ma asau ra anum o God, mot in pitari torom o God.” ²⁶ Ma ka det usobor lar pasi umatan a taro nama wasiso ra. Det kisin doko una nun a minabalu, ma katu wasiso mo anundet.

A iting una nilaun melet gusun a minat (Mt 22:23-33; Mk 12:18-27)

²⁷ A ramano kum Sadusi, ra det ser ipul kut lena, katu nilaun melet gusun a minat, det wan torom o Iesu, ma det tingi lena, ²⁸ “Tene Ususer, o Moses i tumus tari tandat lena, ra tu musano in mat pas gusun anum a ino, ma katu nutunder, o tisinolik in ben pasi ra in nolin nami, sur in ulabo tar lako kum nat una risan o tisiso. ²⁹ Ara kabo tisiso, a wonom mawit na musano det. A mugano i nolin, ra i mat pas gusun anum a ino, ma katu nutunder. ³⁰ Ra a murmur tano bulung i nolin nama ino ra, ma i bulung i mat kut gusuni. ³¹ Numur a mantul nami bulung i nolin nama ino ra. I lenkutkai ra, a wonom mawit det rop, det nolin pas nami, ma det mat kut. Ikut a ino ra, ke usus tar tu nat un det. ³² Ra numur a ino bulung i mat. ³³ Una nilaun melet gusun a minat, a ino ra, anum osi na pasandet mo? Uni a wonom mawit rop, det sa nolin pas nami.”

³⁴ O Iesu i watungi tandet lena, “A taro tagun a kum kilalo ri det ser nolin, ³⁵ ikut a taro ra det tokodos sur det in katutur melet gusun a minat, ma det in laun una nilaun numur, ka det in nolin melet mo. ³⁶ Ma ka det in mat melet, uni det elar mukut nama kum ensel. Det a kum nutnutun o God, uni det sa laun melet gusun a minat. ³⁷ O Moses i ese i lena a kum minat det katutur melet. Una wasiso na Buk Tabu unin nanai ra i kunabor, o Moses i watung a Labino lena,

‘A God anum o Abaram, a God anum o Aisak ma a God anum o Jekop†.’ *Kis 3:6*
³⁸ O God awu sur a God anum a kum minat, i a God anundet ra det laun, uni umatano det rop det laun.” ³⁹ Ra a ramano kum tene ususer tagun a Warkurai det watungi lena, “Tene Ususer, anum a wasiso i wakak doko.” ⁴⁰ Ma ka det wan melet mo toromi nam tu iting, uni det ngara.

A Karisito i a Labino anum o Dewid (Mt 22:41-46; Mk 12:35-37)

⁴¹ O Iesu i watungi tandet lena, “Iai ra di watungi lena a Karisito i a nutun o Dewid? ⁴² Uni o Dewid ut i watungi una Buk Song una Buk Tabu lena, ‘A Labino i watungi torom anum a Labino lena, “Un kis una papor sot na lamang, ⁴³ tuk ra an winim pas anum a kum ebar sur det in kis ututudu in anum a warkurai.”’ *Sng 110:1*
⁴⁴ O Dewid i watung a Karisito lena, i anum a Labino. Ra i lenra, der tamano pePETlai?”

O Iesu i utumarong a taro una petutna anum a kum tene ususer tagun a Warkurai (Mt 23:1-36; Mk 12:38-40; Lk 11:37-54)

⁴⁵ Ra a taro rop det longoro o Iesu, i watungi tan anum a kum nat na ususer lena, ⁴⁶ “Mot in tumarong mot gusun a kum tene ususer tagun a Warkurai. Det nemi sur det in nan tuPTUPUKUS nama kum wakak na ememar, ma det nemi kai sur a taro det in pitar a labino urur torom det una kum nubual na inawan tomo. Ma det nem a kinkinis sa numugu una kum rumu na lotu, ma a kinkinis na labino sa numugu una kum lukaro. ⁴⁷ Det ser urop a kum ululeng anum a kum ula, ma det ser pam a kum walalos na niaring sur a taro det in tama det. In labo doko a warkurai na minabalu anum o God torom det.”

21

A etabor anum a ula (Mk 12:41-44)

¹ O Iesu i kis una rumu na etabor, i tamtama usa, ra i tama a kum tene gongon det woro tar anundet a etabor una dino ra di ser woro mani uni. ² Ra i tama ara sibo na ula kai i woro tar aru toia kut. ³ Ra o Iesu i watungi lena, “A inanos mot nama lingmulus, a sibo na ula ri, i woro a labino mani taun det rop ra det woro anundet a kum mani. ⁴ Det woro tari kut a sibano tagun anundet a kum mani, ikut a sibo na ula ri, i sa woro rop ru asau ra in topas anum a kinkinis.”

* 20:22: A Sisa i a labino mugumugu tagun a gapman Rom, ma a taro Israel kai det kis ututudu in anum a warkurai.

† 20:37: O Abaram, o Aisak ma o Jekop detul mat, ikut a wasiso ri i ese i lena, uniri detul laun. 21:3: 2 Kor 8:12

*A kum ukinalong ina ururop na bung
(Mt 24:1-14; Mk 13:1-13)*

⁵ A ramano kum nat na ususer det watungi una rumu na etabor lena, di sa mar tari nama kum wakak na watat ma a kum etabor ra di pitari torom o God. Ikut o Iesu i watungi lena, ⁶ “A kum utna ri, ra mot tama det, a bung in nanpat numur ra din rege ginogino det rop, ma katu wat in inep netes un tu wat.”

⁷ Det ting o Iesu lena, “Tene Ususer, nangisin mo a kum utna ri in nanpat? Ma asi na ukinalong ra in ese i lena i sa milau sur det in nanpat?” ⁸ I balu det lena, “Mot in tumarong, sako din toro pas mot. Uni a susut det in nanpat nama risang, ma det in warango det lena, ‘Tau a Karisito,’ ma lena, ‘A du bung i sa milau.’ Gong mot mur det. ⁹ Ra mot in longoro a kum inaim ma a kum inaim tomo nama gapman, gong mot ngara, uni a kum utna ri det in nanpat mugu, ikut a ururop ina rakrakon bual ken nanpat utmakai.”

¹⁰ O Iesu i watungi tandet lena, “A kum kamkabo taro det in tur na inaim torom a kum se kabotaro, ma ara gapman in tur na inaim torom ara gapman. ¹¹ A kum lamlabino guri, ma a kum munurak ma a kum ngas na dekdek na misait una kum tamon, ma a kum ngas na utna tagisapat una bakut ra in ungara a taro, ma a kum lamlabino ukinalong tagisapat una bakut, det in nanpat.

¹² “Numugu ra a kum utna ri ka det wanpat utmakai, din dat pas mot, din ukadik mot, ma din dat mot una kum rumu na lotu sur a warkurai, ma din uruk mot una kum karabus. Ma din dat pas mot sur a warkurai sa numugu umatan a kum king, ma a kum lamlabino mugumugu, uni mot anungi. ¹³ I ra, a wakak na du bung, sur mot in wasiso talapor un iau torom det. ¹⁴ Gong mot nuknuk mugu sur asau ra mot in balu lako kum etakun nami. ¹⁵ Uni iau ut, an unuk tar a wasiso ma a mananos kai una nuknuki mot, ra anumot a kum ebar rop, ka det in balu lar pasi, ma ka det in ipul ru i. ¹⁶ A kum tamtama mot ma a kum nanamot, a kum tistisi mot, a kum kukumot, ma a kum paspasa mot, det in mulaot ru mot sur din um doko lako taro tagun mot. ¹⁷ A taro rop det in nget mot uni mot anungi. ¹⁸ Ikut ka tin iwu na lorimot in raro. ¹⁹ Anumot a tuntunur dekdek in ulaun mot.

*O Iesu i watungi lena din kamar ru o
Jerusalem
(Mt 24:15-21; Mk 13:14-19)*

²⁰ “Ra mot in tama a kum taro na inaim det tur talilis pas o Jerusalem, mot in tasmani lena i milau sur din kamar ru i. ²¹ Ma det ra det kis una papor Judia, det in kalabor eno usapat una kum tangai, ma det ra det kis una tamon Jerusalem det in pirso, ma det ra det kis sa ubual gong melet mo det ruk. ²² Uni a kum bung ra, det a kum bung na minabalu sur din pam sot pas a kum ututna rop ra di sa tumus tari una Buk Tabu. ²³ Una kum bung ra, in laulau doko torom a kum tianan, ma torom a kum ino kai ra a kum nutnutun det, det sus utmakai. A labino ngunungut in nanpat una tamon Israel, ma a kankan anun o God in monong a taro ri. ²⁴ Lako taro din um doko det nama totok na inaim, ma lako taro din ben pas det sur det in kis na karabus una kum tamon rop. Ma det ra awu sur a taro Juda det in pas tataun o Jerusalem, ma in tuk ut una bung ra o God i kubus tari sur a taro ra awu sur a taro Juda det in mana nama ban laulau a taro Juda.

*A Nutun a Musano in nanpat
(Mt 24:29-31; Mk 13:24-27)*

²⁵ “A kum ukinalong in nanpat sapat netes unin matanas, ma una kalang, ma una kum nangnang. Ma nin upiso a taro tagun a kum gapman rop det in laulau nama nginara una karangop ina top ma a wungu ino, ma a nuknukin det kai in talara uni. ²⁶ A taro det in matnat lalang nama nginara kibino una kum utna ra in nanpat una rakrakon bual, uni a kum utna sapat netes una bakut det in tugunu. ²⁷ Una bung ra, det in tama a Nutun a Musano in nanpat una du bakut, nama dekdek ma a labino minamar. ²⁸ Ra a kum utna ri in turpasi sur in nanpat, mot in tur, ma mot in tatado, uni a bung ra o God in ulaun pas mot uni i sa milau.”

*A wasiso elelar unin nanai na fig
(Mt 24:32-35; Mk 13:28-31)*

²⁹ O Iesu i watung a wasiso elelar ri tandet lena, “Mot in nuk pas in nanai na fig ma a kum duwai rop. ³⁰ Ra mot tama a kum gomono det in sibul pat, mot tasmani lena, a kum kalang na mararong i sa milau. ³¹ Lenkutkai ra mot in tama a kum utna ra a wasiso taru uni in nanpat, mot in tasmani lena a matanitu anun o God i sa milau. ³² A inanos mot nama lingmulus, a kum utna rop ri in nanpat ra a taro tagun uniri det laun utmakai. ³³ A langit ma a rakrakon bual der in rop, ikut anung a kum wasiso ken rop.

Mot in tumarong mot

21:5: Lk 19:44 **21:14:** Lk 12:11-12 **21:15:** Ap 6:10 **21:16:** Mt 10:21-22 **21:22:** Jer 5:29; 46:10; Os 9:7
21:24: Sng 79:1; Tam 11:2 **21:25:** Ais 13:10; Ese 32:7; Jol 2:31; Tam 6:12-13 **21:27:** Dan 7:13; Mt 26:64; Tam

³⁴ “Mot in tumarong mot, sako mot in balon nama pam lukaro ma a ininum, ma a nginara sur a kum utna una nilaun nin upiso, ma a bung ra in nanpat kisin torom mot elar namin nukun. ³⁵ Uni in nanpat torom a taro rop una rakrakon bual. ³⁶ Mot in tumarong mot una kum bung rop, mot in wararing sur mot in dekke sur mot in walip gusun a kum utna rop ri ra milau det in nanpat. Ma mot in wararing kai sur mot in pet lar pasi sur mot in tur umatan a Nutun a Musano.”

³⁷ Una kum bung rop o Iesu i ususer a taro ubalan in noworo ina rumu na etabor, ma una kum mirum i pirso, ma i kis una tangai, a risano o Oliw. ³⁸ Ma una kum bung na kobot raut, a taro rop det wan toromi ubalan in noworo ina rumu na etabor sur det in longoro i.

22

O Judas i mulaot sur in pitar tar o Iesu torom a kum ebar

(Mt 26:1-5, 14-16; Mk 14:1-2, 10-11; Jn 11:45-53)

¹ I sa milau a labino bung na lotu na beret ra kalako is uni, di watungi nama labino bung na lotu na Wanlakai. ² Ra a kum lamlabino tene etabor torom o God, ma a kum tene ususer tagun a Warkurai, det nuknuk sur tu ngas na kisapi sur det in um doko o Iesu uni, uni det ngaran a taro.

³ Ra o Satan i ruk taru un o Judas, ara risano kai o Iskariot, i ara tagun a noino ma aru nat na ususer. ⁴ I wan torom a kum lamlabino tene etabor torom o God, ma a kum mugumugu anun a kum tene tamtamabat tagun a rumu na etabor, ra i wasiso tomo nam det sur in pitar petlan tar o Iesu ulamandet. ⁵ Det gas, ma det watungi lena, det in kuli nam lako mani. ⁶ O Judas i mulaot, ra i nuknuk sur tu wakak na du bung, ra kalako susut na taro, ra in pitar tar o Iesu ulamandet.

Aru nat na ususer der waninar a utna na Wanlakai

(Mt 26:17-25; Mk 14:12-21; Jn 13:21-30)

⁷ A labino bung na lotu na beret ra kalako is uni i wanpat, ra di ser um doko a kum sipsip uni, sur din nani una labino bung na lotu na Wanlakai. ⁸ Ra o Iesu i tulu ru o Pita ma o Jon, ma i watungi tander lena, “Mur in nan ma mur in waninar andat a utna sur a labino bung na lotu na Wanlakai.” ⁹ Ra der tingi lena, “U nemi sur mir in waninari awai?” ¹⁰ I balu der lena, “Ra mur in nanpat sapat o Jerusalem, mur in etorom nam ara musano i los in labino koto na danim, ra

mur in muri utiro una rumu ra in ruk uni. ¹¹ Ma mur in watungi tan a taman a rumu lena, ‘A Tene Ususer i watungi lena: Awai i a kukur rumu ra met nam anung a kum nat na ususer, met in nan a utna na Wanlakai iai?’ ¹² Ma in ese tar mur una labino kukur rumu sapat netes, ra di sa waninar tari. Mur in waninar a utna tiro iai.” ¹³ Ra der wan, ma der pastoromi ut a kum utna rop ra o Iesu i sa watung tari tander. Ra der waninar a utna na Wanlakai.

A ururop na inangon anun a Labino

(Mt 26:26-30; Mk 14:22-26; 1 Kor 11:23-25)

¹⁴ Ra a du bung i sa sot, o Iesu ma a kum aposel det kis una inangon. ¹⁵ Ra o Iesu i watungi tandet lena, “A nem doko i sur dat in nan a utna na Wanlakai, ra ka taramo i utmakai a ngunungut, ¹⁶ uni a watungi tamot lena, kan nan melet mo tu utna na Wanlakai tuk una bung ra o God in pam sot pas a kukurai ina Wanlakai una nun a matanitu.”

¹⁷ O Iesu i los pas a kap ma i watung wakak pas uni, ra i watungi tandet lena, “Mot in los pas a kap ri, ma mot rop mot in inum taguni. ¹⁸ Uni a watungi tamot lena, kan inum melet mo lako wain, tuk ra a matanitu anun o God in nanpat.”

¹⁹ Ra i los pas a beret, i watung wakak pas uni, i tibiki, ma i tabor det nami, ra i watungi lena, “Iri a pining, a pitari sur mot. Mot in ser pami lenri, sur mot in ser nuk melet pas iau.” ²⁰ Lenkutkai ra, numur tan a inangon, i los pas a kap ma i watungi lena, “A kap ri, a matok na kunubus tagun a gaping ra i tilingis sur mot, ra i dat tomo tar a taro nam o God. ²¹ Tama! A laman o naro ra in pitar tar iau torom a kum ebar, kuri mir rarakon tomo una kabulu na inangon. ²² A lingmulus ut ra a Nutun a Musano in mat elar nam o God i sa kubus tari. Ikut in laulau sakit torom a musano ra in pitar tari torom a kum ebar.” ²³ Ra det ting etetalai det lena, “Osi mo tagun dat in pam a utna ri?”

Osi ra i labo taun det?

²⁴ Det engaras sur osi na pasandet din watungi lena, i labo taun det. ²⁵ Ra o Iesu i watungi tandet lena, “A kum king anun a taro ra awu sur a taro Juda, det kuro laulau det, ma anundet a kum mugumugu det nemi sur din watung det a kum wakak na tene warut. ²⁶ Ikut torom mot ken lenra. Osi ra i labo taun mot in elar kut nami ra i natino, ma osi ra i mugumugu in elar kut nama tultul. ²⁷ Osi ra i labo? O naro ra i kis una inangon, o, o naro ra i ser taromlu i? I

ut ra i kis una inangon, niko? Ikut iau, a kis epotor tamot elar nami ra i ser taromlu.

²⁸ “Mot, mot tur tomo nam iau una kum mamaut ra i wanpat torom iau. ²⁹ Ma an pitar tar a kinkinis na king tamot elar nam o Tita i sa pitar tari tang, ³⁰ sur mot in nangon ma mot in inum una nung a kabulu una nung a matanitu. Ma mot in kis una kum kiskis na king, ra mot in warkurai sur a noino ma aru kabotaro Israel.”

O Iesu i wasiso mugu lena o Pita in ipul ru i

(Mt 26:31-35; Mk 14:27-31; Jn 13:36-38)

³¹ O Iesu i watungi lena, “Saimon, Saimon, tama i, o Satan i sa sasaring pas sur in lar mot, elar nama tene minarut ra i lakro susuaro a wit mulus gusun a pinino. ³² Ikut a sa wararing taru sur ui, Saimon, sur gong anum a nurnur i puku. Ra u sa nukpukus melet, un udekdek a kum tistisim.” ³³ O Pita i watungi tano lena, “Labino, a sa waninar taru, sur an nan tomo nam ui una karabus, ma una minat.” ³⁴ Ma o Iesu i balu i lena, “Pita, a watungi tam, uniri a kereke ken kurkurirakuk utmakai, ra un ipul a tulu dino lena, ko tasman iau.”

Det in los a paus na umubek mani, a rat ma in totok na inaim

³⁵ Numur o Iesu i ting anum a kum nat na ususer lena, “Ra a tulu ru mot, ma katu paus na umubek mani anumot, o tu rat, o tu su, pepetlai, mot sibo ut sur tu utna?” Ra det balu i lena, “Awu.” ³⁶ Ra o Iesu i watungi tandet lena, “Ikut uniri, osi ra anunu tu paus na umubek mani, i wakak sur in losi ut, ma a rat kai. Ma osi ra ka tin totok na inaim, i wakak sur in siuru ru anum a saket sur in kul pas tino. ³⁷ A watungi tamot, din pam sot pas a tumtumus ri un iau, ‘Di watung toto det nama kum tene sakino.’ *Ais 53:12*

Uni a kum utna ri di sa tumus tari un iau, milau mo din pam sot pasi.” ³⁸ Ra a kum nat na ususer det watungi lena, “Tama i, Labino, arin totok na inaim kuri ut.” Ra o Iesu i balu det lena, “I elar kut.”

O Iesu i wararing

(Mt 26:36-46; Mk 14:32-42)

³⁹ O Iesu i pirso gusun a tamon, ra i wan usapat una Tangai na Oliw, elar ut nami ra i ser pami. Ra a kum nat na ususer det muri. ⁴⁰ Ra det wanpat una nubual ra, i watungi tandet lena, “Mot in wararing, sur gong mot puku una ululam.” ⁴¹ I wan gisen lilik taru kut gusun det, i kis butkeke, ma i wararing lena, ⁴² “Tita, ra u nemi, un los ru a kap na mamaut ri gusun iau. Ikut gong u mur anung a nemnem, un muri ut anum

a nemnem.” [⁴³ Ra ara ensel tagisapat una langit i wanpat toromi, ma i udekdek tari. ⁴⁴ I taramo a dekdek na tupunuk, ra i dekdek doko nama niaring. Ma a misongot na pinino i elar nama tutu na gap i puku pirso utiro upiso.] *

⁴⁵ I urop a niaring ra i tur, i milet melet torom a kum nat na ususer, ra i tama det ra det sa inep dumun, uni a pinindet i tungulu nama tupunuk. ⁴⁶ Ra i watungi tandet lena, “Ilai ra mot inep dumun kut? Mot in katutur, ma mot in wararing, sur gong mot puku una ululam.”

Di dat pas o Iesu

(Mt 26:47-56; Mk 14:43-50; Jn 18:3-11)

⁴⁷ Ra o Iesu i wasiso utmakai, a labino kunur na taro det wanpat. Ra o Judas, ara tagun a noino ma aru nat na ususer, i mugu pas det. I wan torom o Iesu sur in gom a pangpagor na wano. ⁴⁸ Ra o Iesu i tingi lena, “Judas, pepetlai, un pitar tari mo a Nutun a Musano torom a kum ebar, nama egom?”

⁴⁹ Det ra det wan tomo nam o Iesu det tasman asau ra in nanpat, ra det tingi lena, “Labino, pepetlai, met in waim nama numet a kum totok na inaim?” ⁵⁰ Ma ara tagun det i tau kutu ru in nosot na talngan a tultul anum a mugumugu na tene etabor torom o God.

⁵¹ Ra o Iesu i turbati lena, “Gong!” Ra i pam in talngan a tultul, ma in talngano i wakak melet. ⁵² O Iesu i wasiso torom a kum lamlabino tene etabor torom o God, ma a kum mugumugu anum a kum tene tamtamabat tagun a rumu na etabor, ma a kum mugumugu anum a taro ra det wanpat suri. I watungi lena, “Pepetlai, kutiro iau a tene inaim ma a tene wolong, sur i mo ri mot wanpat nama kum totok na inaim ma a kum nalnal sur iau?” ⁵³ Una kum bung rop dat ser kis tomo ubalan in noworo ina rumu na etabor ma ka mot pam ukai iau. Ikut uniri anumot a du bung, ra a dekdekin a dumirum i mugu mot.”

O Pita i ipul ru o Iesu

(Mt 26:57-58, 69-75; Mk 14:53-54, 66-72;

Jn 18:12-18, 25-27)

⁵⁴ Det pam ukai pas o Iesu, ra det ben gisen ru i. Det beni utiro una rumu anum a mugumugu na tene etabor torom o God. Ra o Pita i mur nanan o Iesu, ikut i bakbak ut gusuni. ⁵⁵ Ra det sa tagol tar a sungun nago utamon, ma det kis tomo, o Pita kai det ut. ⁵⁶ Ara toraro, a tultul, i tama pasi ra i kis taru una talapor ina sungun, ra i nas dekdeki, ma i watungi lena, “A musano ri, i ser wan tomo utkai nam o Iesu.” ⁵⁷ Ikut

o Pita i ipul lena, “Le, ka tasman o Iesu.”⁵⁸ Numur lilik kut, ara bulung i tama pas o Pita ra i watungi lena, “Ui kai tagun det.” Ra o Pita i balu i lena, “Le, iau awu.”

⁵⁹ Numur lilik melet, ara bulung i ngon-gos lena, “A lingmulus ut, a musano ri i ser wan tomo utkai nam o Iesu, uni i a te Galili.”⁶⁰ O Pita i balu i lena, “Le, ka tasman asau ra u wasiso uni.” Ra i wasiso utmakai, uniutra a kereke i kurkurirakuk mut.⁶¹ A Labino i tupukus, i tamtama tokodos torom o Pita, ra o Pita i nuk pas a wasiso anun a Labino ra i sa watung tari tano lena, “Uniri, a kereke ken kurkurirakuk utmakai, ra un ipul a tulu dino lena, ko tasman iau.”⁶² Ra i pirso gusun a nubual ra, ma i tangis dokodoko i.

Di urongon laulau un o Iesu ma di mirasi
(Mt 26:67-68; Mk 14:65)

⁶³ Det ra det tamtamabat o Iesu, det urongon laulau uni, ma det mirasi.⁶⁴ Det pulus bat pas arin matano, ma det watungi tano lena, “Ui a poropet, un inanos met. Osi ra i takalo ui?”⁶⁵ Ma det mang sakosako i nama susut na wasiso utkai.

O Iesu i tur umatan a taro na kiwung
(Mt 26:59-66; Mk 14:55-64; Jn 18:19-24)

⁶⁶ Ra i waspi, a kum mugumugu anun a taro, a kum lamlabino tene etabor torom o God, ma a kum tene ususer tagun a Warkurai det wan tomo. Ma di ben pas o Iesu torom det una nundet a kiwung, ma det watungi tano lena,⁶⁷ “Ra ui a Karisito, un inanos met.” Ra o Iesu i balu det lena, “Ra an inanos mot, ka mot in nurnur una nung a wasiso.”⁶⁸ Ma ra an ting mot nam tu iting, ka mot in balu i.⁶⁹ Ikut, turpasi uniri, a Nutun a Musano in kis una papor sot na laman o God, i ra i dekdek sakit.”⁷⁰ Ra det rop det ting o Iesu lena, “Ui a Nutun o God niko?” Ma i balu det lena, “Mot sa watung sot pasi, iau ut ri.”⁷¹ Ra det watungi lena, “Dat nem melet lako wasiso na etakun sur asau? Uni dat sa longoro tar anun a wasiso ri.”

23

O Iesu i tur una warkurai numugu tan o Pailat

(Mt 27:1-2, 11-14; Mk 15:1-5; Jn 18:28-38)

¹ A taro na kiwung rop det tur, ra det ben o Iesu torom o Pailat.² Ra det turpasi sur det in takuni lena, “Met pastorom a musano ri i ben raro anumet a taro. I turbat met sur gong met pitar a takis torom a Sisa, ma i warango i kai lena, i a Karisito,

a king.”³ O Pailat i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.”⁴ O Pailat i watung tan a kum lamlabino tene etabor torom o God ma a kunur na taro lena, “Ka tikin pas tu petutna a musano ri i raro uni.”⁵ Ikut, det ngongos makai lena, “Anun a etowo i ukatutur a balan a taro, sur det in lakai a warkurai anun a gapman una papor Judia rop. I turpasi tong o Galili ra i tuk taru ut nin.”

O Iesu i tur una warkurai umatan o Erod

⁶ Ra o Pailat i longoro i, i iting un o Iesu lena, “I a te Galili?”⁷ Ra i sa tasmani lena o Iesu tagitong una papor Galili, ra o Erod i mugumugu iai, i tulu ru i toromi. Una bung ra, o Erod kai i kis sapat o Jerusalem.

⁸ Ra o Erod i tama pas o Iesu, i gas doko, uni tagun numugu utmakai i nemi sur in tama i, uni i sa longoro tar a wasiso uni, ra i nemi sur in tama tu utna na ukisin ra in pami.⁹ Ma o Erod i ting o Iesu nama susut na iting, ikut o Iesu ke balu i.¹⁰ A kum lamlabino tene etabor torom o God ma a kum tene ususer tagun a Warkurai kura det tur tiro iai, det takun dekdek o Iesu.¹¹ O Erod ma anun a taro na inaim det urongon laulau uni, det nongoni, det mar tari namin wakak na malu sakit, ra det tulu melet ru i torom o Pailat.¹² Numugu o Erod ma o Pailat der ebar, ikut una bung ra, der emarom maragom.

O Pailat i warkurai o Iesu sur in mat

(Mt 27:15-26; Mk 15:6-15; Jn 18:39-19:16)

¹³ O Pailat i kabo tomo pas a kum lamlabino tene etabor torom o God, ma a kum mugumugu, ma a taro,¹⁴ ra i watungi tandet lena, “Mot sa ben tar a musano ri torom iau, elar nam ara ra i ukatutur a balan a taro, sur det in lakai a warkurai anun a gapman. Ra iri a sa ting tari umatamot, ma ka tikin pas tu petutna ra a musano ri i raro uni.”¹⁵ Ma o Erod kai, ke pastorom tu niraro, ra i tulu melet ru i urin torom dat. Tama i, ke pam tar tu utna sur in iru uni.¹⁶⁻¹⁷ I mo ra an miras tatari kut, ra an palos ru i.*

¹⁸ Ra a taro rop det kukukuk lena, “A musano ri in iru. Palos ru o Barabas torom met.”¹⁹ O Barabas i ara musano ra di uruk tari una karabus, uni i waim nama gapman una tamon Jerusalem, ma i ser um doko a taro kai.²⁰ O Pailat i ting melet det, uni i nemi ut sur in palos ru o Iesu.²¹ Ikut, det kukukuk dekdek kut lena, “Sak wati unin nanai kutus! Sak wati unin nanai kutus!”

22:67: Jn 3:12 22:69: Ap 7:56 23:7: Lk 3:1

* 23:16-17: Una ramano kum du buk una wasiso Grik, a ramano kum wasiso kai i kis una vers ri. I lenri: *Un arara labino bung na lotu na Wanlakai, o Pailat i ser palos ru ara musano gusun a karabus torom a taro.*

²² Ra i mantul nami i ting det lena, "Asau a kibino? Asi na sakino utna ra i sa pam tari? Ka pastorom tu sakino petutna sur in iru uni. I mo ra an miras tatari kut, ra an palos ru i." ²³ Ikut, det dekdek nama kukukuk nama labino walngandet, sur din sak wati mukut unin nanai kutus. Ra det kukukuk taun a wasiso anun o Pailat. ²⁴ Ra o Pailat i mulaot mukut sur din pami elar nama nundet a nemnem. ²⁵ Ra i palos ru o Barabas ra i kis una karabus, uni i waim nama gapman ma i um doko a taro, i ra det sasaring suri. Ma i pitar tar o Iesu torom a kum tene inaim elar nama nemnem anun a taro.

*Di sak wat o Iesu unin nanai kutus
(Mt 27:32-44; Mk 15:21-32; Jn 19:17-27)*

²⁶ Ra det ben pas o Iesu sur din sak wati unin nanai kutus, det dat pas ara te Sairini, a risano o Saimon, ra i wan tagitong un ara tamon sur in nan usapat o Jerusalem. Ra det ubek tar in nanai kutus usapat netes uni, sur in los murmur o Iesu nami.

²⁷ A labino kunur na taro det mur o Iesu. Epotor tandet a wardain utkai, ra det tupunuk ma det tangisi. ²⁸ O Iesu i tupukus, ma i watungi tandet lena, "A wardain Jerusalem, gong mot tangis iau, mot in tangis mot ut, ma a kum nutnutu mot. ²⁹ Uni a kum bung na mamaut in nanpat ra a taro det in watungi lena, 'A kum pobo na ino, ra ka det usus ma ka det ugu nat, det dan.' ³⁰ Ma

'det in watungi torom a kum tangai lena, "Mot in puku sapat netes un met!" ma torom a kum du tultul lena, "Mot in por met!"' *Os 10:8*

³¹ Ra det pam a kum utna ri ra in nanai i laun utmakai, asau ra det in pami ra i sa marang?[†]

³² Ma aru kai, aru laulau na musano, di ben der tomo nam o Iesu sur din sak wat der tomo nami.

³³ Ra det wanpat una nubual ra di watungi nama, "Nubual na Lor na Minat," tiro iai det sak wat o Iesu unin nanai kutus, ma aru sakino musano kai, ara una papor sot, ma ara kai una kair. ³⁴ Ra o Iesu i watungi lena, "Tita, un unus ru anundet a sakino petutna, uni ka det tasman asau ri det pami." Ma det pilai laki sur det in isuaro anun a kum malu torom det taktakai.

³⁵ A taro det tur ra det ieli, ma a kum mugumugu det urongon laulau un o Iesu, det watungi lena, "I ulaun pas a taro gisen.

Ra i a Karisito anun o God, anun a nat na pipilok, i wakak sur in ulaun pasi ut." ³⁶ Ma a kum tene inaim kai det urongon laulau uni. Det wan toromi, det pitar tar a wain ra i mititir tano, ³⁷ ra det watungi lena, "Ra ui a king anun a taro Juda, uniri un ulaun pas ui mo." ³⁸ Di tumus tari kai a tumtumus sapat netes unin nanai kutus lena,

"IRI A KING ANUN A TARO JUDA."

³⁹ Ara tagun aru sakino musano ra der kete tomo nam o Iesu, i watung laulau i kut o Iesu lena, "Ui a Karisito, niko? Un ulaun pas ui ma mir kai!" ⁴⁰ Ma ara pasander i kankan toromi, ra i watungi lena, "Peptelai, ui ko ngara sur o God? Uni ui kai u los ara ngas na warkurai kut elar nami. ⁴¹ I tokodos ut un dar, uni dar los a minabalu una nundar a sakino petutna. Ikut, a musano ri ke pam tu niraro." ⁴² Ra i watungi tan o Iesu lena, "Iesu, nuk pas iau, ra un ruk una num a matanitu." ⁴³ Ma i balu i lena, "A inanos ui nama lingmulus, uniri un kis tomo nam iau una Paradais[§]."

O Iesu i mat

(Mt 27:45-56; Mk 15:33-41; Jn 19:28-30)

⁴⁴ Una du bung ra, i noino ma aru pakano bung una suan, ra a bual rop i dumirum tuk una tulu pakano bung una lirap, ⁴⁵ uni in matanas ke sisio. Ra in namalu ra di mabat kutus nami sa urumu una rumu na etabor i tararos potur sur aru dino. ⁴⁶ Ra o Iesu i kukuk dekdek lena, "Tita, a pitar tar a niong un aru lamam." Ra i sa watung tari lenri, i mat. ⁴⁷ A mugumugu anun a kum tene inaim i tama a utna ri i wanpat, ra i watung ulabo pas o God lena, "I lingmulus ut, a musano ri a tene tokodos." ⁴⁸ A kunur na taro kura det tur tomo taru sur det in tama a utna ri. Ra det tama i, det raprapus a kum romrobon det nama tupunuk ra det millet melet. ⁴⁹ Ikut, a kum paspasan o Iesu, ma a wardain ra det muri tagitong o Galili, det tur bakbak taru ut, ma det tama a kum utna ri.

Di inep o Iesu una kulam na minat

(Mt 27:57-61; Mk 15:42-47; Jn 19:38-42)

⁵⁰⁻⁵¹ Ara musano, a risano o Josep, tagitong o Arimatia una papor judia. I ara wakak na musano, ma a tene tokodos, ma i kiskis langlang sur a matanitu anun o God. I ara tagun a taro na kiwung, ikut, ke mulaot tomo nam det una nundet a warkurai ma una utna ra det pami. ⁵² I wan torom o Pailat ma i saring pas a minatin o Iesu tano. ⁵³ I los pirso pasi, i pulus pasi namin wakak na malu, ra i inep tari una

23:28: Lk 21:23 **23:30:** Tam 6:16 † **23:30:** Det wasiso lenri uni det los a labino maut ra det ling sur det in mat lakit. ‡ **23:31:** In nanai i laun utmakai i ukinalong o Iesu, ma in nanai ra i marang i ukinalong a taro Juda.

23:34: Ais 53:12; Sng 22:18 **23:35:** Sng 22:7-8 **23:36:** Sng 69:21 § **23:43:** A Paradais i a wakak na tamon anundet ra det nurnur. Ra det in mat det in kis iai. **23:44:** Lk 8:2-3

kulam na minat, ra di sa kil tari una papor wat, ra katu minat utmakai i inep taru uni.⁵⁴ A bung ra, a bung na waninar, ma milau mo a Bung na Sabat in turpasi.

⁵⁵ A wardain ra det wan tomo nam o Iesu tagitong o Galili, det mur o Josep, ra det tama tar a kulam na minat, ma a ngas na ininep ra di pami una minatin o Iesu.⁵⁶ Ra det milet melet, ma det waninar pas a kum utna ra i sangsangnain wakak, ma a wel ra i sangsangnain kai. Ma una Bung na Sabat, det mana elar ut nama warkurai.

24

*O Iesu i katuttur melet gusun a minat
(Mt 28:1-10; Mk 16:1-8; Jn 20:1-10)*

¹ Ra i kobot raut, una mugano bung una wik, a wardain det los a kum utna ra i sangsangnain wakak ra det sa waninar pasi, ra det wan utiro una kulam na minat.

² Ma det pastoromi ra di sa bulus gisen ru a wat gusun a matansako na kulam na minat.³ Det ruk, ikut ka det tama i mo a minatin a Labino o Iesu.⁴ Ra a nuknukin det i lokolokor utmakai uni, uniuira, aru musano, anunder arin namalu i pilpil doko, der wanpat torom det.⁵ Det ngara, ra det tudung piso ma a masarindet unago piso. Ikut, der watungi tandet lena, “I lai ra mot sisio sur o naro ra i laun nin nisan a kum minat?”⁶ Ke kis mo nin, i sa katuttur melet. Mot in nuk pas a wasiso ra i sa watung tari tamot, ra i kis utmakai tomo nam mot tong o Galili.⁷ I sa watung tari lenri, “Din pitar tar a Nutun a Musano una laman a laulau na taro, ma din sak wati unin nanai kutus. Ra a tulu bung in rop in katuttur melet.”⁸ Ra det nuk melet pas a wasiso anun o Iesu.

⁹ Ra det milet melet gusun a kulam na minat, det inanos nama kum utna rop ri torom a noino ma ra nat na ususer ma torom det rop kai, ra det ser mur o Iesu.¹⁰ A wardain ra det inanos a kum aposel det ri: O Maria Magdalen, o Joana, ma o Maria o nan o Jems, ma a ramano kum ino kai, ra det wan tomo nam detul.¹¹ Ikut, a kum aposel det longoro a wasiso anun a wardain elar nama wasiso oros kut, ma ka det nurnur un det.¹² Ikut o Pita i tur, i kalabor sur a kulam na minat. I par pirso, ra i kiet ma i tama a kum malu mukut, det inep gisen taru. Ra i milet melet, ma i nuknuk doko un asau ri i wanpat.

*A inawan utong o Emaus
(Mk 16:12-13)*

¹³ Una bung ut ra, aru tagun det ra det ser mur o Iesu, der wan sur a tamon a risano o Emaus. A bakbakino i elar nama noino ma

ara kilomita tagisapat o Jerusalem.¹⁴ Ra der wan nanan der wasiso etalai torom der una kum utna rop ri, ra i sa wanpat taru.

¹⁵ Ra der wasiso ma der ting etalai der una kum utna ri, o Iesu ut i wanpat torom der, ma detul wan tomo.¹⁶ Ikut ara utna i pulus bat arin matander ra ka der tama lele pasi.

¹⁷ O Iesu i ting der lena, “Asau ri mur wasiso nanan uni una numur a inawan?” Der tur taru kut ra der tamtama na tupunuk.

¹⁸ Ma ara pasander a risano o Kliopas, i tingi lena, “Ui mukut ara musano ra u kis na usiro sapat o Jerusalem, ma ko tasman a kum utna ri ra i wanpat sapat una kum bung ri?”¹⁹ Ra i ting der lena, “A kum utna na sau?” Ma der balu i lena, “A kum utna un o Iesu a te Nasaret. I ara poropet, ra i ser pam a kum dekdek na pinapam, ma anun a wasiso kai i dekdek, umatan o God ma a taro rop.²⁰ A kum lamlabino tene etabor torom o God ma anundat a kum mugumugu det pitar tari una warkurai sur in mat, ma di sak wati unin nanai kutus.²¹ Ikut, met nurnur uni lena, i ra, in ulangolango a taro Israel. Ma ara utna kai, i sa tulu bung bat tar a kum utna ri det pami.²² Ma i kai ri, a ramano kum ino tagun met, det ukisin met. Det wan kobot sur a kulam na minat,²³ ikut ka det tama a minatino. Ra det milet melet, det watungi lena, det tama tar aru ensel una tamtama, ra der watungi lena i sa laun.²⁴ Numur ara taro kai tagun met, det wan pas tiro una kulam na minat, ra det tama tar a utna ri, lenkutkai ra a kum wardain det inanos nami, ikut ka det tama o Iesu.”

²⁵ Ra o Iesu i watungi tander lena, “Mur longlong kut. Nangisin mur in nurnur una kum wasiso rop ra a kum poropet det sa watung tari?”²⁶ Det watungi lena, a Karisito in taramo a kum ngunungut ri, ra numur in ruk una nun a minamar.”²⁷ Turpasi una kum buk anun o Moses ma a kum poropet rop, o Iesu i papalos torom der una kum utna, ra di sa tumus tari uni ut, una Buk Tabu.²⁸ Ra detul wan milau sur a tamon ra der wan suri, o Iesu i lari sur in nan sakit mukut.²⁹ Ma der turbat dekdeki lena, “Un kis tomo nam mir, uni i sa lirup. In matanas i ling na sup mo.” Ra detul ruk ma i kis tomo nam der.

³⁰ Ra detul kis sur detul in nangon, o Iesu i los pas a beret, i watung wakak pas uni, i tibik pasi, ma i tabor der nami.³¹ Ra a matander i tapalos, ra der tama lele pasi maragom, ra i rorom pas mut gusun der.

³² Ra der wasiso etalai torom der lena, “I lingmulus ut, in balandar i pirok nama gasgas ra i wasiso torom dar, ra datul wan

nanan una kisapi ma i palos tar a wasiso na Buk Tabu torom dar.”

³³ Uniutra, der katutur ma der milet melet usapat o Jerusalem, ra der wan torom a noino ma ra nat na ususer ma ara taro kai ra det kis tomo. ³⁴ Det watungi lena, “A lingmulus ut! A Labino i sa katutur melet, ma i tur pat torom o Saimon.” ³⁵ Ra der inanos un asau ra i wanpat torom der una kisapi, ma una nunder a tamtama lele kai uni, ra i tibik a beret.

O Iesu i tur pat torom anun a kum nat na ususer

(Mt 28:16-20; Mk 16:14-18; Jn 20:19-23; Ap 1:6-8)

³⁶ Ra der wasiso utmakai una kum utna ri, o Iesu ut i tur epotor tandet, ma i watungi tandet lena, “A malmal torom mot.” ³⁷ A pinindet i sursurin ma det ngara doko, det nuki lena, a nion kut ra det tama i. ³⁸ Ma i watungi tandet lena, “Ilai ra mot ngara? Ma ilai ra mot wur nuknuk?” ³⁹ Mot in tama aru lamang ma aru kiking. Iau mulus ut ri. Mot in tuk iau, ma mot in tama iau. A nion kalako pinino, ma kalako sursur kai. Ikut a pining ut ma a sursur na pining utkai, ra uniri mot tama i.” ⁴⁰ Ra i sa watung tari lenri, i ese aru lamano ma aru kikino tandet. ⁴¹ Det gas ma det kisin, ikut ka det nurnur utmakai. Ma i ting det lena, “Katu utna kuri sur an nani?” ⁴² Ma det tabori nama lik kiripo ra di sa tun tari. ⁴³ Ra i rakon pasi, ma i wani umatandet.

⁴⁴ Ma i watungi tandet lena, “Ra a kis utmakai tomo nam mot, a sa inanos tar mot lenri: A kum utna rop ra di sa tumus tari un iau, una Warkurai anun o Moses, una wasiso anun a kum poropet ma una Kum Kelekele anun o Dewid din pam sot rop pasi.” ⁴⁵ Ra o Iesu i utalapor a nuknukin det sur det in talapor una Buk Tabu. ⁴⁶ I watungi tandet lena, “Di sa tumus tari lenri: A Karisito in iru, ra a tulu bung in rop, in katutur melet gusun a minat, ⁴⁷ ma din warawai una risano torom a taro tagun a kum gapman rop, turpasi sapat o Jerusalem. Din warawai torom det lena, det in nukpukus ma o God in unus ru anundet a kum sakino petutna. ⁴⁸ Mot a kum tene wasiso una kum utna ri mot sa tama tari. ⁴⁹ Tama i, i ra o Tita i sa uliliman taru uni, an tulu ru i torom mot. Ikut mot in kis ut nin una tamon ri, tuk ra din mar tar mot nama dekdek tagisapat netes.”

O Iesu i wan toto usapat una langit

(Mk 16:19-20; Ap 1:9-11)

⁵⁰ Numur i ben pirso pas det gusun a tamon Jerusalem, ra det wanpat un ara nubual milau o Betani, ra i kodos aru

lamano, ma i watung udan det. ⁵¹ Ra i watung udan det utmakai, i wan gusun det, ra o God i ben toto pasi usapat una langit. ⁵² Det lotu toromi, ra det milet melet usapat o Jerusalem nama labino gasgas. ⁵³ A kum bung rop det kis tiro ubalan in noworo ina rumu na etabor, det ser watung ulabo pas o God.

A Wakak na Wasiso un o Iesu Karisito o Jon i tumusi

A wasiso talapor mugu

O Jon i ara tagun a noino ma aru nat na ususer anun o Iesu (tama Mt 4:21). I tama a kum utna ra o Iesu i pami ma i longoro anun a kum etowo. I tumus a buk ri numur tan a tulu buk ra o Matiu, o Mak ma o Luk detul tumusi. I tumus a buk ri uni i nemi sur dat in tasman o Iesu ma dat in nurnur uni, ma un o Iesu kut dat in laun tukum, tama Jon 20:31.

Ara labino utna ra o Jon i nem na inanos dat uni, i lenri: O Iesu i o God ma i a Nutun o God. Una turturkibin ina buk ri, i wasiso talapor un o Iesu lena, i o God ma numugu utmakai i kis tomo nam o God. I inanos dat kai una kum utna na ukisin ra o Iesu i pami. O Jon i watung det a kum ukinalong, uni det ulingmulusi lena o Iesu i o God. O Jon i inanos dat kai lena a susut na taro ka det nurnur un o Iesu, a kum mugumugu anun a taro Juda kai ka det nurnur.

A inawan ina buk Jon:

A Wasiso i wanpat a musano mulus (1:1-18)

O Jon a Tene Baptaiso (1:19-34)

A kum mugano nat na ususer anun o Iesu (1:35-51)

A pinapam anun o Iesu torom a taro (2:1-12:50)

A ururop na wik ma a minatin o Iesu (13:1-19:42)

A katkatatur melet anun o Iesu gusun a minat (20:1-31)

O Iesu i wanpat torom a kum nat na ususer tong o Galili (21:1-25)

O Iesu i a Wasiso anun o God

¹ Numugu utmakai ra ka di ukisi utmakai a rakrakon bual, a Wasiso i sa kis mugu taru. A Wasiso i kis tomo nam o God, ma a Wasiso i ut o God. ² Numugu utmakai i kis tomo nam o God. ³ Una Wasiso kut, o God i ukis a kum utna rop. Katu utna o God i ukis tari, ra ke ukisi nama Wasiso. ⁴ A nilaun i kis uni, ma a nilaun ra, i a talapor anun a taro rop. ⁵ A talapor i sisio una dumirum, ma a dumirum ke pulus lar pasi.

⁶ O God i tulu ru ara musano, a risano o Jon. ⁷ I wanpat sur in wasiso puaso una talapor, sur a taro rop det in nurnur

uni. ⁸ I ut awu sur a talapor, i wanpat kut sur in wasiso puaso una talapor. ⁹ A talapor mulus, ra i ser utalapor a taro rop, in nanpat mo urin una rakrakon bual.

¹⁰ A Wasiso i kis una rakrakon bual. Ma una Wasiso, o God i ukis a rakrakon bual, ikut a taro una rakrakon bual ka det tama lele pasi. ¹¹ I wanpat sur anun a taro, ikut anun a taro ut ka det gas pasi. ¹² Ikut, torom det ra det gas pasi, ma det nurnur una risano, i mulaot pas det sur det a kum nutnutun o God. ¹³ Awu sur di watung det a kum nutnutun o God kibino una usus na kabotaro, o una nuknukin tu musano taginin upiso, o una nemnem tagun a nolin, awu. Di usus det una nion, una nemnem ut anun o God.

¹⁴ A Wasiso i wanpat a musano mulus, ma i kis epotor tamet. Met sa tama tar anun a minamar, a minamar anun o Nutunu, ara sot kut, ra i wan tagisapat tan o Tamano, i bukus nama marmaris ma a lingmulus. ¹⁵ O Jon i wasiso talapor uni, ma i watungi namin labino walngano lena, "I ut ri, ra a wasiso mugu taru uni lena, 'I ra in mur tang, i labo tang, uni i laun raut numugu tang.'" ¹⁶ I bukus nama marmaris, ma gusun anun a labino marmaris i udan dat nama susut na wakak na utna ra i wanan pat torom dat. ¹⁷ Un o Moses, o God i pitar tar a Warkurai torom dat, ikut un o Iesu Karisito i pitar tar a marmaris ma a lingmulus torom dat. ¹⁸ Kataio utmakai i tama tar o God. Ikut ara Nutunu kut, ra i kis tomo nam o Tamano, i ut i ese o God torom dat. Ma i ut o God.

O Jon a Tene Baptaiso i inanos talapor a taro uni ut

(Mt 3:1-12; Mk 1:1-8; Lk 3:1-18)

¹⁹ A kum mugumugu anun a taro Juda tagisapat o Jerusalem, det tulu ru a ramano kum tene etabor torom o God, ma a ramano taro tagun a kabotaro Liwai,* torom o Jon sur det in tingi lena, "Ui osi?" ²⁰ O Jon ke wasiso batbati, i wasiso talapor ut uni lena, "Awu sur iau a Karisito." ²¹ Det ting meleti lena, "Osi ui? Ui o Elaija?" Ra i balu det lena, "Awu, awu sur iau o Elaija." Det ting meleti lena, "Ui a poropet ra di watung tari sur in nanpat?" I balu det lena, "Awu." ²² Numur det tingi lena, "Osi ui? Un inanos met sur met in inanos det ra det tulu ru met urin. Asau un watungi un ui ut?" ²³ O Jon i balu det lena, "Iau a musano ra a poropet Aisaia i wasiso mugu taru uni lena, 'Una nubual kalako taro uni, in nalngan ara i

1:1: Jn 17:5; 1 Jon 1:1-2; Tam 19:13 1:3: 1 Kor 8:6; Kol 1:16-17; lbr 1:2 1:4: Jn 5:26 1:5: Jn 3:19 1:6: Mt 3:1; Lk 1:13-17, 76 1:9: Jn 8:12 1:13: Jn 3:3-6; Pil 2:7; Jn 2:11; 1 Pit 1:23 1:17: Kis 34:28; Rom 6:14
1:18: Kis 33:20; Jn 6:46; 1 Tim 6:16 * 1:19: A taro tagun a kabotaro Liwai det ser papam una rumu na etabor.
1:21: Lo 18:15, 18; Mt 11:14

kakabo lena: Mot in pam kodos a kisapi anun a Labino.’ ” Ais 40:3

²⁴ A kum Parisi ra di tulu tar det torom o Jon, ²⁵ det tingi lena, “U watungi lena, awu sur ui a Karisito, ma awu sur ui kai o Elaija, o a poropet, ra di watung tari sur in nanpat. Ra i lenra, ilai sur u baptaiso a taro?” ²⁶ O Jon i balu det lena, “Iau, a baptaiso mot nama danim, ikut ara kura i tur epotor tamot, ra ka mot tasman pasi. ²⁷ I ra, in mur tang. Ka elar sur an palos aru su gusun aru kikino, uni a natino doko tano.”

²⁸ A kum utna ri, i wanpat tong o Betani una ara papor danim Jordan, ra o Jon i baptaiso a taro iai.

O Iesu a Barman na Sipsip anun o God, ra in mat una sakino petutna anun a taro

²⁹ Ara bung numur, o Jon i tama o Iesu i wan nanan toromi, ra i watungi uni lena, “Mot tama i, a Barman na Sipsip anun o God, ra in lakro ru a sakino petutna anun a rakrakon bual. ³⁰ A musano kut ri, ra a wasiso mugu taru uni lena, ‘A musano ra in mur tang, i labo tang, uni i laun raut numugu tang.’ ³¹ Iau kai numugu ka tasmani. Ikut a baptaiso nama danim sur an upuaso a musano ri torom a taro Israel.”

³²⁻³³ Ma o Jon i watungi lena, “Ka tasmani lena osi a Karisito. Ikut o God, ra i tulu ru iau sur an baptaiso nama danim, i inanos iau lena, ‘Un tama a Tokodos na Nion in nan pirso ma in kis un ara musano. I ra a musano ra in baptaiso nama Tokodos na Nion.’ Ma a tama a Tokodos na Nion i wan pirso tagisapat una langit, i elar namin natabun ma i kis taru netes un o Iesu. ³⁴ A sa tama tar a utna ri i wanpat, ra a inanos uni lena, i a Nutun o God.”

A kum mugano nat na ususer anun o Iesu

³⁵ Ara bung palu melet, o Jon ma aru nat tagun anun a kum nat na ususer detul tur taru melet tiro. ³⁶ I tama pas o Iesu i wan sakit detul, ra i watungi uni lena, “Tama i, a Barman na Sipsip anun o God.”

³⁷ Aru nat na ususer der longoro a wasiso ra, ma der muri mut o Iesu. ³⁸ O Iesu i tur tupukus, i tama der ra der muri, ra i ting der lena, “Asau ra mur nemi?” Der balu i lena, “Rabai,” (a kukuraino a Tene Ususer), “kura u kis awai?” ³⁹ O Iesu i balu der lena, “Mur iap sur mur in tama i.” I mo ra der muri, ma der tama a dino ra o Iesu i kis iai. Ra detul wanpat, i sa wat na pakano bung

pas, ma detul kis mukut tiro iai a kudulano lirop ra.

⁴⁰ Ara tagun aru musano ra der longoro a wasiso anun o Jon ma der mur o Iesu, a risano o Endru, a tisin o Saimon Pita. ⁴¹ A mugano utna ra o Endru i pami, i sio pas o Saimon a tisinolik, ra i inanos lena, “Met sa sio pas a Mesaia!” (a kukuraino a Karisito)†.

⁴² O Endru i ben pas o Saimon torom o Iesu. O Iesu i tama i, ra i watungi tano lena, “Ui o Saimon, a nutun o Jon, † din watung ui nam o Kepas.” (Una wasiso Grik di watungi nam o Pita, a kukuraino a wat.)

O Iesu i kabo pas o Pilip ma o Natanael

⁴³ Ara bung palu melet, o Iesu i nem na wan utong o Galili. I sio pas o Pilip, ra i watungi tano lena, “Un mur iau.” ⁴⁴ O Pilip, tagitong o Betsaida, a tamon anun o Endru ma o Pita. ⁴⁵ O Pilip i sio pas o Natanael, ra i inanos lena, “Met sa sio pas a musano ra o Moses i tumtumus mugu taru uni una Buk na Warkurai, ma a kum poropet kai det sa tumtumus mugu taru uni. I ra, o Iesu a te Nasaret, a nutun o Josep.” ⁴⁶ Ikut o Natanael i balu i lena, “O Nasaret! Pepetlai, tu wakak na utna ut in nanpat tagitiro iai?” O Pilip i balu i lena, “Un nan urin ma dar in nan sur un tama i.”

⁴⁷ O Iesu i tama pas o Natanael i wan nanan toromi, ra i watungi lena, “A te Israel mulus ut ri, ke tasman a torotoro.” ⁴⁸ O Natanael i ting o Iesu lena, “U tasman lan iau?” I balu i lena, “Ra o Pilip ke kabo pas ui utmakai, a sa tama mugu tar ui ra u kis taru nago utuntudu in nanai na fig.” ⁴⁹ O Natanael i watungi tano lena, “Tene Ususer, ui a Nutun o God, ui a King anun a taro Israel.” ⁵⁰ O Iesu i watungi tano lena, “Pepetlai u nurnur un iau, uni a inanos ui lena u kis taru nago utuntudu in nanai na fig? Numur un tama a kum lamlabino utna sakit in nanpat, in labo taun a utna ri u tama i.” ⁵¹ O Iesu i watung meleti lena, “A inanos mot nama lingmulus, mot in tama a langit in papos, ma a kum ensel anun o God det in nanan toto ma det in nanan pirso torom a Nutun a Musano.”

2

O Iesu i pukus a danim sur a wain

¹ Numur tan a ru bung, di pam a lukaro na unolin tong o Kana, una papor Galili. O nan o Iesu i wan una lukaro ra. ² Di saring

1:27: Jn 1:15 1:29: Ais 53:6-7; 1 Pit 1:18-19 1:30: Jn 1:15 1:32-33: Mt 3:16 1:34: Mt 3:17 1:36:

Jn 1:29 1:40: Mt 4:18-20 † 1:41: Mesaia, a du wasiso Ibru, ma una wasiso Grik, di watungi nama Karisito. O Iesu i a Mesaia, a musano ra o God i pilok pasi sur in ulaan a taro. A kum poropet tagun numugu det wasiso na poropet uni, lena in nanpat, ra a taro Juda det kis langlang suri. 1:42: Mt 16:18 † 1:42: O Jon ra a taman o Pita, awu sur o Jon a Tene Baptaiso. 1:45: Lo 18:18; Ais 7:14; 9:6; Jer 23:5; Ese 34:23 1:49: Mt 14:33; 16:16; Mk 3:11

1:51: Stat 28:12

o Iesu ma anun a kum nat na ususer kai sur det in nan una lukaro na unolin. ³ Ra a wain i sa rop, o nan o Iesu i watungi tano lena, "A wain i sa rop." ⁴ O Iesu i balu i lena, "Nang, ilai ra u inanos iau nami? Anung a du bung ke sot utmakai." ⁵ O nan o Iesu i watungi tan a kum tultul lena, "Mot in pami kut asau ra in watungi tamot."

⁶ Tiro iai, a wonomnin lamlabino koto ra di pami nama wat kura di utur tari sur a nginigis, elar ut nama warkurai tagun a lotu anun a taro Juda. Unin tekteken nokoto ri, di ser ubukusi nama ru noino galen na danim o a tulu noino. ⁷ O Iesu i watungi tan a kum tultul lena, "Mot in ubukus tar a kum koto nama danim." Ra numur det titior bukus rop tar det. ⁸ Ra o Iesu i tulu det lena, "Mot in itup pas lako danim tagun a kum koto, ma mot in losi torom a mugumugu na lukaro." Ra det pami ut lenra. ⁹ A mugumugu na lukaro i inum tama a danim ra, ra i sa wain rop. Ke tasmani lena a wain ri i wan tagai. A kum tultul kut ra det itupi det tasmani. Ra i kabo gisen pas a musano ra di unolini una bung ra, ¹⁰ ma i watungi tano lena, "A taro rop det ser tabor mugu a taro nama wakak na wain. Ra det sa inum pas a susut na wain, det in tabor det mukut nama wain ra ke wakak bing. Ikut ui, u etabor maragom nama wain ra i wakak sakit."

¹¹ Iri a mugano ukinalong ra o Iesu i pami. I pami tong o Kana una papor Galili. A ukinalong ra, i ese puaso anun a minamar, ma anun a kum nat na ususer det nurnur uni.

¹² Numur, ra a lukaro na unolin i sa rop, i wan utong o Kapernaum. Det wan tomo nam o nano, a kum tistisino ma anun a kum nat na ususer. Det kis tiro iai a kabano bung ut.

O Iesu i lakro ru a kum tene siuru gusun a rumu na etabor

(Mt 21:12-13; Mk 11:15-17; Lk 19:45-46)

¹³ Ra a labino bung na lotu na Wanlakai anun a taro Juda i sa milau, o Iesu i wan usapat o Jerusalem. ¹⁴ Tiro ubalan in noworo ina rumu na etabor, i tama a taro ra det siuru a kum bulumakau, a kum sipsip, ma a kum tabun. I tama i kai a kum tene keles mani, kura det kis nisan anundet a kum kabulu. ¹⁵ I mo ra i iris pas a kum warus sur in pam in narus na inaim, ra i lu pirso ru det rop nami. I lu pirso ru a kum bulumakau ma a kum sipsip, ma i woro sarara ru a kum mani anun a kum

tene keles mani[†], ma i bulus ru anundet a kum kabulu. ¹⁶ Ma i watungi tandet ra det siuru a kum tabun, "Mot in los pirso ru det taginin! Gong mot pukus a rumu anun o Tita sur a rumu na siuru!" ¹⁷ Anun a kum nat na ususer det nuk pas a wasiso una Buk Tabu lena, "An iru uni anung a labino marmaris sur anum a rumu." *Sng 69:9*

¹⁸ A taro Juda det wanpat melet torom o Iesu ma det tingi lena, "Asi na ukinalong un ese met nami, sur met in tasmani lena u utur ukai a warkurai ra u pam a kum utna ri nami?" ¹⁹ O Iesu i balu det lena, "Mot in rege ru a rumu ri anun o God, ma an utur melet pasi kut un lako tulu bung." ²⁰ Det ting o Iesu lena, "Di pam tar a rumu ri una wat na noino ma wonom na kilalo, ra ui, pepetlai, un pam melet pasi kut un lako tulu bung?"

²¹ O Iesu i wasiso una rumu anun o God, i wasiso elelar ut una pinino. ²² Numur, ra o Iesu i sa laun pat melet gusun a minat, anun a kum nat na ususer det nuk melet pas a wasiso ri. Numur det nurnur maragom una Buk Tabu, ma una wasiso ra o Iesu i sa watung tari.

²³ O Iesu i kis sapat o Jerusalem una labino bung na lotu na Wanlakai, ra a susut na taro det tama a kum ukinalong ra i pami, ma det nurnur una risano. ²⁴ Ikut o Iesu ke nurnur un taio, uni i tasman a taro rop. ²⁵ Ke sibo sur taio ra in inanos i una petutna anun a taro, uni i ut i tasman wakak a balandet.

3

O Iesu der nam o Nikodimas

¹ Ara musano tagun a kum Parisi, a risano o Nikodimas, i ara mugumugu anun a taro Juda. ² I wan torom o Iesu una ra bung na mirum ma i watungi tano lena, "Tene ususer, met tasman ui ra ui a tene ususer, ra o God i tulu ru ui. Katu musano in pam lar pas a kum ukinalong ra u ser pami, ra o God ke kis tomo nami." ³ O Iesu i balu i lena, "A inanos ui nama lingmulus, osi ra ka di usus matoki, ken tama lar pas a matanitu anun o God." ⁴ O Nikodimas i tingi lena, "Din usus matok petlan pas taio ra i sa takano? Pepetlai, in ruk melet unin balan o nano sur in usus matoki?"

⁵ Ra o Iesu i balu i lena, "A inanos ui nama lingmulus, osi ra ka di usus matoki una danim ma una nion, ken ruk lar pas una matanitu anun o God. ⁶ Osi ra di ususi una pinindi, i ra a pinindi ut, ma osi ra di ususi una nion, i ra a nion ut. ⁷ Gong u

2:4: Jn 7:30; 8:20 * 2:6: 75 lita o 115 lita. 2:12: Mt 4:13 2:13: Kis 12:1-27 † 2:15: A mani anun a gapman Rom det ser ruk nami una rumu na etabor, ra det kelesi sur a mani sur det in kul a takis nami tagun a rumu na etabor. 2:19: Mt 26:61; 27:40 2:21: 1 Kor 6:19 2:22: Lk 24:6-8; Jn 12:16 2:23: Jn 7:31 3:1: Jn 7:50; 19:39 3:3: Mt 18:3; 1 Pit 1:23 3:5: Ese 36:25-27 3:6: Jn 1:13

kisin ra a watungi tam lena din usus matok mot. ⁸ A wuwu i wan tuptupukus elar nam anun a nemnem. U longoro a wungu ino, ikut, ko tasmani lena i wan tagai, ma i wan urai. Lenkutkai ra torom det rop ra a Nion i usus matok det.” ⁹ Ra o Nikodimas i tingi lena, “In pepetlai a utna ri?” ¹⁰ O Iesu i balu i lena, “Ui a labino tene ususer anun a taro Israel, ma ilai ra ko tasman a kum utna ri?” ¹¹ A inanos ui nama lingmulus, met watung asau ra met tasmani, ma met wasiso un asau ra met sa tama tari, ikut ka mot nurnur un asau ra met wasiso uni. ¹² A inanos mot una kum utna taginin upiso ma ka mot nurnur uni. Mot in nurnur pepetlai ra an inanos mot una kum utna tagisapat una langit? ¹³ Kataio i wan pas utmakai usapat netes una langit, a Nutun a Musano sot kut ra i wan pirsu tagisapat netes una langit. ¹⁴ Numugu, o Moses i ukete in nusui unin nanai una nubual kalako taro uni. Lenkutkai ra din ukete a Nutun a Musano usapat, ¹⁵ sur det rop, ra det nurnur uni, det in laun tukum.

¹⁶ “O God i maris a rakrakon bual, ra i pitar tar o Nutunu ara sot kut, sur osi ra in nurnur uni, in laun tukum ma ken iru. ¹⁷ O God ke tulu tar o Nutunu urin una rakrakon bual sur in pitar a warkurai na minabalu torom a rakrakon bual. I tulu tari kut sur in ulaun a rakrakon bual. ¹⁸ Osi ra i nurnur uni, ka din pitar a warkurai na minabalu toromi. Ikut, osi ra ke nurnur, i sa tur una dedek na warkurai na minabalu uni ke nurnur un ara Nutun o God sot kut. ¹⁹ Iri a warkurai anun o God: A talapor i sa wanpat una rakrakon bual, ikut a taro det nem a dumirum kut ma a talapor awu, uni det pam a kum sakino petutna. ²⁰ Det rop ra det ser pam a kum sakino petutna, det nget a talapor, ma ka det wan suri, sako din tama pupuaso pas anundet a kum sakino petutna. ²¹ Ikut, osi ra i murmur a lingmulus, i ser wanpat una talapor, sur din tama pupuaso i lena anun a kum pinapam i kibino ut tan o God.”

O Jon a Tene Baptaiso i wasiso talapor un o Iesu

²² Nurnur, o Iesu tomo nam anun a kum nat na ususer det wan tagisapat o Jerusalem sur ara tamon lik kura una papor Judia. Det kis tiro iai, ma i baptaiso a taro. ²³ O Jon kai i baptaiso tong o Ainon milau o Saleim, uni a susut na danim kura iai. A taro det wanan toromi sur in baptaiso det. ²⁴ A utna ri i wanpat, ra kabaut di uruk o Jon una karabus. ²⁵ A ramano kum nat na

ususer anun o Jon det wasiso na engaras tomo nama ara te Juda una nirurus keles, elar nama petutna una lotu Juda. ²⁶ Det wan torom o Jon ra det watungi tano lena, “Tene ususer, a musano ra mur kis tomo pas nami tong un ara papor danim Jodan, i ra u inanos taru uni, uniri kurong mo kai i baptaiso. Ra a taro rop det wan mukut toromi.” ²⁷ O Jon i watungi tandet lena, “Kataio in pam pas tu utna ra o God ke pitar tari tano. ²⁸ Mot ut mot sa longoro tari ra a watungi lenri, ‘Awu sur iau a Karisito. O God i tulu ru iau kut sur an mugu tano.’ ²⁹ Tu musano ra i nolin nam tu ino, anun a ino ut ra. A pasan a musano ra i nolin, in tur ma in longoro suri. Ra in longoro in nalngano, in gas doko. Uniri, anung a gasgas i elar nam anun a gasgas, ra anung a gasgas i sot maragom. ³⁰ O Iesu ut in labo nanan ma iau an natino nanan.

O naro ra i wan pirsu tagisapat una langit

³¹ “O naro ra i wan pirsu tagisapat una langit, i labo sakit taun a taro rop. A musano ra taginin upiso, taginin ut upiso, ma i wasiso kut una kum utna taginin upiso. I ra i wan tagisapat una langit, i labo sakit taun a taro rop. ³² Ma i wasiso talapor una kum utna ra i tama tari ma i longoro tari, ikut kataio i nurnur una nun a wasiso. ³³ Ikut det ra det nurnur una nun a wasiso, det mulaot lena o God i a lingmulus. ³⁴ I ra o God i tulu ru i, i wasiso nama wasiso anun o God, uni o God i pitar rop tar a Tokodos na Nion toromi. ³⁵ O Tamano i nem o Nutunu, ra i pitar rop tar a kum utna ulamano. ³⁶ Osi ra i nurnur una Nutun o God, i sa utur ukai a nilaun tukum. Ikut, osi ra i rosumur gusun o Nutunu, ken utur ukai a nilaun, uni a kankan anun o God kura uni.”

4

O Iesu i wasiso tomo nama ino Samaria

¹ A kum Parisi det longoro i lena o Iesu i ben pas a susut na taro na ususer, ra det susut taun a taro na ususer anun o Jon, ma i baptaiso det. ² Ikut o Iesu ut ke baptaiso taio, anun a kum nat na ususer kut det baptaiso. ³ Ra o Iesu i sa tasmani lena a kum Parisi det sa longoro i, i wan tagitiro una papor Judia ra i millet melet utong una papor Galili. ⁴ Una nun a inawan i wan potot tong una papor Samaria.

⁵ Tiro una papor Samaria, i wanpat una tamon Sikar. I milau i kut a du piso ra, un ra bung ut, o Jekop i tabor tar o nutunu,

o Josep nami. ⁶ In nutung na danim, ra o Jekop i sa kil tari, kura tiro iai. O Iesu i taramo a pinino i tungulu una nun a walos na inawan, ra i kis mo tiro nisan in nutung na danim ra. Una du bung ra, in matanas i sa kis lekeleke. ⁷ Ara ino Samaria i wanpat sur in itup, ra o Iesu i watungi tano lena, “Un tabor iau nam lako danim.”

⁸ Anun a kum nat na ususer det sa wan taru utiro una tamon, sur det in kul utna na inangon. ⁹ A ino Samaria i balu o Iesu lena, “Ui a te Juda, ma iau a ino Samaria. Sur asau ra u saring iau sur lako danim?” Uni a kum te Juda ka det emarom nama kum te Samaria. ¹⁰ Ikut o Iesu i balu i lena, “Ra u tasman a etabor anun o God, ma u tasman osi kai ra i saring ui sur lako danim, un saring, ma in tabor ui nama danim na nilaun.” ¹¹ A ino i watungi tano lena, “Labino, katu utna na ititup anum, sur un itup danim nami. In nutung na danim ri i dordorong doko. Ma tagai a danim na nilaun ra? ¹² U nuki lena u labo taun a tubundat o Jekop ra i tabor met namin nutung na danim ri? Det tomo nama kum nutnutunu ma anun a kum wewegua kai, det rop det ininum taguni.”

¹³ O Iesu i balu i lena, “Det rop ra det inum a danim ri, det in muruk melet kut. ¹⁴ Ikut det ra det in inum a danim ra an tabor det nami, ka det in muruk melet mo. A danim ra an tabor det nami, in elar nam ara matmatano danim una nundet a nilaun, ra in burburak pat ma in tabor det nama nilaun tukum.” ¹⁵ A ino i watungi tano lena, “Labino, un tabor iau nama danim ra, sur gong melet mo a muruk, ma gong mo a wan liklik urin sur an itup.”

¹⁶ Ra o Iesu i watungi tano lena, “Un nan ma un ben pas anum a musano, ra mur in millet melet urin.” ¹⁷ A ino ra i balu i lena, “Katu musano anung.” O Iesu i watungi tano lena, “A lingmulus ut ra u watungi lena katu musano anum. ¹⁸ U sa nolin pas nama limo na musano, ma ara, ra uniri u kis tomo nami, awu sur anum a musano. A lingmulus ut ra u watungi tang.” ¹⁹ A ino i balu i lena, “Labino, uniri, a tasmani lena ui a poropet. ²⁰ A kum tumtubu met tagun numugu det ser lotu torom o God una tangai ri, ikut mot a taro Juda mot watungi lena, din lotu torom o God sapat kut o Jerusalem.”

²¹ Ra o Iesu i watungi tano lena, “Tama i, a lingmulusino ri an watungi tam, a du bung in nanpat, ra ka mot in lotu mo torom o Tita una tangai ri, ma sapat kai o Jerusalem, awu. ²² Mot a kum te Samaria ka mot

tasman osi ra mot ser lotu toromi, ma met a taro Juda met tasmani ut osi ra met ser lotu toromi, uni a pinapam anun o God ra i ulaun a taro, i wanpat ut tagun a taro Juda. ²³ A du bung in nanpat ma iri i sa wanpat, ra a kum tene lotu mulus det in lotu torom o Tita una nion ma una lingmulus. A kum ngas na tene lotu lenra, o Tita i nem doko det. ²⁴ O God a nion. Det ra det ser lotu toromi, det in lotu ut una nion ma una lingmulus.”

²⁵ Ra a ino i watungi tano lena, “A tasmani lena a Mesaia ra di watungi nama Karisito, in nanpat, ma in upuaso a kum utna rop torom dat.” ²⁶ Ma o Iesu i balu i lena, “Iau ut ri, a wasiso torom ui.”

²⁷ Una du bung ut ra, a kum nat na ususer anun o Iesu det millet melet. Det tama o Iesu i wasiso tomo nam ara ino, ra det kisin. Ikut katutaio tagun det i iting lena, “U nem asau?” o lenri, “Sur asau ra u wasiso tomo nami?” ²⁸ A ino ra i wan pas gusun anum in nadanim, i millet melet utiro utamon, ra i inanos a taro tiro iai lena, ²⁹ “Ai, mot iap, sur mot in tama ara musano, i inanos iau una kum utna rop ra a sa pam tari numugu. Kutiro i a Mesaia?” ³⁰ Ra a taro ra, det wan pas gusun a tamon, ma det wan torom o Iesu.

³¹ Ra a ino i sa wan taru, a kum nat na ususer det inanos dekdeki lena, “Tene Ususer, un nangon pas.” ³² Ikut o Iesu i balu det lena, “Anga utna na inangon kuri ut, ka mot tasmani.” ³³ A kum nat na ususer det ting etetalai det lena, “Kutiro taio i sa tabor tari nam lako utna na inangon?” ³⁴ O Iesu i watungi tandet lena, “Anga utna na inangon iri i, an pam sot pas a nemnem anum o naro ra i tulu ru iau urin, ma an urop anum a pinapam. ³⁵ Mot ser watungi lenri, ‘A watnin kalang utnakai kura ra din pasong maragom.’ Ikut a watungi tamot lena: Mot in tamtama tokodos usa numugu, ma mot in tama a kum kinobot, det sa taka rop, ma i sa sot sur din pasong. ³⁶ Uniri a musano ra i pasong i los anum a ikul. Ma a win anum a pasong, a utna sur a nilaun tukum, sur osi ra i marmarut ma osi ra i pasong, der in gas tomo. ³⁷ A wasiso ra a taro det ser watungi, i lingmulus ut lenri, ‘Ara i marmarut, ma ara i pasong.’ ³⁸ A tulu mot sur mot in pasong una kinobot ra mot ut ka mot marut tari. Ara taro gisen ut det pam tari, ma mot, mot los a tinibo mukut tagun anundet a pinapam.”

A kum te Samaria det nurnur

³⁹ A susut na te Samaria tagun a tamon ra, det nurnur un o Iesu. Det nurnur kibino

una wasiso anun a ino, ra i watungi tandet lena, “I inanos iau una kum utna rop ra a sa pam tari numugu.”

⁴⁰ Ra a taro Samaria det wan torom o Iesu, det saringi sur in kis nisanDET, ra i kis pas aru bung tiro iai. ⁴¹ A susut melet det nurnur, kibino una nun a wasiso. ⁴² Det watungi tan a ino ra lena, “Uniri met sa nurnur, awu sur una wasiso kut ra u watungi un o Iesu, awu. Met ut, met sa longoro i, ma met sa tasman mulusi lena, i a Tene Ulaun anun a rakrakon bual.”

O Iesu i ulangolango pas a nutun ara mugumugu

⁴³ Ra aru bung i sa rop, o Iesu i wan utong o Galili. ⁴⁴ O Iesu ut i sa watung tar a wasiso lenri, “A poropet, a taro una nun a tamon ka det ser ru i.”

⁴⁵ A taro tagitong o Galili det sa wan pas una labino bung na lotu na Wanlakai sapat o Jerusalem, ma det sa tama tar a kum utna rop ra o Iesu i pami sapat iai. Ra o Iesu i wanpat tong o Galili, a taro det gas pasi.

⁴⁶ O Iesu i wan melet utong o Kana una papor Galili, a tamon ra i pukus tar a danim sur a wain iai. Ara mugumugu tagun a gapman, ra i papam ututudu ina king, o nutunulik a musano i misait tong o Kapernaum. ⁴⁷ I longoro i lena o Iesu i wan tagisapat o Judia utong o Galili, ra i wan toromi, ma i saringi sur in nan utong o Kapernaum sur in ulangolango pas o nutunu a musano, i milau mo sur in mat. ⁴⁸ O Iesu i watungi tano lena, “Ra ka mot tama a kum utna na ukisin ma lako kum ukinalong, ka mot in nurnur ut.” ⁴⁹ Ra a mugumugu anun a gapman i watungi lena, “Labino, dar in nan lakit sako o nutunglik in mat.” ⁵⁰ O Iesu i watungi tano lena, “Un nan kut, o nutumlik in laun.” A musano ra i nurnur una wasiso anun o Iesu, ra i wan.

⁵¹ Ra ke wanpat utmakai, anun a kum tultul det wan barato i ra det inanos i lena, “O nutumlik i sa langolango.” ⁵² I ting det lena, “Asi na du bung mulus ra o nutunglik i langolango melet uni?” Det balu i lena, “Nubung, una ara pakano bung una lirop a mararong i rop gusuni.” ⁵³ A taman a nat i nuk melet pas a du bung ra o Iesu i watungi toromi lena, “O nutumlik in laun.” Ra i tasman lele i lena, a du bung ut ra o Iesu i wasiso uni, a mararong i rop. I mo ra det tamtamano rop det nurnur maragom un o Iesu. ⁵⁴ A utna ri, i a manru na ukinalong o

Iesu i pami tong o Galili, ra i wan tagisapat o Judia.

5

O Iesu i ulangolango pas ara musano

¹ Numur, o Iesu i wan usapat o Jerusalem sur a labino bung na lotu anun a taro Juda. ² Ara kabopolo, di watungi nam o Besata una wasiso lbru, i kis sapat o Jerusalem, milau una labino matansako ra di watungi nama “Matansako na sipsip”. Ma a limo na parada det tur talilis pas a kabopolo ra. ³⁻⁴ A susut na taro ra det misait nama wur ngas na misait, det ser kis tiro iai, a kum pulu, det ra ka det ser wan ma det ra a pinpinin det i mat.*

⁵ Ara musano i kis tiro iai i misait pas a tulu noino ma tiwal na kilalo. ⁶ O Iesu i tama pas a musano ra i inep taru tiro iai. I tasmani lena a musano ra i sa suano i a misait uni, ra i tingi lena, “Pepetlai, u nemi sur un langolango?” ⁷ A musano ra i balu i lena, “Labino, kataio i ser warut iau sur in los tar iau una du bung ra a danim i tonton uni. Ra a nem na wan sur an rurus, ara gisen kut in kalabor mugu batbat pas iau.” ⁸ O Iesu i watungi tano lena, “Un katutur, a los anum a bat ra un nan.” ⁹ Uniutur a musano ra i langolango, i tur, ma i los pas anun a bat, ra i wan.

A utna ri i wanpat una Bung na Sabat. ¹⁰ I mo ra a ramano kum te Juda det watungi tan a musano ra o Iesu i ulangolango pasi lena, “A Sabat ri! I tabu sur din los a bat uni.” ¹¹ Ra i balu det lena, “A musano ra i ulangolango pas iau, i watungi tang lena, an los pas anung a bat ra an nan.” ¹² Det tingi lena, “Osi na musano ra i watungi tam lena un los pas anum a bat ma un nan?” ¹³ Ikut a musano ra ke tasman osi ra i ulangolango pasi, uni o Iesu i wan epotor tan a kunur na taro.

¹⁴ Numur ut, o Iesu i barato pas a musano ra una rumu na etabor. I watungi tano lena, “Tama i, uniri u sa langolango. Gong melet mo u pam tu sakino, sako numur tu laulau na utna sakit in nanpat un ui.” ¹⁵ A musano ra i wan ma i inanos a kum te Juda lena, “O Iesu ut i ulangolango pas iau.” ¹⁶ Ra uniri, a kum te Juda det turpasi sur det in pam a kum sakino petutna torom o Iesu, uni i pam a kum utna ri una Bung na Sabat. ¹⁷ O Iesu i watungi tandet lena, “O Tita ke mana nama pinapam na warut, lenkutkai ra iau kan mana nama pinapam na warut

4:42: 1 Jon 4:14 **4:44:** Mt 13:57 **4:45:** Jn 2:23 **4:46:** Jn 2:1-11 **4:47:** Mt 8:5-6 **4:48:** Jn 2:18; 1 Kor 1:22 **4:50:** Mt 8:13 **4:54:** Jn 2:11 * **5:3-4:** Una ramano kum du buk una wasiso Grik, a ramano kum wasiso kai i kis una vers ri. I lenri: *Det kis langlang sur a danim ra in tonton. A ramano kum du bung, a ensel anun a Labino in nan pirso utiro una kabopolo ra, ma in uttononi. Osi kut ra in rurus mugu una kabopolo una du bung ra i tonton, in ulangolango mut gusun anun a misait.* **5:8:** Mt 9:6 **5:10:** Neh 13:19; Jer 17:21 **5:18:** Mt 26:4; Jn 7:1; 10:30

torom a taro.”¹⁸ Iri a kibino ra a kum te Juda det nem doko i sur det in um doko o Iesu. Det kankan torom o Iesu, awu sur i kibino kut ra i papam una Bung na Sabat. A kibino utkai ra o Iesu ut i watung o God lena o Tamano, ma una wasiso ri, i elaro i ut nam o God.

O Tamano i pitar a warkurai torom o Nutunu

¹⁹ O Iesu i balu det lena, “A inanos mot nama lingmulus, a Nutun o God ken pam oros pas tu utna elar nam anun a nemnem, in pami kut a kum utna ra i tama o Tamano i ser pami. Uni a kum utna rop ra o Tamano i pami, o Nutunu kai in pami.”²⁰ O Tamano i nem o Nutunu, ma i ese i una kum utna rop ra i ser pami. Ma in ese i kai una kum utna ra i labo taun a kum utna ri, sur mot in kisin uni.²¹ O Nutunu in tabor det ra i nemi sur in tabor det nama nilaun, elar nam o Tamano i ukatur pas a kum minat, ma i tabor det nama nilaun.²² O Tamano ken warkurai taio, ikut i pitar tar a warkurai rop tan o Nutunu, sur in warkurai nami,²³ sur a taro rop det in ru o Nutunu elar nami ra det ru o Tamano. Osi ra ke ru o Nutunu ke ru i kai o Tamano, i ra i tulu ru i urin.

²⁴ “A inanos mot nama lingmulus, osi ra i longoro anung a kum wasiso ma i nurnur un o naro ra i tulu ru iau urin, i sa utur ukai a nilaun tukum, ma ken iru una warkurai. I sa wan gusun a minat sur a nilaun tukum.”²⁵ A inanos mot nama lingmulus, a du bung in nanpat, ma iri i sa wanpat, ra a kum minat det in longoro in nalngan a Nutun o God, ma det ra det longoro i det in laun.²⁶ O God a kimkibin a nilaun. Ma lenkutkai ra i pitari torom o Nutunu sur i kai a kimkibin a nilaun.²⁷ O God i pitar tar a dekdek tano sur in warkurai a taro nami, uni, i a Nutun a Musano.²⁸ Gong mot kisin una wasiso ri. A du bung in nanpat, ra det rop ra det inep una kum kulam na minat det in longoro in nalngano.²⁹ Det in katatur melet gusun a kum kulam na minat. Det ra det sa pam tar a wakak na petutna det in katatur melet gusun a minat sur a nilaun tukum. Ma det kai ra det sa pam tar a sakino petutna, det in katatur melet gusun a minat sur a iniru tukum.”

A wasiso talapor un o Iesu

³⁰ O Iesu i wasiso utmakai torom a kum te Juda lena, “Ka pam oros tu utna elar nam anun a nemnem. A warkurai nama utna a longoro i. Ma anung a warkurai i tokodos, ma ka mur a nuknuking, a ser muri ut a

nuknukin o naro ra i tulu ru iau urin.³¹ Ra an wasiso talapor un iau ut melet, anung a wasiso talapor ken maut.³² Ikut ara gisen ut i wasiso talapor un iau, ra a tasmani lena anun a wasiso talapor un iau i lingmulus sakit.

³³ “Mot tulu ru ara taro torom o Jon a Tene Baptaiso, ra i wasiso talapor torom det un iau. Ma anun a wasiso i lingmulus.

³⁴ Ka sibo sur lako taro det in wasiso talapor un iau, ikut a watungi lenri sur din ulaun mot.³⁵ O Jon i elar nama lam, ra i kunabor ma i talapor, ma mot gas ra mot tamtama lilik pas kut una talaporino.

³⁶ “Ikut an inanos mot una wasiso talapor un iau, ra i labo taun a wasiso talapor anun o Jon un iau. A kum pinapam ra a ser pami, det wasiso talapor un iau lena, o Tita i tulu ru iau urin. O Tita i pitar tar a kum pinapam ra tang, sur an pami.³⁷ Ma o Tita, i ra i tulu ru iau urin, i sa wasiso talapor taru un iau. Ka mot longoro in nalngano, ma ka mot tama tari kai in matano.³⁸ Ma ka mot utur ukai anun a wasiso una kum balamot, uni ka mot nurnur un o naro ra di tulu ru i urin.³⁹ Mot ser luki ut a Buk Tabu, uni mot nuki lena mot in los a nilaun tukum uni. Ikut a Buk Tabu kai i wasiso ut un iau!⁴⁰ Ikut, mot a kum te Juda, ka mot nem na wan torom iau sur mot in los a nilaun.

⁴¹ “Ka ling sur a taro det in ulabo pas iau.⁴² Ikut a tasman mot ut lena, ka mot nem o God nama balamot mulus.⁴³ A wanpat nama risan o Tita, ma ka mot gas pas iau. Ikut ra taio gisen in nanpat nama risano ut, i ra, mot in gas pasi.

⁴⁴ “Mot, mot nemi sur a taro det in ulabo pas mot, ikut a wasiso na ululabo anun o God, i ra ara God sot kut, ka mot tiktikin wakak suri. I mo ra ka mot nurnur un iau.⁴⁵ Gong mot nuki lena iau an takun mot torom o Tita, awu. O Moses ra mot nurnur uni lena in warut mot, i ut in takun mot.⁴⁶ Ra gunuk mot nurnur un o Moses, mot in nurnur utkai un iau, uni anun a kum tumtumus i wasiso ut un iau.⁴⁷ Ikut ka mot nurnur una kum tumtumus anun o Moses, ra mot in nurnur pepetlai una anung a kum wasiso?”

6

O Iesu i tabor a limo na arip na musano (Mt 14:13-21; Mk 6:30-44; Lk 9:10-17)

¹ Numur, o Iesu i wan kutus una du tasi Galili, ra di watungi kai nama du tasi Taiberias.² A labino kunur na taro det muri, uni det sa tama tar a kum ukinalong

ra i pami una kum misait. ³ O Iesu i wan toto usapat una du tangai lik ma i kis tomo nam anun a kum nat na ususer. ⁴ Ma a labino bung na lotu na Wanlakai anun a taro Juda i sa milau sur in nanpat.

⁵ O Iesu i tamtama tokodos, ra i tama pas a labino kunur na taro det wan toromi, i watungi tan o Pilip lena, "Dat in kul lako utna na inangon awai sur dat in tabor a taro ri nami?" ⁶ O Iesu i watungi lenri sur in lari kut o Pilip. Uni i ut i sa tasman asau ra in pami. ⁷ Ra o Pilip i balu i lena, "Lako utna na inangon ra din kul pasi nam lako ru mar na denaria,* ken elar nam det, a lililik kut ra det in nani." ⁸ Ara melet tagun anun a kum nat na ususer a risano o Endru, a tisin o Saimon Pita, i watungi tan o Iesu lena, ⁹ "Ara natlik kuri i los a limanin beret kut ra di pami nama bali, ma arin natnat na kiripo kai. Ikut pepetlai, in elar ut nama kunur na taro ri?"

¹⁰ A dino ra, in wuliso rop kut, ra o Iesu i tulu anun a kum nat na ususer sur det in ukis a taro tiro iai. A kunur na taro ra, a niluluk ina kum musano kut i elar nama limo na arip. ¹¹ O Iesu i los pas a limanin beret, i watung wakak pas torom o God uni, ma i tibo a taro nami, ra det kis tiro iai. I tibo det kai nam arin kiripo, elar nam anundet a nemnem. ¹² Ra det sa masur rop, i watungi tan anun a kum nat na ususer lena, "Mot in ubek tomo wakak a utna rop ra det wangon kopos pas uni, sur gong di ban laulau a utna na inangon." ¹³ Ra det ubek tomo rop pas a utna ra a taro det wangon kopos pas uni, ma det song bukus pas a noino ma aru rat tagun a limanin beret ra. ¹⁴ A taro det tama a ukinalong ri i pami, ra det watungi lena, "I lingmulus ut, a musano ri, i a poropet ra di watungi lena in nanpat urin una rakrakon bual." ¹⁵ Ra o Iesu i sa tasmani lena, det nem na wan toromi sur det in ungongos pasi sur in king, i wan gisen pas gusun det usapat netes una tangai.

*O Iesu i wan sapat netes una tasi
(Mt 14:22-33; Mk 6:45-52)*

¹⁶ Ra i sa lirop matano mirum, a kum nat na ususer anun o Iesu det wan piso unago una du tasi Galili. ¹⁷ Det kas taru una pot, ra det turpasi sur det in nan kutus una du tasi Galili sur o Kapernaum. I sa mirum, ma o Iesu ke wanpat utmakai torom det. ¹⁸ A dekdek na wuwu i wanpat ma a top i umenene det. ¹⁹ Ra det sa ulusu bakbak, i elar nama limo na kilomita, det tama pas o

Iesu i wan sapat netes una tasi torom det una pot. Ra det ngara doko. ²⁰ Ikut o Iesu i watungi lena, "Iau kut ri. Gong mot ngara." ²¹ Numur, det gas pasi sur in kas una pot, ra uniuutra, det sot una nubual ra det wan suri.

A taro det sisio sur o Iesu

²² Una bung numur, a kunur na taro ra det kis tong una ra papor tasi, det tasmani lena ara pot sot kut i kis tiro iai. Det tasmani lena, a kum nat na ususer kut det wan, ikut o Iesu ut ke kas tomo nam det. Det kut det wan tagitiro iai. ²³ A ramano kum pot tagitong o Taiberias det sot milau una nubual ra a Labino i watung wakak una beret, ma a kunur na taro det wangon iai. ²⁴ Ra a kunur na taro det sa tasmani lena, o Iesu ma anun a kum nat na ususer ka det kis tiro iai, det kas una kum pot ma det wan utong o Kapernaum ra det sisio sur o Iesu.

O Iesu i a beret na nilaun

²⁵ A taro det sio pas o Iesu tong una ara papor du tasi Galili, ra det tingi lena, "Tene Ususer, nangisin kut ra u wan taru urin?" ²⁶ O Iesu i balu det lena, "A inanos mot nama lingmulus, awu sur mot sisio sur iau uni mot tama a kum ukinalong ra a pami, awu. Mot sisio kut sur iau uni mot wan a beret ma mot masur nami. ²⁷ Gong mot papam kut sur a utna na inangon ra i ser mereseng. Mot in papam sur a utna ra in kis tukum sur a nilaun kura numur, ra a Nutun a Musano in tabor mot nami. Uni o Tamano, o God i sa ese tari lena i mulaot un asau ra a Nutun a Musano i pami." ²⁸ Det tingi lena, "Asau met in pami sur met in pam a pinapam anun o God?" ²⁹ O Iesu i balu det lena, "Iri a pinapam anun o God, ra mot in nurnur un o naro ra di tulu ru i urin." ³⁰ Ra det ting meleti lena, "Asi na ukinalong un pami sur met in tama i, ma met in nurnur un ui? Asau un pami?" ³¹ A kum tumtubu met tagun numugu, det wan a mana† una nubual kalako taro uni, elar ra di sa tumus tari una Buk Tabu lena, 'I tabor det nama beret tagisapat una langit ma det wani.'" *Sng 78:24*

³² O Iesu i watungi tandet lena, "A inanos mot nama lingmulus, awu sur o Moses ra i tabor det nama beret tagisapat una langit, o Tita ut i tabor det nami. Ra uniri, i tabor mot nama beret mulus tagisapat una langit. ³³ I ra i wan pirso tagisapat una langit, i ut a beret anun o God, ma i pitar a nilaun torom a taro una rakrakon bual."

* 6:7: Ara denaria i elar nama ikul anun ara musano una ra bung na pinapam. 6:15: Jn 18:36 6:27: Jn 6:48-58 6:29: 1 Jon 3:23 6:30: Mt 16:1; Jn 2:18 6:31: Kis 16:14-15; Nam 11:7-9 † 6:31: A mana i ara ngas na utna na inangon, i elar nama beret. O God i pitar pirso i, tagisapat una langit, ma o Moses i tabor a taro Israel nami, una nubual kalako taro uni, una nundet a inawan tagisa o Ijip utong o Kenan. 6:35: Jn 4:14

³⁴ Det watungi tano lena, “Labino, un tabor met nama beret ra, una kum bung rop.” ³⁵ O Iesu i balu det lena, “Iau ut a beret na nilaun. Osi ra in nan torom iau ken murak, ma osi ra in nurnur un iau ken muruk melet mo. ³⁶ A sa watung tari tamot lena mot sa tama tar iau, ikut ka mot nurnur. ³⁷ Det rop ra o Tita i pitar tar det tang, det in nan torom iau, ma osi ra in nan torom iau kan lu ru i. ³⁸ Uni a wan pirso tagisapat una langit sur an muri ut a nemnem anun o Tita, i ra i tulu ru iau urin. Awu sur a wan pirso sur an mur a nuknuking, awu. ³⁹ Ra iri a nemnem anun o Tita, i ra i tulu ru iau urin, lena, gong taio tagun det ra i sa pitar tar det tang in iru. An ukatatur pas det rop melet gusun a minat una bung na warkurai. ⁴⁰ Una nemnem anun o Tita, det rop ra det tamtama torom o Nutunu ma det nurnur uni, det in laun tukum, ma iau an ukatatur pas det gusun a minat una bung na warkurai.”

⁴¹ A ramano kum te Juda det wasiso na ururai eno un o Iesu, uni i watungi lena, “Iau a beret ra i wan pirso tagisapat una langit.” ⁴² Ra det watungi uni lena, “O Iesu a nutun o Josep kut. Dat tasman o tamano ma o nano. Iai ra i watungi lena i wan pirso tagisapat una langit?” ⁴³ O Iesu i watungi tandet lena, “Gong mot wasiso na ururai eno. ⁴⁴ O Tita i tulu ru iau urin. Kataio in pet lar pasi sur in nan torom iau, ra o Tita ken ben tari torom iau. Ra o Tita in ben tari torom iau, iau ut an ukatatur pasi gusun a minat una bung na warkurai. ⁴⁵ A kum propet det sa tumus tari lena, ‘O God in ususer det rop.’”

Ais 54:13

Det rop ra det longoro o Tita ma det ususer tano, det in nan torom iau. ⁴⁶ Katutaio i tama tar o Tita. Iikut, i ra i wan tagisapat tan o God, i ut ra i sa tama tar o Tita. ⁴⁷ A inanos mot nama lingmulus, osi ra i nurnur un iau, i sa los pas a nilaun tukum.

⁴⁸ “Iau a beret na nilaun. ⁴⁹ A kum tumtubu mot tagun numugu det wan a mana una nubual kalako taro uni, ikut det sa mat. ⁵⁰ Iikut a beret ri, i wan tagisapat una langit. Osi ra in nani, ken mat. ⁵¹ Iau ut a beret ra i laun, ra i wan pirso tagisapat una langit. Osi ra in nangan tagun a beret ri, in laun tukum. A lingmulus, a beret ra an etabor nami, i a pining. A pitari sur a taro una rakrakon bual det in laun nami.”

⁵² A ramano kum te Juda det engaras etetalai, ra det watungi lena, “A musano ri in tabor petlan dat nama pinino sur dat in nani?” ⁵³ Ra o Iesu i watungi tandet lena, “A inanos mot nama lingmulus, ra ka mot in nan a pinin a Nutun a Musano ma ka

mot in inum a gapino, katu nilaun mulus in kis un mot. ⁵⁴ Osi ra in nan a pining ma in inum a gaping, i sa los a nilaun tukum, ma iau an ukatatur pasi gusun a minat una bung na warkurai. ⁵⁵ Uni a pining, i a utna na inangon mulus, ma a gaping, i a danim na ininum mulus. ⁵⁶ Osi ra in nan a pining ma in inum a gaping, in laun un iau, ma iau an laun uni. ⁵⁷ O Tita ra i laun, i tulu ru iau, ma i tabor iau nama nilaun. Lenkutkai ra torom osi ra i wan a pining, an tabori nama nilaun. ⁵⁸ Iri a beret ra i wan tagisapat una langit, awu sur i elar nama mana, ra a kum tumtubun dat tagun numugu det wani, ma det sa mat. Osi ra in wangon tagun a beret ri, in laun tukum.” ⁵⁹ O Iesu i ususer a taro una rumu na lotu tong o Kapernaum ra i watung a kum wasiso ri.

A kum wasiso na nilaun tukum

⁶⁰ A susut tagun anun a taro na ususer det longoro a kum wasiso ri, ra det watungi lena, “A etowo ri i ngangitin doko. Osi mo in rakon sot pasi?” ⁶¹ O Iesu i tasmani lena anun a taro na ususer det wasiso na ururai eno uni. Ra i ting det lena, “Pepetlai, a wasiso ri i ban laulau mot? ⁶² In pepetlai torom mot, ra mot in tama a Nutun a Musano ra in milet melet usapat sur a tamon ra numugu i kis pas iai? ⁶³ A Nion, i ra i pitar a nilaun. A dekdekin a pinin a musano, katu utna i gas uni. A kum wasiso ra a watungi tamot, i a nion ma i pitar a nilaun. ⁶⁴ Iikut ara taro tagun mot ka det nurnur.”

Numugu ut o Iesu i sa tasman tar det ra ka det nurnur uni, ma o naro kai ra in usobor tari. ⁶⁵ Ma i watungi kai lena, “Iri i a kibino ra a watungi tamot lena, kataio in nan torom iau ra o Tita ken pitar a dekdek tano, sur in mur iau.”

⁶⁶ Numur tano, a susut tagun anun a taro na ususer det milet pas gusuni, ma ka det muri mo. ⁶⁷ O Iesu i watungi tan anu a noino ma aru nat na ususer lena, “Pepetlai, mot kai, mot nemi sur mot in milet mo gusun iau?” ⁶⁸ O Saimon Pita i balu i lena, “Labino, met in nan mo torom osi? Uni anumi kut, a kum wasiso na nilaun tukum. ⁶⁹ Met sa nurnur ma met tasmani lena ui a Tasur na Musano anun o God.” ⁷⁰ O Iesu i watungi tandet lena, “A sa pilok pas mot, a noino ma aru, niko? Iikut ara tagun mot, i a turangon kut!” ⁷¹ I wasiso un o Judas, a nutun o Saimon Iskariot, ara tagun a noino ma aru nat na ususer, ra numur in usobor tar o Iesu.

7

A kum tistisin o Iesu ka det nurnur uni

¹ Numur o Iesu i wan tuptupukus una kum tamon tong una papor Galili. Ke nem na wan tuptupukus una papor Judia, uni a ramano kum te Juda det epak sur det in um doko i. ² A kum bung na lotu anun a taro Juda, ra di watungi nama kum lamlabino bung na lotu na turturup*, i sa milau. ³ Ra a kum tistisin o Iesu det watungi tano lena, "I wakak sur un nan taginin ma un nan usapat o Judia sur anum a taro na ususer det in tama a kum pinapam ra un pami. ⁴ Kataio i ser pam eno a kum utna, ra i nemi sur a taro det in tasmani. U ser pam a kum utna ri, in wakak ra un pam puaso i sur a taro una rakrakon bual rop det in tasman ui!" ⁵ A kum tistisino det wasiso lenri, uni det kai ka det nurnur uni.

⁶ I mo ra o Iesu i watungi tandet lena, "Anung a du bung ke sot utmakai, sur an nan una kum lamlabino bung na lotu, ikut torom mot, anumot a kum du bung i langolango kut. ⁷ A taro tagun a rakrakon bual ka det in nget mot, ikut det nget iau, uni a inanos det una nundet a kum sakino petutna. ⁸ Mot, mot in nan usapat una kum lamlabino bung na lotu. Ikut iau, kan nan lakit sur a kum lamlabino bung na lotu ri, uni anung a du bung ke sot utmakai." ⁹ Ra i sa wasiso taru, i kis sikot tong o Galili.

O Iesu i wan sur a kum lamlabino bung na lotu

¹⁰ Ra a kum tistisin o Iesu det sa wan sur a kum lamlabino bung na lotu, numur o Iesu i mur det, ikut ke upuaso i torom a taro. I wan eno nanan kut. ¹¹ A ramano kum te Juda det sisio sur o Iesu una kum lamlabino bung na lotu, det iting lena, "A musano ri awai i?"

¹² A susut na taro det wasiso eno un o Iesu. Ara taro det watungi uni lena, "I ara wakak na musano," ma ara taro kai det watungi lena, "Awu, i ben raro a taro." ¹³ Ikut kataio i wasiso puaso uni, uni det ngaran a ramano kum taro Juda.

O Iesu i ususer a taro ra det wanpat una kum lamlabino bung na lotu

¹⁴ Ra det sa kis epotor una kum lamlabino bung na lotu, o Iesu i turpasi sur in ususer a taro ubalan in noworo ina rumu na etabor. ¹⁵ A ramano kum te Juda det kisin doko ra det watungi lena, "A musano ri ke etowo pas. Ikut i tasman petlan a kum utna ri?" ¹⁶ O Iesu i balu det lena, "Anung a kum

etowo, ra a ususer a taro nami, awu sur anung, anun o naro ra i tulu ru iau urin. ¹⁷ Osi ra i nem na mur a nemnem anun o God, in tasmani lena anung a kum etowo i wan tagai. I wan tagisapat tan o God, o a nuknuking kut. ¹⁸ Osi ra i wasiso kut nama nuknukino, i nemi kut sur din ulabo pasi. Ikut iau, a nemi sur din ulabo pas o God ra i tulu ru iau urin. A wasiso nama lingmulus, ma katu torotoro i kis un iau. ¹⁹ O Moses i sa pitar tar a Warkurai tamot, ikut kataio tagun mot i muri. Sur asau ra mot nem na um doko iau?"

²⁰ A kunur na taro det balu i lena, "A laulau na nion kura un ui. Osi i nem na um doko ui?" ²¹ O Iesu i balu det lena, "A pam ara utna na ukisin, ma mot rop mot kisin uni. ²² O Moses i pitar tar a warkurai tamot sur mot in tok talilis a kum nat musano. Ikut a warkurai ri, awu sur anun o Moses, a taro ut tagun numugu det turpasi. Ma a ramano kum du bung utkai mot tok talilis a natlik una Bung na Sabat. ²³ Mot ser tok talilis una Bung na Sabat, sur gong di lakai a warkurai anun o Moses. Ra mot pami lenra, sur asau ra mot kankan torom iau ra a ulangolango pas a kudulano musano una Bung na Sabat? ²⁴ Gong mot warkurai kut nama matmata mot, mot in warkurai nama warkurai ra i tokodos."

Ara taro ka det nurnur lena o Iesu i a Karisito

²⁵ Ara taro tagisapat o Jerusalem det iting lena, "I mo ri a musano ra det nem na um doko i? ²⁶ Tama i, iri i tur ma i wasiso umatan a taro, ma ka det wasiso balu i. Pepetlai, kutiro a kum mugumugu det sa tasmani lena i a Karisito? ²⁷ Ra a Karisito in nanpat, ka din tasmani lena in nanpat tagai. Ikut a musano ri dat tasmani kut anun a tamon."

²⁸ O Iesu i ususer utmakai ubalan in noworo ina rumu na etabor; i wasiso namin labino walngano ma i watungi lena, "Pepetlai, mot tasman mulus iau ut, ma a tamon kai ra a wan taguni? Ka wanpat urin una nuknuking. O naro ra i tulu ru iau, i watung a lingmulusino. Ma mot, ka mot tasman o naro ra. ²⁹ Ikut iau, a tasmani, uni a wan ut tagisapat tano, ma i ut i tulu ru iau."

³⁰ I mo ra a kum te Juda det nemi sur det in pam ukai pasi, ikut kataio i pami, uni anun a du bung ke sot utmakai. ³¹ A susut tagun a kunur na taro det nurnur uni, ra det watungi lena, "A musano ri i pam tar a

7:1: Jn 5:18 7:2: Wkp 23:34 * 7:2: Una kum lamlabino bung na lotu na turturup, a taro Israel det ser pam a kum turturup ra det ser inep uni, sur det in ukinalong a kum kilalo ra det kis una nubual kalako taro uni. 7:5: Ap 1:14 7:15: Mt 13:54; Lk 2:47 7:16: Jn 12:49; 14:10 7:18: Jn 8:50 7:19: Ap 7:53; Rom 2:21-24 7:20: Jn 8:48; 10:20 7:22: Wkp 12:3; Stat 17:9-13 7:23: Jn 5:8-10, 16 7:27: Jn 7:41; 9:29 7:28: Mt 11:27; Jn 8:55 7:30: Jn 7:44

susut na utna na ukisin. Pepetlai, kutiro a Karisito ut ri?"

³² A kum Parisi det longoro a taro det waswasiso eno lenri un o Iesu, ra a kum lamlabino tene etabor torom o God, ma a kum Parisi, det tulu ru a kum tene tamabab tagun a rumu na etabor, sur det in pam ukai pasi. ³³ Ra o Iesu i watungi tandet lena, "Iau kan kis suano i nin nisamot, an millet melet torom o naro ra i tulu ru iau urin. ³⁴ Mot in sisio sur iau, ikut ka mot in sio pas iau, ma ka mot in nan lar pas kai una tamon ra an kis iai." ³⁵ A ramano kum te Juda det ting etetalai det lena, "A musano ri in nan mo urai, ra ka dat in sio lar pasi? Pepetlai, in nan sur a kum tamon anun a taro Grik ra anundat a taro det kis iai? Kutiro in ususeri mo a taro Grik? ³⁶ Uni i watungi lena dat in sisio suri ikut ka dat in sio pasi, ma ka dat in nan lar pas kai una tamon ra in kis iai. Asau a kukurai ina nun a wasiso ri?"

A wasiso elelar una Tokodos na Nion

³⁷ A ururop na bung ina kum lamlabino bung na lotu, i a labino bung sakit. Una bung ra, o Iesu i tur ma i wasiso namin labino walngano, i watungi lena, "Osi ra i muruk, i wakak sur in nan torom iau ma in inum. ³⁸ Osi ra i nurnur un iau, 'a kum danim na nilaun det in sal pat tagun anun a nilaun,' elar nami ra di sa tumus tari una Buk Tabu." ³⁹ Una wasiso ri, o Iesu i wasiso una Tokodos na Nion. Ka di pitari utmakai a Tokodos na Nion, uni o Iesu ke losi utmakai anun a minamar. Numur, det ra det nurnur un o Iesu, din tabor det nami.

A nuknukin a taro un o Iesu ke takai

⁴⁰ Ara taro tagun a kunur na taro ra det longoro a wasiso ri, det watungi lena, "A lingmulus ut, a musano ri, i a poropet ra o God i tulu ru i urin." ⁴¹ Ara taro kai det watungi lena, "I a Karisito." Ma ara taro kai det watungi lena, "Awu. A Karisito ken nanpat tagitong o Galili. ⁴² A Buk Tabu i watungi lena, a Karisito in nanpat tagun a kabotaro anun o Dewid. In nanpat tong o Betliem, a tamon ra numugu o Dewid i kis iai." ⁴³ Ma a nuknukin a taro uni, ke takai. ⁴⁴ Ara taro det nem na pam ukai i, ikut katutaio i tulana tar a pinino.

A kum mugumugu ka det nurnur

⁴⁵ A kum tene tamtabab tagun a rumu na etabor det millet melet, ra a kum lamlabino tene etabor torom o God ma a kum Parisi det ting det lena, "Sur asau ra ka mot dat pas o Iesu urin?" ⁴⁶ A kum tene

tamtamabab tagun a rumu na etabor det balu det lena, "Katutaio utmakai i ser wasiso elar nama musano ri!" ⁴⁷ A kum Parisi det ting det lena, "Pepetlai, mot kai i sa ben raro pas mot? ⁴⁸ Pepetlai, taio tagun met a kum mugumugu ma a kum Parisi, i sa nurnur uni? Awu! ⁴⁹ A kunur na taro ri, ra det nurnur un o Iesu, ka det tasman a Warkurai anun o Moses. A kankan anun o God i sa kis un det."

⁵⁰ Ara Parisi tagun det, a risano o Nikodimas, i ra numugu i wanpat pas torom o Iesu, i watungi tandet lena, ⁵¹ "Una nundat a Warkurai, ka dat in takun oros pas taio ra ka di longoro i utmakai. Din longoro mugu tari sur din tasman asau ra i pami." ⁵² Det balu i kut lena, "Ni, ui kai a te Galili ui? Un ususer una Buk Tabu ma un mananos uni, lena a poropet ken nanpat tagitong o Galili."

A ino ra i pam a sakino nam ara nolin na musano

[⁵³ Ra a taro rop det wan susuaro sur anundat a kum tamon.

8

¹ O Iesu i wan toto usapat una Tangai na Oliw. ² Una kobot raut una bung numur, o Iesu i millet melet sur a rumu na etabor, ra a taro rop det wan tomo toromi. Ra i kis ma i ususer det. ³ A kum tene ususer tagun a Warkurai, ma a kum Parisi det ben ruk ara ino torom o Iesu. A ino ra di pastorom pasi ra i pam a sakino tomo nam ara nolin na musano. Det ungonos pas a ino ra, sur in tur numugu umatan a taro. ⁴ Det watungi tan o Iesu lena, "Tene Ususer, a ino ri di pastorom pasi ra i pam a sakino nam ara nolin na musano. ⁵ Una Warkurai anun o Moses, ra tu ino in pami lenra, din duku doko i nama kum watat. Ma ui, asau ra un watungi uni?" ⁶ Det watungi lenri, uni det nem na lari kut o Iesu ra in watung tar tu wasiso, sur det in takuni nami. Ikut o Iesu i tudung piso, ra i tumtumus namin kaskas na lamano una piso.

⁷ Det ting likliki, ra i tur ma i watungi tandet lena, "Osi tagun mot ra ke pam tar tu sakino petutna, in duku mugu a ino ri nam tu wat." ⁸ O Iesu i tudung piso melet, ra i tumtumus una piso. ⁹ Det longoro tar a wasiso ri anun o Iesu, ra det rop det pirso. A kum takano det pirso mugu. Ra numur det rop det pirso taktakai. O Iesu mukut i kis tiro iai, der nama ino ra di utur tari nisano. ¹⁰ O Iesu i tur, ra i watungi tan a ino lena, "Le, det ra det takun tar ui, awai det mo? Pepetlai, kataio i takun ui?" ¹¹ A

ino i balu i lena, "Awu. Kataio." Ra o Iesu i watungi tano lena, "Iau kai kan takun ui. Un nan kut, ma gong melet mo u pam a sakino.]"*

O Iesu a talapor tagun a rakrakon bual

¹² O Iesu i wasiso melet torom a taro, ra i watungi lena, "Iau a talapor tagun a rakrakon bual. Osi ra i mur iau, in pam ukai a talapor na nilaun, ma ken nan melet una dumirum." ¹³ A kum Parisi det watungi tano lena, "Anum a wasiso talapor ke maut, uni ui ut, u wasiso talapor melet un ui." ¹⁴ Ra o Iesu i balu det lena, "Ra iau ut an wasiso talapor un iau, anung a wasiso i lingmulus, uni a tasman a tamon ra a wan gusuni, ma a tamon ra an nan suri. Ikut mot, ka mot tasman a tamon ra a wan gusuni, ma a tamon ra an nan suri. ¹⁵ Mot, mot warkurai kut nama warkurai anun a taro, ma iau ka warkurai taio. ¹⁶ Ikut ra an warkurai taio, anung a warkurai i lingmulus, uni, awu sur iau kut a pami, mir ut nam o Tita, i ra i tulu ru iau urin. ¹⁷ Di sa tumus tari una numot a Warkurai lenri, 'Ra lako ru anunder a wasiso i elar kut un tu utna, anunder a wasiso i lingmulus.' ¹⁸ Iau ri a wasiso talapor un iau, ma o Tita ra i tulu ru iau urin, i kai i wasiso talapor un iau."

¹⁹ Det tingi lena, "Awai i o tamam?" O Iesu i balu det lena, "Ka mot tasman iau ma ka mot tasmani kai o Tamang. Ra gunuk mot in tasman iau, mot in tasmani kai o Tita." ²⁰ O Iesu i watung a wasiso ri tiro ubalan in noworo ina rumu na etabor, una nubual ra di ser ubek a mani na etabor iai. Kataio i pam ukai i, uni anun a du bung ke sot utmakai.

O Iesu i utumarong a taro ra ka det nurnur

²¹ O Iesu i watung meleti tan a taro lena, "An nan gusun mot, mot in sisio sur iau, ma mot in mat nam anumot a kum sakino petutna. A tamon ra an nan suri, ka mot in nan lar pas iai." ²² A ramano kum te Juda det lena, "Pepetlai, in um doko i? Pepetlai, iri a kibino ra i watungi lena, 'A tamon ra an nan suri, ka mot in nan lar pas iai?'" ²³ O Iesu i balu det lena, "Mot taginin ut mot upiso, ma iau, a wan ut tagisapat netes. Mot tagun a rakrakon bual, iau awu sur tagun a rakrakon bual. ²⁴ Iri a kibino ra a watungi tamot lena, mot in mat nam anumot a kum sakino petutna. Ra ka mot nurnur un iau

lena iau ut ri iau,† mot in mat nam anumot a kum sakino petutna." ²⁵ Ma det tingi lena, "Osi ui?" O Iesu i balu det, "A sa inanos tar mot turpasi una turturkibin ina nung a pinapam, tuk uniri. ²⁶ A susut na utna an watungi un mot ra an warkurai mot uni, uni i ra i tulu ru iau i lingmulus, ma iau, a inanos kut a taro una rakrakon bual una kum utna ra a longoro i tano." ²⁷ Ka det tasmani lena, o Iesu i wasiso torom det un o Tamano. ²⁸ Ma o Iesu i watungi lena, "Ra mot in utur toto a Nutun a Musano usapat netes, mot in tasmani lena iau ut ri iau, ma mot in tasmani kai lena awu sur iau sot kut a papam, o Tita i ususer iau un asau ra a watungi. ²⁹ I ra i tulu ru iau, i kis tomo nam iau, ma ke ser wan gusun iau, uni a ser pam a kum utna ra i gas nami."

³⁰ A susut ra det longoro a kum wasiso ri, det nurnur un o Iesu.

A lingmulus in ulangolango mot

³¹ O Iesu i watungi torom a kum te Juda ra det nurnur uni lena, "Ra mot in mur anung a etowo, mot anung a taro na ususer mulus. ³² Ma mot in tasman a lingmulus, ma a lingmulus in ulangolango mot." ³³ Det balu o Iesu lena, "Met a kum nutnutun o Abaram, tuk uniri ka met tene ititula anun taio. Sur asau ra u watungi lena a lingmulus in ulangolango met?"

³⁴ O Iesu i balu det lena, "A inanos mot nama lingmulus, a taro rop ra det pam a sakino, det a kum tene ititula anun a sakino petutna. ³⁵ A musano ra i tene ititula kut anun tu kabo tamano, ken kis tukum torom det, ikut a nat ra o tamano ma o nano der usus pasi, i ra tagun der mulus. ³⁶ Ra a Nutun o God in ulangolango mot, mot in langolango mulus. ³⁷ A tasmani ut lena, mot a kum nutnutun o Abaram, ikut uniri mot lari sur mot in um doko iau, uni anung a wasiso ke kis un mot. ³⁸ A wasiso un asau ra a tama i tan o Tita, ma mot kai, mot pam asau ra mot longoro i tan a tamamot."

³⁹ Det balu i lena, "Met, met tamano nam o Abaram." O Iesu i balu det lena, "Ra mot tamano mulus nam o Abaram, mot in pam a kum utna ra o Abaram i pami. ⁴⁰ Iau a musano ra a inanos mot nama lingmulusino ra a longoro i tan o God, ikut mot nem na um doko iau. O Abaram ke pam tu utna lenri. ⁴¹ Mot, mot pami ut a kum pinapam ra a tamamot i pami."

* **8:11:** Una ramano kum du buk una wasiso Grik, katu 7:53-8:11. **8:12:** Ais 49:6; Jn 1:4-9; 9:5; 12:46 **8:14:** Jn 5:31-32; 7:28 **8:15:** Jn 12:47 **8:16:** Jn 5:30; 8:29 **8:17:** Lo 19:15 **8:18:** 1 Jon 5:9 **8:20:** Jn 7:30 **8:21:** Jn 7:34; 13:33 **8:23:** Jn 3:31 † **8:24:** "Iau ut ri iau" Una du wasiso ri, o Iesu i watungi ut nama risan o God. Una buk Kisim Bek 3:14, o God i watungi ut nama rising ri, ra i inanos o Moses lena, a taro Israel kai det in watungi nama rising ri. Una ramano kum vers kai una buk ri, o Iesu i watungi ut lena i o God. Tama Jon 4:26; 6:20; 8:28; 8:58; 13:19; 18:5. **8:28:** Jn 3:14 **8:33:** Mt 3:9 **8:34:** Rom 6:16, 20 **8:39:** Mt 3:9 **8:41:** Ais 63:16

Det watungi tan o Iesu lena, "Awu sur di usus oros tar met kut, a tamamet ut ra o God."

⁴² O Iesu i watungi tandet lena, "Ra gunuk mot tamano mulus nam o God, mot in nem iau, uni a wan tagisapat tan o God, ra uniri a kis nin. Ka wanpat urin una nung a nemnem, i ut i tulu ru iau. ⁴³ Sur asau ra ka mot tasman lele anung a wasiso? Uni ka mot longoro lar pasi. ⁴⁴ A tamamot ra o Satan, ma mot nemi ut lena mot in mur anun a nemnem. Tagun numugu utmakai, i a tene um doko a taro, ma ke tasman a lingmulus, uni katu lingmulus i kis uni. Ra i watung a torotoro, i wasiso nam anun a wasiso mulus, uni i ut a tene torotoro ma a taman a torotoro. ⁴⁵ A watung a lingmulus, iri a kibino ra ka mot nurnur un iau. ⁴⁶ Osi tagun mot in takun sot pas iau un tu sakino petutna? A watung a lingmulus, ra ilai ra ka mot nurnur un iau? ⁴⁷ Osi ra anun o God, i ser longoro a kum wasiso anun o God. Ikut mot, ka mot longoro i, uni awu sur mot anun o God."

O Iesu i labo taun o Abaram

⁴⁸ A ramano kum te Juda det watungi tan o Iesu lena, "Met tasman mulusi lena ui a te Samaria, ma a laulau na nion kura un ui." ⁴⁹ Ra o Iesu i balu det lena, "Katu laulau na nion kuri un iau. A urur torom o Tita, ma mot, ka mot urur torom iau. ⁵⁰ Ka pam a kum utna ri sur a taro det in ulabo pas iau uni. Ikut ara sot kut, a tene warkurai, i ulabo pas iau. ⁵¹ A inanos mot nama lingmulus, osi ra i mur anung a wasiso, ken mat."

⁵² A ramano kum te Juda det watungi tano lena, "Uniri met tasman mulus ui lena a laulau na nion kura un ui! O Abaram i sa mat, ma a kum poropet kai det sa mat, ikut ui, u watungi lena osi ra i mur anum a wasiso ken mat. ⁵³ Pepetlai, u nuki lena ui u labo taun a tamamet o Abaram? O Abaram i sa mat, ma a ramano kum poropet kai det sa mat. U nuki lena ui osi na ngas na musano ui?" ⁵⁴ O Iesu i balu det lena, "Ra an ulabo melet pas iau ut, anung a wasiso na ulabo ri ke gas un tu utna. Ikut o Tita ut i ulabo pas iau, i ra mot watungi lena i anumot a God. ⁵⁵ Mot, ka mot tasman o God, ikut iau, a tasmani. Ra an watungi lena ka tasmani, iau kai a tene torotoro elar nam mot. A tasman o God, ma a ser mur anun a wasiso. ⁵⁶ A tamamot o Abaram i gas sur in tama anung a inawan pat. I tama i, ra i gas doko uni." ⁵⁷ A kum te Juda det watungi tano lena, "Ke limo na noino kilalo utmakai una nilaun anum. Ilai ra

u watungi lena, u sa tama tar o Abaram?" ⁵⁸ O Iesu i balu det lena, "A inanos mot nama lingmulus, numugu ra ka di usus utmakai o Abaram, iau a sa kis mugu taru."

⁵⁹ Ra det los watat pas sur det in dukuduku o Iesu nami, ikut i parau ra i wan gusun in noworo ina rumu na etabor.

9

O Iesu i utamtama pas a pulu

¹ Ra o Iesu i wan nanan, i tama pas ara musano a pulu. O nano i usus pasi, i sa pulu taru. ² A kum nat na ususer det tingi lena, "Tene Ususer, sur asau ra di usus pasi, i sa pulu? Osi mo i pam a sakino petutna, i ut, o, o tamano ma o nano?" ³ O Iesu i balu det lena, "A musano ri ke pam tar tu sakino petutna, o tamano ma o nano kai awu. I pulu kut sur a taro det in tama a dekdekin o God uni. ⁴ I wakak sur dat in pami ut a kum pinapam anun o naro ra i tulu ru iau urin ra i waspi utmakai. Ra i sa mirum, kataio melet mo in pet lar pasi sur in papam. ⁵ Ra a kis nin upiso, iau a talapor anun a rakrakon bual."

⁶ O Iesu i sa watung tari lenri, ra i ibis taru una piso, i gisgis pas a ibisino tomo nama piso, ra i talus arin matan a pulu nami. ⁷ O Iesu i watungi tano lena, "Un nan, ma un gos pas arin matam una kabopolo Siloam." (Siloam a kukuraino "di tulu i.") I wan, ra i gos pas arin matano. Ra i milet, arin matano der sa tamtama.

⁸ A kum paspasano, ma a taro ra det ser tama i ra i ser saring utna det iting lena, "Kutiro a musano ra i ser kis ma i ser saring utna, niko?" ⁹ Ara taro det watungi lena, "I ut ra." Ara taro kai det watungi lena, "Awu, i tamtama elar kut nama musano ra." Ra i ut i watungi lena, "Iau ut ri." ¹⁰ Det tingi lena, "Di utamtama petlan pas arin matam?" ¹¹ I balu det lena, "A musano ra di watungi lena o Iesu i gisgis pas a ibisino nama piso ra i talus tar arin matang nami. Ra i tulu ru iau ma i watungi lena, 'Un nan utong una kabopolo Siloam sur un gos pas arin matam.' A wan ma a gos pas arin matang, ra a tamtama mut." ¹² Det tingi lena, "Ma i, awai i?" A musano ra i balu det lena, "Ka tasmani."

A kum Parisi det ting a pulu

¹³ Det ben pas a musano ra numugu i pulu torom a kum Parisi, ¹⁴ uni o Iesu i gisgis pas a ibisino nama piso ma i utamtama pas a pulu una Bung na Sabat. ¹⁵ I mo ra a kum Parisi det ting melet a musano lena, "Di utamtama petlan pas ui?" I balu det lena, "I talus tar arin matang nama pikaio,

a gos pasi, ra a tamtama mut.”¹⁶ A ramano kum Parisi det watungi lena. “A musano ra i pam a utna ri, i awu sur tagun o God, uni i papam una Bung na Sabat.” A ramano kai det watungi lena, “Ra a musano ri a sakino musano, in pam petlan a kum utna na ukisin ri?” Ra a nuknukin det ke takai uni.¹⁷ Ara dino melet a kum Parisi det ting a musano ra lena, “Asau un watungi una musano ra i utamtama pas ui?” I balu det lena, “I ara poropet.”

¹⁸ A ramano kum te Juda ka det nurnur lena a musano ri numugu i pulu ma di sa utamtama pasi. Ra det itula pasi ut o tamano ma o nano, ma det ting der lena,¹⁹ “A nutumur ut ri? I ra mur watungi lena mur usus pasi, i sa pulu? I tamtama pepetlai?”²⁰ O tamano ma o nano der balu det lena, “Mir tasmani lena a nutumir ut ri, ma mir tasmani lena mir usus pasi, i sa pulu.²¹ Ikut ka mir tasmani ra i tamtama pepetlai, ma ka mir tasmani kai osi ra i utamtama pasi. I sa tarai na musano, mot in tingi, i ut in wasiso talapor uni.”²² O tamano ma o nano der wasiso lenri, uni der ngaran a kum te Juda, ra det watungi lena, ra taio in nurnur un o Iesu lena i a Karisito, din turbat ru i gusun a rumu na lotu.²³ Iri i a kibino ra o tamano ma o nano der watungi lena, “I sa tarai na musano, mot in tingi.”

²⁴ Det ben melet pas a musano ra di usus pasi, i sa pulu, ma det watungi tano lena, “Un liliman umatan o God ra anum a wasiso i lingmulus ut! Met tasmani lena a musano ra i utamtama pas ui, a tene sakino.”²⁵ I balu det lena, “Ka tasmani ra i a tene sakino, o awu. Ara utna kut ra a tasmani: Numugu a pulu, ma uniri a sa tamtama.”²⁶ Det tingi lena, “Asau ra i pami un ui? Ma i utamtama petlan pas ui?”²⁷ I balu det lena, “A sa watung tari tamot, ma ka mot longoro i. Sur asau ra mot nem na longoro meleti? Kanapi mot kai mot nemi sur mot a kum nat na ususer anunu?”

²⁸ Det watung laulau i, ma det watungi uni lena, “Ui anun a nat na ususer, ikut met a kum nat na ususer anun o Moses.²⁹ Met, met tasmani lena o God i wasiso torom o Moses, ikut a musano ra, ka met tasmani ra i wan tagai.”³⁰ A musano i balu det lena, “Ai, anumot a wasiso i ukisin iau! Ka mot tasmani ra i wan tagai, ikut i sa utamtama pas iau.³¹ Dat sa tasmani lena o God ken longoro a niaring anun a kum tene sakino, in longoro det kut ra det pam a petutna ra i wakak umatan o God ma det ser mur anun a nemnem.³² Turpasi una turturkibin ina rakrakon bual tuk uniri, ka di tasman tar taio ra in utamtama pas arin matan tu pulu,

ra di usus pasi, i sa pulu.³³ Ra a musano ri awu sur tagun o God ken pam lar pas tu utna.”³⁴ Det balu i lena, “Di usus pas ui una sakino petutna, ma ui, u nemi sur un ususer met!” Ra det lakro ru i mut gusun a rumu na lotu.

Osi ra ke nurnur i a pulu

³⁵ O Iesu i longoro i lena, di sa lakro ru tar a musano ra gusun a rumu na lotu, ra i sisio suri, ma i sio pasi ra i tingi lena, “U nurnur ut una Nutun a Musano?”³⁶ I balu i lena, “Labino, un inanos iau, osi ra a Nutun a Musano, sur an nurnur uni.”³⁷ O Iesu i watungi tano lena, “U sa tama i, iau ut ri a wasiso tam.”³⁸ A musano ra i watungi lena, “Labino, a nurnur un ui!” Ra i lotu toromi.

³⁹ O Iesu i watungi lena, “A wanpat urin una rakrakon bual nama warkurai, sur det ra det pulu det in tamtama, ma det ra det tamtama det in pulu.”⁴⁰ A ramano kum Parisi ra det tur tomo nami, det longoro a wasiso ri, ra det tingi lena, “Pepetlai, met kai met pulu?”⁴¹ I balu det lena, “Ra gunuk mot pulu, kataio in takun mot un tu sakino petutna. Ikut uniri mot watungi lena mot tamtama, ra anumot a sakino petutna kura ut un mot.”

10

A wasiso elelar una tene tamtamabat anun a kum sipsip

¹ O Iesu i watungi lena, “A inanos mot nama lingmulus, i ra ke ruk una matansako tagun in noworo na sipsip, ma i ka tito kut unarumu, i a tene wolong ma a tene ras orosi kut a kum utna.² Ikut a musano ra i ruk una matansako, i a tene tamtamabat mulus anun a kum sipsip.³ A tene tamtamabat ina matansako in papos sarotari sur in ruk. A kum sipsip det longoro lele in nalngano. I ser kabo det nama kum risandet ma i ser ben pirso det.⁴ In ben pirso rop pas anun a kum sipsip, ra in mugu pas det ma det in muri, uni det longoro lele in nalngano.⁵ Ka det in mur tu usiro, det in kalabor gisen kut gusuni, uni ka det longoro lele in nalngano.”⁶ O Iesu i watung a wasiso elelar ri tandet, ikut ka det tasman asau ra i wasiso uni.

O Iesu a wakak na tene tamtamabat anun a kum sipsip

⁷ I mo ra o Iesu i watung meleti lena, “A inanos mot nama lingmulus, iau a matansako anun a kum sipsip.⁸ Det rop ra det wanpat mugu tang, a kum tene wolong ma a kum tene ras oros pas a kum utna, ma a kum sipsip ka det longoro det.⁹ Iau a matansako, osi ra i ruk uni, din ulauni. In ruk ma in pirso ma in etoromi kut ana

utna na inangon. ¹⁰ A tene wolong i ruk kut sur in wolong, ma in um doko a kum sipsip ma in ban laulau det. Ikut iau, a wanpat sur det in utur ukai a nilaun, a nilaun ra i bukus nama wakakino.

¹¹ “Iau a wakak na tene tamtamabat anun a kum sipsip. A pitar anung a nilaun sur an mat bat det. ¹²⁻¹³ A musano ra di kuli kut, awu sur a tene tamtamabat mulus anun a kum sipsip, ma a kum sipsip awu sur anunu. Ra in tama pas a ngalngalia na pap in nanpat, in kalabor pas gusun a kum sipsip, uni i papam kut sur a mani, ma ke maris a kum sipsip. Ma a ngalngalia na pap in karkarot det ma in lu sarara ru det.

¹⁴ “Iau a wakak na tene tamtamabat anun a kum sipsip. A tasman anung a kum sipsip, ma anung a kum sipsip kai det tasman iau, ¹⁵ elar nam o Tita i tasman iau, ma a tasman o Tita, ma a pitar anung a nilaun sur an mat bat det. ¹⁶ Anung a ramano kum sipsip kai, ka det kis unin noworo na sipsip ri. An ben pas det utkai, ma det in longoro in nalngang, sur det rop det in kis kut unin teken noworo, ma ara sot kut in tene tamtamabat anundet.

¹⁷ “O Tita i nem mulus iau, uni iau ut a pitar anung a nilaun, sur numur an los melet pasi. ¹⁸ Kataio in rakon ru anung a nilaun, iau ut an pitari. Iau ut a utur ukai a dekdek sur an pitari, ma iau ut a utur ukai a dekdek sur an los melet pasi. Iri i a pinapam ra o Tita i tulu ru iau sur an pami.”

¹⁹ A kum te Juda det tapagol una kum wasiso ri anun o Iesu. ²⁰ A susut tagun det, det watungi lena, “A laulau na nion kura uni, ma i sa toboroboro. Asau ra mot longoro i suri?” ²¹ Ikut ara taro det watungi lena, “Awu sur a ngas na wasiso ri anun taio ra a laulau na nion kura uni. Pepetlai, a laulau na nion in pet lar pasi sur in utamtama a taro ra det pulu?”

A kum te Juda ka det nurnur un o Iesu

²² Numur det ukinalong a labino bung na lotu sur det in nuk melet pas a bung ra det papos a rumu na etabor uni. Det ukinalong a labino bung na lotu ri sapat o Jerusalem epotor una kum kalang na kotokoto. ²³ O Iesu i wan nanan una parada ra di watungi nama parada anun o Solomon, una rumu na etabor. ²⁴ A kum te Juda det tur talilis pas o Iesu, ma det tingi lena, “Nangisin mo un inanos mulus met? Ra ui a Karisito, un inanos talapor met.” ²⁵ Ra o Iesu i balu det lena, “A sa watung tari tamot, ikut ka mot nurnur. A kum pinapam ra a pami una risan o Tita, det wasiso talapor un iau. ²⁶ Ikut ka mot nurnur, uni awu sur mot

anung a kum sipsip. ²⁷ Anung a kum sipsip det ser longoro in nalngang. A tasman det, ma det ser mur iau. ²⁸ Ma a pitar a nilaun tukum tandet, ma ka det in iru. Ma kataio in ras ru det gusun a lamang. ²⁹ O Tita ra i pitar tar det tang, i labo taun a kum utna rop, ma kataio in ras ru det gusun a laman o Tita. ³⁰ Mir nam o Tita, mir takai kut.”

³¹ A kum te Juda det los watat melet sur det in duku doko o Iesu nami. ³² O Iesu i watungi tandet lena, “A sa ese tar mot una susut na pinapam, ra o Tita i pitar tari tang sur an pami. Osi na utna tagun a kum pinapam ri, ra a pami, ra mot nem na duku iau uni?” ³³ Det balu i lena, “Met nem na duku ui, awu sur un tu utna na ukisin ra u pami, awu, uni u watung laulau o God! Ui a musano kut ui, ra u watungi lena ui o God.” ³⁴ O Iesu i watungi tandet lena, “Di sa tumus tari una numot a Warkurai lena o God i watungi lenri, ‘Mot a kum god.’” *Sng 82:6*

³⁵ I watung det lena det a kum god, det ra di pitar tar a wasiso anun o God tandet. Ma kataio in pet lar pasi sur in rakon ru a wasiso na Buk Tabu. ³⁶ Ma iau, o Tita ut i pilok pas iau, ma i tulu ru iau urin una rakrakon bual. Ra ilai ra mot takun iau lena a watung laulau o God uni a watungi lena, iau a Nutun o God? ³⁷ Ra ka ser pam a kum pinapam anun o Tita, gong mot nurnur un iau. ³⁸ Uniri a pami ut anun a kum pinapam. Ikut ra ka mot nurnur una nung a wasiso, mot in nurnur un iau kibino una kum pinapam a pami, sur mot in tasmani lena o Tita kuri un iau, ma iau kura un o Tita.”

³⁹ Ara dino melet det nem na pam ukai o Iesu, ikut i wan eno pas kut gusun det.

⁴⁰ O Iesu i wolos melet a danim Jodan sur a nubual ra numugu o Jon i baptaiso iai, ra i kis tiro. ⁴¹ A susut na taro det wan torom o Iesu ma det wasiso etetalai torom det lena, “O Jon ke pam tu utna na ukisin, ikut a kum wasiso rop i sa watung tari una musano ri, i lingmulus sakit.” ⁴² Ma a susut na taro tiro iai det nurnur uni.

11

O Lasarus i mati

¹⁻² Ara musano tagitong o Betani, a risano o Lasarus, i misait. Detul tisino nam o Maria mo Mata. O Maria ri, i ra i lingis tar in nokoto na polo sangsangnain una aru kikin a Labino, ma i wus sengesenge der nama iwu na lorino. ³ O Maria der sinoino nam o Mata der pitar ru a wasiso sur o Iesu

lenri, “Labino, a pasam, ra u ser nem doko i, i misait.”

⁴ O Iesu i longoro i, ra i watungi lena, “Awu sur o Lasarus in mat una misait ri. I misait kut, sur din tama a minamar anun o God, ma sur din mari kai a Nutun o God nami.”

⁵ O Iesu i maris o Mata ma a tisino ino o Maria ma a tisinder o Lasarus. ⁶ Ikut ra i longoro i lena o Lasarus i misait, i kis melet pas ut aru bung una tamon ra i kis iai. ⁷ Numur o Iesu i inanos a kum nat na ususer lena, “Dat in milet melet utong una papor Judia.” ⁸ Ma det watungi tano lena, “Ai, Tene Ususer, un ra bung kut a kum te Juda det nem na duku doko ui, ra uniri u nem na milet melet kut utong?” ⁹ O Iesu i watungi lena, “Ara bung i elar nama noino ma aru du bung, niko? Ra taio i wanan una waspi ken tutuka, uni i tamtama una talapor ina rakrakon bual. ¹⁰ Ikut ra taio i wanan una mirum in tutuka, uni kalako talapor.”

¹¹ O Iesu i watung tar a wasiso ri tandet, ra numur i lena, “A pasandat o Lasarus i sa inep dumun, ma an nan sur an wangun pasi.” ¹² A kum nat na ususer det balu i lena, “Labino, ra i inep dumun kut, in langolango melet.” ¹³ O Iesu i wasiso una minatin o Lasarus, ikut a kum nat na ususer det nuki lena o Lasarus i inep dumun kut. ¹⁴ Ra o Iesu i watung talapori maragom tandet lena, “O Lasarus i sa mat. ¹⁵ Ma a nuknuking i kis un mot, i mo ra a gas ra ka kis tong, sur mot in nurnur. Ikut, uniri dat in nan mo toromi.” ¹⁶ O Tomas ra di watungi kai nama kasango i watungi tan a kum nat na ususer lena, “Dat in nan tomo sur det kai dat in mat tomo nami.”

O Iesu i a nilaun melet, ma i a nilaun mulus

¹⁷ O Iesu i wanpat, ra i longoro i lena di sa uruk ru tar a minatin o Lasarus una kulam na minat, ma i sa wat na bung bat tari. ¹⁸ A tamon ra, o Betani, i milau i kut o Jerusalem, i elar kut nama tulu kilomita, ¹⁹ ra a susut na te Juda det wanpat torom o Mata ma o Maria sur det in kis umaot der una tisinder ra i mat.

²⁰ O Mata i longoro i lena o Iesu kura mo i wan nanan urin, ra i pirso, i wan barato i. Ikut o Maria i kis utmakai tiro urumu. ²¹ O Mata i watungi tan o Iesu lena, “Labino, ra gunuk un kis ut nin, a tisinglik ken mat. ²² Ikut a tasmani lena, ra uniri un saring o God sur tu utna, in pitari kut tam.” ²³ O Iesu i watungi tano lena, “O tisimlik in laun melet kut.” ²⁴ O Mata i balu i lena, “A tasmani lena in laun melet una bung ra

o God in ukatatur melet pas a taro gusun a minat.” ²⁵ O Iesu i watungi tano lena, “Iau a nilaun melet gusun a minat, ma iau a nilaun mulus. Osi ra i nurnur un iau, ra in mat, in laun melet, ²⁶ ma osi ra i laun ma i nurnur un iau, ken mat. Pepetlai, u nurnur ut una wasiso ri?” ²⁷ O Mata i balu i lena, “Ma Labino, a nurnur lena ui a Karisito a Nutun o God, i ra o God i tulu ru i urin una rakrakon bual.”

²⁸ Numur ra o Mata i sa watung tari lenri, i milet melet ma i kabo eno pas a tisino ino o Maria, ma i inanos i lena, “A Tene Ususer i sa wanpat ma i iting sur ui.” ²⁹ O Maria i longoro i lenri, ra i pirso lakit ma i wan toromi. ³⁰ O Iesu ke wanpat utmakai tiro utamon, i kis utmakai una nubual ra o Mata i barato pasi iai. ³¹ A kum te Juda ra det kis tomo nam o Maria tiro urumu sur det in umaromi, det tama i ra i pirso lakit pas gusun det unago utamon, ra det muri. Uni det nuki lena in nan sur a kulam na minat sur in domos iai.

³² O Maria i wanpat una nubual ra o Iesu i kis iai, ra i tama pasi, i kis butkeke taru numugu nisan, ma i watungi lena, “Labino, ra gunuk un kis ut nin, a tisinglik ken mat.” ³³ O Iesu i tama o Maria tomo nama kum te Juda ra det wan tomo nami det domos nanan, ra i nuknuk doko una niono ma in balano i maut doko. ³⁴ O Iesu i ting det lena, “Kura mot ubek tar a minatino aawai?” Det balu i lena, “Labino, wan urin sur un tama i.” ³⁵ Ra o Iesu i tangis. ³⁶ A kum te Juda det watungi lena, “Mot tama i, i maris doko i!” ³⁷ Ikut ara taro tagun det, det watungi lena, “I utamtama pas a matan a pulu, ilai ra ke ulangolango pasi kai a musano ri, sur gong i mat?”

O Iesu i ulaun pas o Lasarus

³⁸ In balano Iesu i maut doko, ra i wanpat nisan a kulam na minat. A kulam na minat ra, a mato kura tiro una papor wat, ma di ubek bat tari nama labino wat. ³⁹ O Iesu i watungi tandet, “Mot in bulus ru a wat.” Ra o Mata, a tisin a musano ra i mat, i balu i lena, “Labino, i sa sangnain, uni i sa wat na bung bat tari!” ⁴⁰ O Iesu i watungi tano lena, “Pepetlai, ka watung tari tam lena, ra un nurnur un tama a minamar anun o God?”

⁴¹ I mo ra det bulus ru a wat. O Iesu i tatado usapat netes, ra i watungi lena, “Tita, a watung wakak torom ui, uni u sa longoro iau. ⁴² A tasmani lena u ser longoro iau, ikut a wasiso lenri, kibino una taro ri, sur det in nurnur lena ui u tulu ru iau.”

⁴³ I sa watung tari lenri, ra i kakabo namin labino walngano lena, “Lasarus, un

pirso!”⁴⁴ O Lasarus i pirso, tomo nama kum malu ra di rau tar aru lamano ma aru kikino nami, ma ara du malu kai ra di pulus bat tar in masarino nami. O Iesu i watungi tandet lena, “Mot in palos ru a kum malu na minat gusuni sur in nan.”

Det wasiso tomo sur det in um doko o Iesu

(Mt 26:1-5; Mk 14:1-2; Lk 22:1-2)

⁴⁵ I mo ra a susut na te Juda ra det kis nisan o Maria, det tama a utna ri o Iesu i pami, ma det nurnur uni. ⁴⁶ Ikut ara taro tagun det ka det nurnur, ra det wan torom a kum Parisi ma det inanos det una utna ri o Iesu i pami. ⁴⁷ A kum lamlabino tene etabor torom o God, ma a kum Parisi det kabo tomo a taro na kiwung, ma det watungi lena, “Asau dat in pami? A musano ri i pam a susut na utna na ukisin. ⁴⁸ Ra dat in madek ru i, a taro rop det in nurnur uni, ma a kum taro na inaim tagitong o Rom det in nanpat ma det in rege ru anundat a rumu na etabor ma det in rakon ru anundat a gapman kai.”

⁴⁹ Ara tagun det a risano o Kaiapas, a mugumugu na tene etabor torom o God una kilalo ra, i watungi lena, “Ai, ka mot mananos. ⁵⁰ Ka mot tasmani lena in wakak torom mot ra taio in mat bat a taro, sur gong dat a taro Juda rop dat iru.”

⁵¹ Awu sur i watung orosi kut. I wasiso na poropet lenra, uni i a mugumugu na tene etabor anun o God una kilalo ra. I wasiso un o Iesu lena in mat sur a taro Juda. ⁵² Ma awu sur in mat sur det kut, sur a taro rop utkai anun o God ra det kis una ramano kum tamon gisen, sur in ben tomo pas det ma det in takai kut.

⁵³ Una bung ut ra, a kum mugumugu anun a taro Juda det turpas a wasiso sur lako kum kisapi sur det in um doko o Iesu. ⁵⁴ I mo ra o Iesu ke ser wan mo umatandet. I wan pas tagitiro, sur a tamon Efraim ra i milau una nubual kalako taro uni, ra det kis tiro nam anun a kum nat na ususer.

⁵⁵ A labino bung na lotu na Wanlakai anun a taro Juda i sa milau, ra a susut na taro tagun a kum tamon det mugu usapat o Jerusalem, sur det in utalapor mugu pas det umatan o God ra ka di pami utmakai a labino bung na lotu, elar nama ngasino tagun anundet a lotu. ⁵⁶ Tiro iai, det sisio sur o Iesu. Det tur tomo taru ubalan in noworo ina rumu na etabor, ra det ting etetalai det lena, “Asau mot nuki, in nan ut urin una labino bung na lotu, o awu?”

⁵⁷ A kum lamlabino tene etabor ma a kum Parisi det sa itula taru lena, ra taio i sa tama

tar o Iesu, in inanos lakit uni ra kura i kis awai, sur det in pam ukai pasi.

12

O Maria i waninar o Iesu sur a bung ra in mat ma din uruki una kulam na minat (Mt 26:6-13; Mk 14:3-9)

¹ A wonom na bung utmakai numugu tan a labino bung na lotu na Wanlakai, o Iesu i wanpat tong o Betani, a tamon anun o Lasarus, a musano ra o Iesu i ulaun melet pasi gusun a minat. ² Ra det pam a inangon tiro sur u ugasgas o Iesu. O Mata i wapor utna torom det, ma o Lasarus i ara tagun det ra det kis tomo nam o Iesu una inangon. ³ Ra o Maria i los pas in nokoto na polo sangsangnain ra di watungi nama nad, ma a matano i ka doko. I lingisi una ru kikin o Iesu ma i wus der nama iwu na lorino. Ma a sangnainino, i ubukus pas a rumu ra.

⁴ Ara tagun a kum nat na ususer anun o Iesu, o Judas Iskariot, i ra in usobor tar o Iesu, i watungi lena, ⁵ “Sur asau ra ka di siuru in nokoto na polo sangsangnain ri sur lako tulu mar na denaria* sur din tabor a kum sibo na taro nami?” ⁶ O Judas ke maris a sibo na taro, awu. I watungi lenri uni i ser tamtamabat anundet a mani ma i ser los eno i, uni i a tene wolong. ⁷ O Iesu i longoro a wasiso anun o Judas, ra i watungi lena, “Madek ru a ino ri, uni i sa pam tar a pinapam ri un iau sur a bung ra an mat ma din uruk a minating una kulam na minat. ⁸ A kum sibo na taro det in laun bolbolos tomo ut nam mot. Ikut iau, kan kis tukum nisamot.”

Det epak sur det in um doko o Lasarus

⁹ A kunur na taro tagun a taro Juda det longoro i lena o Iesu kurong i o Betani, ra det wan utong. Awu sur det wan sur det in tama o Iesu kut, det wan utkai sur det in tama o Lasarus, i ra o Iesu i sa ulaun pasi gusun a minat. ¹⁰ I mo ra a kum lamlabino tene etabor det epak sur det in um doko o Lasarus utkai. ¹¹ Uni a susut na te Juda det wan gusun det ma det nurnur un o Iesu, i kibino un o Lasarus.

O Iesu i wan usapat o Jerusalem elar nama king

(Mt 21:1-11; Mk 11:1-11; Lk 19:28-40)

¹² Una bung numur, a labino kunur na taro ra det wanpat sur a labino bung na lotu na Wanlakai, det longoro i lena o Iesu kai i sa wan nanan usapat o Jerusalem. ¹³ Ra det los pas a kum dono baibai ma det

11:45: Jn 7:31 11:46: Lk 16:31 11:52: Jn 10:16

11:53: Jn 5:18

12:1: Jn 11:1, 43

12:2: Lk 10:40

12:3: Lk 7:37-38

*

12:5: Ara denaria i elar nama ikul

12:8: Lo

15:11

12:10: Jn 11:45

12:13: Jn 1:49

anun ara musano un ara bung na pinapam.

wan sur det in barato o Iesu nami. Ra det kukukuk lena,

“Osana! O naro ra i wanpat nama risan a Labino i dan! Sng 118:25-26

A king anun a taro Israel i dan!”

¹⁴ O Iesu i sio pas a dongki, ra i kis taru netes uni, elar nama Buk Tabu i sa watung tari uni lena,

¹⁵ “A taro Saion, gong mot ngara.

Tama i, anumot a king i mo ra pat i wan nanan torom mot,

i kis una barman na dongki.” Sek 9:9

¹⁶ A kum nat na ususer anun o Iesu ka det tasman lele i lena a kum utna ri, di sa tumtus mugu taru uni una Buk Tabu. Ikut ra o Iesu i sa kis una nun a minamar, det tasmani maragom lena, di sa tumus tar a kum utna ri un o Iesu, ma di sa pam tari kai a kum utna ri uni.

¹⁷ A susut na taro ra det tur tomo nam o Iesu una bung ra i kabo pirso pas o Lasarus tagun a kulam na minat ma i ulaun pasi, det inanos nanan nami. ¹⁸ Ra a susut na taro det wan sur det in barato o Iesu, uni det sa longoro tar a wasiso una utna na ukisin ri. ¹⁹ A kum Parisi det wasiso etetalai torom det lena, “Mot tama i, ka dat in pam lar pas tu utna ra dat nem na pami uni. Uni a taro rop det sa muri.”

A taro Grik det nem na tama o Iesu

²⁰ A ramano kum te Grik kai det wan usapat o Jerusalem una labino bung na lotu na Wanlakai, sur det in lotu. ²¹ Ra det wan torom o Pilip, a te Betsaida. O Betsaida ara tamon una papor Galili. Ma det watungi tano lena, “Le, met nemi sur met in tama o Iesu.” ²² O Pilip i wan ra i inanos o Endru. Ra der wan ma der inanos tar o Iesu. ²³ Ra o Iesu i watungi tander lena, “A du bung i sa wanpat sur o God in mar a Nutun a Musano. ²⁴ A inanos mot nama lingmulus, ra in niwino wit ken puku taru una piso, ma ken mat pas, in kis len taru ut ra, in tekene kut. Ikut ra in mat pas, in wu lako susut na wino. ²⁵ Osi ra i maris anun a nilaun, in iru, ma osi ra ke maris bat anun a nilaun nin una rakrakon bual, in utur ukai a nilaun sur a nilaun tukum. ²⁶ Ra taio i nemi sur iau anun a Labino, i wakak sur in mur iau, ma i anung a tultul ra in kis tomo nam iau una dino ra an kis iai. Osi ra i papam torom iau, o Tita in ulabo pasi.

O Iesu i wasiso una nun a minat

²⁷ “Uniri in balang i maut doko. Asau mo ra an len? Pepetlai, an watungi lena, “Tita, un ulaun iau gusun a du bung ri?” Awu, kan

wararing lenri, uni, i kutri, i a kibino ra a wan suri urin, sur an taramo a ngunungut una bung ri. ²⁸ Tita, un ulabo pas a risam!”

Numur in nalngan ara tagisapat una langit i watungi lena, “A sa ulabo tari, ma an ulabo meleti ut.” ²⁹ A kunur na taro ra det tur taru tiro det longoro i. Ara taro det watungi lena a pungpugur, ma ara taro kai det watungi lena, “Ara ensel i wasiso toromi.” ³⁰ Ikut o Iesu ut i watungi lena, “In nalngan ara ri, awu sur i wasiso sur in warut iau, awu, i wasiso sur in warut mot ut. ³¹ A du bung ri din warkurai a rakrakon bual. Uniri din lakro ru a labino anun a rakrakon bual. ³² Ikut iau, ra din utur toto pas iau taginin upiso usapat netes, an dat pas a taro rop torom iau.”† ³³ I watungi lenri sur in utalapor i lena in mat pepetlai.

³⁴ A kunur na taro ra, det watungi tano lena, “Met sa longoro tari una Buk na Warkurai lena, a Karisito in kis tukum. Sur asau ra u watungi lena din utur toto pas a Nutun a Musano usapat netes? Osi ra a Nutun a Musano?” ³⁵ O Iesu i watungi tandet lena, “A talapor ken kis suano i mo torom mot. Ra a talapor i kis utmakai torom mot, mot nan tuptupukus. Numur a dumirum in pulus bat mot. I ra i wanan una dumirum, ken tasmani lena in nan urai. ³⁶ Ra a talapor i kis utmakai torom mot, mot in nurnur uni, sur mot a kum nutnutun a talapor.” Ra o Iesu i sa watung rop tar a wasiso ri, i wan eno pas gusun det.

A ramano taro Juda ka det nurnur un o Iesu

³⁷ O Iesu i sa pam tar a susut na utna na ukisin umatandet, ikut ka det nurnur uni, ³⁸ sur a wasiso ra a poropet Aisaia i wasiso taru uni in nanpat mulus. I watungi lena, “Labino, osi i nurnur una numet a wasiso?

Ma osi ra di sa ese tar a dekdekin a Labino tano?” Ais 53:1

³⁹⁻⁴⁰ Ma o Aisaia i sa watung tari kai lena, “O God i sa upulu bat ru a kum matmatan det,

ma i sa udumun bat ru a kum nuknukin det,

sur gong det tamtama nama matmatan det, ma gong det tasman lele i nama nuknukin det,

ma ka det in tupukus torom iau,

sur an ulaun pas det.” Ais 6:10

Iri a kibino ra ka det nurnur. ⁴¹ O Aisaia i watungi lenri uni i sa tama mugu a minamar anun o Iesu, ra i wasiso uni.

⁴² A susut na taro det nurnur un o Iesu. A ramano kum mugumugu kai tagun a taro

12:16: Jn 2:22 12:23: Jn 13:31-32; 17:1 12:24: 1 Kor 15:36 12:25: Mt 16:25 12:27: Sng 6:3; 42:5; Mt 26:38 12:32: Jn 3:14 † 12:32: O Iesu i wasiso na pidik una nun a minat unin nanai kutus. 12:33: Jn 19:6 12:34: Sng 110:4; Ais 9:7; Dan 7:14 12:35: Jn 8:12 12:36: Ep 5:8 12:41: Ais 6:1 12:42: Jn 9:22 12:43: Jn 5:44

Juda det nurnur, ikut ka det wasiso puaso uni, sako a kum Parisi det in turbat ru det gusun a kum rumu na lotu. ⁴³ Ka det wasiso talapor, uni det nemi kut a wasiso na ululabo anun a taro torom det, ma ka det nuk pas a wasiso na ululabo anun o God torom det.

A kum wasiso anun o Iesu in warkurai a taro

⁴⁴ O Iesu i wasiso namin labino walngano lena, "I ra i nurnur un iau, awu sur i nurnur kut un iau, i nurnur utkai un i ra i tulu ru iau urin. ⁴⁵ Ma i ra i tama iau, i sa tama tar i ra i tulu ru iau urin. ⁴⁶ A sa wanpat urin una rakrakon bual elar nama talapor, sur osi ra i nurnur un iau, ken kis una dumirum. ⁴⁷ Ra taio i longoro anung a kum wasiso ma ke muri, iau kan warkurai i. Uni ka wanpat sur an warkurai a rakrakon bual, a wanpat kut sur an ulauni. ⁴⁸ Osi ra ke nem iau ma ke mur anung a kum wasiso, anung a kum wasiso ut ra, det in warkurai i una bung na warkurai. ⁴⁹ Uni a kum wasiso ra a sa watung tari, awu sur anung. O Tita ut i tulu ru iau nami urin, sur an wasiso kut nami. ⁵⁰ Ma a tasmani lena anun a warkurai i pitar a nilaun tukum. A kum wasiso a watungi, o Tita i tulu ru iau nami sur an watungi."

13

O Iesu i gos a kum kikin anun a kum nat na ususer

¹ A labino bung na lotu na Wanlakai i sa milau, ra o Iesu i tasmani lena i sa milau sur in nan mo gusun a rakrakon bual, ma in nan torom o Tamano. I maris doko anun a taro ra det kis una rakrakon bual, ra uniri i ese anun a labino marmaris torom det, a marmaris ra katu tuktukino. ² Una mirum, o Iesu tomo nam anun a kum nat na ususer det wangon tomo. Numugu tan anundet a inangon, o Satan i sa unuk tar o Judas Iskariot, a nutun o Saimon, sur in usobor tar o Iesu. ³ O Iesu i tasmani lena, o Tamano i sa pitar rop tar a dekdek toromi, sur in warkurai sur a kum utna rop nami. Ma i tasmani lena i wan ut tagisapat tan o God, ma in millet melet torom o God. ⁴ I mo ra i katutur pas gusun a inangon, i rakon ru anun in teken namalu ra i rakup bat anun a ememar nami, ra i los pas a tawol ma i ker pasi uni. ⁵ I lingis pas a danim una besen ra i gos a kum kikin anun a kum nat na ususer nami, ma i wus sengesenge det nama tawol ra i ker pasi uni.

⁶ I wan torom o Saimon Pita, ra o Pita i tingi lena, "Ai, Labino, ui un gos aru kiking?" ⁷ O Iesu i balu i lena, "A utna ri a pami ko tasmani, ikut numur un tasmani." ⁸ O Pita i watungi lena, "Gong! Gong u gos aru kiking." O Iesu i balu i lena, "Ra kan gos aru kikum, ui awu sur ara tagun iau." ⁹ O Saimon Pita i balu i lena, "Labino, gong u gosi kut aru kiking, un gosi utkai aru lamang ma in loring!" ¹⁰ O Iesu i watungi tano lena, "Osi ra i sa rurus pas, a pinino rop i sa talapor, din gos tar aru kikino mukut. Mot, mot sa talapor, ikut, awu sur mot rop." ¹¹ O Iesu i sa tasman tar o naro ra in usobor tari. Iri a kibino ra i watungi lena, "Awu sur mot rop mot talapor."

¹² I sa gos tar a kum kikindet, ra i ubek melet pas anun in namalu ra i rakon ru tari, i kis melet ma i ting det lena, "Mot tasmani ut a utna ri a pami un mot? ¹³ Mot watung iau a 'Tene Ususer' ma a 'Labino'. I tokodos ut anumot a wasiso, uni a risang ut ra. ¹⁴ Iau anumot a Labino ma a Tene Ususer, ma a sa gos tar a kum kikimot. I wakak sur mot kai mot in ser gos etetalai a kum kikimot. ¹⁵ A sa pam tar a larlar ri torom mot, i wakak sur mot kai mot in pami lenri a pami. ¹⁶ A inanos mot nama lingmulus, a tultul ke labo taun anun a labino. Ma osi ra di tultulu i, ke labo taun o naro ra i itula. ¹⁷ Ra mot tasman a kum utna ri, ma mot pami, mot in dan.

¹⁸ "Awu sur a wasiso un mot rop, a tasman det ut ra a sa pilok pas det. Ikut din pam sot pasi ut a wasiso ra di sa tumus tari una Buk Tabu lena, 'A musano ra mir wangon tomo nami, in tupukus taru melet sur iau, ma in pas pisopiso iau.' *Sng 41:9* ¹⁹ A inanos mugu tar mot una utna ri ra in nanpat. Ra in nanpat, mot in nurnur lena, iau a Karisito. ²⁰ A inanos mot nama lingmulus, osi ra i gas pas o naro ra a tulu i, i gas pas iau utkai. Ma osi ra i gas pas iau, i gas pasi utkai o naro ra i tulu ru iau urin."

O Iesu i wasiso un o naro ra in usobor tari ulaman a kum ebar

(Mt 26:20-25; Mk 14:17-21; Lk 22:21-23)

²¹ O Iesu i sa watung tari lenri, ra i taramo a labino mamaut una niono, ra i watung puaso i lena, "A inanos mot nama lingmulus, ara tagun mot in pitar tar iau ulaman a kum ebar." ²² A kum nat na ususer det tama etetalai det, ikut ka det tasmani lena osi tagun det ra i watung a wasiso ri uni. ²³ Ara nat na ususer i kis milau o Iesu. A nat na ususer ri, o Iesu i ser nem doko i. ²⁴ O Saimon Pita i pet ukinalong pas a nat na ususer ra, ma i watungi lena, "Un ting o

Iesu lena, osi ra i watung a wasiso ri uni.”
²⁵ A nat na ususer ra, i ere torom o Iesu ra i tingi lena, “Labino, osi ra u watung a wasiso ri uni?”
²⁶ O Iesu i balu i lena, “An puk pas a du beret una dis, ma osi ra an pitari tano, i ut ra.” Ra i puk pas a du beret, ma i pitari tan o Judas Iskariot, a nutun o Saimon.
²⁷ O Judas i rakon pas a du beret gusun o Iesu, ra o Satan i ruk taru mut uni. Ra o Iesu i watungi tan o Judas lena, “A utna ra u nem na pami, un pam lakiti.”
²⁸ Ikut kataio tagun det ra det kis tomo una inangon i tasmani lena sur asau ra o Iesu i watungi lenra toromi.
²⁹ O Judas i ser tamtamabat anundet a mani. Ma iri a kibino ra a ramano kum nat na ususer det nuki lena, o Iesu i inanosi sur in kul lako utna ra det sibo suri una labino bung na lotu. A ramano kum nat na ususer kai det nuki lena o Iesu i inanosi, sur in tabor a kum sibo na taro nam tu utna.
³⁰ Ra o Judas i rakon pas a du beret, i pirso pas mut. Ma i sa mirum.

A Nutun a Musano in los a minamar

³¹ Ra o Judas i sa wan taru, o Iesu i watungi tandet lena, “Uniri din mar a Nutun a Musano, ma o God kai in los a minamar uni.
³² O God in los a minamar uni, ma o God in pitar a minamar torom a Nutun a Musano. Uniutra o God in pitari tano.

³³ “A kum paspasang, uniri kan kis suano i mo torom mot. Mot in sisio sur iau. Ikut, a wasiso ra a sa watung tari tan a kum te Juda, uniri an watungi bulung tamot lena, ‘A tamon ra an nan suri, ka mot in nan lar pas iai.’

O Iesu i pitar a matok na warkurai

³⁴ “Uniri a pitar a matok na warkurai torom mot lena, mot in nem etetalai mot. Mot in nem etetalai mot elar nami ra a nem mot.
³⁵ Ra mot in nem etetalai mot, a taro rop det in tasmani lena mot anung a kum nat na ususer.”

O Iesu i wasiso mugu un o Pita ra in ipul ru i

(Mt 26:31-35; Mk 14:27-31; Lk 22:31-34)

³⁶ O Saimon Pita i tingi lena, “Labino, un nan urai?” O Iesu i balu i lena, “A tamon ra an nan suri, kon nan lar pas iai uniri, ikut numur un mur iau.”
³⁷ O Pita i tingi lena, “Labino, sur asau ra kan mur ui uniri? Ka ngara ra an mat bat ui.”
³⁸ Ra o Iesu i balu i lena, “Pepetlai, a lingmulus ut ra un mat bat iau? A inanos ui nama lingmulus,

a kereke ken kurkurirakuk utmakai, ra an ipul a tulu dino lena, ko tasman iau.”

14

O Iesu i a kisapi

¹ O Iesu i watungi tandet lena, “Gong a balamot i mamaut, mot in nurnur un o God, ma mot in nurnur kai un iau.
² A rumu anun o Tita, a susut na kukur rumu kura uni. Ma ra awu, an inanos mot ut uni. An nan sur an waninar tar a dino sur mot.
³ Ra a sa waninar tar a dino sur mot, an milet melet, ma an ben pas mot torom iau sur mot kai mot in kis una tamon ra a ser kis iai.
⁴ Mot tasmani ut a kisapi sur a tamon ra an nan suri.”

⁵ O Tomas i watungi tano lena, “Labino, ka met tasman a tamon ra un nan suri, ra met in tasman petlan a kisapi suri?”
⁶ O Iesu i balu i lena, “Iau a kisapi, ma iau a lingmulus, ma iau a nilaun. Kataio in nan torom o Tita un tu kisapi gisen, un iau kut.
⁷ Ra mot in tasman mulus iau, mot in tasmani kai o Tita. Uniri mot sa tasmani, ma mot sa tama tari.”
⁸ O Pilip i watungi tano lena, “Labino, un ese tar o Tamam torom met, i kut ra met nemi.”
⁹ O Iesu i balu i lena, “Pilip, a sa kis suano i tomo nam mot, pepetlai, ko tasman iau utmakai? Osi ra i tama iau, i sa tama tar o Tita. Sur asau u watungi lena an ese tar o Tita torom mot?
¹⁰ Pepetlai, ko nurnur lena iau kura un o Tita, ma o Tita kuri un iau? A kum wasiso ra a watungi tamot, awu sur anung. O Tita ra kuri un iau i pam anun a pinapam.
¹¹ Mot in nurnur un iau ra a watungi lena kura iau un o Tita, ma o Tita kuri un iau. Ma ra ka mot nurnur una nung a wasiso, mot in nurnur kut un iau, kibino una kum utna na ukisin ra a pami.

¹² “A inanos mot nama lingmulus, o nara ra i nurnur un iau, in pam a kum pinapam elar nami ra iau a ser pami. Ma in pam a kum lamlabino pinapam taun a kum pinapam ra a sa pam tari, uni an nan torom o Tita.
¹³ Ma a kum utna rop ra mot saringi nama risang, an pam sot pasi, sur o Tita in los a minamar un o Nutunu.
¹⁴ Ra mot in sasaring sur tu utna nama risang, an pam sot pasi.

O Iesu i watungi lena in tulu ru a Tokodos na Nion

¹⁵ “Ra mot in nem iau, mot in mur anung a kum warkurai.
¹⁶ Ma an saring o Tita, ra in tulu ru ara Tene Warut bulung torom mot, sur in kis tukum torom mot.
¹⁷ I a

Tokodos na Nion, ra in upuaso a lingmulus. A taro tagun a rakrakon bual ka det in nemi, uni ka det in tama lele i ma ka det in tasmani. Ikut mot, mot tasman a Tene Warut, uni i kis tomo nam mot ma in kis un mot. ¹⁸ Ra an nan gusun mot, ka mot in kis na nat na soi, uni an milet melet kut torom mot.

¹⁹ “Ken suano i kut, ra a taro tagun a rakrakon bual ka det in tama melet iau mo. Ikut mot, mot in tama iau. Ma mot in laun, uni a laun. ²⁰ A bung ra an katutur melet gusun a minat, mot in tasmani lena kura iau un o Tita, ma mot kai kuri un iau, ma iau kura un mot. ²¹ Osi ra i utur ukai anung a kum warkurai ma i muri, i ra i nem iau. O Tita in nemi, ma iau kai an nemi, ma an ese iau toromi.”

²² O Judas (awu sur o Judas Iskariot) i ting o Iesu lena, “Labino, sur asau ra un ese tar ui torom met kut, ma awu sur torom a taro una rakrakon bual?” ²³ O Iesu i balu i lena, “Ra taio i nem iau, in mur anung a kum etowo. O Tita in nemi, ma mir nam o Tita mir in nan toromi, ma mir in kis tomo nami. ²⁴ Osi ra ke nem iau, ken mur anung a kum etowo. A kum wasiso ra mot longoro i awu sur anung, anun o Tita, i ra i tulu ru iau urin.

²⁵ “A watung a kum wasiso ri torom mot, ra a kis utmakai tomo nam mot. ²⁶ A Tene Warut, a Tokodos na Nion ra o Tita in tulu ru i una risang. In ususer mot una kum utna rop, ma in unuk tar mot melet nama kum wasiso ra a sa watung tari tamot. ²⁷ A pitar a malmal torom mot. Anung a malmal ra, a tabor mot nami. Ka tabor mot elar nama rakrakon bual i etabor. Gong a balamot i mamaut, ma gong mot ngara. ²⁸ Mot sa longoro tari, ra a sa watung tari torom mot lena, ‘An nan pas ma an milet melet torom mot.’ Ra mot nem iau, mot in gas ra an nan torom o Tita, uni i, i labo tang. ²⁹ A sa inanos mugu tar mot una kum utna ra numur in nanpat, ma ra i sa wanpat, mot in nurnur.

³⁰ “Kan wasiso liklik mo torom mot, uni a labino taginin una rakrakon bual milau mo in nanpat. Kalako dekdekino sur in winim pas iau nami, ³¹ ikut an pam sot rop pasi ut a kum pinapam ra o Tita i tulu ru iau sur an pami, sur a rakrakon bual in tasmani lena a nem o Tita.

“Mot tur, dat na wan.”

15

O Iesu ut in nanai na wain

14:20: Jn 17:21-23 14:24: Jn 7:16 14:28: Jn 20:17 14:29: Jn 13:19 15:2: Mt 3:10 15:6: Mt 7:19;
13:42 15:8: Mt 5:16 15:10: Jn 14:15; 1 Jon 2:5 15:12: Jn 13:34 15:13: Jn 10:11; 1 Jon 3:16 15:14:
Mt 12:50 15:17: Jn 13:34 15:19: Jn 17:14

¹ O Iesu i watungi lena, “Iau ut in nanai na wain mulus, ma o Tita i a tene tamtamabat tagun a kinobot na wain. ² I ser tau ru a kum kanokano rop nin un iau ra ka det ser wu, ma i ser burup det ra det ser wu, sur det in wu a susut na wino. ³ Mot sa talapor, kibino una wasiso ra a sa watung tari tamot. ⁴ Mot in laun un iau, ma iau an laun un mot. Ka mot in wu ra ka mot laun un iau, elar nama kano wain ken wu oros ra ken patop unin nanai ino.

⁵ “Iau ut in nanai na wain, ma mot a kum kanokano. Osi ra i laun un iau, ma iau a laun uni, in wu a susut na wino. Ikut ra mot laun gisen gusun iau, ka mot in pam lar pas tu utna. ⁶ Ra taio ken laun un iau, i elar nama kano duwai, ra di woro ru i ra numur in marang. Din ubek tomo det, ma din woro det una sungun, sur det in nangan rop tiro iai. ⁷ Ra mot in laun un iau, ma anung a wasiso in laun un mot, mot in saring iau sur tu utna ra mot nemi, ra din pitari ut torom mot.

⁸ “Ra mot in wu a susut na wimot, o Tita in los a minamar, ma a wimot in ese i lena mot anung a kum nat na ususer mulus. ⁹ O Tita i nem iau, lenkutkai ra a nem mot. Mot in laun una nung a marmaris. ¹⁰ Ra mot in mur anung a kum warkurai, mot in laun una nung a marmaris, elar nam iau, a mur a kum warkurai anun o Tita, ra a laun una nun a marmaris.

¹¹ “A watung a kum wasiso ri tamot, sur anung a gasgas in kis un mot, ma anumot a gasgas in bukus una numot a nilaun. ¹² Iri anung a warkurai torom mot lena, mot in nem etetalai mot, elar nami ra a nem mot. ¹³ Ra taio in pitar ru anun a nilaun sur in mat sur a kum paspasano, anun a marmaris i labo sakit. Katu marmaris anun taio i elar nami. ¹⁴ Ra mot in mur anung a kum warkurai, mot a kum paspasang. ¹⁵ Kan watung mot melet mo lena a kum tultul, uni a tultul ke tasman a utna ra anun a labino i pami. Ikut a watung mot lena a kum paspasang, uni a sa watung rop tar a kum wasiso tamot ra a longoro i tan o Tita. ¹⁶ Awu sur mot pilok pas iau, iau ut a pilok pas mot. Ra a pitar a pinapam tamot sur mot in nan ma mot in wu a wimot, ma a wimot in kis tukum. Ma o Tita in tabor mot nama sau ra mot sasaring suri nama risang. ¹⁷ Mot in nem etetalai mot. Iri anung a warkurai torom mot.

A taro tagun a rakrakon bual det in nget mot

¹⁸ “Ra a taro tagun a rakrakon bual det in nget mot, mot in nuk pasi lena det sa nget

mugu tar iau. ¹⁹ Ra mot anun a rakrakon bual, a rakrakon bual in nem mot elar nam mot anunu. Ikut mot awu sur anun a rakrakon bual, a sa pilok pas mot gusuni. Iri a kibino ra i nget mot. ²⁰ Mot in nuk pas a wasiso ra a sa watung tari tamot lena, 'A tultul ke labo taun anun a labino.' Ra det ban laulau iau, det in ban laulau mot kai. Ra det mur anung a wasiso, det in muri kai anumot a wasiso. ²¹ Det in ban laulau mot kibino una risang, uni ka det tasman o naro ra i tulu ru iau urin.

²² "Ra gunuk kan nanpat ma kan wasiso torom det, ka din takun det una nundet a kum sakino petutna, ma det in langolango ut. Ikut uniri, katu wasiso anundet sur det in wasiso bat det nami gusun anundet a sakino petutna. ²³ Osi ra i nget iau, i ngeti utkai o Tita. ²⁴ A sa pam tar a kum utna na ukisin ra kataio in pam lar pasi. Ra gunuk kan pam tar a kum utna na ukisin ra nisandet, ka din takun det una nundet a kum sakino petutna, ma det in langolango ut. Ma iri, det sa tama tar a kum utna na ukisin ra a sa pam tari, ikut det nget mir rop nam o Tita. ²⁵ Di pami lenri, sur din pam sot pas a wasiso ra di sa tumus tari una Buk na Warkurai lena, 'Det nget iau, ma katu kibino.' *Sng 35:19*

²⁶ "An tulu ru a Tene Warut torom mot tagisapat tan o Tita, i a Tokodos na Nion ra in upuaso a lingmulus. Ra in nanpat in wasiso puaso un iau. ²⁷ Ma mot kai mot in wasiso puaso un iau, uni mot kis tomo nam iau turpasi una turturkibin ina nung a pinapam tuk uniri.

16

¹ "A watung a kum utna ri tamot, sur gong anumot a nurnur i puku. ² Det in turbat mot gusun a kum rumu na lotu. Numur a du bung in nanpat, ra a taro ra det um doko mot, det in nuki lena det pami ut a pinapam anun o God. ³ A taro det in pam a kum utna ri torom mot, uni ka det tasman mir nam o Tita. ⁴ A sa watung tar a kum wasiso ri tamot, sur ra a du bung ra in nanpat, mot in tasmani lena a sa utumarong mugu tar mot uni.

A pinapam anun a Tokodos na Nion

"Ka watung a kum wasiso ri tamot una turturkibin ina nung a pinapam, uni a kis utmakai tomo nam mot. ⁵ Ikut uniri, an nan torom o naro ra i tulu ru iau urin. Ikut kataio tagun mot i ting iau lena, 'Un nan urai?' ⁶ Mot tupunuk doko uni a watung a kum wasiso ri torom mot. ⁷ A inanos mot nama lingmulus lena, in wakak torom mot

ra an nan. Gunuk ra kan nan, a Tene Warut ken nanpat torom mot. Ikut ra an nan, an tulu ru i urin torom mot.

⁸ "Ra in nanpat, in ese a taro una rakrakon bual una nundet a sakino petutna, ma in ese det kai una tokodos na petutna ma una warkurai anun o God. ⁹ In ese det lena, ra ka det in nurnur un iau, i ra anundet a sakino petutna. ¹⁰ Ma in ese det kai una tokodos na petutna, uni an nan torom o Tita ma ka mot in tama melet iau mo. ¹¹ Ma in ese det kai lena o God i sa pitar tar a warkurai na minabalu tan a labino tagun a rakrakon bual, ma i sa upuku ru tari.

¹² "A susut na wasiso ra an watungi tamot, ikut ke topas mot utmakai. ¹³ A Tokodos na Nion, ra i ser upuaso a lingmulusino, in nanpat, ma in utalapor mot una kum lingmulusino rop un o God. A kum wasiso ra in watungi awu sur anunu, in watungi kut a kum wasiso ra i longoro i, ma in inanos mot una kum utna ra in nanpat numur. ¹⁴ In pitar a minamar torom iau, ra in los pas anung a wasiso, ma in inanos mot nami. ¹⁵ A kum utna rop ra anun o Tita, anungi. I ra a kibino ra a watungi lena, a Tokodos na Nion in los pas anung a wasiso ma in inanos mot nami.

A tupunuk ma a gasgas

¹⁶ "Ken suano i kut, ra ka mot in tama melet iau mo. Ma ken suano i kut, mot in tama melet iau." ¹⁷ Anun a ramano kum nat na ususer det ting etetalai det lena, "Asau a kukurai ina nun a wasiso ri ra i watungi lena, ken suano i kut ra ka dat in tama meleti mo, ma ken suano i kut ra dat in tama meleti? Ma i watungi kai lena, 'Uni an nan torom o Tita'. ¹⁸ Asau a kukuraino ra i watungi lena, 'ken suano i? Ka dat tasman a utna ri i wasiso uni!'"

¹⁹ O Iesu i tasmani lena det nem na tingi, ra i watungi torom det lena, "A watungi lena, 'Ken suano i kut ra ka mot in tama iau mo, ma ken suano meleti kut mot in tama melet iau.' Iri a wasiso ra mot ting etetalai mot uni, niko? ²⁰ A inanos mot nama lingmulus, mot in tupunuk ma mot in tangis, ikut a rakrakon bual in gas. Mot in tupunuk, ikut numur anumot a tupunuk in tupukus sur a gasgas, ²¹ elar nama ino ra i milau sur in usus, in taramo a ngunungut, ikut, ra i sa usus pas, in dumano a ngunungut ma in gas. In gas uni i sa usus tar a nat urin una rakrakon bual. ²² Lenkutkai ra torom mot, uniri mot tupunuk, ikut an tama melet mot, ra mot in gas. A ngas na

gas ri, kataio in pet lar pasi sur in rakon ru i gusun mot.

²³ “Una bung ra, ka mot in ting melet iau mo un tu utna. A inanos mot nama lingmulus, o Tita in tabor mot nama sau ra mot sasaring suri nama risang. ²⁴ Tuk uniri, ka mot sasaring utmakai sur tu utna nama risang. Mot in sasaring ra din tabor mot, sur a gasgas in bukus una numot a nilaun.

O Iesu i winim pas a rakrakon bual

²⁵ “A watung a kum utna ri tamot una kum wasiso elelar, ikut a du bung in nanpat ra kan wasiso melet mo torom mot nama wasiso elelar, an inanos talapor mulus mot mo un o Tita. ²⁶ Una kum bung ra, mot in sasaring nama risang. Ka watungi lena iau an saring o Tita sur in warut mot, ²⁷ uni o Tita ut i nem mot. I nem mot uni mot nem iau, ma mot nurnur lena a wan tagisapat tan o God. ²⁸ A wan tagisapat tan o Tita, ra a wan urin una rakrakon bual. Uniri, an nan mo gusun a rakrakon bual, ma an milet melet torom o Tita.”

²⁹ Anun a kum nat na ususer det watungi tano lena, “Uniri ko wasiso mo nama wasiso elelar, u wasiso talapor mulus maragom. ³⁰ Uniri met tasmani lena u tasman a kum utna rop. Ko sibo sur taio in ting ui nam tu iting, uni u sa tasman a nuknuki met rop. I mo ra met nurnur maragom lena u wan ut tagisapat tan o God.” ³¹ O Iesu i watungi tandet lena, “I lai, mot nurnur maragom? ³² A du bung in nanpat, ma iri i sa wanpat, ra din lu susuaro ru mot gusun iau, ra mot in nan susuaro sur anumot a kum tamon taktakai, ra iau mukut an kis. Ikut awu sur iau kut ra an kis, mir ut nam o Tita.

³³ “A watung a kum wasiso ri tamot sur mot in laun un iau, ma a balamot in bukus nama malmal. Nin una rakrakon bual, mot in taramo a mamaut. Ikut gong mot ngara, uni a sa winim pas a rakrakon bual.”

17

O Iesu i wararing sur anum a kum nat na ususer

¹ Ra o Iesu i sa watung rop tar a kum wasiso ri, i tamtama tito usapat una langit, ra i watungi lena,

“Tita, a du bung i sa wanpat, un pitar a minamar torom o Nutum, sur o Nutum in pitar a minamar torom ui. ² U pitar tar a dekdek tang sur an warkurai sur a taro rop, sur an pitar a nilaun tukum torom det rop ra u pitar tar det tang. ³ A nilaun tukum i lenri: A taro det in tasman ui, ra

ui kut a God mulus, ma det in tasman o Iesu Karisito kai, i ra u tulu ru i urin. ⁴ A sa pam sot pas a kum pinapam ra u pitar tari tang sur an pami. Ma una pinapam ra, a sa ese tar a minamarim nin una rakrakon bual. ⁵ Tita, uniri, ra an kis tomo melet nam ui, un pitar a minamar tang. A minamar ra numugu a kis uni tomo nam ui, ra ka di ukisi utmakai a rakrakon bual.

⁶ “Det ra u sa pilok pas det gusun a rakrakon bual, ma u pitar tar det tang, a sa watung puaso tar ui tandet. Det anumi, ra u pitar tar det tang, ma det sa mur anum a kum wasiso. ⁷ Uniri, det sa tasmani lena a kum utna rop ra u pitar tari tang, i wanpat mulus ut tagisapat tam. ⁸ A sa inanos tar det nama kum wasiso ra u pitar tari tang, ma det sa muri. Ma det tasman mulusi lena a wan ut tagisapat tam, ma det sa nurnur lena ui ut u tulu ru iau urin.

⁹ “A wararing sur det. Awu sur a wararing sur a taro tagun a rakrakon bual, ikut a wararing sur det ra u pitar tar det tang, uni det anum. ¹⁰ Det rop ra anung, anum utkai, ma det rop ra anum, anung utkai. Ma anung a minamar din tama i un det. ¹¹ Uniri an nan torom ui, kan kis suano i melet mo nin una rakrakon bual, ikut det, kuri utmakai det una rakrakon bual. Tita, ui u tasur sakit, un tamtamabat det nama dekdekin a risam, a rising ra u pitar tari tang. Un tamtamabat det sur det in takai kut, elar nam ui ma iau, dar takai kut. ¹² A kis tomo nam det, ra a tamtamabat det nama dekdekin a risam, a rising ra u pitar tari tang. A tamtamabat det, ma kataio tagun det i iru. Ara sot kut in iru, o Judas, i ra i wan sur a iniru tukum. I wanpat lenra, sur din pam sot pas a wasiso ra di sa tumus tari una Buk Tabu.

¹³ “Iri an nan torom ui, ikut a watung a kum wasiso ri ra a kis utmakai nin una rakrakon bual, sur anung a labino gasgas in ubukus anundet a nilaun. ¹⁴ A sa watung tar anum a kum wasiso tandet, ma a rakrakon bual i nget det, uni awu sur det taginin una rakrakon bual, elar nam iau kai, awu sur iau taginin una rakrakon bual. ¹⁵ Ka saring ui sur un rakon ru det gusun a rakrakon bual, awu. Ikut a saring ui sur un tamtamabat det gusun a Tene Sakino. ¹⁶ Awu sur iau taginin una rakrakon bual, ma det kai awu sur det taginin una rakrakon bual. ¹⁷ Anum a kum wasiso i lingmulus. Un utalapor det nam anum a

lingmulus na wasiso, sur det anum a taro mulus. ¹⁸ U tulu ru iau urin una rakrakon bual, lenkutkai ra iau, a tulu ru det una rakrakon bual. ¹⁹ A pitar tar iau ut torom ui, sur det kai, det anum a taro mulus una num a lingmulus na wasiso.

²⁰ “Awu sur a wararing kut sur det, a wararing utkai sur a taro ra numur det in nurnur un iau, a taro ra a kum tene nurnur det in wasiso puaso un iau torom det. ²¹ Tita, a wararing lena det rop ra det nurnur un iau, det in takai kut, elar nam ui kuri un iau ma iau kura un ui. A nemi sur det in laun un dar, sur a taro una rakrakon bual det in nurnur lena ui u tulu ru iau urin. ²² A sa pitar tar a minamar tandet, a minamar ra u pitar tari tang, sur det in takai kut, elar nam dar, ra dar takai kut. ²³ Iau kura un det, ma ui kai kuri un iau, sur det ara mukut, sur a taro nin una rakrakon bual det in tasmani lena, u tulu ru iau urin, ma det in tasmani kai lena, u nem det elar nami ra u nem iau.

²⁴ “Tita, a nemi sur det ra u sa pitar tar det tang, det in kis tomo nam iau una tamon ra an kis iai, sur det in tama anung a minamar, a minamar ra u pitar tari tang, uni u nem iau numugu ra ko ukisi utmakai a rakrakon bual. ²⁵ Tita, ui u tokodos, a taro nin una rakrakon bual ka det tasman ui. Ikut iau, a tasman ui, ma anung a taro na ususer kai, det tasmani lena ui, u tulu ru iau urin. ²⁶ A sa watung puaso tar ui torom det, ma kan mana nama wasiso talapor un ui torom det, sur det in tasman ui, sur a marmaris ra u nem iau nami, in kis un det ma iau kai an laun un det.”

18

O Judas i ben tar det torom o Iesu

(Mt 26:47-56; Mk 14:43-50; Lk 22:47-53)

¹ Ra o Iesu i sa wararing pas, i ben pas anun a kum nat na ususer, ra det lakai in nala na danim Kidron. Un ara papor, det wan ruk utiro una ara kinobot na duwai na oliw. ² O Judas, i ra i usobor tar o Iesu i tasman a kinobot ra, uni a susut na dino o Iesu ma anun a kum nat na ususer det ser wan tomo iai. ³ Ra o Judas i mugu pas a kum tene inaim tagitiro o Rom, ma a kum tene tamtamabat tagun a rumu na etabor. A kum lamlabino tene etabor torom o God, ma a kum Parisi det tulu ru det. Det los a kum utna na inaim, a kum lam ma a kum utna ra i kunabor ra det sulu saro det nami.

⁴ Ikut o Iesu i sa tasman a kum utna rop ra in nanpat toromi, ra i wan torom det ma

i ting det lena, “Osi ra mot sisio suri?” ⁵ Det balu i lena, “O Iesu a te Nasaret.” I balu det lena, “Iau kut ri.” O Judas, i ra a tene usobor, kura ut i tur tomo nam det. ⁶ Una du bung ra o Iesu i watungi lena, “Iau kut ri,” det isu unago numur, ra det puku piso. ⁷ O Iesu i ting melet det, “Osi ra mot sisio suri?” Det balu i lena, “O Iesu a te Nasaret.” ⁸ O Iesu i balu det lena, “A sa watung tari tamot lena, iau kut ri. Ra mot sisio ut sur iau, mot in madek ru det ri det in nan.” ⁹ O Iesu i watungi lenri, sur in pam sot pas a wasiso ra i sa watung tari lena, “Det rop ra u pitar tar det tang, kataio tagun det in iru.”

¹⁰ O Saimon Pita i los in totok na inaim. I dat pasi ra i tau kutus ru in nosot na talngan o Malkus, a tultul anun a mugumugu na tene etabor torom o God. ¹¹ Ra o Iesu i watungi tan o Pita lena, “Uruk melet anum in totok una bano. Pepetlai, kan inum tagun a kap na mamaut ra o Tita i pitar tari tang?”

Det ben pas o Iesu torom o Anas

¹² A kum tene inaim tagitong o Rom tomo nam anundet a mugumugu, ma a kum tene tamtamabat tagun a rumu na etabor anun a taro Juda, det pam ukai pas o Iesu, ma det ker pas aru lamano. ¹³ Det ben mugu i torom o Anas i ra der inumunu nam o Kaiapas, a mugumugu na tene etabor torom o God una kilalo ra.* ¹⁴ O Kaiapas, i ra i watungi torom a kum te Juda lena, in wakak ra taio in mat bat a taro rop.

A mugano ipul anun o Pita

(Mt 26:69-70; Mk 14:66-68; Lk 22:55-57)

¹⁵ O Saimon Pita ma ara nat na ususer kai der wan nanan numurun o Iesu. A mugumugu na tene etabor i tasman wakak a nat na ususer ra der wan tomo nam o Pita. A nat ra, i ruk tomo nam o Iesu utiro una nubual anun a tene etabor ra. ¹⁶ O Pita kura utmakai i tur taru nago utamon nisan a matansako. Ra a nat na ususer ra a mugumugu i tasmani, i millet melet, ma i wasiso torom a toraro ra i tamtamabat a matansako, sur in papos pas o Pita. ¹⁷ A toraro ra i tamtamabat a matansako i ting o Pita lena, “Ai, ui utkai ara nat na ususer anun a musano ri, niko?” O Pita i balu i lena, “Awu, iau awu.”

¹⁸ A bung na mirum ra, i kotokoto doko. Ra a kum tultul ma a kum tene tamtamabat tagun a rumu na etabor det sur tomo pas a kabo lakit na sungun, det tur talilis pasi ma det minor. O Pita kai i tur tomo nam det sur in minor.

17:22: Ap 4:32 **18:9:** Jn 17:12 **18:11:** Mt 26:39
nama mugumugu na tene etabor torom o God. **18:14:** Jn 11:49-51

*

18:13: O Anas ma o Kaiapas, der rop di watung der

*O Iesu i tur umatan o Anas**(Mt 26:59-66; Mk 14:55-64; Lk 22:66-71)*

¹⁹ O Anas, a mugumugu na tene etabor torom o God i ting o Iesu una nun a kum nat na ususer, ma una kum wasiso ra i ser ususer a taro nami. ²⁰ O Iesu i balu i lena, "A sa wasiso talapor umatan a taro rop, ma a ser ususer det una kum rumu na lotu ma ubalan in noworo ina rumu na etabor, ra a taro Juda det ser wan tomo iai. Ka inanos eno tar det un tu utna. ²¹ Gong u ting iau. Un ting a taro ra det ser longoro iau. Det ra, det tasman a kum utna ra a ser wasiso uni."

²² Ra o Iesu i sa watung len tari ra, ara tagun a kum tene tamtamabat i pasor in masarino, ma i watungi tano lena, "Sur asau ra u balu a wasiso anun a mugumugu na tene etabor lenra?" ²³ O Iesu i balu i lena, "Ra a sa watung tar tu utna i raro, un watung talapori torom a taro rop ri. Ikut ra a utna ri a watungi i lingmulus ut, sur asau ra u pasor iau?" ²⁴ Ra ka di palosi utmakai a kineker gusun aru lamano, o Anas i tulu ru i torom o Kaiapas, i kai a mugumugu na tene etabor torom o God.

*O Pita i ipul ru o Iesu aru dino melet**(Mt 26:71-75; Mk 14:69-72; Lk 22:58-62)*

²⁵ Ra o Pita kura utmakai i minor liklik, det tingi lena, "Ai, ui ukai ara tagun anun a kum nat na ususer, niko?" O Pita i ipul, ra i watungi lena, "Awu, iau awu." ²⁶ Ara tultul anun a mugumugu na tene etabor, a kukun o naro ra o Pita i tau kutus ru in talngano, i tingi lena, "Lar kut ui kut, ra a tama tomo tar mur nam o Iesu sapat una kinobot na duwai na oliw?" ²⁷ O Pita i ipul melet lena, "Awu." Ra uniutra, a kereke i kurkurirakuk mut.

*O Iesu i tur umatan o Pailat**(Mt 27:1-2, 11-14; Mk 15:1-5; Lk 23:1-5)*

²⁸ Una kobot raut, di ben pas o Iesu gusun a rumu anun o Kaiapas sur a labino rumu anun o Pailat, ara mugumugu tagun a gapman Rom. A kum te Juda ka det nem na ruk una nun a rumu, uni det sa rus talapor pas det umatan o God, sur det in nangon una labino bung na lotu na Wanlakai. Uni osi ra in ruk una rumu anun taio, ra awu sur a te Juda, in dur umatan o God. ²⁹ I mo ra o Pailat i pirso torom det ra i ting det lena, "Asau ra mot takun a musano ri uni?" ³⁰ Ma det balu i lena, "Gunuk ra a musano ri ken pam tu niraro, ka met in pitari torom ui sur un warkurai i." ³¹ O Pailat i watungi torom det lena, "Mot in ben pasi, ma mot ut mot in warkurai i elar nam anumot a warkurai." A kum te Juda det watungi tano

lena, "Torom met i tabu sur met in um doko taio." ³² A utna ri i wanpat sur din pam sot pas a wasiso anun o Iesu, ra i sa watung mugu tari una nun a ngas na minat.

³³ Numur o Pailat i ruk melet ra i kabo pas o Iesu, ma i tingi lena, "Ui a king anun a taro Juda?" ³⁴ O Iesu i balu meleti kut nama iting lena, "I lai, anum ut a wasiso ra u watungi lenra un iau, o di inanos tar ui kut un iau?" ³⁵ O Pailat i balu i lena, "Awu sur iau a te Juda. Anum a taro ut tomo nama kum lamlabino tene etabor torom o God, det ra det pitar tar ui tang sur an warkurai ui. Asau ra u sa pam tari?" ³⁶ O Iesu i balu i lena, "Anung a matanitu awu sur taginin una rakrakon bual. Ra gunuk anung a matanitu taginin una rakrakon bual, anung a kum tultul det in waim bat iau, sur gong a tur una warkurai anun a taro Juda. Ikut anung a matanitu awu sur taginin."

³⁷ Numur o Pailat i tingi lena, "I lingmulus ut, ui a king?" O Iesu i balu i lena, "I lingmulus ut ra u watungi lena iau a king. Di usus iau, ra a wanpat nin una rakrakon bual, sur an wasiso una lingmulus. Det rop ra tagun a lingmulus, det longoro in nalngang." ³⁸ Ra o Pailat i tingi lena, "Asau a lingmulus?"

*Di mulaot ru o Iesu sur din sak wati unin nanai kutus**(Mt 27:15-31; Mk 15:6-20; Lk 23:13-25)*

Ra o Pailat i sa ting tari lenri, i pirso melet torom a taro Juda. I watungi tandet lena, "Ka pastorom tu niraro anunu. ³⁹ Ikut, ara ngasino a ser pami torom mot, una kum kilalo rop una kum lamlabino bung na lotu na Wanlakai, a ser palos ru ara karabus torom mot. Pepetlai, mot nemi sur an palos ru a 'king anun a taro Juda' torom mot?" ⁴⁰ Det kukukuk lena, "Gong! Ka met nem o Iesu. Palos ru o Barabas!" O Barabas i a tene sakino sakit.

19

¹ Ra o Pailat i itula sur din ben gisen pas o Iesu ma din mirasi namin narus na inaim.

² A kum tene inaim det liko pas in narus ra a loklokono ma det ubek tari unin lorino elar nama kukup anun a king, ma det mar tari namin pepol na malu.* ³ Det wanan toromi, ma det watungi lena, "Ui a king anun a taro Juda!" Ra det kubu pasor in masarino.

⁴ O Pailat i pirso melet, ra i watungi tandet lena, "Mot tama i, iri a ben pirso tari umatamot, sur mot in tasmani lena, ka sio pas tu niraro anunu." ⁵ Ra o Iesu i pirso, di sa mar tari namin narus ra a loklokono unin lorino, ma in pepol na malu. O Pailat

i watungi tandet lena, “Mot tama a musano ri!”⁶ Ra a kum lamlabino tene etabor torom o God, ma a kum tene tamtamabat tagun a rumu na etabor det tama o Iesu, det kukukuk lena, “Sak wati unin nanai kutus! Sak wati unin nanai kutus!” Ra o Pailat i watungi tandet lena, “Mot in ben pasi, sur mot ut, mot in sak wati unin nanai kutus. Iau ka sio pas tu niraro anunu.”⁷ A kum te Juda det balu i lena, “Anumet a warkurai i lenri, din um doko i, uni i watungi lena i a Nutun o God.”

⁸ O Pailat i longoro a wasiso ri, ra i ngara doko. ⁹ I ruk melet usa urumu, ra i ting o Iesu lena, “Ui tagai ui?” Ikut o Iesu ke balu i. ¹⁰ O Pailat i watungi tano lena, “Sur asau ra ko balu iau? Ko tasmani lena, a utur ukai a warkurai sur an ulangolango ui, o an sak wat ui unin nanai kutus?” ¹¹ O Iesu i balu o Pailat lena, “Ra gunuk o God ken pitar tar a warkurai tam, kalako dekdekim sur un pam tu utna un iau. I mo ra o naro ra i pitar tar iau torom ui sur un warkurai iau, anun a sakino i labo taun anum a sakino.”

¹² O Iesu i watungi len tari ra, ra o Pailat i lari sur in ulangolango ru i. Ikut a kum te Juda det kukukuk toromi lena, “Ra un palos ru i, ka mur pasano nama Sisa! Uni taio ra i ulabo pasi lena i a king, i lakai a warkurai anun a Sisa.”[†] ¹³ O Pailat i longoro a kum wasiso ri, ra i ben pirso pas o Iesu unago upiso. Numur o Pailat i kis taru una kiskis na warkurai, kura una dino ra di watungi o Gabata una wasiso Ibru. A kukuraino i lena, di ubek bat a piso nama kum watat. ¹⁴ Ra in matanas i sa kis lekeleke, o Pailat i watungi tan a taro Juda lena, “Mot tama i, anumot a king ri.” A utna ri, i wanpat una bung na waninar, a bung numugu tan a labino bung na lotu na Wanlakai. ¹⁵ A taro Juda det kukukuk dekdek lena, “Sak doko i! Sak doko i! Sak wati unin nanai kutus!” O Pailat i ting det lena, “Mot nemi sur an sak wat anumot a king unin nanai kutus?” A kum lamlabino tene etabor torom o God det balu i lena, “A Sisa sot kut i anumet a king!” ¹⁶ Ra o Pailat i pitar tar o Iesu torom a kum tene inaim, sur det in sak wati unin nanai kutus. Ra det ben ru pas o Iesu.

Di sak wat o Iesu unin nanai kutus
(Mt 27:32-44; Mk 15:21-32; Lk 23:26-43)

¹⁷ O Iesu i pirso gusun a tamon Jerusalem, i los pas anun in nanai kutus ra i wan sur a nubual ra di watungi nama “Nubual na Lor na Minat,” ma una wasiso Ibru di watungi lena o Golgota. ¹⁸ Tiro iai, di sak wat tari unin nanai kutus. Ma di sak wat aru

musano kai tomo nami, una ru paporino, ma o Iesu i kete potar tander. ¹⁹ Ma o Pailat i pitar a wasiso sur din tumus a tumtumus, sur din ubeki sapat netes unin nanai kutus. A tumtumus ra i lena:

O IESU A TE NASARET, A KING ANUN A TARO JUDA.

²⁰ A susut na taro Juda det luk a tumtumus ri, uni a nubual ra di sak wat o Iesu unin nanai kutus iai, i millau kut o Jerusalem, ma di tumus a tumtumus ri una tulu ngas na wasiso, a wasiso Ibru, Latin ma Grik. ²¹ A kum lamlabino tene etabor torom o God det watungi tan o Pailat lena, “Gong u tumusi lena, ‘A King anun a taro Juda.’ Un tumusi kut lena, ‘A musano ri i watungi lena i a king anun a taro Juda.’” ²² O Pailat i balu det lena, “A tumtumus ra a sa tumus tari in lenutra.”

²³ Ra a kum tene inaim det sa sak wat tar o Iesu unin nanai kutus, det los pas anun a kum malu ra i rakup bat anun a ememar nami, ma det isuaro pasi una a wat na tinibo, arara tene inaim anun ara tinibo. Det los pasi kai anun in namala ra i pipisi. In namala ra, katu sunusuk uni, in teken kudulano malu kut. ²⁴ A kum tene inaim det wasiso etetalai torom det lena, “Gong dat rarosi, dat in pilai laki sur osi na pasandat in losi.” Det pami lenra sur din pam sot pas a wasiso na Buk Tabu. I watungi lena,

“Det isuaro anung a kum malu un det, ma det pilai laki suri.” Sng 22:18
Iri a kum utna ra a kum tene inaim det pami.

²⁵ O nan o Iesu i tur millau nisan in nanai kutus anun o Iesu. I tur tomo nama tisino a ino, ma o Maria kai a ino anun o Klopas, ma o Maria Magdalen. ²⁶ O Iesu i tama o nano det tur tomo nam ara nat na ususer ra o Iesu i ser nem doko i, ra i watungi tan o nano lena, “Nang, o naro ra i, a nutumlik.” ²⁷ I watungi kai tan a nat na ususer ra lena, “I ra i, o nam.” Turpasi ut una bung ra, a nat na ususer ra, i ben pas o nan o Iesu, sur in kis una nun a rumu.

O Iesu i mat

(Mt 27:45-56; Mk 15:33-41; Lk 23:44-49)

²⁸ O Iesu i tasmani lena i sa pam rop ru tar a kum pinapam, ra i watungi lena, “A muruk.” I watungi lenri sur in pam sot pas a wasiso ra di sa tumus tari una Buk Tabu. ²⁹ In teken nokoto na wain ra i mititir kura i tiro. Det los pas ara utna ra i ser dop a polo, ra det puk pasi una wain ra. Det ubek pasi unin nanai ra di watungi namin isop, ra det

19:8: Mt 27:12 19:11: Jn 10:18; Ap 2:23; Rom 13:1

mugumugu tagun a gapman Rom, ma a taro Israel kai det kis utuntudu ina nun a warkurai.

19:12: Lk 23:2; Ap 17:7 † 19:12: A Sisa i a labino

19:25: Mt 27:55-56

19:26: Jn 13:23

19:28: Sng 22:15

19:29: Sng 69:21

tulsu toto i usapat sur a wan o Iesu. ³⁰ Ra o Iesu i sa dop pas a wain ra, i watungi lena, "I sa rop." I lukun pirso in lorino, ra i ubek ru anun a nilaun.

Di so a paporin o Iesu

³¹ A kum te Juda det saring o Pailat sur din sak pakpak tar a kum kikindetul, sur detul in mat lakit, ma din los pirso ru a pinindetul gusun a tulin nanai kutus, uni a bung ra, i a bung na waninar, a bung numugu tan ara labino Bung na Sabat, ma ka det nemi sur a pinindetul in kete una tulin nanai kutus una Bung na Sabat. ³² I mo ra a kum tene inaim det wan, ma det sak pakpak aru kikin a mugano musano, ra numur ara pasander bulung, ra di sak wat tomo detul nam o Iesu una tulin nanai kutus. ³³ Ikut, ra det wanpat torom o Iesu, det tama i lena i sa mat, ra ka det sak pakpak aru kikin mo. ³⁴ Ikut ara tene inaim i so a paporin o Iesu nama bele, ra a gap ma a danim i sal pirso mut.

³⁵ A musano ra i tama a kum utna ri, i wasiso uni sur mot kai mot in nurnur. A utna ri i wasiso uni, i lingmulus, ma i ut i tasmani lena i lingmulus. ³⁶ Di pam a kum utna ri sur din pam sot pas a wasiso ra di sa tumus tari una Buk Tabu lena, "Ka din sak pakpak tu surino."

³⁷ Di pam sot pas a wasiso na Buk Tabu kai lena, "Det in tama o naro ra det so tari." *Sek 12:10*

Di uruk a minatin o Iesu una kulam na minat

(Mt 27:57-61; Mk 15:42-47; Lk 23:50-56)

³⁸ Numur, o Josep a te Arimatia i saring o Pailat sur a minatin o Iesu. I kai ara nat na ususer ra i ser mur eno i kut o Iesu, uni i ngaran a kum te Juda. Ra o Pailat i mulaot tari sur in nan ma in palos pirso pas a minatin o Iesu. ³⁹ O Nikodimas, i ra numugu i wan torom o Iesu una ara bung na mirum, i kai i wanpat. I los pas ara utna ra i sangnain wakak, ra di pami tagun a mira ma a alo. A maut inder i elar nama tulu noino na kilogrem. ⁴⁰ Der los pas a minatin o Iesu, numur der ubek a kum utna ra i sangnain wakak uni, ma der pulusi nama kum wakak na malu. A pinapam ra i elar nama ngasino anun a taro Juda, ra det ser pami una kum minat. ⁴¹ Ara kinobot kura milau nisan a nubual ra di sak wat o Iesu unin nanai kutus iai. Ara matok na kulam na minat kura tiro, ra ka di inep i utmakai tu minat uni. ⁴² Det inep tar a minatin o Iesu una kulam na minat ra, uni i milau kut. Det pami lenra uni a bung ra,

a bung na waninar, a bung numugu tan a Bung na Sabat anun a taro Juda.

20

O Iesu kapinaimi tiro una kulam na minat

(Mt 28:1-8; Mk 16:1-8; Lk 24:1-12)

¹ Una lar una mugano bung una wik, o Maria Magdalen i wan utiro una kulam na minat. I tama i lena di sa sur gisen tar a wat gusun a matansako na kulam na minat. ² I kalabor torom o Saimon Pita der nama nat na ususer ra o Iesu i ser nem doko i, ma i watungi tander lena, "Di sa los ru pas a Labino gusun a kulam na minat, ma ka met tasmani, ra kura di inep tari awai."

³ Ra o Pita der nama nat na ususer ra, der wan sur a kulam na minat. ⁴ Der rop der kalabor, ikut ara pasander i kalabor pas gusun o Pita, ma i kalabor pat mugu tiro nisan a kulam na minat. ⁵ I par pirso, ma i kiet, ra i tama a kum malu, ikut ke ruk. ⁶ O Saimon Pita i wanpat murmur tano, ra i ruk una kulam na minat, ma i tama i mukut a kum malu det inep taro tiro iai. ⁷ Ikut in namalu ra di rau tar in lorin o Iesu nami, ke kis tomo nama kum malu. Di sa pul tari, ma di ubek gisen tari ut. ⁸ Numur a nat na ususer, ra i mugu pat taro nisan a kulam na minat, i kai i ruk. I tama i ra i nurnur. ⁹ Ka der talapor utmakai una wasiso na Buk Tabu ra i watungi lena, o Iesu in katutur melet gusun a minat. ¹⁰ Numur aru nat na ususer der millet melet sur a tamon.

O Iesu i wanpat torom o Maria Magdalen

(Mt 28:9-10; Mk 16:9-11)

¹¹ O Maria Magdalen i tur nago utamon nisan a kulam na minat ma i tangis. Ra kura utmakai i tangis, i par pirso ma i kiet ruk una kulam na minat. ¹² I tama pas aru ensel kura der tiro, der emar nama kum kabang na malu ma der kis taru una nubual ra di inep tar a minatin o Iesu iai. Ara i kis una ulalong, ma ara pasander i kis una papadus. ¹³ Der tingi lena, "Le, ulai ra u tangis?" I balu der lena, "Det sa los gisen ru anung a Labino, ma ka tasmani ra kura mo di inep tari awai."

¹⁴ Ra i tupukus, i tama pas o Iesu kura i tur taru, ikut ke tasmani lena o Iesu ut ra. ¹⁵ O Iesu i tingi lena, "Le, ulai ra u tangis? Osi ra u sisio suri?" O Maria i nuki lena a musano ra, i a tene tamtamabat tagun a kinobot, ra i watungi tano lena, "Ra ui u los gisen ru a minatin o Iesu, un inanos iau ra kura u inep tari awai, sur an nan ma an los pasi." ¹⁶ O Iesu i watungi tano lena,

“Maria!” Ra o Maria i tupukus ma i watungi tano nama wasiso Ibru lena, “Raboni!” (a kukuraino lena tene ususer).

¹⁷ O Iesu i watungi tano, “Gong u pam a pining, uni ka wan toto utmakai torom o Tita. Ikut un nan torom a kum tisting, ra un inanos det lena, an nan usapat netes torom o Tita, i ra a Tamamot kai, torom anung a God, i ra anumot a God kai.” ¹⁸ Ra o Maria Magdalen i wan torom a kum nat na ususer ra i inanos det lena, “A sa tama tar a Labino.” Ma i inanos det kai una kum utna ra o Iesu i sa watung tari tano.

O Iesu i wanpat puaso torom anun a kum nat na ususer

(Mt 28:16-20; Mk 16:14-18; Lk 24:36-49)

¹⁹ Ra i mirum una mugano bung una wik, a kum nat na ususer det kis tomo, ma det ukai bat pas det tagisa urumu, uni det ngaran a ramano kum te Juda. O Iesu i wanpat ma i tur epotor tandet, ra i watungi tandet lena, “A malmal torom mot.” ²⁰ Ra i sa watung tari lenri, i ese aru lamano ma a paporino tandet. A kum nat na ususer det gas doko, ra det tama a Labino. ²¹ O Iesu i watung meleti tandet lena, “A malmal torom mot. O Tita i tulu ru iau, lenkutkai ra a tulu mot.” ²² Ra i sa watung tari lenri, i wup det nama wuwu na wano, ma i watungi tandet lena, “A Tokodos na Nion ri, mot in utur ukai i una nilaun anumot. ²³ Ra mot in dumano ru a kum sakino petutna anun taio, o God kai in unus ru i gusuni. Ra ka mot in dumano ru tu sakino petutna anun taio, o God kai ken unus ru i.”

O Iesu der nam o Tomas

²⁴ O Tomas, ra di watungi kai nama kasango, i ara tagun a noino ma aru nat na ususer, ke kis tomo nam det una du bung ra o Iesu i wanpat pas torom det. ²⁵ I mo ra a kum nat na ususer det inanos lena, “Met sa tama tar a Labino!” O Tomas i watungi kut tandet lena, “Ra kan tama a kinan a nil una aru lamano, ma kan uruk in kaskas na lamang uni, ma ra kan uruk a lamang una kinan a bele una paporino, iau kan nurnur.”

²⁶ Ra i sa ra wik bati, a kum nat na ususer det kis tomo melet tiro urumu, det tomo nam o Tomas. Det ukai bat pas det ut tagisa urumu. Ikut o Iesu i wanpat puaso ma i tur epotor tandet, ra i watungi lena, “A malmal torom mot!” ²⁷ Numur i watungi tan o Tomas lena, “Uruk in kaskas na lamam nin, ma un tama aru lamang. Tulsu a lamam urin, ma un uruki una paporing. Ra gong mo u wur nuknuk, un nurnur kut.” ²⁸ O Tomas i watungi tano lena, “Anung a

Labino ma anung a God!” ²⁹ O Iesu i inanos lena, “U nurnur maragom uni u tama iau, niko? Det ra ka det tama iau, ikut det nurnur, det dan.”

A kibino ra di tumus a buk ri

³⁰ O Iesu i pam a susut na ukinalong kai umatan anun a kum nat na ususer, ra ka di tumus ukai det una buk ri. ³¹ Ikut di tumus ukai pas a ramano kum utna ri, sur mot in nurnur lena o Iesu i a Karisito, a Nutun o God. Ra mot in nurnur uni, mot in laun nama risano.

21

O Iesu i wanpat melet torom a wonom mawit na nat na ususer

¹ O Iesu i wanpat melet torom anun a kum nat na ususer una usalin ina du tasi Taiberias. ² I lenri: Ara bung o Saimon Pita ma o Tomas, ra di watungi kai nama kasango, ma o Natanael a te Kana tagun a papor Galili, ma aru nutun o Sebedi, ma aru kai tagun a kum nat na ususer, det kis tomo. ³ Ra o Saimon Pita i watungi tandet lena, “An nan, an woro a uben.” Det balu i lena, “Dat tomo.” Ra det kas pas una pot ma det wan. Ikut una bung na mirum ra, ka det dat lako kiripo.

⁴ Una komkobot raut, o Iesu i tur taru nago una usalin, ikut a kum nat na ususer ka det tasmani lena o Iesu ut ra. ⁵ Ra o Iesu i kakabo torom det lena, “A kum nat, mot dat pas lako kiripo ut?” Det ipul kut lena, “Awu.” ⁶ O Iesu i watungi tandet lena, “Mot in woro a uben una papor sot na lamamot, sur mot in dat lako kiripo.” Det woro i lari ra i watungi. Ra det lagano datdat tar a uben, uni i bukus nama kum kiripo. ⁷ A nat na ususer ra o Iesu i ser nem doko i, i watungi tan o Pita lena, “A Labino ut nago!” O Saimon Pita i longoro i lena a Labino ut nago, ra i pipis melet pas in namalu ra i palos tari ra i woro a uben, ma i sirok losop utiro utasi. ⁸ A kum nat na ususer det mur nama pot unago una usalin. Ma det dat piso pas a uben ra i bukus nama kum kiripo, uni ka det bakbak gusun a usalin, i elar kut nama limo na noino sinanga.

⁹ Det sirok gusun a pot, ra det tama a lakit na sungun ma a kiripo kusapat netes uni, ma det tama i kai a beret. ¹⁰ O Iesu i watungi tandet lena, “Mot in los lako kiripo urin tagun a kum kiripo ra unikutri mot uben pasi.” ¹¹ Ra o Pita i kas una pot, ra i dat pirso a uben unago una usalin, ma i ulit ru a kum kiripo gusuni. I bukus nama kum lamlabino kiripo, a nilulukin det i elar nam ara mar ma limo na noino ma tul. Det

susut doko, ikut a uben ke tararos. ¹² O Iesu i watungi tandet lena, “Mot wan urin ma mot in nangon.” Kataio tagun anun a kum nat na ususer i pet lar pasi sur in tingi lena, “Ui osi?” Det sa tasmani lena i a Labino ut ra. ¹³ O Iesu i los pas a beret ma i tabor det nami, ra numur i tabor det bulung nama kiripo.

¹⁴ Iri a mantul na dino ra o Iesu i wanpat torom anun a kum nat na ususer, numur tan anun a katkatatur melet gusun a minat.

O Iesu i wasiso torom o Pita

¹⁵ Ra det sa wangon rop, o Iesu i watungi tan o Saimon Pita lena, “Saimon, nutun o Jon, pepetlai, u nem doko iau taun det ri?” I balu i lena, “Lingmulus, Labino, u tasmani lena a nem ui.” O Iesu i watungi tano lena, “Un tabor anung a kum nat na sipsip.”

¹⁶ O Iesu i manru u iting toromi lena, “Saimon, nutun o Jon, pepetlai, u nem doko iau?” I balu i lena, “Lingmulus, Labino, u tasmani lena a nem ui.” Ra o Iesu i watungi tano lena, “Un tamtamabat anung a kum sipsip.”

¹⁷ Ra o Iesu i mantul u watungi tano lena, “Saimon, nutun o Jon, pepetlai, u nem iau?” O Pita i tupunuk, uni o Iesu i tingi a tulu dino lena, “U nem iau?” I watungi tano lena, “Labino, u tasman a kum utna rop. U tasmani lena a nem ui.” Ma o Iesu i watungi tano lena, “Un tabor anung a kum sipsip.”

¹⁸ “A inanos ui nama lingmulus, ra u barman, ui ut u ser mar pas ui, ma u ser wan una kum nubual ra u nem na wan iai. Ikut ra un takano, un kodos aru lamam, ma ara gisen ut in mar ui, ma in ben tar ui una nubual ra ko nem na wan iai.” ¹⁹ O Iesu i watungi lenri, sur in ese a ngas na iniru ra in los o Pita. Un anun a iniru ra, in ulabo pas o God. Ra i sa watung tari lenri, i inanosi lena, “Un mur iau.”

O Pita i ting o Iesu un o Jon

²⁰ O Pita i ger ma i tama a nat na ususer ra o Iesu i ser nem doko i, kura i mur der. A nat na ususer ra, i ra i ere torom o Iesu una nundet a ururop na inangon, ra i ting o Iesu lena, “Labino, osi ra in usobor tar ui?”

²¹ O Pita i tama i, ra i ting o Iesu uni lena, “Labino, pepetlai un o naro ri?” ²² O Iesu i balu o Pita lena, “Ra a nemi sur in laun tuk an millet, awu sur a utna anumi. Ikut ui, un mur iau.” ²³ A wasiso i wanpat epotor tan det ra det nisnisino una nurnur, lena a nat na ususer ri ken mat. Ikut o Iesu ke watungi lena ken mat, awu, i watungi kut lena, “Ra a nemi sur in laun tuk an millet, awu sur a utna anumi.”

²⁴ A nat na ususer ri, i ra i wasiso puaso una kum utna ri, ma i tumus ukai i. Ma dat tasmani lena a kum utna ri i wasiso puaso uni, i lingmulus sakit.

²⁵ A susut na utna utkai o Iesu i sa pam tari. Ra gunuk din tumus rop pas det taktakai, a nuki lena a rakrakon bual ke labo sur din ubek a kum buk rop uni.

A kum Pinapam anun a kum Aposel

A wasiso talapor mugu

A buk ri, o Luk i tumusi. I tugus tomo i nam anun a mugano buk ra i tumusi, a Wakak na Wasiso un o Iesu Karisito. Una buk Aposel dat tama i lena, a Tokodos na Nion, i udekdek a kum nat na ususer sur det in warawai nama Wakak na Wasiso un o Iesu.

A buk ri, i wasiso una taro na lotu anun o Karisito, turpasi tong una papor Judia ma numur det wan sarara una rakrakon bual rop. A kum mugano te Karisito det tagun a taro Juda kut. Det nuki lena a lotu anun o Karisito anundet kut, ma awu sur anun a taro gisen kai. Ikut numur o God i ese i lena, i nemi sur a taro rop det a kum te Karisito. (Ap 10). A kum te Karisito tagun a taro Juda det nemi sur a kum te Karisito ra awu sur a taro Juda, det kai det in mur a kum warkurai anun a lotu Juda. A tinotok talilis una pinindi i ara warkurai ra det nemi sur a taro gisen kai det in muri. Ikut ra det kis tomo un ara labino kiwung, det kubus pas a wasiso sur a ramano kum warkurai kut, ra a kum te Karisito ra awu sur a taro Juda det in muri. (Ap 15).

Ara labino utna ra a buk ri i wasiso uni, a pinapam anun a Tokodos na Nion, a nion o God. A Tokodos na Nion i wanpat mugu torom a taro na ususer anun o Iesu una bung na Pentikos. A Tokodos na Nion ut i mugu a nuknukin det ma i pitar a dekdek tandet.

Una ramano kum inawan anun o Pol, o Luk i wan tomo nami. (Ap 16:10-17; 20:5-21; 27:1-28:16).

A inawan ina buk Aposel:

A ururop na wasiso anun o Iesu torom a kum nat na ususer (1:1-26)

A kum nat na ususer det warawai sapat o Jerusalem (2:1-8:3)

A kum nat na ususer det warawai tong una papor Judia ma una papor Samaria (8:4-12:25)

A mugano inawan anun o Pol (13:1-14:28)

A kiwung anun a taro na lotu sapat o Jerusalem (15:1-35)

A manru na inawan anun o Pol (15:36-18:22)

A mantul na inawan anun o Pol (18:23-21:16)

Di ukarabus o Pol sapat o Jerusalem (21:17-23:22)

O Pol i kis tong o Sisaria (23:23-26:52)

O Pol i wan utong o Rom (27:1-28:30)

¹⁻³ Torom o Tiopilus,

Una nung a mugano buk, a tumus a kum utna rop o Iesu i sa pam tari ma i sa ususer tar a taro nami, una turturkibin anun a pinapam, tuk una bung ra o God i ben toto pasi usapat una langit. Numur tan anun a minat, i wanan pat melet torom anun a kum aposel, ma a kum utna ra i pami i ulingmulusi lena, i sa laun melet gusun a minat. A wat na noino bung i kis melet pasi nin upiso ra i wanan pat torom det, ma i wasiso una matanitu anun o God. Ra i ususer tar anun a kum aposel nama dekdekkin a Tokodos na Nion, a kum aposel ra i pilok pas det. ⁴ Un ara bung tagun a kum bung numur tan anun a katkatatur melet gusun a minat, det kis tomo una inangon, ra i turbat det lena, "Gong mot wan gusun o Jerusalem, mot in kis langlang pas a Tokodos na Nion, ra o Tita i sa ullilman taru uni, ra a sa inanos tar mot nami. ⁵ O Jon i baptaiso nama danim, ikut ken suano i, ra din baptaiso mot nama Tokodos na Nion."

O Iesu i wan toto usapat una langit

⁶ Ra a kum aposel det kis tomo nam o Iesu, det tingi lena, "Labino, pepetlai, uniri un pitar melet tar a gapman torom met a taro Israel, sur met ut met in tamtamabat met ma met in kis langolango gusun a gapman Rom?"* ⁷ I balu det lena, "Awu sur a utna anumot sur mot in tasman a bung o a du bung ra o Tita i sa kubus tari sur in pitari uni. ⁸ Ikut a Tokodos na Nion in kis un mot, ma mot in utur ukai a dekdek, ma a utna ra mot tama i un iau, mot in wasiso uni sapat o Jerusalem, ma una kum tamon rop tong una ru papor Judia ma o Samaria, ma una rakrakon bual rop."

⁹ Ra i sa rop anun a wasiso, o God i ben toto pasi usapat una langit. Ra det tamtama utmakai, a bakut i pulus bat pasi gusun anundet a tamtama.

¹⁰ Det tatatado utmakai usapat una bakut ra o Iesu i wan gusun det, ra aiapiap kut aru musano ra der emar nama kum kabang na malu der tur pat nisandet. ¹¹ Ma der watungi lena, "Mot a kum te Galili, sur asau ra mot tur ma mot tatado usapat una bakut? O Iesu mo sapat, i ra o God i sa ben pasi gusun mot usapat una langit, in

1:1-3: Mk 16:19; Lk 1:3; 24:36-51; Ap 10:41 1:4: Lk 24:49; Jn 14:16-17; Ap 2:33 1:5: Mt 3:11 1:6: Lk 24:21 * 1:6: Una kum kilalo ra, a taro Israel det kis ututundu ina gapman Rom. Det nuki lena o Iesu in winim pas a gapman Rom ma det in langolango. 1:7: Mk 13:32 1:8: Mt 28:19; Lk 24:48 1:11: Mt 26:64; Lk 21:27

nanpat melet urin, elar ut nami ra mot tama ru i, ra i wan usapat netes.”

O Matias i keles o Judas Iskariot

¹² Numur a kum aposel det wan gusun a tangai di watungi nama Tangai na Oliw ra det milet melet usapat o Jerusalem. I milau i kut o Jerusalem. ¹³ Ra det wanpat sapat o Jerusalem, det ruk una rumu ma det kis una kukur rumu sapat netes. A kukur rumu ra det ininep ma det kiskis uni. Det ri, ra det kiskis tomo tiro iai: O Pita, o Jon, o Jems, o Endru, o Pilip, o Tomas, o Batolomiu, o Matiu, o Jems a nutun o Alpius, o Saimon ara tagun a kum Silot†, ma o Judas, a nutun ara Jems gisen. ¹⁴ Det tomo nam o Maria o nan o Iesu, ma a kum tistisin o Iesu, ma a ramano kum wardain kai. Det rop ka det mana nama niaring una kum bung.

¹⁵ Un ara bung epotor tan a kum bung ra, a kum tene nurnur det kis tomo. Det elar nam ara mar ma ru noino det. O Pita i tur ma i watungi lena, ¹⁶ “A kum tistising, a wasiso anun a Tokodos na Nion, ra o Dewid i wasiso taru uni numugu utmakai una Buk Tabu, uniri di sa pam sot pasi. I wasiso un o Judas, i ra i mugu det ra det pam pas o Iesu. ¹⁷ I ara tagun met, ma i kai i los a tinibo tomo nam met una pinapam ri.”

¹⁸ Ra o Judas i kul pas a du piso nama mani tagun anun a sakino pinapam ra i pam tari. Numur i puku pirso tiro iai una nun a du piso, in masarino i mugu. Ra in balano i tupurus potor, ma in narus na balano i tilior piso rop. ¹⁹ Det rop ra det kis tiro o Jerusalem, det longoro i, ma det watung a piso ra nam anundet a wasiso, Akeldama, a kukuraino, a piso na gap.

²⁰ O Pita i watungi utkai lena, “Di sa tumus tari una Kum Kelekele anun o Dewid lena,

‘A kinano in belbel,
ma gong taio i kis uni.’ *Sng 69:25*
Ma di tumus tari kai lenri,
‘Taio in kelesi una nun a pinapam.’ *Sng 109:8*

²¹⁻²² I mo ra i wakak ra dat in pilok pas tu musano, sur i kai in tene wasiso talapor tomo nam dat, un o Iesu lena i katutur melet gusun a minat. I wakak ra a musano ra, taio ut tagun dat ra dat ser kis tomo nam o Iesu, turpasi ra o Jon i baptais, tuk una bung ra di ben pas o Iesu gusun dat usapat una langit.”

²³ Ra det watung pat pas aru musano: O Josep, di watungin nam o Basabas, ma ara risano kai o Jastus, der nam o Matias. ²⁴ Ma

det wararing lena, “Labino, u sa tasman a balan a taro rop, un ese met, osi mulus tagun der ri u sa pilok pasi, ²⁵ sur in los a pinapam na aposel, ra o Judas i sa mat pas gusuni ma i sa wan sur a tamon ra i sot nam anun a sakino petutna.” ²⁶ Det pam a pinapam na pipilok nama ru wat, ra a wat anun o Matias i wanpat. Ra det luk tomo pasi nama noino ma ra aposel.

2

A inawan pat anun a Tokodos na Nion una bung na Pentikos

¹ Una bung na Pentikos, a kum tene nurnur rop det kis tomo un ara rumu. ² Ra a wungu tagisapat una langit i elar nama wungu ina labino wuwu, i wanpat kisin torom det, ma i ubukus pas a rumu ra det kis uni. ³ Ra det tama a kum utna i elar nama kum kunkunabor ina sungun, det wan sarara ma det kis netes un det taktakai. ⁴ Det rop det bukus nama Tokodos na Nion, ma det turpas a wasiso nama kum wur ngas na wasiso ra a Tokodos na Nion i pitar tari torom det.

⁵ Una kum bung ra, a susut na te Juda kai det kis tiro o Jerusalem. Det a kum tene lotu, tagun a kum tamon rop una rakrakon bual. ⁶ Det longoro a wungu ri, ra det kalabor pat tomo, ma i toboroboro a nuknukin det, uni det ut taktakai, det longoro anundet a kum wasiso, ra a kum tene nurnur det wasiso nami. ⁷ Det rop det kisin ma det nuknuk doko una utna ri, ra det watungi lena, “Tama i, det rop ri ra det wasiso, a taro Galili kut! ⁸ Asau a kibino ra dat rop taktakai dat longoro det, det wasiso nam anundet a kum wasiso ut? ⁹ Dat a kum te Patia, a kum te Midia, a kum te Elam, ma dat tagitong una kum papapor Mesopotemia, Judia, Kapadosia, Pontus, Asia, ¹⁰ Pirigia ma o Pampilia, ma tagitong o Ijip. Dat tagitong una papor Libia ra i milau o Sairini, ma tagitong o Rom. ¹¹ Dat a taro Juda ma ara taro tagun dat ra det ruk una lotu Juda. Ma dat tagitong o Krit ma o Arebia. Dat rop dat longoro det ra det wasiso una kum lamlabino pinapam anun o God nam anundat a kum wasiso.” ¹² Ra det rop det kisin, ma i toboroboro a nuknukin det, ra det ting etetalai det lena, “Asau a kukurai ina utna ri?” ¹³ Ikut ara taro det urongon un det, ma det watungi lena, “Det inum a wain ra det sipak nami.”

A warawai anun o Pita

¹⁴ O Pita i tur tomo nama noino ma ra aposel, ma i wasiso namin labino walngano

1:12: Lk 24:50-53 1:13: Mt 10:2-4 † 1:13: Silot i a risan a taro, ra det tur tomo, uni det nemi sur det in lakro ru a gapman Rom. 1:16: Sng 41:9 1:18: Mt 27:3-8 1:21-22: Mt 16:19; Mk 1:9; Jn 15:27 2:1: Wkp 23:15-21; Lo 16:9-11 2:3: Mt 3:11 2:4: Ap 4:31; 10:44-46; 19:6; Mk 16:17

torom a taro lena, “Mot a taro Juda, ma mot rop ra mot kis nin o Jerusalem, an palos a utna ri torom mot, ma mot in longoro wakaki. ¹⁵ Mot watungi lena det sipak. Ikut awu, uni i lisu na pakano bung utmakai una kobot. ¹⁶ A utna ri mot tama i, a poropet Joel i sa wasiso mugu taru uni lena, ¹⁷ ‘O God i watungi lena:

Una kum ururop na bung*

an pitar pirso a Niong torom a taro rop.
A kum nutnutu mot, a kum musano ma a wardain, det in wasiso na poropet.
Anumot a kum barman det in tama a kum tamtama,
ma anumot a kum takano na musano det in ririon a kum ririon.

¹⁸ Una kum bung ra, an pitar a Niong torom det kai ra anung a kum tultul na musano ma anung a kum tultul na wardain,
ma det in wasiso na poropet.

¹⁹ Ma an ese tar a kum utna na ukisin sapat una bakut,
ma a kum ukinalong nin upiso una rakrakon bual,
a kum utna ra, a gap, a sungun, ma a labino mis.

²⁰ In matanas in dumirum,
ma a kalang in merek elar nama gap,
ra numur a bung anum a Labino in nanpat,
a labino bung ra, a bung na minamar.

²¹ Ra det rop ra det wararing torom a Labino, in ulaun det.’ *Jol 2:28-32*

²² “A taro Israel, mot in longoro iau. An inanos mot un o Iesu, a te Nasaret. Mot ut mot tasmani lena, una dekdekin o God i pam a kum utna na ukisin, ma a kum dekdek na pinapam ma a kum ukinalong. I pami epotor torom mot, sur o God in ese i torom mot lena, i ut i tulu ru i. ²³ Di pitar tar o Iesu torom mot, elar nami ra o God i sa tasman mugu tari, una nuknukino. Ra mot tomo nama kum sakino taro, mot sak wati unin nanai kutus. ²⁴ Ikut, o God i ukatutur melet pasi, ma i los ru a minat gusuni, uni a minat ke pam ukai lar pasi. ²⁵ O Dewid i sa watung tari un o Iesu lena,

‘A tasmani lena a Labino i kis bolbolos tomo nam iau.

Kan neder,
uni kuri i una sot na lamang, i udekdek iau.

²⁶ I mo ra in balang i gas doko, ra a wasiso nama gasgas,
a nurnur lena un ulaun melet a pining.

²⁷ Uni kon madek tar iau unin nutung na minat,
ma kon madek tar anum a Tene Tasur sur in mereseng.

²⁸ U sa ese tar iau una kum kisapi sur an los a nilaun.

An kis tomo nam ui, ma un ubukus iau nama gasgas.’ *Sng 16:8-11*

²⁹ “A kum tistising, an wasiso talapor torom mot un o Dewid, a tubundat tagun numugu. I sa mat ma di sa por ru i, ma anum a kulam na minat kuri ut nisan dat tuk uniri. ³⁰ Ikut o Dewid a poropet, ra i tasmani lena, o God i sa liliman dekdek taru toromi lena, i ut in ukis tar taio tagun a kabotaro anunu sur in kelesi una nun a kiskis na king. ³¹ O Dewid i sa tasman mugu tar a utna ra in nanpat, ma i watung a wasiso ri una nilaun melet anum o Karisito, lena ka din madek tari unin nutung na minat ma a pinino ken mereseng. ³² O Iesu ut ra, o God i ukatutur pasi gusun a minat, ma met rop met tama i, ra met wasiso talapor uni. ³³ Di ulabo pasi ma di ukis tari una sot na laman o God, ma o God o Tamano i pitar a Tokodos na Nion toromi, elar nami ra i uliliman tari nami. Ra uniri o Iesu i sa pitar pirso a utna ri, ra mot tama i, ma mot longoro i. ³⁴ O Dewid ke wan usapat una langit, ikut i watungi lenri,

‘A Labino i watungi torom anung a Labino† lena,
“Un kis una papor sot na lamang,
³⁵ tuk ra an winim pas anum a kum ebar sur det in kis utuntudu in anum a warkurai.”’ *Sng 110:1*

³⁶ “I mo ra mot a taro Israel rop mot in tasman wakaki: O Iesu ra mot sak wat tari unin nanai kutus, o God i sa ukis tari sur i a Labino ma a Karisito.”

³⁷ Det longoro a wasiso ri, ra i so a balandet, ma det ting o Pita ma a kum aposel lena, “A kum tistisi met, asau met in pami?”

³⁸ O Pita i balu det lena, “Mot rop taktakai mot in nukpukus, ma din baptaiso mot nama risan o Iesu Karisito, sur din unus ru anumot a kum sakino petutna, ra din tabor mot nama Tokodos na Nion. ³⁹ Uni a etabor ri ra o God i sa uliliman taru uni, in nan torom mot, ma torom a kum nutnutu mot, ma det utkai ra det kis bakbak. In nan torom det rop, ra a Labino anundat a God in kabo pas det toromi.” ⁴⁰ Ma i utumarong det nama susut na wasiso kai, ma i udekdek det lena, “Mot in tumarong, ma mot in nan gisen gusun a sakino petutna anum a taro tagun uniri, sur gong mot los a warkurai

* **2:17:** A kum ururop na bung i turpasi una bung ra o Iesu i kis nin upiso ma in tuk una bung ra in millet melet.

2:29: 1 Kin 2:10 **2:30:** 2 Sml 7:12; Sng 89:3-4; 132:11 **2:31:** Sng 16:10 **2:33:** Ap 5:32; 7:55-56 † **2:34:**

“A Labino” i wasiso un o God, ma “anung a Labino” i wasiso un o Iesu. **2:36:** Ap 5:30-31 **2:38:** Ais 57:19

2:41: Ap 2:47; 4:4

na minabalu.”⁴¹ Det ra det mur a wasiso anun o Pita, di baptaiso det. Det elar nama tulu arip det, ra di luk tomo det nama kum tene nurnur.⁴² Ma det pitar tar anundet a nilaun una etowo anun a kum aposel, una kinkinis tomo nama marmaris, ma una inangon tomo, ma una niaring.

A kinkinis tomo anun a kum tene nurnur

⁴³ A kum aposel det pam a susut na utna na ukisin, ma a susut na ukinalong kai, ra a taro rop det urur un o God.⁴⁴ A kum tene nurnur rop det kis tomo, ma a kum utna rop ra anundet taktakai, anundet rop kut.⁴⁵ Ra det siuru anundet a kum du piso ma anundet a kum utna, ma a mani tagani, det isuaro i torom osi ra i sibo.⁴⁶ Det ser kis tomo ubalan in noworo ina rumu na etabor una kum bung rop. Ra det ser wangon tomo una nundet a kum rumu nama gasgas ma a lingmulus ubalandet.⁴⁷ Ra det watung ulabo pas o God, ma a taro rop det gas nam det. Ma una kum bung rop, a Labino i ulaun a susut na taro, ra di luk tomo det nama kum tene nurnur.

3

Di ulangolango pas a musano ra ke ser wan

¹ Ara bung o Pita ma o Jon der wan usapat una rumu na etabor, una du bung na niaring, una tulu pakano bung una lirop.² A taro det los tar ara musano ra ke ser wan, di usus pasi lenutra. Ma una kum bung rop, det ser ukis tari nisan a matansako ina in noworo na rumu na etabor, di watungi nama Wakak na Matansako, sur in ser saring utna tandet ra det ser ruk.³ I tama pas o Pita ma o Jon ra der ling na ruk, ra i saring der sur lako mani.⁴ Der tamtama tokodos toromi, ra o Pita i watungi lena, “Un tama mir!”⁵ I tarom tander, ma i kis langlang sur tu utna tander.

⁶ Ra o Pita i watungi lena, “Iau katu mani, ikut uniri an tabor ui nama utna ra anung. Una risan o Iesu Karisito, a te Nasaret, un tur ma un nan!”⁷ O Pita i pam a sot na lamano, ma i ukatutur pasi. Uniutra aru kikino i dekdek mut.⁸ Ra i katutur lakit mut, ma i wanan maragom. Detul ruk ubalan in noworo ina rumu na etabor, ra i wan, ma i sirsirok ra i watung ulabo pas o God.⁹ A taro rop det tama i lena i wanan, ma i watung ulabo pas o God,¹⁰ ra det kisin doko una utna ri di pami uni, ra det tasmani lena i kut ra i kiskis, ma i ser saring utna nisan a Wakak na Matansako.¹¹ A musano ri i pam ukai pas o Pita ma o Jon, ra a taro rop det kisin doko ma det

kalabor torom detul una parada ina rumu na etabor, ra di watungi nama Parada anun o Solomon.

O Pita i warawai una rumu na etabor

¹² O Pita i tama det, ra i watungi tandet lena, “Mot a taro Israel, ilai ra mot kisin una utna ri, ra mot tama dekdek mir? Peptelai, mot nuki lena mir ulangolango pas a musano ri nama dekdeki mir ut? Awu! Mot nuki lena mir ulangolango pasi uni mir tokodos umatan o God? Awu!”¹³ O God ut i pami. A God anun o Abaram, a God anun o Aisak ma a God anun o Jekop, a God anun a kum tumtubun dat tagun numugu, i ulabo tar a risan o Iesu anun a tultul. Mot pitar tari sur din um doko i, ma mot ipul ru i kut umatan o Pailat, ra i nem na palos ru i.¹⁴ Mot ipul ru a Tasur na Musano ma a Tene Tokodos, ra mot sasaring sur din palos tar a tene umum doko a taro torom mot.¹⁵ Ra mot um doko ru o Iesu, i ra a kibin i nilaun, ikut o God i ukatutur melet pasi gusun a minat. Ma met, met tama i ma met wasiso talapor uni.¹⁶ Una nurnur una risan o Iesu, di ulangolango pas a musano ri, ra mot tama i ma mot tasmani. A nurnur una risan o Iesu i ulangolango pas a musano ri umatamot rop.

¹⁷ “A kum tisting, a tasmani lena, mot tomo nam anumot a kum mugumugu kai mot pam orosi kut a utna ri un o Iesu, ka mot tasman asau ra mot pami.¹⁸ Iikut una kum utna ri mot pami, o God i pam sot pas a kum utna ra i sa watung mugu tari nama wasiso anun a kum poropet rop, lena anun a Karisito in mat.¹⁹ Mot in nukpukus, ma mot in nan torom o God, sur in unus ru anumot a kum sakino petutna,²⁰ sur mot in taramo a wakak na nilaun ra a Labino in pitari. Ma in tulu ru a Karisito torom mot, o Iesu i ra o God i sa pilok pasi.²¹ In kis sapat netes una langit, tuk una bung ra o God in umatok melet a kum utna rop, ra i sa watung tari numugu utmakai nama wasiso anun a kum taru na poropet anunu.²² O Moses i watungi lena, ‘A Labino anumot a God, in tulu ru tu poropet elar nam iau, tagun a kum tumtubu mot ut. Mot in longoro a kum utna rop ra in watungi tamot.²³ Ma osi det ra ka det longoro a poropet ra, din um doko ru det, ra awu mo sur det a taro anun o God.’ *Lo 18:15, 18-19*

²⁴ “A kum poropet rop, ra det wasiso puaso una wasiso anun o God, turpasi un o Samuel, ma det ra det wanpat numur tano, det wasiso mugu una kum bung ri.²⁵ A wasiso anun a kum poropet, anumot, ma a kunubus kai, ra o God i uliliman tari

torom a kum tumtubu mot tagun numugu. I watungi torom o Abaram lena, 'Un o tubum, an udan a kum kamkabo taro rop una rakrakon bual.' *Stat 22:18*

²⁶ O God i tulu ru anun a Tultul, i tulu mugu ru i torom mot a taro Juda, sur in ben pukus pas mot taktakai gusun anumot a kum sakino petutna, sur mot in dan."

4

O Pita ma o Jon der tur una warkurai

¹ O Pita ma o Jon der wasiso torom a taro, ra a kum tene etabor torom o God, ma a mugumugu anun a kum tene tamtamabat tagun a rumu na etabor, ma a kum Sadusi, det wan torom der. ² Det kankan torom der, uni der ususer a taro un o Iesu, ma der warawai nami lena i sa laun melet gusun a minat, lenkuktai ra a taro det in laun melet. ³ Ra det pam ukai pas der ma det uruk tar der una karabus, sur der in kis tuk una bung numur, uni i sa lirop. ⁴ Ikut, a susut na taro ra det longoro a wasiso anun o Pita ma o Jon, det nurnur. Ra a niluluk ina kum tene nurnur i labo nanan, a kum musano kut i elar nama limo na arip.

⁵ Una bung numur, a kum mugumugu, ma a taro na kiwung ma a kum tene ususer tagun a Warkurai, det kis tomo sapat o Jerusalem. ⁶ Det tomo nam o Anas, a mugumugu na tene etabor torom o God, ma a kum kukunu ri det: o Kaiapas, o Jon, o Aleksanda, ma ara taro kai. ⁷ Di ben pas o Pita ma o Jon, ra der tur umatandet ma det ting der lena, "Osi na ngas na dekdek ra mur pam a utna ri nami? Ma a risan osi ra mur pami nami?"

⁸ O Pita i bukus nama Tokodos na Nion, ra i watungi tandet lena, "Mot a kum mugumugu anun a taro ma a taro na kiwung kai, ⁹ uniri mot ting mir una wakak na pinapam ra mir pami una musano ra ke ser wan ma di ulangolango petlan pasi. ¹⁰ Mot ma a taro Juda rop, mot in tasmani lena, a musano ri ra i tur numugu tamot, di ulangolango pasi nama risan o Iesu Karisito a te Nasaret, i ra mot sak wat tari unin nanai kutus, ma o God i ukatutur melet pasi gusun a minat.

¹¹ I 'A wat ra mot a kum tene pam rumu mot lakro ru tari,

i ut ra, i wanpat a wakak na wat ra i udekdek a rumu.' *Sng 118:22*

¹² Katutaio gisen in ulaun dat, ma katu risan taio kai taginin una rakrakon bual, ra o God i pitar tari torom dat a taro, sur din ulaun dat nami."

¹³ Det tasmani lena, o Pita ma o Jon aru musano oros kut, ma ka der ususer pas un tu labino wortowo. Ma det kisin doko un der ra der wasiso ma ka der ngara. Ra det tasmani lena numugu detul ser imurmur tomo ut nam o Iesu. ¹⁴ Ikut det tama a musano ra di ulangolango pasi, i tur tomo nam der, ra ka det pet lar pasi mo sur det in balu der. ¹⁵ Det tulu gisen ru detul munung gusun a kiwung, ra det wasiso tomo pas, ma det watungi lena, ¹⁶ "Asau dat in pami una ru musano ri? Uni der sa pam ru ara labino utna na ukisin, ma i sa talapor torom det rop ra det kis nin o Jerusalem. Dat in ipul pepetlai mo? ¹⁷ Dat in turbat dekdek der, sur gong melet mo der wasiso torom taio nama risan o Iesu, sako a wasiso ri in nan kakaka torom a taro rop."

¹⁸ Numur det kabo melet pas der, ma det turbat der sur gong melet mo der wasiso ma der ususer lako taro nama risan o Iesu. ¹⁹ Ikut o Pita ma o Jon der balu det lena, "Pepetlai, i tokodos umatan o God sur mir in mur anumot a wasiso, ma a wasiso anun o God gong? Mot ut mot in tama i. ²⁰ Ikut mir, ka mir in mana lar pas nama wasiso un asau ra met sa tama tari, ma met sa longoro tari."

²¹ Ra det sa turbat dekdek tar der, det palos ru der. Ka det sio lar pas tu utna ra det in um der uni, uni a taro rop det watung ulabo pas o God una utna na ukisin ra der sa pam tari. ²² Uni a musano, ra di pam a utna na ukisin uni ra i langolango, anun a kilalo i labo taun a wat na noino.

A kum tene nurnur det wararing

²³ Ra di sa palos ru o Pita ma o Jon, der millet melet torom a kum paspasan der, ra der inanos det una kum utna rop ra a kum lamlabino tene etabor torom o God ma a kum mugumugu det sa watung tari tander. ²⁴ Ra det longoro i, det wararing tomo torom o God lena, "Labino, u ukis a bakut, a rakrakon bual, a tasi, ma a kum utna rop ubalandetul. ²⁵ Una Tokodos na Nion, u pitar a wasiso torom a tubumet o Dewid, anum a tultul. Ra o Dewid i watungi lena,

'Asau a kibino ra a taro, ra awu sur a taro Israel det kankan doko?

Ma sur asau det epak sur det in pam a sakino?

Ikut anundet a epak i utna oros kut.

²⁶ A kum king taginin una rakrakon bual det tur na inaim, ma a kum mugumugu det wan tomo,

sur det in ban laulau a Labino ma anun a Mesaia, i ra i sa pilok pasi.' *Sng 2:1-2*

²⁷ A lingmulus ra o Erod ma o Pontias Pailat, ma a taro ra awu sur a taro Israel, ma a taro Israel kai, det wan tomo una tamon ri sur det in ban laulau o Iesu, anum a Tasur na Tultul, ra u sa pilok pasi. ²⁸ Ra det pami lenra, det pam sot pas a kum utna ra numugu u sa waninar tari una dekdekim ma una num a nemnem sur in nanpat. ²⁹ Labino, un nuk pas anundet a kum dekdek na wasiso, ma un warut met anum a kum tultul sur gong met ngara ra met in wasiso puaso nama num a wasiso. ³⁰ Un warut met nama dekdekim sur a kum misait det in langolango, ma a kum utna na ukisin ma a kum ukinalong det in nanpat una risan o Iesu, anum a Tasur na Tultul."

³¹ Ra det sa wararing pas, a rumu ra det kis tomo uni i tugunu, ma det rop det bukus nama Tokodos na Nion, ma det wasiso nama wasiso anum o God, ma ka det ngara.

A kum tene nurnur det isuaro anundet a kum utna

³² A kum tene nurnur rop, i takai kut a nuknukin det ma a balandet, ma kataio tagun det i watung tu utna sur anunu kut. Det ubek tomo a kum utna sur anundet rop. ³³ A kum aposel det wasiso nama dekdek, una nilaun melet anum a Labino o Iesu gusun a minat, ra det sa tama tari. Ra a labino marmaris anum o God i kis un det rop. ³⁴ Kataio tagun det i sibo sur tu utna, uni det ra anundet a kum du piso ma det kai ra anundet a kum rumu det siuru pasi, ra a mani taguni, ³⁵ det losi torom a kum aposel. Ra det isuaro i torom osi ra i sibo.

³⁶ Ma o Josep kai, ara musano tagun a aillan Saipras, tagun a kabotaro Liwai, ma a kum aposel det watungi nam o Banabas, a kukurai ino lena "tene ururagot". ³⁷ Anun ara du piso i siuru pasi, ra a mani taguni, i los tari torom a kum aposel.

5

O Ananias ma o Sapaira

¹ Ara musano a risano o Ananias, der nama nun a ino a risano o Sapaira der siuru ara du piso. ² Ra der mulaot sur der in pam sikot ara kukur mani ra di sa kul tar a du piso nami, ma ara kukur mani kut o Ananias i losi torom a kum aposel. ³ Ra o Pita i watungi tano lena, "Ananias, pepetlai ra u mulaot pas o Satan sur in ruk unin balam ra u toro a Tokodos na Nion? Asau a kibino ra u munu pas ara kukur mani ra di

sa kul tar a du piso nami? ⁴ Ra a du piso i kis utmakai torom ui, anumi ut. Ma ra, u siuru i, ui ut u warkurai sur a mani ra u siuru pasi taguni. Ilai ra u pam a sakino utna ri? Awu sur u toro a taro, u toro i ut o God."

⁵ O Ananias i longoro a wasiso ri, i puku pirso ra i mat. Ra det rop ra det longoro a wasiso uni det ngara doko. ⁶ Numur a kum barman det wanpat, ma det pulus pas a minatino, det los pirso i, ma det por u i.

⁷ A tulu aua numur, anum a ino i ruk, ke tasman a utna ra i sa wanpat. ⁸ Ra o Pita i tingi lena, "Un inanos iau, i kut ri a matan a du piso, ra mur siuru pasi?" Ra i balu i lena, "I kut ra." ⁹ O Pita i watungi tano lena, "Ilai ra mur nama num a musano mur epak pas sur mur in lar a Nion a Labino? Tama i, det ra det sa por tar anum a musano, kuri kut det una matansako. Uniutri det in los pirso ui bulung." ¹⁰ Uniutra i bulung i puku pirso taru numugu nisan o Pita, ra i mat. Ra a kum barman det ruk, det tama i lena i sa mat, det los pirso pas a minatino, ra det por tari milau nisan anum a musano. ¹¹ Ra a taro na lotu rop det ngara doko, ma det rop kai ra det longoro a kum utna ri.

A kum ukinalong ma a kum utna na ukisin

¹² A kum aposel det pam a susut na ukinalong ma a susut na utna na ukisin nisan a taro. Ma a kum tene nurnur rop det ser kis tomo una parada ina rumu na etabor, di watungi nama Parada anum o Solomon.

¹³ A taro gisen det ngara sur det in kis tomo nam det, ikut ka det watung laulau det, det urur un det. ¹⁴ Ikut a susut na taro melet, a wardain ma a kum musano, det nurnur maragom una Labino, ma di luk tomo det nama taro na nurnur. ¹⁵ A taro det tama a pinapam anum a kum aposel, ra det los tar a kum misait ma di inep tar det una papor kisapi una kum kabulu na ininep ma una kum bat, sur o Pita in nan sakit det ra a niono in nan netes un lako taro tagun det, ra det in langolango. ¹⁶ Ra a susut na taro tagitong una kum tamon milau o Jerusalem, det wanpat. Det los a kum misait, ma det ra a kum laulau na nion det ban laulau det, ma di ulangolango pas det rop.

A kum aposel det tur una warkurai

¹⁷ A mugumugu na tene etabor torom o God, ma a kum paspasano tagun a kum Sadusi, a nuknukin det i laulau nama kum aposel, uni det tama a taro det mur a kum aposel. ¹⁸ Ra det pam ukai pas det, ma det uruk det una karabus. ¹⁹ Ra una mirum, ara ensel anum a Labino i papos a kum

matansako ina rumu na karabus, ra i ben pirso ru det²⁰ ma i watungi lena, “Mot in nan, ma mot in tur ubalan in noworo ina rumu na etabor, ma mot in inanos a taro nama kum wasiso rop una matok na nilaun ri.”²¹ Ra a kum aposel det mur a wasiso ra. Una kobot raut det ruk ubalan in noworo ina rumu na etabor ma det ususer a taro.

A mugumugu na tene etabor torom o God i wanpat, tomo nama kum paspasano, ra det kabo tomo pas a taro na kiwung rop, a kum mugumugu anun a taro Israel. Ma det itula utong una karabus sur din ben pas a kum aposel.²² Ikut, ra a kum tene tamtamabat tagun a rumu na etabor det wan, ka det tama det mo una karabus. Ra det milet melet, det watungi lena,²³ “Met wanpat una karabus, ra met tama i lena di sa tagar dekdek tari, ma a kum tene tamtamabat det tur ut una kum matansako, ikut ra met papos, ka met tama det mo.”

²⁴ Ra a mugumugu anun a kum tene tamtamabat tagun a rumu na etabor ma a kum lamlabino tene etabor torom o God, det longoro a wasiso ri, i toboroboro a nuknukin det, ra det nuknuk doko un asau mo ra in nanpat.²⁵ Ra ara musano i wanpat, ma i watungi tandet lena, “Tama i, a taro ra mot uruk det una karabus, kurong det mo ubalan in noworo ina rumu na etabor, ma det ususer a taro.”²⁶ Ra a kum tene tamtamabat ma anundet a mugumugu det ben pas a kum aposel. Det ben wakak pas det kut, uni det ngaran a taro, sako det in dukuduku det.

²⁷ Ra det sa ben pas a kum aposel, det utur tar det umatan a taro na kiwung. Ma a mugumugu na tene etabor torom o God i watungi tandet lena,²⁸ “Met sa turbat tar mot lena, gong mo mot ususer a taro nama risan o Iesu. Ikut uniri, o Jerusalem i sa bukus nam anumot a etowo, ra mot nemi, sur mot in takun met una minatin o Iesu.”

²⁹ Ikut, o Pita ma a kum aposel det balu i lena, “Met in muri ut a wasiso anun o God, ma ka met in mur a wasiso anun a taro.³⁰ A God anun a kum tumtubun dat tagun numugu, i ukatutur melet pas o Iesu, i ra mot sak wat tari unin nanai kutus.³¹ I ut ra o God i ulabo pasi ma i ukisi una papor sot na lamano, sur in Labino Mugumugu ma in Tene Ulaun, ma in pam a kisapi sur a taro Israel det in nukpukus, ma din unur ru anundet a kum sakino petutna.³² Met tama a kum utna ri ma met wasiso uni, ma a Tokodos na Nion i ulingmulus anumet a wasiso. A Tokodos na Nion, i a etabor anun o God torom det ra det ser mur anun a wasiso.”

³³ Det longoro a wasiso ri, ra det kankan doko, ma det nem na um doko a kum aposel.³⁴ Ikut ara Parisi, a risano o Gamaliele, a tene ususer tagun a Warkurai, ra a taro rop det ser ru i, i tur una kiwung, ra i watungi lena a kum aposel det in pirso pas munung.³⁵ Ma i watungi torom a taro na kiwung lena, “Mot a taro Israel, mot in nuknuk wakak sur asau ra mot in pami una taro ri.³⁶ A ramano kum kilalo numugu o Tiudas i wanpat, ma i watungi lena i a labino, ra a susut na taro, elar nama wat na mar, det muri. Ikut ra di um doko ru i, det rop ra det muri det wan susuaro, ra anundet a pinapam i rop oros kut.³⁷ Numur tan a musano ri, ara bulung, o Judas, a te Galili, i wanpat una kilalo na tumtumus rising, ra i ben gisen pas a ramano taro sur det in waim nama gapman. I kai i iru, ma det rop ra det muri, det wan susuaro.

³⁸ “I mo ra uniri a watungi tamot lena: Gong mot pam tar tu utna un det, mot in palos ru det. Ra a utna ri det pami, i kibino pas kut una taro, in rop kut.³⁹ Ikut ra i kibino ut un o God, mot in lagano ururor tari. Sako numur in talapor torom mot lena, mot waim tomo nam o God.”

⁴⁰ Ma det mulaot una nun a wasiso, ra det kabo melet pas a kum aposel, det miras tatar det, ma det turbat det sur gong mo det wasiso nama risan o Iesu. Numur det palos ru det.⁴¹ Ra a kum aposel det pirso gusun a kiwung, ma det gas, uni o God i tama det lena det wakak sur det in los a maimai una risan o Iesu.⁴² Ra una kum bung rop ubalan in noworo ina rumu na etabor, ma una nundet a kum rumu kai, ka det mana nama etowo ma a warawai nama Wakak na Wasiso lena o Iesu i a Karisito mulus.

6

Di pilok pas a wonom mawit na musano sur det in tabor a kum sibo na taro

¹ Una kum bung ra, a niluluk ina taro na ususer i ka toto nanan. Det tagun aru ngas na taro, ara taro Juda ra det wasiso nama wasiso Grik, ma ara taro Juda kai ra det wasiso nama wasiso Ibru. Det ra det wasiso Grik, det ururur un det ra det wasiso Ibru, lena, “Ra mot ser tibo a kum ula nama utna na inangon una kum bung, mot wanan sakit ru i kut a kum ula tagun met.”² Ra a noino ma aru aposel det kabo tomo pas a taro na ususer rop, ma det watungi tandet lena, “Ke tokodos sur met in balon mukut una etabor nama utna na inangon, ma ka met in pam a pinapam na warawai nama

7

wasiso anun o God. ³ A kum tistisi met, mot in pilok pas lako wonom mawit na wakak na musano tagun mot, det ra det mananos ma det bukus nama Tokodos na Nion, sur met in pitar tar a pinapam na etabor ri torom det. ⁴ Ma met, met in balon ut nama niaring ma a pinapam na warawai nama wasiso anun o God.”

⁵ Det rop det gas una wasiso ri. Ra det pilok pas o Stiwen, a musano ra i bukus nama nurnur ma a Tokodos na Nion. Ra det pilok pasi kai o Pilip, o Prokorus, o Nikano, o Timon, o Pamenas, ma o Nikolas, a musano tagitong o Antiok, ra awu sur a te Juda, ikut i ruk una lotu Juda. ⁶ Ra det ben pas det torom a kum aposel. Ma det ubek a kum lamandet sapat netes un det, ma det wararing.

⁷ A wasiso anun o God i wan sarara, ma a niluluk ina taro na ususer sapat o Jerusalem, i labo nanan kai. Ma a susut na tene etabor torom o God kai, det nurnur ma det mur a Wakak na Wasiso.

Di takun o Stiwen

⁸ O Stiwen i bukus nama dekdek ma a marmaris anun o God, ra i pam a kum lamlabino utna na ukisin, ma a kum ukinalong utkai umatan a taro. ⁹ Ikut ara taro Juda det engaras nam o Stiwen. A taro ri tagun a rumu na lotu ra di watungu lena, Anun a Langolango na Taro. Det tagun aru tamon, o Sairini ma o Aleksanderia ma tagitong una ru papor, o Silisia ma o Asia. ¹⁰ Det lagano balubalu tar anun a wasiso, uni a Tokodos na Nion ut i pitar a mananos tano.

¹¹ Ma det ungonos eno pas a ramano kum musano, sur det in watungu lena, “Met longoro tari ut ra i wasiso laulau un o Moses ma un o God kai.” ¹² Ra det usungun balan a kum mugumugu, ma a kum tene ususer tagun a Warkurai ma a taro oros kai. Det wan torom o Stiwen, det pam ukai pasi, ma det beni sur in tur sa numugu umatan a taro na kiwung. ¹³ Ra det ben pas a taro sur det in takuni nama kum torotoro na wasiso, ma det watungu lena, “A musano ri ke mana nama wasiso laulau una nundat a rumu na etabor, a rumu anun o God, ma una Warkurai kai anun o Moses. ¹⁴ Met longoro i, ra i watungu lena o Iesu, a te Nasaret, in rege ru a rumu ri, ma in keles ru a kum ngasino ra o Moses i sa ususer tar dat nami.”

¹⁵ Det rop ra det kis una kiwung, det tama dekdek o Stiwen, ma det tama i lena, in masarino i elar namin masarin a ensel.

A warawai anun o Stiwen

¹ A mugumugu na tene etabor torom o God i ting o Stiwen lena, “I lingmulus ut a kum wasiso ri?” ² Ra i balu i lena, “A kum tistising, ma a kum tamtamang, mot in longoro iau. A God na minamar i wanpat torom a tubundat o Abaram, ra i kis utmakai tiro o Mesopotemia, ma ke wan utmakai utiro o Aran. ³ Ra i watungu tano lena, ‘Un nan gusun anum a tamon, ma gusun a kum kukum kai, ma un nan sur a tamon ra an ese tar ui uni.’ *Stat 12:1*

⁴ “I mo ra i wan gusun a tamon anun a kum Kaldia, ma i kis tiro o Aran. Ra o tamano i sa mat, o God i tulu ru i sur a tamon ri, ra uniri mot kis uni. ⁵ O God ke pitar tar tu du piso utmakai tano sur anunu, o tu nat na nubual lik. Awu ut. Ikut i liliman taru sur numur in pitar tar a piso ri tano ma torom a kum tumtubunu numur. Una du bung, ra o God i uliliman tari, o Abaram katu nutunu utmakai. ⁶ Ra o God i watungu tano lena, ‘A kum tumtubum numur tam, det in kis na usiro una usiro na tamon, ma det in papam na karabus, ma din ban laulau det a wat na mar na kilalo. ⁷ Ikut an ukadik a taro ra det dat pas a kum tumtubum sur a pinapam na karabus. Ma numur det ra det papam na karabus det in pirso gusun a tamon ra, ma det in lotu torom iau una tamon ri.’ *Stat 15:13-14*

⁸ O God i pam tar a kunubus tomo nam o Abaram. Ma a ukinalong ina kunubus ra, a tinotok talilis una pinindi. O Abaram i ulabo o Aisak, numur ra i sa tiwal na bung bati, o Abaram i tok talilis a pinin o Aisak. Numur o Aisak i ulabo o Jepok, ma o Jepok i ulabo a noino ma aru tumtubun dat.

⁹ “Ma a kum tumtubun dat ra, det nuknuk laulau un o Josep, a tisindet, ra det siuru ru i sur in papam na karabus tong o Ijip. Ikut o God i kis tomo ut nami, ¹⁰ ra i ulaun pasi gusun a kum maut ra i monongi. I pitar a wakak na mananos tano, ma i waruti sur o Pero, a king tagitong o Ijip, in gas nami. Ra o Pero i ukis tari sur in mugumugu una tamon Ijip, ma in mugumugu kai una rumu anun o Pero.

¹¹ “Numur a labino munurak i wanpat tong o Ijip ma o Kenan kai, ma a susut na maut i monong a taro, ma kalako utna na inangon ana kum tumtubun dat. ¹² Ra o Jepok i sa tasmani lena a wit kurong o Ijip, i tulu ru a kum nutnutunu, a kum tumtubun dat, tagitong o Kenan utong o Ijip a mugano inawan. ¹³ Una manru na

inawan anundet, o Josep i inanos det lena, i a tisindet. Ra o Pero kai i talapor maragom una kum tistisin o Josep. ¹⁴ Numur o Josep i itula sur o tamano o Jekop, det tomo nama kum tumtubunu. Det rop a wonom mawit na noino ma limo. ¹⁵ Ra o Jekop ma a kum tumtubun dat det wan ma det kis tong o Ijip. Numur det mat tong. ¹⁶ A susut na kilalo numur, di los pas a sursurin det, ma di uruk det una kulam na minat, tong o Kenan una tamon Sikem. A kulam na minat ra, o Abaram i sa kul pasi tan a kum nutnutun o Amor.

¹⁷ “Ra i sa milau nanan a du bung ra o God in pam sot pas anun a liliman ra i sa inanos tar o Abaram nami, a niluluk ina nundat a taro i sa ka toto bing tong o Ijip. ¹⁸ Ra ara matok na king i turpasi sur in mugumugu tong o Ijip, ke talapor una pinapam anun o Josep ra i pami numugu. ¹⁹ I toro tar anundat a taro, ma i ban laulau det, ra i ungonos tar det sur det in los pirso ru anundet a kum nat miso, gusun a kum rumu, ma det in madek ru det, sur det in mat.

²⁰ “Una kilalo ra, di usus o Moses uni. Ma i ara wakak na nat sakit umatan o God, ra di ugu i a tulu kalang una rumu anun o tamano. ²¹ Numur di los pirso ru i, ra a nutun o Pero, a ino, i los pasi, ma i ugu pasi sur o nutunulik. ²² Ra di ususer o Moses una kum ngas na mananos rop anun a taro Ijip, ma i ara dekdek na musano una nun a kum wasiso ma una nun a kum pinapam.

²³ “Ra o Moses i sa wat na noino kilalo anunu, i nuki lena in nan ma in tama tar anun a taro Israel. ²⁴ I tama ara te Ijip i um laulau ara tagun det, i kalabor torom der ra i um doko ru a te Ijip, sur in balu ara pasander. ²⁵ O Moses i nuki lena anun a taro det in tasman lele i lena, o God i tulu ru i sur in ulaun pas det, ikut ka det tasmani.

²⁶ “A bung numur tano, i tama melet aru te Israel, ra der waim, ra i nemi sur in umalmal der, ma i watungi tander lena, ‘Aru musano, mur pasano kut. Pepetlai ra mur ban laulau etalai melet mur?’ ²⁷ Ikut, i ra i um laulau a pasano, i sugut gisen ru o Moses, ma i watungi tano lena, ‘Osi ra i ubek tar ui sur un mugumugu ma un tene warkurai anumet?’ ²⁸ Pepetlai, u nemi sur un um doko iau, elar nama te Ijip, ra nubung u um doko tari?’ *Kis 2:14*
²⁹ O Moses i longoro a wasiso ri, ra i kalabor eno utong o Midian. Una nun a kinkinis na usiro tong iai, i ulabo aru nutnutunu, aru musano.

³⁰ “Ra i sa wat na noino kilalo uni tiro iai, ara ensel i wanpat toromi epotor una kunabor unin nanai, una nubual kalako taro uni, milau a Tangai Sainai. ³¹ Ra o Moses i tama i, i kisin doko uni. I wan milau sur in tama wakaki, ra i longoro in nalngan a Labino i watungi lena, ³² ‘Iau a God anun a kum tumtubum tagun numugu, a God anun o Abaram, o Aisak ma o Jekop.’ *Kis 3:6*

Ra o Moses i neneder, ma i ngara sur gong i tama i. ³³ Ra a Labino i watungi tano lena, ‘Un palos ru aru su, uni a du piso ra u tur uni, anungi ut. ³⁴ A sa tama a kum ngunungut ra i monong anung a taro ra det kis tong o Ijip, ma a sa longoro anundet a tinangis. Iri a sa wan pirso, sur an ulangolango pas det. Wan urin, sur an tulu melet ru ui utong o Ijip.’ *Kis 3:5, 7-8, 10*

³⁵ “Numugu a taro Israel det ban lulu ru o Moses nama wasiso lenri, ‘Osi ra i ubek tar ui sur un mugumugu ma un tene warkurai anumet?’ Ikut, i ut ra, o God i tulu ru i sur in mugumugu ma in ulangolango pas a taro. I tulu ru i nama wasiso anun a ensel ra i wanpat toromi unin nanai ra i kunabor. ³⁶ Ra o Moses i mugu pirso pas det tagitong o Ijip, i pam a kum utna na ukisin ma a kum ukinalong tong o Ijip ma tong una Merek na Tasi, ma tiro kai una nubual kalako taro uni, i elar nama wat na noino kilalo. ³⁷ O Moses ut i watung tari tan a taro Israel lena, ‘O God in tulu ru tu poropet elar nam iau tagun a kum tumtubu mot ut.’ *Lo 18:15*
³⁸ O Moses i kis tomo nama kum tumtubun dat tagun numugu, a taro Israel, una nubual kalako taro uni. Ra a ensel i wasiso toromi una Tangai Sainai. O Moses i los pas a wasiso na nilaun, ma i tumus ukai tari sur anundat uniri.

³⁹ “Ikut a kum tumtubun dat tagun numugu ka det nem na longoro o Moses. Det rosumur gusuni, ma det nuknuk melet utong o Ijip. ⁴⁰ Ra det watungi tan o Aron lena, ‘Un pam pas anundat lako kum god sur det in mugu dat, uni o Moses, ra i mugu pirso pas dat tagitong o Ijip, ka dat tasmani mo ra asau kura i sa wanpat uni.’ *Kis 32:1*
⁴¹ Una du bung ra, det pam pas a nat na bulumakau nama gol, ma det gas una pinapam na lamandet ra det etabor toromi. ⁴² Ikut o God i rosumur gusun det, ma i madek ru det sur det in lotu torom a kum nangnang, elar nami ra di sa tumus tari una buk anun a kum poropet lena,

‘Mot a taro Israel,

una wat na noino kilalo ra mot kis una nubual kalako taro uni, ka mot etabor torom iau, ma ka mot um doko tu wewegua sur mot in etabor nami torom iau.

⁴³ Mot ser los a rumu na lotu anun a torotoro na god Molek, ma a malalar in in nangnang anun o Repan, anumot a torotoro na god. A kum torotoro na god ri mot pam pas det, sur mot in lotu torom det.

I mo ra an rakon ru mot' *Amo 5:25-27* ma mot in nan lakai ru o Babilon ma utong sakit.

⁴⁴ "A kum tumtubun dat tagun numugu det los nanan a rumu na sel una nubual kalako taro uni. A rumu na sel ra, i upuaso i lena o God i kis tomo nam det. Ra di sa pam tari murmur a wasiso anun o God torom o Moses, elar nama malalar ra i tama tari.

⁴⁵ Ma a kum tumtubun dat tagun numugu det pitari torom a kum nutnutun det. Ra det bulung det los nanani ra o Josua i mugu det, sur det in los a kum tamon gusun a taro tagun a kum gapman ra o God i lu ru det. Ra i kis tiro iai, tuk una kilalo anun o Dewid, ⁴⁶ i ra o God i nem doko i. Ra o Dewid i saring o God sur in mulaot sur in pam tu rumu, sur a taro det in lotu uni, torom o God, i ra o God anun o Jekop. ⁴⁷ A rumu ra, o Solomon i pami. ⁴⁸ Ikut o God a Labino Sakit ke kis una kum rumu ra a taro det pami, elar nami ra a poropet i watungi lena,

⁴⁹ 'A Labino i watungi lena: A langit, i anung a kiskis na king, ma a rakrakon bual, a utna ra a ubek aru kiking netes uni.

Pepetlai, i topas mot sur mot in pam tu rumu anung?

Awai i anung a nubual na mana?

⁵⁰ Pepetlai, awu sur iau, a pam a kum utna rop ri?" *Ais 66:1-2*

⁵¹ Ra o Stiwen i watungi tan a taro na kiwung lena, "Mot a kum tene pitarnगत mot, a balamot i bakbak gusun o God ma a talngamot i kutkut. Mot turbat liklik a Tokodos na Nion, elar nama kum tumtubu mot tagun numugu det ser pami. ⁵² A kum tumtubu mot tagun numugu det ban laulau a kum poropet rop. Det um doko det ra det wasiso mugu una inawan pat urin anun a Tene Tokodos, i ra uniri mot usobor tari, ma mot um doko ru i. ⁵³ Mot ra mot sa los ukai a Warkurai anun o God, ra a kum ensel det pitari torom mot, ikut ka mot muri."

Det duku doko o Stiwen

⁵⁴ Ra a taro na kiwung det longoro a kum wasiso anun o Stiwen, det kankan doko, ma det karot bum toromi. ⁵⁵ O Stiwen i bukus nama Tokodos na Nion, ma i tatado usapat una langit, ra i tama a minamar anun o God, ma o Iesu kai, kura i tur taru una papor sot na laman o God. ⁵⁶ Ra i watungi lena, "Tama! A tama a langit i papos, ma a Nutun a Musano kura i tur taru una papor sot na laman o God." ⁵⁷ Ra det bari nama labino walngandet, det song bat a kum taltalngan det, ma det kalabor bat pasi. ⁵⁸ Det dat pirso ru i gusun a tamon, ra det dukuduku i. Ma det ra det takun o Stiwen, det palos ru anundet a kum saket, ra det ubek tari nisan aru kikin ara barman, a risano o Sol. ⁵⁹ Ra kura utmakai det dukuduku i, o Stiwen i wararing lena, "Labino o Iesu, un los pas a niong." ⁶⁰ Ra i sing a ru but na kikino una piso, ma i kakabo lena, "Labino, gong u balu a sakino petutna ri det pami." I watung len tari ra, ra i mat.

8

¹ Ra o Sol i mulaot sur din um doko o Stiwen.

O Sol i ban laulau a taro na lotu

Una bung ra di um doko o Stiwen, a taro det turpasi sur det in ukadik a taro na lotu sapat o Jerusalem, ma a taro na nurnur rop det wan sarara una aru papor Judia ma o Samaria. Ikut, a kum aposel ka det wan, det kis ut. ² A kum tene lotu mulus det por tar o Stiwen, ma det domosi. ³ Ra o Sol i ban laulau a taro na lotu. I ruk una nundet a kum rumu, i dat pas a kum musano ma a wardain, ra i uruk tar det una karabus.

O Pilip i warawai tong una papor Samaria

⁴ Ma det ra det wan sarara tagisapat o Jerusalem, det warawai nama Wakak na Wasiso una kum tamon ra det wan iai. ⁵ O Pilip i wan utiro una labino tamon tong una papor Samaria, ma i warawai un o Karisito torom det. ⁶ A kunur na taro det longoro a wasiso anun o Pilip, ma det tama a kum utna na ukisin ra i pami, ra det nem doko i sur det in longoro a kum wasiso ra i watungi. ⁷ I lakro ru a kum laulau na nion gusun a susut, ma a kum laulau na nion, ra det pirso, det kukukuk dekdek. Ma i ulangolango pas a susut ra a pinpinin det i mat, ma det kai, ra ka det wan lar pas. ⁸ Ma a taro tagun a tamon ra, det gas doko.

O Saimon a tene sangsagor

⁹ Ara musano tagitiro iai, a risano o Saimon. I ser sangsagor una susut na kilalo,

ra a taro Samaria det ser kisin una kum utna ra i ser pami. Ma i warango pasi ut umatan a taro. ¹⁰ A taro rop, a kum lamlabino ma a taro oros kut, det rop det ru i, ma det watungi uni lena, "A musano ri i utur ukai a dekdekin o God, a dekdek ra di watungi nama Labino Dekdek." ¹¹ Ra det ser longoro wakaki, uni tagun numugu utmakai, i ser ukisin det nama anun a kum sangsagor.

¹² Ikut uniri, a kum musano ma a wardain det nurnur una Wakak na Wasiso ra o Pilip i warawai nami, una matanitu anun o God, ma una risan o Iesu Karisito, ma di baptaiso det. ¹³ O Saimon utkai i nurnur, ma di baptaiso tari. I mur likliki mukut o Pilip, ra i tama a kum ukinalong ma a kum utna na ukisin ra o Pilip i pami, ra i kisin doko uni.

¹⁴ A kum aposel ra det kis sapat o Jerusalem, det longoro i lena a taro Samaria kai det sa mur a wasiso anun o God, ra det tulu ru o Pita ma o Jon torom det. ¹⁵ Ra der wanpat, der wararing un det sur det in los a Tokodos na Nion, ¹⁶ uni ke kis utmakai una taio tagun det. Di baptaiso tar det kut nama risan a Labino o Iesu. ¹⁷ Numur o Pita ma o Jon der ubek a lamander sapat netes un det, ra det losi maragom a Tokodos na Nion.

¹⁸ O Saimon i tama i ra aru aposel der ubek a lamander sapat netes una taro ma di tabor det nama Tokodos na Nion. Ra i los a mani torom der, ¹⁹ ma i watungi lena, "Mur in pitar a dekdek ra tang, sur iau kai an ubek a lamang sapat netes un taio sur in los a Tokodos na Nion." ²⁰ Ra o Pita i balu i lena, "Ui tomo nam anum a mani mur in iru, uni u nuki lena un kul a etabor anun o God nama mani. ²¹ Katu tinibo ma katu utna anum kuri nin una utna ri, uni ke tokodos in balam umatan o God. ²² Un nukpukus gusun anum a sakino petutna ri, ma un wararing torom a Labino. Kutiro in unus ru a sakino nuknukim, ²³ uni a tama ui lena in balam i bukus nama sakino nuknuk, ma a sakino petutna i ker ukai ui." ²⁴ Ra o Saimon i balu i lena, "Mur in wararing torom a Labino un iau, sur gong tu utna tagun a kum utna ra mur watung tari, in nanpat un iau."

²⁵ Ra o Pita ma o Jon der sa wasiso talapor taru una kum utna ra a Labino i pami, ma der sa warawai taru kai nam anun a wasiso, der milet melet usapat o Jerusalem. Ma una nunder a inawan, der warawai nanan nama Wakak na Wasiso una susut na tamon una papor Samaria.

O Pilip i etorom ara musano a te Itiopia

²⁶ A ensel anun a Labino i watungi tan o Pilip lena, "Un katuttur, ma un nan utong una matmatano tobar sur a kisapi tagisapat o Jerusalem utong o Gasa. A kisapi ra, i wan una nubual kalako taro uni." ²⁷ Ra o Pilip i katuttur pas, ma i wan. Ra der etorom nam ara musano tagitong o Itiopia, a labino tene tamtamabat a ututna anun a Kandake, a kwin anun a taro Itiopia. A musano ri i wan usapat o Jerusalem ra i lotu torom o God. ²⁸ Numur i milet melet sur anun a tamon. Una nun a inawan, i kis taru una karis, ma i luk nanan a buk anun a poropet Aisaia. ²⁹ Ra a Tokodos na Nion i watungi tan o Pilip lena, "Un nan milau a karis, ma un nan tomo nami." ³⁰ Ra o Pilip i kalabor sur a karis, ra i longoro a musano ra i luk a buk anun a poropet Aisaia, ma i tingi lena, "Le, u talapor ut un asau ra u luki?" ³¹ Ra i balu i lena, "An tasman petlani, ra kataio in watung palosi torom iau?" Ra i saring o Pilip sur in kas ma der in kis tomo.

³² Iri a kum wasiso na Buk Tabu ra i luki: "Di beni elar nama sipsip, sur din um doko i.

Ke wasiso,

elar nama sipsip ra i tur wowowon torom o naro ra i kumuri.

³³ Di ban umaimai tari, ma ka di warkurai i nama tokodosino.

Osi ra in wasiso una nun a kum nat?

Katu nutunu,

uni i rop anun a nilaun taginin una rakrakon bual." *Ais 53:7-8*

³⁴ Ra a te Itiopia i watungi tan o Pilip lena, "Un inanos iau, a poropet i watung a wasiso ri un osi? Uni ut, o un taio gisen?" ³⁵ Ra o Pilip i turpas a papalos toromi. I inanosi una Wakak na Wasiso un o Iesu, turpasi ut una buk ra a te Itiopia i luki.

³⁶⁻³⁷ Ra der wan nanan una kisapi, der wan taru un ara danim, ra a te Itiopia i watungi tan o Pilip lena, "Tama i, iri a danim, asau melet mo i turbat iau sur gong di baptaiso iau?"* ³⁸ Ra i turbat a karis sur in tur. Numur der wan pirso sur a danim, ra o Pilip i baptaiso i. ³⁹ Ra der saur gusun a danim, uniutra a Nion a Labino i los ru o Pilip. Ra a te Itiopia ke tama meleti mo. Ikut a te Itiopia i wan melet una nun a inawan nama labino gasgas una nun a nilaun. ⁴⁰ O Pilip i tama i lena, kurong mi una tamon Asdot. I wan tagitiro iai, ra i warawai nanan nama Wakak na Wasiso una kum tamon tuk tong o Sisaria.

8:17: Ap 19:6 **8:36-37:** Ap 10:47 * **8:36-37:** Una ramano kum du buk una wasiso Grik, a ramano kum wasiso kai i kis una vers ri. I lenri: *Ra o Pilip i watungi tano lena, "Ra u nurnur namin balam rop, i wakak kut sur din pami."* *Ra a te Itiopia i balu i lena, "A nurnur lena o Iesu Karisito i a Nutun o God."* **8:40:** Ap 21:8

9

*O Sol i nukpukus**(Ap 22:6-16; 26:12-18)*

¹ Una kum bung ra, o Sol i ungara a taro na ususer anun a Labino nama dekdek na wasiso lena, in um doko det. I wan torom a mugumugu na tene etabor torom o God, ² ra i saringi lena, “Un tumus tar lako kum pas, sur an losi utong una kum rumu na lotu tong o Damaskus.” A mugumugu i tumus tari una kum pas lena, ra in barato lako kum musano ma wardain, ra det mur a Kisapi anun o Iesu, in ker pas det ma in ben det usapat o Jerusalem.

³ Ra i wan milau o Damaskus, a labino talapor tagisapat una langit i wanpat kisin, ma i sisio talilis pasi. ⁴ Ra i puku pirso una piso, ra i longoro in nalngan ara i watungi tano lena, “Sol, Sol, sur asau ra u ser ban laulau iau?” ⁵ Ra o Sol i tingi lena, “Labino, osi ui?” Ra i balu i lena, “Iau o Iesu ra u ser ban laulau iau.” ⁶ Uniri, un katutur ma un nanpat utiro una tamon Damaskus, ra din inanos ui nama sau ra un pami.”

⁷ A taro ra det wan tomo nami, det ngara ra ka det wasiso lar pas, uni det longoro in nalngan ara, ikut ka det tama i. ⁸ Ra o Sol i katutur tagitiro upiso, i palos arin matano, ikut ke tama lar pas tu utna mo. Det pam benben tari mukut utiro o Damaskus. ⁹ Ma a tulu bung, i pulu kut, ke wangon ma ke inum kai.

¹⁰ Ra ara tagun a taro na ususer, a risano o Ananias, i kis tong o Damaskus. A Labino i kabo i una tamtama lena, “Ananias!” Ra i balu i lena, “Labino, iri kut iau.” ¹¹ Ra a Labino i watungi tano lena, “Un katutur, ma un nan sur a rumu anun o Judas, una kisapi di watungi nama Tokodos na Kisapi, ma un iting sur o Sol, a te Tasus, kurong i wararing.” ¹² Ma una tamtama, o Sol i sa tama tar a musano, a risano o Ananias, i ruk toromi, ra i ubek aru lamano netes uni sur in tamtama melet.” ¹³ Ra o Ananias i balu i lena, “Labino, a sa longoro a susut na wasiso una musano ra, ma una kum laulau na utna ra i ser pami una num a taro sapat o Jerusalem.” ¹⁴ Ra a kum lamlabino tene etabor torom o God det sa mulaot tari, sur in dat det rop ra det lotu una risam. Ra uniri, i sa wanpat nin.” ¹⁵ Ikut a Labino i watungi tano lena, “Un nan kut, uni a sa pilok pasi, sur i anung a tene pinapam. In wasiso puaso una risang torom a taro ra awu sur a taro Israel, torom a kum king, ma torom a taro Israel kai. ¹⁶ Ma an inanos lena, in taramo a susut na mamaut una risang.”

¹⁷ Ra o Ananias i wan, ma i ruk una rumu ra o Sol i kis iai. Ra i ubek aru lamano netes uni, ma i watungi lena, “Sol, a tising, a Labino o Iesu, i ra i tur pat torom ui una kisapi ra u wan urin, i ut i tulu ru iau urin sur un tamtama melet, ma sur un bukus nama Tokodos na Nion.” ¹⁸ Uniutra a kum utna i elar nama walong na kiripo, i puku pirso gusun arin matano, ra i tamtama melet. I tur ma di baptaiso i. ¹⁹ Ra i sa wangon pas, a pinino i dekdek melet.

O Sol i warawai tong o Damaskus

O Sol i kis pas a kabano bung torom a taro na ususer tong o Damaskus. ²⁰ Uniutra i turpasi sur in warawai una kum rumu na lotu anun a taro Juda. I warawai un o Iesu lena, i a Nutun o God. ²¹ Det rop ra det longoro i, det kisin uni, ma det watungi lena, “Ai! A musano kut ri, ra i umum doko det ra det ser lotu torom o Iesu sapat o Jerusalem. Un uniri, i wanpat bulung urin, sur in dat pas lako taro ra det ser lotu torom o Iesu, usapat torom a kum lamlabino tene etabor torom o God.” ²² Ma a warawai anun o Sol i dekdek ra i watung a kum utna ra i ulingmulus pasi lena, o Iesu i ut a Karisito. Ma a taro Juda ra det kis tiro o Damaskus det nuknuk doko una nun a wasiso, ma ka det pet lar pasi sur det in balu i.

²³ Ra i sa rop a susut na bung, a taro Juda det epak sur det in um doko o Sol. ²⁴ Ikut o Sol i sa tasmani lena det epak suri. Una kum mirum ma a waspi, det tamtama una kum matansako ina tamon sur o Sol, sur det in um doko i. ²⁵ Ikut, anun a kum nat na ususer, det ben pasi una mirum, ma det ukete pirso i nama rat una papor nin noworo na wat ra di pam bat a tamon nami.

O Sol i kis sapat o Jerusalem

²⁶ Ra o Sol i wanpat sapat o Jerusalem, i lari sur in kis torom a taro na ususer, ikut det rop det ngarani kut, ma ka det nurnur uni lena, i kai ara tagun a taro na ususer. ²⁷ Ikut o Banabas i ben pasi, ra der wan tomo torom a kum aposel, ma i inanos det lena, “O Sol i sa tama tar a Labino, ma a Labino i wasiso toromi una nun a inawan utong o Damaskus. Tong o Damaskus, i warawai una risan o Iesu ma ke ngara.” ²⁸ Uniri, det nurnur maragom uni. Ra o Sol i kis tomo nama kum aposel. I wan tuptupukus sapat o Jerusalem, ra i wasiso una risan a Labino, ma ke ngara. ²⁹ I wasiso tomo nama taro Juda ra det wasiso Grik, ma i balu anundet a kum iting, ikut det lari sur det in um doko i. ³⁰ Det ra det tar tistisino una nurnur, det longoro i. Ra det

beni utong o Sisaria, ra numur det tulu ru i utong o Tasus.

³¹ Numur a taro na lotu tong una tulu papor Judia, Galili ma o Samaria, det kis na malmal. Det kis nama urur torom a Labino, ra a Tokodos na Nion i uragot det. Ra a niluluk ina taro na nurnur i labo nanan.

O Pita i kis tong o Lida ma o Jopa

³² Ra o Pita i wan nanan una kum tamon, i wan utkai torom a taro anun o God tong o Lida. ³³ Tiro iai, i barato pas ara musano, a risano o Ainias, a pinino i mat, ma i inep kut una bano, elar nama tiwal na kilalo. ³⁴ Ra o Pita i watungi tano lena, "Ainias, o Iesu Karisito i sa ulangolango pas ui. Un katutur, ma un pul pas a bam." Ra uniuira i katutur. ³⁵ Numur, det rop ra det kis una ru tamon, o Lida ma o Saron, det tama a musano ra, ma det nukpukus torom a Labino.

³⁶ Ara ino tagun a taro na ususer i kis tong o Jopa, a risano o Tabita, ma una wasiso Grik di watungi nam o Dokas. A ino ri, i ser pam a susut na wakak na pinapam, ma i ser tabor a sibo na taro. ³⁷ Una kum bung ra o Pita i papam tong o Lida, o Dokas i misait, ra i mat. Det rus tari, ma det inep tari una ara kukur rumu sapat netes. ³⁸ O Lida i kis milau i kut o Jopa. Ma a ramano taro na ususer tagitong o Jopa, det sa longoro i lena o Pita i kis tong o Lida, ra det tulu ru aru musano toromi, ma der saring lena, "Un maris met, ma un nan lakit torom met."

³⁹ Ra o Pita i wan tomo nam detul. Ra i wanpat, det ben pasi usapat una kukur rumu sapat netes. Ra a kum ula rop det tur talilis pasi ma det domos. Det ese a kum kolos ma a kum malu, ra o Dokas i mabon tar det ra i laun utmakai. ⁴⁰ O Pita i tulu pirso ru det rop gusun a kukur rumu ra, i kis butekeke, ma i wararing. I tupukus torom a ino ra i mat, ma i watungi lena, "Tabita, un katutur." Ra o Tabita i tamtama pat, ma i tama o Pita, ra i kis mut. ⁴¹ Ra o Pita i pam pas a lamano, ma i ukatuturi. Numur i kabo pas a kum tene nurnur, ma a kum ula, ra i tulu tar o Tabita torom det, i sa laun. ⁴² A taro rop tong o Jopa det talapor un asau ra i wanpat, ma a susut na taro, det nurnur una Labino. ⁴³ O Pita i kis suano pasi tiro o Jopa tomo nama ra musano a risano o Saimon, a tene pam ututna nama pinin a wewegua.

10

O Konelias ra awu sur a te Juda, i itula sur o Pita

¹ Tong o Sisaria, ara musano i kis, a risano o Konelias, i ara mugumugu anun ara mar

na taro na inaim, det tagun a taro na inaim tagitong o Itali. ² O Konelias ma det rop ra det kis una nun a rumu det a kum tene lotu mulus ma det ser urur torom o God. O Konelias i a tene etabor, i ser tabor a kum sibo na taro, ma a kum bung rop i ser wararing torom o God.

³ A tulu pakano bung un ara lirop i tama ara tamtama. I tama pupuaso a ensel anun o God i wanpat toromi ma i kabo i lena, "Konelias!" ⁴ Ra o Konelias i tamtama dekdek toromi nama labino nginara, ra i tingi lena, "Labino, asau ra?" Ra a ensel i balu i lena, "Anum a kum niaring ma a kum etabor torom a kum sibo na taro, det wan usapat torom o God, elar nama etabor ra i ugasgasi." ⁵ Uniutri un tulu ru lako taro utong o Jopa, sur det in ben pas ara musano, o Saimon, ara risano kai o Pita. ⁶ Kura i kis nisan o Saimon, i ara tene pam ututna nama pinin a wewegua. Anun a rumu i tur milau nago utasi." ⁷ Ra a ensel, ra i wasiso toromi i sa wan, o Konelias i kabo pas aru tagun anun a kum tultul, ma ara tene lotu mulus tagun anun a taro na inaim. ⁸ I inanos detul una kum utna rop ri, ra i tulu detul utong o Jopa.

A tamtama anun o Pita

⁹ Una bung numur detul wan. Ra in matanas i kis lekeleke, detul wanpat milau a tamon Jopa, ra o Pita kai i ka tito usapat netes una rumu, sur in wararing. ¹⁰ Ra i wararing, i taramo a munurak ma i nem na wangon. Ra di waninari utmakai a utna na inangon, i tama ara tamtama. ¹¹ I tama a langit i papos, ma ara utna i elar namin labino malu, ra di pam pas a wat na kukurino ma di ukete pirso i. ¹² Tiro ubalano, a kum wur ngas na wewegua rop, det ra det wanan netes una piso ma det ra det kaukawar, ma a kum piko kai. ¹³ In nalngan ara i watungi tan o Pita lena, "Pita, un tur. Un um doko det, ma un nan det." ¹⁴ Ra o Pita i watungi lena, "Labino, awu ut! Ka wan tar tu utna ra i dur umatam, ra i tabu torom met a taro Juda." ¹⁵ Ra in nalngan ara i balu meleti lena, "A utna ra o God i sa utalapor tari, gong u watungi lena i dur." ¹⁶ A utna ri di pami elar nama tulu dino, ra uniuira di dat toto melet pasi usapat una langit.

¹⁷ Ra a nuknukin o Pita i toboroboro utmakai una kukurai ina tamtama ri, a tulu musano ra o Konelias i tulu ru detul, detul sa sio pas a rumu anun o Saimon, ra uniri detul tur una matansako. ¹⁸ Numur detul kakabo ruk, detul iting lena, "O Saimon ara risano kai o Pita kura i tiro?" ¹⁹ Ra o Pita i nuknuk utmakai una tamtama ra, a Tokodos na Nion i watungi tano lena,

“Tama i! A tulu musano detul sisio sur ui.
²⁰ Un katutur, ma un nan pirso. Gong u nuknuk larlar sur un nan tomo nam detul, uni iau ut a tulu ru detul urin.” ²¹ Ra o Pita i pirso torom detul ma i watungi lena, “Iau kut ri, ra motul sisio sur iau. Motul wan urin sur asau?” ²² Detul balu i lena, “O Konelias, a mugumugu anun ara mar na taro na inaim i tulu ru metul. O Konelias i ara tene tokodos ma a tene urur un o God, ma a taro Juda rop det ru i. A ensel anun o God i inanos tari lena, in itula pas ui utong una nun a rumu, sur in longoro anum tu wasiso.” ²³ Ra o Pita i ben ruk pas detul sur detul in inep pas.

O Pita i wanpat tiro una rumu anun o Konelias

Ra i sa waspi, o Pita i turpas a inawan, ma a ramano kum musano ra det tar tistisino una nurnur tagitiro o Jopa, det wan tomo nam det. ²⁴ Una bung numur, det wanpat tong o Sisaria. O Konelias i sa tasmani lena det na wanpat, ra i sa kabo tomo pas a kum kukunu, ma a kum paspasano, ra det kis langlang sur o Pita. ²⁵ Ra o Pita i ruk, o Konelias i wan barato i, ma i kis butkeke taru nama urur nisano, ra i lotu toromi. ²⁶ Ra o Pita i dat utur pasi, ma i watungi lena, “Un tur, iau kai a musano kut.”

²⁷ Ra der wasiso nanan, o Pita i ruk ma i tama a susut na taro kura det sa kis tomo. ²⁸ Ra i watungi tandet lena, “Mot tasmani lena i tabu una numet a warkurai sur met a kum te Juda met in lason tomo nam taio ra awu sur a te Juda, ma met in lumu i kai. Ikut uniri o God i sa ese tar iau lena, gong a watungi un taio lena i dur umatan o God, ma gong a nuki lena i tabu torom met sur met in lason tomo nami. ²⁹ I mo ra ka putut ra di itula sur iau urin. Ra uniri an ting mot lena: Asau ra mot itula pas iau suri?”

³⁰ Ra o Konelias i balu i lena, “Ara bung a wararing una nung a rumu una du bung lenri, una tulu pakano bung una lirrop, ra a tama ara musano i tur sa numugu tang. Ma uniri i sa tulu bung bati. A musano ra a tama i, i emar namin namalu ra i pilpil doko, i wanpat kisin torom iau, ³¹ ra i watungi lena, ‘Konelias, o God i sa longoro tar anum a niaring, ma i sa tasman anum a kum etabor torom a kum sibno na taro. ³² Un itula utong o Jopa, sur din ben pas o Saimon, i ra ara risano kai o Pita. Kura i kis na usiro nisan o Saimon, a tene pam ututna nama pinin a wewegua, ra i kis milau nago utasi.’

³³ “Uniutra, a itula mut sur ui. I wakak sakit ra u wan urin. Ra kuri met rop met

kis umatan o God, sur met in longoro a kum wasiso rop ra a Labino i sa watung tari tam sur un inanos met nami.”

O Pita i warawai

³⁴ O Pita i watungi lena, “A tasman mulusi lena, a kum kamkabo taro rop det elar kut umatan o God. ³⁵ I gas pas a taro tagun a kum kamkabo taro rop, ra det ru i ma det pam a tokodos na petutna. ³⁶ Mot tasmani lena, o God i sa pitar tar anun a wasiso torom a taro Israel. A wasiso ri, i a Wakak na Wasiso na malmal. A malmal epotor tan o God ma a taro, ra i kibino un o Iesu Karisito, i ra a Labino anun a taro rop. ³⁷ Mot tasman a kum lamlabino utna ra i wanpat una kum tamon tong o Israel, turpasi tong o Galili numur tan a baptais ra o Jon i warawai nami. ³⁸ Mot tasmani lena, o God i sa pitar tar a Tokodos na Nion ma a dekdek torom o Iesu, a te Nasaret. Mot tasmani kai lena, i wan tuptupukus, ra i pam a kum wakak na pinapam, ma i ulangolango pas det rop ra det kis utuntudu ina dekdekin o Satan. O Iesu i pam a kum utna ri, uni o God i kis tomo nami.

³⁹ “Ma met a kum tene wasiso puaso una kum utna rop ra met tama i, ra i ser pami una kum tamon anumet a taro Juda, ma sapat o Jerusalem kai. Di sak wati unin nanai kutus, ra i mat. ⁴⁰ Ikut, numur tan a tulu bung, o God i ukatutur melet pasi gusun a minat, ma i ese tari torom a taro. ⁴¹ Awu sur torom a taro rop, torom det kut ra o God i sa pilok mugu tar det sur det in tama i ma det in wasiso puaso uni. Met a taro ra, met wangon ma met inum tomo nami numur tan a katkatutur anunu gusun a minat. ⁴² Ma i tulu ru met, sur met in warawai ma met in wasiso puaso uni, lena i ut ra o God i sa pilok pasi sur in tene warkurai anundet ra det laun ma det kai ra det sa mat. ⁴³ Ma a kum poropet rop det wasiso puaso un o Iesu, lena osi ra i nurnur uni, din unus ru anun a kum sakino petutna nama risano.”

A Tokodos na Nion i wan pirso taru un det ra awu sur a taro Juda

⁴⁴ Ra o Pita kura utmakai i wasiso una rumu anun o Konelias, a Tokodos na Nion i wan pirso un det rop, ra det longoro a wasiso ra. ⁴⁵ Ra a kum tene nurnur tagun a taro Juda ra det wan tomo nam o Pita, det kisin, uni o God i etabor utkai nama Tokodos na Nion torom a taro ra awu sur a taro Juda. ⁴⁶ Uni det longoro det, ra det wasiso nama kum ngas na wasiso ma det watung ulabo pas o God. ⁴⁷ Ra o Pita i

watungi lena, “Katutaio in turbat lar pas det ri sur gong di baptaiso det nama danim, uni a Tokodos na Nion i kis un det elar nami ra i kis un dat.”⁴⁸ Ra i itula sur din baptaiso det nama risan o Iesu Karisito. Ra numur det saring o Pita sur in kis munung torom det tu kabano bung.

11

O Pita i wasiso talapor una nun a pina-pam

¹ A kum aposel ma det ra det tar tistisino una nurnur ra det kis tiro o Judia, det longoro i lena a taro kai ra awu sur a taro Juda det sa nurnur una wasiso anun o God.² Ra o Pita i wan usapat o Jerusalem, a taro ra det nemi sur a kum tene nurnur rop din tok talilis a pinindet, det bori, uni i sa lakai a warkurai anun a taro Juda.³ Det watungi tano lena, “U pam a utna ra i tabu torom dat a taro Juda, ra u ruk torom a taro ra ka di tok talilis a pinindet, ma u wangon tomo nam det.”

⁴ Ra o Pita i wasiso talapor torom det una kum utna rop ra i wanpat lena,⁵ “A kis tiro una tamon Jopa, a wararing, ra a tama ara tamtama. A tama ara utna i elar namin labino malu, ra di pam pas a wat na kukurino ma di ukete pirso i tagisapat una langit torom iau.⁶ Ra a tamtama tiro ubalano, a tama a kum wewegua, det ra di ser ugu det ma a kum lomlomino, ma det ra det kaukawar, ma a kum piko kai.⁷ Ra a longoro in nalngan ara i watungi tang lena, ‘Pita, un tur. Un um doko det ma un nan det.’⁸ Ra a watungi lena, ‘Labino, awu ut! Ka wan tar tu utna ra i dur umatam, ra i tabu torom met a taro Juda.’⁹ Ra in nalngan ara tagisapat una langit i balu meleti lena, ‘A utna ra o God i sa utalapor tari, gong u watungi lena i dur.’¹⁰ A utna ri, di pami elar nama tulu dino, ra numur di dat toto melet pasi usapat una langit.

¹¹ “Una du bung ut ra, a tulu musano ra di tulu ru detul tagitong o Sisaria torom iau, detul wanpat una rumu ra met kis uni.

¹² Ra a Tokodos na Nion i inanos iau sur an nan tomo nam detul, ma gong a nuknuk larlar uni. Ma a womon na musano kai ri, ra met tar tistisino una nurnur met wan tomo nam detul utong o Sisaria ra met ruk una rumu anun a musano ra i itula sur iau.

¹³ Ra i inanos met lena, i tama tar a ensel i wanpat una nun a rumu, i tur ma i watungi lena, ‘Un itula utong o Jopa sur din ben pas o Saimon, ara risano kai o Pita.’¹⁴ In inanos ui un lako kum wasiso ra in ulaun ui tomo nam det rop ra det kis una num a rumu.’

¹⁵ Ra a turpas a wasiso, a Tokodos na Nion i wan pirso un det, elar nami ra i pami un dat numugu.¹⁶ Ra a nuk pas a wasiso anun a Labino, ra i watungi lena, ‘O Jon i baptaiso nama danim, ikut numur din baptaiso mot nama Tokodos na Nion.’¹⁷ O God i sa pitar tar a Tokodos na Nion lar a etabor tandet, elar nami ra i sa pitar tari tandat, ra dat nurnur una Labino, o Iesu Karisito. Ra osi na ngas na musano iau, sur an turbat o God?”

¹⁸ Det longoro a wasiso ri, ra ka det wasiso melet mo, ma det watung ulabo pas o God lena, “O God i sa pam tar a kisapi sur det kai ra awu sur a taro Juda, det in nukpukus ma det in laun.”

A Wakak na Wasiso i wanpat tong o Antiok

¹⁹ A taro na nurnur ra det wan sarara tagisapat o Jerusalem, uni di ban laulau det numur tan a minatin o Stiwen, det wan bakbak utong o Saipras, ma una papor Ponisia, ma a tamon Antiok. Det wasiso torom a taro Juda kut nama Wakak na Wasiso un o Iesu.²⁰ Ikut ara taro tagun a taro na nurnur ra, a taro Saipras ma a taro Sairini, det wan utong o Antiok, ra det wasiso torom a taro ra awu sur a taro Juda kai, nama Wakak na Wasiso una Labino o Iesu.²¹ A dekdekin a Labino i kis un det ra det wasiso, ma a susut na taro doko det nurnur ma det tupukus torom a Labino.

²² A taro na lotu sapat o Jerusalem det longoro a wasiso un asau ra i wanpat, ra det tulu ru o Banabas utong o Antiok.²³⁻²⁴ O Banabas i ara wakak na musano, i bukus nama Tokodos na Nion ma a nurnur. Ra i wanpat, i tama asau ra a marmaris anun o God i pami una nundet a nilaun, ra i gas doko. Ra i uragot det rop sur det in tur dekdek mulus nama nurnur torom a Labino una nundet a nilaun rop. Ra a susut na taro det tupukus torom a Labino.

²⁵ Numur o Banabas i wan bulung utong o Tasus, sur in sisio sur o Sol.²⁶ Ra i sa sio pasi, i ben pasi utong o Antiok. Ara kudulano kilalo der kis tomo nama taro na lotu tiro iai, ma der ususer a susut na taro doko. A rising “a taro anun o Karisito”, di watung mugu i una taro na ususer tong o Antiok.

²⁷ Una kilalo ra, a ramano kum propet det wan tagisapat o Jerusalem utong o Antiok.²⁸ Ara tagun det, a risano o Agabus, i tur, ra i wasiso nama dekdekin a Tokodos na Nion. I wasiso mugu taru una labino munurak ra in nanpat una rakrakon bual rop ra i kis utuntudu ina warkurai anun

a taro Rom. A munerak ri i wanpat una kilalo ra o Klodius i mugumugu tagun a gapman. ²⁹ Ra a taro na ususer det kubus pasi sur det in etabor torom a taro na nurnur ra det kis una papor Judia. Det rop taktakai det in etabor nama sau ra i sot sur det in etabor nami, elar nama sau ra det utur ukai i. ³⁰ Det woro tomo tar a mani, ra o Banabas ma o Sol der losi torom a kum mugumugu na lotu sapat o Jerusalem.

12

Di uruk tar o Pita una karabus

¹ Una kum bung ra, o king Erod i tulu a kum tene inaim, sur det in dat pas ara taro tagun a taro na lotu, sur din ban laulau det. ² I itula sur din tau doko o Jems, a tisin o Jon, namin totok na inaim. ³ I tama i lina a taro Juda, det gas nama minatin o Jems, ra i dat pas o Pita bulung una ra bung epotor tan a kum lamlabino bung na lotu na beret ra kalako is uni. ⁴ Ra i sa dat pas o Pita, i uruk tari una karabus. Ra a noino ma wonom na tene inaim det tamtamabati. Det ukukeles, a wat det munung, numur a wat det bulung, i lenkutra. O Erod i nemi sur in ben pirso i sur din warkurai i umatan a taro, numur tan a kum lamlabino bung na lotu na Wanlakai. ⁵ Ikut, ra o Pita i kis una karabus, a taro na lotu rop ka det mana nama niaring torom o God suri.

A Labino i ulaun pas o Pita gusun a laman o Erod

⁶ Una mirum, numugu tan a bung ra o Erod in ben pat o Pita sur a warkurai, o Pita i inep epotor tan a ru tene inaim. Det sa ker tari nama ru sen. Ma a ramano kum tene inaim kai, det tur una matansako ma det tamtamabat a karabus. ⁷ A ensel anun a Labino i wanpat kisin toromi, ma a talapor i utalapor a balano rumu na karabus. I rapus wangun o Pita una paporino, ra i watungi tano lina, "Un katutur lakit!" Ra aru sen der tapalos gusun aru lamano. ⁸ Ra a ensel i watungi tano lina, "Un emar pas, ma un pas pas anum aru su." Ra o Pita i pami lenutra. Ma a ensel i watungi tano lina, "Un ubek pas anum a saket, ma un mur iau." ⁹ Ra o Pita i mur pirso i gusun a karabus. Ikut i nuki lina a utna ri a ensel i pami, awu sur a lingmulusino. I nuki lina i tama ara tamtama kut. ¹⁰ Der wan sakit ru a mugano tene tamtamabat, ra der wan sakiti bulung a murmurino. Numur der wanpat una matansako na aen, ra di ser pirpirso uni unago utamon. Der tur tiro iai, ra a matansako i papos oros kut, ma der pirso. Ra der wanpat una nubual ra

a kisapi i wan susuaro iai, a ensel i rorom mut gusuni.

¹¹ Numur a nuknukin o Pita i talapor pat, ra i watungi lina, "A tasman mulusi lina a Labino i tulu ru anun a ensel, ra i sa ulaun pas iau gusun a laman o Erod, ma gusun a kum utna ra a taro Juda det nem na pami un iau."

¹² Ra i sa tasman lele i lina i sa langolango, i wan sur a rumu anun o Maria, o nan o Jon, ra ara risano kai o Mak. A susut na taro det kis tomo tiro iai, ra det wararing. ¹³ O Pita i pinpidik una matansako, ra ara tultul a toraro, a risano o Roda, i kalabor sur in tonok tiro una matansako. ¹⁴ Ra i longoro lele pas in nalngan o Pita, i gas. Ra una nun a gasgas, ke papos mo, i kalabor melet, ma i inanos det lina, "O Pita kuri mukut i tur taru una matansako." ¹⁵ Ra det watungi tano lina, "U lai, u longlong?" Ma i ipul det kut lina, "I lingmulus ut, kuri kut i upiso." Ra det watungi lina, "Kutiro anun a ensel kut mira." ¹⁶ Ikut o Pita i pinpidik liklik kut. Ra det papos pasi, det tama i maragom, ra det kisin uni. ¹⁷ Ra i turbat det nama lamano, sur det in kis wowowon. Numur i inanos det una pinapam anun a Labino ra i ben pirso petlan pasi gusun a karabus. Ma i watungi lina, "Mot in inanos o Jems ma det, ra dat tar tistisino una nurnur, una utna ri." Ra i wan gusun det sur ara tamon gisen.

¹⁸ Ra una kobot, a kum tene inaim det sisio sur o Pita, ma a nuknukin det i talara lina, "Awai mi uniri?" ¹⁹ Ra o Erod i longoro i lina, o Pita ke kis mo una karabus, i itula sur det in sisio suri. Ikut ka det sio pasi. Numur i tikin wakak a taro na inaim ra det tamtamabat una karabus, ma i itula sur din um doko det. Numur o Erod i wan tagitiro una papor Judia utong o Sisaria, sur in kis pas munung tong iai.

O Erod i mat

²⁰ O Erod i kankan torom a taro tagun aru tamon, o Tair ma o Saidon. Ra a taro tagun aru tamon ra, det wan tomo sur det in tama i, ma det in saringi sur a malmal. Uni anundet aru tamon det laun kut nama utna na inangon, tagun a papor anum o king Erod. Det emarom mugu pas nam o Blastus, a labino tene tamtamabat anun a king, ra i warut det sur det in tama a king.

²¹ Una bung ra o Erod i kubus tari tandet, i emar pas nama kum malu na king, ma i kis taru una kiskis na king, ra i wasiso torom a taro. ²² A taro det kukukuk nama gasgas lina, "In nalngan ara god kut ri, awu sur a musano." ²³ Uniutra, a ensel anun a Labino i umi, uni i madek a taro det watung

ulabo pasi, ikut, i ut ke ulabo pas o God. Ra a kum suisui det wan a pinino, ra i mat.

²⁴ Ikut a wasiso anun o God i lubung, ma i wan sarara una susut na tamon.

²⁵ O Sol ma o Banabas der urop anunder a pinapam sapat o Jerusalem, ra der milet melet utong o Antiok. Der ben pas o Jon, ara risano kai o Mak, ra detul wan tomo.

13

Di pilok pas o Banabas ma o Sol

¹ Tiro o Antiok, a kum poropet ma a kum tene ususer kai, kura epotor tan a taro na lotu. Iri a kum risandet: o Banabas, o Simion ara risano kai o Niger, o Lusius a te Sairini, o Sol ma o Manaen, i ra di ugu tomo der nam o Erod, a mugumugu.

² Ara bung ra det lotu torom a Labino ma det wewel, a Tokodos na Nion i watungi lena, “Mot in pilok pas o Banabas ma o Sol sur anung, sur a pinapam ra a kabo pas der suri.” ³ Det wararing ma det wewel, ra numur det ubek a kum lamandet netes un der, ma det tulu ru der.

A pinapam anun o Banabas ma o Sol tong o Saipras

⁴ A Tokodos na Nion i tulu ru o Banabas ma o Sol, ra der wan utong o Selusia. Numur der kas una sip ma der wan usa una ailan Saipras. ⁵ Der wanpat tong o Salamis, ra der warawai nama wasiso anun o God, una kum rumu na lotu anun a taro Juda. Detul wan tomo nam o Jon, anunder a tene warut.

⁶ Detul wan potur una kudulano ailan ra, tuk tong o Papos. Tiro iai, detul etorom nam ara te Juda, a risano o Barjisas, a tene sangsagor, ma a torotoro na poropet, ⁷ i ara pasan o Sergius Paulus. Sergius Paulus i a mugumugu tagun a ailan ra, a tene mananos, ra i itula pas o Banabas ma o Sol, uni i nem na longoro a wasiso anun o God. ⁸ Ikut o Barjisas, ra di watungi kai nam o Elimas, a kukuraino a tene sangsagor, i turbat der. I nemi sur in turbat ru a mugumugu sur gong i nurnur. ⁹ Ra o Sol ra di watungi kai nam o Pol, i bukus nama Tokodos na Nion, i tama dekdek o Elimas, ¹⁰ ma i watungi tano lena, “Ui a nutun o Satan, a ebar anun a kum tokodos na petutna rop. U bukus nama kum ngas na torotoro ma a kum usobor. U pukus liklik a tokodos na kisapi anun a Labino. Nangisin mo un mana gusun anum a petutna ra?” ¹¹ Uniutri a warkurai anun a Labino in rakon ui, in matam in pulu suano pasi, ma

kon tama a talapor ina suan.” Uniutra a gawul ma a dumirum i wanpat toromi, ma i paraso tuptupukus sur taio ra in pam pas a lamano sur in beni. ¹² Ra a mugumugu i tama a utna ri i wanpat, i nurnur, uni i kisin una etowo una Labino.

O Pol ma o Banabas der kis tong o Antiok una papor Pisidia

¹³ O Pol ma aru musano ra der wan tomo nami, detul kas una sip tagitiro o Papos, ra detul wan utong o Perga, una papor Pampilia. O Jon i wan pas gusun der tiro iai, ra i milet melet usapat o Jerusalem. ¹⁴ O Pol ma o Banabas der katutur melet pas tagitong o Perga ra der wan utong o Antiok una papor Pisidia.* Ma una Bung na Sabat der ruk una rumu na lotu anun a taro Juda, ra der kis tiro iai. ¹⁵ Ra di sa luk tar a kum wasiso tagun a Buk na Warkurai anun o Moses, ma a kum wasiso anun a kum poropet, a kum mugumugu tagun a rumu na lotu det pitar a wasiso torom der lena, “Aru tistisi met, ra tu wasiso na ururagot kura sur mur in inanos a taro nami, mur in wasiso kut.” ¹⁶ O Pol i katutur, ra i turbat det nama lamano sur det in kis wowowon, ra i watungi lena,

“Mot a taro Israel, ma mot a taro gisen kai ra mot lotu torom o God, mot in longoro iau. ¹⁷ A God anumet a taro Israel i pilok pas a kum tumtubu met ma i uburese tar det ra det kis tong o Ijip. Numur i ben pirso pas det tagitiro nama dekdekino. ¹⁸ Una wat na noino kilalo ra det kis una nubual kalako taro uni, det rosumur gusuni, ikut i tamtamabat det. ¹⁹ I um ru tar a taro tagun a wonom mawit na gapman ra det kis tong o Kenan, ra i pitar tar a piso Kenan sur anundet a taro Israel. ²⁰ A kum utna rop ri di pami ubalan a wat na mar ma a limo na noino kilalo.

“Numur o God i ubek tar a ramano kum tene warkurai sur det in mugu det, tuk una kilalo ra a poropet Samuel i mugu det. ²¹ Numur det sasaring sur tu king, ra o God i pitar tar o Sol torom det, ma o Sol i mugu det a wat na noino kilalo. O Sol, a nutun o Kis, tagun a kabotaro Benjamin. ²² Ra o God i sa rakon ru tar o Sol, numur i ubek tar o Dewid bulung sur in king anundet. Ma i watungi uni lena, ‘A tama o Dewid a nutun o Jesi, i a musano ra i elar nama nuknuking, ra in pam rop a kum utna ra a nemi.’

²³ “Tagun a kabotaro anun o Dewid, o God i pitar a Tene Ulaun, o Iesu, torom a taro Israel, elar nama nun a liliman.

12:25: Ap 11:29-30; 15:37 13:2: Ap 9:15 13:3: Ap 6:6 13:5: Ap 12:12; 15:39 13:11: Ap 9:8 13:13:

Ap 15:38 * 13:14: Aru tamon a risander o Antiok. Ara una papor Pisidia ma ara kai una papor Siria. 13:17:

Kis 1:7; 6:6; 12:51 13:18: Nam 14:34; Lo 1:31 13:19: Lo 7:1; Jos 14:1 13:20: Het 2:16; 1 Sml 3:20 13:21:

1 Sml 8:5, 19; 10:20-24 13:22: 1 Sml 13:14; 16:12; Sng 89:20 13:23: 2 Sml 7:12-16 13:24: Mt 3:1-2

²⁴ Numugu tan a inawan pat anun o Iesu, o Jon a Tene Baptaiso i warawai torom a taro Israel rop sur det in nukpukus ma din baptaiso det. ²⁵ Ra milau mo sur anun a pinapam in rop, i watungi lena, 'Mot nuki lena iau osi? Iau awu sur o naro ra mot kis langlang suri, awu! Ikut, a musano ra, in mur tang. Ka elar sur an palos aru su gusun aru kikino, uni a natino doko tano.'

²⁶ "A kum tistising, a kabotaro anun o Abaram, ma mot a taro gisen kai ra mot lotu torom o God, di sa pitar tar a wasiso torom dat lena o God i sa ulaun pas a taro. ²⁷ A taro ra det kis sapat o Jerusalem, tomo nam anundet a kum mugumugu, ka det tama lele o Iesu, lena i a Tene Ulaun, ma ka det tasman a kum wasiso ra a kum poropet det sa tumus tari, ra di ser luki una kum Bung na Sabat. Ikut ra det mulaot tar o Iesu sur in mat, det pam sot pas a wasiso anun a kum poropet. ²⁸ Ka det sio pas tu sakino ra o Iesu in iru uni, ikut det saring o Pailat sur in pitar tari sur din um doko i. ²⁹ Ra det sa pam sot rop tar a kum wasiso ra di sa tumus tari uni, det palos pirso ru i gusun in nanai kutus, ma det inep tari una kulam na minat. ³⁰ Ikut o God, i ukatutur melet pasi gusun a minat. ³¹ Ma una susut na bung i wanan pat torom a taro ra numugu det ser wan tomo nami tagitong o Galili usapat o Jerusalem. Ra uniri, det wasiso puaso uni torom a taro Israel.

³² "Ra met inanos mot una Wakak na Wasiso lenri: A liliman ra o God i sa pitar tari torom a kum tumtubun dat tagun numugu, ³³ uniri i sa pam sot pasi torom dat, ra i ukatutur melet pas o Iesu. Elar nami ra di sa tumus tari una manru na kelekele tagun a kum Kelekele lena, 'Ui a Nutung,

ma uniri a sa wanpat o Tamam.' *Sng 2:7*
³⁴ O God i sa ukatutur pas o Iesu gusun a minat, ma ken nan melet mo sur a minat ma ken mereseng. Elar nami ra o God i sa watung tari lena, 'A wakak na utna ra a uliliman taru uni torom o Dewid, an udan mot nami.

A utna ri in nanpat mulus ut.' *Ais 55:3*

³⁵ Ma i sa watung tari una ara Kelekele kai lena,

'Kon madek tar anum a Tene Tasur sur in mereseng.' *Sng 16:10*

³⁶ "O Dewid i pam sot rop pas a nemnem anun o God una nun a kum bung na nilaun. Numur i mat, ra di pori tomo nama kum tumtubunu, ma a pinino i mereseng. ³⁷ Ikut, o naro ra o God i ukatutur pasi gusun a minat, ke mereseng.

³⁸ "I mo ra a kum tistising, a inanos mot sur mot in tasmami lena, un o Iesu, din unus ru anumot a kum sakino petutna. A Warkurai anun o Moses ken pet lar pasi sur in unus ru anumot a kum sakino petutna, sur din watung mot a kum tene tokodos. ³⁹ Ikut, det rop ra det nurnur un o Iesu, din watung det a kum tene tokodos. ⁴⁰ Mot in tumarong, sako a kum utna ra a kum poropet det sa wasiso taru uni in sot mo un mot. Det watungi lena,

⁴¹ 'Tama i, mot a kum tene urongon un o God,

mot in kisin ma mot in iru, uni an pam ara utna una numot a kum bung na nilaun.

Ra taio in inanos mot una utna ra, ka mot in nurnur ut uni.' " *Hab 1:5*

⁴² O Pol ma o Banabas der pirso gusun a rumu na lotu, ra a taro det saring der sur der in milet una Bung na Sabat sapat, sur der in wasiso melet torom det una kum utna ri. ⁴³ Ra a taro det wan susuaro gusun a rumu na lotu, a susut na te Juda ma det kai a taro gisen ra det ruk una lotu Juda ma det lotu nama lingmulus, det mur o Pol ma o Banabas. Der wasiso torom det, ma der uragot det, sur det in tur dekdek una marmaris anun o God.

⁴⁴ Una Bung na Sabat ra det sa kubus tari, milau sur det rop tagun a tamon ra det wanpat tomo, sur det in longoro a wasiso anun o God. ⁴⁵ Ra a kum te Juda det tama a kunur na taro, a nuknukin det i laulau torom o Pol ma o Banabas, ma det mang sakosako a kum wasiso ra o Pol i wasiso nami. ⁴⁶ Ikut ka der ngara ra der watungi lena, "A labino utna sur mir in upuaso mugu tar a wasiso anun o God torom mot. Ma mir sa pam sot pasi. Ikut mot rosumur gusuni, ra i elar nami ra mot ut mot watungi lena, 'Ka met tokodos sur met in los a nilaun tukum.' Mot in tama i, mir in nan mo torom a taro ra awu sur a taro Juda. ⁴⁷ Uni a Labino, i tulu mir lena, 'A ubek tar ui sur ui a talapor anun a taro ra awu sur a taro Juda,

sur un los a wasiso torom a taro una rakrakon bual rop lena, an ulaun pas det.' " *Ais 49:6*

⁴⁸ A taro ra awu sur a taro Juda det longoro a wasiso ri, ra det gas doko, ma det watung ulabo pas a wasiso anun a Labino. Ma det rop ra di sa pilok pas det sur a nilaun tukum, det nurnur.

⁴⁹ Ra a wasiso anun a Labino i wan sarara una kum tamon rop una papor ri. ⁵⁰ Ikut a kum te Juda, det ukatutur a nuknukin a kum mugumugu na ino ra det ser urur

torom o God, ma a nuknukin a kum mugumugu na musano kai tagun a tamon ra, sur det in ban laulau o Pol ma o Banabas. Ma det lakro ru der gusun anundet a papor.⁵¹ Ra der tang ru a kubus gusun a kum kikinder sur a ukinalong lena o God i sa rosumur gusun det. Numur der wan utong o Aikoniam.⁵² Ma a taro na ususer tong o Antiok det bukus nama gasgas ma a Tokodos na Nion.

14

O Pol ma o Banabas der kis tong o Aikoniam

¹ O Pol ma o Banabas der ruk una rumu na lotu anun a taro Juda tong o Aikoniam ma der wasiso, elar nama ngasino ra der ser pami una kum tamon. Anunder a wasiso i talapor ra a susut na taro Juda det nurnur uni, ma a susut na taro gisen kai.² Ikut a ramano taro Juda ra ka det nem na nurnur, det usungun balan a ramano taro ra awu sur a taro Juda. Det ban laulau a nuknukin det sur det in kankan torom det ra det tar tistisino una nurnur.³ O Pol ma o Banabas der kis suano der tiro o Aikoniam. Ka der ngara, der dekdek kut nama wasiso una labino marmaris anun a Labino. Ra a Labino i ulingmulus anunder a wasiso nama dekdek ra i pitari tander sur der in pam a kum utna na ukisin ma a kum ukinalong.

⁴ A taro tagun a tamon ra det tapagol, ara taro det tur tomo nama taro Juda ra ka det nurnur, ma ara taro det tur tomo nama aru aposel.⁵ A ramano taro Juda ma ara taro kai ra awu sur a taro Juda tomo nam anundet a kum mugumugu, det epak pas sur det in ban laulau o Pol der, ma det in duku doko der nama watat.⁶ Ikut ra der longoro i, der wan gisen utong una papor Likonia, sur aru tamon o Listra ma o Derbe, ma a ramano kum tamon kai ra det kis milau.⁷ Ra der warawai nama Wakak na Wasiso torom det tiro iai.

Tong o Listra o Pol ma o Banabas der ulangologo pas ara musano

⁸ Tong o Listra, ara musano kura i kis taru, aru kikino der mat. Di usus pasi ut nami, ma ke pet lar pasi sur in nan.⁹ I longoro o Pol i wasiso. Ra o Pol i tamtama tokodos toromi, ma i tama i lena, a musano ra, i nurnur sur din ulangologo pasi.¹⁰ Ra o Pol i wasiso toromi namin labino walngano lena, "Un katutur." Ra a musano ra, i katutur lakit mut, ra i wan.

¹¹ A susut na taro det tama a utna ri o Pol i sa pam tari, ra det kukukuk nama wasiso Likonia lena, "Aru god der sa wan pirso elar nama ru mulusino torom dat!"

¹² Ra det nuki lena o Banabas a god Sus, ma o Pol a god Ermes, uni i a tene wasiso tander.¹³ A rumu na etabor anun o god Sus kura upiso milau una papor tamon ra. Ra a tene etabor torom o god Sus i ben pat a kum bulumakau utiro una matansako ina tamon, sur det in tuni elar nama etabor torom o Pol der nam o Banabas. Ma i los pasi kai a kum purpur ra di sa suk tari sur det in tabor der nami.

¹⁴ Ikut, ra aru aposel der sa tasman pas asau ra a taro det nem na pami, der dat raros anunder a ramano kum malu, uni ka der gas nama sau ra det pami.* Ra der kalabor potor tan a taro, ma der kukukuk lena,¹⁵ "A taro, sur asau ra mot pam a kum utna ri? Mir aru musano kut, mir elar kut kai lar mot! Mir wanpat kut nama Wakak na Wasiso torom mot, ma mir inanos mot sur mot in tupukus gusun a kum utna oros kut ri ra mot lotu torom det, sur mot in mur a God ra i laun. I ra, i ukis a bakut, a rakrakon bual, a tasi, ma a kum utna rop ubalandetel.¹⁶ Numugu utmakai, i madek tar a taro tagun a kum gapman rop sur det in laun elar nama nundet a nemnem.¹⁷ Ikut o God ke dumano mot, i ukis tar a kum utna sur mot in tasmani lena, i ut o God. Una nun a marmaris i tabor mot nama bato tagisapat una bakut, ma a kum duwai det wu una kalangin det ut. I tabor mot nama utna na inangon, ma i ubukus mot nama gasgas."¹⁸ Der watung a wasiso ri, ikut a taro det nemi ut sur det in lotu torom der nama etabor ra di tuni. Ra der dekdek nama iturbat, tuk det mana.

¹⁹ Numur a ramano kum te Juda det wanpat tagitong o Antiok ma o Aikoniam, ra det dat pukus pas a nuknukin a susut na taro gusun o Pol der nam o Banabas. Det duku o Pol nama watat, ma det dat pirso ru i gusun a tamon, ra det nuki lena i sa mat.²⁰ Ikut, ra a taro na ususer det tur talilis pasi, i katutur, ra i ruk melet una tamon. Una bung numur, der wan tomo nam o Banabas utong o Derbe.

O Pol ma o Banabas der wan utong una ru papor Pisidia ma o Pampilia

²¹ O Pol ma o Banabas der warawai nama Wakak na Wasiso tong o Derbe, ra der ususer a susut na taro ra det wanpat a kum nat na ususer. Numur der milet

13:51: Mt 10:14; Ap 18:6 14:3: Mk 16:20; Ibr 2:4 14:5: Ap 14:19 14:11: Ap 28:6 14:14: Ap 10:26;

Sng 146:6 * 14:14: A taro Israel det ser dat raros anundet a kum malu sur det in ese i lena, a utna ra i laulau doko umatandet. 14:16: Ap 17:30 14:17: Jer 5:24 14:19: Ap 17:13; 2 Kor 11:25 14:22: Ap 15:32; 1 Tes 3:3

melet utong o Listra, Aikoniam, ma o Antiok. ²² Ra der uragot a taro na ususer tagun a tulu tamon ra, ma der wasiso na warut torom det, sur det in tur dekdek una nurnur anundet. Der watungi lena, “A susut na utna in monong mugu tar dat, numur dat in ruk una matanitu anun o God.” ²³ Der pilok pas a ramano taro sur det a kum mugumugu anun a taro na lotu, una tulu tamon taktakai. Der wararing ma der wewel, ra der pitar tar det torom a Labino, o naro ra det nurnur uni. ²⁴ Ra der sa wan pas una kum tamon una papor Persidia, numur der wanpat una papor Pampilia. ²⁵ Ra der sa warawai pas tong o Perga, der wan utong o Atalia.

O Pol ma o Banabas der milet melet utong o Antiok una papor Siria

²⁶ Ra der sa pam sot pas anunder a pinapam una kum tamon, der kas una sip tagitong o Atalia utong o Antiok. O Antiok a tamon ra a kum tene nurnur, det pitar tar der una marmaris anun o God, ma det tulu der sur a pinapam ri. ²⁷ Ra der wanpat, der kabo tomo pas a taro na lotu, ma der inanos det una kum utna rop ra der pam sot pasi nama dekdekin o God. Der inanos det kai lena, o God i sa papos tar a kisapi na nurnur torom a taro ra awu sur a taro Juda. ²⁸ Ra der kis suano i tiro o Antiok torom a taro na ususer.

15

A kum mugumugu tagun a taro na lotu det kiwung sapat o Jerusalem

¹ A ramano taro tagisapat una papor Judia det wan utong o Antiok, ma det ususer det ra det tar tistisino una nurnur lena, “Ra ka din tok talilis a pinimot elar nama Warkurai anun o Moses, ka din ulaun mot.”

² Ra o Pol ma o Banabas der engaras tomo nam det. Ra a taro na nurnur det pilok tar o Pol ma o Banabas ma ara taro utkai tagun det, sur det in nan usapat o Jerusalem torom a kum aposel ma a kum mugumugu anun a taro na lotu, sur det in ting det una utna ri.

³ A taro na lotu det tulu o Pol, o Banabas ma ara taro kai. Det wan poter una papor Ponisia ma a papor Samaria. Det wasiso puaso nanan torom a kum tene nurnur una kum tamon, una taro ra awu sur a taro Juda, lena det sa nukpukus. Ma det ra det tar tistisino una nurnur, det gas doko ra det longoro i. ⁴ Ra det wanpat sapat o Jerusalem, a taro na lotu ma anundet a kum mugumugu ma a kum aposel det ugasgas pas det. Ra der inanos det una

kum utna rop ra der pam sot pasi nama dekdekin o God.

⁵ A ramano kum Parisi ra det nurnur un o Iesu, det katuttur ra det watungi lena, “I tokodos ut sur din tok talilis a pinin a taro ra awu sur a taro Juda ra det nukpukus. Ma din ususer det, sur det in mur a Warkurai anun o Moses.”

⁶ A kum aposel ma a kum mugumugu det kiwung sur det in nuknuk wakak una utna ri. ⁷ Ra det sa wasiso suano pas det, o Pita i katuttur ma i watungi tandet lena, “A kum tistising, mot tasmani lena numugu, o God i pilok pas iau gusun mot, sur an warawai nama Wakak na Wasiso torom det ra awu sur a taro Juda, sur det in longoro i, ma det in nurnur uni. ⁸ Ma o God, i ra i tasman a nuknukin a taro rop, i pitar a Tokodos na Nion torom a taro ra awu sur a taro Juda elar nami ra i pitari torom dat. Una nun a pinapam ra, i ese i torom dat lena i mulaot pas det kai ra awu sur a taro Juda. ⁹ Anun a pinapam torom dat ma torom det ke senene. I ukodos det kai umatano uni det nurnur. ¹⁰ I lai ra mot nem na lar o God? Ra mot watungi lena a taro na ususer det in mur a Warkurai anun o Moses, i elar nami ra mot pitar tar a maut torom det. A kum tumtubun dat tagun numugu ka det pet lar pasi sur det in muri, ma dat kai uniri awu. ¹¹ Dat nurnur lena, din ulaun dat i kibino una marmaris anun anundat a Labino o Iesu, lenkutkai ra torom det.”

¹² A taro na kiwung rop det kis wowowon taru kut. Det longoro o Pol ma o Banabas, ra der wasiso una kum ukinalong ma a kum utna na ukisin der pami nama dekdekin o God epotor tan a taro ra awu sur a taro Juda. ¹³ Ra der sa wasiso rop, o Jems i watungi lena, “A kum tistising, mot in longoro iau. ¹⁴ O Saimon i sa inanos tar dat una mugano dino ra o God i maris det ra awu sur a taro Juda, ra i pilok pas ara taro tagun det sur det anun a taro ut. ¹⁵ A utna ri o God i pami, i elar nama wasiso anun a kum poropet. Di sa tumus tari lena,

¹⁶ ‘Numur tano, an milet melet, ma an pam melet a rumu anun o Dewid, ra i sa terege.

Ma an utur melet pas a rumu ra i toropo, ma an pam wakak meleti,

¹⁷⁻¹⁸ sur a taro gisen kai, a taro ra awu sur a taro Juda, det in nukpukus torom a Labino, det ra a sa kabo pas det sur anung.

A Labino i sa watung tari lenri, i ra i pam a kum utna ri ra numugu i sa upuaso tari.’ *Amo 9:11-12*

¹⁹ “I mo ra a nuknuking i lenri, gong dat pitar a mamaut torom a taro ra awu sur a taro Juda, ra det tupukus torom o God. ²⁰ Dat in tumtumus torom det, ma dat in inanos det lena, det in mur a kum warkurai kut lenri: Gong det wan tu utna ra di sa etabor taru nami torom a kum torotoro na god, uni a ngas na lotu lenri i udur a utna na inangon. Gong det pam a kum petutna na pamuk. Gong det wan tu utna ra ka di gos wakak a gap gusuni, ma tu wewegua ra di pos doko i kut ra a gap kura utmakai uni. ²¹ Uni tagun numugu utmakai una kum tamon rop, di ser luk a Warkurai anun o Moses, ma di ser warawai nami una kum rumu na lotu una kum Bung na Sabat.”

Di tumus a pas torom a taro na lotu ra awu sur a taro juda

²² A kum aposel, ma a kum mugumugu, ma a taro na lotu rop, det wasiso tomo pas sur det in pilok pas lako ru musano tagun det, sur det in nan tomo nam o Pol ma o Banabas utong o Antiok. Det pilok pas o Judas, ara risano kai o Basabas, ma o Sailas, aru mugumugu tagun det ra det tar tistisino una nurnur. ²³ Ra det tumus tar a pas sur det in losi. A pas ra i watungi lenri:

Met a kum aposel ma a kum mugumugu, met a kum tistisi mot, met tumtumus torom mot a kum tene nurnur tagun a taro ra awu sur a taro Juda ra mot kis tong o Antiok, ma una ru papor Siria ma o Silisia:

A marmaris torom mot.

²⁴ Met sa longoro tari lena ara taro tagun met, det ulokolokor mot ra det watungi lena mot in mur a kum Warkurai rop anun o Moses, ma det utalara a nuknuki mot nami. Awu sur met ra met tulu det. ²⁵ Uniri met sa wasiso tomo pas, ma met rop met mulaot sur met in pilok pas lako ru musano, sur met in tulu der torom mot. Der in nan tomo nama ru wakak na paspasa met, o Banabas ma o Pol, ²⁶ aru musano ra ka der maris bat anunder a nilaun una risan anundat a Labino o Iesu Karisito. ²⁷ I mo ra met tulu ru o Judas ma o Sailas torom mot, sur der in inanos mot una kum wasiso ri met tumusi una pas. ²⁸ A Tokodos na Nion i kis tomo nam met, ma i ese met sur gong met pitar tar tu mamaut torom mot. Iri a kum warkurai ra mot in muri:*

²⁹ Gong mot wan tu utna ra di sa etabor taru nami torom a kum torotoro na god. Gong mot wan tu utna ra ka di gos wakak a

gap gusuni, ma tu wewegua ra di pos doko i kut, ra a gap kura utmakai uni. Ma gong mot pam a kum petutna na pamuk. Ra ka mot in pam a kum utna ri, in wakak torom mot.

I kut ra, ma i rop. A marmaris torom mot.

³⁰ Numur di tulu det, ra det wan utong o Antiok. Tiro iai det kabo tomo pas a taro na lotu, ra det pitar tar a pas ra tandet. ³¹ A taro det luki, ra det gas doko una wakak na wasiso na ururagot. ³² O Judas ma o Sailas der pitar a susut na wasiso sur der in uragot a taro ra det tar tistisino una nurnur, ma sur der in udekdek det, uni der aru poropet. ³³⁻³⁴ Ra der sa kis suano pasi tiro iai, det ra det tar tistisino una nurnur, det tulu melet ru der nama malmal, sur der in milet melet usapat o Jerusalem torom det ra det tulu tar der.†

³⁵ Ikut o Pol ma o Banabas der kis kut tong o Antiok. Der tomo nama susut na taro, det ususer a taro ma det warawai nama wasiso anun a Labino.

O Pol ma o Banabas der wan susuaro

³⁶ A ramano kum bung numur, o Pol i watungi tan o Banabas lena, “Dar in milet melet sur a kum tamon rop, ra dar sa warawai taru uni torom det nama wasiso anun a Labino, sur dar in tama a kum tistisin dar, ra det pepetlai mo.” ³⁷ Ra o Banabas i nemi sur der in ben melet pas o Jon, ara risano kai o Mak. ³⁸ Ikut o Pol i nuki lena, ke wakak sur der in ben melet pasi, uni i wan pas kut gusun der utong o Pampilia, ma ke mur der tuk ra a pinapam i rop. ³⁹ Der engaras pas, ra numur der wan susuaro. O Banabas i ben pas o Mak, ra der kas una sip utong o Saipras. ⁴⁰ Ra o Pol i pilok pas o Sailas, sur der in nan tomo. Ma a kum tistisin der una nurnur, det pitar tar der una marmaris anun a Labino. ⁴¹ Ra der wan tuptupukus epotor una papor Siria ma una papor Silisia, ma der udekdek a taro na lotu una kum tamon.

16

O Timoti i wan tomo nam o Pol ma o Sailas

¹ O Pol ma o Sailas der wanpat tiro o Derbe ra numur utiro o Listra. Tiro o Listra, ara tagun a taro na ususer kura iai, a risano o Timoti. O nano a ino Juda ma a tene nurnur, ma o tamano a te Grik. ² Det ra det tar tistisino una nurnur tong o Listra ma o Aikoniam, det watungi uni o Timoti

15:20: Kis 34:15-17; Wkp 17:10-16 **15:28:** Mt 23:4 * **15:28:** I mo ra a taro ra awu sur a taro juda det langolango gusun a kum Warkurai anun a taro juda. Lenra det langolango gusun a warkurai na tinotok talilis. † **15:33-34:** Una ramano kum du buk una wasiso Grik, a ramano kum wasiso kai i kis una vers ri. I lenri: *Ikut o Sailas i nemi sur in kis utmakai tiro iai.* **15:37:** Ap 12:12, 25 **15:38:** Ap 13:13; Kol 4:10 **16:1:** Ap 14:6; 2 Tim 1:5 **16:2:** Pil 2:19-22

lena i a wakak na musano. ³ O Pol i nemi sur detul in nan tomo. I ben pasi, ra i tok talilis a pinino, uni a kum te Juda ra kura una kum tamon ra, det tasmani lena o tamano, a te Grik*. ⁴ Ra detul wan nanan una kum tamon, detul wasiso un asau ra a kum aposel ma a kum mugumugu det sa wasiso pas uni sapat o Jerusalem, sur a taro det in muri. ⁵ Ra a taro na lotu ma kum tamon det lubang una nurnur, ma a nilulukin det i labo nanan kut una kum bung.

A tamtama anun o Pol tong o Troas

⁶ A Tokodos na Nion i turbat detul sur gong munung detul warawai nama Wakak na Wasiso, tong una papor Asia. Ra detul wan tuptupukus kut tong una ru papor, Pirigia ma o Galesia. ⁷ Detul wanpat una tuktuk ina papor Misia, ra detul nemi sur detul in nan utong una papor Bitinia, ikut a Nion o Iesu ke mulaot sur detul in nan utong. ⁸ I mo ra detul wan sakit a papor Misia, ma detul wan utong o Troas.

⁹ Una mirum, o Pol i tama ara tamtama. I tama ara musano, a te Masedonia i tur taru ma i saringi lena, "Un nan urin o Masedonia, ma un warut met." ¹⁰ Ra i sa tama tar a tamtama ra, uniuutra met† waninar pas sur a inawan utong o Masedonia, uni met tasmani lena o God ut i sa kabo pas met sur met in warawai torom det nama Wakak na Wasiso.

O Lidia i nukpukus tong o Pilipai

¹¹ Ra met wan tagitong o Troas, met kas una sip ma met wan tokodos utong una ailan Samotres. Ra ara bung palu met wan bulung utong o Neapolis. ¹² Ra met wan tagitiro o Neapolis utong o Pilipai. A tamon ra, i labo sakit taun a kum tamon rop tong una papor Masedonia, ra a taro Rom det kis iai. Ra met kis pas a kabano bung tiro una tamon ra. ¹³ Una Bung na Sabat met pirso una matansako ina tamon ra, sur a danim, uni met nuki lena a nubual na niaring kura nisan a danim ra. Met kis taru, ma met wasiso nama wardain ra kura det sa kis tomo taru tiro iai.

¹⁴ Ara ino tagun det ra det longoro met, a risano o Lidia, a ino tagitong o Taiataira, a tene siuru pepol na malu ma a tene lotu torom o God. Ra a Labino i pukus pas anun a nilaun sur in mur a kum wasiso ra o Pol i watungi. ¹⁵ Ra di sa baptaiso tar o Lidia ma det kai ra det kis una nun a rumu, i ben pas met, ra i watungi lena, "Ra mot nuki lena a nurnur una Labino, mot in ruk una nung

a rumu, ma mot in kis uni." Ra i ungongos pas met.

O Pol ma o Sailas der karabus tong o Pilipai

¹⁶ Ara bung ra met wan sur a nubual na niaring, met etorom pas nam ara tultul na ino ra a laulau na nion kura uni, ma i ser wasiso mugu un asau ra in nanpat numur. Anun a kum mugumugu det ser los a labino mani tagun anun a pinapam. ¹⁷ A ino ra i mur met nam o Pol, ma i kukukuk lena, "A kum musano ri, det a kum tultul anun o God a Labino Sakit, det inanos mot una kisapi ra din ulaun mot uni." ¹⁸ A susut na bung i pami lenra. Ra a pinin o Pol i sa ngoro nami, i tupukus, ra i watungi tan a laulau na nion lena, "Una risan o Iesu Karisito, a watungi tam, un pirso gusun a ino ri." Uniuutra a laulau na nion i pirso gusuni.

¹⁹ A kum mugumugu anun a ino ra, det tasmani lena, ka det in tama melet lako mani mo gusuni. Ra det pam ukai pas o Pol ma o Sailas, ra det dat pas der torom a kum mugumugu una nubual na inawan tomo. ²⁰ Det ben tar der torom a kum tene warkurai ma det watungi lena, "Aru musano ri, aru te Juda, der pam pat a kum purpuruon una nundat a tamon. ²¹ Der ususer a taro una kum utna ra ke tokodos sur dat a taro Rom det in longoro i, ma dat in muri." ²² A kunur na taro kai det kukukuk ma det takun der, ra a kum tene warkurai det itula sur din palos ru anunder a kum malu ma din miras der namin kadas. ²³ Ra di sa miras dekdek tar der, di uruk tar der una karabus, ma di inanos tar a tene tamtamabat sur in tamtama dekdek taru un der. ²⁴ Ra a tene tamtamabat i sa rakon tar a wasiso ra, i uruk tar der una kukur rumu kura epotor una karabus, ma i ukai tar a kum kikinder nama palang.

²⁵ Una labino mirum, o Pol ma o Sailas der wararing, ma der kelekele torom o God. Ma a taro kai ra det kis una karabus, det longoro der. ²⁶ Kura kut, a labino guri i wanpat, ra i gunu a kum pos ina rumu. Ra uniuutra a kum matansako rop det papos, ma a kum sen det tapalos gusun a kum karabus rop. ²⁷ A tene tamtamabat i tuangun, ra i tama a kum matansako det sa papos. I dat pirso pas anun in totok na inaim sur in un doko i ut nami, uni i nuki lena a kum karabus det sa kalabor song. ²⁸ Ikut o Pol i kakabo dekdek toromi lena,

* **16:3:** O Timoti a te Juda uni o nano a te Juda, ikut, ra i nat miso ka di tok talilis a pinino, uni o tamano a te Grik. O Pol i tok talilisi sur a taro Juda det in mulaoti ra in nan tomo nam o Pol una pinapam. **16:4:** Ap 15:23-29 **16:6:** Ap 18:23 † **16:10:** O Luk i tumus a du wasiso "met", uni i wan tomo nam o Pol. **16:17:** Mk 1:24 **16:20:** Mk 13:9 **16:22:** 2 Kor 11:25; 1 Tes 2:2 **16:27:** Ap 12:18-19

“Gong u ban laulau ui. Met rop kuri kut met.”

²⁹ A tene tamtamabat i kakabo sur lako kum lam, ra i kalabor ruk lakit torom o Pol ma o Sailas. I ngara ma i neneder, ra i puku pirso taru numugu tander. ³⁰ I ben pirso pas der, ra i ting der lena, “Aru musano, asau ra an pami sur din ulaun iau?” ³¹ Ra der balu i lena, “Un nurnur una Labino o Iesu, ra o God in ulaun ui tomo nam det ra det kis una num a rumu.” ³² Ra der wasiso nama wasiso anun a Labino toromi, ma torom det rop ra det kis una nun a rumu. ³³ Una bung na mirum ut ra, a tene tamtamabat i ben pas der, ma i gos a kum kinano lokono kadas ra kura una pininder. Ra uniutra di baptaiso a tene tamtamabat, ma det rop ra det kis una nun a rumu. ³⁴ I ben pas der utiro una nun a rumu, ma i tabor der nama utna na inangon. I gas sakit, ma anun a taro kai det gas, uni det sa nurnur un o God.

³⁵ Una kobot raut a kum tene warkurai det tulu ru aru polis nama wasiso lena, “Un palos ru aru musano ra.” ³⁶ Ra a tene tamtamabat i inanos o Pol lena, “A kum tene warkurai det itula sur din palos ru mur. Uniri mur in pirso, ma mur in nan nama malmal.” ³⁷ Ikut o Pol i watungi torom a ru polis lena, “Det miras mir umatan a taro, ma det uruk tar mir una karabus, ikut katutaio utmakai i warkurai tar mir. Mir aru te Rom ut mir. Ra uniri det nem na palos eno ru mir. Ikut awu! I wakak sur det ut det in nan urin ma det in palos ru mir.” ³⁸ Aru polis der milet melet, ma der inanos a kum tene warkurai una kum wasiso ra. Ra det longoro i lena der aru te Rom, det ngara. ³⁹ Ra det wan, det upuaso anundet a niraro torom der, ma det ben pirso pas der gusun a karabus. Ra det sa ben pirso pas der, det saring der sur der in nan gisen gusun anundet a tamon. ⁴⁰ Ra der sa pirso gusun a karabus, der wan sur a rumu anun o Lidia. Tiro iai der tama det ra det tar tistisino una nurnur ra der uragot tar det. Numur der wan.

17

A kum Tesalonaika det nem na um o Pol ma o Sailas

¹ O Pol ma o Sailas der wan utong o Ampipolis ma o Apolonia, ra numur der wanpat tong o Tesalonaika. Tiro o Tesalonaika ara rumu na lotu anun a taro Juda kura iai. ² O Pol i ruk torom det una rumu na lotu elar nami ra i ser pami. Una tulu Bung na Sabat i wasiso tomo nam det una Buk Tabu. ³ I watung palosi ma i upuaso i lena, i sot ut sur a Karisito in los a

ngunungut ma in mat ma in katutur melet gusun a minat. Ma i watungi kai lena, “O Iesu ri a inanos mot nami, i ut a Karisito ra o God i tulu ru i urin.” ⁴ Ara taro Juda ma a susut na te Grik ra det lotu torom o God, ma a susut na mugumugu na ino kai, det nurnur ma det mur o Pol ma o Sailas.

⁵ Ikut, a nuknukin a ramano taro Juda i laulau doko un der, uni a susut det mur der. Ra det ben pas a ramano kum tene pet laulau tagun a nubual ra a taro det ser wan tomo iai. Det wan tomo, ra det ukatutur a balan a taro. Det kalabor ruk una rumu anun o Jeson, ma det sisio sur o Pol ma o Sailas sur det in ben pirso pas der torom a taro. ⁶ Ikut ka det sio pas der. Ra det dat pas o Jeson ma a ramano taro kai ra det tar tistisino una nurnur, torom a kum mugumugu tagun a tamon ra, ma det kukukuk lena, “A taro ri det pam purpuruon una kum tamon una rakrakon bual, ra uniri, det sa wanpat bulung nin torom dat! ⁷ O Jeson i ben pas det utiro una nun a rumu. Det rop ri det lakai a kum warkurai anun a Sisa, a king anun a taro Rom, ra det watungi lena ara musano kai, a risano o Iesu, i a king.” ⁸ A taro ma a kum mugumugu det longoro a wasiso ri, ra det balano sungun. ⁹ Det ungonos o Jeson ma det kai ra di dat pas det tomo nami, sur det in kul pirso pas det. Numur det los pas a mani gusun det ra det palos ru det.

O Pol ma o Sailas der warawai tong o Beria

¹⁰ Una bung na mirum ut ra, det ra det tar tistisino una nurnur det tulu lakit ru o Pol ma o Sailas utong o Beria. Numur ra der wanpat tiro iai, der ruk una rumu na lotu anun a taro Juda. ¹¹ Det ri det wakak tandet tong o Tesalonaika, uni det rakon a wasiso ri nama gasgas, ma det luk wakak a kum wasiso tagun a Buk Tabu una kum bung rop, sur det in tama a wasiso anun o Pol, ra i lingmulus o awu. ¹² Ra a susut na taro Juda det nurnur, ma a susut na mugumugu na ino Grik, ma a susut na musano kai.

¹³ Ikut a taro Juda kurong o Tesalonaika det longoro i lena o Pol i warawai una wasiso anun o God tong o Beria, ra det wan utong ma det usungun balan a taro. ¹⁴ Uniutra det ra det tar tistisino una nurnur det tulu ru o Pol unago utasi. Ikut o Sailas der nam o Timoti der kis utmakai tong o Beria. ¹⁵ A taro ra det ben pas o Pol, det wan tomo nami utong o Atens. Numur i tulu melet det nama wasiso torom o Sailas ma o Timoti sur der in nan lakit toromi.

Tong o Atens

¹⁶ Ra o Pol i kis langlang utmakai sur o Sailas ma o Timoti tong o Atens, i tupunuk doko, uni i tama a tamon ra i bukus nama kum torotoro na god ra det ser lotu torom det. ¹⁷ I ruk una rumu na lotu anun a taro Juda, ma i wasiso tomo nama ramano taro Juda, ma a taro gisen kai ra det lotu torom o God. Ma una kum bung rop, i wasiso kai tomo nam det ra i pastorum det una nubual na inawan tomo. ¹⁸ A kum tene mananos tagun a etowo anun a taro Epikurian ma a taro Stoik* det wasiso tomo nami. Ara taro det watungi lena, "Asau ri a tene wasiso oros ri i inanos dat nami?" Ma ara taro kai det watungi lena, "Kutiro, i inanos dat una kum matok na god tagun tu tamon gisen." Det watungi lenri uni i warawai nama Wakak na Wasiso un o Iesu ma a nilaun melet gusun a minat.

¹⁹ Det ben pasi, ra det wan nami usapat una nubual na kiwung di watungi nam o Areopagus, ma det watungi lena, "Met nem na longoro anum a matok na etowo. ²⁰ A utna ra u wasiso uni i senene doko torom met, ra met nemi sur met in mananos una kukuraino." ²¹ Det watungi lenri, uni a kum te Atens ma a kum usiro kai ra det kis tiro iai, det balon una kum bung nama wasiso tomo una kum matok na etowo, ma una longlongoro kai suri.

²² O Pol i katutur epotor tandet una Areopagus ra i watungi lena, "Mot a taro Atens, una kum pinapam ra mot pami, a tama i lena mot a kum tene lotu mot. ²³ Uni, ra a wan tuptupukus nin, a tama wakak a kum toktok ra mot lolotu torom det, ma a sa tama tari kai ara kabulu ra di tuntun etabor uni, a tumtumus uni i lenri, 'Torom a god ra ka di tasmani'. O naro ra mot lotu toromi, ikut ka mot tasmani, i kut ri, an warawai nami torom mot. ²⁴ O God ut ra i pam a rakrakon bual ma a kum utna ra det kis uni, i a Labino anun a langit, ma a rakrakon bual, ma ke kis un tu rumu na lotu ra a taro det pami. ²⁵ Ma ke sibo sur taio in waruti, uni i ut i ser tabor a taro rop nama nilaun, a wuwu na nilaun, ma a kum utna rop. ²⁶ O God i ukis tar a mugano musano. Ra tagun a musano ra, a kum kabotaro rop det wanpat taguni, ma det kis una rakrakon bual rop. Una nuknukino ut i nuki lena det in kis awai, ma nangisin det in nanpat, ma nangisin det in rop melet. ²⁷ O God i pam a kum utna ri sur a taro det in sisio suri, ma kutiro det in tamtama tuptupukus suri ma det in sio pasi. Ikut, o God ke kis bakbak

gusun dat rop taktakai. ²⁸ Elar nami ra di sa watung tari lena, 'Dat laun, dat wan tuptupukus, ma dat utur ukai a nilaun, i kibino ut tan o God.' Elar nama numot a kum tene pak kelekele ra det watungi lena, 'Dat kai a kum nutnutunu ut.'

²⁹ "Dat a kum nutnutun o God, i mo ra ke wakak sur dat in nuki lena o God i elar nama toktok na gol, o a silwa, o a wat, ra a taro det nuk pat pasi ma det pami nama lamandet. ³⁰ Una kum kilalo numugu, o God ke nuknuk una kum petutna anun a taro ra ka det nuk pasi. Ikut uniri, i pitar a warkurai sur a taro rop una rakrakon bual det in nukpukus. ³¹ Uni i sa kubus tar a bung, sur in warkurai a rakrakon bual nama tokodos na warkurai. Ma i sa pilok tar a musano ra in pam a warkurai ra. I ukatutur melet pas a musano ra gusun a minat. Una nun a pinapam ra, i ulingmulus pas anun a pipilok torom a taro rop."

³² Ra det longoro a wasiso una nilaun melet gusun a minat, ara taro tagun det, det urongon laulau uni, ikut ara taro kai det watungi lena, "Met nemi sur un wasiso melet torom met una utna ri." ³³ Ra o Pol i pirso pas gusun a kiwung. ³⁴ Ma a ramano taro det nurnur, ra det mur o Pol, iri det: O Dionisius, i ara tagun a taro na kiwung Areopagus, ma ara ino, a risano o Damaris, ma a ramano taro kai.

18

O Pol i kis tong o Korin

¹ Ra i sa rop a kum utna ri, o Pol i wan tagitong o Atens utong o Korin. ² Tiro iai der etorom pas nama ara te Juda, a risano o Akuila. I tagitong o Pontus, ma anun a ino, a risano o Prisila. Ke suano i kut ra der wanpat taru tagitong o Itali, uni a Sisa Klaudius i pitar tar a warkurai, sur a taro juda rop det in nan gusun o Rom, i ra a labino tamon tong o Itali. Ra o Pol i wan torom der. ³ I kis nisan der ma detul papam tomo, uni detul a tulu tene pam rumu na sel. ⁴ Una kum Bung na Sabat i wasiso tomo nam det una rumu na lotu anun a taro juda, sur in ukatutur a nuknukin a taro juda, ma det kai ra awu sur a taro juda, sur det in nurnur un o Iesu.

⁵ Ra o Sailas ma o Timoti der wanpat tagitong una papor Masedonia, o Pol ke mana nama warawai nama wasiso anun o God, ma i upuaso i torom a taro juda lena, o Iesu i a Karisito ra o God i tulu ru i urin. ⁶ Ikut a taro juda det wasiso batbat o Pol ma

17:17: Ap 18:19 * **17:18:** A taro Atens det ser mur a susut na etowo anun a kum tene mananos tagun numugu. A ramano taro tagun aru ngas na etowo, a taro Epikurian ma a taro Stoik. A kum etowo kut anun a taro, awu sur i elar nama Buk Tabu. **17:24:** 1 Kin 8:27; Ap 7:48 **17:25:** Sng 50:12 **17:27:** Sng 145:18; Jer 23:23 **17:29:** Ais 40:18-20; 44:10-17; Ap 19:26 **17:31:** Sng 96:13 **18:2:** Rom 16:3 **18:3:** Ap 20:34 **18:5:** Ap 17:14-15 **18:6:** Ap 13:46, 51; 20:26

det watung a kum sakino wasiso uni. Ra o Pol i tutupu anun in namalu, a ukinalong lena, in rosumur gusun det. Ma i watungi tandet lena, "Ra mot in iru una warkurai anun o God, i kibino un mot ut, ma iau, a langolango. Turpasi uniri, an nan mukut torom det ra awu sur a taro Juda."

⁷ I pirso gusun a rumu na lotu, ra i ruk una rumu anun ara musano, a risano o Titius Jastus, i ara tene lotu torom o God. Anun a rumu i tur milau nisan a rumu na lotu. ⁸ O Krispus, ara mugumugu tagun a rumu na lotu, ma det rop kai, ra det kis una nun a rumu, det nurnur una Labino. Ma a susut na taro Korin, ra det longoro a warawai anun o Pol, det nurnur, ma di baptaiso det.

⁹ Ara bung na mirum a Labino i wasiso torom o Pol una tamtama lenri, "Gong u ngara. Ma gong u mana nama wasiso. ¹⁰ Uni an kis tomo nam ui, ma katao in ban laulau ui, uni anung a susut na taro kuri una tamon ri." ¹¹ Ra o Pol i kis tiro iai ara kilalo ma a wonom na kalang, ma i ususer det nama wasiso anun o God.

¹² Una kilalo ra o Galio i mugumugu tagun a gapman tong una papor Akaia, a taro Juda det tur tomo sur det in um o Pol, ma det beni sur in tur una warkurai. ¹³ Ma det takuni lena, "A musano ri i lari sur in pukus a nuknukin a taro sur det in lotu torom o God nama ngasino ra ke elar nama kum warkurai anumet a taro Juda." ¹⁴ Ra o Pol i ling sur in wasiso, o Galio i watungi torom a taro Juda lena, "Mot a taro Juda, ra a utna ri i pami i laulau, ma ke mur a warkurai anun a gapman, in tokodos sur an longoro mot uni. ¹⁵ Ikut, ra mot takuni kut una kum wasiso, ma una kum rising, ma una anumot a kum warkurai ut, i wakak sur mot ut mot in warkurai i. Iau kan warkurai i una kum ngas na utna ri." ¹⁶ Ra i lakro ru det gusun a kinkinis na warkurai. ¹⁷ Ma det rop det pam ukai pas o Sostenes, a mugumugu tagun a rumu na lotu anun a taro Juda, ra det umi umatan a kinkinis na warkurai. Ikut o Galio ke nuk pas a utna ra.

O Pol i milet melet utong o Antiok

¹⁸ Ra o Pol i sa kis suano pasi tong o Korin, i wan gusun det ra det tar tistisino una nurnur, ma i wan utong o Senkria. Tiro iai, di kumur rop ru a iwu na lorino, sur in ese i lena, i sa pam sot pas anun a liliman torom o God. Ra detul nam o Prisila ma o Akuila detul kas una sip utong una papor Siria. ¹⁹ Ra detul sot tong o Epeses, o Pol i wan pas gusun der tiro iai, ra i ruk una rumu na lotu, ma det wasiso tomo nama taro

Juda. ²⁰ Det saringi sur in kis suano lilik pasi tomo nam det, ikut ke mulaot. ²¹ Ra det wan susuaro, i watungi tandet lena, "Ra a nemnem anun o God, an milet melet torom mot." Ra i kas una sip ma i wan gusun a tamon Epeses.

²² Ra i sot tong o Sisaria, i wan usapat o Jerusalem sur in lumu tar a taro na lotu, ra numur i wan utong o Antiok. ²³ Ra i sa kis pas a susut na bung tiro iai, i wan melet pas gusun det. Ra i wan tuptupukus una kum tamon una ru papor Galesia ma o Pirigia, ma i udekdek a nurnur anun a taro na ususer rop.

O Apolos i kis tong o Epeses

²⁴ Ara te Juda tagitong o Aleksanderia, a risano o Apolos, i wanpat tong o Epeses. I ara wakak na tene wasiso, ma i mananos doko una Buk Tabu. ²⁵ Di sa ususer tari una Kisapi anun a Labino, ma i gas doko sur in warawai. I ususer tokodos det un o Iesu, ikut i tasmani kut a baptais anun o Jon. ²⁶ I ruk una rumu na lotu, ra i turpas a wasiso ma ke ngara. Ra o Prisila ma o Akuila der longoro i, der ben pasi, ma der palos wakak a Kisapi anun o God toromi. ²⁷ Ra o Apolos i nem na wan mo utong una papor Akaia, det ra det tar tistisino una nurnur tong o Epeses, det uragot tari, ma det tumtumus torom a taro na ususer tong o Akaia, sur det in gas pasi. Ra i wanpat tong una papor Akaia, i ara wakak na tene warut torom a kum tene nurnur. Det ra det sa nurnur, kibino una marmaris anun o God. ²⁸ I balu dekdek a wasiso anun a taro Juda umatan a taro, ra i ulingmulusi nama wasiso na Buk Tabu lena, o Iesu ut a Karisito.

19

O Pol i kis tong o Epeses

¹ O Apolos i kis tiro o Korin, ra o Pol i usur a kisapi sa usual, ra i wanpat tong o Epeses. Tiro iai i pastorom a ramano taro na ususer. ² Ra i ting det lena, "Pepetlai, a Tokodos na Nion i kis un mot ra mot nurnur?" Ma det balu i lena, "Awu, ka di inanos met una Tokodos na Nion." ³ Ra i ting det lena, "Di baptaiso mot nam asi na ngas na baptais?" Ma det balu i lena, "Nam a baptais anun o Jon." ⁴ Ra o Pol i watungi lena, "O Jon i baptaiso nama baptais na nukpukus. Ma i inanos a taro lena, det in nurnur un o naro ra in nanpat numur tano. I ra o Iesu." ⁵ Ra det sa longoro tar a wasiso anun o Pol, di baptaiso det nama risan a Labino o Iesu. ⁶ Numur o Pol i ubek aru lamano netes un det, ra a Tokodos na Nion i kis mut un det, ma det wasiso nama wur

ngas na wasiso, ma det wasiso na poropet.
⁷ Kutiro a niluluk ina kum musano i elar nama noino ma aru.

⁸ O Pol i ser ruk una rumu na lotu, ma i wasiso nama dekdek ma ke ngara. I lari sur in pukus pas a nuknukin det sur a matanitu anun o God. I pami lenra i elar nama tulu kalang. ⁹ Ikut a balan a ramano taro tagun det i dekdek sakit, ma ka det nem na nurnur, ra det watung laulau a Kisapi anun o Karisito umatan a taro rop. Numur o Pol i wan pas gusun det. I wan sur a rumu na ususer anun o Tiranus, ma a taro na ususer det muri ra det wasiso tomo una kum bung una rumu ra. ¹⁰ Aru kilalo i ser pami lenra. Ra det rop ra det kis una papor Asia, a taro Juda ma a taro ra awu sur a taro Juda kai, det longoro a wasiso anun a Labino.

A wonom mawit na nutnutun o Skewa

¹¹ O Pol i pam a kum dekdek na utna na ukisin nama dekdekin o God. ¹² Ma a taro det los pas anundet a kum du tawol, ma a kum du malu kai, ra det ubek pasi una pinin o Pol. Numur det ubeki una kum misait ra det langolango, ma a kum laulau na nion kai det pirso mut gusun det.

¹³ A ramano kum te Juda, det ser wan tuptupukus una kum tamon, sur det in lakro ru a kum laulau na nion gusun a taro. Ma det lari sur det in lakro ru i kai a kum laulau na nion nama risan o Iesu. Det ser watungi lena, "A lakro ru mot nama risan o Iesu, ra o Pol i ser warawai nami." ¹⁴ Ara musano, a risano o Skewa a te Juda, a labino tene etabor torom o God, a wonom mawit na nutnutunu, det kai det lari sur det in lakro ru a kum laulau na nion nama risan o Iesu. ¹⁵ Ikut a laulau na nion i balu det lena, "A tasmani ut o Iesu, ma a tasmani utkai o Pol. Ikut mot, osi mot?" ¹⁶ Ra a musano ra a laulau na nion kura uni, i sirok bat pas det, ra i um kinkidikin tar det ma i raros ru anundet a kum malu. Ra det kalabor pirso unago upiso nama kum kabo mengmengere mukut.

¹⁷ A wasiso una utna ri, i wanpat torom a taro Juda ma a taro kai ra awu sur a taro Juda ra det kis tong o Epeses, ra det ngara rop, ma det urur sakit una risan a Labino o Iesu. ¹⁸ A susut tagun det ra det nurnur, det wanpat ma det watung puaso anundet a kum sakino petutna. ¹⁹ Ma a susut kai tagun det ra det ser sangsagor, det los tomo pas anundet a kum buk na sangsagor, ra det tun ru det tiro umatan a taro rop. Ra det luk tomo pas a matan a kum buk rop, i elar ut nama limo na noino arip na mani. ²⁰ Ra a wasiso anun a Labino i wan sarara, ra i lubang ma i dekdek.

A purpuruon tong o Epeses

²¹ Ra a kum utna ri i sa rop, o Pol i nuki lena in nan potora una ru papor Masedonia ma o Akaia sur in nan usapat o Jerusalem. Ma i watungi lena, "Ra a sa wan pas sapat o Jerusalem, an nan bulung utong o Rom."

²² I tulu mugu ru o Timoti ma o Erastus, aru tagun det ra det ser waruti, utong o Masedonia, ma i ut, i kis melet pas ut munung tong una papor Asia.

²³ Una kum bung ra, a labino purpuruon i wanpat, uni a taro ka det nem a Kisapi anun a Labino. ²⁴ Ara musano a risano o Dimitrius, a tene pam utna nama silwa. I ser pam a kum natnat na rumu na lotu anun a ino na god anundet, o Artemis, nama silwa. Ma a pinapam ri i pam pat a susut na mani torom o Dimitrius ma anun a taro na pinapam kai. ²⁵ I ben tomo pas anun a taro na pinapam, ma a ramano taro gisen kai ra anundet a pinapam i elar, ma i watungi tandet lena, "A taro, mot tasmani lena, dat ser pam pat a susut na mani tagun a pinapam ri. ²⁶ Nin o Epeses, ma una kum tamon rop nin una papor Asia, a musano ra, o Pol, i pukus a nuknukin a susut na taro, ma i ben raro det, ra i inanos det lena, a kum god ra dat ser pami nama lamandat, awu sur a kum god. ²⁷ Ra a utna ri in nanpat torom dat, awu sur in ban laulau a wakak na risan anundet a pinapam kut, det in nuk unatino pasi kai a rumu na lotu anun a ino na god anundet, o Artemis, ma det in unatino pas a risano. Uniri a taro Asia rop ma a rakrakon bual kai det lotu torom anundet a ino na god, o Artemis."

²⁸ Ra det longoro a wasiso ri, det kankan doko, ma det kukukuk lena, "O Artemis anun a taro Epeses, i labo sakit!" ²⁹ Ma a taro rop tagun a tamon ra det purpuruon. Det kalabor ma det pam ukai pas o Gaius ma o Aristakus, aru te Masedonia ra detul wan tomo nam o Pol, ma det ruk nam der una nundet a labino rumu na kiwung. ³⁰ O Pol i nem na ruk torom a taro, ikut a taro na ususer det turbati. ³¹ Ma a ramano kum mugumugu tagun a gapnam una papor Asia, ra det tar pasano nam o Pol, det pitar ru a wasiso toromi lena, gong i ruk una rumu na kiwung.

³² A kunur na taro det purpuruon. A ramano taro det kukukuk nama ara wasiso ut, ma ara taro det kukukuk nama se wasiso kai. Ma a susut tagun det, ka det tasman asau ra det wanpat suri. ³³ A taro Juda det sugut pat tar o Aleksanda usa numugu tan a kunur na taro. Ma det kukukuk nama wasiso sur in watung asau. Ra o Aleksanda i turbat det nama lamano,

sur det in kis wowowon, sur in wasiso bati ut umatan a taro. ³⁴ Ikut, ra a taro Epeses det sa tasmani lena, o Aleksanda i a te Juda, det kukukuk tomo elar nama ru aua lena, “O Artemis anun a taro Epeses, i labo sakit!”

³⁵ Ra a tene tumtumus anun a tamon ra, i turbat a taro sur det in kis wowowon, ra i watungi lena, “Mot a taro Epeses, osi na tamon kuri ra ke tasmani lena, a taro Epeses det tamtamabat a rumu na lotu anun a labino god Artemis, ma a malalarino kai ra i puku pirso tagisapat una langit?” ³⁶ Katutaio in ipul gusun a kum utna ri, i mo ra i wakak sur mot in mana ma gong mot pam oros tar tu purpuruon. ³⁷ Mot sa ben tar aru musano ri urin, ikut ka der wolong tu utna un tu rumu na lotu, ma ka der watung laulau anundat a ino na god. ³⁸ A kinkinis na warkurai ma a kum tene warkurai kuri ut det. Ra o Dimitrius ma a kum tene pinapam ra det wan tomo nami, det nem na takun taio un tu utna, det in inanos a kinkinis na warkurai nami. ³⁹ Ra tu wasiso na etakun kura utmakai mot nem na wasiso uni, din ukodosi ut una kiwung na tamon. ⁴⁰ Sako din takun dat una purpuruon ra i wanpat una bung ri. Ra asau mo ra dat in wasiso bat dat nami? Uni katu kibino.” ⁴¹ Ra i sa watung len tari ra, i tulu susuaro ru a taro gusun a kiwung.

20

A inawan anun o Pol utong o Troas

¹ Ra i sa rop a purpuruon, o Pol i itula pas a taro na ususer, i udekdek tar det, ma i wasiso na itula taru tandet. Numur i wan utong una papor Masedonia. ² I wan papas una kum tamon ra, ma i uragot tar det nama susut na wakak na wasiso. Numur i wan utong o Grik. ³ I kis tiro iai a tulin kalang. Numur i waninar sur in kas una sip utong una papor Siria, ikut i tasmani lena a kum te Juda det wasiso tomo pas sur det in um doko i. Ra i pukus a nuknukino ma i nuki lena i wakak sur in nan melet epotor una papor Masedonia. ⁴ Ma o Sopata, a te Beria, a nutun o Pairas, ma o Aristakus ma o Sekundas, aru te Tesalonaika, ma o Gaius a te Derbe, ma o Tikikus ma o Tropimus, aru te Asia, ma o Timoti, det wan tomo nam o Pol. ⁵ Det ri det mugu utong, ra det kis langlang met* tong o Troas. ⁶ Ra i sa rop a labino bung na lotu na beret ra kalako is uni, met kas una sip tagitong o Pilipai. A limo na bung bat tari, met sot tong o Troas torom det ra det mugu gusun met, ma met kis pas a wonom mawit na bung tiro iai.

O Pol i ulaun pas o Iutikus

⁷ Una mugano bung una wik, met kis tomo sur met in nangan tomo. Ra o Pol i wasiso torom a taro, ma i walos doko anun a wasiso, tuk ut una labino mirum, uni i nemi sur in nan kut gusun det una bung numur. ⁸ A susut na lam kura una kukur rumu sapat netes ra met kis tomo iai. ⁹ Ra ara barman, a risano o Iutikus, i kis taru una windo. O Pol i wasiso liklik, ra in matan o Iutikus i sunu doko, ma i inep dumun taru, ra i puku pirso tagisapat netes gusun a mantul na kukur rumu unago upiso. Ra det los pat tari, i sa mat. ¹⁰ Ra o Pol i pirso, i inep netes uni, ma i tal pasi, ma i watungi lena, “Gong mot ngara, i sa laun.”

¹¹ Numur o Pol i ka toto melet, i tibik pas a beret ra i wangon. Ma i wasiso tuk in matanas i pusu pat, ra numur i wan pas gusun det. ¹² Ra a taro det wan susuaro, det wan tomo nam o Iutikus, i sa laun, ra det gas doko.

O Pol i wan tagitong o Troas utong o Miletus

¹³ Met mugu, ra met kas una sip utong o Asos sur met in ukas pas o Pol tiro iai. I ut i sa watung len tari ra, uni i nemi sur in usur a kisapi kut. ¹⁴ Ra met etorom nami tong o Asos, met ukas pasi ra met wan utong o Mitilini. ¹⁵ Una bung numur met wan tagitong ra met wan milau ara ailan, a risano o Kios. I waspi kobot melet, ra met wan tiro upaporin o Samos, ra una bung numur melet tano, met sot tong o Miletus. ¹⁶ O Pol i sa pam tari una nuknukino sur in nan sakiti kut o Epeses, sur gong melet mo i balon tong una papor Asia, uni i nemi sur in nan lakit usapat o Jerusalem sur in kis sapat, una bung na Pentikos.

A ururop na wasiso anun o Pol torom a kum mugumugu anun a taro na lotu tong o Epeses

¹⁷ Met wanpat una tamon Miletus, ra o Pol i itula utong o Epeses sur a kum mugumugu anun a taro na lotu. ¹⁸ Ra det wanpat toromi, i watungi tandet lena, “Mot tasmani ut anung a ngas na kinkinis una kum bung ra a kis pas nisamot, turpasi una bung ra a wanpat kibin nin una papor Asia. ¹⁹ A taro Juda det wasiso tomo sur det in pam a kum sakino petutna un iau, ma a taramo a mamaut uni. Ikut, a papam ut torom a Labino, ma a unatino pas iau, ma a lurlur na matang i puku. ²⁰ Ra a ser warawai ma a ususer mot, umatan a taro ma una numot a kum rumu utkai, ka ngara ma ka munu tu utna ra in warut mot. ²¹ A warawai torom a taro rop, a taro Juda ma det ra awu sur a taro Juda kai, sur det in

* **20:5:** O Luk i tumus “met”, uni i wan tomo nam o Pol.

20:17: Ap 18:21

20:18: Ap 18:19

nukpukus torom o God ma det in nurnur una nundat a Labino o Iesu.

²² “Ra uniri, a Tokodos na Nion i ungon-gos iau sur an nan ut usapat o Jerusalem, ma ka tasman asau an etoromi sapat. ²³ A tasmani kut lenri, una kum tamon rop, a Tokodos na Nion i inanos iau lena a karabus ma a kum mamaut det kis pas iau. ²⁴ Ikut ka nuk labo pas anung a nilaun, ma ka maris bati. Awu! A pitar tar iau kut sur an pam sot rop tar anung a inawan ma a pinapam, ra a Labino o Iesu i pitar tari torom iau, sur an wasiso puaso una Wakak na Wasiso una marmaris anun o God.

²⁵ “A tasmani lena mot rop, ra a wan tuptupukus torom mot nama warawai una matanitu anun o God, ka mot in tama melet iau mo. ²⁶ I mo ra uniri, a inanos kapo tar mot lena, ra taio tagun mot in iru una warkurai anun o God, awu sur iau a kibino, iau, a sa langolango. ²⁷ Uni ka ngara ma ka munu tu utna una nuknukin o God. A sa watung rop tari torom mot.

²⁸ “Mot in tamtamabat wakak taru un mot, ma a kum sipsip kai, ra a Tokodos na Nion ut i sa pitar tari torom mot sur mot in tamtamabat det. Mot in tamtamabat a taro na lotu anun o God, ra i sa kul pas det nama gapino ut. ²⁹ A tasmani lena, ra an nan gusun mot, lako taro elar nama kum lomlom na pap ra det ngalngalia, det in ruk torom mot, ma det in ban laulau a kum sipsip. ³⁰ Ma lako taro utkai tagun mot det in tur pat, ma det in pukus a lingmulusino, sur a taro na ususer det in mur det. ³¹ Mot in tumarong! Mot in nuk pasi lena, a tulu kilalo ka mana gusun mot rop nama wasiso na utumarong, una kum mirum ma a waspi, ma a lurlur na matang i puku uni.

³² “Uniri a pitar tar mot ulaman o God, ma a pitar tar mot una nun a wasiso ra i upuaso anun a marmaris. A wasiso ra, i pet lar pasi sur in udekdek mot, ma in tabor mot nama kum wakak na etabor ra o God i ser tabor anun a taro nami. ³³ Ka nuknuk laulau sur tu mani anun taio, o tin namalu anun taio. ³⁴ Mot ut, mot tasmani lena, a papam ut nama aru lamang sur a kum utna ra in topas iau, ma det kai ra met wan tomo. ³⁵ Una kum dekdek na pinapam rop ra a ser pami, a sa ese tar mot lena mot kai mot in pami lenra, ma mot in warut det ra kalako dekdekin det. Ma mot in nuk pas a wasiso anun a Labino o Iesu ra i sa watung tari lena, ‘Det ra det etabor det dan tandet ra det los a kum utna ra di tabor tar det nami.’”

³⁶ Ra i sa watung tar a kum wasiso ri, o Pol tomo nama taro rop det kis butkeke, ma det wararing. ³⁷ Numur det rop det tangis, det tal pas o Pol, ma det gom a papor wano. ³⁸ Ma a taro det tupunuk doko, uni i sa inanos tar det lena ka det in tamtama tomo melet mo. Ra numur det wan tulu ru i sur in kas una sip.

21

A inawan anun o Pol usapat o Jerusalem

¹ Ra met sa wan pas gusun det, met kas una sip ma met wan tokodos utong una ailan Kos. Una bung numur, met wan utong una ailan Rodes, ra tagitiro iai met wan utong o Patara. ² Tiro iai, met pastorum ara sip, ra in nan utong una papor Ponisia. Met kas uni, ra met wan. ³ Met tama a ailan Saipras una papor kair imet, ra met wan sakit ru i. Ra met wan utong una papor Siria, ma met sot tong o Tair, sur din usirok a kum utna tiro iai. ⁴ Ra met etorum pas a taro na ususer, met kis pas tiro iai a wonom mawit na bung. Ma a Tokodos na Nion i unuk tar det nama wasiso sur gong o Pol i wan usapat o Jerusalem. ⁵ Ikut ra a wonom mawit na bung i sa rop, met wan melet, ra a taro na ususer rop det tulu tar met unago utasi, det tomo nam anundet a kum ino ma a kum nutnutun det. Ra met sa wanpat nago utasi, met kis butkeke una usalin, ma met wararing. ⁶ Numur met wasiso na itula pas, ra met kas una sip, ra det, det milet melet sur anundet a kum rumu.

⁷ Met wan tagitong o Tair ra met sot tong o Ptolemiais, ra met etorum pas nam det ra det tar tistisino una nurnur, ra met kis pas ara bung tomo nam det. ⁸ Una bung numur, met wan melet, ra met wanpat tong o Sisaria, ma met kis una rumu anun o Pilip, a tene warawai nama Wakak na Wasiso, ara tagun a wonom mawit det ra a kum aposel det pilok pas det. ⁹ O Pilip a wat na nutnutunu, a wat na toraro, ra det ser wasiso na poropet.

¹⁰ Ra met sa kis tiro o Sisaria a susut na bung, ara poropet, a risano o Agabus, i wanpat. I wan tagisapat una papor Judia. ¹¹ I wan torom met, ra i rakon pas a let anun o Pol, ra i ker pas aru kikinoma aru lamano ut nami, ma i watungi lena, “A Tokodos na Nion i watungi lena, ‘A taro Juda sapat o Jerusalem det in ker a musano ra anun a let ri, lenutri a pami. Ma det in pitar tari una laman a taro ra awu sur a taro Juda.’”

20:23: Ap 9:16; 21:11

20:24: Ap 21:13; 2 Tim 4:7

20:28: 1 Tim 4:16; 1 Pit 5:2-4

20:29: Mt 7:15; Jn 10:12

20:31: 1 Tes 2:11

20:33: 1 Kor 9:11-12

20:34: Ap 18:3; 1 Tes 2:9

21:4: Ap 20:23

21:8: Ap 6:5; 8:40

* 21:8: Tama Aposel 6:1-6.

21:10: Ap 11:28

21:11: Ap 20:23; 21:33

21:13: Ap 20:24

¹² Ra met longoro a wasiso ri, met nama taro tagun a tamon ra, met turbat o Pol sur gong i wan usapat o Jerusalem. ¹³ Ikut o Pol i balu met lena, “Ilai ra mot tangis, ma mot utupunuk iau? A sa pitar tar iau sur det in ker iau ma din um doko iau utkai sapat o Jerusalem, kibino una risan a Labino o Iesu.” ¹⁴ Ra met lagano turturbat tari, met mana mukut, ma met watungi lena, “I wakak sur din pam sot pas a nemnem anun a Labino.”

¹⁵ Ra numur, met waninar pas anu-met a kum ututna, ra met wan usapat o Jerusalem. ¹⁶ Met wan tomo nama ramano taro na ususer tagitong o Sisaria. Det tulu tar met torom ara musano, a risano o Manason, a te Saipras, sur met in kis toromi. I ara tagun a kum mugano taro na ususer.

O Pol kusapat o Jerusalem

¹⁷ Met wanpat sapat o Jerusalem, ra det ra met tar tistisino una nurnur det ben pas met nama gasgas. ¹⁸ Una bung numur, met nam o Pol, met ruk torom o Jems. Ma a kum mugumugu rop anun a taro na lotu kai kura. ¹⁹ O Pol i wasiso na ugaggas pas torom det, ra i inanos wakak det mo nama sau rop ra o God i sa pam tari una pinapam anun o Pol torom det ra awu sur a taro Juda.

²⁰ Ra det longoro i, det watung ulabo pas o God. Ra numur det watungi tan o Pol lena, “Tisimet, u tasmani lena a susut na arip tandat a taro Juda, det sa nurnur, ra det rop det dekdek sur det in mur a Warkurai anun o Moses. ²¹ Det sa longoro a wasiso un ui lena, u ser ususer a taro Juda rop ra det kis nisan a taro ra awu sur a taro Juda, sur gong det mur a Warkurai anun o Moses. Det longoro i lena, u inanos det sur gong det tok talilis a pinin a kum nutnutun det, ma gong det mur a kum petutna anun a taro Juda. ²² Ra asau mo dat in pami, ra det in longoro i lena, u sa wanpat urin? ²³ Un pam a utna ri met in watungi tam: A wat na musano tagun met, det sa liliman taru torom o God. ²⁴ Un nan tomo nam det, ma mot in utalapor mot elar nama Warkurai, ma un kul a kum utna na etabor ra det in etabor nami. Ra numur din kumur rop ru a iwu na lorindet. Ra un pami lenri, a taro rop det in tasmani lena, a kum wasiso ra det sa longoro tari un ui, ke lingmulus, ma ui kai u ser muri ut a Warkurai anun o Moses. ²⁵ Un ra bung dat sa tumus tar a buk torom a kum tene nurnur tagun det ra awu sur a taro Juda, lenri: Gong det wan tu utna ra di sa etabor taru nami torom a kum torotoro na god. Gong det wan tu utna ra ka

di gos wakak a gap gusuni, ma tu wewegua ra di pos doko i kut, ra a gap kura utmakai uni. Ma gong det pam a kum petutna na pamuk.”

²⁶ Una bung numur, o Pol i wan tomo nama wat na musano, ra i utalapor tomo nam det. Numur i ruk una rumu na etabor, ra i watung puaso tar a bung ra a pinapam na utalapor in rop, ma din tun a etabor anundet taktakai uni.

Di pam ukai pas o Pol una rumu na etabor

²⁷ Ra milau a wonom mawit na bung na utalapor in rop, a ramano taro Juda tagitong una papor Asia, det tama pas o Pol ubalan in noworo ina rumu na etabor. Ma det usungun balan a taro sur det in kankan torom o Pol ra det pam ukai pasi. ²⁸ Ma det kukukuk lena, “A taro Israel, mot in warut met. A musano ri, i ususer a taro rop una rakrakon bual sur det in nget dat, ma a Warkurai anun o Moses, ma a rumu na etabor. Ma i sa ben ruk pasi kai a taro ra awu sur a taro Juda urin una rumu na etabor, ma i sa udur ru a rumu ri anun o God.” ²⁹ Det watungi lenri, uni numugu ut munung, det sa tama tar der nam o Tropimus, a te Epeses, tiro una tamon, ma det nuki lena o Pol i ben ruk pasi una rumu na etabor.

³⁰ Ma a taro rop det purpuruon ra det kalabor tomo, ma det pam ukai pas o Pol, ra det dat pirso pasi tagun in noworo ina rumu na etabor. Uniuira det tagar ru i mut a kum matansako. ³¹ Milau mukut det in um doko o Pol, a wasiso i wan sur a labino mugumugu anun a taro na inaim tagitong o Rom, lena a taro Jerusalem rop det sa purpuruon. ³² Uniuira i ben tomo pas a taro na inaim ma anundet a kum mugumugu kai, ma det kalabor pirso torom det. Ra a taro det tama a labino mugumugu ma a taro na inaim, det mana nama inaim gusun o Pol. ³³ A labino mugumugu i wan torom o Pol, ma i dat pasi, ra i itula sur din ker ukai i nama ru sen. Ma i iting lena, “Osi na musano ri? Asau ra i pam raro tari?” ³⁴ A ramano taro tagun a kunur na taro det watung ara wasiso, ma ara taro kai det watung ara wasiso gisen. Ra a labino mugumugu i itula sur din ben pas o Pol utiro una rumu anun a taro na inaim, uni, ke talapor lar pas una kibin a labino purpuruon ra. ³⁵ Ra o Pol i wanpat nisan a leta ina rumu, a taro na inaim det los pasi, uni a kunur na taro det balano sungun doko. ³⁶ Ma a kunur na taro ra det mur det, ka det mana nama kukukuk lena, “Sak doko i!”

O Pol i wasiso torom a taro

³⁷ Ra milau mo det in ruk nam o Pol una rumu anun a taro na inaim, i ting a labino mugumugu lena, "I wakak kut sur an watung tu utna tam?" Ra a labino mugumugu i tingi lena, "Ai, u tasmani ut a wasiso Grik?" ³⁸ A len makai ui a te Ijip, ra numugu i turpas a inaim tomo nama gapman, ra i ben pas a wat na arip na tene pam purpuruon, usapat una nubual kalako taro uni." ³⁹ Ma o Pol i balu i lena, "Iau a te Juda tagitong o Tasus, una papor Silisia, awu sur iau tagitiro un tu tamon oros kut. A saring ui, sur un mulaot iau sur an wasiso torom a taro ri." ⁴⁰ Ra a labino mugumugu i mulaot tari, o Pol i tur una leta ina rumu, ra i turbat a taro nama lamano. Ra det sa tur wowon, i wasiso tandet nama wasiso Ibru lena,

22

¹ "A kum tistising, ma a kum tamtamang, mot in longoro a wasiso ra an wasiso bat iau nami."

² Ra det longoro i ra i wasiso nama wasiso Ibru torom det, det tur wowon rop. Ra i watungi lena, ³ "Iau a te Juda, di usus iau tong o Tasus una papor Silisia. A barman taru ut nin o Jerusalem, ma iau a nat na ususer anun o Gamaliel, ma i ususer wakak iau una Warkurai anun a kum tumtubun dat tagun numugu, ma a papam dekdek torom o God lenutri mot pami. ⁴ A ban laulau a taro ra det mur a Kisapi anun a Labino. A um doko a ramano taro, ma a ramano taro kai a dat pas det, a kum musano ma a wardain utkai, ra a uruk tar det una karabus. ⁵ A mugumugu na tene etabor torom o God ma a taro na kiwung rop det talapor una kum utna ri, ma det pet lar pasi sur det in wasiso uni. A los pas a kum pas gusun det ra det tumusi torom a kum tistisin det a kum te Juda tong o Damaskus. Ra a wan utong sur an ker pas a taro ra det mur a Kisapi anun a Labino, ma an ben det usapat o Jerusalem sur din ukadik det.

O Pol i wasiso talapor una nun a bung na nukpukus

(Ap 9:1-19; 26:12-18)

⁶ "Ra a wan milau nanan o Damaskus, una labino suan, a labino talapor tagisapat una langit i wanpat kisin ma i sisio talilis pas iau. ⁷ Ma a puku pirso una piso, ra a longoro in nalngan ara i watungi tang lena, "Sol, Sol, sur asau ra u ser ban laulau iau?" ⁸ Ma a tingi lena, "Labino, osi ui?" Ma i balu iau lena, "Iau o Iesu, a te Nasaret, ra u ser ban laulau iau." ⁹ Ra a taro ra met

wan tomo, det tama a talapor, ikut ka det longoro in nalngan ara ra i wasiso torom iau. ¹⁰ Ma a tingi lena, "Labino, asau ra an pami?" Ra a Labino i balu iau lena, "Un katuttur ma un nan utiro una tamon Damaskus, ra din inanos ui nama sau ra un pami." ¹¹ Det ra met wan tomo, det pam benben tar iau mukut utiro o Damaskus, uni a dekdekin a talapor i upulu iau.

¹² "Ara musano, a risano o Ananias, i ara lingmulus na tene lotu ra i ser mur a kum Warkurai anun o Moses, ma a taro Juda rop ra det kis tiro iai, det ser ru i. I wanpat torom iau, ¹³ ra i tur milau iau, ma i watungi tang lena, "Sol, a tising, un tamtama melet." Ra una du bung ut ra, arin matang i tamtama melet ra a tama o Ananias. ¹⁴ Ra o Ananias i watungi tang lena, "O God anun anundat a kabotaro tagun numugu i sa pilok tar ui, sur un tasman anun a nemnem, ma un tama a Tene Tokodos, ma un longoro anun a wasiso. ¹⁵ Ma ui, un ser wasiso puaso torom a taro rop un asau ra u sa tama tari, ma u sa longoro tari kai. ¹⁶ Ra sau mo ra u kis pasi? Un tur, ma din baptaiso ui, ma una risano, un wararing sur din unus ru anum a kum sakino petutna."

A kakabo torom o Pol sur in warawai torom a taro ra awu sur a taro Juda

¹⁷⁻¹⁸ "Ra a milet melet usapat o Jerusalem, ma a wararing una rumu na etabor, a tama a Labino una tamtama, ra i watungi torom iau lena, "Un tur ma un nan lakit taginin o Jerusalem, uni ka det in longoro a wasiso puaso anumi un iau." ¹⁹ Ma a watungi tano lena, "Labino, det tasmani lena a ser ruk una kum rumu na lotu rop ma a ser dat pas det ra det nurnun un ui ra a ser uruk tar det una karabus, ma a ser miras det. ²⁰ Ra di duku doko o Stiwen, i ra i ser wasiso puaso un ui, iau kai a tur ut tiro iai. A mulaot tomo nam det, ma a tamtamabat a kum saket anundet ra det duku doko i." ²¹ Ikut a Labino i watungi torom iau lena, "Un nan, an tulu bakbak ru ui utong torom a taro ra awu sur a taro Juda."

²² A taro det longoro a wasiso anun o Pol tuk ut una wasiso ri. Numur det kukukuk nama labino walngandek lena, "Din um doko ru i! Din lakro ru i gusun a rakrakon bual. Ke sot sur in laun." ²³ Ra det kukukuk, det rakon ru anundet a kum saket, ma det woro sarara a kubus usapat netes. ²⁴ Ma a labino mugumugu i pitar a warkurai lena, din ben o Pol utiro una rumu anun a kum tene inaim, din mirasi ma din tingi sur din tasman asau a kibino ra det kukukuk lenra uni. ²⁵ Ra det ker tari nama kum sen

sur det in mirasi, o Pol i watungi torom a mugumugu anun a kum tene inaim ra i tur milau i lena, "Pepetlai, i tokodos kut sur din miras tu te Rom, ra ka di warkurai i utmakai?"

²⁶ Ra a mugumugu anun a taro na inaim i longoro i, i wan torom anun a mugumugu, ra i watungi tano lena, "Asau ra u nem na pami? A musano ri a te Rom." ²⁷ Ra a labino mugumugu i wan torom o Pol ra i tingi lena, "Ai, inanos iau. Ui a te Rom?" Ra i balu i lena, "Ma! Iau a te Rom." ²⁸ Ma a labino mugumugu i watungi lena, "Iau a ikul nama labino mani sur an nanpat a te Rom." Ra o Pol i balu i lena, "Iau awu. Di usus iau, a te Rom ut." ²⁹ Ma det, ra det nem na tingi, uniutra det wan susuaro mut gusuni. Ra a labino mugumugu i tasmani lena o Pol a te Rom, i ngara, uni i ker tari nama sen.

O Pol i tur umatan a taro na kiwung

³⁰ Una bung numur, a labino mugumugu i nemi sur in mananos wakak pas una utna ra a taro Juda det takun o Pol nami. Ra i palos ru a kum sen, i itula sur a kum lamlabino tene etabor torom o God, ma a taro na kiwung rop kai, sur det in nan tomo. Ra i ben pirso pas o Pol, ra i utur tari sa numugu umatandet.

23

¹ O Pol i tamtama tokodos torom a taro na kiwung, ra i watungi lena, "A kum tistising, tuk una bung ri, anung a nilaun i talapor umatan o God, ma in balang ke takun iau un tu utna." ² Uniutra o Ananias* a mugumugu na tene etabor torom o God, i tulu det ra det tur milau o Pol sur det in pasor a wano. ³ Ra o Pol i watungi tano lena, "O God in pasor ui, ui u elar nama papor rumu ra di pen tari nama kabang, ikut tiro ubalano i laulau rop. U kis sur un warkurai iau elar nama wasiso na Warkurai, ikut ui ut u lakai a Warkurai ra u itula sur din pasor iau." ⁴ Det ra det tur milau i det watungi lena, "Pepetlai, u nemi sur un watung laulau a mugumugu na tene etabor torom o God?" ⁵ Ra o Pol i balu det lena, "A kum tistising, ka tasmani lena, i a mugumugu na tene etabor torom o God, uni di sa tumus tari una Buk Tabu lena, 'Gong u watung laulau tu mugumugu anun anum a taro.'" *Kis 22:28*

⁶ O Pol i tasmani lena, a ramano taro tagun det, a kum Sadusi, ma ara taro kai a kum Parisi, ra i kakabo una kiwung lena, "A kum tistising, iau a Parisi, ma a nutun a Parisi. Uniri di takun iau uni a kis langlang

nama nurnur una katkatutur melet anun a kum minat." ⁷ Ra i sa watung len tari ra, a kum Parisi ma a kum Sadusi det turpas a wasiso na kankan, ra a taro na kiwung det tapagol. ⁸ Uni a kum Sadusi det nurnur lena katu nilaun melet gusun a minat, ma kalako ensel, ma kalako nion, ikut a kum Parisi det nurnur un detul rop. ⁹ Ra a labino purpuruon i turpasi, a ramano kum Parisi, det ra a kum tene ususer tagun a Warkurai, det tur, ma det engaras dekdek, ma det watungi lena, "Ka met sio pas tu sakino utna ra a musano ri i raro uni. Dat in lai mo? Sako det in dat ngagos tar o Pol. Ra i tulu ru a taro na inaim, sur det in nan ma det in dat pasi gusun a taro, ma det in ben pasi utiro una rumu anun a taro na inaim.

¹¹ Una mirum utra, a Labino i wanpat torom o Pol, ra i watungi tano lena, "Gong u ngara, un tur dekdek. U sa wasiso talapor taru un iau nin o Jerusalem, lenkutkai ra un wasiso talapor un iau tong o Rom."

Det epak sur det in um doko o Pol

¹²⁻¹³ Una bung palu una kobot, a ramano kum te Juda, elar nama wat na noino ma i puku, det wasiso tomo pas ra det liliman lena, ka det in nangon, ma ka det in inum, tuk ut ra det sa um doko tar o Pol. ¹⁴ Det wan torom a kum lamlabino tene etabor torom o God, ma a kum mugumugu na lotu, ra det watungi lena, "Met sa liliman taru sur ka met in nan tu utna tuk ut ra met sa um doko ru tar o Pol. ¹⁵ Met nemi sur mot tomo nama taro na kiwung, mot in pitar ru tu wasiso torom a labino mugumugu anun a kum tene inaim ma mot in toro pas o Pol gusuni, sur in tulu ru i torom mot. Mot in watungi lena mot nem na longoro tu wasiso talapor melet tano. Ra met, met sa waninar sur met in um doko ru i kut una kisapi ra kabaut i wanpat torom mot."

¹⁶ Ikut a laban o Pol i longoro a wasiso na epak ri, ra i wan utiro una rumu anun a kum tene inaim, ra i inanos o Pol uni. ¹⁷ Numur o Pol i kabo pas ara mugumugu anun a kum tene inaim, ma i watungi tano lena, "Un ben a barman ri torom anumot a labino mugumugu, uni i nem na inanos nam ara wasiso." ¹⁸ Ra i ben pati torom a labino mugumugu, ra i watungi lena, "O Pol, o naro ra di ukarabusi, i kabo pas iau toromi, ra i saring iau sur an ben tar a barman ri torom ui, sur in inanos ui nam ara wasiso." ¹⁹ A labino mugumugu i pam

22:29: Ap 16:38 **23:2:** Jn 18:22-23 * **23:2:** O Ananias ri, i a mugumugu na tene etabor torom o God, awu sur o Ananias ra i utamtama pas o Pol. **23:3:** Mt 23:27 **23:6:** Ap 26:5 **23:8:** Mt 22:23 **23:11:** Ap 27:24; 28:16, 23 **23:15:** Ap 25:3

pas a laman a barman, ra i ben eno pasi, ra i tingi lena, "Asau ra u nemi sur un watungi tang?" ²⁰ Ra i watungi lena, "A taro Juda det sa epak pas sur det in toro pas o Pol gusun ui, sur un tulu ru i markan torom a taro na kiwung, sur det in longoro tu wasiso talapor melet tano. ²¹ Gong u longoro det, uni a wat na noino ma i puku na taro det sa parau taru suri. Uni det sa liliman taru lena, ka det in nangon ma ka det in inum, tuk ut ra det sa um doko ru tar o Pol. Ra uniri det kis langlang sur anum tu nimulaot." ²² Ra a labino mugumugu i turbati lena, "Gong u inanos tar taio lena u sa inanos tar iau una utna ri." Ra numur i tulu ru i.

Di ben pas o Pol torom o Peliks

²³ A labino mugumugu anun a kum tene inaim i kabo pas aru mugumugu toromi ra i watungi lena, "Mur in waninar aru mar na tene inaim, ma a wonom mawit na noino tene inaim ra det kas una kum os, ma aru mar na tene inaim ra det los a kum bele, ma mot in nan una lisu na du bung miri una mirum utong o Sisaria. ²⁴ Mur in ben lako ru os, sur o Pol in nan nami. Mot in tamtamabat wakaki tuk mot in nanpat nami torom o Peliks, a labino mugumugu tagun a gapman." ²⁵ Ra i tumus tar a pas lenri toromi:

²⁶ Iau o Klodius Lisias, a tumtumus torom ui o Peliks a labino mugumugu tagun a gapman.

A marmaris torom ui.

²⁷ A musano ri, ra a tulu ru i torom ui, a kum taro Juda det pam ukai pasi, ma milau det in um doko i. Ikut met nama kum tene inaim, met wanpat, ma met ulaun pasi, uni a sa tasman tari lena i a te Rom. ²⁸ A nemi sur an tasman asau a kibino ra di takuni, ra a beni torom anundet a taro na kiwung. ²⁹ Uniri a sa talapor lena, di takun orosi kut una nundet a kum warkurai tagun a lotu, ma ke pam tu sakino utna ra in karabus uni, o din um doko i uni. ³⁰ Ikut, ra di inanos iau lena det sa epak sur a musano ri, sur det in um doko i, a tulu lakit ru i torom ui. Ma a taro ra det takuni, a sa inanos tar det lena, det in nan torom ui nama nundet a etakun uni. I kut ra, ma i rop.

³¹ Ra a taro na inaim det ben pas o Pol una mirum utong o Antipatris, lenutra di sa watung tari tandet. ³² Ra una bung numur, a taro na inaim ra det kas una kum os, det wan saksakit nam o Pol, ma ara

taro na inaim kai det milet melet usapat o Jerusalem. ³³ Ra det wanpat tiro o Sisaria, det pitar tar a pas torom o Peliks, a labino mugumugu tagun a gapman, ra det pitar tar o Pol toromi. ³⁴ O Peliks i luk tar a pas, ra i ting o Pol lena, "Ui tagun osi na papor?" Ra i sa tasmani lena o Pol a te Silisia, ³⁵ i watungi lena, "Una bung ra a taro ra det takun ui det in nanpat nin, an longoro i maragom anum a wasiso." Ra i itula sur din tamtamabat o Pol una rumu anun o Erod.

24

A taro Juda det takun o Pol

¹ Ra i sa rop a limo na bung, o Ananias, a mugumugu na tene etabor torom o God ma a ramano kum mugumugu na lotu, ma o Tetulas, a tene mananos tagun a kum warkurai, det wanpat tong o Sisaria, ra det inanos o Peliks a labino mugumugu tagun a gapman una nundet a kum etakun un o Pol. ² Ra di sa kabo pas o Pol, o Tetulas i turpas a wasiso torom o Peliks lena,

"Labino, met kis suano i una molmol utuntudu im. Una kum wakak na nuknukim, u ukodos a susut na utna sur anumet a kinkinis in wakak una nundet a papor. ³ Met nama taro tagun a kum tamon rop, met gas doko nama num a kum warkurai ma met watung wakak sakit torom ui. ⁴ Ikut kan wasiso suano i, sako a pinim in ngoro. A saring ui sur un maris met ma un longoro anumet tu nat na wasiso.

⁵ "Met tama i lena a musano ri a tene pam purpuruon, i ser turpas a kum purpuruon epotor torom a taro Juda una rakrakon bual rop. Ma i a mugumugu tagun ara tororo na lotu di watungi nama lotu Nasaret. ⁶⁻⁸ Ma i nemi sur in ban udur a rumu na etabor sur in dur umatan o God. Ikut met pam ukai pasi. Ui ut un ting o Pol, sur un tasman a lingmulusino tano, una kum utna ri met takuni nami."* ⁹ Numur a ramano taro Juda kai det warut una etakun, det watungi lena, a kum wasiso ri i lingmulus ut.

O Pol i wasiso talapor umatan o Peliks

¹⁰ O Peliks, a labino mugumugu tagun a gapman, i pikmato o Pol sur in wasiso, ra o Pol i watungi lena, "A gas sur an wasiso batbat iau, uni a tasmani lena u sa tene warkurai a susut na kilalo torom met a taro Juda. ¹¹ Ra un ting a taro, un tasmani lena, a noino ma ru bung bat iau kut, ra a wan

23:27: Ap 21:30-33; 22:25-27

23:28: Ap 22:30

23:30: Ap 24:5-8

24:5: Ap 17:6

24:6-8: Ap 21:28-30

* 24:6-8: Una ramano kum du buk una wasiso Grik, a ramano kum wasiso kai i kis una vers ri. I lenri: *Ma met nemi sur met in warkurai i elar nama numet a Warkurai. Ikut o Lisias a labino mugumugu anun a kum tene inaim i ruk ra i dat gisen pasi gusun a lamamet nama dekdek. Ra i itula sur met ra met takun a musano ri, sur met in nan torom ui ma met in tur umatam ma met in inanos ui.*

usapat o Jerusalem, sur an lotu. ¹² Ma det ra det takun iau, ka det tama tar iau ra mir in engaras nam taio ubalan in noworo ina rumu na etabor, ma ka det tama tar iau kai ra an upurpuruon a kunur na taro una kum rumu na lotu, o una balano tamon. ¹³ Ma ka det in ulingmulus lar pas anundet a kum etakun una kum utna ri ra det takun iau nami.

¹⁴ “Ikut uniri an inanos talapor ui lena, a ser mur a Kisapi anun o Karisito, ra det watungi nama torotoro na lotu. Una kisapi ri, a lotu ut torom o God anun a kum tumtubu met tagun numugu, ma a nurnur una kum utna rop ra di sa tumus tari una Warkurai anun o Moses ma una kum buk anun a kum poropet. ¹⁵ Anung a nurnur un o God i elar nama taro ri. Iau kai a kis langlang nama nurnur lena o God in ukatutur melet pas a wakak na taro ma a laulau na taro gusun a minat. ¹⁶ Lenkutkai ra, a dekdek doko sur anung a nilaun in tokodos umatan o God, ma umatan a taro kai.

¹⁷ “A kabano kilalo, a kis gisen gusun o Jerusalem, ra numur a milet melet usapat sur an los tar a mani na etabor torom anung a taro ra det siblo, ma sur an pitari kai a kum wewegua sur din tun det elar nama etabor torom o God. ¹⁸ Numugu ra ka ruk utmakai ubalan in noworo ina rumu na etabor, a sa pam rop tar a kum warkurai sur an talapor umatan o God. Ra a ruk sur an pam a pinapam na etabor, ka det pastorom iau nam lako susut na taro, ma ka pam tu purpuruon kai. ¹⁹ Ikut a ramano taro Juda tagitong una papor Asia, det kis una rumu na etabor una bung ra di pam ukai pas iau. Ra tu utna din takun iau nami, in wakak sur det ut det in nan urin ma det in takun iau umatam. ²⁰ Ma i wakak sur det ra kuri det, det in watung tu sakino ra det sa sio pasi un iau, ra a tur umatan a taro na kiwung sapat o Jerusalem. ²¹ Kutiro, det takun iau una nung ara wasiso kut. Ra a tur umatandet, a kakabo lena, ‘A tur una warkurai umatamot uniri, uni a nurnur una nilaun melet gusun a minat.’”

²² O Peliks i talapor wakak ut una lotu ri di watungi nama Kisapi anun o Karisito, ra i umana tar a warkurai munung, ma i watungi lena, “Ra o Lisias, a labino mugumugu anun a taro na inaim in nanpat, an ubeki maragom a warkurai una etakun ri.” ²³ Ra i inanos a mugumugu anun a kum tene inaim lena, “O Pol in kis na karabus una num a warkurai. Un tamtamabati nama marmaris, ma gong u turbat a kum paspasano sur det in waruti.”

O Pol i wasiso torom o Peliks ma o Darusila

²⁴ A kabano bung bat tari, o Peliks i wanpat melet, der nama nun a ino o Darusila, a ino Juda. O Peliks i itula sur o Pol, ra i longoro anun a wasiso una nurnur un o Karisito Iesu. ²⁵ O Pol i wasiso una tokodos na petutna, ma una petutna ra taio in tamtamabat wakak anun a nilaun, ma una bung na warkurai kai anun o God ra numur in nanpat, ra o Peliks i ngara, ra i watungi lena, “Pol, un nan munung. Un tu bung ra an langolango, an itula melet sur ui.” ²⁶ Ra i ititula liklik suri, ra der ser wasiso tomo, uni i nemi utkai lena o Pol in ukodosi nam tu mani, sur in palos ru i.

²⁷ Ra aru kilalo i sa rop, o Posius Pestus i keles ru o Peliks. Ikut o Peliks ke palos ru o Pol, uni i nemi sur in ugargas a taro Juda.

25

O Pol i tur umatan o Pestus

¹ Ra o Pestus i sa wanpat tiro o Sisaria una papor ra in warkurai iai, i kis pas kut a tulu bung, ra numur i wan usapat o Jerusalem. ² A kum lamlabino tene etabor torom o God ma a kum mugumugu anun a taro Juda sapat o Jerusalem, det inanos nama etakun un o Pol. ³ Ra det saring o Pestus sur in mulaot tandet, ma det watungi lena, “Un maris met, ma un tulu ru o Pol urin o Jerusalem.” Uni det sa epak pas sur det in um doko i kut epotor una nun a inawan. ⁴ Ikut o Pestus i balu det lena, “O Pol kurong ut i kis tong o Sisaria, ma iau kai milau sur an milet melet utong. ⁵ I wakak sur lako kum mugumugu tagun mot, det in nan tomo nam iau utong. Ma ra tu utna a musano ra in raro uni, det in takuni nami tong.”

⁶ Ra o Pestus i sa kis tomo pas nam det a tiwal na bung, o a noino bung, i milet melet utong o Sisaria. Una bung numur, i turpasi sur in pam a warkurai, ra i itula sur din ben o Pol toromi. ⁷ Ra o Pol i sa wanpat, a taro Juda tagisapat o Jerusalem det tur talilis pasi, ma det takuni nama susut na maut na etakun, ikut ka det watung tu utna sur in ulingmulus anundet a kum etakun uni. ⁸ Ra o Pol i wasiso batbati ut lena, “Ka pam tu niraro una Warkurai anun a taro Juda, o una rumu na etabor, o torom a Sisa.”

⁹ O Pestus i nemi sur in ugargas a taro Juda, ra i ting o Pol lena, “Pepetlai, un mulaot kut sur un nan usapat o Jerusalem, ma un tur una warkurai una kum etakun ri un ui sapat?” ¹⁰ Ra o Pol i balu i lena, “Uniri a tur una warkurai anun a Sisa, i tokodos ut sur din warkurai iau nin. Ka

pam tu niraro torom a taro Juda, ui kai u sa tasman tari. ¹¹ Ra a sa pam tar a sakino ra i tokodos sur an iru uni, i wakak kut sur an iru. Ikut ra a kum utna ri det takun iau nami ke lingmulus, ke tokodos sur din pitar tar iau tandet. A sasaring sur a Sisa ut in longoro a warkurai anung.” ¹² Ra o Pestus i sa wasiso pas nam anun a kum tene mananos, i inanos o Pol lena, “Uniri u sasaring sur un nan torom a Sisa, ra an tulu ru ui utong o Rom torom a Sisa.”

O Agripa ma o Benaisi der nem na longoro o Pol

¹³ Ra i sa rop a kabano bung, a King Agripa der nama bunu ano, o Benaisi, der wanpat tong o Sisaria, ra der wasiso na ugasgas pas o Pestus una nun a kinkinis na mugumugu. ¹⁴ Ra der kis a susut na bung tiro iai, o Pestus i inanos a king nama wasiso un o Pol lena, “O Peliks i sa mana gusun anun a pinapam, ikut i madek tar ara musano una karabus, ra kuri utmakai i una karabus. ¹⁵ Ra a kis sapat o Jerusalem, a kum lamlabino tene etabor torom o God ma a kum mugumugu anun a taro Juda det inanos iau nama kum etakun uni, ra det saring iau sur an warkurai i sur din um doko i. ¹⁶ A inanos det lena, ‘Awu sur a ngasino anun a taro Rom, sur din pitar tar tu musano sur din warkurai i sur in mat, ra kabaut i tur tomo nam det ra det takuni, sur in wasiso bati ut gusun a kum etakun.’

¹⁷ “Ra det wanpat tong mo nin, ka balbalon nama warkurai. Ara bung kut numur, a kis una kiskis na warkurai, ra a itula sur din ben pas a musano ra. ¹⁸ A taro na etakun det tur sur det in wasiso, ikut awu sur det takuni nam tu sakino utna, elar nama sau ra a nuki. ¹⁹ Det takuni kut una kum utna tagun anundet a ngas na lotu, ma una ara musano, a risano o Iesu ra i mat, ra o Pol i watungi lena i sa laun melet. ²⁰ Ka talapor ma ka tasmani ra an iting pepetlai una kum utna ri. Ra a tingi sur in nan usapat o Jerusalem ma din warkurai i una kum etakun ra, sapat. ²¹ Ikut, o Pol i sasaring sur a Sisa in warkurai i, ra a itula sur in kis munung nin una karabus, tuk una bung ra an tulu ru i utong o Rom torom a Sisa.” ²² Ma o Agripa i watungi tan o Pestus lena, “Iau kai, a nem na longoro a musano ri.” Ra o Pestus i watungi lena, “Markan un longoro i.”

²³ Una bung numur, o Agripa ma o Benaisi der wanpat. Di mar der nama ngas na ememar anun a kum lamlabino. Det ruk tomo nama kum mugumugu anun a taro na inaim, ma a kum mugumugu tagun a tamon ra. Numur o Pestus i itula sur o Pol,

ma di ben pasi. ²⁴ Ma o Pestus i watungi lena, “King Agripa, ma mot kai a taro ra dat kis tomo nin, mot tama a musano ri. A taro Juda rop tagisapat o Jerusalem ma nin kai det saring iau sur an warkurai i, ra det kukukuk lena ka det nemi sur in laun melet mo. ²⁵ Ikut ka pastorum tu utna ra din um doko i uni. Ikut i sasaring sur a Sisa in warkurai i, ra a nuki lena an tulu i utong o Rom torom a Sisa. ²⁶ Ka tasman mulus tu utna ra an tumus ukai i uni, torom a Sisa. I mo ra a ben pati torom mot rop, ma torom ui, King Agripa, sur dat in ting tari sur an tasman asau ra an tumusi. ²⁷ Uni a nuki lena ke tokodos sur an tulu tu karabus torom a Sisa, ma ka di tumus ukai asau ra di takuni nami.”

26

O Pol i wasiso talapor umatan a King Agripa

¹ O Agripa i watungi tan o Pol lena, “A mulaot ui sur un wasiso talapor una kum etakun un ui.” Ra o Pol i kodos a lamano ra i turpasi sur in wasiso bati ut lena, ² “King Agripa, a gas doko sur an tur umatan ra an wasiso bat iau una kum utna rop ra a taro Juda det takun iau nami. ³ Uni ui a tene mananos tagun a kum ngasino anun a taro Juda, ma tagun a kum utna kai ra det ser wasiso to i. I mo ra a saring ui sur un kis wowowon ma un longoro iau.

⁴ “A taro Juda rop det tasman anung a ngas na nilaun, turpasi utmakai ra a natlik, ra a kis una nung a tamon, ma sapat utkai o Jerusalem. ⁵ Det tasman iau tagun numugu, ma ra det nemi, det ut det in wasiso talapor un iau lena a muri ut a ngasino anun a kum Parisi. Met ara kabotaro tagun a taro Juda ra met mur sot rop pas a kum Warkurai tagun anumet a lotu. ⁶ Ra uniri a tur una warkurai, uni a kis langlang nama nurnur sur a liliman ra o God i pam tari torom a kum tumtubu met tagun numugu. ⁷ Anumet a noino ma aru kabotaro, det kis langlang nama nurnur sur din pam sot pas a liliman ra torom det, ra det ser lotu torom o God una kum mirum ma a waspi rop. King, a taro Juda det takun iau, uni a nurnur ut una liliman ra. ⁸ Sur asau ra mot ri mot nuki lena o God ken pet lar pasi sur in ukatutur melet a kum minat?

⁹ “Iau kai numugu, a nuki ut lena i wakak sur an lar rop a kum kisapi sur an turbat a risan o Iesu, a te Nasaret. ¹⁰ A pam a pinapam ri sapat o Jerusalem. A wan nama warkurai anun a kum lamlabino tene etabor torom o God, ma a uruk a susut na tene nurnur una karabus. Ra din um doko det, iau kai, a mulaot sur det in mat.

¹¹ A susut na dino a ruk una kum rumu na lotu sur an ukadik det, ma a ser ungonos det sur det in wasiso laulau un o Iesu. A ser kankan dekdek torom det, ra a ser wan una ramano kum tamon gisen, sur an sio pas det ma an ukadik det.

O Pol i wasiso talapor una nun a bung na nukpukus

(Ap 9:1-19; 22:6-16)

¹² “Una nung ara inawan melet una nung a pinapam ra, a wan utong o Damaskus, nama warkurai anun a kum lamlabino tene etabor torom o God nama nimulaot anundeti. ¹³ King, una labino suan, ra a wan una kisapi, a tama pas a tarai na talapor tagisapat una langit. I sisio doko tan a talapor ina in nusunan, ma i sisio talilis pas iau tomo nam det ra met wan tomo. ¹⁴ Ra met rop met sa puku pirso una piso, a longoro in nalngan ara i wasiso torom iau nama wasiso Ibru lena, ‘Sol, Sol, sur asau ra u ser ban laulau iau? Ui ut u um pas ui nama kum ukadik ra u pami un iau.’ ¹⁵ Ra a tingi lena, ‘Labino, osi ui?’ Ma i balu iau lena, ‘Iau o Iesu, ra u ser ban laulau iau. ¹⁶ Un katuttur ma un tur. A wanpat torom ui, uni a sa pilok pas ui, sur un pam anung a pinapam ma un wasiso talapor una kum utna ra u sa tama tari un iau, ma una kum utna kai ra an ese i tam. ¹⁷ Ma an ulaun ui gusun a kabotaro anum, ma gusun a taro kai ra awu sur a taro Juda, ra an tulu ui torom det. ¹⁸ Un utamtama det sur det in tupukus gusun a dumirum sur a talapor, ma gusun a dekdekin o Satan sur o God, sur din unun ru anundet a kum sakino petutna. Det in nurnur un iau, ma una nundet a nurnur, det in kis tomo nam det ra o God i sa pilok pas det sur anun a taro.’

O Pol i wasiso talapor una nun a pinapam

¹⁹ “King Agripa, ka rosumur gusun a tamtama ra tagisapat una langit. ²⁰ A warawai mugu torom a taro tong o Damaskus, ma numur sapat o Jerusalem ma una kum tamon una papor Judia rop, ra numur torom det kai ra awu sur a taro Juda. A warawai lena, det in nukpukus, ma det in tupukus torom o God, ma det in pam a kum pinapam, sur in ese i lena det sa nukpukus. ²¹ Iri a kibino ra a taro Juda det pam ukai pas iau ubalan in noworo ina rumu na etabor, ma det nemi sur det in um doko iau. ²² Ikut, tuk uniri, o God i warut iau, ra a tur nin umatam ra a wasiso talapor torom a taro oros kut, ma a kum lamlabino kai. Ka watung tu matok na utna, a wasiso kut una utna ra o Moses ma a kum poropet det sa

watung tari ra in nanpat. ²³ Det sa watung tari lena o Karisito in mat, ma i a mugano musano ra in laun melet gusun a minat, ma in wasiso puaso una talapor torom a taro Juda ma torom a taro gisen kai.”

²⁴ Ra kura utmakai i wasiso batbati, o Pestus i kukuk dekdek toromi lena, “Pol, u sa longlong. Anum a labino etowo i sa ban longlong pas ui.” ²⁵ O Pol i watungi lena, “Pestus, ui a labino, ka longlong. Anung a wasiso i lingmulus ma i pitar a kukuraino. ²⁶ A king i tasmani ut a kum utna ri, ra a langolango sur an wasiso uni. Uni a tasmani lena katu utna i parau umatano ma una nun a longlongoro, uni awu sur di pam eno i. ²⁷ A King Agripa, pepetlai, u nurnur una wasiso anun a kum poropet? A tasmani lena u nurnur.” ²⁸ Ra o Agripa i ting o Pol lena, “Pepetlai, u nuki lena un tu kukur du bung kut, un pukus pas iau, sur an nanpat a te Karisito?” ²⁹ O Pol i balu i lena, “Ra tu nat na du bunglik o tu walos na du bung, an wararing torom o God sur ui. Awu sur sur ui kut, sur mot rop kai ra mot longoro iau uniri, sur mot in nanpat a kum te Karisito elar nam iau, ikut gong di ker mot nama sen.”

³⁰ Ra a king i tur, o Pestus ma o Benaisi, ma det kai ra det kis tomo. ³¹ Det pirso, ra det wasiso etalai lena, “A musano ri ke pam tu sakino utna ra din um doko i uni, o in karabus uni.” ³² Ma o Agripa i watungi tan o Pestus lena, “Ra gunuk a musano ri ken sasaring sur a Sisa in warkurai i, i wakak sur din palos ru i.”

27

O Pol i kas una sip utong o Rom

¹ Ra di sa warkurai tari sur met* in kas una sip utong o Itali, di pitar tar o Pol, ma a ramano kum karabus kai, tan ara mugumugu a risano o Julias, ara tagun a taro na inaim anun a Sisa. ² Met kas una ara sip tagisa o Adramitiam, ra in nan sur in sot nanan una kum tamon nago korot una papor Asia. Ra met kas, a sip i wan. Met wan tomo nam o Aristakus tagitong o Tesalonaika una papor Masedonia.

³ Una bung numur, met sot pas tiro o Saidon. O Julias i maris o Pol, ra i muloat ru i sur in nan pas torom a kum paspasano, sur det in tabori nama sau ra i sibo suri. ⁴ Tagitiro iai, a sip i wan melet, ra met kalabor rait una ailan Saipras, uni a wuwu i um met tagisa numugu. ⁵ Numur, met wan kutus sa utasi pi tan aru papor Silisia ma o Pampilia, ra met sot tong o Maira, una papor Lisia. ⁶ Tiro iai, ara sip tagitong

26:17: Ais 42:16; Ep 2:2; Kol 1:13

26:23: Lk 24:44-47; 1 Kor 15:20

27:1: O Luk i tumus a du wasiso “met”,

uni i wan tomo nam o Pol.

27:2: Ap 19:29

o Aleksanderia, in nan utong o Itali. O Julias i sio pasi ra i ukas tar met uni. ⁷ A susut na bung met kalabor wowowon kut, uni i dekdek doko inawan utong o Nidas. Met kalabor rait una ailan Krit milau o Salmoni, uni a wuwu i dekdek, ra ka met pet lar pasi sur met in kalabor tokodos. ⁸ I dekdek utmakai anumet a inawan, ra met kalabor rararot murmur a usalin, ra met wanpat un ara nubual, a risano A Wakak na Mulmulukun, i milau a tamon Lasia.

⁹ Met sa kis ru a susut na bung, ra uniri a inawan sa utasi i sa laulau doko, uni a Bung na Winewel i sa rop ma i sa milau a kum kalang na wuwu.[†] Ra o Pol i utumarong det lena, ¹⁰ “A taro, gong dat wan taru. A tama i lena, ra dat in nan kut, a sip in iru tomo nama kum utna, ma dat kai dat in iru.” ¹¹ Ikut o Julias ke longoro pas a wasiso anun o Pol, ra i muri kut a wasiso anun a kipten ma o naro ra anun a sip. ¹² A mulmulukun ra, awu sur i wakak sur det in kis ru a kum kalang na wuwu tiro iai. Ra a susut tagun det, det nuki lena, i wakak sur det in kalabor utong o Poniks, sur det in kis langlang ru a wuwu tiro iai. O Poniks, a wakak na mulmulukun sur din bait uni. I tamtama sur a nubual ra in matanas i ser pup iai.

A labino wuwu i wanpat

¹³ A wakak na du wuwu tagun a papor tobar i wanpat, ra det nuki lena a inawan anundet in wakak kut. Det dat pas a ega, ra det rarot nanan murmur a usalin una ailan Krit. ¹⁴ Ke suano i kut, a labino dekdek na wuwu i wanpat, di watungi nama Kabokup. I waim pirso tagisa una ailan ra. ¹⁵ A wuwu i tan kis una sip, ra ke pet lar pasi sur in nan. Ra met pukus ru a sip sur in muri mukut a wuwu. ¹⁶ Ra met kalabor rait una ara ailan lik, a risano o Kauda, i dekdek doko torom met sur met in dat toto a digi. ¹⁷ Ikut det dekdek ut ra det dat toto pasi usapat netes. Ma det rau dekdek a sip nama kum rop. Det ngara sako det in nan taru una mamaso na woio in o Sirtis milau o Afrika, ra det dat pirso ru a sel, ma a sip i salir oros mukut, ra a wuwu i wup nanan det. ¹⁸ Una bung numur, a sip milau in terege tan a labino wuwu, ra det turpasi sur det in woro losop ru a kum utna. ¹⁹ Ra i tulu bung bat met, a kum boskuru det woro losop a kum utna na sip. ²⁰ Ma a susut na bung, in matanas ma a kum nangnang ka det sisio, ma a dekdek na wuwu ke mana lar pas, ka met nuki melet mo lena met in laun.

²¹ A susut na bung ka det wangon. Numur o Pol i tur umatandet ma i watungi

tandet lena, “A taro! Ra gunuk mot in longoro pas iau, ma gong dat wan taru tagitong o Krit, katu utna lenri in monong dat, ra a sip tomo nama ututna ken laulau. ²² Ikut uniri, a watungi tamot lena, gong mot ngara, uni kataiao tagun mot in iru, a sip kut in iru. ²³ Iau anun o God, ma a ser muri. Nanganong mirum, ara ensel anunu i wanpat torom iau. ²⁴ I watungi tang lena, ‘Pol, gong u ngara, un tur ut una warkurai umatan a Sisa. Ma det kai ra mot tomo una sip, o God i sa pitar tar det tam, sur mot in laun rop.’ ²⁵ A taro, gong mot ngara, uni a nurnur un o God lena a kum utna in nanpat elar ut nami ra i sa inanos tar iau nami. ²⁶ Ikut a sip in kis ut un tu mamaso na woio milau un tu ailan.”

²⁷ Una noino ma a wat na mirum nami, a wuwu i wup nanan met utmakai una du tasi, di watungi nama Tasi Adriatik. Una labino mirum, a kum boskuru det nuki lena met sa salir milau tu nubual. ²⁸ Ra det lar a lamano ina tasi, ra i ru noino sinanga. Numur lilik, det lar meleti, ra i noino ma aru sinanga mukut. ²⁹ Ra det ngara sako met in salir taru un tu lur na mat, ra det woro losop ru a wat na ega nago numur na sip, ma det wararing sur in waspi lakit. ³⁰ A kum boskuru det nem na kalabor eno gusun a sip nama digi. Det palos pirso pasi utiro utasi, ra det toro lena det in ubek lako kum ega sa numugu una sip. ³¹ O Pol i watungi tan o Julias tomo nama nun a taro na inaim lena, “Ra det ri det sa kalabor eno pas gusun a sip, ka mot in laun.” ³² Ra a kum tene inaim det tau kutus ru a kum rop gusun a digi, ra i salir gisen mut.

³³ Ra a lar i dati, o Pol i watungi tandet rop lena, “Mot in nangon, uni uniri i sa noino ma a wat na bung ra mot sa kis nama nginara, ma ka mot wan tu utna. ³⁴ Ra a saring pas mot sur mot in nangon, sur mot in laun. Ma katutaiao tagun mot in los tu iniru.” ³⁵ Ra o Pol i sa watung tari lenri, i los pas a beret, i watung wakak pas uni torom o God umatandet rop, i tibiki, ra i wangon. ³⁶ Ra det tama i, det rop det taramo a gasgas, ma det kai det wangon. ³⁷ Met rop una sip, met elar nama ru mar ma a wonom mawit na noino ma wonom met. ³⁸ Ra det sa masur, det woro losop ru a kum bek na wit utiro utasi, sur a sip in walowalo.

A sip i iru ma a taro det laun

³⁹ Ra i sa waspi, det sa tama a bual, ikut ka det tama lele i. Det tama pas ara mulmulukun lik, nago una usalin na woio, ra det nuki lena i wakak ra det in lari sur det in ukalabor mamaso a sip tiro unin

† 27:9: A kum kalang numur tan a Bung na Winewel i ser wuwu tong.

27:23: Ap 23:11

27:26: Ap 28:1

nowoio. ⁴⁰ Numur det tau kutus ru a kum rop na ega, ma det wan gusun a kum ega sa utasi, ma det palos ru i kai a kum rop gusun aru woso na stia, ma det dat palos a mugano sel sa numugu una sip sur a wuwu in wup pirso det unago una usalin. ⁴¹ Ikut a sip i kis mut una mamaso na woio. A masarin a sip i kis netes taru tiro iai, ke pet lar pasi mo sur in nan. Numur a kum lamlabino toptop det pasor pagol pas a ngon a sip, ra i terege mut. ⁴² Ra a kum tene inaim det nem na um doko a kum karabus, sako lako taro tagun det, det in was pirso, ma det in kalabor song. ⁴³ Ikut o Julias, a mugumugu anun a kum tene inaim i nemi sur in ulaun o Pol, ra i turbat det. Ra i pitar a warkurai sur det ra det tasman a was, det in sirok losop, ma det in was mugu unago una usalin. ⁴⁴ Ma det ra ka det tasman a was, det in was murmur nama kum palang, o lako kum utna tagun a sip. Det pami lenra, ra det rop det was pirso unago una usalin ma det laun.

28

Tong o Malta

¹ Ra met sa saur rop taru, met tasmani maragom a ailan ra, a risano o Malta. ² A taro tagitiro iai det maris doko met, ra det tagol tar a sungun ma det ben pas met rop, uni i bato ma i kotokoto doko. ³ Ra o Pol i los pas a kabo duwai, sur in ukarangop a sungun nami, ra teken laulau na sui i kawar pat gusun a kabo duwai ra, uni a sungun i mararong, ra i kakarot dekdek taru una lamano. ⁴ A taro tagitiro iai una ailan, det tama i lena in nusui i kete taru una laman o Pol, ra det wasiso etetalai torom det lena, "Kutiro, a musano ri, a tene um doko a taro. I sa laun sikot tagisa utasi, ikut o god na minabalu ke mulaot sur in laun." ⁵ Ikut o Pol i lakro ru in nusui gusun a lamano usapat una sungun, ma ke ban laulau i. ⁶ Det nuki lena a lamano ina surung, o in puku pirso ra in mat. Ikut, det kis langlang ma i sa suano i, ma katu laulau na utna i wanpat uni, ra det pukus a nuknukin det, ra det nuki lena o Pol ara god.

⁷ Ara mugumugu tagitiro una ailan ri, a risano o Publius, anun a du piso pi kura iai. I ben pas met utiro una nun a rumu, ma i ugasgas met. Ra met kis pas a tulu bung tiro una nun a rumu. ⁸ Ma o taman o Publius i inep, i misait nama mararong, ma in balano i kalabor. Ra o Pol i ruk toromi, ra i wararing, ma i ubek aru lamano sapat netes uni, ra i ulangolango pasi. ⁹ Ra i sa pam tari lenri, a kum misait rop tagun

a ailan, det wanpat ma di ulangolango det. ¹⁰ Ma det pam a susut na wakak na pinapam torom met sur det in ese anundet a urur. Ma numur, ra met waninar sur met in kas una sip, det tabor met nama kum utna rop ra met sibo suri.

Tagitong o Malta utong o Rom

¹¹ Ra i sa rop a tulu kalang, met kas una ara sip ra i kis ru a kum kalang na wuwu una ailan ra. A sip ra, tagitong o Aleksanderia ma sa numugu uni di sa tok tar a malalarin aru kasango, aru nutun a god Sus. ¹² Met sot pas tiro o Sirakus, ra met kis pas a tulu bung tiro iai. ¹³ Met kalabor tagitiro iai ma met sot tong o Regium. Ra una bung numur, a tobar i wanpat. Ma ara bung melet numur tano, met sot tiro o Puteoli. ¹⁴ Tiro iai met pastoram pas a kum tistisi mot una nurnur, ra det saring met sur met in kis pas lako wonom mawit na bung nisandet. Numur met wan mo utong o Rom. ¹⁵ Det ra det tar tistisino una nurnur tagitiro o Rom, det longoro a wasiso un met, ra det wan barato met tong una nubual di watungi nama A tulu Rumu na Usiro. Ra o Pol i tama pas det, i watung wakak torom o God. Ma a magirandet, i udekdek anun a nilaun.

O Pol i kis tong o Rom

¹⁶ Ra met sa wanpat tong o Rom, di mulaot tar o Pol sur i kut in kis un tu rumu, ma tu tene inaim in tamtamabati.

¹⁷ Ra a tulu bung i sa rop, o Pol i kabo tomo pas a kum mugumugu anun a taro Juda. Ra det wanpat tomo, i watungi tandet lena, "A kum tistising, ka ban laulau anundat a taro, o lako kum petutna kai anun a kum tumtubun dat tagun numugu. Ikut det pam ukai pas iau sapat o Jerusalem, ma det pitar tar iau torom a taro Rom. ¹⁸ Ra a taro Rom det sa longoro tar anung a wasiso ra a wasiso bat iau nami, det nemi sur det in palos ru iau, uni ka det sio pas tu utna ra din um doko iau uni. ¹⁹ Ra a taro Juda ka det mulaot, ka sio pas tu kisapi sur an langolango uni, ra a sasaring sur a Sisa in warkurai iau. Ikut katu sakino utna ra an takun anung a taro uni. ²⁰ A itula sur mot, sur dat in kis tomo ma an wasiso talapor una kibino ra di sen ukai tar iau. Di sen ukai tar iau uni a kis langlang nama nurnur sur o naro ra a taro Israel kai det kis langlang suri."

²¹ Ra det watungi tano lena, "Katu pas tagisa o Judia i wanpat torom met un ui, ma katu tisimet kai i wanpat nam tu wasiso tagisa un ui, o tu wasiso un tu sakino utna

ra u pam tari. ²² Met nemi sur met in longoro a nuknukim, uni met sa tasmani lena, una kum tamon rop di watung laulau a matok na lotu ri.”

²³ Det nam o Pol det kubus pas ara bung sur det in wasiso. A susut na taro det wan-pat toromi, una rumu ra i kis uni. I turpas a wasiso una kobot ma i tuk una lirop. I papalos torom det una matanitu anun o God. Ma i papalos utkai una Warkurai anun o Moses ma a kum tumtumus anun a kum poropet, sur in ukatatur a nuknukin det sur det in nurnur un o Iesu. ²⁴ A ramano taro tagun det, det nurnur un asau ra o Pol i watungi, ikut ara taro kai, ka det nurnur. ²⁵ Det engaras epotor tandet ra det katatur na inawan. Ikut numugu ra ka det wan utmakai, o Pol i watung a ururop na wasiso tandet lena, “A lingmulus ut ra a Tokodos na Nion i wasiso una wan a poropet Aisaia, torom a tumtubu mot tagun numugu lena, ²⁶ ‘Un nan torom a taro ri ma un inanos det lena,

Mot in longoro ma mot in longoro, ikut ka mot in longoro lele i,

mot in tamtama ma mot in tamtama, ikut ka mot in tama lele i.

²⁷ Uni a balan a taro ri i dekdek, ma a taltalngan det i kutkut, ma a matmatan det i pulu.

Ra gunuk det in tamtama lele nama matmatan det,

ma det in longoro lele nama taltalngan det,

ma det in tastasman nama nuknukin det,

sako det in tupukus torom iau, ma iau ut, an ulaun pas det.’ ” *Ais 6:9-10*

²⁸⁻²⁹ Ra o Pol i watungi tandet lena, “I mo ra mot in tasmani lena, a pinapam anun o God ra i ulaun pas a taro, i sa wan torom det ra awu sur a taro Juda. Ra det, det na rakoni!”*

³⁰ Aru kudulano kilalo, o Pol i kis una rumu ra i ut i ser tokomi, ma i gas pas a taro rop ra det wanan pat toromi. ³¹ Ra i ser warawai una matanitu anun o God, ma i ser ususer a taro una Labino o Iesu Karisito, ma ke ngara, ma kataio kai i turbati.

* **28:28-29:** Una ramano kum du buk una wasiso Grik, a ramano kum wasiso kai i kis una vers ri. I lenri: *Numur tan anun a wasiso, a taro Juda det wan susuaro, ma det engaras dekdek epotor tandet.*

A Pas anun o Pol torom a taro Rom

A wasiso talapor mugu

Ra o Pol i kis tong o Korin, i tumus a pas ri torom a taro na lotu tong o Rom. I pitari torom ara ino a risano o Pibi ra i losi utong o Rom (tama o Rom 16:1).

O Rom a tarai na tamon doko. A labino king, ra di watungi nama Sisa i kis iai.

Ra o Pol i tumus a pas ri, kabaut i wan utong o Rom ma kabaut i ususer det. Ra una pas ri, i nem na ususer det una susut na utna. Ara labino utna ra i nemi sur det in talapor uni i lenri: A taro rop det sa pam a sakino ma katai i tokodos umatan o God. Dat in tokodos umatan o God ra dat nurnur kut un o Iesu Karisito. Ma ra dat nurnur un o Karisito dat in laun nama matok na nilaun ma dat in muri mo a Tokodos na Nion. I watungi kai una taro Juda, lena o God ke dumano det.

O Pol i inanos det kai lena i nem na wan torom det.

A inawan ina Pas Rom:

A turturkibin ina buk ri (1:1-17)

A taro rop det pam a sakino ma det sibo sur taio in ulaun det (1:18-3:20)

O God in ulaun dat uni dat nurnur un o Karisito (3:21-4:25)

Un o Karisito dat laun nama matok na nilaun (5:1-8:39)

O God ke dumano a taro Israel (9:1-11:36)
A kum wakak na petutna ra dat in muri (12:1-15:13)

A ururop na wasiso anun o Pol torom a taro Rom (15:14-16:27)

O Pol i wasiso una nun a pinapam na aposel

¹ Iau o Pol, a tultul anun o Karisito Iesu, a tumus a pas ri torom mot. O God i kabo pas iau, sur an aposel, ma i pilok pas iau sur an warawai nama nun a Wakak na Wasiso torom a taro. ² A Wakak na Wasiso ri, o God i sa ullilman mugu taru uni ma anun a kum poropet det sa tumus tari una Buk Tabu. ³ A Wakak na Wasiso i wasiso un o Nutunulik, ra di usus pasi tagun a kabotaro anun o king Dewid. ⁴ Ma una nun a katkatatur melet gusun a minat, a Tokodos na Nion i ese i lena, i a Nutun o God ma i dekdek. I ut o Iesu Karisito anundat a Labino. ⁵ Un o Karisito ut, o God i maris met ma i pitar a pinapam na aposel torom met, sur met in ulabo pas a risan o Karisito, ma met in warawai torom a taro rop ra awu sur a taro

Juda, sur det in nurnur ma det in mur anun a wasiso. ⁶ Mot kai ara taro tagun det, ra o God i kabo pas mot, sur mot anun o Iesu Karisito.

⁷ A tumtumus torom mot rop tiro o Rom, ra o God i maris mot, ma i kabo pas mot sur mot anun a taro. A marmaris ma a malmal tan o God a Tamandat ma a Labino o Iesu Karisito in kis tomo nam mot.

O Pol i wararing sur a taro Rom

⁸ Iri a mugano utna, una risan o Iesu Karisito, a watung wakak torom anung a God un mot rop, uni a taro tagun a rakrakon bual rop, det wasiso puaso una numot a nurnur. ⁹ A papam torom o God nama nung a nilaun rop, ra a ser warawai nama Wakak na Wasiso un o Nutunu, ma o God ut i tasmani lena, a ser nuk pas mot ¹⁰ nama nung a kum niaring una kum bung rop. A wararing kai lena, ra a nemnem ut anun o God, kanapi an pet sot pasi ut sur an nanpat torom mot.

¹¹ A nem doko i sur an tama mot, sur an tabor mot nama etabor, sur in udekdek a niomot. ¹² Lenra, ra an tama anumot a nurnur, ma mot kai mot in tama anung a nurnur, dat in uragot etetalai dat. ¹³ A kum tistising, a nemi sur mot in tasmani lena, a susut na bung a nuki lena an nan torom mot, sur an warut mot tuk ra an tama a win anung a etowo una numot a nilaun, elar nama win anung a etowo ra a tama i una kum tamon gisen tandet ra awu sur a taro Juda. I kut, tuk uniri, a kum utna i turbat iau, ma ka wan lar pas.

¹⁴ Anung a pinapam utra, o God i pitar tari tang, sur an warawai torom a taro ra det tasman a wasiso Grik ma a taro ra ka det tasmani kai, torom a kum tene mananos ma det ra anundet a mananos ke labo. ¹⁵ I mo ra a nem doko i, sur an warawai nama Wakak na Wasiso torom mot kai, tiro o Rom.

A Wakak na Wasiso i a dekdekin o God

¹⁶ Ka maimai una Wakak na Wasiso, uni i a dekdekin o God sur in ulaun pas a taro rop ra det nurnur. Torom met a taro Juda mugu, ma uniri torom mot kai, ra awu sur a taro Juda. ¹⁷ Uni a Wakak na Wasiso i upuaso a kisapi ra o God i pami, sur a taro det in tokodos umatan o God. A kisapi na nurnur kut, a taro det in tokodos uni, a nurnur sot kut tagun a turturkibino tuk una ururopino. Elar nami ra di sa tumus tari una Buk Tabu lenri, "Osi kut ra i nurnur, o God in watungi a tene tokodos, ma in laun."
Hab 2:4

O God i kankan una magiran a taro

¹⁸ O God i upuaso anun a kankan tagis-apat una langit, uni a taro ka det mur a petutna ra i wakak umatano, ma det pam a sakino, ma una nundet a kum sakino petutna, det turbat a lingmulusino. ¹⁹ O God i kankan, uni a kum utna ra din tasmani un o God i talapor kut torom det, uni i ut i sa utalapor tari torom det. ²⁰ Turpasi una ukukis ina rakrakon bual, a taro det tama a kum ukukis. I mo ra det pet lar pasi sur det in tasman a kum magiran o God, a kum magiran o God, ra ka din tama i. Det tasmani lena, a dekdekino in tur tukum, ma i o God. I mo ra katu kisapi sur det in ipul ru i.

²¹ Det tasmani ut o God, ikut ka det ulabo pasi lenri, i a God, ma ka det watung wakak kai toromi. Det nuk penpen oros kut, ma a balandet i dumirum, uni kalako mananosin det. ²² Det watungi lena, det mananos doko, ikut det wanpat a kum longlong. ²³ Ka det lotu torom o God ra i laun tukum, ma i bukus nama minamar. Det lotu kut torom a kum toktok ina kum musano ra det ser mat kut, ma torom a kum toktok ina kum piko, ma a kum wewegua, ma a kum utna ra det kaukawar nin upiso.

²⁴ I mo ra, o God i madek tar det sur det in pam a kum dur na petutna elar nama kum sakino nemnem tagun a balandet, ra det in pam a petutna na maimai etetalai una pinindet. ²⁵ Det keles ru a lingmulus na etowo anun o God sur a torotoro. Det lotu ma det wararing mukut torom a kum utna ra o God i ukis tar det, ma ka det lotu mo torom a Tene Ukukis, i ra din watung ulabo pasi ma in tur tukum. Amen.

²⁶ I mo ra, o God i madek tar det una nundet a labino nemnem sur a kum sakino petutna na maimai. I lenri: A wardain det keles ru a kisapi na nolin, ra di sa ukis tari, ma det ser inep etetalai nam det melet ut. ²⁷ Lenkutkai ra a kum musano, det wan gisen gusun a kisapi na nolin ra di sa ukis tari lena, det in nolin nama wardain, ma a balandet i kalkal doko sur a kum musano, ma det pam a sakino torom det melet ut a kum musano. Kalako maimai indet, ra det pami lenra. Det ut, det los a warkurai na minabalu, ra i sot nam anundet a kum niraro.

²⁸ I kai ri, ka det nuk pasi mo o God, det nuki lena, a etowo un o God i utna oros kut. I mo ra i madek tar det sur in laulau a nuknukin det, ma det pami mukut a kum utna ra ke sot sur din pami. ²⁹ Det bukus nama kum wur ngas na sakino petutna rop

ri: Det pam a sakino torom a taro, det nemnem sur a susut na ululeng, ma det nem na ban laulau a taro. Det bukus nama nuknuk laulau sur a utna anun taio, det um doko a taro, det engaras, det torotoro, ma det nget a taro. Det wasiso eno, ³⁰ det emang, det nget o God, det waim, det uman labino, ma det warango pas det. Det nuknuk sur a kum matok na kisapi, sur a pam sakino. Det pitarnagat torom a kum tamandet, ma a kum nandet. ³¹ Kalako wakak na mananos, ka det ser pam sot pas anundet a kum liliman, ka det tasmani mo a marmaris, ma a wakak na petutna torom a taro. ³² A ngas na taro lenri, det tasmani ut a warkurai anun o God lena, det ra det ser pam a kum petutna ri, i sot sur det in mat. Ikut det pami kut, ma det mulaot sur a taro gisen kai det in pami.

2

O God in pam a tokodos na warkurai

¹ I mo ra, mot ra mot ser takun a taro gisen lena, ka det tokodos, ka mot in ipul lar pas. Anumot a etakun in takun melet mot ut. Uni mot takun a taro gisen, ikut mot kai, mot pami kut a sakino petutna ra. ² Dat tasmani lena, ra o God in warkurai det, ra det pam a kum sakino petutna, anun a warkurai ra i tokodos. ³ Mot a taro oros kut, ra mot takun det ra det pam a kum sakino petutna, ikut mot kai mot ser pami, mot nuki lena mot in kalabor eno pepetlai? In warkurai mot ut. ⁴ I sa ese anun a wakak na petutna ra i bukus torom mot, ma ke warkurai lakit mot una numot a kum sakino petutna, ma a pinino ke ngoro lakit nam mot. Pepetlai, mot nuk penpen kut una nun a kum wakak na petutna ra? Pepetlai, ka mot tasmani lena, i maris mot lenri sur mot in nukpukus?

⁵ Ikut, a balamot i dekdek ma ka mot nukpukus, ra mot ubek tomo anun a kankan netes un mot, sur a bung na kankan anun o God, ra anun a tokodos na warkurai in nanpat talapor. ⁶ O God in warkurai arara, elar ut nama pinapam ra i sa pam tari. ⁷ Det ra det dekdek una wakak na pinapam sur o God in pitar a minamar torom det, ma in ulabo pas a risandet, ma det nem a nilaun ra ken rop, o God in pitar a nilaun tukum tandet. ⁸ Ikut torom det ra det ser ulabo pas det melet ut, ma ka det mur a lingmulus na wasiso anun o God, ma det muri kut a sakino petutna, o God in kankan, ma in balano sungun torom det. ⁹ Ma in pitar a mamaut, ma a labino

ngunungut torom a taro rop, ra det pam a sakino. Torom a taro Juda mugu, ra numur torom a taro gisen kai. ¹⁰ Ikut, torom det rop ra det pam a wakakino, o God in pitar a minamar torom det, ma in ulabo pas a risandet, ma in pitar tar a malmal torom det. Torom a taro Juda mugu, ra numur torom a taro gisen kai. ¹¹ Uni, a warkurai anun o God, ke senene, i elar rop kut torom a taro rop.

¹² A taro rop ra ka det tasman a Warkurai anun o Moses, ma det pam a sakino petutna, det in iru ut. Ma lenkutkai ra torom det rop ra det tasman a Warkurai, ma det pam a sakino, o God in warkurai det elar nama wasiso na Warkurai. ¹³ Uni, awu sur det rop ra det longoro a Warkurai det tokodos umatan o God, awu. Det kut ra det mur rop a Warkurai, din watung det a kum tene tokodos. ¹⁴ A taro ra awu sur a taro Juda, det ra ka det tasman a Warkurai, ikut det pami ut a wakak na petutna, elar nama Warkurai, i ese i lena a Warkurai kura ut una gapindet. ¹⁵ A ngas na taro ra, i talapor ra o God i sa tumus tar a wasiso tagun a Warkurai una nuknukin det. A nuknukin det i upuaso anundet a petutna, ra i wakak o awu. Ra det pam a sakino, a nuknukin det ut i takun det, ma ra det pam a wakakino, a nuknukin det i gas nami. ¹⁶ Una bung na warkurai, o God in pitar tar a warkurai torom o Iesu Karisito, sur in warkurai det, una kum utna i kis eno una nuknukin det. Ra a ser warawai nama Wakak na Wasiso, a ser warawai una kum utna ri.

A kum te Juda det warango det nama kum Warkurai anun o Moses

¹⁷ An inanos mot, ra mot watung mot a kum te Juda. Mot nuki lena mot tokodos umatan o God, uni o God i pitar tar a kum Warkurai tamot, ra mot warango mot lena, mot tagun o God. ¹⁸ Mot ser warango mot lena, mot tasman a nemnem anun o God, ma mot gas una kum wakak na petutna, uni mot sa rakon pas a etowo una kum Warkurai. ¹⁹ Mot nuki lena, mot elar nam ara ra i ben a pulu, ma mot elar nama talapor torom det ra det kis una dumirum. ²⁰ Mot nuki lena, mot ususer kodos det ra ka det mananos, ma mot a kum tene ususer anundet ra ka det tasman tu utna, uni mot, mot sa pam ukai a mananos rop, ma a lingmulusino ra i kis una kum Warkurai.

²¹ Mot ser ususer a taro gisen una kum Warkurai, ikut mot ut ka mot ususer wakak pas mot! Mot warawai lena, gong det wolong, ikut mot ut mot ser wolong! ²² Mot watung tan a taro lena, "Gong mot pam

a sakino nam tu ino anun taio o nam tu musano anun taio," ikut mot ut mot ser pami! Mot nget a kum torotoro na god, ikut mot wolong una kum rumu na etabor anun a kum torotoro na god. ²³ Mot warango pas mot una kum Warkurai, ra o God i pitar tari tamot, ikut, mot ban laulau a risan o God, uni ka mot mur a kum Warkurai. ²⁴ I elar nami ra di sa tumus tari una Buk Tabu lena, "A taro ra awu sur a taro Juda, det watung laulau a risan o God, i kibino un mot." *Ais 52:5*

A Tokodos na Nion i pam a tinotok talilis mulus

²⁵ Ra u mur a kum Warkurai, a tinotok talilis ra di pam tari un ui, i lingmulus. Ikut, ra ko mur a kum Warkurai, u elar kut nam taio ra ka di tok talilis a pinino. * ²⁶ A taro gisen ka di tok talilis det, ikut, ra det mur asau ra a kum Warkurai anun o God i wasiso uni, o God i tama det elar nami ra di sa tok talilis tar det. ²⁷ Osi ra ka di tok talilis a pinino ma ka di ususeri una kum Warkurai, ikut i muri ut asau ra a kum Warkurai i wasiso uni, anun a nilaun in takun ui, ra di sa tok talilis tar ui, ma u tasman a kum Warkurai, ikut u lakai i. ²⁸ Taio ra a te Juda kut una rising, awu sur a te Juda mulus. Ma taio kai ra di tok talilis kut una pinino, awu sur a tinotok talilis mulus. ²⁹ Ikut, ra taio in mur o God namin balano, i ra a te Juda mulus. A tinotok talilis mulus, awu sur a ngasino ra a taro det mur a kum Warkurai ra di sa tumus tari, awu. A tinotok talilis mulus, a Tokodos na Nion ut i pami unin balano. A ngas na musano ra, awu sur a taro det in watung ulabo pasi, o God ut in watung ulabo pasi.

3

Anundet a sakino i ese i lena o God i tokodos

¹ Ra taio a te Juda, anun a kinkinis na te Juda in warut petlani? Ra taio di sa tok talilis tari, anun a kinkinis na tinotok talilis in warut petlani? ² Ra taio a te Juda i wakak doko toromi. A mugano utna ut, o God i sa ubek tar anun a wasiso una laman a taro Juda. ³ I pepetlai ra ara taro Juda ka det nurnur? Ra ka det nurnur, pepetlai, i topasi sur in turbat o God sur gong i pam sot anun a wasiso? ⁴ Awu ut! Ra a taro rop det in torotoro, a wasiso anun o God i lingmulus ut. Elar nama wasiso torom o God ra di sa tumus tari una Buk Tabu lena, "Anum a wasiso na warkurai i ese i lena u tokodos.

2:14: Ap 10:35 2:20: 2 Tim 3:5 2:21: Mt 23:3-4

i lena a musano i ara tagun a taro anun o God ra det mur a kum Warkurai.

* 2:25: A tinotok talilis a ukinalong di pami sur in ese

2:26: Gal 5:6

2:29: Lo 30:6; Kol

Ma ra din takun ui,

ka din sio pas tu niraro.” *Sng 51:4*

⁵⁻⁶ Ra dat pam a sakino, anundat a sakino i ese mulusi lena, o God i tokodos. Pepetlai, o God i raro sur in warkurai dat uni? Awu ut! A ngas na wasiso ra, i wanpat tan a taro kut. Gunok ra anun a warkurai ke tokodos, ken warkurai lar pas a taro tagun a rakrakon bual. Ikut i tokodos ut, ra in pet lar pasi sur in warkurai det. ⁷ Kutiro taio in watungi lena, “Ra anung a kum torotoro na wasiso i ese mulusi lena, a wasiso anun o God i lingmulus, ma i ulabo pas a risano, sur asau ra o God i watung iau a tene sakino, ma an iru una nun a warkurai?” ⁸ Ara taro det watung laulau met, ma det takun met lena, met ususer a taro lenri, “Dat in pam a sakino sur a wakakino in nanpat talapor.” Ikut awu, ke lingmulus. Det ra det watung a wasiso ra, i sot sur det in iru una warkurai anun o God.

Kataio i tokodos umatan o God

⁹ Asau ra dat in watungi una utna ri? Pepetlai, met a taro juda met tokodos taun a taro gisen? Awu ut! A sa watung tari lena, a kum te juda ma a taro gisen kai det elar kut. Dat rop dat kis utuntudu ina sakino petutna. ¹⁰ Elar nami ra di sa tumus tari una Buk Tabu lena, “Katutaio i tokodos, katutaio ut!

¹¹ Katutaio kai ra i mananos.

Katutaio i sisio sur o God.

¹² Det rop det sa wan gisen gusun o God.

Det rop ka det gas mo un tu utna.

Katutaio tagun det i pam a wakakino, katutaio ut.” *Sng 14:1-3*

¹³ “A kum wandet i papos elar nama kum tung na minat, ma a wasiso anundet i elar nama singino na minat.

Det ser watung a kum torotoro nama kum karmendet.” *Sng 5:9*

“A wasiso tagun a wandet, i elar nama kusmapak na sui ra i ser karot doko a taro.” *Sng 140:3*

¹⁴ “A kum wandet i bukus nama wasiso laulau ma i pitar a maut torom a taro.” *Sng 10:7*

¹⁵ “Det raras sur det in um doko a taro.

¹⁶ Det kamar a kum utna, ma det ban laulau a taro una nundet a kum kisapi ra det wan iai.

¹⁷ Ka det tasman a kisapi na malmal.” *Ais 59:7-8*

¹⁸ “Ka det ngara sur o God.” *Sng 36:1*

¹⁹ Dat tasmani lena, asau ra a warkurai i wasiso uni, ke wasiso una taro ra awu sur a taro juda kut, i wasiso una taro juda utkai,

ra det kis utuntudu ina kum Warkurai. I mo ra, a taro rop tagun a rakrakon bual det in tur na warkurai umatan o God, ma kataio in ipul lar pas. ²⁰ I mo ra, katutaio in tokodos umatan o God, uni i mur a kum Warkurai. A kum Warkurai i ser ese dat kut una nundat a kum sakino petutna.

Una nurnur kut o God in watung a taro det tokodos

²¹ Ikut uniri, o God i sa pam tar a kisapi sur a taro det in tokodos umatano, ma awu sur uni det mur a kum Warkurai. A kisapi ri, a Buk na Warkurai ma a wasiso anun a kum poropet det sa wasiso puaso taru uni.

²² A kisapi ri tan o God, ma i lenri: A taro rop ra det nurnur kut un o Iesu Karisito, o God in watung det lena det tokodos. A taro juda ma a taro gisen kai det elar kut. ²³ Uni a taro rop det sa pam tar a sakino petutna, ma det kis bakbak gusun a minamar anun o God. ²⁴ Ikut, una marmaris anun o God, o God i watung det lena det tokodos. I pami lenra elar nama etabor oros kut, uni o Karisito Iesu i kul langolango pas det. ²⁵ O God i pitar ru o Iesu, sur in mat ma a gapino in unus ru a kum sakino petutna anun a taro rop ra det nurnur uni. Ma a gapino in urop ru a kankan anun o God gusun det. I pami lenri, sur in ese anun a tokodos na petutna. Uni numugu i madek ru i kut a sakino petutna anun a taro, ma ke warkurai det uni, kibino una balano molmol anunu torom det. ²⁶ Ikut uniri, i pami lenri sur in ese anun a tokodos na petutna, sur i ut, i tokodos, ma i o nara ra i watung a taro lena, det tokodos ra det nurnur un o Iesu.

²⁷ Pepetlai, tu kibino ra dat in warango pas dat? Awu! Pepetlai, dat in warango pas dat uni dat mur a kum Warkurai? Awu! Dat tokodos umatan o God uni dat nurnur kut un o Iesu. ²⁸ Uni uniri, dat tasmani lena, o God i watung a taro lena, det tokodos umatano uni det nurnur kut un o Iesu, ma awu sur uni ra det mur a kum Warkurai. ²⁹ Pepetlai, o God i a God anun a taro juda kut? Pepetlai, i a God anun a taro gisen utkai? Lingmulus, i a God anun a taro gisen utkai. ³⁰ Uni ara God kut, ma in watung a taro juda lena, det tokodos umatano una nurnur. Lenkutkai ra torom a taro gisen, in watung det lena, det tokodos una nurnur utkai. ³¹ Pepetlai, ra dat nurnur dat nuki lena a kum Warkurai i utna oros kut? Awu ut! Una nurnur dat ese i lena a kum Warkurai a dekedekin det ut.

4

O Abaram i nurnur un o God

¹ Asau ra dat in watungi un o Abaram, a tamamet a taro Juda? Asau ra i ususer pas uni una kisapi ra taio in tokodos umatano o God? ² Gunuk ra o God i watung o Abaram lena i tokodos, kibino una kum wakak na pinapam ra i pami, i topasi ra o Abaram in ulabo pasi ut uni. Iikut awu, ken ulabo lar pasi umatano o God. ³ A Buk Tabu i watungi lena, "O Abaram i nurnur un o God. I mo ra o God i watungi a tene tokodos." *Stat 15:6*

⁴ Ra taio i papam, anun a ikul, awu sur a etabor, awu. Anun a ikul tagun a pinapam ut anunu ra i pami. ⁵ Iikut o God ken watung taio lena i tokodos uni i pam tar a pinapam. In watungi lena, i tokodos uni i nurnur. Uni i nurnur un o God ra i ser watung a kum tene sakino lena det tokodos. ⁶ O Dewid kai i watungi lenri. I watungi lena, a musano i dan ra o God i watungi lena i tokodos, awu sur i kibino una kum pinapam a musano ra i pami, awu. I watungi lena,

⁷ "Det ra o God i sa unus ru anundet a kum petutna na lakai warkurai, det dan, ma det ra o God i sa nuk dumano ru anundet a kum sakino petutna, det dan.

⁸ A musano i dan ra a Labino ke nuk pas anun a kum sakino petutna, ma ken warkurai meleti mo." *Sng 32:1-2*

⁹ Pepetlai, a taro kut ra di tok talilis det, det dan? Awu. A taro utkai ra ka di tok talilis det. Uni dat tasmani lena, o Abaram i nurnur, i mo ra o God i watungi a tene tokodos. ¹⁰ Nangisin ra o God i watung o Abaram lena i tokodos? Numugu tan a bung ra di tok talilis a pinino, o numur? Numugu, awu sur numur. ¹¹ Ra kabaut di tok talilis o Abaram, o God i watungi lena i tokodos umatano, kibino una nun a nurnur ut. Ra o Abaram i los pas a ukinalong na tinotok talilis, i ese i lena i tokodos umatano o God. I mo ra o Abaram a taman a taro ra ka di tok talilis det. Det nurnur, ra o God i watung det, det tokodos umatano. ¹² Ma i a tamandat kai ra di tok talilis det. Awu sur kibino ra di tok talilis det, ikut uni det mur a kisapi na nurnur ra tamandat o Abaram i muri, ra kabaut di tok talilis a pinino.

¹³ O God i uliliman tar o Abaram sur in pitar tar a rakrakon bual tano ma torom a kum tumtubunu kai. A liliman ri, o God i pam tari torom o Abaram awu sur i kibino ra i mur a kum Warkurai, awu. I kibino uni i nurnur, ra o God i watungi lena i

tokodos umatano. ¹⁴ Gunuk ra o God in pitar a rakrakon bual tan a taro uni det mur Warkurai, a nurnur ke gas un tu utna, ma a liliman anun o God a utna oros kut. ¹⁵ Uni a kankan anun o God i kis un det ra det nem na mur a kum Warkurai, ikut ka det mur sot pasi. Ra kalako kum Warkurai, ka din takun taio lena i lakai warkurai.

¹⁶ I mo ra a utna ra o God i uliliman tari, in pitari torom det ra det nurnur. O God i pami lenra, sur in elar nama etabor na marmaris, ma in nan ut torom a kabotaro rop anun o Abaram. Awu sur torom a taro Juda kut ra di pitar tar a kum Warkurai tandet. Awu! Torom det utkai ra det nurnur elar nam o Abaram, i ra a tamandat rop. ¹⁷ Elar nami ra di sa tumus tari una Buk Tabu:

"A ukis tar ui sur ui a taman a taro tagun a susut na gapman." *Stat 17:5*
Umatano o God, o Abaram a tamandat, uni i nurnur un o God, i ra i ser ukatutur a taro melet gusun a minat, ma i ser wasiso kut, ra a kum utna ra kabaut i wanpat, i wanpat kut.

¹⁸ O God i uliliman tar o Abaram sur in ulabo pas tu nutunu. Una tamtama anun o Abaram, ke sot sur din pam sot pas a liliman ra. Iikut, i nurnur, ra i wanpat a taman a taro tagun a susut na gapman. Elar nama liliman anun o God toromi lena, "A kum tumtubum det in susut." ¹⁹ Ma anun a nurnur ke puku ra i tama i lena, anun a kilalo i sa elar nam ara mar, ma ke elar melet mo sur in ululabo. Ma o Sara kai i sa takano ra ke elar mo sur in usus. ²⁰ Iikut o Abaram ke wur nuknuk una liliman anun o God. I tur dekdek una nun a nurnur ma o God i udekdek anun a nurnur, ra o Abaram i watung ulabo pas o God. ²¹ Ma una nun a nurnur i tasmani ut lena, o God i pet lari sur in pam sot pasi ut anun a liliman. ²² I mo ra "O God i watungi a tene tokodos." ²³ Ra a Buk Tabu i watungi lena, "O God i watungi a tene tokodos," awu sur i watungi kut un o Abaram, awu. ²⁴ I watungi utkai un dat. Ra dat nurnur un o God, ra i ukatutur melet pas o Iesu anundat a Labino gusun a minat, in watung dat kai a kum tene tokodos. ²⁵ O God i pitar ru o Iesu, sur in mat una nundat a kum sakino petutna, ma i ukatutur melet pasi gusun a minat, sur dat in tokodos umatano o God.

5

Dat sa emarom melet nam o God

¹ Una nundat a nurnur ut, o God i watung dat lena dat tokodos umatano. I mo ra dat

kis na malmal tomo nam o God, kibino una nundat a Labino o Iesu Karisito. ² Ra dat nurnur un o Karisito, i mugu dat ma i uruk dat una marmaris anun o God. Ra uniri, dat sa laun uni. Ma dat gas, ra dat kis langlang nama nurnur sur a minamar anun o God, ra kura numur dat in kis uni.

³ Ma awu sur i kut ra dat gas suri, dat gas utkai una kum mamaut ra dat taramo i, uni dat tasmani lena a kum mamaut i pam pat anundat a tuntunur dekdek. ⁴ Ma anundat a tuntunur dekdek i pam pat a ngas na nilaun ra a kum larlar ka det in upuku pas dat. Ma a ngas na nilaun ri, i pam pat anundat a kinkinis langlang nama nurnur. ⁵ Ra dat kis langlang nama nurnur, dat tasmani lena a utna ra o God i sa uliliman taru uni in nanpat ut. Uni o God i sa pitar tar a Tokodos na Nion tandat. Ra a Tokodos na Nion i sa lingis tar a marmaris anun o God unin balandat.

⁶ Numugu ka dat mur a petutna ra i wakak umatan o God, ra ka dat pet sot pas tu utna. Ikut ra a du bung i sot, o Karisito i mat sur dat. ⁷ I ngangitin doko ra taio in mat sur tu tokodos na musano. Kutiro taio in pet lar pasi sur in mat sur tu wakak na musano. ⁸ Ikut o God i ese anun a marmaris torom dat una kisapi lenri: Ra dat laun utmakai una sakino petutna, o Karisito i mat sur dat. ⁹ Ma una gapin o Iesu, o God i watung dat lena dat tokodos umatano. I mo ra i lingmulus sakit lena, o Iesu in ulaun pas dat gusun a kankan anun o God, una bung na warkurai. ¹⁰ Ra dat kis na ebar utmakai nam o God, i tulu ru o Nutunu sur in mat sur dat, sur dat in emarom melet nam o God. Ra dat kis na emarom nam o God, i lingmulus sakit, in ulaun pas dat, kibino una nilaun anun o Nutunu.

¹¹ Awu sur i kut ra. Uniri dat gas utkai tomo nam o God, kibino ut una nundat a Labino o Iesu Karisito, ra i umarom tomo tar dat nam o God.

O Adam i pitar a minat, ma o Iesu i pitar a nilaun

¹² Ara musano kut i pam a sakino petutna, ma una petutna ra, a sakino petutna i wanpat una rakrakon bual. A sakino petutna i pam pat a minat. Ma una kisapi ra, a minat i wan sur a taro rop, uni det rop det pam a sakino petutna. ¹³ Uni numugu, ra kabaut o God i pitar a kum Warkurai, a sakino petutna i sa kis una rakrakon bual. Ra kalako Warkurai, o God ken takun taio lena i pam a sakino petutna. ¹⁴ Ikut, tagun a kum kilalo anun o Adam tuk una kum kilalo anun o Moses, a taro rop

det kis utuntudu ina dekdekin a minat. Ara taro ka det pam a ngas na sakino elar nam o Adam, ra i lakai a warkurai. Ikut, det utkai, det kis utuntudu ina dekdekin a minat.

O Adam i a malalarin o naro ra in nanpat numur. ¹⁵ Ikut a etabor anun o God ke elar nama sakino petutna anun o Adam. Uni a susut na taro det mat una sakino petutna anun ara musano kut. Ikut, i lingmulus sakit, a marmaris anun o God i bukus ma i pulpulas, ma un ara musano kut, o Iesu Karisito, ma una nun a marmaris, i pitar oros tari kut a etabor torom a susut na taro.

¹⁶ Ara utna kai, a etabor anun o God ke elar nama utna ra i wanpat tagun a sakino petutna anun o Adam. Anun ara petutna i dat tar a taro, sur det in iru una warkurai na minabalu anun o God. Ikut a etabor anun o God i lenri, ra a taro det pami utmakai a kum sakino petutna, o God i watung det a kum tene tokodos. ¹⁷ Ma una petutna na lakai warkurai anun ara musano kut, a taro rop det kis utuntudu ina dekdekin a minat. Ikut, i lingmulus sakit, a taro ra det los pas a marmaris anun o God ra i bukus ma i pulpulas, ma det los pasi kai anun a etabor ra i watung det a kum tene tokodos, det in laun tukum ma det in warkurai elar nama kum king, kibino un ara musano kut, o Iesu Karisito.

¹⁸ I mo ra un ara petutna na lakai warkurai kut anun o Adam, a taro rop det kis una warkurai na minabalu anun o God. Lenutkai ra, un ara tokodos na petutna ra o Iesu i pami, o God in watung a taro rop a kum tene tokodos, ma det in laun. ¹⁹ Una pitarngat anun ara musano kut, a susut na taro det a kum tene sakino. Lenutkai ra, una mur wasiso anun ara musano kut, o Iesu Karisito, a susut na taro det a kum tene tokodos.

²⁰ Ra o God i pitar tar a kum Warkurai, a sakino petutna anun a taro i lubang. Ikut ra a sakino petutna i lubang, a marmaris kai anun o God i labo tauni. ²¹ A taro det kis utuntudu ina dekdekin a sakino petutna, ra i pitar a minat torom det. Ikut uniri, a taro ra det kis utuntudu ina dekdekin a marmaris anun o God, o God i watung det a kum tene tokodos, ra i pitar a nilaun tukum torom det, kibino una pinapam ra o Iesu Karisito anundat a Labino i sa pam tari.

6

Ra dat mat tomo nam o Karisito, dat in laun kai tomo nami

¹ Asau mo dat in watungi? Pepetlai, i wakak kut sur dat in pam a sakino

sur a marmaris anun o God in lubung?
² Awu! Dat mat gusun anundat a sakino petutna. Dat in laun pepetlai melet mo uni?
³ Pepetlai, ka mot tasmani lena, dat rop ra di baptaiso dat un o Karisito Iesu, dat mat tomo nami una baptais ra? ⁴ Lenra, ra di baptaiso dat, dat mat tomo nami ma di por tomo dat kai nami. O God a Tamandat i ukatutur pas o Karisito gusun a minat nama minamarino, lenkutkai ra dat in laun nama matok na nilaun.

⁵ Ra dat mat tomo nam o Iesu una nun a minat, i lingmulus dat in katutur tomo nami kai una nun a katkatutur melet gusun a minat. ⁶ Uni dat tasmani lena, a turai na nilaun anundat i sa mat tomo nam o Karisito unin nanai kutus, sur a sakino petutna una pinindat katu dekdekino. Ma ka dat in tene ititula melet mo anun a sakino petutna. ⁷ Uni osi ra i mat tomo nam o Karisito, i sa langolango gusun a sakino petutna.

⁸ Ra dat mat tomo nam o Karisito, dat nurnur lena dat in laun utkai tomo nami. ⁹ Uni dat sa tasmani lena, ra o Karisito i katutur melet gusun a minat, ken melet mo, uni a minat katu dekdekino mo sur in pam ukai i. ¹⁰ I mat ara dino kut, sur in rakon rop ru a dekdekin a sakino petutna, ma ken mat melet mo. Ra i laun melet, i laun sur in mur a nemnem anun o God. ¹¹ Lenkutkai ra, mot in nuk pas mot lena mot sa mat gusun anumot a kum sakino petutna, ma mot, ra tagun o Karisito Iesu, mot laun sur mot in mur a nemnem anun o God.

¹² I mo ra gong melet mo mot pitar a pinimot, ra i ser mat, sur in kis utuntudu ina dekdekin a sakino petutna, sur mot in mur a kum sakino nemnem ina pinimot. ¹³ Gong melet mo mot pitar tar tu du pini-mot sur in elar nama utna na pinapam sur a pam sakino. Mot in pitar tar mot torom o God, uni mot sa laun melet gusun a minat. Ma mot in pitar tar a kum du pinimot rop torom o God, sur in elar nama kum utna na pinapam sur a tokodos na pinapam. ¹⁴ Ka mot in kis melet mo utuntudu ina dekdekin a sakino petutna, uni ka mot kis mo utuntudu ina kum Warkurai. Uniri mot sa kis utuntudu ina marmaris anun o God.

Dat a kum tene ititula anun a tokodos na petutna

¹⁵ Ka dat kis mo utuntudu ina kum Warkurai, dat kis utuntudu ina marmaris anun o God. Pepetlai, dat in pam melet a sakino petutna? Awu ut! ¹⁶ Pepetlai, ka mot tasmani lena, ra mot pitar tar mot

torom taio sur mot in longoro i, mot a kum tene ititula anunu? Ra mot a kum tene ititula anun a sakino petutna, in pitar a minat torom mot. Ikut, ra mot a kum tene ititula anun o God ma mot ser longoro i, mot tokodos umatano. ¹⁷ A watung wakak torom o God, uni numugu mot a kum tene ititula anun a sakino petutna, ikut uniri mot mur a kum etowo nama balamot rop. A kum etowo ra di pitar tari tamot. ¹⁸ Di sa ulangolango pas mot gusun a sakino petutna, ma uniri mot a kum tene ititula mo anun a tokodos na petutna.

¹⁹ A wasiso nama kum wasiso elelar ri torom mot, uni a nuknuki mot ke talapor wakak una utna ra a wasiso uni. Numugu mot pitar tar a kum du pinimot sur in tene ititula anun a kum dur na petutna, ma anumot a kum sakino i lubung ma i labo. Ikut uniri, mot in pitar tar a kum du pinimot sur in tene ititula anun a tokodos na petutna, sur anumot a nilaun, anun o God.

²⁰ Numugu, ra mot tene ititula anun a sakino petutna, ka mot kis utuntudu ina dekdekin a tokodos na petutna. ²¹ Numugu mot ser pam a kum sakino petutna, ra uniri mot maimai uni. Ra mot pami, i warut mot pepetlai? I ben mot kut sur a minat. ²² Ikut uniri di sa ulangolango pas mot gusun a sakino petutna, ma mot tene ititula mukut anun o God. A win a ngas na nilaun ra, i ben mot sur mot in talapor, ma katu dur un mot, ra o God in pitar a nilaun tukum torom mot. ²³ Uni a kunukul ina sakino petutna, a minat. Ikut a etabor, ra o God i pitar orosi kut, i a nilaun tukum. A nilaun ra dat losi, kibino una pinapam anun o Karisito Iesu anundat a Labino.

7

A wasiso elelar una warkurai na nolin

¹ A kum tistising, an wasiso torom mot ra mot tasmani ut a kum Warkurai. Pepetlai, ka mot tasmani lena, det kut ra det laun det kis utuntudu ina kum Warkurai? ² Lenra an wasiso elelar una warkurai na nolin: Ra ara ino i nolin, a warkurai na nolin i ker tomo der nam anun a musano, ra a musano i laun utmakai. Ikut ra anun a musano i sa mat, a ino i sa langolango gusun a warkurai na nolin. ³ I mo ra a ino, ra in nolin melet nam tu musano, ma anun a musano i laun utmakai, a ino ra i pam a sakino. Ikut ra anun a musano i sa mat, a ino ra i langolango gusun a warkurai na nolin, ma ra in nolin melet nam tu musano, awu sur i pam a sakino.

⁴ Lenkutkai ra torom mot, a kum tisting, ra o Karisito i mat, mot kai mot mat tomo nami. I mo ra mot kai mot langolango gusun a kum Warkurai, sur mot tagun ara gisen, o Karisito, i ra i sa katutur melet gusun a minat. Dat tagun o Karisito, sur dat in wu a windat sur o God in gas nami.

⁵ Numugu anundat a nilaun i kis utun-tudu ina dekdekin a sakino nemnem ina pinindat, ra a kum Warkurai i ukatutur pat a kum sakino nemnem sur dat in pam a sakino petutna. Ra a sakino petutna una nundat a nilaun i pitar a minat kut. ⁶ Ikut uniri, dat mat gusun a kum Warkurai ra i ker ukai dat numugu. Ma di sa ulangolango pas dat gusun a dekdekin a Warkurai, ma dat papam torom o God nama matok na kisapi, ra a Tokodos na Nion i pitari torom dat. Awu sur i elar nama mugano kisapi, ra dat muri kut a kum Warkurai ra di tumus tari.

A sakino petutna i um doko dat

⁷ I mo ra asau mo dat in watungi? Pepet-lai, a kum Warkurai a sakino petutna? Awu ut! Ra katu Warkurai, kan tasmani kai a sakino petutna. Lenri, ra o God ken watung tari una kum Warkurai lena, "Gong u nuknuk laulau sur a utna anun taio," kan tasmani kai lena, a nuknuk laulau sur a utna anun taio i a sakino petutna. ⁸ Ikut a sakino petutna i sio pas a kisapi tiro korot una warkurai ra, sur in pam pat tar a kum wur ngas na nemnem sur a nuknuk laulau sur a utna anun taio. Ikut ra katu Warkurai, a sakino petutna katu dekdekino.

⁹ Ra ka tasmani utmakai a kum Warkurai anun o God, a laun. Ikut ra a sa tasman a kum Warkurai, a sakino petutna i laun pat unin balang, ra a mat. ¹⁰ A kum Warkurai ra o God i pitar tari sur in pitar a nilaun tang, i pitari kut a minat tang. ¹¹ Uni a sakino petutna i sio pas a kisapi tiro korot una Warkurai sur in toro pas iau, ra una dekdekin a Warkurai i um doko iau.

¹² I mo ra dat tasmani lena, a Warkurai katu dur uni, ma a kum du wasiso na Warkurai rop katu dur un det, det tokodos, ma det wakak. ¹³ Pepetlai, a utna ra i wakak i um doko iau? Awu ut! A sakino petutna i um doko iau. A sakino petutna i papam nama kum wakak na wasiso na Warkurai, ra i pitar a minat tang, sur in talapor lena a ngas na petutna ri i laulau. Una kum Warkurai dat tama lele pasi lena, a sakino petutna i laulau doko.

A wakak na petutna ra a nemi sur an pami, ka pami

7:6: Rom 8:2; 6:4 7:7: Kis 20:17; Lo 5:21 7:11: Stat 3:13 7:12: 1 Tim 1:8 7:15: Gal 5:17 7:23: Gal 5:17; 1 Pit 2:11 7:25: 1 Kor 15:57

¹⁴ Dat tasmani lena, a kum Warkurai anun o God, a kum utna na nion. Ikut iau a musano kut taginin upiso, ma a sakino petutna i ker tar iau sur an tene ititula anunu. ¹⁵ Ka talapor un asau ra a ser pami. Uni asau ra a nemi sur an pami, ka pami, ikut asau ra a ngeti, a ser pami. ¹⁶ Ra a ser pam asau ra ka nem na pami, i ese i lena a mulaot lena a kum Warkurai anun o God i wakak. ¹⁷ I mo ra awu sur iau mo a pam a kum utna ri, awu. A sakino petutna ut ra i laun un iau i pami. ¹⁸ A tasmani lena katu wakak na utna kuri i laun un iau. A wasiso lenra una sakino nemnem ina pining. Uni, a nemi ut sur an pam a wakakino, ikut ka pet lar pasi. ¹⁹ Uni, ka pam asau ra i wakak, ra a nemi sur an pami. Ikut a sakino petutna ra ka nemi sur an pami, i ra a ser pami. ²⁰ Ra a ser pam asau ra ka nemi sur an pami, awu sur iau mo a pami, a sakino petutna ra i laun un iau, i ser pami.

²¹ A tama ara ngas na dekdek kuri una nung a nilaun, lenri: Ra a nem na pam a wakakino, a sakino kut i wanpat. ²² Una nuknuking a nem doko a kum Warkurai anun o God. ²³ Ikut, una kum du pining a tama i kai ara se ngas na dekdek, ra ke mur a Warkurai anun o God. I waim tomo nama wakak na warkurai kuri una nuknuking, ma i ker ukai iau sur an kis una karabus anun a sakino petutna, ra i ser papam una kum du pining. ²⁴ Iau a pot na marmaris na musano iau! Osi in ulangolango iau gusun a pining ri, ra i wan sur a minat? ²⁵ O God ut. A watung wakak toromi ra i tulu ru o Iesu Karisito anundat a Labino, ra i ulangolango pas iau.

I mo ra iau ut, una nuknuking, iau a tene ititula anun a kum Warkurai anun o God, ikut, ra a mur a sakino nemnem ina pining, iau a tene ititula utuntudu ina dekdekin a sakino petutna.

8

Dat in kis utuntudu ina Tokodos na Nion

¹ I mo ra det ra tagun o Karisito Iesu, katu warkurai na minabalu mo anun o God torom det. ² Uni, ra iau tagun o Karisito Iesu, a dekdekin a Tokodos na Nion, ra i ser pitar a nilaun, i ulangolango pas iau gusun a dekdekin a sakino petutna, ra i pitar a minat tang. ³ A kum Warkurai anun o Moses ken pet lar pasi sur in turbat a sakino, uni a sakino nemnem ina pinindat, kalako dekdekino sur in mur a kum Warkurai.

Ikut o God i pet lar pasi. I tulu ru o Nutunu urin upiso ma i wanpat a mulusino elar nam dat, a taro na pam sakino. I mat

ma i sa ulaun pas dat gusun anundat a sakino. A warkurai na minabalu una kum sakino petutna anundat, o God i ubek tari una pinin o Iesu, ma i urop a dekdekin a sakino petutna. ⁴ I pami sur a tokodos na petutna, ra a kum Warkurai det wasiso uni, in nanpat mulus una nundat a nilaun. Ka dat mur meleti mo a sakino nemnem ina pinindat, dat muri mukut a nemnem anun a Tokodos na Nion.

⁵ Det ra det mur a sakino nemnem ina pinindet, a nuknukin det kai i kis kut un asau ra a sakino nemnem ina pinindet i nemi. Ikut, det ra det mur a nemnem anun a Tokodos na Nion, a nuknukin det i kis un asau ra a Nion i nemi. ⁶ Osi ra a nuknukino i kis utuntudu ina sakino nemnem ina pinino, in mat. Ikut, osi ra a nuknukino i kis utuntudu ina Tokodos na Nion, in laun ma in taramo a malmal. ⁷ Osi ra a nuknukino i kis utuntudu ina sakino nemnem ina pinino, der ebar nam o God. Uni osi ra a nuknukino i lenra, ke unatino pasi utuntudu ina kum Warkurai anun o God, ma ken pet lar pasi. ⁸ Ma det ra det kis utuntudu ina sakino nemnem ina pinindet, ka det in ugargas lar pas o God.

⁹ Ikut mot, ka mot kis mo utuntudu ina sakino nemnem ina pinimot. Awu! Mot kis utuntudu ina Tokodos na Nion, uni a Nion o God i laun un mot. Ikut, ra taio, a Nion o Karisito ke laun uni, i awu sur anun o Karisito. ¹⁰ Ra o Karisito i laun un mot, a pinimot in mat, kibino una sakino petutna, ikut a niomot in laun, uni mot tokodos umatano. ¹¹ A Nion o God, ra i ukatutur pas o Iesu gusun a minat, i laun un mot. Una pinapam anun a Niono ra i laun un mot, i ra i ukatutur pas o Karisito gusun a minat, in pitar a nilaun una pinimot, ra i ser mat.

Dat a kum nutnutun o God

¹² I mo ra a kum tistising, dat a kum tene pinapam. Ikut awu sur dat a kum tene pinapam tagun a sakino nemnem ina pinindat, sur dat in muri, awu. ¹³ Uni ra mot mur a sakino nemnem ina pinimot, mot in mat. Ikut, ra una dekdekin a Tokodos na Nion, mot in um doko ru a kum sakino petutna ra a pinimot i ser pami, mot in laun. ¹⁴ Uni det ra a Nion o God i mugu det, det a kum nutnutun o God. ¹⁵ Uni a Nion, ra mot los pasi, awu sur a ngas na nion ra i pam mot sur mot in tene ititula melet mo anun a nginara, awu. Mot los pas a Nion sur mot a kum nutnutun o God, ra i ras pas mot. Ma una dekdekin a Nion, dat ser kakabo torom o God lena, "Aba, Tita." ¹⁶ Ma a Tokodos na Nion i wasiso puaso una

niondat lena dat a kum nutnutun o God. ¹⁷ Ra dat a kum nutnutunu, dat in rakon a kum utna anun o God, tomo nam o Karisito. Ra dat in taramo a mamaut tomo nam o Karisito, numur dat in kis tomo nami una nun a minamar.

Dat kis langlang sur a minamar

¹⁸ A tasmani lena, a minamar ra o God in pitari tandat numur, in labo sakit taun a kum mamaut ra uniri dat taramo i. ¹⁹ A kudulano ukukis rop i kis langlang nama labino nemnem sur a bung ra o God in upuaso ru a kum nutnutunu. ²⁰ Uni a kum ukukis rop det kis una karabus na minat ma det utna oros kut. Awu sur a nemnem anun a kum ukukis, a nuknukin o God sur det in kis langlang sur a bung, ²¹ ra in palos det gusun a karabus na mereseng na minat. Det in kis langolango una minamar tomo nama kum nutnutunu.

²² Dat tasmani lena, tuk uniri a kudulano ukukis det kis langlang nama tinangis, elar nama ino ra i leser nama ngunungut sur in usus. ²³ Ma awu sur a kum ukukis kut, dat kai, ra o God i sa pitar tar a mugano etabor torom dat, a Tokodos na Nion, dat kai dat kis langlang nama tinangis nin ubalandat, nama labino nemnem sur a du bung ra o God in ras dat sur dat a kum nutnutunu, ma in ulangolango a pinindat. ²⁴ O God i sa ulaun pas dat, ma uniri dat kis langlang nama nurnur sur a ngas na nilaun ra in pitari torom dat numur. Ra taio in kis langlang sur tu utna, ikut ra i sa los pasi, ken kis langlang melet mo suri. Osi melet mo in kis langlang sur tu utna ra i sa los pasi? ²⁵ Ikut dat, dat kis langlang nama nurnur sur a utna ra ke wanpat utmakai. Dat kis langlang, ma a pinindat ke ngoro.

²⁶ Lenkutkai ra, a Tokodos na Nion ut i ser warut dat, uni kalako dekdekin dat. Ka dat tasman asau ra dat in wararing suri, ikut a Tokodos na Nion ut i ser wararing torom o God sur dat. I wararing nama dekdek na tartaramo ra ka din palos lar pasi nama wasiso. ²⁷ Ma o God i tama a balandat ma i tasman a nuknuk ina Tokodos na Nion, uni a Tokodos na Nion i wararing elar nama nemnem anun o God, sur a taro anunu.

²⁸ Ra dat tasmani lena, a kum utna rop ra i wanpat, o God i papam nami, sur a wakakino in nanpat torom det, ra det nem o God, ma i sa kabo pas det elar nama nuknukino. ²⁹ Numugu utmakai o God i sa tasman anun a taro. Ma numugu utmakai, i sa pilok pas det sur det in elar nam o Nutunu, sur i a mugano tan a susut na tistisino. ³⁰ Ma det ra o God i sa pilok

pas det, i kabo pas det kai. Ma det ra i sa kabo pas det, i watung det, det tokodos umatano. Ma det ra i watung det, det tokodos umatano, i pitari kai a minamar torom det.

Katu utna in ukis susuaro dat gusun a marmaris anun o God

³¹ I mo ra, asau mo dat in watungi una kum utna ri? Ra o God i kis tomo nam dat, osi mo in ebar tomo nam dat? Katutaio. ³² O God ke maris bat o Nutunu, awu. I pitar tari kut sur in mat sur dat rop. Ra i pitar tar o Nutunu sur in mat sur dat, in pitar orosi utkai a kum wakak na utna rop torom dat.

³³ Osi ra in takun a taro na pipilok anun o God? Katutaio in pet lar pasi, uni o God ut i sa watung tar dat lena dat tokodos umatano. ³⁴ Osi ra in watungi lena, din pitar a warkurai na minabalu torom dat? Katutaio. Uni o Karisito Iesu i sa mat sur dat. Awu sur i kut ra, o God i sa ukatur melet pasi kai gusun a minat, ma uniri kusapat mo i kis una papor sot na laman o God, ma i ser wararing sur dat. ³⁵ Osi in ukis susuaro dat gusun a marmaris anun o Karisito? Pepetlai, a kum mamaut in ukis susuaro dat? A kum ngunungut? O ra din ukadik dat? O a munurak? O kalako malu indat? O tu utna na iniru? O ra din um doko dat namin totok na inaim? ³⁶ Elar nami ra di sa tumus tari una Buk Tabu, "A kum bung rop a taro det nem na um doko met, uni met anum a taro.

Met elar nama kum sipsip ra di waninar sur din um doko det." *Sng 44:22*

³⁷ Awu, dat in pas pisopiso a kum utna ri, kibino un o Karisito ra i maris doko dat. ³⁸ Uni a tasmani ut lena, katu utna in ukis susuaro dat gusun a marmaris anun o God: A minat, a nilaun, a kum ensel, a kum laulau na nion, tu ngas na utna in nanpat uniri o numur, a kum sangsagor, ³⁹ tu ngas na utna tagisapat netes o taginin upiso. Awu! Katu utna mulus una kudulano ukukis in ukis susuaro lar pas dat gusun a marmaris anun o God, ra i pitar tari torom dat un o Karisito Iesu anundat a Labino.

9

O Pol i tupunuk una nun a taro

¹ A watung a lingmulusino ri umatan o Karisito, ka toro. Ma a Tokodos na Nion i upuaso i una nuknuking lena, a wasiso ri i lingmulus ut. ² A nuknuking i maut doko, ma ka mana nama tupunuk. ³ Ra gunuk an pet lar pasi, a nemi sur an tur keles a kum tistising, anung a taro Juda, ma din ubek

tari mukut anundet a warkurai na minabalu un iau, ma din rakon ru iau gusun o Karisito, sur din ulaun pas det. ⁴ Det a taro Israel, ra o God i ras pas det sur det a kum nutnutunu. I ese anun a minamar tandet, i pam a kum kunubus tomo nam det, i pitar tar a kum Warkurai tandet, i ese tar det una kisapi na lotu mulus, ma i uliliman tar det. ⁵ Det a kabotaro anun o Abaram, o Aisak ma o Jekop. Ra o Karisito i wanpat a musano mulus, i wanpat tagun det, i a Karisito ra i warkurai sur a kum utna rop, ma i ut ra o God. Dat in watung ulabo pasi, ma ken rop. Amen.

A pinapam anun o God torom a taro Israel

⁶ Ra a watungi lenra, awu sur a watungi lena o God ke pam sot pas anun a liliman torom a taro Israel, awu. Uni awu sur a taro Israel rop, det a taro Israel mulus umatan o God. ⁷ Ma awu kai sur det rop ra det wanpat tagun o Abaram, det a kum nutnutun o Abaram mulus. Awu. O God i watungi tan o Abaram lenri, "A kum tumtubum det in nanpat tagun o Aisak." *Stat 21:12*

⁸ Awu sur det rop ra det wanpat tagun o Abaram, ra din watung det lena a kum nutnutun o God. Awu. Det kut ra di usus det una liliman anun o God, det ra, o God i watung det lena, a kum nutnutun o Abaram mulus. ⁹ Uni a liliman anun o God i lenri, "Ra a bung in sot, an millet melet, ma o Sara i sa usus pas a nat musano." *Stat 18:10, 14*

¹⁰ Awu sur i kut ra, o Rebeka kai i usus pas a ru nutnutunu, ma ara tamander kut, o Aisak, a tubundat. ¹¹⁻¹² Ra ka di usus der utmakai, o God i watungi torom o Rebeka lena, "A mugano in papam torom a murmur." *Stat 25:23*

I watung a wasiso ri, ra aru nat ka der pami utmakai tu wakakino o tu sakino. O God i pami lenra, sur anun a pipilok in elar ut nam anun a nemnem. O God, i ra i ser kabo pas a taro, i pilok pas det ra i nem det, awu sur un tu pinapam ra det sa pam tari. ¹³ Elar nami ra di sa tumus tari una Buk Tabu lena, "O Jekop a nemi, ikut o Iso a ngeti." *Mal 1:2-3*

¹⁴ I mo ra, asau mo dat in watungi? Pepetlai, o God ke pam a tokodos na petutna? Awu! ¹⁵ Uni o God i watungi torom o Moses lena,

"An maris osi ra a nemi sur an marisi, ma an pam a wakakino torom osi ra a nemi sur an pam a wakakino toromi." *Kis 33:19*

¹⁶ I mo ra a pipilok anun o God, awu sur i kibino una nemnem anun taio, o un tu pinapam ra taio i pami. Anun a pipilok i kibino ut una nun a marmaris. ¹⁷ Elar nama wasiso una Buk Tabu, ra o God i watungi torom o Pero tong o Ijip lena, “A ubek tar ui sur un king, sur an ese a dekdeking una sau ra an pami un ui, sur a risang in nan sarara una rakrakon bual rop.” *Kis 9:16*

¹⁸ I mo ra o God i maris osi ra i nemi sur in marisi, ma i udekdek in balan osi ra i nemi sur in udekdek in balano.

¹⁹ Kutiro taio in ting iau lena, “Ra o God i pami lenra, sur asau ra i takun dat? Katutaio in turbat lar pas o God sur in pam sot pas anun a nemnem.” ²⁰ Osi ui ra u nuki lena un balu a wasiso anun o God? Ui a musano kut ui. Ra taio i pam tu utna, pepetlai, a utna ra i pami, i elar sur in watungi torom o naro ra i pami lenri, “Sur asau ra u pam iau lenri?” ²¹ Ra a tene pam kuro i nemi sur in pam lako ru kuro gusun ara du piopap kut, i ut i warkurai suri. In pam ara wakak na kuro sur a kum lamlabino balon, ma ara kai sur a kum bung oros kut.

²² Lenutkai ra o God i pami una taro. O God i ling sur in ese anun a kankan ma a dekdekino. Ikut i kis langlang utmakai, ma ke pitar lakit a minabalu torom a taro ra det kis utuntudu ina nun a kankan, det ra det sa waninar sur a iniru. ²³ I pami lenra sur in ese anun a labino minamar torom det ra det kis utuntudu ina nun a marmaris. Det ra i waninar tar det numugu utmakai sur det in kis tomo nami una nun a minamar. Ma uniri det kis langlang suri. ²⁴ Osi det? Dat ut, ra i sa kabo pas dat. Awu sur a taro Juda kut, a taro gisen kai. ²⁵ I elar nama wasiso anun o God una taro ra awu sur a taro Israel, ra a poropet Hosea i sa tumus tari lena,

“A taro ra awu sur anung, an watung det anung a taro,
ma det ra ka maris det, an maris det.”
Os 2:23

²⁶ Ma o Hosea i watungi kai lena,

“Una tamon ra numugu o God i watung tari tandet lena,
‘Mot awu sur anung a taro,’
din watung det ‘a kum nutnutun o God, ra i laun.’” *Os 1:10*

²⁷ Ikut o Aisaia i wasiso dekdek una taro Israel lenri,

“A taro Israel det susut elar nama woio nago utasi,
ikut o God in ulaun pas a pak na taro kut.

²⁸ A Labino in pam sot lakit pas anun a warkurai una rakrakon bual,
ma in pam sot rop pasi.” *Ais 10:22-23*

²⁹ I elar nama wasiso ra o Aisaia i watung tari numugu lenri,

“A Labino i dekdek sakit.

Gunuk ra ken madek tar lako taro tagun anundat a kabotaro,
dat sa iru rop elar nama taro tagitiro o Sodom ma o Gomora.” *Ais 1:9*

A taro Israel ka det nurnur

³⁰ I mo ra asau mo dat in watungi una kum utna ri? Det ra awu sur a taro Israel awu sur det dekdek sur det in tokodos umatan o God. Ikut o God i watung det lena det tokodos umatano, kibino una nundet a nurnur. ³¹ A taro Israel det dekdek sur det in mur a kum Warkurai, sur det in utokodos pas det, ikut ka det pet lari.

³² Asau a kibino? Uni ka det nurnur, det nuki kut lena det sa tokodos umatan o God, kibino una nundet a kum pinapam. Det tutuka una wat na tutuka, ma det puku. ³³ Elar nami ra di sa tumus tari una Buk Tabu lenri,

“Tama i, a ubek tar a wat sapat o Saion, ra a taro det in tutuka uni, ma det in puku.

Ma osi ra in nurnur uni, ken maimai.” *Ais 8:14; 28:16*

10

A taro Israel ka det tasmani lena det in tokodos pepetlai

¹ A kum tistising, anung a labino nemnem, ma anung a niaring torom o God, sur in ulaun pas anung a taro Israel. ² Uni a tasmani ut lena, det nem doko i sur det in ugargas o God, ikut ka det tasman asau ra det in ugargasi nami. ³ Ka det unatino pas det utuntudu in o God, sur in watung det lena, det tokodos umatano, uni ka det tasman a kisapi ra o God i pitari, sur taio in tokodos umatano, ma det lari kut sur det in ese det lena det tokodos umatano. ⁴ Uni a kum Warkurai anun o Moses i tuk taru kut un o Karisito, sur det ra det nurnur un o Karisito det in tokodos umatan o God.

⁵ O Moses i tumtumus una taro ra det mur a kum Warkurai, det in tokodos pepetlai umatan o God. I watungi lenri, “Osi ra in mur sot rop pas det, in laun uni i mur a kum Warkurai.” *Wkp 18:5*

⁶ Ma a Buk Tabu i watungi kai una taro ra det nurnur, ra o God i watung det lena det tokodos umatano. I watungi lena, “Gong mot nuki lena: Osi in nan usapat netes una langit?” I lenra mot nemi sur mot in ben pirso pas o Karisito urin. ⁷ Ma gong mot

nuki lena: “Osi in nan pirso sur a tamon anun a kum minat?” I lenra mot nemi sur mot in ben toto pas o Karisito gusun a minat. ⁸ A kukurai ina wasiso ri i lenri, “A wasiso anun o God i sa milau. Kura ut uwamot, ma ubalamot kai.” *Lo 30:12-14* Iri a wasiso una nurnur ra met warawai nami. ⁹ Ra u upuaso i nam anum a wasiso lena, o Iesu i a Labino, ma u nurnur unin balam lena o God i sa ukatutur melet pasi gusun a minat, o God in ulaun ui. ¹⁰ Uni, ra u nurnur namin balam, o God i watung ui lena u tokodos umatano. Ma, ra u upuaso i nam anum a wasiso lena, o Iesu i a Labino, o God in ulaun ui. ¹¹ Elar nami ra di sa tumus tari una Buk Tabu lenri, “Osi ra in nurnur uni, ken maimai.” *Ais 28:16*

¹² Ke senene torom a taro Juda ma torom a taro gisen kai: Ara Labino kut anundat rop. Ma in watung udan a taro rop ra det wararing toromi. ¹³ Uni a Buk Tabu i watungi lena, “Det rop ra det wararing torom a Labino, in ulaun pas det.” *Jol 2:32*

¹⁴ Ikut, ra ka det nurnur un a Labino, det in wararing pepetlai toromi? Ra ka det longoro tar tu wasiso uni, det in nurnur pepetlai uni? Ra kataio i inanos det, det in longoro i pepetlai? ¹⁵ Ra kataio i tulu a kum tene warawai, det in nan pepetlai nama wasiso? Elar nami ra di sa tumus tari una Buk Tabu lena, “A inawan pat anundet ra det wanpat nama Wakak na Wasiso, i wakak doko.” *Ais 52:7*

¹⁶ Ikut awu sur a taro rop det mur a Wakak na Wasiso. Elar nami ra a poropet Aisaia i sa watung tari lena, “Labino, osi i nurnur una numet a wasiso? Katutaio.” *Ais 53:1*

¹⁷ I mo ra dat nurnur, uni dat longoro a Wakak na Wasiso. A wasiso ra det longoro i, a wasiso ut anun o Karisito. ¹⁸ Ikut, a iting lena, pepetlai, a taro Israel ka det longoro i utmakai a Wakak na Wasiso? Det longoro i ut. Elar nami ra di sa tumus tari una Buk Tabu lenri,

“A taro taginin upiso det sa longoro in nalngandet*.

A wasiso ra i sa wan sarara una kum nubual rop una rakrakon bual.” *Wkp 19:4*

¹⁹ Pepetlai, a taro Israel ka det talapor una wasiso anun o God? Det talapor ut. Uni numugu o Moses i wasiso puaso una wasiso anun o God lena,

“Iau ut an ungangos tar mot sur a nuknuki mot in laulau torom a taro ra awu sur det tagun a labino kabotaro.

An ungangos tar mot kai sur a balamot in kankan,
uni an warut a kabotaro ra ka det mananos.” *Lo 32:21*

²⁰ Ma o Aisaia kai i wasiso nama dekdek lenri,

“A taro ra awu sur det sisio sur iau, det sa sio pas iau.

Ma a sa upuaso tar iau torom a taro ra ka det iting sur iau.” *Ais 65:1*

²¹ Ikut, una taro Israel, o Aisaia i watung a wasiso anun o God, lenri,

“A kum bung rop a ser kakabo na marmaris sur det,

a kum tene pitarngat, ma a kum tene rosumur.” *Ais 65:2*

11

O God i ulaun pasi kut a pak na taro Israel

¹ I mo ra a iting lena, pepetlai, o God i rosumur gusun anun a taro? Awu, i nuk pas det ut. Iau kai, a te Israel ut, o tubun o Abaram ma tagun a kabotaro Benjamin.

² O God ke rosumur gusun anun a taro, ra numugu utmakai i sa tasman tar det. Pepetlai, ka mot tasman asau ra a Buk Tabu i watungi un o Elaija? I eloklok tan o God una sakino petutna ra a taro Israel det pami. I watungi lena, ³ “Labino, det sa um doko ru anum a kum poropet, ma det sa rege ru i kai a kum kabulu na tuntun etabor torom ui. Ma iau sot mukut kuri, ma det nemi sur det in um doko iau kai.” *1 Kin 19:10, 14*

⁴ Ikut o God i balu o Elaija lena, “Anung a wonom mawit na arip na taro kura ut, ra ka det lotu torom o Bal*.” *1 Kin 19:18*

⁵ Lenkutkai ra uniri, o God i sa pilok pas a pak na taro, kibino una nun a marmaris.

⁶ O God i sa pilok pas det una nun a marmaris ut, awu sur una kum pinapam ra det pami. Gunuk ra o God in pilok pas det kibino una kum pinapam ra det pami, awu sur a marmaris ra.

⁷ Asau dat in watungi? A taro Israel det sisio sur tu kisapi ra det in tokodos uni umatan o God, ikut ka det sio pasi. Det kut ra i sa pilok pas det, det sio pasi, ma ara taro kai, awu. I udekdek bat a balandet. ⁸ Elar nami ra di sa tumus tari una Buk Tabu lena, “O God i utalara a nuknukin det, ma i upulu a matandet, sur gong det tam-tama,

ma i ukutkut a talngandet, sur gong det longoro,

tuk uniri.” *Lo 29:4*

10:12: Ap 15:9 * **10:18:** “In nalngandet” i wasiso una suan, a kum nangnang ma a kalang. I elar nami ra det wasiso talapor una minamar ma a labino pinapam anun o God torom a taro nin una rakrakon bual. **11:1:** 1 Sml 12:22; Sng 94:14; Pil 3:5 * **11:4:** O Bal i a torotoro na god. **11:6:** Gal 3:18 **11:8:** Ais 29:10

⁹ Ma o Dewid kai i watungi torom a Labino lenri,

“Ra det kis tomo una nundet a lu na inangon,
 un pukusi sur in elar namin nukun torom det,
 elar nama uben ra i pam sikot det,
 elar nam in nutung ra det puku dorong uni,
 ma a warkurai na minabalu kai.

¹⁰ Un upulu bat a matandet sur gong det tamtama,

ma un madek tar det,
 sur a surundet in bul tukum una labino maut.” *Sng 69:22-23*

O God i ulaun a taro ra awu sur a taro Israel

¹¹ I mo ra a iting melet lena, pepetlai, ra a taro Israel det puku, det puku tukum? Awu! Ikut, o God i ulaun pas a taro gisen, kibino una sakino petutna anun a taro Israel, sur in ukatutur a nuknukin a taro Israel, sur det kai det in nemnem sur o God in ulaun pas det. ¹² Ra a taro Israel det rosumur gusun a kisapi ra o God in ulaun det uni, o God i watung udan a taro gisen tagun a rakrakon bual. Ra i los ru a wasiso na udan gusun a taro Israel, i pitar tari torom a taro gisen. Ikut ra a taro Israel rop det in millet melet torom o God, a taro tagun a rakrakon bual det in dan sakit.

¹³ Uniri a tumtumus torom mot a taro ra awu sur a taro Israel. Mot tasmani lena a papam na aposel torom mot. Ma a ulabo pas anung a pinapam, uni i maut doko.

¹⁴ Una nung a pinapam ri, a nemi sur an ukatutur a nuknukin anung a kabotaro, sur lako taro tagun det, det in nemnem sur a wakakino ra o God i pam tari un mot, ra in ulaun pas det. ¹⁵ O God i rosumur munung gusun a taro Israel, sur in marom nama taro gisen tagun a rakrakon bual. Ra o God in ben melet pas a taro Israel, in wakak sakit, in elar nami ra det sa katutur melet gusun a minat. ¹⁶ An wasiso elelar lenri: Ra a mugano du beret di pitari torom o God, elar nama ngasino anun a taro Israel, in kudulano beret rop anun o God. Ra a wakakor nin nanai di pitari torom o God, a kum kanokano kai anun o God ut. †

A wasiso elelar una arin nanai na oliw

¹⁷ A taro Israel det elar namin nanai na oliw mulus, ma mot a taro gisen mot elar namin lomlom nin nanai na oliw. O God i pak ru a ramano kum kano gusun in nanai na oliw mulus. I los pas a ramano kum kano lomlom na oliw, ma i pam a bading

tomo namin nanai na oliw mulus. Ra uniri, mot laun tagun a polo ra i wan gusun a wakakor nin nanai na oliw mulus. ¹⁸ Gong mot tama pisopiso a kum kano ra di sa pak ru det. Ra mot tama pisopiso det, mot in nuk pasi lena, in wakakor nin nanai ut i pitar a nilaun torom mot a kum kano, awu sur a nilaun i wan tagun mot. ¹⁹ Kutiro mot in watungi lena, “O God i pak ru a ramano kum kano sur in kubus tar iau una nubual ra di sa pak ru det gusuni.” ²⁰ A lingmulus ut, o God i pak ru det uni ka det nurnur. Ikut mot, mot tur dekdek uni mot nurnur. Gong mot ulabo pas mot, mot in ngara. ²¹ Uni o God ke maris bat a kum kano tagun in nanai na oliw mulus. Ra i pami lenra torom det, in pami kai lenra torom mot ra ka mot nurnur.

²² I mo ra mot in tama a marmaris ma a kankan anun o God. I ese anun a kankan torom det ra det wan gisen gusuni, ma i ese anun a marmaris torom mot, ra mot tur dekdek una nun a marmaris, ma ka mot mana gusuni. Ikut, ra awu, in pak ru mot kai. ²³ Ma a taro Israel kai, ra det in nurnur det kai din kubus tomo melet det namin nanai na oliw mulus, uni i topas o God sur in kubus tomo melet det. ²⁴ O God i pak pas mot gusun in lomlom nin nanai na oliw, ma i kubus tomo tar mot namin nanai na oliw mulus, ra awu sur tagun mot. Ra i pami lenra, ke ngangitin sur in kubus tomo melet a kum kano tagun in nanai na oliw mulus namin nanai ino.

O God i nem na ese anun a marmaris torom a taro rop

²⁵ A kum tisting, a nemi sur mot in mananos una utna ra numugu i kis eno, sur gong mot ulabo pas mot. I lenri: Ara taro Israel, in dekdek a balandet, tuk ra a niluluk ina taro gisen ra det nurnur in elar nama nuknukin o God. ²⁶ Una kisapi ri, o God in ulaun rop pas a taro Israel. Elar nami ra di sa tumus tari una Buk Tabu lenri,

“A Tene Ulaun in nanpat tagisapat o Saion, ma in ben pukusa a kabotaro anun o Jekop gusun anundet a petutna na rosumur gusun o God. †

²⁷ Ra iri a kunubus ra an pami tomo nam det,

an lakro ru anundet a kum sakino petutna.” *Ais 59:20-21; 27:9*

²⁸ A taro Israel det a kum ebar anun o God, uni ka det nurnur una Wakak na Wasiso, sur in udan mot a taro gisen. Ikut, o God i maris doko det, uni i pilok pas a kum tumtubun det tagun numugu. ²⁹ Uni o God

11:11: Ap 13:46 † **11:16:** Aru wasiso elelar ri, i wasiso una taro Israel lena det anun o God. **11:17:** Ep

2:11-19 **11:22:** Jn 15:2, 4 † **11:26:** O Jerusalem di ser watungi kai nam o Saion. O Jekop ara risano kai o Israel.

11:27: Jer 31:33-34

ke ser los pukus anun a kum etabor ma ke ser pukus a nuknukino gusun a taro ra i sa kabo pas det. Awu!

³⁰ Numugu, mot a taro ra awu sur a taro Israel, mot ser pitarngat torom o God. Ikut uniri, mot sa rakon anun a marmaris, uni a taro Israel det pitarngat toromi. ³¹ I lenkutkai ra, uniri a taro Israel det pitarngat torom o God, sur det in rakon anun a marmaris, uni i maris mot. ³² Uni o God i madek tar a taro rop sur anundet a pitarngat in ker det, sur in ese anun a marmaris torom det rop.

A watung ulabo torom o God

³³ Nandet! I labo sakit a kum wakak na ululeng anun o God, anun a wakak na nuknuk ma anun a mananos.

A warkurai anun o God i labo sakit, kataio in palos lar pasi.

Katutao i tasman anun a kum kisapi.

³⁴ "Osi i tasman a nuknukin o God?"

Ma osi i wasiso waruti?" *Ais 40:13*

³⁵ "Osi ra i sa tabor tar o God nam tu utna sur in balu i toromi?" *Jop 41:11*

³⁶ Uni i ut i ukis a kum utna rop, ma i ut i kibin a kum utna rop, ma anunu ut a kum utna rop.

Dat in watung ulabo pas o God, ken rop ma ken rop. Amen.

12

Dat in pitar anundat a nilaun torom o God

¹ I mo ra a kum tisting, a saring mot sur mot in pitar tar a pinimot rop torom o God, uni o God i maris doko mot. Mot in pitari elar nama etabor ra i laun, ma katu dur uni, ma i elar nam anun a nemnem ut. I ra anumot a lotu mulus torom o God. ² Ma gong mo mot tamtaua ususer una nilaun tagun a rakrakon bual. Mot in pitar tar mot torom o God, sur in pukus a nuknuki mot, ma in umatoki, sur mot in tasman lele anun a nemnem. Anun a nemnem ra i wakak, i tokodos sakit, ma i gas nami.

³ Una marmaris anun o God, a watungi torom det rop lena: Gong mot nuk ulabo pas mot ut. Mot in nuknuk wakak un mot, elar ut nama nurun ra o God i sa pitar tari torom mot. ⁴ Dat taktakai ara pinindat kut, ikut a susut na du pinindat ma anundet a pinapam kai ke elar. ⁵ Lenkutkai lar dat, dat susut, ikut una pinin o Karisito dat takai kut. Dat taktakai dat tar pasano.

⁶ Una marmaris anun o God i pitar tar a kum se etabor torom dat. Osi ra i pitar tar a etabor na wasiso na poropet toromi, i wakak sur in papam nami, elar nam anun a nurun. ⁷ Ma osi ra o God i pitar tar a etabor sur in tene warut, i wakak sur in warut a taro. Ma osi ra o God i pitar tar a etabor sur in tene ususer, i wakak sur in ususer a taro. ⁸ Ma osi ra o God i pitar tar a etabor na ururagot tano, i wakak sur in uragot a taro nami. Ma osi ra o God i pitar tar a etabor sur in tene etabor, i wakak sur in palos lamano torom a taro. Ma osi ra o God i pitar tar a etabor sur in mugumugu, i wakak sur in papam dekdek sur in mugu wakak a taro. Ma osi ra o God i pitar tar a etabor sur in tene marmaris, i wakak sur in maris a taro nama gasgas.

A kum wakak na petutna ra dat in muri

⁹ In wakak ra anumot a marmaris torom a taro in lingmulus. Mot in nget a sakino, ma mot in pam ukai a kum petutna ra i wakak. ¹⁰ Mot in nem etetalai mot elar nami ra mot nem a kum tistisi mot. Mot in urur etetalai torom mot, ma gong mot nuk pas mot ut. ¹¹ Mot in papam dekdek, ma gong a pinimot i ngoro. Mot in papam torom a Labino nama labino gasgas una balamot. ¹² Mot in kis langlang nama gasgas sur a kum utna ra numur a Labino in tabor mot nami. Ra mot etorom a kum mamaut, mot in tur dekdek, ma gong mot mana nama niaring. ¹³ Ra a taro anun o God det sibo sur tu utna, mot in warut det. Mot in dekdek sur mot in gas pas a kum usiro.

¹⁴ Ra a taro det ban laulau mot, mot in watung udan det, ma gong mot saring o God sur in ban laulau det. ¹⁵ Ra a taro det gas, mot in gas tomo nam det. Ra det domos, mot in domos tomo nam det. ¹⁶ Mot in tur tomo nama wakak na petutna etetalai torom mot. Gong mot nuk ulabo pas mot, mot in gas sur mot in kis tomo nama taro ra ka di ulabo pas a risandet. Ma gong mot nuki lena mot mananos doko.

¹⁷ Gong mot balu a laulau ino nama laulau ino. Mot in nuknuk wakak sur mot in pam a petutna ra a taro det in tama lele i lena i tokodos. ¹⁸ Ra i topas mot, mot in dekdek sur mot in kis na malmal nama taro rop. ¹⁹ A kum paspasang, gong mot balu taio ra i pam a laulau ino torom mot. Mot in madek tari kut torom o God sur in balu i. Uni di sa tumus tar a wasiso ra a Labino i watungi una Buk Tabu lena, "Anungi kut

a warkurai na minabalu. Iau an mabalu.”
Lo 32:35

²⁰ Ikut mot in pami lenri,
“Ra anum a ebar i murak un tabori,
ra i muruk un tabori nam lako danim.
Ra un pami lenra toromi, in maimai una
nun a sakino petutna.” *Snd 25:21-22*
²¹ Gong u madek tar a sakino sur in winim
pas ui. Un winim pas a sakino nama
wakakino.

13

O God ut i pam pat a gapman

¹ Dat rop dat in unatino pas dat utuntudu
ina taro ra det pam ukai a warkurai tagun
a gapman. Uni o God ut i pam pat a kum
gapman rop, ma katu gapman ra o God ke
pam pat tari. ² I mo ra osi ra ke mur
a warkurai anum a gapman, ke mur asau ra
o God ut i ubek tari. Ma det ra det pami
lenra, det ut det in dat pas a warkurai un
det. ³ Osi ra i pam a wakak na petutna
ken ngara sur a gapman, ikut osi ra in
pam a sakino in ngara ut. Pepetlai, u nemi
sur un langolango gusun a nginara sur a
mugumugu tagun a gapman? Un pam a
wakakino ra in watung ulabo pas ui. ⁴ Uni o
God ut i ukis tari sur i a tultul anunu, sur in
pam a wakakino torom ui. Ikut, ra u pam
a sakino, un ngara, uni ke pam orosi kut
in totok na inaim. A mugumugu tagun a
gapman i a tultul anum o God, sur in pitar
a warkurai na minabalu torom osi ra i pam
a sakino. ⁵ I mo ra i wakak sur dat in
unatino pas dat utuntudu ina mugumugu
tagun a gapman. Awu sur i kibino kut
uni a mugumugu in pitar a warkurai na
minabalu torom dat, i kibino utkai uni a
wakak na nuknuk una balandat i inanos
dat lena dat in pami lenra.

⁶ I mo ra mot ser pitari kai a takis torom
a gapman, uni a kum mugumugu tagun a
gapman det a kum tultul anum o God, ma
det ser pitar anundet a nilaun una pinapam
na tamtamabat a taro. ⁷ Mot in pitari torom
a taro rop asau ra i tokodos sur mot in pitari
torom det: Mot in pitar a takis torom det
ra det ser los a takis, ma mot in pitar a
totokom torom det ra det ser los totokom.
Ma mot in urur torom det, ma mot in ulabo pas
det ra i tokodos sur mot in ulabo det.

*Osi ra i nem a taro i sa pam sot pas a
kum Warkurai*

⁸ Gong u madek tar anum tu dinau torom
taio. Ikut anum ara dinau kut ra kon mana
u balu i, i lenri: Un ser nem a taro. Uni

osi ra i nem a taro, i sa pam sot pas a kum
Warkurai anum o God. ⁹ Iri a kum Warkurai
anum o God: “Gong u pam a sakino nam tu
ino anum taio o nam tu musano anum taio.
Gong u um doko taio. Gong u wolong. Gong
u nuknuk laulau sur a utna anum taio.” A
kum warkurai ri ma a kum warkurai rop
kai, ara warkurai kut i pulus bat det. I lenri,
“Un nem o pasam elar nami ra u nem ui ut.”

Wkp 19:18

¹⁰ Osi ra i nem a pasano, ken pam tu sakino
toromi. I mo ra osi ra i pami lenra, i pam
sot rop pas a kum Warkurai.

¹¹ Mot in pami lenra, ma mot in tama
lele a kum bung ri. A du bung i sa sot sur
mot in tuangun gusun a ininep. Uni, ra dat
turpas a nurnur un o Karisito, a bung ra
o God in ulaun dat, kabaut i milau mulus,
ikut uniri i sa milau. ¹² I sa labino mirum
pas, ma milau mo in waspi. I mo ra dat
in lakro ru i mo a kum pinapam tagun a
dumirum, ma dat in emar pas nama kum
utna na inaim tagun a talapor. ¹³ Dat in
muri mo a tokodos na petutna, elar nami
ra dat laun una waspi. Gong dat sipak, ma
dat longlona tuptupukus. Gong dat pam a
kum petutna na pamuk, ma a kum utna na
maimai. Gong dat taptapagol, ma gong dat
nuknuk laulau. ¹⁴ Ikut mot in emar nama
nilaun anum a Labino o Iesu Karisito, ma
gong mot nuknuk sur tu kisapi sur mot in
ugasgas a sakino nemnem ina pinimot.

14

*Gong dat etakun una kum utna ra ke
labo umatan o God*

¹ Mot in gas pas taio ra ke dekdek anum a
nurnur, ma gong mot tama pisopiso i. Gong
mot engaras una kum utna ra ke talapor
toromi. ² Ara taro det nurnur lena, i wakak
kut ra det in nan a kum utna rop. Ma ara
taro ra ke dekdek anundet a nurnur, ka det
wan a komonong ina kum wewegua. Det
wani kut a utna ra di maruti. ³ Osi ra i
nurnur lena i wakak kut ra in nan a kum
utna rop, gong i tama pisopiso o naro ra ke
wan a kum utna rop. Ma osi ra ke wan a
kum utna rop, gong i warkurai o naro ra
i wan a kum utna rop lena i pam a sakino
petutna, uni o God ut i sa gas pasi. ⁴ Osi ui ra
un warkurai a tultul anum taio gisen? Anun
a Labino ut in tama i, ra in tur dekdek o in
puku. Ikut in tur dekdek ut, uni a Labino in
pet lar pasi sur in udekdeki.

⁵ Lenkutkai ra, ara taro det nuki lena, ara
bung kut i labo taun a kum bung. Ma ara
taro kai det nuki lena, a kum bung rop det

elar rop kut. I wakak sur dat rop arara taktakai dat in tasman wakak asau ra i tokodos, elar nama nuknukin dat. ⁶ O nara ra i nuki lena, ara bung i labo, a nuknukino i lenra, sur in ulabo pas a Labino. Ma o nara ra i ser wan a kum utna rop, i pami sur in ulabo pas a Labino, uni i ser watung wakak torom o God. Ma o nara kai, ra i ser wani kut a kum utna ra di maruti, i pami kai, sur in ulabo pas a Labino, ra i ser watung wakak torom o God. ⁷ Ra dat laun awu sur anundat ut a nilaun, ma ra dat mat, awu sur a utna anundat. ⁸ Ra dat laun, dat laun sur a Labino. Ma ra dat mat, dat mat sur a Labino. I lenra, ra dat laun, ma ra dat mat, dat anun a Labino ut.

⁹ I mo ra o Karisito i mat ma i laun melet, sur i a Labino anundat ra det sa mat, ma anundet kai ra det laun. ¹⁰ Ma ui, u lai ra u takun o tisim? U lai ra u tama pisopiso o tisim? Uni dat rop dat in tur numugu tan a kiskis na warkurai anun o God. ¹¹ Elar nami ra di sa tumus tari una Buk Tabu lena, "A Labino i watungi lena, 'Ra i lingmulus a laun, a wasiso kai ri i lingmulus:

A taro rop det in kis butkeke sa numugu tang,

ma a taro rop det in watung puaso i lena iau o God.' " *Ais 45:23*

¹² Lenra, numur dat rop taktakai dat in wasiso puaso torom o God una kum utna rop ra dat sa pam tari.

Gong dat pam tu utna ra in ban laulau a nurnur anun taio

¹³ I mo ra gong mo dat takun etalai dat. Mot in nuknuk wakak sur gong mo mot pam tar tu petutna ra tu tisimot in puku uni. ¹⁴ Uni iau tagun a Labino o Iesu, a tasman mulusi lena, katu utna na inangon in ban ling tar dat sur dat in laulau umatan o God. Ikut, ra taio i nuki lena in laulau umatan o God ra in nan tu ngas na utna, i ut i tasmani lena ke tokodos toromi sur in nani. ¹⁵ Ra un nan tu utna ra i ban purpuruon a nuknukin o tisim, ko upuaso a petutna na marmaris ra. Gong u maked tar tu utna na inangon in ban laulau a nurnur anun tu tisim ra o Karisito i mat suri. ¹⁶ Ra u nuki lena ara utna i wakak, gong u pam tu petutna ra in ban ling tar taio sur in watung laulau a utna ra. ¹⁷ Uni a matanitu anun o God awu sur tagun a utna na inangon ma a ininum. A matanitu anun o God tagun a tokodos na petutna, a malmal ma a gasgas tan a Tokodos na Nion. ¹⁸ Ma osi ra in mur a kum petutna ri una nun a pinapam torom o Karisito, o God in gas nami, ma a taro

kai det in tama lele i lena anun a petutna i tokodos.

¹⁹ I mo ra dat in dekdek sur dat in pam a petutna na malmal, ma sur dat in udekdek a nurnur anundat etetalai. ²⁰ Ma gong mot ban laulau a pinapam anun o God, kibino una utna na inangon kut. A kum utna na inangon rop i wakak kut umatan o God, ikut ra taio in nan tu utna ra in ban ling tar taio sur in puku una nun a nurnur, a utna ra i pami ke tokodos. ²¹ I wakak sur gong u wan tar a komonong ina kum wewegua, ma gong u inum a wain, ma tu ngas na utna kai lenra, sako a pinapam ra in ban ling tar o tisim sur in puku.

²² A kum utna rop ra u nuki lena i wakak torom ui, anumur ut nam o God. Osi ra i pam tu utna ma a nuknukino ken takuni uni, i dan. ²³ Ikut osi ra i wangon, ma i wur nuknuk una utna ra i wani, din warkurai i ut uni, uni awu sur i mur anun a nurnur. Ma a kum utna rop ra taio i pami ma anun a nurnur ke mulaot uni, i ra a sakino petutna.

15

Dat in warut det ra ka det tur dekdek una nurnur

¹ Dat ra dat tur dekdek, i wakak sur dat in warut det ra ka det tur dekdek una nurnur. Ma gong dat nuk pas dat kut. ² Dat rop taktakai dat in nuk pasi kai a pasandat, ma dat in pam a kum utna ra in waruti, ra in udekdek anun a nurnur. ³ Uni o Karisito kai, awu sur i nuk pasi ut, awu. I pami elar nami ra di sa tumus tari una Buk Tabu lena, "O God, a kum sakino wasiso ra di watungi un ui, i ukadik iau utkai." *Sng 69:9*

⁴ Uni a kum wasiso rop ra di sa tumus tari numugu utmakai una Buk Tabu, di tumus tari sur in user dat, sur dat in tur dekdek una anundat a nurnur, ma in warut dat kai, sur dat in kis langlang nama nurnur sur a kum utna o God in pami numur.

⁵ A wararing lena o God ut, ra i ser udekdek anundat a nurnur, ma i ser warut dat, in dat tomo mot sur in takai kut a nuknuki mot, ra mot mur a nilaun anun o Karisito Iesu. ⁶ A wararing sur in takai kut a nuknuki mot ma a walngamot, ra mot watung ulabo pas o God, a Taman anundat a Labino o Iesu Karisito.

O Karisito i wanpat utkai sur a taro ra awu sur a taro Israel

⁷ Mot in gas pas mot etetalai elar nami ra o Karisito i gas pas mot, sur mot in ulabo pas o God. ⁸ A watungi tamot lena, o Karisito i wanpat elar nama tultul anun a

taro Juda, sur in pam sot pas a kum liliman anun o God ra i sa pam tari torom a kum tumtubun det. Ra i pami lenra, i ese i lena a wasiso anun o God i lingmulus. ⁹ I wanpat kai sur a taro ra awu sur a taro Juda det in watung ulabo pas o God una nun a marmaris. Elar nami ra di sa tumus tari una Buk Tabu lenri,

“I mo ra an watung ulabo pas ui nisan a taro ra awu sur a taro Israel, ma an kekeleke na watung gasgas torom ui.” *2 Sml 22:50*

¹⁰ Ma di sa tumus tari kai lenri, “Mot a taro ra awu sur a taro Israel, mot in gas tomo nama taro anun o God.” *Lo 32:43*

¹¹ Ma di sa tumus tari kai lenri, “Mot ra awu sur a taro Israel, mot in watung ulabo pas a Labino, mot a kum kamkabo taro rop mot in kekeleke na watung ulabo toromi.” *Sng 117:1*

¹² O Aisaia kai i wasiso na poropet un o Karisito lena, “Ara in nanpat tagun a kabotaro anun o Jesi.*

In kis na king ma in warkurai sur a taro tagun a kum gapman rop, ma a taro ra awu sur a taro Israel det in kis langlang nama nurnur sur a wakakino ra in pami.” *Ais 11:10*

¹³ A wararing torom o God, i ra dat kis langlang suri nama nurnur sur a wakakino ra in pami. A wararing sur in ubukus mot ra mot nurnur uni nama labino gasgas ma a malmal. Ma una dekdekin a Tokodos na Nion ut, mot in kis langlang nama labino nurnur sur a wakakino, ra numur o God in pami.

O Pol i wasiso una nun a pinapam

¹⁴ A kum tistising, a tasmani ut lena mot bukus nama wakak na petutna ma a mananos, ma mot pet lar pasi sur mot in ususer etetalai mot. ¹⁵ Ikut, a tumus a pas ri torom mot, ma a wasiso dekdek una a ramano kum utna, sur mot in nuknuk melet uni. A tumtumus torom mot, uni o God i pitar anun a marmaris torom iau, ¹⁶ sur an tene pinapam anun o Karisito Iesu torom a taro ra awu sur a taro Juda. A elar nama tene etabor torom o God. A warawai nama Wakak na Wasiso anun o God, sur a taro ra awu sur a taro Juda, det anung a etabor torom o God ra in gas nami. Ma a Tokodos na Nion i sa rus talapor tar det.

¹⁷ Un o Karisito Iesu, a gas doko una nung a pinapam ra a pami torom o God.

¹⁸ Ka nem na wasiso un tu utna gisen. A nem na wasiso kut una pinapam, ra o Karisito i sa pam tari ulamang, sur an ben a kum taro ra awu sur a taro Juda sur det in mur a wasiso anun o God. Det muri kibino una nung a kum wasiso ma anung a kum pinapam. ¹⁹ Det tama a dekdekin a kum ukinalong ma a kum utna na ukisin ra a pami nama dekdekin a Tokodos na Nion. Tagisapat o Jerusalem tuk tong o Iirikum, a sa warawai rop pas iai nama Wakak na Wasiso anun o Karisito. ²⁰ Una turturkibin ina nung a pinapam torom o Karisito tuk uniri, anung a labino nemnem sur an warawai nama Wakak na Wasiso una kum tamon ra kabaut det tasman o Karisito, sur gong a pam a rumu netes una pos ra ara ut i sa utur tari. ²¹ Elar nami ra di sa tumus tari una Buk Tabu lenri, “Det ra kabaut di inanos det uni, det in tama i,

ma det ra kabaut det longoro i, det in tasmani.” *Ais 52:15*

²² A lari sur an nan utiro torom mot, ikut a balon doko una pinapam na warawai una kum tamon. I mo ra ka wan lar pas utmakai torom mot.

O Pol i nemi sur in nan utong o Rom

²³ Ikut, uniri anung a pinapam una kum papor ri, i sa rop. Ma a susut na kilalo, a nem doko i sur an tama mot. ²⁴ Ra an nan utong o Spein, a nuk i lena an kis lilik pas nisamot ma dat in gas tomo pas. Numur an katatur melet sur an nan utong o Spein. Ma a nemi sur mot in warut iau una nung a inawan utong.

²⁵ Ikut uniri, an nan munung usapat o Jerusalem sur an warut a taro anun o God sapat. ²⁶ Uni a kum tene nurnur tong una aru papor Masedonia ma o Akai det gas sur det in woro tomo a mani, sur det in warut a kum tene nurnur ra det sibo sapat o Jerusalem. ²⁷ Det gas sur det in pami lenra. Ma i tokodos kai ra det in pam a petutna na minabalu torom a taro Juda, uni a taro Juda det sa warut tar det ra awu sur a taro Juda, sur det kai det in rakan a kum utna na nion ra o God i udan det nami, ra numugu anun a taro Juda kut. Ma i wakak sur det bulung det in warut a taro Juda nama mani. ²⁸ Ra a sa urop ru anung a pinapam ma a sa pitar tar a etabor ri torom a kum tene nurnur sapat o Jerusalem, an nan utong o Spein, ma una nung a inawan sur utong, an tama mot. ²⁹ Ma a tasmani lena, ra an nanpat torom mot, an bukus

15:9: Ap 3:25; Sng 18:49 15:12: Tam 5:5 * 15:12: O Jesi a taman o king Dewid. 15:15: Rom 1:5; 11:13
 15:20: 2 Kor 10:15-16 15:22: Rom 1:13 15:25: 1 Kor 16:1-4 15:26: 1 Kor 16:1; 2 Kor 8:1; 9:2, 12; Ap 24:17
 15:27: 1 Kor 9:11 15:29: Rom 1:11 15:30: 2 Kor 1:11; Kol 4:3; 2 Tes 3:1

nama kum utna na nion ra o Karisito i udan tar iau nami, sur in warut mot.

³⁰ A kum tistising, una risan a Labino o Iesu Karisito, ma una marmaris anun a Tokodos na Nion, a saring mot sur mot in dekdek tomo nam iau, nama niaring torom o God sur in warut iau. ³¹ Mot in saring o God sur in ulaun iau gusun a taro ra ka det nurnur, ra kurong det una papor Judia. Ma mot in wararing kai sur a taro anun o God sapat o Jerusalem det in gas pas anung a pinapam na etabor torom det. ³² Ra o God i nemi lenra, an nanpat torom mot nama gasgas, ma an mana tomo nam mot sur an los melet pas a dekdek.

³³ O God, i a kibin a malmal, in kis tomo nam mot rop. Amen.

16

A marmaris anun o Pol torom a taro na lotu tong o Rom

¹ A inanos mot una tisindat o Pibi. A ino ri, a wakak na tene pinapam tagun a taro na lotu tong o Senkria. ² A saring mot sur mot in gas pasi una risan a Labino, lar a kum tene nurnur det ser pami. Ma mot in waruti nam lako utna ra in sibo suri, uni i sa warut tar iau, ma a susut na taro kai.

³ Mot in pitar anung a marmaris torom o Prisila ma anun a musano o Akuila, ra metul papam tomo una pinapam anun o Karisito Iesu. ⁴ Ka der nuk pas anunder a nilaun sur der in warut iau. A watung wakak doko torom der, ma awu sur iau kut, a kum taro na lotu rop ra awu sur a taro Juda, det kai det watung wakak torom der. ⁵ Mot in pitar anung a marmaris kai torom a taro na lotu ra det ser lotu tomo una nunder a rumu.

Mot in pitar anung a marmaris torom a wakak na pasang o Epenetus, i a mugano musano tagitong una papor Asia ra i nukpukus ma i nurnur un o Karisito.

⁶ Mot in pitar anung a marmaris torom o Maria, ra i sa pam tar a dekdek na pinapam sur in warut mot.

⁷ Mot in pitar anung a marmaris kai torom o Andronikus ma o Junias, aru kukung ra der kis tomo nam iau una karabus. Epotor tan a kum aposel a risander i wan sarara. Der aru mugano te Karisito tang, ma iau, a mur tander.

⁸ Mot in pitar anung a marmaris torom o Ampliatius, i ra a nem doko i una risan a Labino.

⁹ Mot in pitar anung a marmaris torom o Urbanus, ara tene pinapam kai tagun met

una pinapam anun o Karisito, ma torom a wakak na pasang kai o Stakis.

¹⁰ Mot in pitar anung a marmaris torom o Apelis, i ra di sa lar tari ma i upuaso i lena i a tene nurnur mulus un o Karisito. Mot in pitar anung a marmaris torom det ra tagun a rumu anun o Aristobulus.

¹¹ Mot in pitar anung a marmaris torom o Erodion, a kukung. Mot in pitari kai anung a marmaris torom det tagun a rumu anun o Nakisus ra det tagun a Labino.

¹² Mot in pitar anung a marmaris torom o Tripina ma o Triposa. Aru ino ri, der sa pam tar a dekdek na pinapam sur a Labino. Mot in pitar anung a marmaris torom ara wakak na pasang kai o Pesis, ara ino ra i sa pam tar a dekdek na pinapam sakit sur a Labino.

¹³ Mot in pitar anung a marmaris torom o Rupus, i ra a Labino i pilok pasi. Mot in pitar anung a marmaris torom o nano kai. I warut iau elar ut nam o nang.

¹⁴ Mot in pitar anung a marmaris torom o Asinkritus, Plegon, Ermes, Patrobas, Ermas ma a kum tistisin dat kai una nurnur ra det kis tomo nam det.

¹⁵ Mot in pitar anung a marmaris torom o Pilologus ma o Julia, o Nereus ma a tisinno a ino, ma o Olimpasi, ma a taro rop anun o God ra det kis tomo nam det.

¹⁶ Ra mot epastorom, mot in maris etetalai mot nama egom na marmaris, ma mot in pami elar nami ra mot anun o God. A taro na lotu anun o Karisito tagun a kum tamon rop, det pitar anundet a marmaris torom mot.

A kum uruop na wasiso na warut

¹⁷ A kum tistising, a saring mot sur mot in tumarong mot gusun a taro ra det ser pagol susuaro a taro na lotu, ma det watung a kum wasiso ra i turbat a kum etowo ra mot sa rakon pasi. Mot in nan gisen gusun det. ¹⁸ A ngas na taro ra, awu sur det mur anundet a Labino o Karisito, awu. Det muri ut a nemnem ina pinindet. Det ser wasiso nama kum namnamin na wasiso ma a wasiso na ugargas, sur det in usobor a taro ra ka det mananos wakak. ¹⁹ A taro rop det sa talapor lena mot sa mur a wasiso anun a Labino, ra a gas doko nam mot. Iku, a nemi sur mot in mananos wakak un asau ra i wakak, ma gong mot lason un asau ra i laulau. ²⁰ Ma o God, i ra a kibin a malmal, milau mo in pas ginogino o Satan utuntudu ina kum kikimot.

A marmaris anun anundet a Labino o Iesu in kis tomo nam mot.

A kum paspasan o Pol det pitar anundet a marmaris

²¹ O Timoti, ra mir papam tomo una pinapam anun o Karisito, i pitar anun a marmaris torom mot. Ma a tulu kukung kai, o Lusius, o Jeson ma o Sosipater, detul pitar anundetul a marmaris torom mot.

²² Iau kai, o Tertius, ra a tumus a kum wasiso anun o Pol una pas ri, a pitar anung a marmaris torom mot nama risan a Labino.

²³⁻²⁴ O Gaius i pitar anun a marmaris torom mot. A musano ri i gas pas iau, tomo nama taro na lotu rop, ma i papos anun a rumu torom met. Ma o Erastus a tene tantamabat a mani tagun a tamon ri, ma o Kwatus a tisindat, der kai der pitar anunder a marmaris.*

A wasiso na ulabo torom o God

²⁵ O God i pet lar pasi sur in utur dekdek mot una nurnur, elar nam anun a Wakak na Wasiso ra a ser warawai nami, a Wakak na Wasiso un o Iesu Karisito. Tagitiro numugu utmakai, a Wakak na Wasiso ra i kis eno. ²⁶ Ikut uniri, i sa wanpat puaso. Met wasiso talapor una sau ra a kum poropet det watung tari un o Karisito. Met pami elar nami ra o God, i ra i laun tukum, i inanos tar met sur met in pami, sur a taro tagun a kum gapman rop, det in nurnur ma det in mur a wasiso anun o God.

²⁷ Dat in watung ulabo pas o God, i ra ara God kut, ra a tene mananos. Dat in watung ulabo pasi kibino un o Iesu Karisito, uniri ma numur ma ken rop. Amen.

16:23-24: Ap 19:9; 1 Kor 1:14 * **16:23-24:** Una ramano kum du buk una wasiso Grik, a ramano kum wasiso kai i kis una vers ri. I lenri: *A marmaris anun anundat a Labino o Iesu Karisito in kis tomo nam mot rop. Amen.* **16:25:** Ep 1:9; 3:5, 9; Kol 1:26; Rom 1:5

A Mugano Pas anun o Pol torom a taro Korin

A wasiso talapor mugu

Ra o Pol i kis tong o Epeses, i tumus a pas ri torom a taro na lotu tong o Korin.

O Korin i a labino tamon ra i kis nago utasi, una papor Akaia. A tamon anun a taro Griik, ikut a susut na taro Juda kai det kis tiro iai.

O Pol i wan utong o Korin una nun a manru na inawan, ra i warawai nama Wakak na Wasiso torom det. I kis ara kilalo ma ara kukur tong, ma i ususer det (tama Ap 18:1-17). Numur, o Apolos i wan torom det (tama Ap 18:27).

O Pol i tumus a pas ri uni i longoro a wasiso una nundet a kum petutna ra i ukis susuaro det (tama 1 Kor 1:10).

O Pol i tumusi kai, sur in balu anundet a pas ra det sa tumus tari toromi (tama 1 Kor 7:1 ma 8:1).

A inawan ina Mugano Pas Korin:

A turturkibin ina buk ri (1:1-9)

A kinkinis susuaro anun a taro na lotu (1:10-4:21)

A kum sakino petutna ra ara taro na nurnur det pami (5:1-6:20)

A kum etowo una kinkinis na nolin (7:1-40)

Gong dat lotu torom a Labino ma torom a kum laulau na nion kai (8:1-11:1)

A kum warkurai na lotu, ma a kum etabor anun a Tokodos na Nion (11:2-14:40)

A katkatatur melet anun o Iesu gusun a minat, ma a taro na nurnur kai (15:1-58)

A etabor torom a taro na lotu tong o Judia (16:1-4)

A ururup na wasiso anun o Pol torom det (16:5-24)

¹ Iau o Pol, ra o God i kabo pas iau, elar ut nam anun a nemnem sur an aposel anun o Karisito Iesu. Mir nam o Sostenes a tisindat, mir tumtumus ² torom mot a taro na lotu anun o God ra mot kis tiro o Korin. Mot ra o Karisito Iesu i gos talapor pas anumot a nilaun, ma i kabo pas mot sur mot a taro anun o God. Mot a taro anun o God tomo nama taro rop una kum tamon rop ra det lotu una risan anundat a Labino o Iesu Karisito, i ra a Labino anundet ma anundat kai.

³ A marmaris ma a malmal tan o God a Tamandat ma a Labino o Iesu Karisito, in kis tomo nam mot.

O Pol i watung wakak torom o God una taro Korin

⁴ A ser watung wakak torom o God un mot, kibino una nun a marmaris ra i pitar tari torom mot un o Karisito Iesu. ⁵ Uni una numot a kinkinis tomo nam o Karisito, o God i udan mot nama kum utna rop. I udan mot una numot a wasiso rop ma numot a mananos rop. ⁶ I pami lenra uni anumet a wasiso talapor un o Karisito, i sa wanpat talapor una numot a nilaun. ⁷ I mo ra ka mot in sibo sur tu etabor anun a Tokodos na Nion torom mot, ra mot ser kis langlang nama gasgas sur anundat a Labino o Iesu Karisito ra in nanpat puaso. ⁸ I ut in udekdek mot tuk una ururup na bung, sur katu utna ra din takun mot nami una bung anun anundat a Labino o Iesu Karisito. ⁹ Ma a utna ri ra o God i watungi in pami ut. Ra i kabo pas mot sur mot in lason tomo nam o Nutunu o Iesu Karisito anundat a Labino.

A taro na lotu det taptapagol

¹⁰ A kum tistising, a saring mot nama risan anundat a Labino o Iesu Karisito, sur mot rop mot in tur tomo, ma gong mot taptapagol. Ma in takai kut a nuknuki mot, ma anumot a nemnem kai. ¹¹ A kum tistising, ara taro ra det kis una rumu anun o Kloe, det inanos iau lena mot ser engaras etetalai. ¹² An palos a kukurai ina wasiso ri lena: Ara taro tagun mot det watungi lena, "A mur o Pol," ara taro det watungi lena, "A mur o Apolos," ara taro det watungi lena, "A mur o Pita," ma ara taro kai det watungi lena, "A mur o Karisito."

¹³ Pepetlai, o Karisito i sa taptapagol? Pepetlai, di sak wat o Pol unin nanai kutus un mot? Pepetlai, di baptaiso mot nama risan o Pol? ¹⁴ A watung wakak torom o God uni ka baptaiso tar taio tagun mot. O Krispus kut ma o Gaius ra a baptaiso der. ¹⁵ I lenra, katutaio tagun mot in pet lari sur in watungi lena, di baptaiso i nama risang. ¹⁶ A lingmulus, a baptaiso det kai ra det kis una rumu anun o Stepanas, ma ka tasmani, ra a sa baptaiso tar taio kai, o awu. ¹⁷ Uni o Karisito ke tulu iau sur an baptaiso, awu. I tulu iau sur an warawai nama Wakak na Wasiso. Ma awu sur an warawai nama wasiso na mananos anun a taro, surko in lakro ru a dekdekin in nanai kutus anun o Karisito ra in utna oros kut.

O Karisito i a dekdekin o God ma a mananos anun o God

¹⁸ Uni a wasiso unin nanai kutus, a longlong na wasiso kut torom det ra det wan sur a iniru. Ikut, torom dat ra o God i ulaun dat, a wasiso unin nanai kutus, i a dekdekin o God. ¹⁹ Uni o God i sa watung tari una Buk Tabu Lenri,

“An kamar ru a mananos anun a kum tene mananos,
ma an upuku ru a wakak na nuknuk anundet ra det tastasman.” *Ais 29:14*

²⁰ Asau dat in watungi un tu tene mananos? Asau dat in watungi un tu tene mananos una kum Warkurai anun o Moses? Asau dat in watungi un tu tene mananos ra in balu rop pas a kum iting? O God i ese i lena, a mananos tagun a rakrakon bual i a longlong na mananos kut. ²¹ Uni, una mananos anun o God, i pami sur a taro una rakrakon bual ka det in pet lari sur det in tasman o God una mananos anundeti ut. A wasiso ra met warawai nami, a taro det nuki lena a longlong na wasiso, ikut, una wasiso ra, o God i gas sur in ulaun det ra det nurnur.

²² A lingmulus, a taro Juda det nem na tama lako kum ukinalong, ma a taro Grik det sisio sur tu mananos. ²³ Ikut met, met warawai kut un o Karisito, i ra di sak wati unin nanai kutus. A warawai ri, a taro Juda det ngeti, ma torom det, i elar nama wat ra det puku taru uni, ma i elar kut nama longlong na wasiso torom a taro ra awu sur a taro Juda. ²⁴ Ikut, o Karisito a dekdekin o God, ma a mananos anun o God, torom a taro ra o God i kabo pas det. A taro ra, tagun a taro Juda ma tagun a taro Grik. ²⁵ A mananos anun o God ra a taro det nuki lena a longlong na mananos kut, i ra i labo taun a mananos anun a taro. A dekdekin o God ra a taro det nuki lena ke dekdek, i ra i dekdek sakit taun a dekdekin a taro.

²⁶ A kum tistising, mot in nuk pas mot lena mot asi na ngas na taro ra o God i kabo pas mot. Awu sur a susut tagun mot a kum tene mananos umatan a taro. Awu sur a susut tagun mot, mot utur ukai a dekdek sur mot in mugu a taro. Ma awu sur kai a susut tagun mot tagun a kum kabotaro ra det labo umatan a taro. ²⁷ Ikut o God i pilok pas a utna ra a taro det nuki lena a longlong na utna sur in ban umaimai a kum tene mananos. Ma o God i pilok pasi kai a kum utna ra a taro det nuki lena ke dekdek sur in ban umaimai det ra det dekdek. ²⁸ O God i pilok pas a kum utna ra a taro tagun a rakrakon bual det unatino pasi, ma a kum utna ra det ngeti, ma a kum utna ra det nuki

lena a kum utna oros kut, sur a kum utna ra i labo torom det, in utna oros mukut. ²⁹ I pami lenra sur gong taio i warango pasi ut umatan o God.

³⁰ O God ut i sa pam tar a kisapi sur mot in laun tomo nam o Karisito Iesu, ma i pitar tari sur i a kimkibin anundat a mananos. Un o Karisito, o God i watung dat lena dat tokodos umatano, ma dat anun a taro. Ma una pinapam anun o Karisito, o God i kul langolango pas dat gusun anundat a kum sakino petutna. ³¹ I mo ra dat in pami elar nami ra di sa tumus tari una Buk Tabu lena, “Osi ra i nemi sur in warango pasi, i wakak sur in warango pas a Labino.” *Jer 9:24*

2

¹ A kum tistising, ra a wanpat torom mot nama wasiso talapor un o God, ka wasiso nama ngas na wasiso ra a ulabo pas iau nami, ma ka wasiso nama ngas na wasiso ra a kum tene mananos det ser wasiso nami. ² Ra a kis tomo nam mot, ka nem na nuknuk un tu utna gisen, awu. A nuknuking i kis kut un o Iesu Karisito ma una nun a minat unin nanai kutus. ³ Ra a wanpat torom mot, katu dekdeking, a ngara ma a neneder doko. ⁴ Ra a wasiso ma a warawai, ka wasiso nama wasiso na mananos anun a taro, ma ka wasiso nama ngas na wasiso ra in dat a nuknukin a taro, awu. A dekdekin a Tokodos na Nion i ulingmulus anung a wasiso, ⁵ sur anumot a nurnur un o Karisito ken kibino pas una mananos anun a taro, awu, una dekdekin o God ut.

A Nion o God i pitar a mananos torom dat

⁶ Ikut, met wasiso na mananos ut epotor tan a taro ra det tur dekdek una nurnur. A mananos ri, awu sur taginin una rakrakon bual, ma awu sur tan a kum mugumugu taginin upiso, ra anundet a warkurai in rop kut. ⁷ A mananos ri met wasiso nami, i a mananos anun o God, a wasiso na pidik, ra numugu i kis eno. Una nun a mananos, i waninar tar a kisapi sur in pitar a minamar torom dat. I sa waninar tari numugu utmakai ra ke ukisi utmakai a rakrakon bual. ⁸ Katu mugumugu taginin una rakrakon bual i tasman a mananos ri. Ra gunuk det sa tasman tari, ka det in sak wat a Labino tagun a minamar unin nanai kutus. ⁹ Ikut, i elar nama wasiso ra di sa tumus tari una Buk Tabu Lenri,

“A kum utna ra kataio i tama i,
ma kataio i longoro i,
ma ke wanpat tagun a nuknukin taio,

1:20: Ais 19:12; 33:18; 44:25; Jop 12:17

1:21: Mt 11:25

2 Kor 13:4

1:26: Mt 11:25; Jem 2:5

1:29: Ep 2:9

1:23: Rom 9:32; 1 Kor 2:14

1:24: Kol 2:3

1:25:

1:30: Jer 23:5-6

2:3: Ap 18:9; 2 Kor 10:1

2:4: 1

a kum utna ra, o God i sa waninar tari sur det ra det nem doko i.” *Ais 64:4*

¹⁰ Ikut a Nion o God i upuaso a kum utna ri torom met. Uni a Tokodos na Nion i tasman a kum utna rop. Lingmulus, i tasmani ut a kum ninunuk na pidik anun o God. ¹¹ Osi ra i tasman a nuknukin taio? A nion a musano sot kut, ra kura uni, i tasmani. Lenkutkai ra, kataio i tasman a nuknukin o God. A Nion o God sot kut i tasmani. ¹² Ma met, ka met rakan a nion taginin una rakrakon bual, awu. O God i tabor met nama Tokodos na Nion, sur met in tasman lele a kum etabor rop ra i tabor oros tar met kut nami. ¹³ Met wasiso una kum etabor ri, ikut ka met wasiso nama kum wasiso na mananos anun a taro, awu. Met wasiso nama kum wasiso ra a Tokodos na Nion ut i usur met nami. Met watung palos a kum etowo na nion torom a taro ra a Tokodos na Nion kura un det.

¹⁴ Ikut, osi ra a Tokodos na Nion ke kis uni, ken utur ukai a kum etowo, ra i wanpat gusun a Nion o God. Uni a kum etowo ra, a kum longlong na utna kut toromi. Ma ken tasman lele a kum etowo, uni a Tokodos na Nion ke kis uni sur in utalaporu toromi. ¹⁵ Osi ra a Tokodos na Nion kura uni, in tasman lele a kum utna rop ra i wakak o ke wakak. Ikut, kataio in pet lar pasi sur in warkurai a musano ra Tokodos na Nion kura uni. ¹⁶ Elar nama Buk Tabu i watungi lena,

“Osi ra i tasman a nuknukin a Labino, sur in towo pasi?” *Ais 40:13*
Ikut dat, a nuknukin o Karisito kuri un dat.

3

Papam tomo una pinapam anun o God

¹ A kum tisting, numugu ka wasiso lar pas torom mot lenlar a taro ra a Tokodos na Nion i kis un det. A wasiso torom mot elar kut nami ra torom a taro taginin una rakrakon bual, ra mot a kum nat liklik utmakai una kinkinis tomo nam o Karisito. ² A tabor mot kut nama polono sus, awu sur nama dekdek na utna na inangon, uni ka mot dekdek utmakai suri. Lingmulus, tuk uniri, ka mot dekdek utmakai. ³ Mot muri utmakai a kum petutna taginin una rakrakon bual. I talapor lena mot laun utmakai elar nama taro taginin una rakrakon bual, uni mot ser nuknuk laulau ma mot ser wasiso na kankan etetalai. Mot laun elar nam det ra ka det nurnur. ⁴ Ra taio i watungi lena, “A mur o Pol,” ma taio kai i watungi lena, “A mur o Apolos,” mot wasiso

kut elar nama taro taginin una rakrakon bual.

⁵ Osi ra o Apolos? Ma osi kai o Pol? Mir aru tultul kut anun o God, ra mot nurnur un o Karisito i kibino una numir a pinapam. Mir taktakai mir pam a pinapam ra a Labino i pitar tari torom mir. ⁶ A marut a wino, o Apolos i pukpuki nama danim, ikut o God ut i ulubung pasi. ⁷ I mo ra o naro ra i marmarut ma o naro kai ra i pukpuki ka der labo. O God kut i labo, i ra i ulubungi. ⁸ O naro ra i marmarut ma o naro ra i pukpuki, a nuknukin der i takai kut. Ma der in los anunder a ikul elar ut nama nunder arara pinapam. ⁹ Uni mir aru tene pinapam tomo anun o God. Ma mot, mot elar nama kinobot anun o God, ma mot elar kai nama rumu anun o God ra i papam nanan uni.

¹⁰ Kibino una marmaris anun o God ra i sa pitar tari tang, a papam elar nama tene pam rumu ra i mananos. A sa utur tar a kibin a rumu, ra ara taro bulung det papam netes uni. Det rop taktakai ra det papam netes uni, det in tumarong det una si na ngas na pinapam ra det in pami. ¹¹ Uni o God i sa ukis tar o Iesu Karisito, i a kibin a rumu, ma ka din pam melet lar pas tu kibino gisen. ¹² Ra taio in papam netes una kibin a rumu ri nama gol, o a silwa, o a kum watat ra a matandei ka, o a duwai, o a re, o a kum luluano wit ¹³ din upuaso anun a ngas na pinapam una bung na warkurai. Din upuaso i nama sungun, ma a sungun ra in lar a ngas na pinapam anun arara taktakai. ¹⁴ Ra a pinapam anun taio in winim pas a sungun, in los pasi ut anun a ikul uni. ¹⁵ Ikut ra a sungun in tun rop ru anun a pinapam, anun a pinapam in utna oros mukut. O God in ulaun pas a tene pinapam ra, ikut in elar mukut nama musano ra di ulaun pasi gusun a sungun.

¹⁶ Pepetlai, ka mot tasmani lena mot a rumu anun o God, ma a Nion o God kura un mot? ¹⁷ Ra taio in ban laulau a rumu anun o God, o God in ban laulau a musano ra. Uni a rumu anun o God katu dur uni, ma mot ut a rumu ra.

¹⁸ Gong mot toro mot ut melet. Ra taio tagun mot i nuki lena i mananos nama ngas na mananos taginin una rakrakon bual, i wakak sur in longlong umatan a taro, sur in mananos mulus umatan o God. ¹⁹ Uni a mananos tagun a rakrakon bual ri, i a longlong na utna kut umatan o God. Elar nami ra di sa tumus tari una Buk Tabu lena, “I ser kun ukai pas a kum tene mananos nama nundet a mananos ut.” *Jop 5:13*

20 Ma di sa tumus tari kai una Buk Tabu lena,

“A Labino i tasmani lena a nuknukin a kum tene mananos, katu utna i gas uni.”
Sng 94:11

21 I mo ra gong taio i warango pas tu musano. Uni a kum utna rop anumot ut:

22 O Pol, o Apolos, o Pita, a rakrakon bual, a nilaun, a minat, a kum utna tagun uniri, ma a kum utna ra in nanpat numur, anumot rop kut. 23 Ma mot anun o Karisito, ma o Karisito anun o God.

4

A kum aposel anun o Karisito

1 I wakak sur mot in nuknuk un met lar met, a kum tultul anun o Karisito, ra a kum wasiso anun o God ra numugu i kis eno, o God i sa pitar tari torom met sur met in upuaso i torom a taro. 2 Det ra di sa pitar tar lako kum pinapam tandet, det in lingmulus uni. 3 Ka nuk bing pasi ra mot in kuro iau, o an tur umatan a warkurai sur a taro kai det in kuro iau. Lingmulus, iau kai ka kuro iau. 4 Uni ka nuk pas tu utna ra a raro uni, ikut a nuknuking ri ken ulangolango ru iau. A Labino ut in kuro iau. 5 I mo ra gong mot warkurai taio numugu tan a bung na warkurai. Mot in kis langlang tuk ra a Labino in nanpat. Ra i ut in utalapor a kum utna ra i parau una dumirum, ra in upuaso a nuknukin a taro. Ma una bung ra, o God in watung ulabo pas a taro, elar ut nama nundet a kum pinapam taktakai.

6 A kum tistising, a sa watung tar a kum wasiso ri un mir nam o Apolos, sur in warut mot ma in ususer mot, sur mot in talapor una kukurai ina wasiso ri: “Mot in muri kut a wasiso na Buk Tabu, ma gong mot ubek tar tu du wasiso kai.” Ra mot in muri lenra, katutaio tagun mot in ulabo pas ara, ma in unatino pas ara kai. 7 Osi ra i watungi lena, ui u wakak taun tu pasandet? Asau anumi ra o God ke pitar tari tam? Ra o God i sa pitar tar a kum utna tam, ilai ra u warango pas ui nami?

8 Kutiro mot sa utur ukai a kum utna rop ra mot nemi? Kutiro mot sa tene gongon? Mot nuki lena mot kis elar nama kum king, ma met awu. A nemi sur mot in kis na king mulus, sur met kai met in kis na king tomo nam mot. Ikut awu. 9 Uni a nuki lena o God i ubek tar met a kum aposel, sur met in musano oros kut. Met elar nama kum karabus ra di sa kuro det sur det in mat ma din urongon un det. A taro ma a kum ensel kai det in tama det.

10 A taro det nuki lena met a kum longlong uni met ser mur o Karisito. Ikut mot, mot nuki lena mot sa mananos rop una numot a nilaun un o Karisito. Met, ka met dekdek, ikut mot, mot nuki lena mot dekdek. Mot, di ulabo pas mot, ikut met, di tama pisopiso met. 11 Tuk uniri met murak, ma met muruk, met pipis a kum tartararos na malu, di um laulau met, ma katu rumu anumet. 12 Met papam dekdek nama kum lamamet ut. Ra det watung laulau met, met watung udan det. Ra det ukadik met, ka met balu det. 13 Ra det mang laulau met, met balu det kut nama kum wasiso na marmaris. Tuk uniri met elar nama beren tagun a rakrakon bual, ma elar nama utna ra i mereseng ra di woro ru i.

O Pol i saring a taro Korin sur det in mur anun a petutna

14 Ka tumus a kum wasiso ri sur an ban umaimai mot nami. A tumusi sur an ukodos mot, uni mot elar nama kum nutnutung ra a nem doko mot. 15 Kutiro ra anumot tu noino arip na tene tamtamabat, ra det tamtamabat anumot a nilaun un o Karisito, ikut kalako susut na tamtama mot. Un o Karisito Iesu, iau a tamamot, uni a los a Wakak na Wasiso torom mot. 16 I mo ra a udekdek pas mot sur mot in mur anung a petutna. 17 Iri a kibino ra a tulu ru o Timoti torom mot. I a nutung ra a nem doko i, ma i ser lingmulus una pinapam anun a Labino. In unuk tar mot melet una nung a kum petutna, ra i kibino pas tagun anung a kinkinis tomo nam o Karisito Iesu. Anung a petutna i elar nam anung a etowo torom a taro na lotu una kum tamon rop.

18 Ara taro tagun mot det dat walos a lorindet, uni det nuki lena kan millet melet mo torom mot. 19 Ikut, milau mo an millet melet torom mot, ra ut ra a Labino i nemi. Ra an nanpat, kan mananos kut una wasiso anun a taro ra det dat walos a lorindet, awu. An mananos utkai una dekdek ra det papam nami. 20 Uni a matanitu anun o God awu sur tagun a wasiso, tagun a dekdek ut. 21 Asau ra mot nemi? An nanpat torom mot namin kadas, o nama marmaris ma a wowowon na petutna?

5

Din rakon ru ara tene lotu ra i pam a pamuk na petutna

1 A longoro i lena a pamuk na petutna kura i kis epotor tamot. Ara tagun mot i pam a sakino tomo nama ino anun o tamano. A taro ra ka det nurnur, ka det ser pam a sakino petutna lenra. 2 Ikut mot,

mot dat walos a lorimot! Ilai ra ka mot tangis na maimai una petutna ra? Ma ilai ra ka mot rakon ru a musano ra gusun mot? ³ A lingmulus, una pining a kis gisen gusun mot, ikut una niong a kis tomo ut nam mot. Ma a sa pitar tar a warkurai un o naro ra i pam tar a sakino petutna ra, elar nami ra a kis tomo ut nam mot. ⁴ Ra mot in nanpat tomo una risan anundat a Labino o Iesu, ma an kis tomo ut nam mot una niong, ma a dekdekin a Labino o Iesu kai in kis tomo nam mot, ⁵ mot in pitar tar a musano ra ulaman o Satan, sur din ban laulau a sakino nemnem ina pinino, ma o God in ulaun pas a niono una bung ra a Labino in nanpat melet.

⁶ Ke wakak ra mot ulabo pas mot ut. Pepetlai, ka mot tasmani lena lakalik nat na is kut, in ulabo rop pas a palawa? ⁷ Mot in rakon ru a is ra i sa turai, sur mot in elar nama matok na palawa ra kalako is uni. A lingmulus ut, kalako is un mot. Uni di sa pitar tar o Karisitor sur anundat a etabor torom o God, elar nama sipsip ra di etabor nami una labino bung na lotu na Wanlakai.* ⁸ I mo ra i wakak sur anundat a nilaun in elar nama taro ra det pam a labino bung na lotu na Wanlakai. Gong dat pami nama is ra i sa turai. I ra a sakino petutna ma a dur na petutna. Dat in pami ut nama beret ra kalako is uni. I a tokodos na petutna ma i lingmulus.

⁹ Una ara pas munung ra a sa tumus tari torom mot, a sa inanos tar mot lena, gong mot lason tomo nama taro ra det pam a kum pamuk na petutna. ¹⁰ Awu sur a kukuraino lena, gong mot lason tomo nama taro tagun a rakrakon bual, ra det ser pam a kum pamuk na petutna, o a kum matano muk, o det ra det ras pas a ututna ra awu sur anundet, o det ra det ser lotu torom a kum torotoro na god, awu. Ra mot nem na wan gusun det, mot in nan taginin una rakrakon bual. ¹¹ Ikut a tumtumus torom mot, sur gong mot lason tomo nam det ra det watungi lena det a kum tistisin dat una nurnur, ikut det ser pam a kum sakino petutna lenri: Det ser pam a kum pamuk na petutna, det a kum matano muk, det ser lotu torom a kum torotoro na god, det ser mang laulau a taro, det a kum tene ininum ma det ra det ras pas a ututna ra awu sur anundet. Ma gong kai mot wangon tomo nama ngas na taro lenra.

¹²⁻¹³ Sur asau ra an warkurai a taro, ra

awu sur det tagun dat a taro na lotu? O God ut in warkurai det. Ikut in wakak sur mot in warkurai det ut, ra tagun dat a taro na lotu. Mot in pami elar nami ra di sa tumus tari una Buk Tabu lenri, "Mot in lakro ru a sakino musano gusun mot." *Lo 17:7*

6

Gong a taro na nurnur det ubek det melet ut una warkurai

¹ Ra ara tagun mot, anunu tu maut torom tu pasano una nurnur, sur asau ra in losi torom det ra ka det nurnur, sur det in warkurai i, ma awu sur torom a taro anun o God? ² Pepetlai, ka mot tasmani lena a taro anun o God det in warkurai a rakrakon bual? Ra mot in warkurai a rakrakon bual, ilai ra ka mot pet lar pasi sur mot in ukodos a kum natnat na mamaut? ³ Pepetlai, ka mot tasmani lena numur dat in warkurai a kum ensel? Ra in lenra, dat in pet lar pasi ut sur dat in warkurai a kum utna tagun a nilaun uniri. ⁴ Ra anumot lako kum mamaut tagun a nilaun uniri, sur asau ra mot losi torom det ra a taro na lotu ka det ru pas det, sur det in warkurai i? ⁵ A watungi lenri torom mot sur mot in maimai uni. Pepetlai, kataio tagun mot i mananos sur in pam a warkurai una kum mamaut epotor tan a kum tene nurnur? ⁶ Ilai ra tu tene nurnur in ben melet tar ara tene nurnur torom det ra ka det nurnur, sur det in warkurai i?

⁷ A ngasino ri, mot ser muri ra mot ubek mot melet ut una warkurai, i upuaso i lena mot sa puku. Ilai ra ka mot madek ru det ra det pam a sakino torom mot? Ilai ra ka mot madek ru det ra det wolong mot? ⁸ Ikut, mot a taro na nurnur, mot ut mot pam a sakino torom mot, ma mot wolong etetalai mot.

⁹ Pepetlai, ka mot tasmani lena det ra det pam a sakino ka det in rakon a matanitu anun o God? Gong mot toro mot ut. Uni det ra det pam a kum pamuk na petutna, ma det ra det lotu torom a kum torotoro na god, ma det ra ka det ru a kinkinin na nolin, ma det ra a kum pamuk na musano ra det siuru a pinpinin det, ma a kum musano ra det nolin melet nama kum musano, ¹⁰ ma a kum tene wolong, ma a kum matano muk, ma a kum tene ininum, ma det ra det emang, ma det ra det ras pas a ututna ra awu sur anundet, det rop ra, ka det in rakon a matanitu anun o God.

5:3: Kol 2:5 5:4: 1 Tim 1:20 5:6: Gal 5:9 5:7: Ais 53:7; 1 Pit 1:19 * 5:7: Ra a taro Juda det waninar sur a labino bung na lotu na Wanlakai, det rakon rop ru a is gusun a kum rumu anundet, ma una wonom mawit na bung det wan a beret ra kalako is uni. A tumtumus anun o Pol una petutna ra a taro Juda det ser muri, i a wasiso elelar sur a taro na lotu tiro o Korin det in rakon rop ru a kum sakino petutna anundet. 5:8: Lo 16:3 5:11: 2 Tes 3:6; Tai 3:10 5:12-13: Lo 13:5 6:2: Tam 3:21 6:9: Gal 5:19-21; Ep 5:5; Tam 22:15 6:11: Tai 3:3-7

¹¹ Ara taro tagun mot, numugu mot ser pam a kum ngasino ri. Ikut, una risan a Labino o Iesu Karisito, ma una Nion o God anundat, o God i sa gos talapor pas mot gusun anumot a kum sakino petutna, sur mot anun a taro, ma i sa watung mot lena mot tokodos umatano.

Dat in ulabo pas o God nama pinindat

¹² Sako taio in watungi lenri, "A kum utna rop i wakak kut sur an pami." Ikut awu sur a kum utna rop in waruti. "A kum utna rop i wakak kut sur an pami," ikut kan madek pas tu utna sur an kis utuntudu ina dekdekino. ¹³ Sako taio in watungi kai lenri, "A utna na inangon sur a balandat, ma a balandat sur a utna na inangon." Ikut o God in kamar rop ru der. A pinindat awu sur tagun a kum pamuk na petutna, awu, sur a Labino ut, ma a Labino sur a pinindat. ¹⁴ Una dekdekin o God ut, i ukatutur melet pas a Labino gusun a minat, ma dat kai in ukatutur melet pas dat. ¹⁵ Pepetlai, ka mot tasmani lena, a pinimot, a kum du pinin o Karisito ut? Pepetlai, an upitapo pas lako kum du pinin o Karisito tomo nama pamuk na ino sur der in takai mukut? Awu, ken elar mulus! ¹⁶ Pepetlai, ka mot tasmani lena osi ra i upitapo i nama pamuk na ino, der ara pininder mukut nama pamuk na ino? Elar nami ra a Buk Tabu i watungi lena, "Aru der in takai mukut." *Stat 2:24* ¹⁷ Ikut, osi ra i upitapo i una Labino, der ara nionder kut nama Labino.

¹⁸ Mot in nan gisen gusun a kum pamuk na petutna. A kum sakino petutna gisen ra taio i pami, ka det kis una pinino. Ikut, ra taio in pam a kum pamuk na petutna, i pam a sakino una pinino ut. ¹⁹ Pepetlai, ka mot tasmani lena a pinimot i a rumu anun a Tokodos na Nion? A Tokodos na Nion ra i kis un mot, o God i sa tabor tar mot nami. Mot ut awu sur anumot, ²⁰ uni o God i sa kul pas mot nama labino kunukul doko. I mo ra mot in ulabo pas o God nama pinimot.

7

A kum etowo una kinkinis na nolin

¹ Uniri an balu a kum utna ra mot tumtumus suri torom iau: In wakak torom a musano ra ke nolin. ² Ikut, kibino una kum pamuk na petutna ra kura, i wakak sur arara musano in nolin nam anun a ino ut, ma arara ino kai in nolin nama nun a musano ut. ³ Gong a musano i bitan a pinino tan anun a ino, ma lenkutkai ra, gong a ino i bitan a pinino tan anun a

musano. ⁴ A ino ra i nolin, ke warkurai sur a pinino, awu. Anun a musano i warkurai suri. Ma lenkutkai ra, a musano ra i nolin, ke warkurai sur a pinino, awu. Anun a ino i warkurai suri. ⁵ Gong der bitan a pininder tan der etalai. Ikut, i wakak kut ra der rop der in mulaot sur der in utabu i munung a pininder gusun der etalai, sur der in wararing. Ikut, numur der in madek melet a pininder torom der etalai, sur gong o Satan i ulam tar der, ma der in puku, uni ka der warkurai kodos a nemnem ina pininder. ⁶ A watung a wasiso ri torom mot sur in warut mot, awu sur in elar nama warkurai torom mot. ⁷ A nemi sur a taro rop det in elar nam iau ra ka nolin. Ikut o God i pitar tar a kum etabor torom a taro rop taktakai. Ara i los ara ngas na etabor, ma ara kai i los a se etabor.

⁸ Ma a watungi tandet ra ka det nolin ma torom a kum ula lena, i wakak sur det in kis ut lenra, elar nam iau. ⁹ Ikut ra ka det pet lar pasi sur det in warkurai kodos a nemnem ina pinindet, i wakak kut sur det in nolin. Uni i wakak ra det in nolin, sur gong a nemnem ina pinindet i ukatutur a balandet.

¹⁰ Torom det kai ra det nolin, a pitar a warkurai ri. Ma awu sur iau, a Labino ut i pitari. Gong tu ino i wan pas gusun anun a musano. ¹¹ Ikut, ra in nan pas gusuni, gong i nolin melet. Ma ra i nemi sur in nolin melet, in milet melet torom anun a musano ma der in ukodos anunder a kinkinis na nolin. Ma gong kai tu musano i lu ru anun a ino.

¹² A watungi torom a ramano taro kai. Awu sur a Labino i watungi, iau ut a watungi lenri: Ra tu tisindat una nurnur, anun a ino awu sur a tene nurnur, ma a ino ra i nemi sur der in kis tomo, gong a tisindat ra i lu ru i. ¹³ Ra tu ino, a tene nurnur, ra anun a musano awu sur a tene nurnur, ma a musano ra i nemi sur der in kis tomo, gong a ino ra i wan pas gusuni. ¹⁴ Uni a musano ra awu sur a tene nurnur, i anun o God, kibino una nun a ino ra i nurnur, ma a ino ra awu sur a tene nurnur, i anun o God, kibino una nun a musano ra i nurnur.* Ra awu, a kum nutnutu mot, det in dur. Ikut, det sa talapor, det a taro anun o God.

¹⁵ Ikut, ra aru suano ra tu pasander ra ke nurnur i nem na wan gusun ara pasander, madek ru i in nan. Ra in nan, anun a musano o anun a ino, ra i tene nurnur, in langolango gusun anunder a kinkinis na nolin. Uni o God i sa kabo pas dat sur dat in

6:12: 1 Kor 10:23 **6:13:** 1 Tes 4:3-5 **6:14:** Rom 8:11; 1 Kor 15:20; 2 Kor 4:14 **6:15:** Ep 5:30 **6:16:** Mt 19:5 **6:17:** Jn 17:21-23; Rom 8:9-11 **6:20:** 1 Kor 7:23; 1 Pit 1:18-19 **7:9:** 1 Tim 5:14 **7:10:** Mt 5:32; 19:9

* **7:14:** Awu sur i lenri det sa los pas a nilaun tukum, awu. Ra det ut det in nukpukus, det in los pas a nilaun tukum. **7:15:** Rom 14:19 **7:16:** 1 Pit 3:1

kis na malmal. ¹⁶Ui a ino, ko tasmani ra un warut anum a musano sur in tene nurnur o awu. Ma ui kai a musano, ko tasmani ra un warut anum a ino sur in tene nurnur o awu.

Dat in laun elar nama ngas na kinkinis ra kuri tandat

¹⁷Arara in laun ut elar nama nilaun ra a Labino i pitar tari tano, ma elar nama ngas na kinkinis ra kura tano, ra o God i kabo pasi. A pitar a warkurai ri torom a taro na lotu una kum tamon rop. ¹⁸Ra o God i sa kabo pas taio ra di sa tok talilis tar a pinino, madek ru i, in lenra. Ma ra o God i sa kabo pas taio ra ka di tok talilis a pinino, gong mo di tok talisis. ¹⁹A petutna ra di tok talilis a pinin taio, o ka di tok talilis a pinino, i a utna oros kut. Ikut a petutna ra taio in mur a kum warkurai anum o God, i ra i labo sakit. ²⁰Arara in laun ut elar nama ngas na kinkinis ra kura tano, ra o God i kabo pasi. ²¹Ra ui a tene ititula, ra o God i kabo pas ui, gong u nuknuk una num a kinkinis na tene ititula. Ikut, ra tu kisapi sur un langolango uni, i wakak un muri. ²²Uni i ra a tene ititula ra a Labino i sa kabo pasi, i a langolango na musano mo anum a Labino. Lenkukai ra, i ra awu sur a tene ititula ra a Labino i sa kabo pasi, i a tene ititula mo anum o Karisito. ²³O God i sa kul pas mot nama ikul ra i labo sakit. Gong mot pitar tar mot sur mot a kum tene ititula anum a taro. ²⁴A kum tisting, a ngas na kinkinis ra mot laun uni, ra o God i kabo pas mot taktakai, i wakak sur mot in laun lenutra tomo nam o God.

A kum etowo torom det ra ka det nolin

²⁵A Labino ke pitar tu warkurai torom iau un det ra ka det nolin. Ikut an inanos mot una nuknuking. Iau a ngas na musano ra a taro det nurnur un iau, uni a Labino i maris doko iau. ²⁶A nuki lena i wakak ra osi ra ke nolin, gong i nolin, uni a kum maut uniri i wanpat. ²⁷Pepetlai, u sa nolin? Gong u lu ru anum a ino. Pepetlai, ko nolin? Gong u sisio sur tu ino. ²⁸Ikut, ra un nolin, awu sur u pam a sakino petutna. Ma ra tu toraro in nolin, awu sur i pam a sakino petutna. Ikut, det ra det nolin det in taramo a susut na mamaut una nundet a nilaun, ra ka nemi sur mot in etorom a kum mamaut ri.

²⁹A kum tisting, a watungi lenri, a du bung i sa milau. Turpasi uniri, a kum musano ra det nolin, det in laun lari ra ka det nolin. ³⁰Ma det ra det tangis, det in laun lari ra ka det tangis. Ma det ra det gas, det in laun lari ra ka det gas. Ma det

ra det kukul, det in laun lari ra kalako utna anundet. ³¹Ma det ra det papam nama kum utna ra kuri upiso, det in laun lari ra ka det nuknuk bing una kum utna ra. Uni a rakrakon bual ri dat laun uni, i sa rorom nanan.

³²A nemi sur mot in langolango gusun a kum nginara taginin upiso. A musano ra ke nolin, i balon una pinapam anum a Labino sur in ugasgas a Labino. ³³Ikut a musano ra i sa nolin, i balon una pinapam taginin una rakrakon bual, sur in ugasgas anum a ino. ³⁴A nuknukino ke takai, uni i nemi sur in ugasgas anum a ino ma a Labino kai. A ino ra ke nolin o a toraro, i balon una pinapam anum a Labino. Anun a nemnem sur in pitar rop tar a pinino ma a niono torom a Labino. Ikut, a ino ra i sa nolin, i balon una pinapam taginin una rakrakon bual, sur in ugasgas anum a musano. ³⁵A watung a kum utna ri sur in uwakak anumot a kinkinis, awu sur a turbat mot. A nemi sur mot in mur a tokodos na petutna, ma mot in pitar rop tar anumot a nilaun torom a Labino, ma gong a nuknuki mot i wan gisen.

³⁶Ra tu musano i nuki lena ke tokodos anum a petutna torom a ino ra di sa ubek bat tari toromi, ma ra a kum kilalo anum a ino i sa wan tito, ma a musano ra i nemi sur der in nolin, i wakak in nolin kut nami. Ke pam a sakino petutna. Der in nolin kut. ³⁷Ikut, ra tu musano i tur dekdek una nuknukino sur gong i nolin, ma katu utna i ungonos tari sur in nolin, ma i ut i tamtamabat anum a nemnem, i kai i pam a wakakino. ³⁸I mo ra a musano ra i nolin i pam a wakakino, ikut i ra ke nolin, i pam a wakak na petutna sakit tander.

³⁹A ino ra i sa nolin, a warkurai i kis toromi ra i ker tomo der nam anum a musano, ra anum a musano i laun utmakai. Ikut, ra anum a musano in mat, a ino ra in langolango sur in nolin melet nam taio ra i nemi, ikut in nolin ut nam taio ra anum a Labino. ⁴⁰Ikut a ino ra, in gas doko ra in kis kut lenra, ma ken nolin melet. Iri a nuknuking, ma a nuki lena a Nion o God i kis un iau kai.

8

A kum utna ra di sa etabor taru nami torom a kum torotoro na god

¹An inanos mot una kum utna na inangon ra di sa etabor taru nami torom a kum torotoro na god.

Dat tasmani lena, dat rop dat sa mananos. A mananos i ser pam pat a petutna sur taio in dat walos in lorino, ikut a marmaris i ser pam pat a petutna sur taio

in udekdek a taro. ² Ra taio i nuki lena i sa mananos doko un tu utna, anun a mananos ke sot utnakai. ³ Ikut, ra taio i nem o God, o God i sa tasman o naro ra.

⁴ An inanos mot una ngasino ra a taro det ser pami ra det wan a kum utna, ra di sa etabor taru nami torom a kum torotoro na god. Dat tasmani lena a toktok i a utna oros kut tagun a rakrakon bual, awu sur i laun. Dat tasmani lena ara God sot kut, ma kataio melet. ⁵ A lingmulus ra a susut na utna sapat una langit ma nin una rakrakon bual, di watung det nama kum god, ma a kum lamlabino. ⁶ Ikut, dat tasmani lena ara God kut, a Tamandat, i ra a kibin a kum utna rop, ma i ra dat laun suri. Ma dat tasmani lena ara Labino kut, i o Iesu Karisito, i ra i ukis a kum utna rop, ma i pitar tar a nilaun torom dat.

⁷ Ikut, awu sur a taro rop det tasman a utna ri. A ramano kum tene nurnur, numugu ra ka det nurnur utmakai, det ser mur a petutna ra det etabor torom a kum torotoro na god. Ma tuk uniri, ra det wan a utna ra taio i sa etabor taru nami torom a kum torotoro na god, det nuki lena, det ut det lotu torom a kum torotoro na god. Det taramo i lena a nuknukin det i takun det lena det pam a sakino. ⁸ Ikut, a utna na inangon ke warut dat sur dat in tokodos umatan o God. Ra ka dat wangon, ke ban laulau dat umatan o God, ma ra dat in nangon kai, ken warut dat sur dat in wakak umatan o God.

⁹ Mot langolango sur mot in nan a utna ra taio i sa etabor taru nami torom a kum torotoro na god. Ikut mot in tumarong mot, sur gong anumot a petutna ra, in ben tar det ra anundet a nurnur ke dekdek, sur det in puku. ¹⁰ Ui, u sa mananos sur un nangon una rumu na etabor anun a torotoro na god, ma a nuknukim awu sur in takun ui uni. Ikut ra un nangon tiro iai, ma o naro ra anun a nurnur ke dekdek in tama ui, un ben tari, sur i kai, in nan a utna ra di sa etabor taru nami torom a kum torotoro na god, ra in taramo i lena, a nuknukino i takuni lena, i pam a sakino. ¹¹ Anum a mananos in ban laulau a musano ra anun a nurnur ke dekdek. A musano ra, a tisindat ra o Karisito i mat suri. ¹² Ra mot pam a sakino lenra torom tu tisindat, sur in pam a utna ra a nuknukino in takuni uni, mot pam a sakino torom o Karisito. ¹³ Ra a utna ra a wani, in upuku a tising una sakino, kan nan meleti mo tu du wewegua, sur gong a upuku a tising una sakino petutna.

9

I tokodos sur din kul a kum aposel

¹ A sa langolango. Iau a aposel. A tama tari ut o Iesu anundet a Labino. Anumot a nilaun tomo nama Labino, i a wino tagun anung a pinapam. ² Sako ara taro det nuki lena awu sur iau a aposel, ikut torom mot, i lingmulus lena iau a aposel. Uni anumot a nilaun tomo nama Labino i ulingmulusi.

³ Ra a taro det takun iau una nung a pinapam, a balu det lenri: ⁴ Ra mir nam o Banabas mir papam epotor tamot, i tokodos ut sur mot in tabor mir sur mir in nangon ma mir in inum. ⁵ A kum aposel, ma a kum tistisin a Labino, ma o Pita det ser ben tuptupukus anundet a kum ino ra det nurnur. I tokodos ut sur mir nam o Banabas kai mir in pami lenra. ⁶ Ke tokodos sur mir kut, mir in papam nama lamamir sur a mani ra mir in laun nama.

⁷ Osi na tene inaim ra i ut in kul pas a kum utna ra i sibo suri? Osi ra in marut a kinobot na wain ma ken nan pas lako wino gusuni? Osi ra in tamtamabat a kum sipsip ma ken inum pas lako polo na sus tagun det? ⁸ A wasiso ri a watungi, awu sur tagun a nuknukin a taro, awu. A kum Warkurai anun o Moses kai i watungi lenri, ⁹ "Gong u ker bat a wan a karabau ra i pas rumrum a wit, i kai in nangon ut." *Lo 25:4*

Peptelai, o God i ngara kut sur a kum karabau? Awu. ¹⁰ O God i watungi lenri sur dat. A lingmulus sakit, a wasiso ri di sa tumus tari sur dat ut, uni i tokodos ra osi ra i marmarut, ma osi ra i lakro susuaro a pinino wit gusun a wit mulus, der in kis langlang nama nurnur sur lako wino. ¹¹ Met sa marut tar a wasiso na nion epotor tamot. I tokodos sur mot in tabor met nam lako utna sur met in laun nami. ¹² I tokodos sur a taro gisen det in los pas a warut ri gusun mot, ma i tokodos sakit sur met kai met in losi gusun mot.

Ikut ka met ungongos pas mot sur anumot tu warut. Met taramo a susut na mamaut, ikut ka met saring mot sur tu warut, sur gong met turbat a Wakak na Wasiso anun o Karisito. ¹³ Mot tasmani lena det ra det papam una rumu na etabor, det ser wangon tagun a rumu na etabor. Ma det kai ra det tuntun a kum etabor una kabulu na tuntun etabor, det ser wangon ut tagun a utna ra det tuni. ¹⁴ Lenkutkai ra, a Labino i warkurai tari lena, det ra det warawai nama Wakak na Wasiso, det in los a ikul tagun a Wakak na Wasiso sur det in laun nami.

O Pol ke nem tu ikul tagun anun a pinapam na warawai

¹⁵ Ikut, iau ut ka los pas tu utna tagun a kum utna ri, ma ka tumtumus sur an los tu utna, awu. A gas doko ra a warawai torom mot ma ka los tu ikul uni. A minat a utna oros kut torom iau, ikut anung a gasgas ri i labo doko torom iau, ma ka nemi sur taio in rakon ru i gusun iau. ¹⁶ Ra a warawai nama Wakak na Wasiso, ka ulabo pas iau nami, awu. Uni o God i sa pitar tar a pinapam na warawai tang, ma kan pet lar pasi sur an mana gusuni. Ma in laulau doko torom iau ra kan warawai nama Wakak na Wasiso. ¹⁷ Ra iau ut a nemi sur an warawai, an losi ut anung tu ikul. Ikut, ra awu sur anung tu nemnem suri, an pami kut a pinapam ra o God i sa pitar tari tang. ¹⁸ Asau ra anung a ikul? Anung a ikul i lenri: An gas sur an warawai nama Wakak na Wasiso, ma kataio in kul iau. A pami lenra sur gong a saring mot sur anumot tu warut ra i tokodos sur mot in pitari torom iau.

O Pol i dekdek sur in ben pukus pas a taro rop torom o Karisito

¹⁹ A lingmulus a sa langolango, ma ka papam na karabus torom taio. Ikut a pitar tar iau sur an tene ititula torom a taro rop, sur an ben lako susut na taro torom o Karisito. ²⁰ Ra a kis tomo nama taro Juda, a muri ut a ngas na nilaun anun a taro Juda, sur an ben pukus pas det torom o Karisito. Ka kis utuntudu ina Warkurai anun o Moses. Ikut, ra a kis tomo nama taro ra det kis utuntudu ina Warkurai anun o Moses, a pitar tar iau sur an kis utuntudu ina Warkurai ra, sur an ben pukus pas det torom o Karisito. ²¹ Ra a kis tomo nama taro ra ka det kis utuntudu ina Warkurai anun o Moses, iau kai ka kis utuntudu ina kum Warkurai ra, sur an ben pukus pas det torom o Karisito. Ikut, awu sur a rosumur una Warkurai anun o God, awu. A kis utuntudu ina Warkurai anun o Karisito. ²² Ra a kis tomo nama taro ra ka det dekdek, iau kai ka dekdek, sur an ben pukus pas det torom o Karisito. A elaro iau sur an elar nama kum ngas na taro rop, ma a mur a kum ngas na kisapi rop sur an ulaun lako taro. ²³ A kum utna ri a pami sur a Wakak na Wasiso in lubang, sur in udan iau tomo nam det.

A kinalabor sur a ikul

²⁴ Det rop ra det ililu una kinalabor det kalabor, ikut ara kut tagun det in los a ikul. Pepetlai, ka mot tasman a utna ri? Mot kai mot in dekdek una kinalabor sur mot in los

a ikul. ²⁵ A taro rop ra det ser wapap, det ulason dekdek a pinindet. Det pami sur det in los pas a ikul ra in rop kut. Ikut dat, dat ulason dat sur dat in los pas a ikul ra ken rop. ²⁶ I mo ra, ka kalabor tuptupukus, awu, a kalabor tokodos sur a tuktukino. Ka itubul elar nama musano ra i tubuli kut a maino. ²⁷ A tumtubul a pining sur in mur wakak anung a nemnem. A pami lenri, sako a sa warawai taru nama Wakak na Wasiso torom a taro gisen, ikut iau ut, o God in ipul ru iau, ma kan los tu ikul.

10

A petutna anun a taro Israel i utumarong dat

¹ A kum tistising, a nemi sur mot in nuk pas a kum tumtubun dat, ra det wan tagitong o Ijip. Det rop det wan utuntudu ina du bakut, ma det rop det wan kutus a Merek na Tasi. ² I elar nami ra di baptaiso det una du bakut ma a tasi, ma i upuaso i lena det a taro anun o Moses. ³ Det rop det wangon tagun ara utna na Nion kut, ⁴ ma det inum tagun ara danim na Nion kut, uni det inum tagun a wat na Nion, ra i wan tomo nam det. Ma a wat na Nion ra, i o Karisito. ⁵ Ikut a susut doko tagun det, o God ke gas nam det. Ra det mat nanan ma a kum minatin det, det inep ororos kut una nubual kalako taro uni.

⁶ Ma a kum utna ri i wanpat sur in utumarong dat, sur gong a balandat i nemnem sur a kum sakino, elar nama balandet i nemnem suri. ⁷ Gong mot lotu torom a kum torotoro na god elar nama ramano taro tagun det. Elar nami ra di sa tumus tari una Buk Tabu lenri,

“A taro det kis sur det in nangon ma det in inum,

ma det tur melet sur det in wap oros mukut nama pinindet.” *Kis 32:6*

⁸ Gong dat pam a kum petutna na pamuk, elar nama ramano taro tagun det, det pami. Ra, un ara bung kut, aru noino ma tulu arip na taro tagun det, det mat. ⁹ Gong dat lar a Labino, elar nam ara taro tagun det, det pami, ma a kum sui det karot doko det. ¹⁰ Gong mot ururai, elar nam ara taro tagun det, det ururai, ma a ensel ra i ser um doko a taro i um doko rop ru det.

¹¹ A kum utna ri, i wanpat un det, sur in utumarong dat. Ma di sa tumus tari sur a etowo torom dat, ra dat laun una kum ururop na bung ri. ¹² Ra taio i nuki lena i tur dekdek, in tumarong, sako in puku taru una sakino petutna. ¹³ A kum

ululam ra mot sa etorom tari, awu sur mot kut mot etoromi, awu, a susut na taro kai det etoromi. Ra o God ken madek ru mot sur tu ululam in nanpat torom mot, ra in labo taun a dekdeki mot. Ra tu ululam in nanpat, o God ut in waninar pas tu kisapi, sur mot in nan gisen gusuni ma mot in winim pasi. Ma asau ra o God i watungi in pam soti.

Gong dat lotu torom a Labino ma torom a kum laulau na nion kai

¹⁴ I mo ra a kum wakak na paspasang, gong mot lotu torom a kum torotoro na god, mot in kalabor gusuni. ¹⁵ A wasiso torom mot elar nami ra a wasiso torom a taro ra det sa mananos. Ma mot ut mot in warkurai wakak anung a wasiso ri. ¹⁶ Ra dat inum tagun a kap ra di sa watung wakak pas uni torom o God, dat takai mukut nam o Karisito, una gapino. Ma ra dat wangon tagun a beret ra dat tibiki, dat takai mukut nam o Karisito, una pinino. ¹⁷ Teken beret kut. Dat susut, ikut, dat ara pinindat uni dat wangon tagun in teken beret kut.

¹⁸ Dat in tama a taro Israel. Ra det wan a wewegua ra di sa etabor taru nami torom o God una kabulu na tuntun etabor, i dat tomo det nam o God. ¹⁹ Asau a kukurai ina nung a wasiso? A utna ra di etabor taru nami torom a torotoro na god, katu utna i gas uni, ma a torotoro na god ra di etabor toromi, i kai katu utna i gas uni. ²⁰ A watungi tamot lena a kum utna ra a taro ra ka det nurnur det etabor nami, det etabor nami torom a kum laulau na nion, ma awu sur torom o God. Ma ka nemi sur mot in lason tomo nama kum laulau na nion. ²¹ Ka mot in pet lar pasi sur mot in inum tagun a kap anun a Labino, ma tagun a kap kai anun a kum laulau na nion. Ma ka mot in pet lar pasi sur mot in nangun tagun a kabulu na inangon anun a Labino, ma tagun a kabulu na inangon kai anun a kum laulau na nion. ²² Pepetlai, dat nemi sur dat in ungangos a Labino, sur a nuknukino in laulau torom dat? Pepetlai, a dekdekin dat i labo taun a dekdekin?

Dat in ulabo pas o God nama kum utna rop ra dat pami

²³ Sako taio in watungi lena, “A kum utna rop i wakak kut sur dat in pami,” ikut, awu sur a kum utna rop in warut dat. “A kum utna rop i wakak kut sur dat in pami,” ikut, awu sur a kum utna rop in udekdek dat.

²⁴ Gong taio i uwakak pasi ut, in uwakak pas a taro gisen.

²⁵ A kum wewegua ra di siuru i una rumu na siuru, mot in nani. Ma gong mot iting lena, di sa etabor taru nami torom a torotoro na god o awu, sur gong a nuknuki mot in takun mot lena mot pam a sakino. ²⁶ Uni a Buk Tabu i watungi lenri, “A rakrakon bual ma a kum utna rop ra det kis uni, anun a Labino.” *Sng 24:1*

²⁷ Ra taio tagun det ra ka det nurnur i saring mot, sur mot in nangun tomo nami, ma mot nemi ut, mot in nan kut. Ma a kum utna rop ra di tabor mot nami, mot in nani kut, ma gong mot iting uni, sur gong a nuknuki mot in takun mot. ²⁸ Ikut, ra taio in watungi tamot lena, “A utna ri di sa etabor taru nami torom a kum torotoro na god,” gong mot wani, sur gong mot ban laulau a nuknukin o naro ra i inanos mot nami. ²⁹ Awu sur a wasiso una nuknuki mot, awu. A wasiso un o naro ra i inanos mot ma i nuki lena mot pam a sakino.

A sa langolango. Sur asau ra a nuknukin taio in warkurai iau? ³⁰ Ra a watung wakak pas torom o God una nga utna na inangon, sur asau ra taio in takun iau una utna ra a wani ra a sa watung wakak pas uni? ³¹ Lenra, ra mot wangon, o mot inum, o tu ngas na utna kai mot pami, mot in pami sur mot in ulabo pas o God nami. ³² Gong mot pam tu utna ra in upuku taio tagun a taro Juda, o tagun a taro ra awu sur a taro Juda, o tagun a taro na lotu anun o God. ³³ A nemi sur an ugagas a taro rop una kum utna rop ra a ser pami. Ka pam tu utna sur in uwakak iau, awu, a pam a kum utna sur in uwakak lako susut na taro, sur o God in ulaun pas det.

11

¹ Mot in mur a magirang, elar nami ra a mur a magiran o Karisito.

A petutna ra din muri una lotu

² A watung ulabo pas mot, uni mot ser nuk pas iau una kum ututna rop, ma mot mur a kum etowo ra a sa ususer tar mot nami. ³ Ikut, a nemi sur mot in tasmani lena, o Karisito in lorin a kum musano rop, ma a musano in lorin a ino, ma o God in lorin o Karisito. ⁴ Ra tu musano in wararing o in wasiso na poropet, ma i sa rakup bat pas in lorino, i ban umaimai in lorino. ⁵ Ra tu ino in wararing o in wasiso na poropet, ma ke rakup bat in lorino, i ban umaimai in lorino. I elar nami ra di sa kas rop ru a iwu na lorino. ⁶ Ra tu ino ke rakup bat

10:16: Mt 26:26-28 **10:17:** Rom 12:5 **10:18:** Wkp 7:6 **10:19:** 1 Kor 8:4 **10:20:** Lo 32:17; Tam 9:20

10:21: 2 Kor 6:15-16 **10:22:** Lo 32:21 **10:23:** 1 Kor 6:12 **10:24:** Rom 15:1-2 **10:28:** 1 Kor 8:7

10:30: 1 Tim 4:4 **10:31:** Kol 3:17 **10:32:** Rom 14:13 **10:33:** 1 Kor 9:20-22 **11:1:** 1 Kor 4:16 **11:3:**

in lorino, i wakak ra din kumur ru a iwu na lorino. Ikut, ra di kumur ru a iwu na lorino, i ra a utna na maimai. I wakak ra in rakup bat in lorino sur gong di kumur ru a iwu na lorino, ma gong di kas rop ru i. ⁷ Ke tokodos ra tu musano in rakup bat in lorino, uni i a malalarin o God ma i ese a minamarin o God. Ikut a ino i ese a minamarin a musano. ⁸ Uni o God ke pam a musano tagun a ino, awu, i pam a ino tagun a musano. ⁹ Ma o God ke pam a musano sur a ino, awu, i pam a ino sur a musano. ¹⁰ Iri a kibino ra a ino in rakup bat in lorino, sur in ese i torom a taro ma torom a kum ensel kai lena i pam ukai a nimulaot sur in wararing ma in wasiso na poropet.

¹¹ Ikut, i lingmulus, ka di ukis gisen a ino gusun a musano, o a musano gusun a ino, awu. Der in warut etetalai der, una nunder a kinkinis na nilaun torom a Labino. ¹² Uni a ino i wanpat tagun a musano, ma lenkutkai ra, a ino i usus a musano. Ikut o God ut a kibin a kum utna rop. ¹³ Mot ut mot in nuknuk una kum wasiso ri. Pepetlai, i tokodos sur a ino in wararing torom o God, ra ke rakup bat in lorino? Awu. ¹⁴ Anundat a nilaun ut i ese dat lena, tu musano ra a iwu na lorino i walos, i ra a utna na maimai toromi. ¹⁵ Ikut, tu ino ra a iwu na lorino i walos, i ra anun a minamar. Uni o God i pitar tar a walalos na iwu na lorino toromi, sur in rakup bat in lorino nami. ¹⁶ Ra taio in pukus a wasiso ri, anung a minabalu i lenri: Ka met mur tu ngasino gisen, ma a taro rop anun o God una kum tamon kai awu.

A inangon anun a Labino

(Mt 26:26-29; Mk 14:22-25; Lk 22:14-20)

¹⁷ Uniri an inanos mot nama kum petutna ra mot in muri. Una kum petutna ra an inanos mot nami, kan watung ulabo pas mot. Uni, ra mot ser wan tomo, awu sur mot uwakak mot, awu, mot ban laulau mot kut. ¹⁸ A mugano utna: A sa longoro tari lena, ra mot ser wan tomo sur a lotu, mot ser tapagol sarara kut, ma a nuki lena a ramano kum wasiso tagun a wasiso ra, i lingmulus. ¹⁹ Uni a taro na lotu det in taptapagol ut, sur din tama lele det ra det tokodos ma det kai ra det raro. ²⁰ Ra mot wan tomo, ma mot wangon tomo, mot nuki lena mot wan a inangon anun a Labino, ikut, awu. ²¹ Uni, ra mot wangon, arara i ngara pas ut nami, sur in nangon mugu, ma ken kis pas ara taro kai. Iri a kibino ra ara taro det murak, ma ara taro det sipak. ²² Pepetlai, kalako kum rumu anumot sur

mot in nangon ma mot in inum iai? Pepetlai, ka mot nuk labo pas a taro na lotu anun o God, ma mot ban umaimai det ra det sibo? Asau ra an watungi torom mot? Pepetlai, an watung ulabo pas mot una petutna ri? Awu!

²³ Uni a etowo ri a los pasi tan a Labino ma a sa pitar tari torom mot i lenri: Una bung na mirum ra di usobor tar a Labino o Iesu, i los pas a beret. ²⁴ Ra i sa watung wakak pas uni, i tibiki, ma i watungi lenri, "Iri a pining, a pitari sur mot. Mot in ser pami lenri, sur mot in ser nuk melet pas iau." ²⁵ Lenkutkai ra, ra i sa rop a inangon, i los pas a kap ma i watungi lena, "A kap ri, a matok na kunubus tagun a gaping, ra i dat tomo tar a taro nam o God. Mot in pami lenri una kum du bung ra mot inumi, sur mot in ser nuk melet pas iau." ²⁶ Uni, una kum bung ra mot wan a beret ri, ma mot inum tagun a kap ri, mot wasiso talapor ut una minat anun a Labino, tuk ra in milet.

²⁷ I mo ra osi ra in nan a beret anun a Labino, ma in inum tagun anun a kap, ma ke pami nama urur, i pam a sakino una pinin a Labino ma a gaping, ma din warkurai i uni. ²⁸ I wakak ra taio in tama mugu tar anun a nilaun, ra numur in nan a beret ma in inum tagun a kap. ²⁹ Ra taio i wangon ma i inum, ma ke tama lele pas a pinin a Labino, i sa wangon pas ma i sa inum pas ana warkurai na minabalu. ³⁰ Iri a kibino ra a susut epotor tamot det misait ma kalako dekdekin det, ma ara taro kai det sa mat. ³¹ Ra gunuk dat ut, dat in tama mugu tar anundat a nilaun ra numur dat in nangon ma dat in inum, o God ken pitar a warkurai na minabalu torom dat. ³² Ikut, ra a Labino i warkurai dat, i ukodos dat, sur gong dat iru una warkurai na minabalu tomo nama rakrakon bual.

³³ I mo ra a kum tistising, ra mot wan tomo sur a inangon, mot in kis langlang sur ara taro kai tagun mot. ³⁴ Ra lako taro tagun mot det murak, i wakak ra det in nangon mugu pas ut una nundet a kum rumu, sur gong a warkurai na minabalu anun o God in los mot, ra mot wan tomo.

Ra an nanpat, an pitar melet lako kum wasiso na warkurai torom mot.

12

A kum etabor anun a Tokodos na Nion

¹ A kum tistising, uniri an inanos mot nama kum etabor anun a Tokodos na Nion, uni a nemi sur mot in talapor uni. ² Mot tasmani lena, ra ka mot nurnur utmakai, di ben raro pas mot torom a kum torotoro na god ra ka det ser wasiso, ma mot lotu

torom det. ³ I mo ra an watungi tamot lenri, katutaio ra a Nion o God in mugu i, in watung lar pasi lena, "O Iesu in iru tukum." Ma katutaio in watung lar pasi lena, "O Iesu a Labino," ra a Tokodos na Nion ke mugu i.

⁴ A wur ngas na etabor anun a Tokodos na Nion, ikut ara Nion o God kut, ra i ser tabor dat. ⁵ A wur ngas na pinapam na warut, ikut ara Labino kut, ra dat papam toromi. ⁶ A wur ngas na pinapam, ikut ara God kut, ra i pam a kum pinapam ra, una nilaun anun a taro rop.

⁷ A Tokodos na Nion i ese i ut una nilaun anun arara, sur in warut a taro rop. ⁸ A Tokodos na Nion i tabor ara nama mananos sur in wasiso nami, ma a Nion ut ra, i tabor ara kai nama wakak na nuknuk sur in wasiso nami. ⁹ Ma a Nion ut ra, i tabor ara kai nama nurnur, ma a Nion ut ra, i tabor ara kai nama etabor sur in ulangolango a kum misait. ¹⁰ Ma i tabor ara kai nama dekke sur in pam a kum utna na ukisin, ma ara kai nama wasiso na poropet. Ma i tabor ara kai nama mananos sur in tasman lele a Tokodos na Nion ma a kum nion gisen kai, ma ara kai nama mananos sur in wasiso nama wur ngas na wasiso, ma ara kai nama mananos sur in palos a kukurai ina wur ngas na wasiso. ¹¹ Ara Nion sot kut ra i pam a kum pinapam rop ri. Ma una nun a nemnem ut, i tabor arara taktakai.

Ara pinindat kut, ikut a susut na du pinindat

¹² A musano i ara kut, ikut a susut na du pinino. A kum du pinino det susut, ikut di tugus tomo pas det sur ara kudulano pinino. A pinin o Karisito i lenkutkai ra. ¹³ Uni ara Nion kut i baptaiso dat rop, sur dat ara pinin o Karisito mukut, dat a taro Juda, ma dat ra awu sur a taro Juda, dat a kum tene ititula ma dat ra ka dat tene ititula. Ma o God i pitar ara Nion kut torom dat rop sur dat in inum taguni.

¹⁴ A kudulano pinino awu sur ara du pinino kut, awu, a susut na du pinino ut. ¹⁵ Ra a kikino in watungi lena, "Iau awu sur a du pinino, uni awu sur iau a lamano," i lingmulus lena, i awu sur a lamano, ikut, a du pinino ut. ¹⁶ Ra in talngano in watungi lena, "Iau awu sur a du pinino, uni awu sur iau in matano," i lingmulus lena, i awu sur in matano, ikut a du pinino ut. ¹⁷ Ra a kudulano pinino in matano rop kut, in longoro mo pepetlai? Ra a kudulano pinino in talngano rop kut, in sasangop mo pepetlai? ¹⁸ Ikut o God i sa tugus tomo tar a kum du pinindat rop taktakai, elar ut nama nun a nemnem. ¹⁹ Ra a kum du pinindat rop det elar kut, in kudulano mo pepetlai?

²⁰ Ikut i lenutra, a susut na du pinindat, ikut ara pinindat.

²¹ In matano ken watung lar pasi tan a lamano lenri, "Ka sibo sur ui!" Ma in lorino kai, ken watung lar pasi tan aru kikino lena, "Ka sibo sur mur!" ²² Awu! A kum du pinindat ra dat nuki lena ka det dekke, anundet a pinapam kura ut. ²³ Ma a kum du pinindat ra dat nuki lena ka det wakak, dat mar wakak det. Ma a kum du pinindat ra dat maimai nam det, dat pipis bat det. ²⁴ Ikut, a kum du pinindat ra det tamtama wakak, ka det sibo sur tu utna. O God i sa tugus tomo tar a kum du pinindat, ma a kum du pinindat ra dat nuki lena ka det wakak det wakak ut. ²⁵ I pami lenra sur gong a pinindat i taptapagol. A kum du pinindat det in warut etetalai det, ma a warut ra, in elar torom det rop. ²⁶ Ra tu du pinindat i ngungut, a kum du pinindat rop det in ngungut tomo nami. Ma ra di watung ulabo pas tu du pinindat, a kum du pinindat rop det in gas tomo nami.

²⁷ Mot ut a pinin o Karisito, ma mot rop taktakai a kum du pinino. ²⁸ O God i sa pilok pas a taro ri epotor tan a taro na lotu: a mugano ut a kum aposel, a manru a kum poropet, a mantul nami, a kum tene ususer, ma det kai ra det pam a kum utna na ukisin, ma det ra o God i pitar a etabor torom det sur det in ulangolango pas a kum misait, ma det ra det warut a taro, ma det ra det ser mugu a taro una kum pinapam, ma det ra det wasiso nama wur ngas na wasiso. ²⁹ Pepetlai, det rop a kum aposel rop kut? Awu. Det rop a kum poropet rop kut? Awu. Det rop a kum tene ususer rop kut? Awu. Det rop det pam a kum utna na ukisin? Awu. ³⁰ Det rop o God i pitar a etabor torom det sur det in ulangolango pas a kum misait? Awu. Det rop det wasiso nama wur ngas na wasiso? Awu. Det rop det ser palos a kukurai ina wur ngas na wasiso? Awu. ³¹ Ikut, mot in kalkal doko sur a kum etabor ra det wakak doko.

Uniri an ese mot una kisapi ra i wakak doko taun det rop.

13

A marmaris i lenri

¹ Ra an wasiso nama wur ngas na wasiso anun a taro ma anun a kum ensel kai, ikut ra ka lason una marmaris, a elar kut nama garamut o a kudu ra i tangtangis oros kut.

² Ra an utur ukai a etabor sur an wasiso na poropet, ma ra an tasman a kum utna na pidik rop ma a kum mananos rop, ma ra an utur ukai a nurnur sur an ukarai a kum tangai nami, ikut ra ka lason una

marmaris, iau a utna oros kut. ³ Ra an pitar ur anung a kum utna rop torom a kum sibo na taro, ma an pitar iau kai sur din tun iau, ikut ra ka lason una marmaris, ken warut iau.

⁴ Osi ra i lason una marmaris a pinino ke ser ngoro lakit torom taio, ma i ser pam a wakakino torom a taro. Ke ser nuknuk laulau sur a utna anun taio, ke ser warango pasi, ma ke ser dat walos in lorino. ⁵ Ke laulau a magirano, ke nuk pasi ut, ke ser kankan lakit, ke ser nuk ukai a sakino ra di pami uni. ⁶ Ke gas un tu petutna ra ke tokodos, i gas kut una lingmulusino. ⁷ Osi ra i lason una marmaris i ser los a kum mamaut anun a taro, i ser nurnur, ma i kis langlang nama nurnur sur a kum utna rop ra o God in pami, ma i ser tur dekdek ra a kum mamaut i wanpat.

⁸ A marmaris ken rop lar pas. Ikut a kum wasiso na poropet det in rop kut, a wur ngas na wasiso det in rop kut, ma a mananos kai in rop kut. ⁹ Uni anundat a mananos ke kudulano, ma anundat a wasiso na poropet kai ke kudulano. ¹⁰ Ikut numur, ra a kum utna ri i kudulano in nanpat, a kum utna ra ke kudulano in rop. ¹¹ Ra a natlik utmakai, a wasiso elar nama natlik, a nuknuk elar nama natlik, ma a mananos kai elar nama natlik. Ra a sa labo, a umana ru a magiran a natlik. ¹² Uniri anundat a tamtama un o God ke talapor, i elar nami ra dat tama a niondat una galas, ra i gawul kut. Ikut numur, dat in tama o God nama matmatan dat. Uniri anung a mananos ke kudul, ikut numur anung a mananos in kudulano, elar nam o God i tasman rop iau.

¹³ A tulu utna ri detul kis tukum: a nurnur, a kinkinis langlang nama nurnur sur asau ra o God in pami, ma a marmaris. Ikut a marmaris i labo sakit tandetul.

14

A wasiso na poropet i wakak taun a wasiso nama wur ngas na wasiso

¹ Mot in dekdek una marmaris. Mot in nemnem sur a kum etabor anun a Tokodos na Nion. Ma a etabor ra i wakak doko sur mot in nemi, mot in wasiso na poropet. ² Uni taio ra in wasiso nama wur ngas na wasiso, ke wasiso torom a taro, awu, i wasiso torom o God. A taro ka det tasman a kukuraino. I watung a kum utna na pidik nama dekdekin a Tokodos na Nion. ³ Ikut, taio ra i wasiso na poropet, i wasiso torom a taro sur in udekdek det, in uragot det ma in umarom det. ⁴ Taio ra i wasiso nama wur ngas na wasiso i udekdek pasi ut. Ikut, taio ra i wasiso na poropet i udekdek a taro

na lotu rop. ⁵ A nemi sur mot rop mot in wasiso nama wur ngas na wasiso, ikut a nem doko i sur mot in wasiso na poropet. O naro ra i wasiso na poropet i wakak doko taun o naro ra i wasiso nama wur ngas na wasiso. Ikut ra taio in palos a kukurai ina wur ngas na wasiso sur in udekdek a taro na lotu, in wakak ut.

⁶ A kum tisting, ra an nanpat torom mot ma an wasiso nama wur ngas na wasiso, an warut petlan mot? Ikut, ra a nemi sur an warut mot, an wasiso torom mot nama wasiso ra o God i sa upuaso tari tang, o an wasiso nama mananos, o a wasiso na poropet, o a etowo torom mot. ⁷ Lenkutkai ra a kum utna ra ka det laun, elar namin tulal ma a gita. Det ser tangis ut, ikut ra a tinangisin det i wan senene kut, dat in tasman petlan a kekelele ra? ⁸ Ra in tuwuru ken tangis talapor, asi na tene inaim in waninar sur a inaim? ⁹ Lenkutkai ra torom mot. Ra ka mot watung talapor a kum wasiso, din tasman petlan a wasiso ra mot watungi? Anumot a wasiso in nan kut una maino. ¹⁰ A lingmulus ut, a wur ngas na wasiso kuri una rakrakon bual, ikut katu wasiso ra katu kukuraino. ¹¹ Ra ka tasman a kukurai ina wasiso ra taio i wasiso nami torom iau, a elar kut nama usiro toromi, ma o naro kai ra i wasiso, i elar kut nama usiro torom iau. ¹² Lenkutkai ra torom mot. Mot ser dekdek sur a kum etabor anun a Tokodos na Nion. I wakak sur mot in dekdek sur a kum etabor ra in udekdek a taro na lotu rop.

¹³ Ra in lenra, i wakak sur osi ra i wasiso nama wur ngas na wasiso, in wararing sur in pet lar pasi sur in palos a kukurai ina nun a wasiso. ¹⁴ Ra a wararing nama wur ngas na wasiso, a niong i wararing, ikut a nuknuking ke nuk tu utna. ¹⁵ Asau an pami? An wararing nama niong, ma an wararing kai nama nuknuking. An kekelele nama niong, ma an kekelele kai nama nuknuking. ¹⁶ Ra u watung wakak torom o God una niom nama wur ngas na wasiso, taio ra ke talapor una kukurai ina num a wasiso, in watung "Amen" pepetlai? Uni ke tasman asau ra u watungi. ¹⁷ I lingmulus, anum a niaring na watung wakak torom o God i wakak, ikut ke udekdek a taro.

¹⁸ A watung wakak torom o God, uni a lason doko una wasiso nama wur ngas na wasiso taun mot rop. ¹⁹ Ikut ra a kis tomo nama taro una lotu ma an watungi kut lako limo na du wasiso ra a kukuraino in talapor torom det sur an ususer det nami, i ra i wakak doko taun a noino arip na du wasiso

una wasiso gisen, ra ka det in longoro lele i.

²⁰ A kum tistising, gong a nuknuki mot i elar nama kum nat liklik. Una sakino petutna i wakak sur mot in elar nama kum nat miso. Ikut, una nuknuki mot, mot in elar nama kum lamlabino. ²¹ A Labino i sa watung tari una Buk Tabu lenri, “An wasiso torom anung a taro, nama walngan ara taro gisen, ra det wasiso nama wasiso gisen, ikut ka det in longoro iau.” Ais

28:11-12

²² A wur ngas na wasiso, i a ukinalong torom det ra ka det nurnur, awu sur torom det ra a kum tene nurnur. Ikut a wasiso na poropet, i a wasiso sur a kum tene nurnur, awu sur a wasiso sur det ra ka det nurnur. ²³ Ra mot a taro na lotu rop mot in kis tomo, ma mot rop mot wasiso nama wur ngas na wasiso, ma lako taro oros kut, o lako taro ra ka det nurnur det in ruk, det in watungi lena mot longlong. ²⁴ Ikut ra mot rop mot wasiso na poropet, ma taio ra awu sur a tene nurnur, o tu musano oros kut in ruk torom mot, anumot a kum wasiso rop ra i longoro i in so in balano ma in takuni lena i a tene sakino. ²⁵ Ma a kum utna ra i kis eno unin balano, in nanpat pupuaso. Ra in puku, in masarino unago upiso, ra in lotu torom o God, ma in wasiso talapor lena, “A lingmulus ut, o God i kis epotor tamot.”

A wakak na inawan ina lotu

²⁶ A kum tistising, asau an watungi? Ra mot kis tomo una lotu, ara taro det in kekeleke, ara taro det in ususer a taro, ara taro det in wasiso puaso un tu utna ra o God i sa ese tari tandet, ara taro det in wasiso nama wur ngas na wasiso, ma ara taro kai det in palos a kukuraino. A kum utna rop ri din pami sur in udekdek a taro na lotu. ²⁷ Ra lako taro det in wasiso nama wur ngas na wasiso, lako ru o lako tul kut ma gong det susut. Ara munung in wasiso, ma taio in palos a kukuraino. Detul rop detul in pami lenra. ²⁸ Ra katutaio kura sur in palos a kukuraino, i wakak ra o naro ra i wasiso nama wur ngas na wasiso, gong i wasiso una lotu. In wasiso kut toromi ut ma o God.

²⁹ Lako ru o lako tul, detul in wasiso na poropet, ra a taro det in nuknuk wakak una nundetul a wasiso ra i lingmulus o awu. ³⁰ Ra taio kura i kis una lotu, in rakon tu wasiso tan o God, o naro ra kura i wasiso in mana. ³¹ Ra mot rop mot nem na wasiso na poropet, i wakak sur ara munung in wasiso, ra numur ara bulung, tuk mot rop mot in wasiso. Mot in pami lenra, sur a

taro rop det in los a etowo, ma in uragot det. ³² A wasiso na poropet i kis utuntudu ina warkurai anun a poropet ut. ³³⁻³⁴ Uni o God, a God na malmal, ma ke nem a utna ra i lokolokor.

I wakak ra a wardain det in kis wowowon kut una lotu, elar nama taro anun o God det ser pami una kum tamon rop. Ka di mulaot tar det sur det in wasiso. Det in unatino pas det, elar nama Warkurai anun a taro Juda i watungi. ³⁵ Ra det nem na iting un tu utna, i wakak sur det in ting anundet a kum musano uni tiro una nundet a kum rumu. Uni a utna na maimai ra a ino in wasiso una lotu.

³⁶ Pepetlai, mot a kibin a wasiso anun o God? Awu. Pepetlai, i wanpat kut torom mot? Awu. ³⁷ Ra taio i nuki lena i ut a poropet, o a Tokodos na Nion kura uni, i wakak sur in tasmani lena asau ra a tumusi torom mot, a warkurai ut anun a Labino. ³⁸ Ra taio ke mur a wasiso ri, o God kai ken longoro anun a wasiso.

³⁹ I mo ra a kum tistising, mot in kalkal sur mot in wasiso na poropet, ma gong mot turbat taio ra i wasiso nama wur ngas na wasiso. ⁴⁰ Ikut mot in mur a kum tokodos na inawan ina lotu, ma gong i lokolokor.

15

O Pol i warawai una minatin o Karisito ma anun a katkatatur melet

¹ A kum tistising, a nemi sur an inanos melet mot una Wakak na Wasiso, ra numugu a sa warawai taru nami torom mot, ma mot sa los pasi, ma mot sa tur dekdek uni. ² Ra mot pam ukai dekdek a wasiso ra a sa warawai taru nami torom mot, o God in ulaun pas mot nama Wakak na Wasiso ri. Ra awu, mot nurnur oros kut.

³ Uni a wasiso ra i labo doko, ra a sa los pasi, a sa pitar tari tamot. A wasiso ra i lenri: O Karisito i mat una nundet a kum sakino petutna, elar nami ra di sa tumus tari una Buk Tabu. ⁴ Di uruk tari una kulam na minat, ma tulu bung bat tari o God i ukatatur melet pasi gusung a minat, elar nami ra di sa tumus tari una Buk Tabu. ⁵ Ra i wanpat torom o Pita, ma numur torom a noino ma aru aposel. ⁶ Numur i wanpat torom a kum tistisin dat una nurnur. A nilulukin det i elar nama limo na mar ma i puku, ra det kis tomo una du bung ra. Ma a susut sakit tagun det, det laun utmakai, ikut, a ramano det sa mat. ⁷ Ra numur i wanpat torom o Jems, ma numur torom a kum aposel rop.

⁸Ma numur sakit tandet, i wanpat torom iau utkai, ra a elar nama nat ra o nano i usus lakit tari, ra anun a kalang ke sot utmakai.

⁹Uni iau, a natino sakit taun a kum aposel rop, ma ka wakak sur din watung iau ara aposel, uni a ser ban laulau a taro na lotu anun o God. ¹⁰Ikut, o God i pitar tar a nilaun ri a laun nami, kibino uti una nun a marmaris. Ma ke urop oros tari kut anun a marmaris un iau, awu. A papam dekdek doko taun det rop. Ikut, awu sur iau ut a papam, a marmaris anun o God i papam tomo nam iau. ¹¹Ra a warawai, o a kum aposel kai det warawai, met rop met warawai nama wasiso ri un o Karisito, ma mot sa nurnur uni.

A katutur melet gusun a minat

¹²Ra di warawai un o Karisito ra o God i ukatutur melet pasi gusun a minat, sur asau ra ara taro kura epotor tamot det watungi lena kalako katkatutur melet gusun a minat? ¹³Ra gunuk katu katkatutur melet gusun a minat, o God ken ukatutur melet pasi kai o Karisito gusun a minat. ¹⁴Gunuk ra o God ken ukatutur melet pas o Karisito gusun a minat, anumet a warawai in utna oros kut, ma anumot a nurnur kai in utna oros kut. ¹⁵Ma ara utna kai, din tama i lena anumet a wasiso un o God, a torotoro kut, uni met wasiso talapor un o God lena i ukatutur melet pas o Karisito gusun a minat. Ikut, ra kalako katkatutur melet gusun a minat, o God ken ukatutur melet pas o Karisito gusun a minat. ¹⁶Gunuk ra o God ken ukatutur melet pas a kum minat, lenkutkai ra ken ukatutur melet pas o Karisito gusun a minat. ¹⁷Gunuk ra o God ke ukatutur melet pas o Karisito gusun a minat, anumot a nurnur i utna oros kut, ma mot kis utmakai una numot a kum sakino petutna. ¹⁸Ma a kum tene nurnur kai un o Karisito ra det sa mat, det mat tukum. ¹⁹Ra dat kis langlang nama nurnur un o Karisito sur a kum utna ra in pami una nilaun kut nin upiso, dat in pot na marmaris sakit taun a taro rop.

²⁰Ikut i lingmulus, o God i sa ukatutur melet o Karisito gusun a minat. I a mugano musano ra i katutur melet gusun a minat, ma i ese i lena numur a kum minat kai det in katutur melet. ²¹A minat i wanpat i kibino un ara musano kut, o Adam. Lenkutkai ra a katkatutur melet gusun a minat i wanpat i kibino un ara musano, o Karisito. ²²Uni, un o Adam, a taro rop det in mat, lenkutkai ra a taro rop un o Karisito det in utur ukai a nilaun. ²³Ikut a inawan

ina katkatutur melet i lenri: O Karisito a mugano musano ra i katutur melet gusun a minat, ma numur ra in nanpat melet, det ra anunu, det kai det in katutur melet gusun a minat. ²⁴Numur, a ururop ina rakrakon bual in nanpat, ra o Karisito in kamar ru a kum sakino nion rop lenri, det ra a kum mugumugu, det ra det utur ukai a warkurai ma det ra det tur nama dekdek. Ma in pitar tar a matanitu torom o God o Tamano. ²⁵Uni o Karisito in kis na king tuk ra in winim pas anun a kum ebar rop sur det in kis utuntudu ino. ²⁶A ururop na ebar ra in kamari, a minat. ²⁷Uni di sa tumus tari una Buk Tabu lenri, “O God i sa ubek tar a kum utna rop utuntudu ino.” *Sng 8:6*

Ikut, ra a Buk Tabu i watungi lena “a kum utna rop”, i talapor lena ke wasiso un o God, uni o God ke kis utuntudu in o Karisito, awu. O God ut i sa ubek tar a kum utna rop utuntudu in o Karisito. ²⁸Ra a kum utna rop i sa kis utuntudu in o Karisito a Nutun o God, o Karisito kai in ubek tari ut utuntudu in o God a Tamano, i ra i ubek tar a kum utna rop utuntudu in o Karisito. O Karisito in pami lenra sur o God in mugumugu una kum utna rop.

²⁹Ra katu katkatutur melet gusun a minat, det ra di baptaiso det sur a kum minat, asau ra det in pami? Ra i lingmulus lena a kum minat ka det in katutur melet gusun a minat, sur asau ra di baptaiso a taro sur a kum minat? ³⁰Met kai, ra katu katkatutur melet gusun a minat, sur asau ra met pam a pinapam ra met barato a kum mamaut uni, una kum bung rop? ³¹A kum tistising, una kum bung rop a barato a kum mamaut ma a taramo i lena a sa mat. A wasiso ri i lingmulus elar nami ra anung a gasgas un mot i lingmulus. A gas nam mot uni dat kis tomo nam o Karisito Iesu anundat a Labino. ³²Ra a waim nama kum kuabor na taro nin o Epeses sur an pam sot pas anung a nemnem kut, i warut petlan iau? Ra a kum minat ka det in katutur melet gusun a minat, dat in mur a wasiso anundet ra det ser watungi lenri,

“Dat in nangun ma dat in inum, uni markan dat in mat.” *Ais 22:13*

³³Gong di ben raro mot, uni “A kinkinis tomo nama sakino taro, in ban laulau a wakak na petutna.” ³⁴Mot in tuangun, mot in mur a tokodos na petutna, ma mot in mana gusun a kum sakino petutna. Uni ara taro tagun mot ka det tasman o God. A watungi lenri sur mot in maimai.

O God in pukus pas a pinindat

³⁵ Sako taio in iting lena, “Di ukatutur melet pas a kum minat pepetlai? Asi na ngas na pinindet ra det in katutur melet nami?” ³⁶ Ui a longlong! Ra u marut a pitino duwai, ra ken mat pas, ken laun. ³⁷ Ma ra u marut a pitino wit o tin pitino duwai gisen kai, kon marut in nanai ino, awu, un maruti ut in pitino. ³⁸ Ra in lubang, in nanpat ut in ngas na duwai elar nama nemnem anun o God. Tekteken ngas na pitino duwai in lubang pat in nanai ino ut, ken lubang pat tin ngas na duwai gisen.

³⁹ A pinin a kum utna rop ra det laun, ka det elar. A taro a pinindet ut, ma a kum wewegua a pinindet i senene, ma a pinin a kum piko i senene, ma a pinin a kum kiripo kai i senene ut. ⁴⁰ A kum utna sapat una maino, a kum pinindet ut, ma a kum utna taginin upiso, a kum pinindet utkai. A minamar ina kum utna sapat una maino i senene ut, ma a minamar ina kum utna taginin upiso i senene utkai. ⁴¹ In matanas a minamarino ut, ma a kalang a minamarino i senene ut, ma a minamar ina kum nangngang i senene ut, ma a minamar ina kum nangngang taktakai i senene utkai.

⁴² I lenkutkai ra una katkatutur melet anun a kum minat. A pinindet ra di por det nami in mereseng kut, ikut ra in katutur melet, ken mereseng mo. ⁴³ A pinin a minat ra di por tari nami ke tamtama wakak, ikut ra in katutur melet in katutur nama labino minamar. Ra di por tari ke dekdek, ikut ra in katutur melet in katutur nama labino dekdek. ⁴⁴ A pinino ra di por tari nami, i taginin ut upiso, ikut ra in katutur melet, in katutur nama pinino ra i nion, tagisapat una langit.

I lingmulus ara pinindat taginin upiso, ma ara pinindat kai ra i nion. ⁴⁵ Elar nami ra di sa tumus tari una Buk Tabu lenri, “A mugano musano, o Adam, o God i pitar tar a nilaun toromi.”

Stat 2:7
Ikut a ururop na Adam, i a Nion ra i tabor a taro nama nilaun. ⁴⁶ A pinindat ra i nion ke wanpat mugu, awu. A pinindat ra taginin upiso i wanpat mugu, ra numur a pinindat ra i nion. ⁴⁷ A mugano Adam i taginin upiso, ma o God i pami nama piso. A manru na Adam tagisapat una langit. ⁴⁸ A taro ra taginin upiso det elar nama musano ra o God i pami nama piso. Ma det ra tagun a langit, det elar nama musano tagisapat una langit. ⁴⁹ Dat a malalar ina musano ra o God i pami nama piso, ma lenkutkai ra, dat in los a malalar ina musano tagisapat una langit.

⁵⁰ A kum tistising, a watungi tamot lena, a pinindat taginin upiso ken ruk una matan-

itu anun o God. A pinindat ra i ser mereseng kut, ken ruk una matanitu anun o God, uni a matanitu anun o God ken mereseng. ⁵¹ Mot longoro, an inanos mot una utna ra numugu i kis eno lenri: Awu sur dat rop dat in mat, ikut o God in pukus senene pas dat rop. ⁵² Ra a ururop na tuwuru in tangis, o God in pukus senene lakit pas dat un ara pulumisis kut. Uni in tuwuru in tangis, o God in ukatutur melet pas a kum minat ma ka det in mat mo, ma o God in pukus senene pas dat. ⁵³ Uni a pinindat taginin upiso ra i ser mereseng kut, in tupukus sur a pinindat ra ken mereseng mo. A pinindat taginin upiso ra i ser mat kut, in tupukus sur a pinindat ra ken mat mo. ⁵⁴ Ma ra a pinindat ra i ser mereseng kut, in tupukus sur a pinindat ra ken mereseng mo, ma ra a pinindat ra i ser mat kut in tupukus sur a pinindat ra ken mat mo, a tumtumus una Buk Tabu in sot maragom, lenri, “O God i sa pas tataun tar a minat, ma i kamar rop ru i.” *Ais 25:8*

⁵⁵ “A minat, awai mi a dekdekim?”

A minat, awai mi anum a minibir ra u ser bir laulau a taro nami?” *Os 13:14*

⁵⁶ A minibirin a minat, a sakino petutna. A sakino petutna i los pas a dekdekino gusun a Warkurai anun o Moses. ⁵⁷ Ikut, dat in watung wakak torom o God, uni i tabor dat nama dekdek sur dat in winim pas a sakino petutna ma a minat nami, una pinapam ra o Iesu Karisito anundat a Labino i sa pam tari.

⁵⁸ I mo ra a kum wakak na tistising, mot in tur dekdek, ma gong i tugunu anumot a nurnur una katkatutur melet gusun a minat. Mot in pitar rop tar anumot a nilaun una pinapam anun a Labino, uni mot tasmani lena a kum pinapam rop mot pami torom a Labino awu sur a utna oros kut.

16

Anundet a etabor torom a taro na lotu sapat o Jerusalem

¹ An inanos mot un asau ra mot in pami nama mani ra mot woro tomo i sur a taro anun o God ra det kis sapat o Jerusalem. Mot in pami elar nami ra a sa inanos tar a taro na lotu una kum tamon tong una papor Galesia sur det in pami. ² Una kum mugano bung una rara wik, mot rop taktakai mot in ubek gisen ru tu mani tagun anumot a mani. Det ra det pam pat a labino mani det in pitar a labino, ma det ra det pam pat a natino det in pitar a natino. Mot in ulengi, sako ra an nanpat, mot in woro tomo i maragom a mani. ³ Mot in pilok pas

lako taro ra mot nurnur un det sur det in los anumot a etabor. Ma ra an nanpat tiro, an pitar tar a kum pas na wasiso talapor torom det sur det in losi tomo nam anumot a etabor, ma an tulu ru det nami usapat o Jerusalem. ⁴ Ra i wakak sur iau kai an nan, met in nan tomo.

O Pol i inanos det una nun a inawan

⁵ An nan utong una kum tamon una papor Masedonia. Ma numur an nan kai utiro torom mot, uni an nan ut utong o Masedonia. ⁶ Kutiro an kis lilik pas ut tomo nam mot tiro iai, o kutiro an kis tuk ra a kum kalang na kotokoto ma a labino wuwu in rop, ra numur mot in warut iau una nung a inawan sur a kum tamon gisen bulung ra an nan iai. ⁷ Ka nemi sur an nan torom mot uniri, ra an tur pas kut nisamot una nung a inawan. Ra a Labino in mulaot iau, a nemi sur an kis suano pasi ut nisamot. ⁸ An kis nin o Epeses tuk una Bung na Pentikos, ⁹ uni a kisapi i sa papos sur anung a pinapam in lubung ma in wu, ma a susut na taro kai det nem na turbati.

¹⁰ Ra o Timoti in nanpat torom mot, mot in tamtamabati sur gong i ngara ra i kis nisamot, uni i pam a pinapam anun a Labino, elar nam iau kai a pami. ¹¹ Gong mot tama pisopiso i. Ra in milet urin torom iau, mot in tulu ru i nama malmal. Ma a kis langlang suri, ra in nanpat tomo nama kum tistisin dat.

¹² A nemi sur an inanos mot una tisindat o Apolos. A saring dekdeki sur in nan tomo nama kum tistisin dat torom mot, ikut ke nem na wan utmakai. Numur ra tu kisapi in papos toromi, in nan ut.

A kum ururop na wasiso anun o Pol

¹³ Mot in tumarong, ma mot in tur dekdek una nurnur. Mot in elar nama kum dekdek na musano, ra ka det ngara. ¹⁴ Mot in pam a kum utna rop nama marmaris.

¹⁵ Mot sa tasmani lena a taro ra det kis una rumu anun o Stepanas, det a mugano taro ra det nukpukus tiro una papor Akaia, ma det sa pitar tar det sur det in warut a taro anun o God. A saring mot, a kum tistising, ¹⁶ sur mot in unatino pas mot torom a ngas na taro lenra, ma torom det ra det papam tomo nam det, ma det dekdek una pinapam ra. ¹⁷ A gas una inawan pat urin anun o Stepanas, o Potunatus ma o Akaikas, uni detul warut iau ra ka mot kis tomo nam iau. ¹⁸ Detul ugagas pas a niong, ma a niomot kai. I wakak ra mot in tama lele a ngas na taro lenra, ma mot in pitar a urur torom det.

¹⁹ A taro na lotu una kum tamon nin una papor Asia det pitar anundet a marmaris torom mot. O Akuila ma o Prisila ma a taro na lotu kai ra det ser lotu tomo una nunder a rumu, det pitar anundet a labino marmaris torom mot a risan a Labino. ²⁰ A kum tistisin dat rop det pitar anundet a marmaris torom mot. Ra mot etorum, mot in nem etetalai mot nama egom na marmaris, ma mot in pami nama tokodos na petutna.

²¹ Anung a nat na wasiso na marmaris ri, iau ut, o Pol, a tumusi torom mot nama lamang. ²² Osi ra ke nem a Labino, in iru tukum. Wan urin a Labino!

²³ A marmaris anun a Labino o Iesu in kis tomo nam mot. ²⁴ Anung a marmaris torom mot rop un o Karisito Iesu. Amen.

A Manru na Pas anun o Pol torom a taro Korin

A wasiso talapor mugu

Una pas ri o Pol i tumtumus melet torom a taro Korin, ra i kis tong una papor Masedonia. Una nun a mugano pas torom det, i wasiso dekdek torom det una nundet a petutna. Numur i tulu ru o Taitus torom det. Ra o Taitus i milet melet torom o Pol, i inansi lena, a taro Korin det sa nukpukus. Ikut, ara taro det nuki lena, o Pol awu sur i, a aposel mulus.

Una pas ri, o Pol i wasiso una wat na utna: A mugano, o Pol i gas uni det nukpukus. A manru, i wasiso melet una Wakak na Wasiso. Ma a mantul nami, i inanos det lena, det in waninar anundet a etabor torom a kum sibo na taro. A manwat nami, i wasiso talapor torom det lena, i a aposel mulus anun o Iesu.

A inawan ina Manru na Pas Korin:

A turturkibin ina buk ri (1:1-11)

A pinapam anun o Pol torom a taro (1:12-7:16)

A etabor torom a taro na lotu sapat o Jerusalem (8:1-9:15)

O Pol i a aposel mulus (10:1-13:10)

A ururop na wasiso anun o Pol torom det (13:11-13)

¹ Iau o Pol, a aposel anun o Karisito Iesu, una nemnem anun o God, mir nam o Timoti a tisindat, mir tumus a pas ri torom mot a taro na lotu anun o God tiro o Korin, ma torom a taro rop anun o God una papor Akaia.

² A marmaris ma a malmal tan o God a Tamandat ma a Labino o Iesu Karisito in kis tomo nam mot.

O God a tene umarom

³ Dat in watung ulabo pas o God a Taman anundat a Labino o Iesu Karisito, ma a Tamandat kai, ra a tene marmaris, ra i ser umarom dat una kum utna rop. ⁴ I ser umarom met una kum mamaut rop ra met taramo i, sur met kai met in umarom a taro, ra a kum mamaut i los det, nama umumarom ra o God i pitar tari tamet. ⁵ Met taramo a kum lamlabino ngunungut ra o Karisito i sa taramo tari, ma lenkutkai ra met taramo a labino umumarom anun o Karisito una numet a nilaun. ⁶ Met taramo a kum mamaut, sur mot in los a warut uni, ma sur din ulaun mot. Ra o God in umarom met, mot kai mot in taramo

i. A umumarom ra mot in taramo i, in udekdek mot sur mot in tur dekdek una kum ngas na ngunungut ri, ra met taramo i. ⁷ Met nurnur mulus un mot lena, mot in tur dekdek ut, uni met tasmani lena, mot taramo a ngunungut tomo nam met. Lenkutkai ra, mot in taramo a umumarom anun o God tomo nam met.

⁸ A kum tistisi met, met nemi sur mot in tasman a kum ngunungut ra i los met una kum tamon tong una papor Asia. Met taramo a labino mamaut doko. Ka met dekdek mo, ma ka met nuki mo lena, met in laun. ⁹ Met nuki lena met in mat mo. A utna ri i wanpat, sur gong met nurnur una dekdeki met ut, met in nurnur kut un o God, i ra i ser ukatutur pas a kum minat. ¹⁰ A lingmulus ut, o God i ulaun pas met ra milau met in mat, ma in ulaun melet pas met. Ma met nurnur uni lena, in ulaun pas met una kum bung kuri numugu, ¹¹ ra mot in warut met nama niaring. I mo ra a susut na taro det in watung wakak torom o God, sur met, uni i maris met ra i longoro anundet a kum niaring.

O Pol i pukus a nuknukino una nun a inawan

¹² Iri a utna ra met warango met nami: a balamet ke takun met un tu utna, uni met tasmani lena, ka met toro, met muri ut a tokodos na petutna tan o God, una numet a nilaun nin upiso, ma una numet a kinkinis tomo nam mot. Ka met mur a mananos anun a taro, met papam murmuri ut a marmaris anun o God. ¹³⁻¹⁴ Met tumtumus kut torom mot una kum utna ra mot in luk lar pasi, ma mot in talapor uni. Mot sa talapor lilik un met, ikut, a nurnur lena, numur mot in talapor wakak un met. I mo ra mot in warango met, lenkutkai ra met, met in warango mot, una bung ra a Labino in milet melet.

¹⁵ A nuki lena, a nuknuki mot un met i lenri. Iri a kibino ra numugu a inanos tar mot lena an nanpat torom mot a mugano inawan, ra numur an milet a manru na inawan torom mot, sur an pitar a warut torom mot aru dino. ¹⁶ Ra an nan sur utong una papor Masedonia, a nuki lena an lumu tar mot. Numur, ra an milet melet tagitong, an kis melet pas nisamot, sur mot in warut iau una nung a inawan utong una papor Judia. ¹⁷ Pepetlai, ra ka wanpat, mot nuki lena, a nuknuk oros kut una nung a inawan pat torom mot? Pepetlai, kutiro mot nuki lena, anung a kum wasiso i elar nama taro tagun a rakrakon bual ra det mulaot un tu utna, ikut ka det pami? Iau ka lenra.

¹⁸ O God i lingmulus, lenkutkai ra anumet a wasiso i lingmulus. Ra met mulaot, a kukuraino lena, met in pam sot pasi. ¹⁹ Iau ma o Sailas ma o Timoti, metul warawai torom mot un o Iesu Karisito, a Nutun o God. O Karisito ke ser mulaot ma numur in ipul. Awu. In pam sot pasi ut anun a wasiso. ²⁰ Uni o Karisito i pam sot pas a kum liliman rop anun o God. Ra un o Karisito kut, dat pet lar pasi sur dat in watungi lena, "Amen," ma dat in watung ulabo pas o God uni. ²¹ O God kut i utur dekdek met, ma mot kai, un o Karisito, ma i pilok pas dat sur dat anun a taro ut. ²² I sa ubek tar anun a ukinalong un dat sur in talapor lena, dat anunu ut. Ma i ukis a Niono unin balandat, elar nama ukinalong ra numur dat in rakon a kum utna, ra o God i sa waninar tari sur dat.

²³ O God ut i tasman iau lena a watung a lingmulus. Ka wan melet torom mot tiro o Korin, uni ka nemi sur a nuknuki mot in maut un lako kum dekdek na wasiso ra an watungi torom mot. ²⁴ Awu sur met nem na warkurai sur a nurnur anumot. Met nemi kut sur met in papam tomo nam mot, sur mot in gas, uni mot sa tur dekdek una nurnur.

2

¹ I mo ra a nuki lena, gong melet mo a wan torom mot, sako an utupunuk mot. ² Ra a sa utupunuk tar mot, osi mo in ugargas iau? Mot ut. Ikut mot in ugargas iau pepetlai, ra a sa utupunuk tar mot? ³ Iri a kibino ra a tumtumus kut torom mot, sako ra an nan ut, an tupunuk un mot. Uni in wakak sur mot in ugargas iau. A tasmani lena, ra an gas, mot kai dat in gas tomo. ⁴ A tumtumus torom mot nama tupunuk, ma in balang i maut doko ma a lurlur na matang i puku. Ka nemi sur an utupunuk mot, a nemi sur mot in tasmani lena, a nem doko mot.

Mot in dumano ru a sakino anun taio tagun mot

⁵ Ra taio i kibino una tupunuk ri, awu sur i utupunuk iau kut, i utupunuk a susut kai tagun mot. A watungi lenri, sur gong a watungi lena, i utupunuk mot rop. ⁶ A susut tagun mot, mot sa pitar tar a warkurai na minabalu toromi. I sa sot, ⁷ ra uniri, mot in dumano ru anun a petutna ra, ma mot in umaromi, sur gong i tupunuk dekdek, ma in puku saksakit. ⁸ I mo ra a saring mot, sur mot in upuaso melet anumot a marmaris toromi. ⁹ Una nung ara pas ra a tumusi torom mot, a lar mot kut nami, sur

an tasmani lena, mot in mur anung a kum wasiso rop, o awu. ¹⁰ Ra mot dumano ru a sakino anun taio, iau kai an dumano ru i. Ra a musano ra i sa pam tar tu sakino, a sa dumano ru i umatan o Karisito. A dumano ru i, uni a nuk pas mot, ¹¹ sur gong o Satan i upuku pas dat, uni dat sa tasman a nuknukino un asau ra i nem na pami.

A tastasman un o Karisito i elar nama utna i sangnain wakak

¹² Ra a wanpat una tamon Troas, sur an warawai torom det nama Wakak na Wasiso anun o Karisito, a tama i lena, a Labino i sa papos saro tar anung a kisapi sur an warawai. ¹³ Ikut in balang ke molmol, uni ka sio pas o Taitus, a tisinglik una nurnur. I mo ra a wasiso na itula taru torom det tagitiro iai, ra a wan pas utong o Masedonia.

¹⁴ Ikut a watung wakak torom o God, uni o Karisito i mugu met elar nama king ra i win. O God i tulu sarara met, sur met in wasiso puaso un o Karisito, sur a taro una kum tamon rop det in tasmani. A tastasman ra, i elar nama utna i sangnain wakak. ¹⁵ Met elar nama utna ra a misino i sangnain wakak, ra o Karisito i etabor nami torom o God. Ma a sangnainino i wan torom det ra o God i ulaun pas det, ma torom det kai, ra det wan sur a iniru. ¹⁶ A sangnain na minat torom det ra det wan sur a iniru, ma a sangnain na nilaun torom det ra o God i ulaun pas det.

Osi ra i pet lar pas a pinapam ri? ¹⁷ Ka met elar nama susut na taro, ra det papam kut nama wasiso anun o God sur a mani. Ikut, un o Karisito met wasiso nama lingmulus umatan o God, uni i ut i tulu ru met.

3

Met a kum tene pinapam una matok na kunubus

¹ Pepetlai, mot nuki lena, met ulabo pas met umatamot? Ara taro det ser los a kum pas ra i wasiso puaso una nundet a ngas na nilaun. Pepetlai, mot nemi sur met in los tu pas lenra torom mot? Pepetlai, met in saring mot sur mot in tumus tu pas lenra un met? ² Mot ut a pas anumet, ra di sa tumus tari una balamet. A taro rop det lukluki ma det tasmani. ³ I talapor lena, mot a pas ra o Karisito i tumusi, kibino una numet a pinapam torom mot. Awu sur i tumusi namin nepen, i tumusi ut nama Nion o God ra i laun. Ke tumusi una du wat, i tumusi ut una balan a taro.

⁴ Met wasiso una kum utna ri, uni met tagun o Karisito, ma met nurnur un o God lena, a kum utna ri i lingmulus. ⁵ Met tasmani lena, met ut ka met pet lar pasi sur met in pam a pinapam ri, ikut o God ut i warut met sur met in pami. ⁶ I ut i ukis tar met sur met a kum tene pinapam una matok na kunubus, ma i pitar tar a dekdek tamet sur met in papam nami. A matok na kunubus ri, awu sur tagun a kum wasiso na Warkurai ra di sa tumus tari, i kibino pas ut una Tokodos na Nion. A wasiso na Warkurai i pitar pati kut a minat, ikut a Tokodos na Nion i pami a nilaun.

⁷ A kum Warkurai ra o God i pitar tar det torom o Moses, ra di tumus tar det una ru wat, det wanpat tomo nama minamar anun o God. Ra o Moses i losi torom a taro Israel, ka det pet lar pasi sur det in tama in masarino, uni in masarino i talapor doko nama minamar anun o God. Ikut numur, a talapor ina minamar ra, i rop nanan gusun. A kum Warkurai ra det upuaso a minat, det wanpat nama minamar lenra. ⁸ Ikut a matok na kunubus una Tokodos na Nion, a minamarino i labo sakit tauni. ⁹ A kum Warkurai anun o Moses det wanpat nama labino minamar, ikut a pinapam na mur Warkurai i pitari kut a minat. Ikut a pinapam ina matok na kunubus i utokodos a taro umatan o God, ma a minamarino i labo sakit. ¹⁰ A kum Warkurai anun o Moses ra det wanpat nama labino minamar numugu, kalako minamarin det mo. Uni a matok na kunubus, a minamarino i labo sakit tauni. ¹¹ A kum Warkurai anun o Moses ra i ling na rop, i wanpat tomo nama minamar. Ikut a matok na kunubus ra in kis tukum, a minamarino i labo sakit tauni.

¹² Ka met ngara sur met in wasiso puaso nama matok na kunubus, uni met nurnur lena, in kis tukum. ¹³ Ka met elar nam o Moses, ra i pulus bat in masarino nama du malu, sur gong a taro Israel det tama a minamar, ra i rop nanan gusun in masarino. ¹⁴ Ikut a nuknukin det i tobonot, ma tuk uniri, ra di luk a kum wasiso una mugano kunubus torom det, i elar kut nami ra di pulus bat a nuknukin det nama du malu ra. Katutaio i rakon ru i, uni o Karisito kut, in rakon ru i gusun osi ra tagun o Karisito. ¹⁵ A lingmulus, tuk uniri, ra di ser luk a kum Warkurai anun o Moses torom det, i elar nama du malu kura i pulus bat a nuknukin det. ¹⁶ Ikut ra taio i millet torom a Labino, o Karisito in rakon ru a du malu ra gusuni. ¹⁷ A Labino i a Nion, ma taio ra a Nion

a Labino kura uni, in langolango. ¹⁸ Ma dat, ra ka di pulus bat a masarindat nam tu du malu, dat upuaso a minamar anun a Labino. Ma anundat a nilaun i tupukus nanan sur dat in elar nam o Karisito, ma anun a minamar i lubung una nundat a nilaun. A minamar ra, tan a Labino ut, i ra a Nion.

4

Met elar nama kum kuro oros kut ra di pami nama piso

¹ O God i maris met ra i pitar tar a pinapam ri tamet. Iri a kibino ra ka met tusako. ² Met sa mana gusun a kum sakino petutna ra di ser pam eno i, ma di ser maimai nami. Ka met papam nama torotoro, ma ka met palos raro a wasiso anun o God, awu. Met palos talapor a lingmulus na wasiso torom a taro, sur det in tasman lele i ut una nuknukin det lena, met watung a lingmulusino umatan o God. ³ Ma a Wakak na Wasiso ri, ra met ser wasiso puaso uni, ra in parau, in parau kut torom det ra det wan sur a iniru. ⁴ O Satan, a god taginin una rakrakon bual, i sa upulu pas a nuknukin a taro ra ka det nurnur, sur ka det in tama a talapor ina Wakak na Wasiso ra i upuaso a minamar anun o Karisito, i ra a malalarin o God. ⁵ Ka met ser wasiso un met ut, met wasiso puaso kut un o Iesu Karisito lena, i a Labino. Ma met anumot a kum tultul kut, kibino una itula anun o Iesu. ⁶ Numugu utmakai, o God i watungi lena, "A talapor in sisio pat una dumirum." Ra uniri, o God i sa ukis anun a talapor una nuknukin dat sur in sisio, sur dat in tasman a minamarin o God, ra di tama i umasarin o Karisito.

⁷ A talapor ri, ra kuri un met, i a utna ra i wakak ma i labo doko. Ikut, met elar nama kum kuro oros kut ra di pami nama piso, sur in ese i lena, a labino dekdek ra kuri un met, tan o God ut, awu sur tagun met. ⁸ Met barato a kum mamaut una kum papori met rop, ikut ke ban laulau ru met. A susut na utna i utalara a nuknuki met, ikut ka met mana. ⁹ A taro det ukadik met, ikut o God i kis ut tomo nam met. Det um met, ikut ka det um doko ru met. ¹⁰⁻¹¹ Ra met laun a minat i milau kut, uni met papam torom o Iesu. Una kum bung rop, met ese a minat anun o Iesu una pinimet, sur a taro det in tama i kai, a nilaun anun o Iesu un met. ¹² I mo ra a minat i papam un met, ikut a nilaun i papam un mot.

¹³ Di sa tumus tari una Buk Tabu lena, “A wasiso, uni a nurnur.” *Sng 116:10*
A ngas na nurnur lenri, i kis utkai un met. Met kai met nurnur, i mo ra met wasiso puaso. ¹⁴ Uni met tasmani lena o God, i ra i sa ukatutur melet pas a Labino o Iesu gusun a minat, lenkutkai ra in ukatutur melet pas met tomo nam o Iesu, ra in ben pas met tomo nam mot, sur dat in kis tomo nami umatan o God. ¹⁵ A kum mamaut ra met barato i, det wanpat sur in uwakak mot. Ra a marmaris anun o God i wan sarara torom a taro, a susut na taro det in watung wakak torom o God, ma det in watung ulabo pasi.

¹⁶ Iri a kibino ra ka met tusako. I kis pirso nanan a pinimet, ikut di umatok a niomet una kum bung rop. ¹⁷ A kum mamaut ra met taramo det, ka det labo ma ka det in kis suano i, ikut det warut met, sur met in rakon pas a wakak na kinkinis una minamar, ra ken rop. A minamar ra, i labo sakit taun a kum mamaut ra met taramo i. ¹⁸ Ka met nuk a kum utna ra di tama i, met nuki kut a kum utna ra ka di tama i. Uni a kum utna ra di tama i, ka det in kis suano i, ikut a kum utna ra ka di tama i, det in kis tukum.

5

Dat in rakon a matok na pinindat

¹ A pinindat i elar nama rumu na sel ra dat laun uni nin una rakrakon bual. Ma dat tasmani lena, ra in laulau, o God in pitar a rumu torom dat sapat una langit. A rumu ra, awu sur a taro det pami nama lamandet, awu. O God ut i sa pam tari, ma a rumu ra in tur tukum. ² Uniri dat tangis nin ubalandat, uni dat nemi sur dat in emar nama pinindat tagisapat una langit. ³ Ra dat emar nama pinindat tagisapat, ka dat in mengere mo. ⁴ Ra dat laun utmakai nama pinindat ri, dat tangis nin ubalandat, ma dat taramo a mamaut. Uni ka dat nemi sur dat in mat, dat nemi sur dat in emar nama pinindat tagisapat una langit, sur a pinindat ra in mat kut, in keles sur a pinindat ra in laun tukum. ⁵ O God ut i sa ukis tar dat sur dat in los a nilaun ri, ma i tabor dat nama Niono, i a ukinalong sur in ulingmulusi lena, numur dat in rakon a kum utna ra o God i sa waninar tari sur dat.

⁶ I mo ra ka met tusako ma met tasmani ut lena, ra met laun nama pinimet ri, kabaut met kis tomo nama Labino. ⁷ Uniri met laun nama nurnur. Awu sur anumet a nurnur kura una utna ra met tama i. ⁸ Ikut met tasman mulusi lena, met in gas ra met

in nan gusun a pinimet ri, ma met in kis tomo nama Labino. ⁹ Lenra, una nilaun nin upiso, o una nilaun sapat netes una langit, met nemi sur met in pami kut a utna ra in gas uni. ¹⁰ Uni dat rop dat in tur sa numugu tan a kiskis na warkurai anun o Karisito. Dat taktakai, dat in los a ikul una kum utna ra dat sa pam tari una nilaun nin upiso, a wakakino, o a laulau ino.

Un o Karisito, o God i marom melet nama taro

¹¹ I mo ra met papam doko sur met in ukatutur a nuknukin a taro sur det in nurnur, uni met ngara sur a Labino. O God i talapor un met lena, met osi na ngas na taro, ma a nurnur lenri mot kai mot talapor un met. ¹² Ka met nem na ulabo pas met torom mot, awu. Met nemi sur mot in warango met, ma sur mot in balu det ra det ser warango det un asau ra a taro det ulabo det uni, ikut ka det ngara sur a balandet in tokodos.

¹³ Ra a taro det nuki lena met longlong, met lenra, sur met in pam a pinapam anun o God. Ra a taro det nuki lena met mananos, met mananos sur met in warut mot. ¹⁴ A marmaris anun o Karisito i ukatutur met, sur met in papam toromi. Uni met tasman mulusi lena, o Karisito i mat sur dat rop. Ra lenra, dat rop dat mat tomo nami. ¹⁵ I mat sur dat rop, sur dat ra dat laun, gong dat laun sur dat in ugasgas pas dat ut. Dat in laun sur o Karisito, ra i mat sur in ulaun pas dat, ma i katutur melet gusun a minat.

¹⁶ I mo ra uniri, anumet a petutna torom a taro ke elar nami ra numugu. Numugu met tama a taro elar nama ngasino taginin na rakrakon bual. Ma met tama i kai o Karisito elar nama taro tagun a rakrakon bual det tama i. Ikut uniri, anumet a tamtama ke len melet mo lar numugu. ¹⁷ Ra taio tagun o Karisito, i a matok na ukukis. Anun a petutna tagun numugu i sa rop. Tama i, a matok na nilaun i sa wanpat. ¹⁸ I wanpat ut tan o God, i ra i dat tomo tar dat nami, una minatin o Karisito. Ra i sa pitar tar a pinapam tamet, sur met in dat pasi kai a taro torom o God. ¹⁹ Un o Karisito, o God i marom nama taro taginin una rakrakon bual. Ken nuk melet pasi mo anundet a kum sakino petutna sur in warkurai det uni. Iri a wasiso na emarom, ra i pitar tari tamet. ²⁰ I mo ra met tur ukinalong o Karisito. Ra met wasiso, i elar nam o God ut i saring mot sur mot in emarom nami, ma met saring mot una risan o Karisito, sur

mot in emarom nam o God. ²¹ O Karisito ke pam tu sakino petutna, ikut o God i ubek tar anundat a sakino petutna netes uni, sur dat ra tagun o Karisito, dat in rakon a tokodos na petutna anun o God.

6

¹ Met papam tomo nam o God, ra met saring mot, sur gong mot ukio orosi kut a marmaris anun o God torom mot. ² Uni o God i watungi lena, “Ra a du bung i sa sot, a longoro ui, Ma una bung ra a ulaun pas ui, a warut ui.”
Ais 49:8

Tama i, uniri, a du bung i sa sot, uniutri a bung ra o God i ulaun pas mot.

A kum aposel det taramo a susut na mamaut

³ Ka met ser pam tu petutna sur a taro det in watung laulau anumet a pinapam, ma ka det in nurnur. ⁴ Una numet a kum pinapam rop i ese i lena, met a kum tultul anun o God. Met tur dekdek ra met taramo a kum mamaut ma a kum ngunungut ma a kum ukadik. ⁵ Di um met, ma di uruk met una karabus ma di ukatutur a inaim torom met. Met papam dekdek, ka met inep una kum bung na mirum, ma met taramo a munurak. ⁶ Anumet a petutna katu dur uni, ma met papam nama mananos. A pinimet ke ser ngoro una taro, met pami kut a wakak na petutna torom det. Met papam nama warut anun a Tokodos na Nion, ma a marmaris mulus. ⁷ Met watung a lingmulus, ma met papam nama dekdekin o God. Met pam ukai a tokodos na petutna, elar nam anumet a utna na inaim una sot na lamamet ma una kair kai.

⁸ Ara taro det ru met, ma ara taro awu. Ara taro det watung laulau met, ma ara taro det watung ulabo pas met. Ara taro det nuki lena, met a kum tene torotoro, ikut met watung a lingmulusino. ⁹ Ara taro det ipul lena kalako risamet, ikut a risamet i labo ut. Det nuki lena, met sa mat, ikut met laun utmakai. Di um met, ikut ka di um doko ru met. ¹⁰ Met tupunuk, ikut met ser gas una kum bung rop. Met sibo, ikut met warut a susut na taro sur anundet a susut na utna. Kalako utna anumet, ikut a kum utna rop anumet.

¹¹ Ai, mot a taro Korin, met wasiso talapor mulus torom mot, ma a balamet i bukus nama marmaris torom mot. ¹² Ka met turbat anumet a marmaris torom mot, ikut mot, mot turbat anumot a marmaris torom met. ¹³ A wasiso torom mot ri, elar kut nami ra a wasiso torom a kum nutnutung: Mot in pami lenra torom met

lenkutkai ra met pami torom mot. Mot in nem met nama balamot rop.

A tene nurnur gong i tur tomo nam det ra ka det nurnur

¹⁴ Gong mot tur tomo nam det ra ka det nurnur, uni a tokodos na petutna der pasano pepetlai nama sakino petutna? A talapor der in kis tomo pepetlai nama dumirum? ¹⁵ O Karisito ma o Satan der in emarom pepetlai? A tene nurnur, der in pasano pepetlai nam taio ra ke nurnur? ¹⁶ A kum torotoro na god ka det in tur lar pas una rumu na etabor anun o God. Uni dat ut a rumu na etabor anun o God ra i laun. I elar nami ra o God i sa watung tari, “An kis tomo nam det,
ma an nan epotor tandet.

Ma iau a God anundet,
ma det anung a taro.” *Wkp 26:12*

¹⁷ Ma a Labino i watungi kai lena,
“Mot in pirso gusun det, ma mot in kis gisen gusun det.

Ma gong mot patop una kum dur na petutna,
ra iau an gas pas mot.” *Ais 52:11*

¹⁸ A Labino ra i dekdek sakit, i watungi lena,
“An nanpat a Tamamot,
ma mot a kum nutnutung, a kum musano ma a kum ino.” *2 Sml 7:14*

7

¹ A kum wakak na paspasang, dat sa rakon pas a kum liliman ri, ra i wakak sur dat in utalapor pas dat gusun a kum utna rop ra i udur a pinindat ma a niondat. Ma dat in talapor rop, uni dat urur doko torom o God.

O Pol i gas

² Mot in nem met nama balamot. Ka met pam tar tu sakino torom taio, ka met ben raro tar taio, ma ka met toro pas tu utna tan taio. ³ Ka watung a wasiso ri sur an takun mot uni, awu. Numugu a sa inanos tar mot lena, met nem doko mot. Mot sa kis una nuknuki met, sur dat in laun tomo ma dat in mat tomo. ⁴ A nurnur un mot. Ma a warango doko mot. Anumot a nilaun i uragot iau. Anung a gasgas i bukus una numet a kum mamaut.

⁵ Ra met wanpat tong una papor Masedonia, ka met mana lar pas. Met barato a susut na mamaut sakit una kum papori met. Met barato a wasiso na kankan anun a taro torom met, ma nin ubalamet met taramo a nginara. ⁶ Ikut, o God ra i ser umarom a taro ra det tupunuk, i umarom met nama inawan pat anun o Taitus torom

met. ⁷Ma awu sur a inawan pat kut anun o Taitus ra i umarom met, met gas kai ra met longoro i lena, mot udekdeki. I inanos met lena, mot nem doko i sur mot in tama iau, ma mot tupunuk, ma mot nuknuk doko sur iau. A wasiso ri, i ugargas doko iau.

⁸Anung ara pas munung i sa utupunuk tar mot. Ikut, ka tupunuk uni. Numugu a tupunuk uni, ikut uniri, a tasmani lena, anumot a tupunuk uni ke suano i. ⁹Uniri a gas, awu sur i kibino ra mot tupunuk, awu. A gas uni anumot a tupunuk i ben pas mot sur mot in nukpukus. Anumot a tupunuk i elar nama nemnem anun o God, uni i ben pas mot sur mot in nukpukus. I mo ra ka met ban laulau mot. ¹⁰A tupunuk ra o God i nemi, i utupunuk a taro sur det in nukpukus. Ra det in nukpukus, o God in ulaun det. Dat in gas una ngas na tupunuk ra. Ikut a tupunuk tagun a rakrakon bual, i pam pati kut a minat.

¹¹Tama i, a tupunuk ri tan o God i pam pat a susut na wakak na utna un mot: A labino nemnem i kis unin balamot sur mot in langolango gusun a sakino. Ma mot nem doko i sur mot in ukodos pas mot sur gong tu etakun in los mot. Mot kankan torom o naro ra i pam a sakino, ma mot ngara. Mot nem doko i sur dat in emarom melet, mot dekdek pas mot, ma mot nemi sur mot in ukodos a utna ra i raro. A lingmulus, anumot a petutna i ese i lena, mot tokodos una utna ri. ¹²Numugu a tumtumus torom mot, awu sur i kibino una musano ra di pam a sakino toromi, ma awu sur i kibino kai una musano ra i pam a sakino, awu. A tumtumus sur mot in tama lele pas anumot a tuntunur tomo nam met umatan o God. ¹³Ra una kum utna ri mot uragot met.

Mot uragot met, ma met gas doko kai ra met tama i lena, o Taitus i gas, uni mot waruti sur a nuknukino in mana. ¹⁴Ra ke wan utmakai, a warango mot toromi, ma ka mot ban umaimai iau. A kum utna ra met watungi tan o Taitus un mot i lingmulus, elar nam anumet a kum wasiso rop torom mot i lingmulus. ¹⁵O Taitus i gas doko un mot, ra i nuk pasi ra mot rop mot mur anun a wasiso ma mot gas pasi nama nginara. ¹⁶A gas doko, uni a nurnur mulus un mot.

8

A etabor

¹A kum tistingis, met nemi sur mot in talapor una marmaris ra o God i pitar tari torom a taro na lotu tong una papor Masedonia. ²Det taramo a susut na mamaut, ikut anundet a gasgas i bukus. Ma

una nundet a labino gasgas ma anundet a kinkinis na sibo, det gas ut sur det in etabor. ³A inanos mot nama lingmulus, anundet a etabor, i elar ut nama dekdekin det, ikut det pitar wot meleti. Anundet a nemnem ut sur det in pami lenra. ⁴Ra det saring met sur det kai det in pitar anundet a mani na etabor torom a taro anun o God sapat o Jerusalem. ⁵Ma awu sur det pitar tari kut a mani ra met nuki lena det in pitari, det pitar mugu tar anundet a nilaun ut torom a Labino, ma torom met kai, elar nama nemnem anun o God.

⁶I mo ra met saring o Taitus sur in warut mot sur mot in pam sot pas a pinapam na etabor ri, uni i ut i warut mot ra mot turpas a pinapam na etabor ri. ⁷Una kum utna rop, mot ser pam soti taun a taro rop: Anumot a nurnur, ma anumot a warawai, anumot a mananos, anumot a dekdek, ma anumot a labino marmaris torom met. Ra i wakak sur mot in pam sot pasi kai a pinapam na etabor ri.

⁸Ka watung a utna ri sur in elar nama warkurai torom mot. Ikut, a inanos mot una taro Masedonia, ma una nundet a labino gasgas sur det in etabor, sur an lar anumot a marmaris lena, i lingmulus o awu. ⁹Uni mot tasman a marmaris anun anundat a Labino o Iesu Karisito. I ut i tadaru sakit nama susut na utna, ikut i wan gusun anun a wakak na kinkinis sapat netes una langit, uni i maris mot, ma i kis na sibo nin una rakrakon bual, sur mot, mot in tadaru nama wakak na nilaun.

¹⁰An inanos mot nama nuknuking una utna ri: I wakak sur mot in pam rop ru a pinapam na etabor ra mot turpasi una kilalo ra i rop. Mot a mugano taro ra mot nemi sur mot in etabor, ma mot a mugano taro kai ra mot turpas a etabor. ¹¹I wakak sur uniri anumot a nemnem sur mot in pam rop ru i, in elar nama labino nemnem ra mot taramo i ra mot turpasi. Mot in etabor elar nama dekdeki mot. ¹²Ra mot gasgas sur mot in etabor, o God in gas uni. O God i nemi sur mot in etabor tagun a utna ra mot utur ukai i, awu sur tagun a utna ra ka mot utur ukai i.

¹³Ka watungi lena mot in warut a taro gisen, ma mot, mot in sibo, awu. A nemi sur mot in elar rop kut. ¹⁴Uniri, mot sa utur ukai a labino, sur mot in warut a taro gisen nami. Ra mot in sibo, det bulung det in warut mot, sur mot rop mot in warut etetalai mot, sur mot in elar rop kut. ¹⁵I elar nami ra di sa tumus tari una Buk Tabu lena, "Osi ra i ubek tomo a labino utna, i utur ukai i kut a utna ra i topasi. Ma osi

ra ke ubek tomo tu labino utna, i kai i utur ukai a utna ra i topasi.” *Kis 16:18*

O Taitus in nan torom a taro Korin

¹⁶ A watung wakak torom o God ra i unuk tar o Taitus sur in warut mot. I nem mot elar nam iau kai a nem mot. ¹⁷ I gas doko ra met saringi sur in warut mot, ma una nun a nemnem ut, in nan melet torom mot nama labino gasgas. ¹⁸ Met in tulu ru i tomo nam ara tisimet kai, ra a kum taro na lotu una kum tamon rop det watung ulabo pasi una nun a wakak na pinapam ra i warawai nama Wakak na Wasiso. ¹⁹ Det ut, det pilok tari sur met in nan tomo usapat o Jerusalem, sur met in los ru a mani na etabor. Met in pam a pinapam ri, sur met in ulabo pas a Labino, ma sur met in ese i lena, met nem na warut a taro na lotu sapat o Jerusalem. ²⁰ Ka met nemi sur taio in takun met una numet a pinapam ra met in nan nama labino etabor ri. ²¹ I mo ra met dekdek sur met in pam asau ra i tokodos, awu sur umatan a Labino kut, umatan a taro utkai.

²² Ma met in tulu ru i kai ara tisimet una nurnur tomo nam der. Met sa lar tari a susut na pinapam. Ra uniri, i nem doko i sur in warut una pinapam ri, uni i nurnur un mot. ²³ Ma o Taitus i papam tomo nam iau, sur mir in warut mot. Ma aru tistisi mot kai, ra detul nam o Taitus detul in nan tomo, der tur ukinalong a taro na lotu una kum tamon, ma nunder a nilaun, i pitar a urur torom o Karisito. ²⁴ I mo ra mot in ese anumot a marmaris torom detul, sur a taro na lotu una kum tamon gisen det in tama lele a kibino ra met warango mot.

9

A taro Korin det in waninar anundet a etabor

¹ Kan tumtumus melet mo torom mot una pinapam na warut torom a taro anun o God sapat o Jerusalem. ² Uni a sa tasmani lena, mot gas sur mot in pam a pinapam ri. A warango mot, ra mot kis tiro una papor Akaia, torom a taro tong una papor Masedonia. Ra a inanos det lena, una kilalo ra i rop, mot sa waninar sur mot in pitar ru anumot a mani. Ma anumot a gasgas sur a etabor, i ukatutur a nuknukin a susut na taro Masedonia sur det kai, det in etabor. ³ A nemi sur mot in waninar, elar nami ra a sa watung tari tandet, sako det in tama i lena, anung a wasiso ra a warango tar mot nami ken lingmulus. Iri a kibino ra an tulu ru a tulu tistisi met ri torom mot. ⁴ Ra an nanpat torom mot tomo nam lako

taro tagitiro o Masedonia, ra det in tama i lena, ka mot waninar, met in maimai una nung a kum wasiso, ra a sa watung tari, ma mot kai mot in maimai doko. ⁵ Iri a kibino ra an tulu mugu ru a tulu musano ri utiro, ma detul in warut mot sur mot in waninar a etabor ra mot sa liliman taru sur mot in pitari. Ra mot sa waninar mugu tar anumot a etabor, in elar ut nama etabor mulus, ma ken elar nama utna ra di ungonos pasi kut gusun mot.

⁶ Mot in nuk pasi, osi ra i marut a lilik, in pasong pasi utkai a lilik. Ma osi ra i marut a susut, in pasong pasi utkai a susut. ⁷ Mot taktakai, mot in pitari kut a utna ra mot sa nuki lena, mot nem na pitari. Ma gong mot pitar a utna ra ka mot gas sur mot in pitari, ma gong mot etabor uni di ungonos tar mot kut. Uni o God i nem det ra det etabor nama gasgas. ⁸ O God i pet lar pasi sur in tabor mot nama kum utna rop ra mot sibo suri, ma in tabor mot nama utna ra i susut taun a utna ra mot sibo suri. Ma una kum bung rop, mot in utur ukai a kum utna kai, sur mot in pam a kum wakak na pinapam nami. ⁹ I elar nami ra di sa tumus tari una Buk Tabu lenri,

“I etabor nama susut na utna torom a kum sibo na taro,
anun a tokodos na petutna in kis tukum.” *Sng 112:9*

¹⁰ O God in tabor mot nama kum utna sur mot in pam a wakak na pinapam nami, elar nami ra i ser tabor a taro nama utna ra det in maruti ma a utna kai ra det in nani. Ma numur mot in pasong a susut na utna tagun anumot a tokodos na petutna. ¹¹ O God in tabor mot nama kum utna rop, sur mot kai mot in ser tabor a taro gisen. Ra mot in pami lenra, a susut na taro det in watung wakak torom o God una numot a etabor, ra met in pitari tandet.

¹² A pinapam na warut ri mot pami, ke waruti kut a taro anun o God nama utna ra det sibo suri, i pam pati utkai a watung wakak torom o God tan a susut na taro. ¹³ A pinapam ri mot pami, i upuaso a wakak na magiramot. Ma a susut na taro det in watung ulabo pas o God, uni anumot a nurnur una Wakak na Wasiso un o Karisito, i pam pati kai a petutna na mur wasiso. Ma det in watung ulabo pas o God, una numot a wakak na petutna ra mot tabor det, ma a taro gisen kai. ¹⁴ Det in wararing sur mot, ma det in nem doko mot, uni o God i ese anun a labino marmaris torom mot. ¹⁵ Dat in watung wakak sakit torom o God, una nun a labino etabor, ra kataio in watung palos lar pasi.

10

O Pol i wasiso talapor una nun a pinapam

¹ A ramano taro det watungi lena, ra a kis torom mot, ka ser wasiso dekdek, ikut ra a kis gisen anung a wasiso i dekdek sakit. Iau, o Pol, a saring mot sur mot in longoro iau, uni o Karisito i unatino pasi, ma i papam nama wowowon na magirano torom a taro. ² Ra an nanpat torom mot, i topasi kut sur an ukodos mot nama kum dekdek na wasiso. Ikut ka nemi. Ara taro tagun mot det watungi lena, met muri kut a petutna tagun a rakrakon bual. Ra a saring det, sur det in mana gusun a ngas na wasiso ra, sur gong a wanpat nama kum dekdek na wasiso torom det. ³ A lingmulus, met laun una rakrakon bual, ikut ka met waim elar nama ngas na inaim tagun a rakrakon bual. ⁴ Uni a kum utna na inaim ra met waim nami, awu sur anun a rakrakon bual, awu. A kum dekdek na utna na inaim anun o God, ma det dekdek sakit sur met in rege a kum dekdek na woro nami anun a ebar. ⁵ Met kamar ru a kum torotoro na wasiso ra a taro det uman labino nami, sur det in turbat a taro sur gong det tasman o God. Ra met dat pukus a nuknukin a taro, sur det in mur a wasiso anun o Karisito. ⁶ Met langlang mot sur mot in mur rop a wasiso anun o Karisito, ra numur met in waninar sur met in warkurai det ra det pitarngat.

⁷ Mot in tama wakak a kum utna! Ra taio i nuki lena, i anun o Karisito, i wakak sur in nuknuk wakak ma in tama lele i lena, met kai anun o Karisito. ⁸ Ra met ser warango pas met una numet a kinkinin na mugumugu ra a Labino i sa pitar tari tamet, ka met maimai. Uni i sa pitar tari, sur met in udekdek mot nami, ma awu sur sur met in ban laulau mot. ⁹ Ka nemi sur an ungara mot nam anung a kum pas. ¹⁰ Uni a ramano taro det watungi lena, “Una nun a kum pas anun a wasiso i maut ma i dekdek, ikut ra i ut i kis tomo nam met, anun a wasiso i utna oros kut, ma ke maut.” ¹¹ I wakak sur det in tasmani lena, anumet a kum dekdek na wasiso ra det ser luki una numet a kum pas, ra ka met kis nisandet, met in pam sot pasi ut, ra met in nanpat tiro.

¹² Ka met ser elaro met nam det ra det watungi lena, det labo sakit. Det elaro etetalai det melet ut. Ka det mananos! ¹³ Ikut met, ka met in warango pas met una kum utna gisen, met in warango pas met kum una pinapam ra o God i pitar tari tamet. A pinapam na warawai ra i wan tuk una

numot a tamon. ¹⁴ Ka met warango pas met un tu pinapam ra ka met pam tari, uni met wanpat ut torom mot nama Wakak na Wasiso un o Karisito. ¹⁵ Ma ka met warango pas met kai, un tu pinapam, ra a taro gisen det sa pam tari. Ikut met nurnur lena, ra anumot a nurnur in lubung, anumet a pinapam kai epotor tamot in lubung, ¹⁶ sur met in warawai kai nama Wakak na Wasiso torom a kum tamon kusa numugu tamot, ra kataio utnakai i warawai iai. Uni ka met nemi sur met in warango pas met, una pinapam ra ara gisen ut, i sa pam tari. ¹⁷ A Buk Tabu i watungi lena, “Osi ra i nemi sur in warango pas taio, i wakak sur in warango pas a Labino.” *Jer 9:24*
¹⁸ Uni osi ra i watung ulabo pasi ut, o naro ra awu sur i labo umatan a Labino, ikut osi ra a Labino i watung ulabo pasi, i ra i labo.

11

O Pol ke elar nama kum torotoro na aposel

¹ A nemi sur mot in longoro i munung anung a longlong na wasiso. A tasmani lena mot in longoro iau. ² A ngara doko un mot, elar nam o God i ngara un mot, sako mot in nan gisen gusun o Karisito. A sa ubek bat tar mot sur mot anun o Karisito, elar nama wakak na toraro ra kabaut i kis tomo nam tu musano. ³ Ikut uniri, a ngara, sako din ben raro a nuknuki mot gusun anumot a petutna ra katu dur uni, ma anumot a nurnur mulus un o Karisito, elar namin nusui i toro pas o Iwa. ⁴ Uni mot gas sur mot in longoro taio ra i wanpat torom mot, ma i warawai un ara Iesu gisen, ma awu sur un o Iesu ra met warawai nami. Ma mot gas kut sur din tabor mot nam tu nion gisen, ra awu sur a Tokodos na Nion. Ma mot gas kut sur mot in longoro tu Wakak na Wasiso gisen, ra awu sur a Wakak na Wasiso ra mot sa nurnur uni.

⁵ Awu sur a nuki lena, a natino tandet ra mot watung det a kum lamlabino aposel. ⁶ Surko mot nuki lena, ka ususer pas sur a tene warawai, ikut a tasmani ut a utna ra a warawai nami. Mot ut, mot talapor uni, uni una kum utna rop met pami torom mot, met upuaso a mananos rop ri.

⁷ Pepetlai, a raro uni ka saring mot sur tu mani ra a warawai nama Wakak na Wasiso torom mot? A unatino pas iau nisamot, sur mot, mot in labo. ⁸ A los a mani gusun a taro na lotu una ramano kum tamon gisen, sur in warut iau una nung a pinapam epotor tamot. I elar nami ra a wolong anundet a

mani sur an papam torom mot. ⁹ A susut na dino a sibo ra a kis tomo nam mot, ikut ka pitar tu maut torom mot. Uni a kum tisting una nurnur tagisa o Masedonia det wanpat, ra det tabor iau nama utna ra a sibo suri. Ka saring tar mot, ma kan saring tar mot kai sur tu utna. ¹⁰ I lingmulus, a lingmulusino anun o Karisito kuri un iau, ra a inanos mot nama lingmulus lena, kataio una kudulano papor Akaia, in turbat lar pas iau ra a warango iau una nung a petutna torom mot. ¹¹ Pepetlai, ra ka saring mani gusun mot, i upuaso i lena, ka nem mot? Awu. O God i tasmani lena, a nem doko mot!

¹² An pam liklik a kum utna ri a pami, sur det ra det watung det a kum aposel, det in tasmani lena, anundet a pinapam ke elar nam anumet a pinapam. I mo ra katu kibino sur det in warango det una nundet a pinapam. ¹³ Uni a kum musano ra, a kum torotoro na aposel, a kum torotoro na tene pinapam, ma det pukus pas det sur det in tamtama elar nama kum aposel anun o Karisito. ¹⁴ Awu sur a utna na ukisin torom dat, uni o Satan utkai i ser pukus pasi, sur in tamtama elar nama ensel tagun a talapor. ¹⁵ Ma ka dat in kisin kai ra anun a kum tene pinapam, det in pukus pas det, sur det in tamtama elar nama kum tene pinapam anun a tokodos na petutna. Numur det in los anundet a ikul, elar ut nam anundet a sakino pinapam.

A kum mamaut ra o Pol i taramo i

¹⁶ An watung meleti lena, gong mot nuki un iau lena a longlong. Ikut ra mot nuki un iau lenra, mot in madek tar a longlong ri sur in warango pasi ut. ¹⁷ A lingmulus, ra a warango pas iau ut, ka wasiso elar nama nemnem anun a Labino, i elar kut nama longlong. ¹⁸ A susut na taro det warango pas det elar nama ngasino anun a rakrakon bual, i mo ra iau kai an warango pas iau ut. ¹⁹ Mot madek tari kut a kum longlong na taro sur det in ususer mot, uni mot mananos doko. ²⁰ I lingmulus, mot gas pas det, ra det ukarabus mot ma det ban laulau mot, ma det urop ru anumot a kum utna ma det ulabo pas det umatamot, ma det pasor a kum masmasari mot. ²¹ A maimai doko ra an watungi lena, met ut kalako dekdeki met sur met in pam a kum petutna ri torom mot!

A kum utna ra det warango pas det uni, iau kai, a pet lar pasi sur an warango pas iau ut uni. A wasiso elar nama longlong. ²² Det warango pas det lena, det a kum te Ibru, niko? Iau kai a te Ibru. Det a kum

te Israel, niko? Iau kai a te Israel. Det a kum nutnutun o Abaram, niko? Iau kai a nutun o Abaram. ²³ Det a kum tultul anun o Karisito, niko? Iau a wakak na tultul tandet rop. A wasiso elar nama longlong. A papam dekdek bing tandet rop, a sa kis papas una karabus, a kum inaim di pami un iau i dekdek sakit, a susut na dino milau an mat. A kum utna rop ri, ra di pami un iau, i labo taun a utna ra di pami un det. ²⁴ A taro Juda det rapus in surung elar nama tulu noino ma lisu na du raprapus. I elar nama limo na dino rop ra det pampami un iau. ²⁵ Ara dino di duku iau nama kum watat. Di rapus iau a susut na dino namin nubuku. I elar nama tulu dino rop ra det pami un iau.* A tulu dino a iru nama sip tiro utasi.† Ara bung na mirum ma ara bung na waspi a salir una epotor na tasi.

²⁶ A sa wan una susut na inawan. A elar nama utna na iniru una inawan una kum danim, ma a ramano kum dino kai, milau an iru una laman a kum sakino taro. Milau an barato a iniru tan anung a taro ut, ma tan a kum usiro na taro kai. Milau an barato a iniru una kum tamon, ma una kum nubual kalako taro uni, ma sa utasi. Ma milau kai, an iru ulaman a kum torotoro na tisting una nurnur. ²⁷ A dekdek ma a papam dekdek ut. A susut na bung na mirum ka inep. A susut na dino a muruk ma a murak. A susut na dino ka wan tu utna. A ramano kum dino a sibo sur a malu ma a taramo a kotokoto.

²⁸ Ara utna kai a etoromi ra i labo doko, i lenri, anung a tamtamabat torom a taro na lotu una kum tamon rop, i maut doko una nung a nilaun una kum bung rop. ²⁹ Ra taio tagun det, anun a nurnur i kis pirso, iau kai a pining in ngoro. Ra taio tandet di sa ben tari una sakino, in balang in sungun nami.

³⁰ Kan warango pas iau un tu utna gisen, an warango pas iau kut una kum utna ra i upuaso i lena, kalako dekdeking. ³¹ O God, i ra a God anun a Labino o Iesu ma i o Tamano, ra a wasiso na ululabo toromi ken rop ma ken rop, i tasmani ut lena, ka toro. ³² Tong o Damaskus, a mugumugu tagun a tamon ra, ra i papam utuntudu ina king Aretas, i utur tar a kum tene tamtamabat una matansaku ina in noworo ina tamon, sur det in dat pas iau. ³³ Ikut, di ukete pirso iau mukut nama rat, una windo na in noworo, ra a laun sikot gusun a laman a mugumugu ra.

12

11:21: Pil 3:5 11:23: Ap 16:23 11:24: Lo 25:3 11:25: Ap 16:22; 14:19 * 11:25: Ap 16:22-23 i inanos
dat una ara dino ra di rapus o Pol namin nubuku. † 11:25: Ap 27:39-44 i inanos dat una ara dino ra o Pol i iru
nama sip. 11:26: Ap 9:23; 14:5 11:32: Ap 9:23-25

Una tamtama o God i ben pas o Pol usapat una langit

¹ Ra an warango pas iau ut, anung a wasiso ke gas un tu utna, ikut an warango pas iau ut una ramano kum tamtama ma a kum ririon ra a Labino ut i sa utamtama tar iau uni. ² A tasman ara musano, a te Karisito, numugu tan a noino ma wat na kilalo, o God i ben pasi usapat una mantul na langit. Ka tasmani ra i los tito pasi, tomo nama pinino, o a niono kut. O God kut i tasmani. ³⁻⁴ An watung meleti, a tasmani lena a musano ri o God i los tito pasi usapat una Paradais, ikut ka tasmani ra i los tito pasi, tomo nama pinino o a niono kut. O God kut i tasmani. Sapat netes, i longoro a kum utna ra kataio in pet lari sur in watungi, ma i tabu kai sur taio in inanos nami.

⁵ An warango pas a musano ri, ikut, ra an warango iau, an warango pas iau una kum utna kut ra i upuaso i lena kalako dekdeking. ⁶ Gunuk ra an warango pas iau una kum utna ri, ka longlong, uni a watungi ut a lingmulus. Ikut ka nem na wasiso bing una nung a kum tamtama, uni ka nemi sur taio in ulabo pas a nuknukino un iau, sako a nuknukino un iau ken elar nama utna ra a pami ma a watungi.

O Pol i gas ra kalako dekdekin

⁷ A kum utna ra o God i sa utamtama tar iau uni i labo sakit, ikut di pitar tar ara utna i suksuk ra i ser so a pining, sur gong a nuk ulabo pas iau ut una kum tamtama ri. A suksuk ra, a ensel anun o Satan ra i ban laulau a pining. ⁸ A sa mantulu saring a Labino, sur in rakon ru i gusun iau. ⁹ Ikut i watungi lenri tang, "Anung a marmaris torom ui sa sot, ma kon sibo sur tu utna gisen. Uni din tama pupuaso a dekdeking un ui ra kalako dekdekim." I mo ra a gas doko sur an warango pas iau lena, kalako dekdeking, sur a dekdekin o Karisito in kis un iau. ¹⁰ I mo ra a gas doko ra kalako dekdeking, ma di watung laulau iau, ma a taramo a kum mamaut, ma a taro det ukadik iau, ma a taramo a dekdek na tupunuk, uni a nurnur un o Karisito. A gas, uni a tasmani lena, ra kalako dekdeking an dekdek.

O Pol i watung puaso anun a marmaris torom a taro Korin

¹¹ A sa watung tar a kum longlong na wasiso ri, uni ka mot nuki lena iau a aposel mulus. I lingmulus ut, iau a musano oros kut, ikut i tokodos sur mot in tama lele iau lena iau a aposel mulus, uni ka natino tandet ra mot watung det a kum lamlabino

aposel. ¹² Ra a kis nisamot, a ulingmulus pas iau umatamot lena, iau a aposel mulus. A pam a kum utna na ukisin, a kum dekdek na pinapam, ma a kum ukinalong, ma pining ke ngoro sur an pam a kum utna ri, ra a taramo a kum maut. ¹³ Asau a kibino ra mot nuki lena ka pam a wakakino torom mot, elar nami ra a pami torom a taro na lotu una ramano kum tamon gisen? Kutiro ra ka saring mot sur tu utna? Mot in dumano ru anung a sakino petutna ra ka saring mot sur tu utna!

¹⁴ Tama i, uniri a sa waninar sur a mantul na inawan torom mot. Ma kan saring tu utna gusun mot, uni ka nem anumot a mani, a nem mot ut. Uni ke tokodos sur a kum nat liklik det in tabor a kum tamandet ma a kum nandet. I wakak sur a kum tamandet ma a kum nandet ut det in ubek a utna sur det in tabor a kum nutnutut det nami. ¹⁵ A gas kut sur an pitar tar anung a kum utna rop, ma anung a nilaun kai, sur u warut mot. A nem doko mot, ma pepetlai, anumot a marmaris torom iau in natino kut?

¹⁶ Mot sa tasmani lena ka saring pas tu mani gusun mot. Ikut, sako taio tagun mot in watungi lena, iau a tene mananos ma a sa toro pas tu utna gusun mot. ¹⁷ Pepetlai, surko a sa los pas tu utna tamot, tan a taro ra a tulu ru det torom mot? ¹⁸ A saring pas o Taitus sur in nan torom mot, der nam ara tisimet kai. Pepetlai, o Taitus i sa los pas tu utna gusun mot? Awu. Met muri kut ara nuknuk, ma ara kisapi kut ra met muri.

O Pol i ngara un det

¹⁹ Pepetlai, mot nuki lena met wasiso bat met kut gusun mot? Awu. Met wasiso nama lingmulus umatan o God elar nama kum tultul anun o Karisito. A kum wakak na paspasa met, a kum utna rop ra met pami, met pami sur in warut mot. ²⁰ A ngara, sako ra an nanpat torom mot, kan tama torom a kum petutna ra a nemi sur an tama i. Ma mot kai, ka mot in gas una petutna ra an nanpat nami. A ngara, sako an etorom pas a ngas na kinkinis lenri: mot wasiso na engaras, mot nuknu laulau, mot kankan, mot kis susuaro, mot emang, mot wasiso eno, mot ulabo pas mot ut, ma anumot a kinkinis i purpuruon. ²¹ A ngara, sako ra an nanpat tiro, anung a God in unatino pas iau umatamot. Ma an tupunuk una susut tagun mot, ra det pam sakino tagun numugu utmakai ma ka det nukpukus gusun anundet a kum dur na petutna, a kum pamuk na petutna ma a kum nemnem sur a sakino petutna ra det ser muri.

13

O Pol i utumarong det

¹ Uniri a mantul na inawan ra an nan torom mot. Ma di sa tumus tari una Buk Tabu lena, “Ra lako ru o lako tul anundetul a wasiso i takai kut un tu utna, anundetul a wasiso i lingmulus.” *Lo 19:15*

² Una nung a manru na inawan pat torom mot, a sa utumarong tar mot una numot a kum sakino petutna. Ma uniri ra a kis gisen, an inanos melet mot ut una utna ri: Numur, ra an nanpat tiro, an wasiso dekdek torom det ra kabaut det nukpukus gusun anundet a kum sakino tagun numugu, ma osi kai ra i pam a sakino. ³ An wasiso lenri, uni mot nemi sur an ese i lena, o Karisito i wasiso torom mot nama anung a wasiso. O Karisito a pinino ke ser ngoro, awu, i ser papam nisamot nama dekdek. ⁴ I lingmulus, ra di sak wat o Karisito unin nanai kutus, katu dekdekino. Ikut una dekdekin o God, i laun melet. Lenkutkai ra kalako dekdeki met tomo nam o Karisito, ikut met laun tomo nami nama dekdekin o God, sur met in papam torom mot.

⁵ Mot in tama wakak anumot a nilaun, ra anumot a nurnur i lingmulus o awu. Mot tasmani lena, o Karisito Iesu i kis un mot, niko? Ra awu, anumot a nurnur ke lingmulus. ⁶ A nurnur lena mot in tasmani kai lena, o Karisito i kis un met. ⁷ Uniri, met wararing torom o God sur gong mot pam tu sakino. Ka met wararing lenra, sur a taro det in tama i lena, anumet a pinapam i wanpat mulus, awu. Met nemi sur mot in pami kut a utna ra i tokodos. Ra a taro det in nuki lena anumet a pinapam ke wanpat mulus, i wakak kut. ⁸ Ka met in pam tu utna ra in turbat a lingmulusino, awu, met in muri kut. ⁹ Ra mot dekdek ma met kalako dekdeki met, met gas kut. Ma met wararing sur mot in tokodos una numot a nurnur. ¹⁰ Iri a kibino ra a tumus a kum utna ri torom mot ra ka wanpat utmakai. Ra an nanpat, kan wasiso nama dekdek na wasiso torom mot, ma kan kuro mot nama warkurai ra a Labino i sa pitar tari tang. I pitar tari tang sur an udekdek mot nami, awu sur an ban laulau mot nami.

A ururop na wasiso

¹¹ Anung a ururop na wasiso mo ri: A kum tistising, mot in gas! Mot in ukodos mot, mot in mur anung a wasiso, in takai kut a nuknuki mot, ma mot in kis na malmal etetalai. Ra a God na marmaris ma a malmal in kis tomo nam mot. ¹² Ra mot etorom, mot in nem etetalai mot nama egom na marmaris, ma mot in pami nama tokodos na petutna.

¹³ A taro rop anun o God ra det kis tomo nam iau, det pitar anundet a marmaris torom mot.

¹⁴ A marmaris anun a Labino o Iesu Karisito, ma a marmaris anun o God, ma a kinkinis tomo anun a Tokodos na Nion in kis tomo nam mot rop.

A Pas anun o Pol torom a taro Galesia

A wasiso talapor mugu

O Pol i tumus a buk ri torom a taro ra det kis una kum tamon tong una papor Galesia. Numugu o Pol i wan tuptupukus una kum tamon tong o Galesia ma i warawai nama Wakak na Wasiso torom det. A taro na lotu tong o Galesia awu sur det a taro Juda, ra o Pol i inanos det lena, ra det in nurnur kut un o Iesu, o God in ulaun pas det. Ma katu kisapi melet mo sur o God in ulaun pas det uni.

Numur a taro Juda det wanpat ma det watungi lena a wasiso anun o Pol ke tokodos. Det watungi lena a taro na nurnur det in mur a kum Warkurai anun o Moses, sur det in tokodos umatan o God. Det watungi lena din tok talilis a taro na nurnur rop. A tinotok talilis, a ukinalong sur det in elar nama taro Juda ra det in mur rop a kum Warkurai anun o Moses ma anun a taro Juda. Ra o Pol i longoro i, i kankan doko. I watungi lena, ra gunuk dat tokodos uni dat mur a kum Warkurai anun o Moses, a minat anun o Iesu in utna oros kut, ma ken pet lar pasi sur in unus ru anundat a kum sakino petutna. O Pol i wasiso dekdek torom a taro Galesia una buk ri. I nemi sur det in nan gisen gusun a kum etowo anun a kum torotoro na tene ususer, ma det in nurnur kut un o Iesu.

A inawan ina Pas Galesia:

Ara Wakak na Wasiso kut (1:1-10)

O Pol i wanpat a aposel mulus (1:11-2:21)

O God in ulaun dat kibino una nundat a nurnur kut un o Iesu, awu sur i kibino ra dat mur a kum Warkurai (3:1-4:31)

Dat langolango gusun a dekdekin a sakino petutna ma dat in mur a nem-nem ina Tokodos na Nion (5:1-6:10)

A ururup na wasiso anun o Pol torom det (6:11-18)

¹ Iau o Pol, a aposel, a tumus a pas ri torom mot. Katutaio taginin upiso i pilok pas iau sur an aposel, ma awu sur a taro kai det tulu iau sur an pam a pinapam ri. O Iesu Karisito ut ma o God o Tamano der tulu iau, o God ra i ukatutur melet pas o Iesu gusun a minat. ² A kum tistising rop ra met kis tomo nin, det mulaot tomo nam iau sur an tumus a pas ri torom mot, a kum tene nurnur rop tiro una papor Galesia.

³ A marmaris ma a malmal tan o God a Tamandat ma a Labino o Iesu Karisito in kis tomo nam mot. ⁴ O Iesu i ubek ru

anun a nilaun una anundat a kum sakino petutna, sur in ulaun dat gusun a kum sakino petutna ra a taro det pami una kum kilalo ri. I elar nama nemnem anun anundat a God a Tamandat. ⁵ Dat in ulabo pasi ma ken rop. Amen.

Ara Wakak na Wasiso kut

⁶ A kisin doko lena, ke suano i ra mot sa wan gisen pas gusun o God, i ra i kabo pas mot una marmaris anun o Karisito. Ra uniri, mot sa tupukus sur a se etowo. ⁷ A etowo ra, awu sur a Wakak na Wasiso. Ara taro det ulokolokor a nuknuki mot ma det lari sur det in pukus a Wakak na Wasiso anun o Karisito. ⁸ Ikut ra met ut, o tu ensel kai tagisapat una langit in warawai nam tu se etowo, ra ke elar nama Wakak na Wasiso ra met sa warawai taru nami torom mot, i wakak ra in iru tukum una warkurai anun o God. ⁹ A sa inanos mugu tar mot, ma iri an watung meleti lena, ra taio in warawai torom mot nam tu etowo ra ke elar nama Wakak na Wasiso ra mot sa utur ukai pasi, i wakak ra in iru tukum una warkurai anun o God!

¹⁰ Ka nemi sur a taro det in ulabo pas iau, a nemi sur o God ut in gas nam iau. Ka nem na ugargas a taro kut. Ra an ugargas a taro kut, awu sur iau a tultul anun o Karisito.

O God ut i kabo pas o Pol

¹¹ A kum tistising, a nemi sur mot in tasmani lena a Wakak na Wasiso ra a warawai nami, awu sur a etowo ra tan a taro taginin upiso. ¹² Ka losi tan a taro, ma katu musano kai i ususer iau nami. O Iesu Karisito ut i upuaso tari tang.

¹³ Mot sa longoro tar anung a ngas na nilaun tagitiro numugu, ra a tur dekdek una lotu Juda, ma a ser ban laulau a taro na nurnur anun o God, ma a lari sur an kamar ru det. ¹⁴ A tur dekdek una lotu Juda, ma anung a mananos una lotu i labo taun det rop ra anumet a kilalo i elar. A dekdek doko sur an mur wakak a kum petutna anun a taro Juda tagun numugu. ¹⁵ Ikut, o God i sa pilok tar iau, ra ka di usus iau utmakai, ma una nun a marmaris, i kabo pas iau. Ma i nemi ¹⁶ sur in upuaso o Iesu a Nutunu torom iau, sur an warawai nami torom a taro ra awu sur a taro Juda. Katu musano i ususer iau uni. ¹⁷ Ma ka wan usapat o Jerusalem sur det ra det sa aposel mugu tang det in ususer iau, awu. A wan mut utong o Arebia, ra nurur a millet melet sur a tamon Damaskus.

¹⁸ Ra a tulu kilalo i sa rop, a wan maragom usapat o Jerusalem sur an tama o Pita, ma a kis tomo nami a noino ma

limo na bung. ¹⁹ Ka tama a ramano kum aposel kai, o Pita kut der nam o Jems a tisin a Labino. ²⁰ Tama i! A liliman umatan o God lena a utna ri a tumusi torom mot i lingmulus ut, ka toro!

²¹ Numur a wan utong una papor Siria, ma una papor Silisia. ²² Ikut a taro na lotu anun o Karisito tong una papor Judia ka det tasman iau. ²³ Det longoro i kut a taro ra det wasiso puaso un iau lena, "A musano ra i nem na ban laulau dat, uniri i warawai mukut nama petutna na nurnur, ra numugu i nem na kamar tari." ²⁴ Ra det watung ulabo pas o God uni i papam una nung a nilaun.

2

A kum aposel det gas pas o Pol

¹ Numur tan a noino ma wat na kilalo, a wan melet usapat o Jerusalem, mir nam o Banabas, ma a beni kai o Taitus. ² A wan uni o God ut i inanos iau sur an nan. A etorom det ra di watung det nama kum mugumugu anun a kum tene nurnur. Ra met kut met kis, a inanos det nama Wakak na Wasiso ra a ser warawai nami torom a taro ra awu sur a taro Juda. A nemi sur det in mulaot uni, sur gong i utna oros kut anung a pinapam na warawai tagitiro ut tuk uniri. ³ Mir kis tomo nam o Taitus, a te Grik, ikut ka det ungonos pasi sur din tok talilis a pinino, elar nama Warkurai anun a taro Juda.

⁴ Met wasiso una utna ri, uni a ramano kum torotoro na tene nurnur det sa ruk eno taru torom a kum tene nurnur, elar nama kum tene longoro eno. Det nemi sur det in longoro wasiso una nundat a kinkinis langolango, ra dat sa utur ukai i tan o Karisito Iesu, sur det in ker tar dat melet una kum Warkurai anun a taro Juda*. ⁵ Ikut, ka met mulaot pas a wasiso anundet, sur met in mur a warkurai na tinotok talilis. Met nemi sur a lingmulus ina Wakak na Wasiso in kis ut torom mot, ma ken senene.

⁶ A taro ra di watung det nama kum mugumugu, ka det pukus a Wakak na Wasiso ri a warawai nami, ma ka det ubek tar lako kum Warkurai anun a taro Juda uni. Ra det a kum mugumugu o awu, ka nuk det. Umatan o God a taro rop det elar kut. ⁷ Det tama lele i ra o God ut i pitar tar a pinapam ri tang, sur an warawai nama Wakak na Wasiso torom det ra awu sur a taro Juda, elar nam o Pita kai, ra o God i pitar tar a pinapam toromi sur in warawai

nama Wakak na Wasiso torom a taro Juda. ⁸ O God i pitar tar a dekdek tan o Pita sur in aposel torom a taro Juda, lenkutkai ra torom iau, i pitar tar a dekdek tang sur an aposel torom det ra awu sur a taro Juda. ⁹ O Jems, o Pita ma o Jon, ra a taro det watung detul nama tulu mugumugu, detul tama i ra o God i tabor iau nama marmaris, ma detul mulaot pas mir nam o Banabas sur mir in papam. Detul mulaot sur mir in nan torom a taro ra awu sur a taro Juda, ma detul, detul in nan torom a taro Juda. Ra detul gas pas mir ra met sikan, uni met ara kut una pinapam. ¹⁰ Ma detul saring mir sur mir in pam ara utna kut lenri, mir in nuk pas a kum sibo na taro, a pinapam ra iau utkai a nemi sur an pami.

O Pol i inanos o Pita lena i sa raro

¹¹ Ra o Pita i wanpat tong o Antiok, a woso matano lena, i sa raro, uni a utna ra i pami ke tokodos. ¹² Numugu, ra i kis tong o Antiok, i wangon tomo nama taro na lotu ra awu sur a taro Juda. Ikut, a ramano kum te Juda ra o Jems i tulu ru det toromi, det wanpat. Ra o Pita ke wangon tomo melet mo nam det ra awu sur a taro Juda. I kis gisen mukut gusun det, uni i ngaran a taro Juda, det ra det nemi sur din tok talilis a taro na nurnur rop. ¹³ Ra o Pita ke wangon tomo melet mo nama taro ra awu sur a taro Juda, a ramano kum te Juda ra det nurnur un o Iesu, det muri mukut a petutna anun o Pita ma det kai det raro tomo nami. Una nundet a petutna ri, det ben raro i utkai o Banabas.

¹⁴ Ra a tama i lena, a utna ri, det pami ke elar nama lingmulus ina Wakak na Wasiso, a watungi torom o Pita umatandet rop lena, "Pita, ui a te Juda, ikut u laun elar nama taro ra awu sur a taro Juda. Asau a kibino ra u ungonos pas a taro gisen sur det in mur a kum petutna anun a taro Juda?"

¹⁵ "Di usus dat a kum te Juda, awu sur dat elar nama taro ra awu sur a taro Juda, ra dat ser watung det lena a kum tene sakino. ¹⁶ Ikut, dat tasmani lena o God ke watung taio a tene tokodos uni i mur a kum Warkurai anun o Moses. Awu! O God in watung taio a tene tokodos uni i nurnur kut un o Iesu Karisito. Lenkutkai ra torom dat, dat nurnur un o Karisito Iesu, sur dat in tokodos umatan o God. Dat tokodos uni dat nurnur un o Karisito, ma awu sur i kibino uni dat mur a kum Warkurai. Uni o God ken watung taio a tene tokodos ra i mur a kum Warkurai.

1:21: Ap 9:30 2:1: Ap 15:2 2:4: Gal 1:7; 5:1, 13 * 2:4: A kum torotoro na tene nurnur det nem na ungonos det sur det in mur a warkurai na tinotok talilis. Ikut a kum tene nurnur mulus det langolango gusun a kum warkurai. 2:7: Ap 22:21 2:10: Ap 11:29-30 2:12: Ap 11:3 2:16: Ap 15:10-11; Rom 3:20-28; Gal 3:11

¹⁷ “Umatan a taro Juda dat a kum tene sakino, uni dat nurnur un o Karisito, sur dat in tokodos umatan o God, ma ka dat mur a kum Warkurai, sur dat in tokodos umatano. Pepetlai, o Karisito i a kibino ra dat a kum tene sakino? Awu ut! ¹⁸ Ikut ra an muri melet a kum Warkurai ra a sa mana taru gusun det, i ese i lena iau a tene lakai warkurai.

¹⁹ “Uniri a sa tasmani lena kan tokodos uni a mur a kum Warkurai. A sa mat gusun det. A kum Warkurai ut i ubek tar iau una minat. A mat sur an laun sur o God. ²⁰ Di sa ukete tomo tar iau nam o Karisito unin nanai kutus, ma awu sur iau mo ri a laun, o Karisito mukut i laun un iau. A laun nama pining, ikut a laun nama nurnur una Nutun o God, ra i maris iau ma i pitar tar anun a nilaun sur in ulaun pas iau. ²¹ A marmaris anun o God torom iau i labo doko, ma kan madek oros ru i kut. Ra gunuk o God in watung taio a tene tokodos, uni i mur a Warkurai, o Karisito i mat oros kut.”

3

A nurnur kut un o Iesu Karisito

¹ A taro Galesia, mot a kum longlong! Osi mo ra i sangsagor, ra i ulokolokor a nuknuki mot? A sa inanos talapor tar mot una minat anun o Iesu Karisito unin nanai kutus, i elar nami ra mot ut mot tama i. ² Mot in inanos iau: Mot utur ukai petlan a Tokodos na Nion? Uni mot mur a kum Warkurai, o uni mot nurnur una Wakak na Wasiso ra mot sa longoro i? ³ Mot sa longlong! Mot turpasi nama dekdekin a Tokodos na Nion. Ilai ra mot nem na papam melet kut nama dekdeki mot ut? ⁴ Pepetlai, a susut na ngunungut ra mot sa taramo tari, i utna oros mukut? Ka nuki lenra. ⁵ Pepetlai, o God i tabor mot nama Tokodos na Nion ma i pam a kum utna na ukisin epotor tamot, uni mot mur a kum Warkurai anun a taro Juda, o uni mot nurnur una Wakak na Wasiso ra mot sa longoro i?

⁶ A Buk Tabu i watungi un o Abaram lenri, “O Abaram i nurnur un o God, i mo ra o God i watungi a tene tokodos.” *Stat 15:6*

⁷ Mot in tasmani lena det ra det nurnur, det a kum nutnutun o Abaram. ⁸ A Buk Tabu i sa wasiso mugu taru lena, o God in watung a taro ra awu sur a taro Juda lena det a kum tene tokodos uni det nurnur. O God i sa inanos mugu tar o Abaram una Wakak na Wasiso lena, “Un ui, din watung udan a taro tagun a kum gapman rop.” *Stat 12:3*

⁹ I lenkutkai ra uniri, det ra det nurnur din watung udan det, elar nami ra di sa watung udan tar o Abaram, a tene nurnur.

¹⁰ Det ra det nuki lena, det in mur a kum Warkurai sur o God in watung det a kum tene tokodos, a dekdek na kankan anun o God i sa kis un det. Uni di sa tumus tari una Buk Tabu lena, “A dekdek na kankan anun o God i kis un det rop ra ka det mur sot pas a kum warkurai rop ra di sa tumus tari una Buk na Warkurai.” *Lo 27:26*

¹¹ Katutaio in mur sot rop pas a kum Warkurai rop. I mo ra, i talapor lena, o God ken watung taio a tene tokodos, uni i mur a kum Warkurai. A Buk Tabu i watungi lenri, “Osi kut ra i nurnur, o God in watungi a tene tokodos ma in laun.” *Hab 2:4*

¹² Osi ra i nuki lena in muri kut a kum Warkurai sur in tokodos uni, ke nurnur un o Karisito. A Buk Tabu i watungi lenri, “Osi ra in mur sot rop pas det, in laun uni i mur a kum Warkurai.” *Wkp 18:5*

¹³ A kum Warkurai i ubek tar dat una dekdek na kankan anun o God. Ikut o Karisito i kul langolango pas dat gusun a kankan ra. I ut i tur keles dat, ra i rakon pas a dekdek na kankan. I elar nami ra di sa tumus tari una Buk Tabu lena, “Osi ra di ukete i netes unin nanai, a dekdek na kankan anun o God i kis uni.” *Lo 21:23*

¹⁴ O Karisito i kul langolango pas dat, sur o God in watung udan a kum kamkabo taro rop, elar nami ra i watung udan o Abaram, ma sur in pitar a Tokodos na Nion torom dat, ra dat nurnur un o Karisito Iesu, elar ut nama nun a liliman.

A liliman anun o God i labo taun a kum Warkurai

¹⁵ A kum tistising, an watung a wasiso elelar una magirandat torom mot. Ra lako ru musano der liliman taru ma der sa pam tar tu kunubus, katutaio melet mo in pukus lar pasi. ¹⁶ Lenkutkai ra, o God i sa uliliman taru torom o Abaram ma torom o nutunu. O God awu sur i watungi lena, “torom a kum nutnutunu.” Gunuk ra in watungi torom a kum nutnutunu, a kukuraino ra a susut na taro. Ikut i watungi lenri, “torom o nutunu,” a kukuraino lena ara musano kut, i a Karisito. ¹⁷ Iri a kukurai ina nung a wasiso: O God i uliliman mugu taru torom o Abaram, nama kum utna ra in pam sot pasi ut. A kum Warkurai, ra det wanpat a wat na mar ma tulu noino kilalo numur, ka det pukus lar pas a liliman anun o God torom o Abaram. ¹⁸ Pepetlai, mot nuki lena a etabor anun o God i wanpat torom dat uni dat mur a Warkurai? Awu! I kibino ut una nun a liliman. O God i uliliman

nami torom o Abaram una nun a labino marmaris toromi.

¹⁹ Sur asau ra o God i pitar a kum Warkurairai? I pitari sur a taro det in tama lele anundet a kum sakino petutna. Di mur a kum Warkurai tuk a nutun o Abaram i wanpat, i ra o God i uliliman taru nami, o Karisito. Ra o God i pitar a kum Warkurai, i tulu ru a kum ensel nami torom o Moses, i ra i tur epotor tan a taro ma o God, sur o Moses in pitari torom det. ²⁰ Ikut ra o God i liliman torom o Abaram, katutaio i tur epotor tander. O God ara sot kut i wasiso.

Dat langolango uni dat nurnur un o Karisito

²¹ Pepetlai, a Warkurai ma a liliman anun o God der ebar etalai? Awu! Gunuk a Warkurai in pitar a nilaun tan a taro, det in tokodos umatan o God uni det mur a Warkurai. ²² Ikut a Buk Tabu i watung puaso i lena, a taro rop una rakrakon bual, anundet a sakino petutna i ukarabus det. Lenra, det kut ra det nurnur un o Iesu Karisito det in los pas a etabor ra o God i liliman taru nami.

²³ Ra ka di ese i utmakai a nurnur un o Karisito torom dat, dat elar nama kum karabus una dekdekin a Warkurai. Ka dat langolango tuk o God i upuaso a nurnur un o Karisito torom dat. ²⁴ A Warkurai i elar kut nama tene tamtamabat torom dat, sur in ben dat torom o Karisito, sur dat in nurnur uni, ra o God in watung dat lena dat tokodos. ²⁵ Ikut uniri, dat sa nurnur, ra ka dat kis melet mo utuntudu ina kum Warkurai.

Dat a kum nutnutun o God uni dat nurnur

²⁶ Uniri mot rop a kum nutnutun o God, uni mot nurnur un o Karisito Iesu. ²⁷ Ra mot los a baptais, i ese i lena mot ara kut nam o Karisito, ma mot emar nam anun a nilaun. ²⁸ Una nurnur un o Karisito, a taro Juda ma a taro gisen det elar umatan o God, lenkutkai ra a kum tene ititula ma det ra awu sur a kum tene ititula, a kum musano ma a wardain. Uni mot rop mot ara mukut un o Karisito Iesu. ²⁹ Ra mot anun o Karisito, mot a kum nutnutun o Abaram, ma mot in rakon asau ra o God i liliman taru nami toromi.

4

A wasiso elelar un aru tamano

¹ An inanos mot nam ara wasiso elelar melet. A nat in tur keles o tamano una kum ululeng rop, ikut ra i natlik utmakai,

i elar kut nama tene ititula. ² A kum tene tamtamabat det in tamtamabat a nat ra, ma a kum ululeng anunu. Ma in ser kis utuntudu indet, tuk ra in sot a kilalo ra o tamano i kubus tari, sur in los a kum ululeng anun o tamano. ³ Lenkutkai ra torom dat, numugu dat elar nama nat, dat elar nama kum tene ititula anun a kum laulau na nion taginin una rakrakon bual. ⁴ Ra a kilalo i sot, o God i tulu ru o Nutunulik urin. A ino i usus pasi, ma i kis utuntudu ina Warkurai. ⁵ I wanpat sur in kul langolango pas det ra det kis utuntudu ina Warkurai, sur dat in nanpat a kum nutnutun o God.

⁶ Mot a kum nutnutun o God ut. I ra a kibino ra i pitar ra a Tokodos na Nion, a Nion o Nutunulik, sur in kis ubalamot, ma i kakabo torom o God lena, "Aba! Tita!" ⁷ Uniri ka mot kis na tene ititula melet mo, awu. Mot a kum nutnutun o God, ma mot in rakon pas a kum utna anun o God.

O Pol i ngara sur a taro Galesia

⁸ Numugu, ra ka mot tasman o God, mot tene ititula torom a kum god ra awu sur a kum god mulus. ⁹ Ikut uniri mot sa tasman a lingmulus na God. A lingmulus, o God i tasman mot. Sur asau ra mot milet melet sur a kum laulau na nion ra ka det gas un tu utna? Pepetlai, mot nemi sur mot in tene ititula melet torom det? ¹⁰ Mot dekdek doko sur mot in mur a kum warkurai anun a taro Juda una kum lamlabino bung, ma a kum kalang, ma a kum kilalo, ra mot nuki lena mot in tokodos uni. ¹¹ A ngara doko sur mot, sako anung a pinapam torom mot in utna oros kut.

¹² A kum tistising, a saring dekdek mot sur mot in kis langolango gusun a Warkurai elar nam iau, uni a elar kut nam mot ra awu sur a te Juda. Numugu ra a kis nisamot, ka mot pam tu laulau ino un iau. ¹³ Mot tasmani ut, a mugano dino ra a wanpat, ra a warawai nama Wakak na Wasiso torom mot, kibino kut uni a misait. ¹⁴ Anung a misait i pitar a maut torom mot, ikut ka mot nget iau, ma ka mot rosumur gusun iau, awu. Mot gas pas iau kut elar nam ara ensel anun o God, o elar nam o Karisito Iesu ut. ¹⁵ A nuki lena, kanapi ra mot in pet lari, mot in gas sur mot in liok ru a kum kiok na matmata mot urin tang. Ikut uniri, awai mi anumot a gasgas ra? ¹⁶ Pepetlai, uniri mot nuki mukut lena iau anumot a ebar, uni a inanos mot nama lingmulus?

¹⁷ A kum torotoro na tene ususer ra, det dekdek doko sur mot in mur det, ikut awu sur det pami sur det in uwakak mot.

Det nemi kut sur mot in nan gusun met, sur mot in dekdek sur mot in longoro det.
 18 A tuntunur dekdek i wakak, ikut mot in dekdek sur a utna ra i wakak. Mot in dekdek uni, ra dat kis tomo, o a kis gisen kai gusun mot.

19 A kum nutnutung liklik, a taramo melet a ngunungut sur mot, elar nama ino ra i usus. An taramo a ngunungut ri, tuk mot in elar nam o Karisito. 20 A nemi sur an kis torom mot, ma an wasiso na marmaris namin nalngang ut torom mot, uni ka tasmani lena, asau melet mo an pami torom mot.

A wasiso elelar un o Agar der nam o Sara

21 Mot ra mot nem na mur a Warkurai, mot in inanos iau: Pepetlai, mot tasmani ut a kukurai ina Warkurai? 22 A Buk Tabu i watungi lena, o Abaram aru nutnutunu, o Ismael a nutun a tene ititula na ino, a risano o Agar. Ara kai, a risano o Aisak, a nutun o Sara, a ino ra awu sur a tene ititula. 23 A Nutun o Abaram ra a tene ititula i ususi, i ususi una ngas na nolin tagun a rakrakon bual. Ikut a nutun o Abaram, ra o Sara i ususi, i ususi kibino una liliman anun o God.

24 A wasiso ri a wasiso elelar. Aru ino ri, der elar nama ru kunubus. Ara kunubus ra o God i pami sapat netes una tangai Sainai ra i pitar a kum Warkurai tan o Moses. O Agar i tur ukinalong a kunubus ra, ra a taro ra det kis utuntudu ina kunubus ra, det elar nama kum tene ititula. 25 O Agar i tur ukinalong a tangai Sainai kurong o Arebia, ma i elar nama malalarin o Jerusalem anun a taro Juda, uni a taro Juda det kis na tene ititula una Warkurai.

26 Ikut o Jerusalem kusapat una langit, i langolango elar nam o Sara, a ino ra awu sur a tene ititula, ma i a nandat, a kum tene nurnur. 27 Di sa tumus tari una Buk Tabu lena,

“Ui a pobo na ino ra ko usus, un gas,
 un kekelele ma un kukukuk nama gas-
 gas,
 ui ra ko taramo tar a ngunungut na
 usus.

Uni a kum nutnutun a ino ra anun a musano i wan pas gusuni, in susut doko, taun a kum nutnutun a ino ra i kis nisan anun a musano.” *Ais 54:1*

28 A kum tistising, di usus mot una liliman anun o God, elar nami ra di usus o Aisak una liliman anun o God. 29 O naro ra di ususi una ngas na nolin tagun a rakrakon bual, i ukadik o naro ra di

ususi una dekdekin a Tokodos na Nion. I lenkutkai ra torom dat uniri. 30 Asau ra a Buk Tabu i sa watung tari uni? I sa watung tari lena, “Un lu ru a tene ititula na ino tomo nam o nutunu, uni a nutun a tene ititula ken rakon a kum ututna anun o tamano. A ino ra ke tene ititula, o nutunu kut in rakoni.” *Stat 21:10*

31 I mo ra a kum tistising, awu sur dat a kum nutnutun a tene ititula na ino. Dat a kum nutnutun a ino ra ke tene ititula.

5

Dat langolango un o Karisito

1 O Karisito ut i sa ulangolango pas dat, sur dat in langolango mulus. Mot in tur dekdek, ma gong mot madek tar taio sur in ker ukai mot sur mot in elar nama kum tene ititula melet.

2 Mot longoro iau! Iau, o Pol, a inanos mot una utna ri: Ra mot in mulaot pas a warkurai na tinotok talilis, a pinapam anun o Karisito in utna oros mukut torom mot. 3 A wasiso melet torom mot tak-takai: Ra mot in mulaot pas a warkurai na tinotok talilis, mot in mur rop a kum Warkurai anun o Moses. 4 Ra mot nemi sur o God in watung mot a kum tene tokodos uni mot mur a kum Warkurai, mot sa kis susuaro gusun o Karisito. Mot sa wan gisen gusun a marmaris anun o God. 5 Ikut dat, una dekdekin a Tokodos na Nion dat kis langlang nama nurnur sur o God in watung dat lena a kum tene tokodos uni dat nurnur. 6 Ra kura dat un o Karisito Iesu, ra di tok talilis a pinin taio, o ka di tok talilis, i a utna oros kut umatan o God. Ara utna kut ra i labo sakit umatan o God, a nurnur ra i pam pat a marmaris.

7 Numugu mot kalabor wakak. Ikut uniri, osi ra i ban lokolokor tar mot, ra ka mot muri mo a lingmulusino? 8 A etowo ri, ra i ban lokolokor tar mot, awu sur tagisapat tan o God, o naro ra i kabo pas mot sur anunu. 9 Mot in nuk pas a wasiso elelar ri: “A lik nat na is kut in pet lar pasi sur in ulabo pas a beret rop.” 10 Ikut iau ut, a nurnur lena a Labino in udekdek mot sur mot in mulaot tomo nam iau. Ma osi ra i sa ban lokolokor tar mot, in taramo i ut a dekdek na warkurai anun o God toromi.

11 A kum tistising, ka ususer meleti mo a taro una tinotok talilis. Iri a kibino ra a taro Juda det ukadik iau. Gunuk ra an ususer utmakai uni, ka det in ukadik iau. Ikut det ukadik iau, uni a ususer a taro sur det in nurnur kut unin nanai kutus anun o Karisito. 12 A nemi sur a taro ra det ususer

mot sur din tok talilis mot, det in sil melet pas det ut!

¹³ A kum tistising, o God i sa kabo pas mot toromi sur mot in langolango mulus. Ikut gong mot nuki lena mot sa langolango sur mot in mur a kum sakino nemnem ina pinimot, awu. Mot in warut etetalai mot nama marmaris. ¹⁴ A kum Warkurai rop anun o God di ubek tomo pas det sur ara warkurai mukut, i lenri: "Un nem o pasam elar nami ra u nem ui ut." *Wkp 19:18*

¹⁵ Ikut ra mot ukadik etetalai mot elar nama kum wewegua ra det karot etetalai det ma det wan etetalai det, mot in tumarong mot, sako mot in ban laulau rop ru mot.

Dat in mur a Tokodos na Nion

¹⁶ Ra uniri, an watungi torom mot lena: Ra mot in mur a Tokodos na Nion, ka mot in mur a kum sakino nemnem ina pinimot. ¹⁷ A sakino nemnem ina pinimot i turbat a Tokodos na Nion, ma a nemnem anun a Tokodos na Nion kai i turbat a sakino nemnem ina pinimot. Der waim etetalai, ra ka mot pam lar pas asau ra mot nemi. ¹⁸ Ikut, ra a Tokodos na Nion i mugu mot, ka mot kis utuntudu ina Warkurai.

¹⁹ Dat sa tasman a kum sakino petutna ra a nemnem ina pinindat i ser pami. Iri a kum petutna: A kum pamuk na petutna, a dur na petutna, a nemnem sur a sakino petutna, ²⁰ a lotu torom a kum torotoro na god, a sangsagor, a petutna ra di nget a taro, a engaras, a nuknuk laulau un taio, a kankan, a nemnem sur a kinkinis na labino, a kinkinis sarara ma a tapagol susuaro, ²¹ a nuknuk laulau sur a utna anun taio, a ininum, a kukuk tuptupukus nama kum longlong na petutna, ma lako kum sakino utnai lenra. A sa utumarong mugu tar mot munung, ma uniri a utumarong mot melet lena, a taro ra det ser pam a kum petutna ri, ka det in ruk una matanitu anun o God.

²² Ikut, a Tokodos na Nion i wu a kum petutna ri: A marmaris, a gasgas, a malmal, a kinkinis wowowon, a petutna na warut torom taio, a wakak na petutna, a pam a lingmulus na pinapam, ²³ a petutna na urur, a petutna ra taio i tamtamabat wakak anun a nilaun. Katu warkurai in turbat a kum petutna ri.

²⁴ A taro anun o Karisito Iesu, det sak wat a sakino nemnem ina pinindet unin nanai kutus anun o Karisito.

²⁵ Ra a Tokodos na Nion i sa pitar tar a nilaun torom dat, i wakak sur dat in nan tomo nami. ²⁶ Gong dat uman labino, gong

dat ukaturut a balano sungun etetalai, ma gong dat nuknuk laulau etetalai sur tu utna anun taio.

6

A petutna na warut

¹ A kum tistising, ra tu tene nurnur i puku una sakino, mot ra a Tokodos na Nion i mugu mot, mot in ukaturut melet pasi nama petutna na urur. Ikut mot in tumarong mot ut, sako mot bulung mot in puku un tu ululam. ² Mot in warut etetalai mot una numot a kum mamaut. Ra mot pami lenri, mot pam sot pas a warkurai anun o Karisito. ³ Ra taio i nuki lena i labo, ikut ra ke labo, i ut i toro melet pasi. ⁴ Arara tagun mot in lar anun a kum pinapam ut, sur i ut in gas nami. Ikut, gong i elaro i nam tu pinapam anun taio. ⁵ Uni arara tagun mot in losi ut anun a pinapam.

⁶ Osi ra i los a etowo una wasiso anun o God, in warut anun a tene ususer nam tu wakak na utna tagun anun a kum utna.

Dat in pasong pasi ut asau ra dat sa marut tari

⁷ Gong taio i toro pasi ut, uni katutaio in toro lar pas o God. A musano in pasong pasi ut asau ra i sa marut tari. ⁸ Osi ra i muri kut a kum sakino nemnem ina pinino, in pasong pas a minat tukum. Ma osi ra i mur a Tokodos na Nion, in pasong a nilaun tukum tan a Tokodos na Nion. ⁹ Gong a pinindat i ngoro una wakak na pinapam ra dat pami, ma gong dat mana gusuni. Ra a du bung in sot, dat in pasong pas a wino tagun anundat a pinapam. ¹⁰ Ra dat in pet lar pasi, dat in pam a wakakino torom a taro rop. Dat in pam mugu i torom a kum tene nurnur, ma numur torom a taro gisen kai.

A uruop na wasiso

¹¹ Mot tama i, a tumus a kum lamlabino matano buk ri. Iau ut a tumusi nama lamang torom mot.

¹² A taro ra det ungongos pas mot sur din tok talilis mot, det pami kut uni det nem na ulabo pas det umatan a taro. Det pami lenra uni det ngara. Uni det nuki lena, ra det in warawai una nurnur unin nanai kutus anun o Karisito, din ukadik det. ¹³ Det ut ra di tok talilis det, ka det mur sot pas a Warkurai. Ikut, det nemi ut sur din tok talilis mot, sur din warango pas det un asau ra det pami un mot.

¹⁴ Iau ut kan warango pas iau. An warango pasi kut anundat a Labino o Iesu Karisito ra i mat unin nanai kutus.

Uni unin nanai kutus, a petutna anun a rakrakon bual i mat gusun iau, ma iau kai, a sa mat gusun a kum petutna anun a rakrakon bual. ¹⁵ Ra di tok talilis a pinin taio, o ka di tok talilisi, i a utna oros kut umatan o God. Ara utna kut ra i labo sakit, dat a matok na ukukis anun o God. ¹⁶ A malmal ma a marmaris torom a taro rop ra det mur anung a etowo ri, det a taro Israel mulus anun o God.

¹⁷ Turpasi uniri, gong taio in utikidis iau, uni a kum burlain una pining det ukinalongi lena iau anun o Iesu.

¹⁸ A kum tistising, a marmaris anun anundat a Labino o Iesu Karisito in kis una niomot. Amen.

A Pas anun o Pol torom a taro Epeses

A wasiso talapor mugu

Ra o Pol i kis una karabus tong o Rom, i tumus a wat na pas: Ara torom a taro Epeses, ara torom a taro Pilipai, ara torom a taro Kolosi ma ara kai torom o Pilimon.

I tumus a pas ri torom a taro na lotu tong o Epeses, sur det in luki, ma numur det in pitari torom a taro gisen kai.

O Epeses i ara labino tamon na papor Asia. A taro tagun a tamon ra, det nem doko a mani, ma det ser lotu torom a torotoro na god a ino, di watungi o Artemis. Det pam ara labino rumu na lotu anun o Artemis (tama Ap 19:17).

Una manru na inawan anun o Pol, i warawai torom a taro Juda, ra det kis tong o Epeses (tama Ap 18:18-21). Ra numur una nun a mantul na inawan, i millet melet utong o Epeses, ra i kis tiro iai a tulu kilalo, ra i ususer a taro, ra det sa nukpukus pas, ma det nurnur un o Iesu (tama Ap 19). A ramano taro na nurnur, det a kum te Juda, ma a ramano taro awu. O Pol i ususer det lena, un o Iesu Karisito dat takai kut, a taro Juda ma a taro gisen kai. I ususer det nama tulu wasiso elelar ri:

Dat elar nama pinin o Karisito, ma i in lorindat.

Dat elar nama rumu anun o God, ma o Iesu i a wakak na wat, ra i udekdek a rumu.

Dat elar nama ino ra di waninari sur in nolin.

A inawan ina Buk Epeses:

A turturkibin ina buk ri (1:1-2)

Dat ra tagun o Karisito, dat in takai kut (1:3-3:21)

A tuntunur tomo anun a taro na lotu (4:1-16)

A matok na nilaun un o Karisito (4:17-5:20)

Dat in unatino pas dat torom dat etetalai (5:21-6:10)

A kum ememar na inaim anun a te Karisito (6:11-20)

A ururop na wasiso anun o Pol torom a taro Epeses (6:21-24)

¹ Iau o Pol, a aposel anun o Karisito Iesu una nemnem anun o God. A tumus a pas ri torom mot a taro anun o God ra mot kis tiro o Epeses, mot a kum lingmulus na tene nurnur un o Karisito Iesu.

² A marmaris ma a malmal tan o God a Tamandat ma a Labino o Iesu Karisito in kis tomo nam mot.

Un o Karisito, o God i udan dat nama kum utna na nion

³ Dat in watung ulabo pas o God, a Taman anundat a Labino o Iesu Karisito. I udan dat nama kum utna na nion rop tagisapat una langit, ra dat tagun o Karisito.

⁴ Numugu utmakai ra o God ke ukisi utmakai a rakrakon bual, i sa pilok tar dat, sur dat anun a taro, ma katu etakun in los dat umatano, uni dat kis un o Karisito.

⁵ Una nun a marmaris, numugu utmakai i sa tasmani lena in ras pas dat sur dat a kum nutnutunu, una pinapam anun o Iesu Karisito ra i ulaun dat. Una nun a nemnem ut ma una nun a gasgas i pami lenri. ⁶ Ra dat in watung ulabo pas o God una nun a wakak na marmaris ra i tabor oros tar dat nami, una Nutunu ra i maris doko i. ⁷ O Karisito i mat, ra a gapino i kul langolango pas dat, ma o God i unus ru anundat a kum sakino petutna. A marmaris ra, anun o God i labo sakit, ⁸ ma i ser tabor liklik dat nami, tomo nama mananos rop ma a wakak na nuknuk.

⁹ O God i ese dat una kum utna ra numugu i kis eno, ma in pami un o Karisito. Una kum utna ra, i muri ut anun a nemnem, ma i gas nami. ¹⁰ Anun a nemnem i lenri: In dat tomo a kum utna rop sapat netes una langit ma nin upiso, sur det rop det in kis ututudu ina warkurai anun o Karisito. Ra a bung in sot in pam sot pasi ut.

¹¹ A kum utna rop ra o God i ser pami, i pami elar ut nam anun a nemnem ma a nuknukino. Numugu utmakai i pilok pas met a taro Juda, sur met tagun o Karisito, elar ut nam anun a nemnem. ¹² I pilok pas met, a mugano taro ra met nurnur un o Karisito, sur met in watung ulabo pas o God kibino una nun a minamar. ¹³ Ma mot kai tagun o Karisito, uni mot longoro a lingmulus na wasiso ri, a Wakak na Wasiso lena o God in ulaun pas mot. Ra mot nurnur un o Karisito, o God i ubek tar anun a ukinalong un mot, a Tokodos na Nion, ra i sa uliliman mugu taru uni. ¹⁴ A Tokodos na Nion i a mugano etabor, sur in ulingmulus anun a liliman lena, numur una bung ra o God in ulangolango pas anun a taro, dat in rakan a kum utna ra o God i sa uliliman taru uni. I mo ra, dat in watung ulabo pas o God kibino una nun a minamar!

O Pol i wararing sur a taro na lotu

15-16 I mo ra, a ser wararing sur mot. Ra a longoro i lena mot sa nurnur una Labino o Iesu, ma mot nem a taro rop anun o God, ka mana nama watung wakak torom o God un mot. Ma una nung a kum niaring a ser nuk pas mot. 17 A ser wararing lena a God anun anundat a Labino o Iesu Karisito, a Tamandat ra i bukus nama minamar, in tabor mot nama mananos tan a Tokodos na Nion, ma in papos a nuknuki mot, sur mot in tasman wakak o God. 18 A wararing lena in utalapor a matan a kum niomot, sur mot in tasman a utna ra dat kis langlang nama nurnur suri, ra o God i kabo pas dat sur dat in rakon pasi. A utna ra dat a taro anun o God, dat in rakon pasi, i labo sakit ma i bukus nama minamar. 19 Ma mot in tasmani lena a dekdekin o God ra i warut dat, a kum tene nurnur, i labo sakit. Ka din pet lar pasi sur din elaro i nam tu utna. A dekdekinu ra, i elar nama dekdek ra o God i papam nami ra 20 i ukatutur pas o Karisito gusun a minat, ma i ukis tari una papor sot na lamano sapat netes una langit. 21 Ra o Karisito i labo taun a kum ngas na nion rop lenri, a kum nion ra det mugumugu, ma a kum nion ra det utur ukai a warkurai, ma a kum nion ra det utur ukai a dekdek, ma a kum nion ra det kiskis na labino. A risan o Karisito i labo sakit taun a kum rising una nilaun ri, ma una nilaun numur kai. 22 O God i ubek tar a kum utna rop utuntudu ina dekdekin o Karisito, ma o God i ukis tar o Karisito sur in lorin a kum utna rop, sur a wakakino anun a taro na lotu. 23 Ma a taro na lotu det a pinin o Karisito. Ma o Karisito i bukus un det, ma i ubukus a kum utna rop kai una wur ngas na kisapi rop.

2

Numugu a niondat i mat, ra uniri o God i sa ulaun pas dat un o Karisito

1 Numugu a niomot i mat, uni mot lakai a warkurai ma mot pam a kum sakino petutna. 2 Mot mur a kum petutna tagun a rakrakon bual, ma mot mur o Satan, a mugumugu anun a matanitu tagun a maino, ra uniri a niono i papam un det ra det pitarngat. 3 Numugu, dat kai dat laun elar nama taro na pitarngat. Dat kai dat ugasgasi kut a pinindat, ma dat mur a kum nemnem ina pinindat ma a nuknukin dat. Di usus pas dat kai a kum tene sakino ut, ma a kankan anun o God i kis un dat, elar nami ra i kis un det a taro na pitarngat.

4 Ikut, o God i bukus nama marmaris! I ulaun pas dat uni i maris doko dat. 5 Ra dat mat una nundat a kum sakino petutna, i ulaun pas dat tomo nam o Karisito. O God i sa ulaun pas mot, kibino kut una nun a marmaris. 6 O God i ukatutur tomo dat nam o Karisito gusun a minat, ma i ukis dat tomo nami una nun a kinkinis na king sapat netes una langit, uni dat tagun o Karisito Iesu. 7 O God i pami lenra, sur in ese anun a marmaris torom dat un o Karisito Iesu, sur anun a labino marmaris sakit in nanpat talapor torom a kum taun taro numur. 8 O God i maris mot ra i ulaun pas mot ra mot nurnur. Awu sur mot ut mot kibino uni, a etabor kut anun o God torom mot. 9 Awu sur i ulaun pas mot kibino una kum wakak na pinapam ra mot pami, sako taio in warango pasi ut nami. 10 Dat a sap na laman o God. Dat tagun o Karisito Iesu, ma o God i ukis dat sur dat in pam a kum wakak na pinapam, ra o God i sa waninar tari sur dat in pami.

A taro Juda ma det ra awu sur a taro Juda, det takai mukut

11 Mot in nuk pasi, di usus mot awu sur mot a taro Juda. Ma a taro Juda det ser tok talilis a pinindet, elar nama ukinalong lena det anun o God. A petutna ra det pami nama lamandet. Ma numugu det watung mot lena awu sur mot anun o God, uni ka di tok talilis mot. 12 Mot in nuk pasi lena, numugu ra mot kis gisen utmakai gusun o Karisito, mot awu sur a taro Israel, ma a kum kunubus ra o God i uliliman taru nami, awu sur anumot. Ma una numot a nilaun nin una rakrakon bual ka mot tasman o God, ma katu wakak na utna ra mot in kis langlang suri nama nurnur. 13 Numugu mot kis bakkak gusun o God, ikut uniri, ra mot tagun o Karisito Iesu, a gapino i sa ben milau pas mot torom o God.

14 Uniri dat kis na malmal, kibino kut un o Karisito. I sa dat tomo pas met a taro Juda ma mot ra awu sur a taro Juda, sur dat in takai mukut. Numugu ka dat emarom, i elar namin noworo ra i kutus dat, ikut o Karisito i sa rege ru i. 15 Ra i mat, i urop ru a kum Warkurai anun a taro Juda, sur in dat tomo aru kabotaro, sur ara matok na kabotaro mukut, sur dat rop dat in kis na malmal. 16 Ra o Karisito i mat unin nanai kutus, i dat tomo dat sur dat ara kut, ma i umarom tomo dat rop nam o God, ma i rakon ru a kinkinis na ebar. 17 I wanpat ma i warawai una malmal torom mot ra

mot kis bakkak gusun o God, ma torom met kai a taro Juda ra met kis milau. ¹⁸ O Karisito i papos a kisapi anundat rop torom a Tamandat, un ara Tokodos na Nion kut.

¹⁹ I mo ra, mot awu melet mo sur a kum usiro, awu. Uniri mot takai mukut nama taro anun o God, ma mot a kabotaro mulus anun o God. ²⁰ Mot a rumu anun o God, ra di uturi netes una kum aposel ma a kum poropet. Det a kibin a rumu, ma o Karisito Iesu i a wakak na wat, ra i udekdek a rumu. ²¹ Una wat ri, a kudulano rumu i tugus tomo, ma i wanpat a rumu na etabor ra katu dur uni, a rumu anun a Labino. ²² Ma mot kai ra tagun o Karisito, o God i dat tomo mot, sur mot in nanpat a rumu ra a Niono i kis uni.

3

A pinapam anun o Pol torom det ra awu sur a taro Juda

¹ I mo ra iau o Pol, a wararing sur mot. Iau a karabus anun o Karisito Iesu, uni a papam torom mot ra awu sur a taro Juda.

² A nuki lena, mot sa longoro tari lena, o God i sa pitar tar a pinapam ri tang una nun a labino marmaris, sur an warut mot. ³ Ma o God i utalapor iau una utna ra numugu i kis eno. Ma una pas ri a sa tumtumus lilik pas uni. ⁴ Ra mot in luki, mot in tasman asau ra a sa talapor uni, una utna un o Karisito, ra numugu i kis eno. ⁵ A kum taun taro tagun numugu, kataio i inanos talapor det uni, ikut uniri a Tokodos na Nion i upuaso i torom a kum tasur na aposel anun o God, ma a kum tasur na poropet anun o God. ⁶ Iri a utna ra numugu i kis eno: Det ra awu sur a taro Juda, ra det in mur a Wakak na Wasiso, det in rarakon tomo nama taro Juda, una kum utna ra o God i udan a kum nutnutunu nami. Ma det rop, ara musano mukut. Ma det ra tagun o Karisito Iesu, a kum liliman anun o God anundet utkai.

⁷ A wanpat a tultul anun a Wakak na Wasiso ri. Una nun a marmaris ma a dekdekino, o God i pitar tar a pinapam ri tang. ⁸ Ma iau, a natino sakit tandet rop a taro anun o God. Ikut i maris iau, ra i pitar tar a pinapam ri tang, sur an warawai torom det ra awu sur a taro Juda una kum utna anun o Karisito ra i labo sakit, ma ken elar sur taio in tasman rop pasi. ⁹ O God, i ra i ukis a kum utna rop, i pitar tar a pinapam tang, sur an utalapor a taro rop una nuknukino ra numugu i kis eno. ¹⁰ Ikut uniri, i pami lenri torom a taro na lotu, sur in upuaso anun a labino mananos torom a kum nion, det ra det mugumugu

ma det ra det utur ukai a warkurai una langit. ¹¹ Tagun narap utmakai o God i tasmani una nuknukino lena in pami lenra. Ra uniri, i sa pam sot pasi un o Karisito Iesu anundat a Labino. ¹² Dat langolango sur dat in nan torom o God ma ka dat in ngara, uni dat tagun o Karisito ma dat nurnur uni. ¹³ I mo ra, a saring mot sur gong mot tusako ra mot longoro a kum mamaut ra a barato i sur an warut mot. A taramo a mamaut sur anumot a kinkinis na minamar.

A marmaris anun o Karisito

¹⁴ I mo ra, a kis butkeke umatan a Tamandat nama niaring, ¹⁵ i ra a Taman a kum kabo taro sapat netes una langit ma nin upiso kai, ma i pitar tar a nilaun torom det rop. ¹⁶ Ma o God anun a ululeng i bukus nama minamar. Ra a wararing sur in tabor mot nama Niono, sur in udekdek a niomot, ¹⁷ sur o Karisito in kis una balamot, ra mot nurnur uni. Ra a wararing sur anumot a marmaris in tur dekdek elar namin nanai ra a wakakorino i rarau. ¹⁸ Ra a wararing sur mot tomo nama taro rop anun o God, mot in dekdek sur mot in tasman mulus a marmaris anun o Karisito, ra i perere pepetlai, i walos pepetlai, i tur toto pepetlai, ma i dordorong pepetlai. ¹⁹ A wararing sur mot in tasman a marmaris anun o Karisito, ra i labo taun a mananos anun a taro, sur mot in bukus nama kudulano nilaun anun o God.

²⁰ Dat in rakon lekeleke pas o God, o naro ra i dekdek, ma i pet lari sur in pam a utna ra i labo sakit taun a kum utna rop ra dat sasaring suri, ma dat nuki. Ma i papam nama dekdekino una nundat a nilaun. ²¹ Dat tomo nama taun taro rop numur, dat in rakon lekeleke pasi, ken rop ma ken rop, una kum lamlabino utna i sa pam tari una taro na lotu, ma un o Karisito Iesu. Amen.

4

A tuntunur tomo anun a taro na lotu

¹ A kis una karabus uni a papam torom a Labino. Anung a dekdek na sasaring torom mot i lenri: Mot in laun elar nama nilaun ra o God i sa kabo pas mot suri. ² Mot in unatino pas mot, ma mot in kis na malmal. Mot in ese a wowowon na magiramot, ma mot in maris etetalai mot, ma gong mot balano sungun ra a ramano taro tagun mot det raro un lako kum utna. ³ Mot in dekdek sur mot in takai kut una kinkinis ra a Tokodos na Nion i sa pitar tari tamot, uni i kubus tomo mot nama

malmal. ⁴ Dat ara pinin o Karisito, ma ara Tokodos na Nion kut i kis un dat rop. Ma o God i kabo pas dat sur dat in takai kut una kinkinis langlang nama nurnur sur a kum wakak na utna ra in udan dat nami. ⁵ Ara Labino kut, ma a takano nurnur kut, ma ara baptais kut. ⁶ Ma ara God kut, i a Tamandat rop. I labo sakit taun dat rop, i papam una nundat a nilaun rop, ma i kis un dat rop.

⁷ O Karisito i tabor dat taktakai nama rara etabor, elar ut nam anun a nemnem.

⁸ I mo ra a Buk Tabu i watungi uni lenri,

“Ra i wan tito usapat netes,

i ben a susut na karabus,

ma i tabor a taro nama kum etabor.” Sng 68:18

⁹ Ra di tumusi lenri, “i wan tito”, a kuku-raino lena, numugu i sa wan pirso pas urin upiso. ¹⁰ O naro ra i wan pirso, i ut ra i wan tito usapat sakit gusun a bakut, sur in ubukus a kum utna rop sapat netes ma nin upiso. ¹¹ I ut ra i tabor anun a taro nama kum aposel, a kum poropet, a kum tene wasiso talapor nama Wakak na Wasiso, ma a kum pasta, ma a kum tene ususer, ¹² sur det in waninar a taro anun o God, sur det ra, det in papam toromi, sur dat a pinin o Karisito dat in lubang. ¹³ Det in pami lenra tuk ra dat in takai kut una nurnur, ma dat rop dat in tasman wakak a Nutun o God, ma dat in nanpat a kum dekdek na tene nurnur. Dat in lubang tuk dat in bukus nama kudulano nilaun anun o Karisito.

¹⁴ I mo ra ka dat in elar melet mo nama kum nat liklik, ra anundet a nurnur i elar nama utna ra a top i woro tuptupukusi utong ma urin. Ka dat in mur a kum etowo tan a kum tene torotoro, elar nama utna ra a wuwu i wup pukpukusi. Ka dat in mur det ra det nem na ben raro a taro nam anundet a kum namnamin na wasiso. ¹⁵ Ikut, dat in watung a lingmulus na wasiso tomo nama marmaris. Ra dat in pami lenra, dat in lubang una kum utna rop sur dat in elar nam o Karisito, i ra in lorindat. ¹⁶ Un o Karisito, a kudulano pinino i tugus tomo wakak. Ra arara du pinino in pami ut anun a pinapam, a kudulano pinino in lubang ma in dekdek, ma in bukus nama marmaris.

A matok na nilaun un o Karisito

¹⁷ Una risan a Labino, a inanos mot ma a utumarong mot lena, gong melet mo mot laun elar nama kum taro ra ka det nurnur. A nuknukin det ke topas tu utna.

¹⁸ Anundet a mananos i dumirum ma det bakbak gusun a nilaun anun o God, uni ka det tasman a lingmulusino, uni a balandet i watat. ¹⁹ Katu maimai indet mo una kum sakino ra det ser pami, ma det pitar tar det mukut sur a kum sakino nemnem, nama kum ngas na dur na petutna, ma anundet a nemnem sur det in pam a sakino ken mana.

²⁰ Ikut mot, ra di ususer tar mot un o Karisito, awu sur di ususer mot una kum petutna lenri. ²¹ A tasmani lena di sa ususer tar mot un o Iesu ma mot sa longoro tari, ma mot tasman a lingmulusino ra i kis uni. ²² Di ususer mot sur mot in nan gusun a ngas na nilaun ra mot muri numugu. Mot in palos ru i elar namin turai na malu, uni i laulau ma i toro dat sur dat in mur a kum sakino nemnem. ²³ Mot in pami lenra, sur o God in umatok a nuknuki mot. ²⁴ Ma mot in emar nama matok na nilaun ra o God i ukis tari elar ut nama malalarino, sur mot in mur a tokodos na petutna mulus, ma mot in nanpat a taro anun o God.

²⁵ I mo ra mot in woro ru a torotoro, ma mot in watung a lingmulusino torom a kum paspasa mot, uni dat rop dat a kum du pinin o Karisito. ²⁶ Ra mot kankan, gong mot pam a sakino. Ma gong in matanas i sup ra anumot a kankan kura utmakai, ²⁷ ma gong mot pitar tar tu kolo tan o Satan. ²⁸ Osi ra i ser wolong, gong melet mo i wolong. I wakak sur in pam a wakak na pinapam nam aru lamano, sur in pam pat a utna sur in tabor a sibo na taro nami.

²⁹ Ma gong tu laulau na wasiso i pirso gusun a wamot. Mot in watungi kut a wasiso ra i wakak sur in udekdek a taro ma in warut det una utna ra det sibo suri, sur anumot a wasiso in pam a wakakino torom det ra det longoro mot. ³⁰ Ma gong mot utupunuk a Tokodos na Nion o God, ra o God i sa ukinalong tar mot nami lena mot anunu. Ma a ukinalong ra, i ese i lena a bung in nanpat ra o God in ulangolango mot. ³¹ Mot in lakro ru a nuknuk laulau, a kankan, a wasiso na engaras, a ugaia na kankan, a emang, ma a kum sakino petutna rop kai. ³² Ikut, mot in pam a wakakino ma mot in nem etetalai mot. Ma ra taio tagun mot i pam a sakino torom mot, mot in dumano ru i, elar nami ra o God i pami un mot un o Karisito.

5

A nilaun una talapor

4:6: 1 Kor 12:6 **4:7:** Rom 12:3, 6 **4:9:** Jn 3:13
2:19 **4:17:** 1 Pit 1:14; Rom 1:21 **4:22:** Rom 8:13; Kol 3:9 **4:23:** Rom 12:2 **4:24:** Stat 1:26; Kol 3:10
4:25: Kol 3:8-9; Sek 8:16 **4:26:** Sng 4:4; Jem 1:19-20
4:31: Kol 3:8 **4:32:** Mt 6:14; 18:22-35; Kol 3:12-13 **4:11:** 1 Kor 12:28 **4:13:** Kol 1:28 **4:15:** Kol 1:18;
4:29: Kol 4:6 **4:30:** Ais 63:10; 1 Tes 5:19; Ep 1:13-14
5:1: Mt 5:48 **5:2:** Ibr 10:10; Kis 29:18

¹ Mot in laun elar nama nilaun anun o God, uni mot a kum nutnutun o God, ma i maris doko mot. ² Mot in laun nama marmaris, elar nam o Karisito i maris dat, ra i pitar tar anun a nilaun sur dat, elar nama etabor ra i sangnain wakak torom o God.

³ Gong tu pamuk na petutna i kis epotor tamot, gong tu dur na petutna, ma gong kai mot nemnem sur a susut na ululeng. Uni a kum petutna ri ke tokodos sur a tokodos na taro anun o God det in pami. ⁴ Gong mot watung tu laulau na wasiso, o tu longlong na wasiso, ma gong mot urongon laulau nama kum sakino urongon. A kum wasiso ri ke wakak sur mot in watungi, ikut mot in watung wakak torom o God. ⁵ Mot in tasman a utna ri: Det ra det pam a pamuk na petutna, o a kum dur na petutna, o det nem doko a susut na ululeng, ka det in rakon a matanitu anun o Karisito ma anun o God. Uni det ra det nem doko a susut na ululeng, det a kum tene lotu torom a kum torotoro na god, uni a kum ululeng anundet a god. ⁶ Gong mot madek tar taio sur in toro pas mot nam tu wasiso oros kut. Uni a kum petutna ra, in dat pas a kankan anun o God torom det ra det pitarngat. ⁷ Lenra, gong mot tur tomo nam det una nundet a kum sakino petutna.

⁸ Numugu mot kis una dumirum, ikut uniri, mot kis una talapor uni mot tagun a Labino. Mot in laun elar nama kum nutnutun a talapor. ⁹ Uni a nilaun anun o naro ra i kis una talapor i wu a wino lenri: a kum wakak na petutna, a kum tokodos na petutna, ma a lingmulusino. ¹⁰ Mot in sisio sur a petutna ra a Labino i gas nami, sur mot in pami. ¹¹ Gong mot pam a kum petutna ra a taro tagun a dumirum det ser pami, ra kalako windet. Ikut, mot in upuaso i lena anundet a kum petutna ke wakak. ¹² Uni a utna na maimai sakit, ra dat in wasiso una kum petutna ra a kum tene pitarngat det ser pam eno i. ¹³ Ikut a talapor i upuaso a kum petutna rop sur in nanpat puaso. ¹⁴ Uni a talapor in utalapor a kum utna, ra din tama lele det. I mo ra di watungi lenri,

“Ui a tene ininep, un tuangun,
ma un katutur melet gusun a minat,
ma o Karisito in utalapor ui.”

¹⁵ Mot in tamtamabat wakak anumot a ngas na nilaun ra mot laun nami, ma gong mot laun elar nama kum longlong, mot in laun elar nama taro na mananos. ¹⁶ Una kum du bung rop, ra i langolango sur mot

in pam a wakakino, mot in pami, uni a kum bung ri, a kum laulau na bung. ¹⁷ Lenra, gong mot laun elar nama kum longlong, mot in tasman a nemnem anun a Labino.

¹⁸ Gong mot sipak nama wain, uni in ban laulau anumot a nilaun. Ikut, mot in bukus nama Tokodos na Nion. ¹⁹ Ma mot in wasiso etetalai nama kum kekeleke tagun a Kum Kekeleke anun o Dewid, a kum kekeleke na lotu, ma a kum kekeleke ra a Tokodos na Nion i tabor mot nami. Mot in kekeleke ma mot in rakon lekeleke a Labino nama balamot. ²⁰ Ma una kum bung rop, mot in watung wakak una kum utna rop torom o God a Tamandat, nama risan anundat a Labino o Iesu Karisito.

*A etowo una kinkinis na nolin
(Kol 3:18-19)*

²¹ Mot in unatino pas mot torom mot etetalai, uni mot urur torom o Karisito.

²² Mot a kum nolin na ino, i wakak sur mot in ser unatino pas mot torom anumot a kum musano elar nami ra mot ser unatino pas mot torom a Labino. ²³ Uni a musano in lorin a kinkinis na nolin, elar nam o Karisito in lorin a taro na lotu, ma det a pinino, ma i anundet a Tene Ulaun. ²⁴ A kum nolin na ino det in ser unatino pas det torom anundet a kum musano una kum utna rop, elar nama taro na lotu det ser unatino pas det torom o Karisito.

²⁵ Mot kai, a kum nolin na musano, mot in ser nem anumot a kum ino, elar nam o Karisito i maris a taro na lotu, ra i pitar tar anun a nilaun sur det, ²⁶ sur det anun a taro mulus. Ma i rus talapor det nama danim ma anun a wasiso. ²⁷ I pami lenri sur in ben pas anun a taro toromi, elar nam anun a wakak na ino ra katu dur uni, ma kalako karkar uni, ma katu sakino utna uni. In tokodos ma katu etakun in losi. ²⁸ Lenkutkai ra, a kum musano det in nem anundet a kum ino elar nami ra det nem a pinindet ut. A musano ra i nem anun a ino, i nemi ut. ²⁹ Katutaio in nget a pinino ut, awu. I ser tamtamabati, ma i ser tabori, elar nami ra o Karisito i pami una nun a taro na lotu. ³⁰ Uni dat a kum du pinin o Karisito. ³¹ A Buk Tabu i watungi lena, “Iri a kibino ra a musano in nan gusun o tamano ma o nano, ma in kis tomo nam anun a ino, sur der in takai mukut.” *Stat 2:24*

³² A wasiso ri ra i kis eno, a labino kuku-raino. I wasiso un o Karisito ma a taro na lotu. ³³ Ikut, arara tagun mot in nem anun

a ino elar nami ra i nemi ut. Ma a ino, in urur torom anun a musano.

6

A etowo torom a kum nat liklik ma a kum tamtaman det

(Kol 3:20-21)

¹ A kum nat liklik, mot in ser mur a wasiso anun a kum tamtama mot ma a kum nanamot, una risan a Labino, uni i tokodos sur mot in pami lenra. ² A Buk Tabu i watungi lena, "Un ru o tamam ma o nam." *Kis 20:12*

Iri a mugano warkurai ra a liliman i kis tomo nami. ³ I watungi lena, "Ra un pami lenri, un dan, ma anum a nilaun in walos nin una rakrakon bual." *Lo 5:16*

⁴ Mot a kum tamtaman a kum nat, gong mot usungun orosi kut a balandet. Mot in tamtamabat det ma mot in ulason det, ma mot in ususer det una nilaun anun a Labino.

A etowo torom a kum tene ititula ma a kum mugumugu

(Kol 3:22-4:1)

⁵ Mot a kum tene ititula, mot in mur a wasiso anun anumot a kum mugumugu taginin una rakrakon bual, ma mot in ngara ma mot in urur torom det. Mot in pami nama lingmulus unin balamot, elar nami ra mot mur a wasiso anun o Karisito. ⁶ Gong mot muri kut anundet a wasiso ra det tama mot, sur mot in ugargas tar det kut. Mot in papam elar nami ra mot a kum tene ititula anun o Karisito, ma mot in pam a pinapam ra o God i nemi, tomo nama anumot a nilaun rop. ⁷ Mot in papam nama gasgas torom anumot a kum mugumugu, elar nami ra mot papam ut torom a Labino, ma awu sur torom a taro kut. ⁸ Uni mot sa tasmani lena a Labino in pitar a ikul torom a taro rop una kum wakak na pinapam ra det pami, det a kum tene ititula ma det kai ra awu sur a kum tene ititula.

⁹ Ma mot a kum mugumugu, mot in pami lenkutkai ra torom anumot a kum tene ititula. Gong mot ungara det, uni mot sa tasmani lena ara Labino kut kusapat una langit, anundeti ma anumot kai. Ma a wakak na magirano awu sur torom ara taro kut, torom a taro rop.

A kum ememar na inaim anun o God

¹⁰ Anung a kum ururop na wasiso i lenri: Mot in tur dekdek una labino dekdekin a Labino. ¹¹ Mot in emar rop pas nama kum ememar na inaim anun o God, sur

mot in turbat a kum usobor anun o Satan. ¹² Uni ka dat waim nama taro, dat waim nama kum mugumugu anun a kum laulau na nion, a kum nion ra det utur ukai a warkurai, a kum nion ra det utur ukai a dekdekin a dumirum nin una rakrakon bual, ma a kum laulau na nion tagun a maino.

¹³ I mo ra mot in emar nama kum ememar na inaim rop anun o God, sur mot in pet lar pasi sur mot in tur dekdek, ra a laulau na bung in nanpat. Ra mot sa waninar pas mot lenra, mot in tur dekdek.

¹⁴ Mot in tur dekdek, mot in ker ukai mot nama lingmulus, elar nama let. Ma mot in emar nama tokodos na petutna, elar nama du pino aen ra a tene inaim i ubek bat a romrobono nami. ¹⁵ Mot in waninar sur a inawan nama Wakak na Wasiso na malmal, elar nama tene inaim i pas pas aru su una aru kikino. ¹⁶ Ra mot sa emar pas lenra, mot in utur ukai a nurnur kai, elar namin palang na umubek bat, sur mot in ubek bat mot gusun a kum kunkunabor na bele anun o Satan. ¹⁷ Ma mot in nuk pasi ra o God i sa ulaun pas mot, elar nama tene inaim i ubek bat in lorino nama kukup na inaim. Ma mot in los pas in totok na inaim anun a Tokodos na Nion, i a wasiso anun o God. ¹⁸ Mot in wararing nama dekdekin a Tokodos na Nion una kum bung rop, nama kum wur ngas na niaring rop. Mot in kis na waninar, ma mot in ser wararing sur a taro rop anun o God.

¹⁹ Mot in wararing kai un iau, sur o God in pitar tar a kum wasiso tang sur an watungi, ma gong a ngara ra an upuaso a utna ra numugu i kis eno ma uniri a Wakak na Wasiso i upuaso i. ²⁰ Uni o God i sa ubek tar iau sur an tene warawai nama Wakak na Wasiso, ma a kis na karabus uni a pam a pinapam ri. Mot in wararing sur iau sur an dekdek sur an upuaso tar a Wakak na Wasiso torom a taro, ma kan ngara.

A ururop na wasiso

²¹ O Tikikus, a wakak na tisindat ma a lingmulus na tene pinapam anun a Labino, in inanos mot una kum utna rop, sur mot in tasman asau ra a pami. ²² I mo ra a tulu ru i torom mot, sur mot in tasman anumot a nilaun nin i pepetlai, ma sur in uragot mot.

²³ A malmal torom mot a kum tistising, ma a marmaris tomo nama nurnur, tan o God a Tamandat ma a Labino o Iesu Karisito. ²⁴ A marmaris torom det rop ra

det nem anundat a Labino o Iesu Karisito
nama marmaris ra ken rop.

A Pas anun o Pol torom a taro Pilipai

A wasiso talapor mugu

Ra o Pol i kis una karabus tong o Rom, i tumus a wat na pas: Ara torom a taro Epeses, ara torom a taro Pilipai, ara torom a taro Kolosi ma ara kai torom o Pilimon.

A pas ri i tumusi torom a taro tong o Pilipai, ra i watung wakak torom det una mani ra det pitar tari tano. Det pitar tari tan o Epaproditus, ra i wan nami torom o Pol.

O Pilipai i ara labino tamon tong una papor Masedonia. O Pol i wan utong una nun a manru na inawan. Ra o Pol i wan utong, ka det longoro i utmakai a Wakak na Wasiso. Det ra det nukpukus una warawai anun o Pol, det a kum mugano taro na lotu tong o Pilipai (tama Ap 16:12-40).

A taro na lotu tong o Pilipai awu sur a kum tene gongon. Ikut det gasgas sur det in etabor nama mani torom a taro na lotu sapat o Judia ra det sibo doko, ma torom o Pol kai.

O Pol i kis una karabus, ikut i gas, ma i nemi sur a taro Pilipai kai, det in gas ra det etorom a kum mamaut. O Pol i watungi torom det lena, det in tur dekdek ma det in tumarong det gusun a kum torotoro na tene ususer ra det ususer a taro lena, din tok talilis a pinindet. I watungi kai lena, det in mur a petutna anun o Iesu ra i unatino pasi.

Una buk ri, dat tama i lena, o Pol i nem doko a taro na lotu tong o Pilipai.

A inawan ina Buk Pilipai:

A turturkibin ina buk ri (1:1-11)

O Pol i inanos det una nun a kinkinis una karabus (1:12-26)

A petutna ra a kum tene nurnur det in muri (1:27-2:18)

O Pol i nem na tulu o Timoti ma o Epaproditus (2:19-30)

Det in tur dekdek (3:1-4:9)

O Pol i gas nama nundet a etabor (4:10-20)

A ururop na wasiso anun o Pol torom det (4:21-23)

¹ Iau o Pol, mir nam o Timoti, aru tul-tul anun o Karisito Iesu, mir tumtumus torom mot, a taro rop anun o God, tiro una tamon Pilipai. Torom mot ra mot laun un o Karisito Iesu, ma mot kai a kum mugumugu na lotu ma a kum tene warut. ² A marmaris ma a malmal tan o God a Tamandat ma a Labino o Iesu Karisito in kis tomo nam mot.

A niaring anun o Pol sur a taro Pilipai

³ A watung wakak torom anung a God una kum du bung rop ra a nuk pas mot.

⁴ Ma una nung a kum niaring rop sur mot rop, a ser wararing nama gasgas, ⁵ uni mot tur tomo nam iau una Wakak na Wasiso, turpasi ut una mugano bung ra mot longoro i tuk uniri. ⁶ A tasman mulusi lena, o God ra i turpasi a wakak na pinapam un mot, in pam nanani, tuk ra in uropi, una bung ra o Karisito Iesu in nan pirso melet.

⁷ I tokodos sur an nuknuk lenri un mot rop, uni mot kis mulus una nuknuking. Dat rop dat tur tomo una pinapam ra o God i pitar tari tang una nun a marmaris. Dat tur tomo ra a kis una karabus, ra a wasiso balu det ra det watung laulau a Wakak na Wasiso, ra a upuaso i torom a taro. ⁸ O God i tasmani lena, a nem doko i sur an tama mot rop, uni a nem doko mot nama marmaris anun o Karisito Iesu.

⁹ A wararing sur anumot a marmaris in labo ma in labo bing, ma a mananos ma a tastasman in lubung una numot a nilaun.

¹⁰ Ra in lenra, mot in pet lari sur mot in tasman lele asau ra i wakak o ke wakak, sur a magiramot in tokodos umatan o God, ma katu etakun in los mot una bung ra o Karisito in nanpat. ¹¹ Ma a wararing sur mot in bukus nama tokodosino, ra o Iesu Karisito in pam pati una numot a nilaun, sur a taro det in watung ulabo pas o God, ma det in rakon lekeleke pasi.

A kinkinis anun o Pol una karabus i ulubung a Wakak na Wasiso

¹² A kum tistising, a nemi sur mot in tasmani lena, a kum mamaut ra a taramo i, i ulubung a Wakak na Wasiso sur in nan sarara. ¹³ Uni i talapor torom a kum tene inaim rop ra det tamtamabat a rumu anun a king, ma torom a taro rop kai lena, a kis una karabus uni iau anun o Karisito. ¹⁴ Anung a kinkinis na karabus i sa uragot a susut na taro ra met nisnisino una Labino, ma ka det ngara sur det in wasiso puaso nama wasiso anun o God nama dekdek.

¹⁵ A lingmulus, ara taro det warawai un o Karisito uni det nuknuk laulau un iau. Ma ara taro kai, det warawai uni det nem na turbat iau gusun anung a kinkinis na mugumugu. Ikut, ara taro det warawai nama wakak na nuknukin det. ¹⁶ Det warawai uni a marmaris i kis un det. Det tasmani lena, a kis una karabus sur an wasiso balu a taro ra det watung laulau a Wakak na Wasiso. ¹⁷ Ikut ara taro det warawai un o Karisito uni det nem na ulabo pas det ut, ma ke lingmulus a nuknukin det. Det nem na wot

meleti kut anung a kum mamaut, ra a kis una karabus. ¹⁸ Ikut katu utna ra det warawai nama sakino nuknuk, o a wakak na nuknuk. Det rop ri det warawai kut un o Karisito. Iri a kibino ra a gas.

A lingmulus, an gas bolbolos, ¹⁹ uni a tasmani lena, una numot a kum niaring, ma a warut anun a Nion o Iesu Karisito, asau ra i wanpat un iau din pukusi sur an langolango. ²⁰ A nurnur lena, kan pam tu utna ra an maimai uni. An tur dekdek ma kan ngara, sur an ulabo pas o Karisito una nung a kum petutna rop elar nami ra numugu a ser pami. Sako an laun o an mat, an ulabo pasi ut. ²¹ Uni a nuknuking i lenri: Ra a laun, a laun sur o Karisito. Ra an mat, an rakon pas a labino utna sakit. ²² Ra a laun, anung a pinapam in wu a wakak na wino. Ka tasmani osi na pasander mo ra an pilok pasi, a nilaun, o a minat. ²³ Aru nuknuking. Ara, a nem doko i, sur an nan ma an kis tomo nam o Karisito, i ra i wakak sakit tan ara pasander. ²⁴ Ikut i wakak sakit sur an laun, ra an warut mot. ²⁵ A tasman mulusi lena, an laun ma an kis tomo nam mot, sur mot in lubang, ma mot in gas una nurnur. ²⁶ Ra dat in tamtama tomo melet, anumot a gasgas un o Karisito Iesu in bukus ma in tiltilingis, kibino un iau.

²⁷ Asau ra in nanpat, anumot a nilaun in mur sot pas a Wakak na Wasiso anun o Karisito. Ra an nan sur an tama mot, o ra an kis bakkak ma an longoro i kut a wasiso un mot, an tasmani lena, mot tur dekdek un ara nuknuk sot kut, ra mot papam tomo nam ara nuknuki mot kut sur a taro det in nurnur una Wakak na Wasiso, ²⁸ ma ka mot in ngaran a kum ebar. Iri a ukinalong torom anumot a kum ebar ra det in iru, ikut torom mot, o God in ulaun mot. O God ut in pam a kum utna ra. ²⁹ Uni o God i udan mot. Awu sur i udan mot nama numot a nurnur kut un o Karisito, awu, i udan mot nama mamaut kai, ra mot taramo i uni mot tagun o Karisito. ³⁰ Mot taramo a mamaut uni mot sa tur tomo nam iau una inaim. A inaim ra numugu mot tama i ra a pami, ma uniri mot longoro i ra a ser pami utmakai.

2

Dat in unatino dat elar nam o Karisito

¹ A nilaun anumot un o Karisito i uragot mot, anun a marmaris i umanatang a nuknuki mot, mot laun tomo nama Tokodos na Nion, mot nem etetalai mot, ma mot pam a wakakino torom mot etetalai. ² Ra a nemi sur in takai kut a nuknuki mot, mot in

nem etetalai mot, ma mot in tur tomo una numot a kum pinapam, ma in takai kut a balamot. Ra mot in pami lenra, in ubukus anung a gasgas. ³ Gong mot pam tu utna sur in warut mot ut, ikut ken warut ara taro kai. Gong mot pam tu utna sur mot in ulabo pas mot nami. Mot in unatino pas mot ma mot in nuk ulabo pas ara taro gisen. ⁴ Gong mot nuknuk kut sur asau ra in uwakak mot. Mot taktakai mot in nuknuk kai sur a utna ra in uwakak a taro gisen.

⁵ A nuknuki mot in elar nama nuknukin o Karisito Iesu.

⁶ I elar mulus nam o God,

ikut ke nuki sur in pam sikot anun a labino kinkinis ra i elar nam o God, awu.

⁷ I wan gusun anun a labino kinkinis ra, i rakon pas a magiran ara tultul, di ususi, i wanpat a mulusino.

⁸ Ma a taro det tama i lena, i a musano mulus.

I unatino pasi, ma i mur a wasiso anun o God ra i pitar tari ut, sur in mat, a lingmulus, i mat unin nanai kutus.

⁹ I mo ra o God i ulabo pas o Karisito una kinkinis ra i labo sakit,

ma i pitar tar a rising tano ra i labo taun a kum rising rop,

¹⁰ sur a kum ukukis rop sapat netes una langit ma una rakrakon bual ma utuntudu ina rakrakon bual, det in kis butkeke una risan o Iesu,

¹¹ ma det rop det in watung puaso i lena, o Iesu Karisito i a Labino, sur det in ulabo pas o God a Tamandat.

Dat in talapor elar nama kum nangnang

¹² A kum wakak na paspasang, mot ser mur anung a wasiso una kum bung ra a kis tomo nam mot. I mo ra uniri, ra ka kis tomo nam mot, i wakak sur mot in muri ma mot in dekdek uni, sur mot in ser ese i una numot a nilaun lena, o God i sa ulaun pas mot. Mot in dekdek ma mot in neder ma mot in ngara sur mot in ese i lena o God i sa ulaun pas mot. ¹³ Uni o God ut i papam un mot sur mot in nem asau ra i elar nama nun a nemnem, ma i pitar a dekdek torom mot sur mot in pami lenra.

¹⁴ A utna rop ra mot pami gong mot ururai, ma gong mot wasiso na engaras uni, ¹⁵⁻¹⁶ sur mot in langolango gusun a kum etakun ma mot in tokodos, a kum nutnutun o God, ma katu niraro un mot, epotor tan a taro ra ka det tokodos ma a magirandet i laulau sakit. Ra mot etabor nama wasiso

na nilaun, mot in talapor epotor tandet elar nama kum nangnang ra det talapor una rakrakon bual. Ra mot in pami lenra, an warango mot una bung anun o Karisito, uni in talapor lena, ka kalabor oros kut, ma anung a pinapam ra det talapor una. ¹⁷ Anumot a pinapam ra anumot a nurnur i pam pati, i elar nama etabor torom o God. Ra kanapi an mat, a gaping in elar nama etabor ra di lingisi netes una numot a etabor.* Ra an gas ma an gas tomo nam mot rop. ¹⁸ Lenra, mot kai mot in gas, ma mot in gas tomo nam iau.

O Pol i nem na tulu o Timoti ma o Epaproditus

¹⁹ A nurnur una Labino o Iesu, ra milau mo an tulu ru o Timoti torom mot, sur an longoro tu wasiso un mot ra an gas. ²⁰ Katutaio i elar nam o Timoti, ra i nuknuk doko un mot. ²¹ Uni, a taro rop det nuk pas det ut ma anundet a kum pinapam, ma ka det nuk pas o Iesu Karisito ma anun a pinapam. ²² Ikut mot sa tasman tar a magiran o Timoti, ra i papam tomo nam iau una warawai nama Wakak na Wasiso elar nama nat ra i papam tomo nam o tamano. ²³ Ra ut an tasman asau ra din pami un iau, a nuki lena, an tulu ru i maragom torom mot. ²⁴ Ma a nurnur una Labino lena, milau mo, iau ut an nanpat torom mot.

²⁵ A nuki lena, in wakak ra an tulu melet o Epaproditus, a tisingat torom mot. Mir papam tomo ma i ser tur warut iau una inaim sur a Wakak na Wasiso, ma i a tultul anumot ra mot tulu ru i sur in warut iau, nama kum utna ra a sibo suri. ²⁶ I nem doko i sur in tama melet mot rop, ra i tupunuk uni mot longoro i lena i misait. ²⁷ A lingmulus ut ra i misait, milau in mat. Ikut o God i marisi, ma awu sur i maris o Epaproditus kut, i maris iau utkai, sur gong a tupunuk melet. ²⁸ I mo ra a nem doko i sur an tulu ru i torom mot, sur mot in tamtama tomo melet ma mot in gas, sur kan nuknuk melet. ²⁹ Mot in gas pasi una risan a Labino nama labino gasgas, ma mot in urur torom a ngas na taro lenra, ³⁰ uni i pitar tar anun a nilaun una pinapam anun o Karisito, ra milau mo sur in mat. Ke nuk pas anun a nilaun, i pitar tari sur in warut iau, uni mot ut, ka mot pet lar pasi.

3

Dat ra dat nurnur un o Karisito dat a kum tene tokodos mulus

* **2:17:** Ra di tun a wewegua sur a etabor torom o God, a ramano kum du bung di lingis a wain netes una etabor sur din etabor kai nami. **2:18:** Pil 3:1; 4:4 **2:21:** 2 Tim 4:10 **2:25:** Pil 4:18 * **3:2:** A tinotok talilis i a ukinalong di pami sur in ese i lena a musano i ara tagun a taro anun o God ra det mur a kum Warkurai anun a taro Juda. **3:3:** Rom 2:29 **3:4:** 2 Kor 11:18 **3:5:** Lk 1:59; 2 Kor 11:22; Ap 23:6 **3:6:** Ap 8:3 **3:7:** Mt 13:44, 46 **3:8:** Rom 3:21-22 **3:10:** Rom 6:3-5; 8:17 **3:12:** 1 Tim 6:12, 19

¹ A kum tistinging, a ururop na wasiso ri, a tumusi torom mot: Mot in gas uni mot anun a Labino. A gas sur an tumus melet a kum utna ra a sa tumus tari munung torom mot, sur in warut mot.

² Mot in tumarong mot gusun a kum ngalngalia na pap, a taro ra det ser pam a sakino, ma det tok laulau a pinpinin a taro, ma det ususer det lena, ra ka di tok talilis a pinindet, ka din ulaun det.* ³ Dat ra dat lotu torom o God nama dekdekin a Niono, dat kut ra, a taro mulus anun o God, i elar nami ra di sa tok talilis tar a pinindat. Ka dat nurnur una pinapam ra a taro det pami, awu. Dat gas kut una pinapam ra o Karisito Iesu i sa pam tari un dat. ⁴ Ra gunuk a pinapam anun a taro i ulaun dat, iau ut an pet lar pasi sur an nurnur uni. A kum pinapam ra det nurnur uni, iau a wakak doko taun det. ⁵ Iau a te Israel, tagun a kabotaro Benjamin, a te Ibru ma a mur anundet a kum petutna. Ra i sa tiwal na bung bat anung a usus, di tok talilis a pining. Iau a Parisi ma a ser mur wakak a kum Warkurai anun o Moses. ⁶ A dekdek doko sur an mur kodos pas a pinapam anun o God, ma una nung a pinapam ra, a ban laulau a kum tene lotu anun o Karisito. Ra gunuk taio in tokodos uni i mur rop a kum Warkurai, katu etakun in los iau.

⁷ Ikut a kum utna rop ri, ra numugu i labo torom iau, uniri i utna oros mukut torom iau, kibino un o Karisito. ⁸ I lingmulus, a kum utna rop ri, det a kum utna oros mukut torom iau. Ara utna kut ra i labo sakit, a tasman o Karisito Iesu anung a Labino. A sa ubek ru a kum utna rop ri, kibino un o Karisito. Det elar mukut nama beren umatang, sur an los pasi mukut o Karisito una nung a nilaun, ⁹ ma an patop tomo nami. Ma awu sur iau a tene tokodos uni a mur a kum Warkurai, awu, kibino kut uni a nurnur un o Karisito. O God i watung dat a kum tene tokodos uni dat nurnur un o Karisito. ¹⁰ A nemi sur an tasman o Karisito ma a dekdekin anun a katkatatur melet gusun a minat, ra a nemi sur an tur tomo nami una nun a kum ngunungut, ma an elar ut nami una nun a minat. ¹¹ I lenkutra, a nurnur lena, iau kai an katatur melet gusun a minat.

A kinalabor sur a ikul

¹² Awu sur a nuki lena, a sa utur ukai a kum utna rop ra, ma ka tokodos mulus utmakai. Ikut a dekdek utmakai sur an

utur ukai a utna ra o Karisito Iesu i kabo pas iau suri. ¹³ A kum tistising, ka nuki lena, a sa utur ukai i. Ikut ara utna ra a pami, ka nuknuk melet sur asau ra tagun numugu, a dekdek mukut sur asau ra kuri numugu tang. ¹⁴ A kalabor usa numugu sur a ururopino sur an los pas anung a ikul. A ikul, i a kakabo anun o God torom iau sur a nilaun sapat una langit, kibino un o Karisito Iesu.

¹⁵ I wakak sur dat, ra dat tur dekdek, a nuknukin dat in lenra. Ikut ra a nuknuki mot in senene un tu utna, o God ut in utalaporu torom mot. ¹⁶ Ikut dat in mur a wakak na nilaun ra dat sa utur ukai pasi.

¹⁷ A kum tistising, mot in mur anung a kum ngas na petutna, ra a sa pam ususer tar mot nami, ra i wakak sur mot in tamtama murmur det ra det muri. ¹⁸ Uni a susut na dino a sa inanos tar mot lena, a susut, det laun elar nama kum ebar anun in nanai kutus anun o Karisito. Ra uniri a inanos melet mot, ma a lurlur na matang i puku. ¹⁹ Det wan mukut sur a iniru, a nemnem na pinindet i anundet a god. Det uman nama kum petutna ra din maimai nami. A nuknukin det i kis kut una kum utna taginin upiso. ²⁰ Ikut dat, a taro tagisapat una langit. Ra dat kis langlang nama labino nemnem sur a Tene Ulaun, ra in nan pirso tagisapat netes, a Labino o Iesu Karisito. ²¹ In pukus pas a pinindet ra ke dekdek, sur in elar nama pinino ra i bukus nama minamar. In pukusi nama dekdekino. A dekdekino ra i papam nami sur in ubek tar a kum utna rop utuntudu in anun a warkurai.

4

¹ I mo ra a kum tistising, mot in tur dekdek una Labino, lenutra a sa inanos tar mot nami. A nem doko mot, ma a nem doko i sur an tama mot, uni mot anung a gasgas ma mot elar nama ikul una nung a pinapam.

A kum wasiso ra in udekdek a taro na nurnur

² A saring mur o Ewodia ma o Sintike sur in takai kut a nuknuki mur, uni mur anun a Labino. ³ Ma ui kai ara lingmulus na tene pinapam tomo nam iau, a saring ui sur un warut aru ino ri, uni der papam dekdek tomo nam iau sur a Wakak na Wasiso in nan sarara. Met papam tomo nam o Klemen, ma ara taro kai ra a kum risandet i sa kis una buk na nilaun.

⁴ Mot in ser gas una kum bung rop, uni mot tagun a Labino. Ma an watung meleti lena, mot in gasgas. ⁵ Mot in ese puaso anumot a wowowon na petutna torom a taro rop. Milau mukut a Labino in nanpat. ⁶ Gong mot nuknuk doko sur tu utna. Una kum utna rop, mot in wararing nama niaring na watung wakak torom o God. Ma mot in inanos una numot a kum nemnem. ⁷ Ra a malmal anun o God ra i labo sakit taun a mananos rop anun a taro, in tamtamabat a balamot ma a nuknuki mot, uni mot tagun o Karisito Iesu.

⁸ A kum tistising, a ururop na wasiso ri a tumusi torom mot: A nuknuki mot in kis una kum utna ri: asau ra i lingmulus, asau ra di urur uni, asau ra i tokodos, asau ra katu dur uni, asau ra i tamama wakak ma asau ra a taro det watungi lena i wakak. Ra tu utna in wakak sakit, o ra tu utna di watung ulabo pasi, a nuknuki mot in kis uni. ⁹ Asau ra mot sa ususer pasi tagun iau, o mot sa rakon pasi, o mot sa longoro tari tagun iau, o mot sa tama tari un iau, mot in muri. Ra o God a tene malmal in kis tomo nam mot.

O Pol i gas nama etabor anun a taro na lotu tiro o Pilipai

¹⁰ A gas doko una Labino, uni uniri, mot sa nuk melet iau. I sa suano i ra ka mot warut iau, ikut, a lingmulus, ka mot dumano iau, ikut katu kisapi sur mot in warut iau. ¹¹ Ka watungi lenri, uni a sibo, awu. Uni a sa ulason pas iau, sur an gas una kum sau ra an etoromi. ¹² A sa tasman a kinkinis na sibo, ma a sa tasmani utkai a kinkinis nama susut na utna. A sa lason sur an gasgas una a kum ngas na kinkinis ra an etoromi: ra an masur, o an murak, ra a utna in susut tang, o an sibo. ¹³ A pet lar pas a kum utna rop kibino un o Karisito ra i udekdek iau.

¹⁴ Ikut i wakak ra mot tur tomo nam iau una kum mamaut ra a taramo i. ¹⁵ Mot a taro Pilipai, mot tasmani lena, ra a turpas a warawai nama Wakak na Wasiso tiro una papor Masedonia, ra numur a wan tagitiro o Masedonia, kalako taro na lotu det tur tomo nam iau sur det in warut iau nam tu etabor, awu, mot sot kut. ¹⁶ Ra a kis tong o Tesalonaika, awu sur mot tabor iau ara dino kut, a susut na dino ut mot tabor iau ra a sibo. ¹⁷ Awu sur anumot a etabor ra a ling suri. A nemi kut sur mot in los a ikul kura numur una numot a wakak na pinapam ra. ¹⁸ A sa los pas a kum utna rop ra mot tula i. I labo sakit, ma i labo taun

anung a sibo. Ka sibo mo sur tu utna, uni a kum utna ra mot tula i, a sa los pasi tan o Epaproditus. I elar nama etabor torom o God, ra i sangnain wakak, ra o God i gas nami, ma i tokodos toromi. ¹⁹A God anungi in pam sot a kum utna rop ra mot sibo suri, tagun anun a kum wakak na ululeng ra anundati, kibino un o Karisito Iesu. ²⁰Dat in ulabo pas anundat a God a Tamandat, ken rop ma ken rop. Amen.

A kum wasiso na marmaris

²¹Mot in pitar anung a marmaris torom a taro rop anun o Karisito Iesu. A kum tistising una nurnur ra det kis tomo nam iau, det pitar anundet a marmaris torom mot. ²²A taro anun o God, det rop, det pitar anundet a marmaris torom mot, ma a taro kai anun o God, ra det kis una rumu anun a Sisa, det pitar anundet a marmaris torom mot.

²³A marmaris anun a Labino o Iesu Karisito in kis una niomot. Amen.

A Pas anun o Pol torom a taro Kolosi

A wasiso talapor mugu

Ra o Pol i kis una karabus tong o Rom, i tumus a wat na pas: Ara torom a taro Epeses, ara torom a taro Pilipai, ara torom a taro Kolosi ma ara kai torom o Pilimon.

A pas ri, i tumusi torom a taro Kolosi. I pitari torom o Tikikus ma o Onesimus, ma der wan nami utong o Kolosi.

Ra o Pol i kis tong o Epeses, i tulu ru ara tene pinapam, a risano o Epapras utong o Kolosi sur in warawai torom det (tama Kol 1:7), ma torom a taro una ru tamon kai, o Laodisia ma o Ierapolis (tama Kol 4:13). O Pol ke wan utong o Kolosi, ikut i longoro i lena, det sa nukpukus ma i ser wararing sur det.

O Pol i tumus a pas ri, uni o Epapras i millet melet toromi, ma i inanosu una kum torotoro na tene ususer. O Pol ke nemi sur a kum torotoro na tene ususer det in ban laulau a nurnur anun a taro Kolosi. A kum tene torotoro ri, det watungi lena, a taro det in lotu torom a kum dekdek na nion ma torom a kum ensel, ma det watungi lena, o Iesu awu sur a Nutun o God, i elar kut nama kum ensel. Det nemi kai, sur a taro det in mur a Warkurai anun o Moses sur din tok talilis det. Una pas ri o Pol i ususer det lena, o Iesu ma o God der ara kut, anunder a minamar, anunder a nemnem, ma anunder a ngasino i elar kut. Ma un o Iesu Karisito, o God i ukis a rakrakon bual, ma o Karisito, i in lorin a taro na lotu. Un o Iesu kut dat in laun tukum.

A inawan ina Buk Kolosi:

A turturkibin ina buk ri (1:1-2)

O Pol i wararing sur a taro Kolosi (1:3-14)

O Karisito i labo sakit (1:15-23)

O Pol i papam dekdek (1:24-2:5)

Det in mur a matok na nilaun un o Karisito (2:6-3:17)

A etowo una wakak na petutna ra dat in pami torom dat etetalai (3:18-4:1)

A ururop na wasiso anun o Pol torom det (4:2-18)

¹ Iau o Pol, a aposel anun o Karisito Iesu una nemnem anun o God. Mir nam o Timoti a tisindat una nurnur, mir tumtumus ² torom mot, a taro anun o God ra mot kis tiro o Kolosi, ra mot a kum tistisi mir una numot a nurnur un o Karisito, ma mot lingmulus una numot a nurnur. A marmaris ma a malmal tan o God a Tamandat in kis tomo nam mot.

O Pol ma o Timoti der wararing sur a taro Kolosi

³ Ra mir ser wararing sur mot, mir ser watung wakak torom o God, a Taman anundat a Labino o Iesu Karisito, ⁴ uni mir sa longoro i lena, mot sa nurnur un o Karisito Iesu, ma mot nem a taro rop anun o God. ⁵ Anumot a nurnur ma a marmaris ri, i kibino una numot a kinkinis langlang tomo nama nurnur sur a utna, ra o God i tamtamabati sur mot sapat una langit. A utna ra, mot sa longoro tar a wasiso uni, una lingmulus na wasiso, i a Wakak na Wasiso, ⁶ ra i wanpat torom mot. A Wakak na Wasiso, ra i lubung, ma i wu a wino una rakrakon bual rop, elar nami ra i wu epotor tamot, turpasi una bung ra mot longoro i, ma mot tasman mulus a marmaris anun o God. ⁷ O Epapras i sa ususer tar mot uni. I a wakak na tultul, ra i papam tomo nam met, ra met nem doko i, ma i a lingmulus na tene pinapam anun o Karisito, ra i tur ukinalong met. ⁸ I sa inanos tar mir una numot a marmaris, ra a Tokodos na Nion i tabor mot nami.

⁹ Iri a kibino ra, ka mir mana nama niaring sur mot, turpasi una bung ra mir longoro a wasiso un mot. Mir ser saring o God, sur in ubukus mot nama mananos sur mot in talapor una nun a nemnem, ma in ubukus mot nama mananos ma a wakak na nuknuk rop, ra a Niono i tabor mot nami. ¹⁰ Mir wararing lenri, sur anumot a nilaun in elar nama petutna anun a Labino, ra in ser pam a kum utna ra in gas uni. Ra in lenra, anumot a nilaun in wu a wimot una kum wakak na pinapam rop ra mot in pami, ma mot in lubung una numot a tastasman un o God.

¹¹ Ra o God in udekdek mot nama dekdek rop, tagun a wakak na labino dekdekino, sur mot in kis wowowon ma mot in tur dekdek una kum maut rop ra mot taramo i. Ma mot in gas, ¹² ra mot in watung wakak torom a Tamandat, ra i warut mot sur mot in pet lari sur mot in rakon a kum utna tomo nam anun a taro. A kum utna ra i sa ulliman tari torom det, ra det kis una talapor. ¹³ I sa ulaun pas dat gusun a dekdekin a dumirum, ma i sa ben ruk pas dat una matanitu anun o Nutunu ra i nem doko i, ¹⁴ i ra i sa kul langolango pas dat, ma i sa unus ru anundat a kum sakino petutna.

A kinkinis na labino anun o Karisito

¹⁵ O Karisito a malalarin o God, i ra ka dat tama tari. O Karisito a mugano Nutun o God, ma i labo sakit taun a kum ukukis rop. ¹⁶ Uni o God i ukis tar a kum utna rop una dekdekin o Karisito: a kum utna

1:3: Ep 1:15, 16

1:7: Kol 4:12; Plm 1:23

1:9: Ep 1:16, 17

1:10: Ep 1:11, 18

1:13: Lk 22:53; Ep 2:2

1:14: Ep 1:7

1:15: 2 Kor 4:4; Jn 1:18

sapat una langit ma a kum utna nin upiso, a kum utna ra di ser tama det ma a kum utna ra ka di ser tama det, lenri, a kum nion ra det kiskis na labino, a kum nion ra det utur ukai a dekdek, a kum nion ra det mugumugu, ma a kum nion ra det utur ukai a warkurai. Un o Karisito, o God i ukis a kum utna rop, ma i ukis det sur det anun o Karisito. ¹⁷ Ra o God ke ukisi utmakai a kum utna rop, o Karisito i sa laun, ma i pam ukai a kum utna rop sur det in papam tomo wakak. ¹⁸ I ut in lorin a taro na lotu, ma det a pinino. I a turturkibin anundet a nilaun, ma a mugano ra i katuttur melet gusun a minat, sur i ut in labo sakit taun a kum utna rop. ¹⁹ Uni o God i gas sur anun a kudulano nilaun rop in bukus un o Nutunu. ²⁰ Ra una minatin o Nutunu, a kum utna rop det millet melet toromi, sur det in kis na emarom tomo nami, a kum utna nin upiso ma a kum utna sapat netes una langit. I pam a malmal nama gapin o Nutunu ra i mat unin nanai kutus.

²¹ Numugu mot kis bakbak gusun o God, ma una nuknuki mot, mot anun a kum ebar, kibino una kum sakino petutna ra mot ser pami. ²² Ikut uniri, o God i sa dat pas mot toromi, sur mot pasano melet. I pam a pinapam ri, nama pinin o Karisito ra i mat, sur in ben pas mot umatan o God, ma mot anun a taro, ra katu niraro kura un mot, ma katu etakun in los mot. ²³ Ra mot in dekdek nama nurnur, ma mot in tur dekdek uni, o God in pam a utna ri. Ma gong mot wan gisen gusun a kinkinis langlang nama nurnur sur a kum utna ra o God in pami, ra mot sa longoro tari una Wakak na Wasiso. A Wakak na Wasiso ra, di sa inanos taru nami torom a taro rop una rakrakon bual. Iau, o Pol, a wanpat a tultul tagun a Wakak na Wasiso.

O Pol i papam dekdek sur a taro na lotu

²⁴ Uniri a gas una kum mamaut ra a taramo i un mot. Una kum mamaut ra a taramo i una pining, a pam sot pas a kum mamaut anun o Karisito, sur an warut a taro na lotu, det ra a pinin o Karisito. ²⁵ O God i ubek tar iau, sur iau a tultul anun a taro na lotu. I pitar tar a pinapam ri tang, sur an warawai nam anun a kum wasiso rop torom mot. ²⁶ A wasiso ri, i a utna ra i kis eno, tagun numugu utmakai gusun a kum taun taro tagun numugu. Ikut uniri, i sa puaso torom a taro anun o God. ²⁷ O God i upuaso i lena, a taro ra awu sur a taro Juda, det kai det in tasman a utna ra numugu i kis eno, ra i wakak doko ma

in udan det. Iri a utna ra: o Karisito ut i kis una numot a nilaun, i mo ra, mot kis langlang nama nurnur sur a minamar anun o God, ra mot in rakoni.

²⁸ Met warawai un o Karisito torom a taro rop. Met utumarong det, ma met ususer det nama mananos rop, sur met in ben pas det rop torom o God, ma det in tokodos sakit, uni det tagun o Karisito. ²⁹ A papam dekdek sur a utna ri in nanpat mulus ut. A lingmulus, a papam dekdek nama labino dekdekin o Karisito, ra i papam dekdek una nung a nilaun.

2

¹ A nemi sur mot in tasmani lena, a papam dekdek sur mot, ma sur a taro Laodisia, ma sur det rop kai, ra ka etorom det utmakai. ² A pami lenra, sur in uragot anundet a nilaun, ma det in kis na marmaris tomo, sur det in bukus nama labino mananos, sur det in tasman a utna anun o God, ra numugu i kis eno, i ra o Karisito ut. ³ A mananos rop, ma a wakak na ninunuk rop, det elar nama kum wakak na ululeng, ra det kis eno un o Karisito.

⁴ A watungi lenri torom mot, sur gong taio i toro pas mot nam tu namnamin na wasiso. ⁵ A lingmulus, a kis gisen gusun mot una pining, ikut una niong a kis tomo ut nam mot, ma a gas ra a tama i lena, mot warkurai kodos anumot a nilaun, ma mot tur dekdek una numot a nurnur un o Karisito.

Dat in mur a matok na nilaun anun o Karisito

⁶ Mot sa los pas o Karisito Iesu sur i a Labino una numot a nilaun, i wakak sur mot in laun bolbolos ut uni. ⁷ Anumot a nilaun in wakakor un o Iesu sur in lubung, ma mot in tur netes uni. Mot in tur dekdek una nurnur elar nami ra di sa ususer tar mot uni, ma mot in bukus nama watung wakak torom o God ma anumot a watung wakak in pulpulas.

⁸ Mot in tumarong mot, sur gong taio i ukarabus mot nama mananos anun a taro kut, ra i a etowo oros kut ma a torotoro. A mananos ra, i wanpat kut tagun a kum etowo anun a kum tumtubun det tagun numugu, ma tan a kum laulau na nion tagun a rakrakon bual, ma awu sur tan o Karisito.

⁹ Uni o Karisito i wanpat a mulusino, ma a nilaun rop anun o God i bukus uni. ¹⁰ Ma mot tagun o Karisito, i mo ra anumot a nilaun i kudulano. Ma o Karisito ut, i labo

taun a kum nion rop ra det utur ukai a dekdek, ma a kum nion rop ra det utur ukai a warkurai. ¹¹ Una numot a nilaun un o Karisito, i tok talilis mot, ikut awu sur a ngas na tinotok talilis ra a taro det pami nama lamandet, awu. A tinotok talilis ra o Karisito i pami i lenri, i rakon ru a laulau na nemnem ina pinimot. ¹² Ra di baptaiso mot, di por mot tomo nam o Karisito. Ma mot katutur melet tomo nami, uni mot nurnur una dekdekin o God, i ra i ukatutur melet pas o Karisito gusun a minat.

¹³ Numugu a niomot i mat, uni mot pam a kum sakino petutna, ma ka di rakon ru a laulau na nemnem ina pinimot. Ikut uniri, o God i sa ulaun pas mot tomo nam o Karisito. I sa unus ru anundat a kum sakino petutna rop. ¹⁴ Dat ser rosumur gusun a kum Warkurai anun o Moses, ra a etakun i kis un dat. Ikut o God i unus ru a etakun, ra i sak wat tari sapat netes unin nanai kutus. ¹⁵ O God i sa rakon ru a dekdekin a kum nion ra det utur ukai a dekdek ma a kum nion ra det utur ukai a warkurai. Ma unin nanai kutus i ban umaimai det umatan a taro rop, uni i ese i lena, i sa winim rop pas det.

¹⁶ I mo ra, gong mot madek tar taio sur in takun mot lena, ka mot pam sot pas a kum warkurai un asau ra mot in nani ma mot in inumi, ma una kum lamlabino bung na lotu, ma una kalang ra i wanpat kibin, ma una Bung na Sabat. ¹⁷ A kum warkurai ri, det elar kut nama malalar ina utna ra in nanpat numur. Ikut, a utna mulus, i o Karisito. ¹⁸ Ara taro det ser toro lena, det unatino pas det una nundet a ngas na lotu, ma det ser lotu torom a kum ensel, ma det ser wasiso una kum ririon ra det tama i. Gong mot madek tar det sur det in takun mot. Uni a ngas na musano ra, i uman labino kut nama nuknukino, ma a nuknukino i bukus nama kum laulau na nemnem ina pinino. ¹⁹ I sa tukutus gusun o Karisito, i ra in lorin a taro na lotu. O Karisito i in lorindat, ma dat a pinino. I udekdek a kum du pinino sur det in warut etetalai det ma det in kis tomo, elar nama kum mulmulukun ina pinindat ra det tugus tomo. Ra a kudulano pinino i lubung, elar nama nemnem anun o God.

²⁰ Mot sa mat tomo nam o Karisito, ma mot sa langolango gusun a kum etowo tan a kum laulau na nion tagun a rakrakon bual. Asau a kibino ra mot laun melet kut elar nam mot taginin una rakrakon bual ma mot mur a kum warkurai taginin? A

kum warkurai lenri: ²¹ “Gong mot pami! Gong mot wani! Gong mot tulani!” ²² A kum warkurai ri i wasiso una kum utna ra dat papam pas nami, ra numur ka det gas mo un tu utna, uni a kum warkurai ri det wanpat tagun a kum etowo kut anun a taro. ²³ A lingmulus ut, a kum warkurai ri, det tamtama elar nami ra det tagun a wakak na mananos, uni a taro ra det ser mur det, det dekdek una lotu, ma det ser unatino pas det, ma det ser warkurai bat a pinindet. Ikut ka det pet lar pasi sur det in turbat a laulau na nemnem ina pinindet.

3

A matok na nilaun un o Karisito

¹ O God i sa ukatutur tomo pas mot nam o Karisito gusun a minat, i mo ra, i wakak sur mot in ubek a kudulano nuknuki mot una kum utna sapat una langit, ra o Karisito i kis iai, una papor sot na laman o God. ² I wakak ra a nuknuki mot in kis una kum utna sapat una langit, ma gong i kis una kum utna taginin upiso. ³ Uni mot sa mat gusun a ngas na nilaun tagun a rakrakon bual, ma uniri anumot a nilaun i kis eno tomo nam o Karisito, un o God. ⁴ O Karisito i ra anumot a nilaun. Ra in nanpat, mot kai mot in nanpat puaso tomo nami una nun a minamar.

⁵ I mo ra, mot in doko ru a kum sakino petutna taginin upiso, ra kura una numot a nilaun. Iri a kum petutna ra: a kum petutna na pamuk, a kum dur na petutna, a laulau na nemnem, a nemnem sur a kum sakino petutna ma a nemnem sur a susut na ululeng. A nemnem sur a susut na ululeng, i ra, a lotu torom a torotoro na god. ⁶ Ra a kankan anun o God in nanpat torom a taro uni det pam a kum petutna ri.

⁷ Una numot a nilaun numugu, mot kai mot ser mur a kum petutna ri. ⁸ Ikut uniri, mot in lakro ru a kum petutna rop lenri: a wasiso na engaras, a kankan, a kum sakino petutna, a emang, ma a wasiso laulau kai. ⁹ Gong mot toro etetalai mot, uni mot sa rakon ru a kum sakino petutna ra numugu mot ser pami, ¹⁰ ma mot sa emar pas nama matok na nilaun. A matok na nilaun ri, o God i ser umatoki, sur mot in elar nama malalarino, ma sur mot in tasman mulusi. ¹¹ Ra lenra, dat rop det elar mukut: a taro Juda, a taro Grik, det ra di sa tok talilis tar det ma det ra ka di tok talilis det, ma a taro tagun osi na ngas na kabotaro, a kum tene ititula ma det kai ra ka det tene ititula. O Karisito ut i labo sakit, ma i kis un dat rop.

A marmaris etetalai

¹² Mot a talapor na taro anun o God, ra i maris doko mot, ma i pilok pas mot. I mo ra, i wakak sur mot in emar nama kum petutna ri: mot in warut a taro, mot in pam a wakakino torom det, mot in unatino pas mot, mot in kis na malmal ma mot in ese a wowowon na magiramot. ¹³ Ma gong mot balano sungun ra taio tagun mot i raro un lako kum utna, mot in dumano ru anun a sakino petutna, elar nama Labino i sa unus ru anumot a kum sakino petutna. ¹⁴ Netes una kum petutna rop ri, i wakak sur mot in emar nama marmaris torom mot etetalai. A marmaris i dat tomo dat rop, sur dat in takai kut.

¹⁵ I wakak sur a malmal ra o Karisito i tabor mot nami in mugu mot una anumot a nilaun. Uni mot ara pinin o Karisito kut, ma o God i kabo pas mot sur mot in kis tomo nama malmal. Ra i wakak sur mot in ser watung wakak torom o God. ¹⁶ I wakak ra a wasiso anun o Karisito in kis sikot ubalamot ma in bukus. Mot in ususer etetalai mot kai nami tomo nama mananos rop. Ma mot in kelekele nama wasiso anun o Karisito ra mot kele a Kum Kelekele anun o Dewid, ma a kum kelekele na lotu, ma a kum kelekele ra a Tokodos na Nion i tabor mot nami. Ra mot in kelekele nama watung wakak torom o God ubalamot. ¹⁷ Una kum utna rop ra mot pami ma mot watungi, mot in pami ut nama risan a Labino o Iesu, ma mot in watung wakak torom o God a Tamandat, kibino una pinapam ra o Karisito i pami un mot.

A etowo torom a kum kamkabo tamano
(Ep 5:22-6:4)

¹⁸ Mot a kum nolin na ino, i wakak sur mot in ser unatino pas mot torom anumot a kum musano, uni i tokodos sur mot, a taro anun a Labino mot in pami lenra.

¹⁹ Mot kai, a kum nolin na musano, mot in ser nem anumot a kum ino, ma gong mot pam det lar a kum karabus anumot.

²⁰ A kum nat liklik, mot in ser mur a wasiso anun a kum tamtama mot ma a kum nanamot una kum utna rop, uni a Labino i gas ra mot ser pami lenra.

²¹ Mot a kum tamtaman a kum nat, gong mot ungangos a kum nutnutu mot, sako det in tusako.

A etowo torom a kum tene ititula ma anundet a kum mugumugu
(Ep 6:5-9)

²² Mot a kum tene ititula, mot in mur a wasiso anun anumot a kum mugumugu taginin upiso una kum pinapam rop. Gong mot papam wakak kut ra det tama mot, sur mot in ugasas tar det kut. Mot in papam wakak torom det nama lingmulusino tiro ubalamot, ma a urur torom a Labino. ²³ Una kum pinapam rop ra mot pami, mot in pitar rop tar anumot a nilaun uni. Ra mot papam, mot in papam elar nami ra mot papam ut torom a Labino, ma awu sur torom a taro. ²⁴ Uni mot tasmani lena, numur a Labino in pitar a ikul torom mot, i a wakak na kinkinis ra numur mot in rakoni. Mot a kum tene ititula anun a Labino o Karisito, ma i ut anumot a mugumugu mulus. ²⁵ Osi ra i pam a sakino in los a warkurai na minabalu una sakino ra i pam tari. A warkurai anun a Labino i elar kut torom a taro rop.

4

¹ Mot a kum mugumugu, mot in pam a tokodos na petutna torom anumot a kum tene ititula, ma a magiramot in elar kut torom det rop, uni mot tasmani lena, mot kai, anumot a mugumugu i a Labino, ra i kis sapat una langit.

Dat in wasiso un o Karisito

² Mot in dekdek nama niaring. Ra mot wararing, a nuknuki mot in talapor, ma mot in watung wakak torom o God. ³ Mot in wararing kai un met, sur o God in papos saro a kisapi, sur met in upuaso a wasiso un o Karisito, ra numugu i kis eno. A kis una karabus, uni a wasiso nama kum wasiso ri. ⁴ Mot in wararing sur an wasiso talapor wakak nami, sur an pam sot pas anung a pinapam.

⁵ Mot in papam nama mananos torom a taro ra ka det nurnur. Una kum du bung rop, ra i langolango sur mot in wasiso puaso torom det, mot in pami. ⁶ Ra mot in wasiso torom det, anumot a wasiso in wakak, ma in namnamin torom det, sur mot in balu anundet a kum iting nama tokodos na minabalu torom det rop tak-takai.

O Pol i tulu ru o Tikikus utong o Kolosi

⁷ O Tikikus in inanos mot una kum utna rop un iau. I a wakak na tisindat, a lingmulus na tene pinapam ma a tultul tomo nam met una pinapam anun a Labino. ⁸ A tulu ru i torom mot, sur mot in tasman anumet a nilaun nin i pepelai, ma sur in uragot mot. ⁹ In nan tomo nam o Onesimus, a wakak na

tisindat ra i lingmulus una nun a pinapam, i ara ut tagun mot. Der in inanos mot una kum utna rop ra i wanpat nin.

A kum wasiso na marmaris

¹⁰ O Aristakus, ra i kis tomo nam iau una karabus, i pitar anun a marmaris torom mot, der nam o Mak a malin o Banabas. Ra o Mak in nanpat torom mot, mot in gas pasi, elar nama wasiso ra mot sa rakon mugu tari. ¹¹ O Iesu, ara risano kai o Jastus, i kai i pitar anun a marmaris torom mot. Detul ri, detul a tulu te Juda ra detul nurnur, ma detul sot kut tagun a taro Juda, detul papam tomo nam iau sur a matanitu anun o God. Ma detul udekdek iau.

¹² O Epapras, i ara ut tagun mot, ma a tultul anun o Karisito Iesu, i pitar anun a marmaris torom mot. I ser wararing dekdek sur mot, sur mot in tur dekdek una numot a kinkinis na nilaun un o Karisito, ma mot in tasman mulus a nemnem rop anun o God. ¹³ Uni iau ut a tama i ma a wasiso mulus uni torom mot lena, i papam dekdek sur mot, ma sur det kurong o Laodisia ma det kai tong o Ierapolis. ¹⁴ O Luk, ra a dokta ma a wakak na pasamet, ma o Demas, der pitar anunder a marmaris torom mot.

¹⁵ Mot in pitar anung a marmaris torom a kum tistisin dat kurong o Laodisia, ma torom a ino ri, o Nimpa, ma a taro na lotu kai, ra det ser lotu tomo una nun a rumu.

¹⁶ Ra di sa luk tar a pas ri torom mot, numur mot in pitari torom a taro na lotu tong o Laodisia, sur det bulung det in luki. Lenkaira, mot in luk a pas ra a sa tumus tari torom a kum Laodisia.

¹⁷ Mot in inanos o Arkipus lena, in pam rop ru a pinapam ra o God i sa pitar tari tano.

¹⁸ Iau o Pol, iau ut, a tumus a nat na wasiso na marmaris ri nama lamang torom mot. Gong mot dumano ru iau, ra a kis una karabus.

A marmaris anun o God in kis tomo nam mot.

A Mugano Pas anun o Pol torom a taro Tesalonaika

A wasiso talapor mugu

Ra o Pol i kis tong o Korin i tumusa a pas ri, a mugano pas torom a taro na lotu tong o Tesalonaika.

O Tesalonaika a labino tamon una papor Masedonia. Una mantul na inawan anun o Pol i wanpat tong o Tesalonaika ra i warawai torom det (tama Ap 17:1-14). Ara taro ra det nukpukus, det tagun a taro Juda, ma a susut tandet tagun a kum se kabotaro. A kum mugumugu anun a taro Juda tong o Tesalonaika det kankan uni a ramano taro tagun det, det sa nurnur un o Iesu. Ra det lu ru o Pol gusun anundet a tamon, ma i wan utong o Beria. Numur i tulu ru o Timoti torom det, ra o Timoti i inanos o Pol un det.

Una pas ri o Pol i watung wakak torom o God, uni a taro Tesalonaika det tur dekdek una nurnur ra det etorom a kum mamaut, ma det nem o Pol. Una pas ri, o Pol i nem na udekdek anundet a nurnur, ma i balu i kai anundet a kum iting una minat.

A inawan ina Mugano Pas Tesalonaika:

A turturkibin ina buk ri (1:1)

O Pol i gas nama taro Tesalonaika (1:2-10)

A pinapam anun o Pol tong o Tesalonaika (2:1-3:13)

A ngas na nilaun ra in ugargas o God (4:1-12)

A inawan pat melet anun a Labino (4:13-5:11)

A ururop na wasiso anun o Pol torom det (5:12-28)

¹ Iau o Pol, o Sailas, ma o Timoti, metul tumtumus torom mot a taro na lotu tong o Tesalonaika, mot ra mot laun un o God a Tamandat ma a Labino o Iesu Karisito. A marmaris ma a malmal torom mot.

A nilaun ma a nurnur anun a taro Tesalonaika

² Metul ser watung wakak torom o God un mot rop, ma metul ser pitar tar mot torom o God una numetul a kum niaring. ³ Ra metul ser wararing torom anundet a God a Tamandat, metul nuk pas anumot a kum pinapam ra anumot a nurnur i pam pati, ma metul nuk pas a kum dekdek na pinapam ra anumot a marmaris i pam pati, ma metul nuk pasi kai, anumot a tuntunur dekdek, ra anumot a kinkinis langlang nama nurnur una Labino o Iesu Karisito i pam pati.

⁴ A kum tistisi metul, mot ra o God i maris mot, metul tasmani lena i sa pilok pas mot, ⁵ uni a Wakak na Wasiso ra metul upuaso i, awu sur i wanpat torom mot elar nama wasiso kut, awu. I wanpat tomo nama dekdek ma a Tokodos na Nion, ma mot longoro lele i ra mot pam ukai i una balamot. Ra metul laun nisamot, mot tasman wakak a magirametul, ra metul ser upuaso i sur in uwakak mot. ⁶ Mot sa mur pas a magirametul ma a magiran a Labino. A taro det ban laulau mot, ikut mot pam ukai a wasiso nama gasgas, ra a Tokodos na Nion i pitar tari tamot. ⁷ Mot ese a ngasino ra i wakak sur a taro na nurnur rop tiro una aru papor, o Masedonia ma o Akaia, det in muri. ⁸ A wasiso anun a Labino ra mot upuaso i, i sa wan sarara, elar nama tinangis ina garamut, ra i wan bakbak. Awu sur tiro kut o Masedonia ma o Akaia, awu. A kum tamon rop det sa tasman anumot a nurnur un o God. Asau melet mo ra metul in watungi? ⁹ Uni det ut det wasiso talapor una numot a wakak na petutna ra mot gas pas metul. Ma det wasiso talapor kai un mot lena, mot sa tupukus torom o God, ma ka mot lotu mo torom a kum torotoro na god. Mot papam mo torom o God, i ra a lingmulusino ma i laun. ¹⁰ Ra mot kis langlang sur o Nutunu, ra in nan pirso tagisapat una langit, i ra o God i sa ukatatur melet pasi gusun a minat. O naro ra, o Iesu, ra i ulaun pas dat gusun a kankan anun o God, ra in nanpat.

2

A pinapam anun o Pol detul tong o Tesalonaika

¹ A kum tistisi metul, mot ut mot tasmani lena, anumetul a inawan pat torom mot ke utna oros, awu, i wu i ut a wino. ² Mot tasmani lena numugu tan anumetul a inawan pat torom mot, a taro det ban laulau metul ma det ban umaimai metul tong o Pilipai. Ikut anundet a God i warut metul, ra metul dekdek ut sur metul in wasiso puaso una nun a Wakak na Wasiso torom mot, ma ka metul ngaran det ra det lari sur det in sakbat metul. ³ Ra metul saring mot sur mot in nukpukus, awu sur anumetul a wasiso i raro, awu sur kai metul wasiso nam tu sakino nuknuk, ma awu sur metul toro pas mot. ⁴ Awu! Metul wasiso puaso nama Wakak na Wasiso, uni o God i sa lar tar metul, ma i nurnur un metul lena metul in pami. Ka metul wasiso puaso sur metul in ugargas a taro nami, awu, sur o God ut in gas nami, i ra i ser lar tar a nuknuki metul. ⁵ Mot sa tasmani lena, ka metul ugargas

1:1: Ap 17:1-9 1:2: 1 Kor 13:13; Kol 1:4-6 1:5: 1 Kor 2:4-5 1:6: Ap 17:5-9 2:2: Ap 16:19-24; 17:1-9

2:4: Gal 1:10

mot nam tu wasiso na umarom, ma ka metul nemnem eno sur tu mani tamot. O God i tama i ma i tasman metul. ⁶ Ka metul nemi sur mot o taio gisen kai in watung ulabo pas metul.

⁷ I tokodos sur metul in saring mot sur tu ikul, uni metul a tulu aposel anun o Karisito. Ikut ka metul pami lenra. Metul upuaso a balano wakak epotor tamot, elar nama ino ra i tamtamabat a kum nutnutunu. ⁸ Metul nem doko mot, ra metul gas doko sur metul in inanos mot una Wakak na Wasiso anun o God. Awu sur i kut ra, awu, metul gas ukai sur metul in pitar anumetul a nilaun kai torom mot, uni mot labo doko umatametul.

⁹ A kum tistisi metul, mot sa tasman anumetul a dekdek na pinapam. Una kum mirum ma a waspi, metul papam nama lamametul sur u warut metul una numetul a kinkinis. Metul pami lenri, sur metul in warawai torom mot nama Wakak na Wasiso anun o God ma gong metul pitar a mamaut torom mot sur mot in kul metul. ¹⁰ Mot ut, ma o God kai, mot tama a magirametul ra metul kis epotor tamot, a kum tene nurnur. A magirametul i talapor ma i tokodos, ma katu etakun i los metul un tu utna. ¹¹ Mot tasmani lena anumetul a petutna torom mot rop taktakai, i elar nama petutna ra ara musano i pami torom a kum nutnutunu. ¹² Metul udekdek mot, metul wasiso na emarom torom mot, ma metul inanos mot sur mot in laun nama ngas na nilaun ra i ugargas o God, i ra i kabo pas mot sur anun a matanitu ma anun a minamar.

¹³ Ara kibino kai ra metul ser watung wakak torom o God i lenri: Ra mot rakon ukai a wasiso anun o God, ra mot longoro i ta metul, mot mulaot pasi. Awu sur mot mulaot pasi elar nama wasiso kut anun a taro, awu, mot mulaot pasi uni a wasiso ra, i a wasiso ut anun o God. A wasiso ra, kura i papam una nilaun anumot ra mot sa nurnur. ¹⁴ A kum tistisi metul, mot elar nama taro na lotu anun o God un o Karisito Iesu, ra det kis tong una papor Judia. Uni, mot kai, mot taramo a ngunungut tan a taro tagun anumot a tamon ut, elar nama taro na lotu tong o Judia det taramo i tan anundet a taro ut, a taro Juda, ¹⁵ det ra det um doko a Labino o Iesu ma a kum poropet, ma det lu ru metul kai. O God ke gas nam det, ma det kis na ebar nama taro rop, ¹⁶ uni det lari sur det in turbat metul, sur gong metul warawai torom a taro ra awu sur a taro Juda sur gong o God i ulaun pas det. Ma una kisapi ra, det

palataun anundet a kum sakino petutna tuk ra anundet a kum sakino petutna i bukus. I mo ra uniri a kankan anun o God i sa wanpat torom det.

Detul nem na tama melet a taro Tesalonaika

¹⁷ A kum tistisi metul, ra a taro Juda det ukis sarara ru metul gusun mot, anundat a kinkinis sarara ke suano i. Dat kis sarara kut una pinindat, ikut una nuknuki metul, metul nuk mot ut. Metul nem doko i sur metul in tama mot, ra metul dekdek sur metul in pam sot pasi. ¹⁸ Metul nem doko i sur metul in millet melet torom mot. Iau, o Pol, a lari a susut na dino sur an nan torom mot, ikut o Satan i turbat metul. ¹⁹ Metul nem doko i sur metul in tama melet mot, uni metul nurnur un mot lena, mot sa tur dekdek, ma mot, mot kibino una numetul a gasgas, ma mot kibino una numetul a kunukul tagun anumetul a pinapam, una bung ra anundat a Labino o Iesu in nanpat, ma dat in tur umatano. ²⁰ I lingmulus sakit, ra mot ut, anumetul a minamar ma anumetul a gasgas.

3

¹ Una numetul a nuknuk na nginara un mot, ka metul nem na kis liklik mo. Metul nuki lena, i wakak sur mir kut nam o Sailas, mir in kis nin o Atens. ² Ra mir sa tulu ru o Timoti a tinsindat, ma a tene pinapam anun o God tomo nam mir, ra metul ser wasiso talapor nama Wakak na Wasiso un o Karisito. Mir sa tulu ru i torom mot, sur in udekdek mot, ma in uragot mot una numot a nurnur, ³ sur gong taio tagun mot a nuknukino i talara kibino una kum mamaut ra i monong mot. Uni mot tasmani ut lena, a kum mamaut in monong dat. ⁴ Ra dat kis tomo utmakai, metul ser inanos mot lena, din ban laulau dat. Ma mot sa tasmani lena, a kum mamaut ra, i sa wanpat ut. ⁵ I mo ra a tulu ru o Timoti torom mot. A tulu ru i torom mot sur an mananos una numot a nurnur, uni a ngara doko un mot ma ka nem na kis liklik mo. A ngara, sako a tene ululam i sa ulam pas mot, ma anumetul a pinapam torom mot in utna oros kut.

A wakak na wasiso puaso una taro Tesalonaika

⁶ Uniri o Timoti i sa millet melet gusun mot sur urin nisamir. I los a wakak na wasiso talapor un mot torom mir, una numot a nurnur ma anumot a marmaris. I inanos mir lena, mot ser gas ra mot ser nuk melet pas anundat a kum kinkinis tomo numugu,

ma mot nem doko i sur mot in tama metul, elar nam metul kai metul nem doko i sur metul in tama mot. ⁷ I mo ra a kum tistisi metul, anumot a nurnur i uragot metul una numetul a kinkinis ubalan a kum mamaut, ma a kum petutna ra a taro det ban laulau metul nami. ⁸ Uniri anumetul a nilaun i wakak doko, uni mot tur dekdek una Labino. ⁹ Metul gas doko nam mot umatan anundat a God, ma metul watung wakak toromi. Metul in watung wakak pepetlai toromi? Uni anumetul a gasgas i labo doko. ¹⁰ Una kum mirum ma a waspi, metul pitar rop tar anumetul a nilaun una niaring sur mot. Metul wararing sur metul in tama melet mot, ma metul in ususer mot un lako kum utna ra mot sibo utmakai suri una numot a nurnur.

¹¹ Metul wararing lena, o God ut a Tamandat ma anundat a Labino o Iesu, in papos anumetul a kisapi sur metul in nan torom mot. ¹² Ma metul wararing kai sur a Labino in ulabo anumot a marmaris, ma in bukus ma in tilingis epotor tamot ma torom a taro gisen kai, elar nama numetul a marmaris kai torom mot. ¹³ Ma metul wararing kai sur in udekdek mot sur mot in tokodos, ma katu etakun in los mot, ra mot in tur umatan o God a Tamandat, una bung ra anundat a Labino o Iesu in nanpat, tomo nam anun a tokodos na taro rop.

4

A ngas na nilaun ra in ugasgas o God

¹ A kum tistisi metul, metul sa ususer tar mot una ngas na nilaun ra mot in laun nami sur in ugasgas o God, lar ut ra mot sa muri. Ra uniri metul saring mot, ma metul udekdek mot una risan a Labino o Iesu, sur anumot a nilaun in lubang dekdek lenutra. ² Uni mot sa tasman a kum etowo ra metul sa ususer tar mot nami. A kum etowo ra, det wanpat ut tan a Labino o Iesu. ³ O God i nemi sur anumot a nilaun gong i dur umatano, ra mot in nan gisen gusun a kum pamuk na petutna. ⁴ Arara tagun mot in dekdek sur in turbat a nemnem na pinino, sur a petutna na urur in kis una nun a nilaun ma katu dur kai in kis uni. ⁵ Ma gong mot mur a dekdek na nemnem ina pamuk na petutna, elar nam det ra ka det tasman o God. ⁶ Gong tu pasamot i pam a sakino una ino anun tu tisinu ra i nurnur. Ra in pami lenra i usobor o tisinu. Metul sa watung tari, ma metul sa utumarong tar mot lena, a Labino in pitar a warkurai na minabalu torom det, ra det ser pam a kum

petutna lenri. ⁷ Uni, o God ke kabo pas dat sur a dur na petutna, i kabo pas dat sur dat in mur a tokodos na nilaun. ⁸ I mo ra osi ra i rosumur gusun a etowo ri, awu sur i rosumur gusun a taro, awu. I rosumur ut gusun o God, i ra i tabor dat nama Niono, a Tokodos na Nion.

⁹ Ka metul in tumtumus melet mo torom mot una numot a marmaris torom a kum tistisi mot, uni, o God i sa ususer tar mot sur mot in nem etetalai mot. ¹⁰ A lingmulus ut, mot nem a kum tistisi mot rop tiro una papor Masedonia rop. Ikut, metul saring mot sur anumot a marmaris in lubang dekdek ut.

¹¹ Mot in dekdek sur anumot a nilaun in lenri: Mot in kis na malmal, ma gong mot uruk lorimot sur tu utna anun taio. Mot in papam nama lamamot sur amot a utna na inangon, elar nami ra metul sa watung tari tamot. ¹² Ra mot in pami lenra, a taro ra ka det nurnur det in ru mot, ma ka mot in nura taio sur in tabor mot.

A inawan pat melet anun a Labino

¹³ A kum tistisi metul, metul nemi sur mot in mananos un det ra det sa mat, ma gong mot tupunuk dekdek elar nama taro ra ka det nurnur una katkatutur melet gusun a minat. ¹⁴ Dat nurnur lena o Iesu i mat, ma i laun melet. I mo ra dat nurnur lena, det ra det nurnur un o Iesu, ma det sa mat, o God in ukatutur det ma det in nan tomo nam o Iesu, ra in millet melet.

¹⁵ A wasiso ri ra metul watungi tamot, a wasiso ut anun a Labino. I lenri: Dat ra dat sa laun tuk una bung ra a Labino in nanpat melet, ka dat in mugu tandet ra det sa mat. ¹⁶ Uni a Labino ut in nan pirso tagisapat una langit, in nalngan ara in kakabo, a mugumugu anun a kum ensel in wasiso, in tuwuru anun o God in tangis, ra det ra det sa mat nama nurnur un o Karisito, det in katutur mugu. ¹⁷ Numur dat ra dat laun utmakai, din los tomo pas dat nam det usapat una kum du bakut sur dat in etorom nama Labino una maino. Ra dat in kis tukum tomo nama Labino. ¹⁸ I mo ra mot in uragot etetalai mot nama kum wasiso ri.

5

Dat in kis na waninar sur a inawan pat anun a Labino

¹ A kum tistisi metul, ka metul in tumtumus torom mot una du bung ma a bung ra a Labino in nanpat uni. ² Uni mot sa tasman wakaki lena, a bung anun a Labino

in nanpat kisin, elar nama tene wolong una mirum. ³ Ra a taro det in watungi lenri, "Ai, ka dat taramo tu maut. A wakak na nilaun kut ri dat taramo i," a iniru in nanpat kisin torom det, elar nama ngunungut ra a ino i taramo i ra milau sur in usus. Ka det in kalabor eno pas gusun a iniru.

⁴ Ikut mot, a kum tistisi metul, a bung ra ken ukisin mot, elar nama tene wolong, uni awu sur mot kis una dumirum. ⁵ Mot rop a kum nutnutun a talapor ma a kum nutnutun a waspi. Awu sur dat tagun a mirum o tagun a dumirum. ⁶ I mo ra gong dat elar nam ara taro ra det inep dumun. Dat in koikoi ma dat in tamtamabat wakak anundat a nilaun. ⁷ Uni det ra det inep dumun, det ser inep una mirum, ma det ra det ininum, det ser inum una mirum.

⁸ Ikut dat tagun a waspi, i wakak sur dat in tamtamabat wakak anundat a nilaun. Dat in emar nama nurnur ma a marmaris sur in tamtamabat dat, elar nama du pino aen ra a tene inaim i ubek bat a romrobono nami. Ma dat in emar kai nama kinkinis langlang nama nurnur sur o God in ulaun dat, elar nama tene inaim i ubek bat in lorino nama kukup na inaim. ⁹ Uni o God ke pilok pas dat sur dat in taramo a ngunungut ubalan anun a kankan, awu. I pilok pas dat, sur anundat a Labino o Iesu Karisito in ulaun pas dat. ¹⁰ I mat un dat, sur dat in laun tomo nami, ra in nanpat melet. Dat rop, det ra det laun utmakai ma det ra det sa mat. ¹¹ I mo ra mot in uragot etetalai mot, ma mot in udekdek mot, lenutra mot ser pami.

A kum ururop na etowo

¹² A kum tistisi metul, metul saring mot sur mot in pitar a urur torom anumot a kum mugumugu, ra det papam dekdek epotor tamot, ma det tamtamabat mot una kisapi anun a Labino, ma det ususer mot. ¹³ Mot in ese a labino urur ma a marmaris torom det, kibino una nundet a pinapam. Ma mot in kis na malmal etetalai.

¹⁴ A kum tistisi metul, metul saring mot sur mot in tumarong a kum tubunu wok na taro, mot in uragot det ra det ser ngara, mot in warut det ra ka det dekdek una nurnur, ma mot in ese a wowowon na petutna torom a taro rop. ¹⁵ Gong mot balu a sakino nama sakino. Mot in dekdek sur mot in pam a wakakino etetalai torom mot, ma torom a taro rop kai.

¹⁶ Mot in ser gas. ¹⁷ Gong mot mana nama niaring. ¹⁸ Mot in watung wakak torom o God un asau rop ra i wanpat torom mot, uni

iri a nemnem ut anun o God torom mot, a taro anun o Karisito Iesu.

¹⁹ Gong mot turbat a pinapam anun a Tokodos na Nion. ²⁰ Gong mot nuk penpen una kum wasiso na poropet. ²¹ Mot in lar rop a kum wasiso ma a kum petutna. Mot in utur ukai a wakakino. ²² Ma mot in nan gisen gusun a kum sakino rop.

²³ Metul wararing sur o God ut, a God na malmal, in uwakak pas anumot a nilaun, sur mot in tokodos rop umatano. Metul wararing kai sur o God in tamtamabat a niomot, a nuknuki mot ma a pinimot, sur gong tu etakun in los mot una bung ra anundat a Labino o Iesu Karisito in milet uni. ²⁴ O naro ra i kabo pas mot in pami lenutra, uni i lingmulus.

²⁵ A kum tistisi metul, mot in wararing sur metul. ²⁶ Mot in nem a kum tistisi mot nama egom na marmaris, ma mot in pami nama tokodos na petutna. ²⁷ A saring mot nama risan a Labino sur mot in luk a pas ri torom a kum tistisin dat rop.

²⁸ A marmaris anun anundat a Labino o Iesu Karisito in kis tomo nam mot.

A Manru na Pas anun o Pol torom a taro Tesalonaika

A wasiso talapor mugu

Ra o Pol i kis tong o Korin i tumus a pas ri, a manru na pas torom a taro Tesalonaika.

I longoro i lena, ara taro det wur nuknuk una inawan pat melet anun o Iesu. Ara taro det watungi lena, o Iesu i sa wanpat. Una pas ri, o Pol i ususer det una inawan pat anun o Iesu. I inanos det lena, a tene lakai warkurai in nanpat mugu, ma in toro a susut na taro. Numur o Iesu in nanpat melet, ra in warkurai a kum tene sakino. O Pol i inanos det kai lena, gong det tubunu wok, det in dekdek sur det in pam a wakak na petutna.

A inawan ina Manru na Pas Tesalonaika:

A turturkibin ina buk ri (1:1-2)

O God in warkurai a taro (1:3-12)

A tene lakai warkurai in nanpat mugu ma numur o Iesu in nanpat (2:1-17)

Det in pam a wakak na pinapam ma gong det tubunu wok (3:1-15)

A ururop na wasiso anun o Pol torom det (3:16-18)

¹ Iau o Pol, o Sailas ma o Timoti, metul tumtumus torom mot a taro na lotu tong o Tesalonaika, mot ra mot laun un o God a Tamandat ma a Labino o Iesu Karisito.

² A marmaris ma a malmal torom mot tan o God a Tamandat ma a Labino o Iesu Karisito.

O God in pitar a warkurai na minabalu torom a taro

³ A kum tistisi metul, i wakak sur metul in ser watung wakak torom o God un mot. I tokodos lenra, uni anumot a nurnur i lubang dekdek, ma a marmaris torom mot etetalai kai i lubang nanan. ⁴ I mo ra, metul ut metul ser warango pas mot torom a taro na lotu anun o God una kum tamon. Metul ser warango pas mot una anumot a tuntunur dekdek ma anumot a nurnur, ubalan a kum maut ra mot taramo i ma a kum ngunungut ra a taro det ban laulau mot nami.

⁵ A kum utna rop ri, i upuaso i lena, a warkurai anun o God i tokodos. Mot taramo a ngunungut, uni mot ulabo anun a matanitu. I mo ra, o God in watung mot lena, mot tokodos sur anun a matanitu.

⁶ O God i tokodos, ma in ukadik det ra det

ukadik mot, ⁷ ma in pitar a mana torom mot ra mot taramo a ngunungut, ma lenkutkai ra torom metul. O God in pami lenra, una bung ra a Labino o Iesu in nanpat tagisapat una langit nama kunabor na sungun ma anun a kum dekdek na ensel. ⁸ In ukadik det ra ka det tasman o God, ma ka det longoro a Wakak na Wasiso anun anundat a Labino o Iesu. ⁹ Det in taramo a warkurai na minabalu ra ken rop, i a iniru tukum, ma det in kis gisen gusun a Labino ma a minamarin a dekdekino. ¹⁰ A warkurai ri in nanpat una bung ra a Labino in nanpat sur din ulabo pasi kibino una nun a tokodos na taro, ma det rop ra det nurnur uni det in ru i. Mot kai tomo nam det, uni mot nurnur una numetul a wasiso talapor torom mot.

¹¹ I mo ra metul ser wararing sur mot torom anundat a God, sur in watung mot lena mot tokodos sur a ngas na nilaun ra i kabo pas mot suri. Ma una dekdekino in warut mot, sur mot in pam sot pas a kum wakak na pinapam ra mot nem na pami, ma a kum petutna rop ra anumot a nurnur i pam pati. ¹² Metul wararing lenra, sur din ulabo pas a risan anundat a Labino o Iesu kibino un mot, ma o God kai in pitar a minamar torom mot. A kum utna rop ri, in nanpat kibino una marmaris anun anundat a God, ma a Labino o Iesu Karisito.

2

A inawan pat anun a tene lakai warkurai

¹ A kum tistisi metul, metul nem na inanos mot una inawan pat melet anun anundat a Labino o Iesu Karisito, ma una nundat a inawan tomo toromi. Metul inanos mot lena, ² gong a nuknuki mot i talara lakit ma i lokolokor ra mot longoro i lena, a bung anun a Labino i sa wanpat. Ra tu wasiso na poropet, o tu inarang, o tu pas in wasiso lenra, ma din watungi kai lena taginin tametul, gong mot nurnur uni. ³ Gong mot madek tar taio sur in toro mot nam tu wasiso o tu kisapi sur mot in muri. Uni a bung ra, ken nanpat utmakai, tuk ut ra, lako susut na taro det in rosุมak gusun o God, ma a tene lakai warkurai in nanpat pupuaso, i ra, numur in iru. ⁴ In ebar torom a kum utna rop ra a taro det watung det a kum god ma det lotlotu torom det, ma in ulabo pasi ut, sur in kis una rumu na etabor anun o God, ma in watung puaso i lena, i ut o God.

⁵ Ra a kis tomo nam mot, a ser inanos mot nama kum utna ri. Pepetlai, ka mot nuk melet pasi mo? ⁶ Mot sa tasman asau

ra i turbat a tene lakai warkurai, sur in nanpat puaso una du bung ra in sot. ⁷ A dekdekin a lakai warkurai kuri i sa papam eno nanan una rakrakon bual. Ikut, i ra i turbat tari, in turbati utmakai, tuk una bung ra din rakon ru i. ⁸ Numur a tene lakai warkurai in nanpat puaso, ma a Labino o Iesu in kamar ru i nama wuwu na wano, ma in ban laulau i nama minamarin anun a inawan pat. ⁹ A tene lakai warkurai in nanpat nama dekdekin o Satan, ma in ese a kum ngas na torotoro na dekdek, ma a kum torotoro na ukinalong ma a kum torotoro na utna na ukisin. ¹⁰ Una kum ngas na sakino rop ra in pami, in toro a taro ra det wanan sur a iniru. Det in iru, uni ka det mulaot sur det in nem a lingmulusino, sur o God in ulaun det. ¹¹ Iri a kibino ra o God i ulokolokor a nuknukin det sur det in nurnur mukut una torotoro. ¹² I mo ra, det ra ka det nurnur una lingmulusino, ma det gas kut una sakino, det rop det in iru una warkurai anun o God.

Dat in tur dekdek

¹³ A kum tistisi metul, mot ra a Labino i maris mot, i wakak sur metul in ser watung wakak torom o God un mot, uni o God i sa pilok pas mot tagun a turturkibino sur in ulaun mot. I ulaun pas mot una nirurus talapor ra a Tokodos na Nion i pami un mot, ma una numot a nurnur una lingmulusino. ¹⁴ Una Wakak na Wasiso ra metul warawai nami, o God i kabo pas mot sur in ulaun mot, sur mot in los a tinibo kai tagun a minamaris anun anundat a Labino o Iesu Karisito. ¹⁵ I mo ra, a kum tistisi metul, mot in tur dekdek, ma mot in utur ukai a kum etowo ra metul sa ususer tar mot nami. A kum etowo ra metul sa watung tari ma metul sa tumus tari kai, torom mot.

¹⁶ O God a Tamandat, i maris dat, ma una nun a marmaris i tabor dat nama wasiso na ururagot ra ken rop, ma i warut dat sur dat in kis langlang nama nurnur sur a wakakino ra in pami. Ra metul wararing sur anundat a Labino o Iesu Karisito ma o God a Tamandat ¹⁷ in uragot mot ma in udekdek mot una numot a kum wakak na pinapam ma a kum wakak na wasiso kai.

3

O Pol detul, detul saring det sur det in wararing sur detul

¹ A kum tistisi metul, iri a ururop na wasiso anumetul, mot in wararing sur metul, sur a wasiso anun a Labino in nan sarara lakit ma a taro det in ru i elar nam mot, mot ru i. ² Ma mot in wararing sur metul, sur o

God in ulaun metul gusun a sakino taro, uni awu sur a taro rop a kum tene nurnur.

³ Ikut a Labino i lingmulus, ma in udekdek mot ma in tamtamabat mot kai gusun o Satan. ⁴ Metul nurnur una Labino lena kura ut mot mur a kum wasiso ra metul sa inanos tar mot uni, ma mot in ser muri lenutra.

⁵ Metul wararing sur a Labino in mugu a nuknuki mot sur mot in tasman mulus a marmaris anun o God, ma mot in tasmani kai a kisapi sur mot in tur dekdek una kum mamaut ra o Karisito i sa ese tari torom dat.

A utumarong torom a kum tubunu wok na taro

⁶ A kum tistisi metul, metul saring dekdek mot nama risan a Labino o Iesu Karisito lena, mot in nan gisen gusun a kum tubunu wok na tistisin dat ra ka det ser mur a kum etowo ra metul inanos tar mot nami. ⁷ Mot ut mot sa tasmani lena, i wakak ra mot in mur a ngasino ra metul sa pam tari umatamot. Ra metul kis tomo nam mot, awu sur metul kis oros kut. ⁸ Ka metul wan oros pas tu utna na inangon tan taio ra ka metul kuli, awu. Una kum mirum ma a waspi, metul papam dekdek nama lamametul sur u warut metul una numetul a kinkinis, sur gong metul pitar a maut torom tu pasamot sur in kul metul. ⁹ I tokodos sur metul in saring mot sur mot in warut metul, ikut ka metul nemi. Metul pam a pinapam sur metul in ese a ngasino ra i wakak sur mot in muri. ¹⁰ Ra metul kis nisamot, metul pitar a warkurai ri torom mot: Ra taio ke nemi sur in papam, gong kai i wangon.

¹¹ Metul longoro i lena, a ramano taro tagun mot, a kum tubunu wok na taro. Ka det papam, det balon kut una uruk lorindet una utna ra awu sur anundeti. ¹² Una risan a Labino o Iesu Karisito metul turbat a ngas na taro ra, ma metul saring det, sur det in kis wowowon ma det in papam sur andet lako utna na inangon ra det in laun nami. ¹³ Ma torom mot, a kum tistisi metul, gong a pinimot i ngoro nama pam a kum tokodos na petutna.

¹⁴ Ra taio ke mur anumetul a wasiso na pas ri, mot in nuk ukai i. Gong mot lason tomo nami, sur in maimai una magirano. ¹⁵ Ikut gong mot tama i elar nam anumot a ebar, mot in utumarong pasi kut elar nama tisimot.

A ururop na wasiso na marmaris

¹⁶ Metul wararing sur a Labino ra i pitar a malmal, i ut in tabor mot nama malmal una kum du bung rop ma una kum ngas

na kinkinis na nilaun rop. A Labino in kis tomo nam mot rop.

¹⁷ Anung a wasiso na marmaris ri, iau ut o Pol, a tumusi torom mot, nama lamang. Iri a ukinalong in anung a kum pas rop. A ser tumtumus ut lenri.

¹⁸ A marmaris anun anundat a Labino o Iesu Karisito in kis tomo nam mot rop.

A Mugano Pas anun o Pol torom o Timoti

A wasiso talapor mugu

A buk ri, a mugano pas anun o Pol torom o Timoti. O Timoti tagitong una papor Asia. O nano a ino Juda ma o tamano a te Grik. Una manru na inawan anun o Pol, i pilok pas o Timoti sur der in nan tomo, ma der in papam tomo (tama Ap 16:1-3). Numur o Pol i ubek tar o Timoti sur in tene tamtamabat anun a taro na lotu tong o Epeses.

Una buk ri, o Pol i inanos o Timoti lena in tamtamabat a taro na lotu gusun a kum torotoro na tene ususer, sako det in ban laulau a nurnur anun a taro. I inanos kai una wakak na etowo, ma un osi na ngas na taro ra det in pilok pas det, sur det a kum tene pinapam na lotu, ma una wakak na petutna ra in muri.

A inawan ina Mugano Pas Timoti:

A turturkibin ina buk ri (1:1-2)

O Timoti in turbat a kum torotoro na etowo (1:3-20)

A kisapi na lotu (2:1-15)

A kum mugumugu na lotu (3:1-16)

O Timoti in tamtamabati ut, sur in napat a wakak na tene pinapam (4:1-16)

A etowo torom o Timoti una nun a pinapam (5:1-6:21)

¹ Iau o Pol, a aposel anun o Karisito Iesu, una itula anun o God, anundat a Tene Ulaun, ma o Karisito Iesu, o naro ra dat kis langlang suri nama nurnur. ² A tumus a pas ri torom ui Timoti, a nutunglik mulus una nurnur. A marmaris ma a wakak na petutna ma a balano molmol, tan o God a Tamandat ma o Karisito Iesu anundat a Labino in kis torom ui.

O Pol i inanos o Timoti sur in turbat a kum torotoro na etowo

³ Uniri a udekdek melet ui sur un kis ut tiro o Epeses, elar nami ra a sa watung tari tam, ra a wan utong o Masedonia. Un kis sur un turbat det ra det ususer a taro nam lako kum torotoro na etowo. ⁴ Ma gong det balon una kum etowo ororos kut, ma a kum utatos, ra katu ururopino. I ulabo i kut a wasiso na engaras, ma ke warut a pinapam anun o God. A pinapam anun o God i lubang kut una nurnur. ⁵ A watungi lenra, sur a marmaris in lubang epotor tandat etetalai. A marmaris ra, i wan tagun a tokodos na balandat, ma a wakak na nuknukin dat, ma a lingmulus

na nurnur. ⁶ A ramano taro det sa wan gisen gusun a kum wakak na petutna ri, ma det mur a kum wasiso ororos mukut. ⁷ Det nemi sur det in ususer a taro una kum Warkurai anun o God, ra det nuki lena det tasman wakaki, ikut ka det tasman mulus asau ra det wasiso uni.

⁸ Dat tasmani lena, a Warkurai anun o Moses i wakak, ra din papam wakak nami. ⁹ Dat tasmani lena, a Warkurai awu sur di pitari sur a kum tene tokodos, awu. Di pitari kut sur a ngas na taro lenri: det ra det lakai a kum warkurai, a kum tene rosumur, det ra ka det mur a petutna ra i wakak umatan o God, a kum tene sakino, det ra det dur umatan o God, det ra ka det ser ru o God, det ra det um doko a taro, det ra det um doko a kum tamtaman det o a kum nanan det, ¹⁰ det ra det pam a sakino nam tu ino anun taio o nam tu musano anun taio, a kum musano ra det nolin melet kut nama kum musano, det ra det pam sikot pas a taro sur det in siuru det, a kum tene torotoro, det ra det liliman torotoro, ma det rop ra det pam a kum utna ra ke elar nama tokodos na etowo anun o God. ¹¹ A tokodos na etowo i kis una Wakak na Wasiso, ra o God i pitar tari tang sur an wasiso talapor nami. A Wakak na Wasiso ri, i wan tagisapat tan o God, a God na minamar ra i dan tukum.

O Pol i watung ulabo a marmaris anun o God

¹² A watung wakak torom o Karisito Iesu anundat a Labino, ra i pitar tar a dekkek tang. A watung wakak toromi uni i nurnur un iau, ma i ubek tar iau sur an papam toromi. ¹³ Numugu a ser watung laulau o Iesu, a ban laulau a taro na nurnur ma a ukadik det. Ikut o God i maris iau, uni ka tasman asau ra a pami, ma ka nurnur utmakai. ¹⁴ Anundat a Labino i ese anun a labino marmaris torom iau, ra i pitar tar a nurnur ma a wakak na petutna torom iau. A etabor ri, i kibino un o Karisito Iesu.

¹⁵ I wan pirso urin una rakrakon bual sur in ulaun a kum tene sakino. A wasiso ri i lingmulus sakit, ma dat in nurnur uni. Ma iau, a laulau sakit tan a kum tene sakino rop. ¹⁶ Ikut o God i maris iau, sur o Karisito Iesu in ese anun a wowowon na petutna torom iau, ra a laulau sakit tan a kum tene sakino rop. I ulaun iau ma i unus ru anung a kum sakino petutna. Lenra, a wanpat a wakak na malalar, sur a taro det in tama asau ra o Iesu i pami un iau, ma det in nurnur un o Iesu, ma det in rakon a nilaun tukum. ¹⁷ Dat in pitar a urur ma a wasiso na ululabo torom a King ra i laun tukum,

ma ken mat, i ra ka dat tama i, ra i sot kut a God. A wasiso na ululabo toromi ken rop ma ken rop. Amen.

¹⁸ Timoti a nutunglik, a kum etowo ri ra a pitari tam, i elar nama wasiso na poropet ra di sa watung tari un ui ra det wararing un ui. Ra un mur a kum etowo ri, ui ara wakak na tene inaim nama Wakak na Wasiso. ¹⁹ Un tur dekdek una num a nurnur, ma un mur a wakak na nuknuk. A ramano taro ka det pami lenri, ra anundet a nurnur i puku elar nama sip ra a top i rapus regerege ru i. ²⁰ O Emeneus ma o Aleksanda aru tagun det, ma a sa pitari tar der ulaman o Satan, sur der in tasmani lena, gong melet mo der watung laulau o God.

2

A etowo una kisapi na lotu

¹ A mugano utna, a nemi sur a taro na nurnur det in wararing, nama niaring sur a utna det sibo suri, a niaring sur a taro, ma a niaring na watung wakak torom o God. Mot in wararing lenra sur a taro rop, ² ma sur a kum king ma a kum mugumugu rop, sur dat in kis wowowon nama malmal, ma dat in mur a petutna ra i wakak umatan o God, ma dat in urur torom o God. ³ Ra mot in pami lenri, in wakak sakit ra o God, anundat a Tene Ulaun, in gas nami. ⁴ I nemi sur in ulaun a taro rop, ma det in tasman a lingmulusino. ⁵ Uni ara God sot kut, ma ara sot kut kai ra i dat tomo o God ma a taro, a musano ri o Karisito Iesu, ⁶ i ra i pitari tar anun a nilaun sur in kul langolango pas a taro rop. Una du bung ra o God i sa kubus tari, o Iesu i ulingmulus a nemnem anun o God lena i nem na ulaun a taro rop. ⁷ Iri a kibino ra o God i pilok pas iau, sur an aposel ma an warawai nama Wakak na Wasiso, ma an ususer a taro ra awu sur a taro Juda nama nurnur mulus. A watung a lingmulus, awu sur a toro.

⁸ A nemi sur a kum musano una kum tamon det in wararing ma det in tulus a kum lamandet usapat netes, det in pitari tar det torom o God, ma gong det kankan ma gong det engaras.

⁹ A nemi kai sur a wardain det in emar nama malu ra i sot nama ememar anun a wardain. Det in emar nama ememar i upuaso a urur ma a wakak na ninunuk. Gong det iris a lorindet, gong det emar nama kum kamkabarar ra di pami nama gol o a kum wat ra a matandet i ka, ma gong kai det emar nama kum malu na ememar ra a matandet i ka. ¹⁰ A wardain ra det

watungi lena det ser lotu torom o God, det in emar nama kum wakak na pinapam.

¹¹ Ra a wardain det in los a etowo tagun a Buk Tabu, i wakak sur det in kis wowowon ma det in unatino pas det. ¹² Ka madek tar tu ino sur in ususer tu musano, ma ka madek tari kai sur tu ino in mugu tu musano. I wakak sur in kis wowowon kut. ¹³ Uni o God i ukis mugu o Adam ra numur o Iwa. ¹⁴ Awu sur o Adam ra o Satan i toro pasi. Awu! O Iwa kut ra o Satan i toro i ra i puku, ra i pam a sakino. ¹⁵ Din ulaun a wardain kibino una usus. Din ulaun det ra det ser tur dekdek una nurnur, ma una marmaris. Det ra, det ser mur a petutna ra o God i nemi, ma a petutna ra i sot sur a wardain det in muri.

3

A kum mugumugu na lotu

¹ A wasiso ri i lingmulus sakit, lenri: Ra taio i nemi sur in mugumugu na lotu, i nem a wakak na pinapam sakit. ² A magiran a mugumugu na lotu in lenri: gong tu etakun i kis uni, in nolin kut nam ara ino, in tumarong a magirano, in tamtamabat wakak anun a nilaun, i a ngas na musano ra a taro det ser urur uni, in ser gas pas a taro una nun a rumu, ma i a wakak na tene ususer. ³ Ma gong i tene ininum, gong i tene inaim, in tene malmal, ma gong i tene wasiso na kankan, ma gong i nem doko a mani. ⁴ I wakak sur in mugu wakak det tamtamano, ma in ususer a kum nutnutunu sur det in mur anun a wasiso nama urur. ⁵ A musano ra ke lason sur in mugu wakak det tamtamano, ken pet lar pasi kai sur in tamtamabat a taro na lotu anun o God. ⁶ Gong taio i mugumugu na lotu ra i nukpukus matok taru kut, sako in umuman labino, ra in puku, ma din warkurai i elar nam o Satan. ⁷ I wakak sur a mugumugu i a ngas na musano ra a taro kai ra ka det ser lotu, det ser ru i. Ra awu, det in watung suri una nun a kum sakino petutna, ma in iru unin nukun anun o Satan.

A kum tene warut una lotu

⁸ Lenkutkai ra torom a kum tene warut una lotu, i wakak sur det a kum ngas na musano ra a taro det ser urur un det, det in lingmulus una nundet a wasiso, gong det tene ininum ma gong det nemnem sur a labino mani. ⁹ Det in utur ukai a nurnur mulus ma a tokodos na ninunuk. ¹⁰ Din lar mugu tar det, ra numur, ra kataio in takun det un tu utna, din utur det maragom una pinapam na tene warut una lotu.

¹¹ Torom anundet a wardain kai in lenra, det a kum ngas na wardain ra a taro det ser ru det. Gong det wasiso eno, det in tumarong a magirandet, ma det in lingmulus una kum pinapam rop.

¹² A tene warut una lotu in nolin kut nam ara ino, ma in mugu wakak a kum nutnutunu, ma det rop una nun a rumu.

¹³ Det ra det papam wakak una pinapam na tene warut una lotu, a risandet in wakak, ma ka det in ngara sur det in wasiso puaso una nundet a nurnur un o Karisito Iesu.

A kibin anundat a nurnur

¹⁴ A nem na wanpat lakit torom ui, ikut a nuki lena, in wakak ra an tumtumus mugu torom ui. ¹⁵ Ra kan nanpat lakit, u sa tasman a kum ngas na petutna ra a taro anun o God det in pami epotor tandet. A taro na lotu anun o God, ra i laun, det elar nama pos ma a kibin a rumu ra i udekdek a lingmulusino. ¹⁶ A lingmulus, o God i upuaso mulusi lena, a etowo ra dat nurnur uni i labo sakit. I lenri:

O Karisito i wanpat a musano,
a Tokodos na Nion i upuaso i lena o Karisito
i tokodos umatan o God,
a kum ensel det tama i,
a wasiso puaso uni, i wan sarara torom a
taro tagun a kum gapman rop,
ma a susut una rakrakon bual det nurnur
uni,
i wan usapat ma i kis una minamar.

4

A kum torotoro na tene ususer

¹ A Tokodos na Nion i watung puaso i lena, una kum ururop na bung, lako taro det in nan gisen gusun a lingmulus na nurnur, ma det in mur a kum nion ra det ser torotoro, ma det in mur a kum etowo anun a kum laulau na nion. ² A kum etowo ri i wan tagitiro tan a kum tene torotoro, a taro ra ka det tama lele i mo a tokodos na petutna, uni a tokodos na ninunuk una nuknukin det i sa mat. ³ A ngas na taro ri, det turbat a nolin ma det turbat a taro sur gong det wan lako kum ngas na utna na inangon. A kum utna na inangon ra, o God i ukis tari sur din nani, ra a taro na nurnur ra det tasman a lingmulusino, det in watung wakak torom o God uni, ma det in nani. ⁴ Uni a kum utna rop ra o God i ukis tar det, det wakak, ra gong dat ngaran ru det. Dat in watung wakak torom o God uni, ra dat in nani. ⁵ Uni a wasiso anun o God ma a niaring der uwakak a utna na inangon sur in wakak umatan o God.

A wakak na tultul anun o Karisito Iesu

⁶ Ra un ususer a kum tistisim nama kum etowo ri, ui a wakak na tultul anun o Karisito Iesu. Una pinapam ri in talapor lena u labo pat una nurnur mulus, ma a wakak na etowo ra u muri. ⁷ Un nan gisen gusun a kum saksakutna ororos, ma a wasiso ra ke warut ui sur nilaun torom o God. Un ulason ui sur a magiram in wakak umatan o God. ⁸ Ra dat ulason a pinindat una wap, i warut a pinindat. Ikut ra dat ulason dat sur a petutna ra i wakak umatan o God, i warut dat una kum utna rop. Awu sur una nilaun kut ri, i warut dat kai una nilaun kura numur. ⁹ A wasiso ri a watungi, i lingmulus sakit, i wakak sur dat in nurnur uni ma dat in muri. ¹⁰ I mo ri dat papam dekdek, uni dat kis langlang nama nurnur sur o God, ra i laun, ma a Tene Ulaun anun a taro rop, ra det nurnur uni.

¹¹ Un inanos det ma un ususer det una kum utna ri. ¹² Gong u madek tar taio sur in tama pisopiso ui, uni u barman utmakai. Una num a wasiso, anum a petutna, anum a marmaris, anum a nurnur ma anum a tokodos na nilaun, un elar nama wakak na malalar, sur a kum tene nurnur det in pam murmuri. ¹³ Un dekdek nama luk a Buk Tabu torom a kum tene nurnur, ma nama warawai ma a etowo torom det, tuk an nanpat. ¹⁴ Gong u madek ru a etabar na Nion, ra di pitar tari tam, una du bung ra a kum poropet det wasiso na poropet, ma a kum mugumugu det ubek tar a kum lamandet sapat netes un ui.

¹⁵ Un ulason ui una kum pinapam ri. Un pitar tar anum a nilaun uni, sur a taro rop det in tama ui lena u lubang una num a nilaun torom o God. ¹⁶ Un tumarong anum a nilaun ma anum a etowo. Un tur dekdek un der, uni, ra un pami lenra, un ulaun pas ui ut, ma det kai ra det longoro ui.

5

A warut torom a kum ula

¹ Ra un ukodos tu musano ra a mugano tam, gong u wasiso na kankan, un wasiso wowon kut elar nami ra u pami torom o tamam. Un pam a wakak na petutna torom a kum barman elar nami ra u pami torom a kum tistisim. ² Un papam torom a kum ino ra a kum mugano tam, elar nami ra u pami torom o nam, ma un papam torom a kum toraro, nama tokodos na petutna, elar nami ra u pami torom a kum tistisim a kum ino.

³ Un warut a kum ula ra kataio i tamtamabat det ma det sibo. ⁴ Ikut, ra tu ula a

kum nutnutunu o a kum tumtubunu kura, i wakak ra det in upuaso mugu anundet a nurnur nama warut torom a kum kukundet, sur det in balu a marmaris anun a tamandet ma a nandet ma a kum tumtubun det. Ra det in pami lenra, o God in gas.⁵ A ula, ra kataio i tamtamabati ma i sibo mulus, i nurnur kut un o God ma i kis langlang sur in waruti. Una kum mirum ma a waspi, i ser wararing sur o God in waruti.⁶ Ikut, a ula, ra i nemi sur in gasgas oros kut, i laun, ikut a niono i sa mat.⁷ Un ususer a taro nama kum etowo ri, sur gong tu etakun i los det.⁸ Ra taio ke warut a kum kukunu, ma det kai ra tagun anun a rumu, i sa wan gisen gusun a nurnur. I ra i laulau sakit taun a taro ra ka det nurnur.

⁹ Un tumus ukai i kut a risan a kum ula ra a wonom na noino kilalo anundet, ma usapat, sur a taro na lotu det in warut det. Det in warut a ngas na ino ra i nolin pas kut nam ara musano,¹⁰ ra a taro rop det tasman anun a kum wakak na pinapam lenri: i ugu wakak a kum nat, i ser gas pas a taro una nun a rumu, i ser gos ru a kubus gusun a kikin a taro anun o God,* i ser warut a taro ra a kum mamaut i los det, ma i pitar taro anun a nilaun sur a kum wakak na pinapam rop.

¹¹ Ikut a kum ula ra ke wonom na noino kilalo utmakai, gong u tumus ukai a kum risandet. Uni, ra anundet a nemnem na nolin in katuttur melet, det in nan gisen gusun o Karisito.¹² Ra a warkurai anun o God in los det, uni det sa kutus anundet a mugano liliman torom o Karisito.¹³ Det in ukio anundet a kum du bung nama inawan tuptupukus una kum rumu. Ma det in wasiso eno, det in wasiso una utna ra awu sur anundet, ma det in watung a kum wasiso ra ke wakak sur det in watungi.¹⁴ A nemi sur a kum ula, ra det dekdek utmakai, det in nolin melet, det in usus melet, ma det in tamtamabat anundet a kum rumu, sur gong det pam tu utna ra anundat a kum ebar det in watung laulau dat uni.¹⁵ A ramano kum ula, det sa wan gisen ma det muri mukut o Satan.¹⁶ Ra tu ino a tene nurnur, ma tu ula kura una nun a kabotaro, i wakak sur in tamtamabati, sur gong a taro na lotu det balon uni. A taro na lotu det in balon kut una kum ula ra kataio sur in tamtamabat det ma det sibo mulus.

A wasiso una kum mugumugu

¹⁷ I wakak sur din pitar a urur ma a wakak na ikul torom a kum mugumugu na lotu ra det pam wakak a pinapam. Din

pami lenra torom det ra det papam dekdek una warawai ma a etowo.¹⁸ Uni a Buk Tabu i watungi lena, “Gong u ker bat a wan a karabau ra i pas rumrum a wit, i kai in nanganon ut.” *Lo 25:4*

Ma i watungi kai lena, “I wakak sur a tene pinapam in losi ut anun a ikul.” *Lk 10:7*

¹⁹ Gong u longoro tu etakun un tu mugumugu ra ara kut i takuni. Ra lako ru o lako tul detul in takuni, ma longoro a etakun ra.²⁰ Ra tu mugumugu in pam a sakino petutna, un ukodosi umatan a taro na lotu rop, sur in utumarong lako taro kai tagun det.²¹ A wasiso dekdek torom un umatan o God ma o Karisito Iesu ma a kum ensel ra o God i pilok pas det, sur un mur a kum wasiso ri, ma un pam a takano petutna kut torom a taro rop, ma gong u tur takano papor.²² Gong u ubek lakit aru lamam netes un taio ma u wasiso udani sur a pinapam anun a Labino. Ma gong u mur a taro una sakino petutna. Un tumarong anum a nilaun sur in tokodos.

²³ Gong u inum a danim kut, un inumi kai lakalik wain sur in warut ui una misait ra kura unin balam, uni u misait liklik nami.

²⁴ A ramano taro, ra kabaut det wanpat una kinkinis na warkurai, di sa tama lele mugu anundet a sakino petutna. Ikut a sakino petutna anun ara taro kai, kataio in tama lele lakiti, numur ut in nanpat talapor.²⁵ Lenkutkai ra, una kum wakak na pinapam. A kum wakak na pinapam anun a ramano taro i sa wanpat talapor. Ikut, anun ara taro kai, ka din tama lele i uniri, numur ut in nanpat talapor.

6

A etowo torom a kum tene ititula

¹ Det ra a kum tene ititula, det in urur torom anundet a kum mugumugu, sur gong taio i watung laulau a risan o God ma anundat a etowo.² Ma det ra anundet a mugumugu a tene nurnur, gong det rosumur gusuni, uni det tasmani lena det taro tistisino una nurnur. Det in ser mur wakak anun a wasiso, uni anundet a pinapam in warut a tene nurnur, ra det ser nemi. Timoti, un ususer det ma un udekdek det nama kum etowo ri.

A nemnem sur a mani

³ Ra taio in ususer a taro nam tu se etowo, ra ke elar nama etowo mulus anun anundat a Labino o Iesu Karisito, ma ke elar nama kum etowo ra i warut det, sur a magirandet in wakak umatan o God,⁴ a ngas na musano ra, i ulabo pasi ut, ma ke

* **5:10:** A petutna anun a taro Juda i lenri: ra tu usiro in ruk una rumu, ma a kikino i kubus, a tultul in gosi. **5:13:**

2 Tes 3:11 **5:14:** 1 Kor 7:9 **5:18:** 1 Kor 9:9; Mt 10:10 **5:19:** 2 Kor 13:1 **5:20:** Ep 5:11 **6:1:** Ep 6:5

6:2: Plm 1:16 **6:3:** Gal 1:6-9

tasman tu utna. Anun a laulau na nemnem sur a wasiso na engaras, ma a inaim na wasiso, i elar nama misait toromi. Anun a petutna ra, i pam pat a kum ngasino lenri: a nuknuk laulau sur a utna anun taio, a engaras, a emang, a nuknuk laulau torom a taro. ⁵ A ngas na taro ri, det ser pam pat a purpuruon, a nuknukin det ke tokodos, ma det rosumur gusun a lingmulusino. Det nuki lena, ra det in mur a petutna ra i wakak umatan o God, a petutna ra, in pam pat a mani sur det in tene ululeng.

⁶ Ikut ra dat mur a petutna ra i wakak umatan o God, tomo nama gasgas un asau ra o God i etabor nami, i ra a ululeng mulus. ⁷ Ra dat wanpat nin una rakrakon bual ka dat los tu utna, ma ra dat in milet, ka dat in los tu utna kai taginin. ⁸ Ra andat a utna na inangon ma anundat a kum malu kai kuri i kis, asau ra dat in nuknuk melet suri? A nuknukin dat in mana. ⁹ Ma det ra det nem a labino mani, det in puku una ululam, ma det in iru unin nukun, ma a kum nemnem ororos kut, ma a nemnem sur a utna ra, in ban laulau det. Ra in woro pirso a susut na taro una minat ma a iniru tukum. ¹⁰ Uni a nemnem sur a mani, i a kimkibin a wur matano sakino petutna. Ma a ramano taro ra det ngara suri, det sa wan gisen gusun a nurnur, ma det ban laulau anundat a nilaun nama susut na mamaut.

O Pol i udekdek o Timoti una pinapam na lotu

¹¹ Ikut ui, Timoti, ui a musano anun o God, un nan gisen gusun a kum utna ri. Un dekdek sur un mur a tokodos na petutna, ma a petutna ra i wakak umatan o God, a nurnur mulus, a marmaris, a tuntunur dekdek, ma a wowowon na petutna. ¹² Un tur dekdek una nurnur elar nama wakak na tene inaim. Ma un pam ukai a nilaun tukum. A nilaun ra o God i kabo pas ui suri, ra u wasiso talapor uni umatan a susut na taro. ¹³ A inanos ui umatan o God, i ra i pitar a nilaun torom a kum utna rop, ma umatan o Karisito Iesu i ra i wasiso talapor uni ut umatan o Pontias Pailat. A inanos ui lenri: ¹⁴ Un mur a kum wasiso ri, ma gong u pam tu utna ra taio in takun ui uni, tuk una bung ra anundat a Labino o Iesu Karisito in nanpat melet. ¹⁵ Ra a bung in sot, o God ut in tulu ru i sur in nanpat melet. O God ara sot kut, a labino Tene Warkurai ma i dan tukum, a King anun a kum king, ma a Labino anun a kum lamlabino. ¹⁶ I sot kut i laun tukum, ra i kis una labino talapor ra kataio in nan milau nisano. Kataio utmakai i tama tari ma ka din tama lar pasi. Din

pitar tar a labino urur toromi, ma i utur ukai a labino dekdek ra ken rop ma ken rop. Amen.

¹⁷ Un utumarong det ra det ululeng nin una rakrakon bual sur gong det ulabo pas det ut, ma gong det nurnur una mani ra i ser rop kut. Det in nurnur kut un o God, ra i ser tabor dat nama kum wakak na utna rop sur dat in gas nami. ¹⁸ Un inanos det sur det in pam a wakakino, ma det in bukus nama kum wakak na pinapam, det in ser etabor, ma det in ser isuaro a utna kai torom lako taro. ¹⁹ Ra det in pami lenri, det in utur ukai a ululeng mulus. I ra a wakak na kibin anundet a nilaun numur, sur det in los a nilaun ra a nilaun mulus.

²⁰ Timoti, un tamtamabat wakak a pinapam ra o God i pitar tari tam. Un nan gisen gusun a kum wasiso ororos kut, ra ke elar nama nemnem anun o God, ma gusun a wasiso na engaras una utna di watungi nama "mananos", ikut awu sur a mananos mulus. ²¹ A ramano taro det watungi lena det tasmani ut a mananos ra, ra det sa wan gisen gusun a nurnur un o Iesu.

A marmaris anun o God torom mot.

A Manru na Pas anun o Pol torom o Timoti

A wasiso talapor mugu

A buk ri a manru na pas anun o Pol torom o Timoti. O Pol i tumusi ra i kis una karabus tong o Rom. O Timoti i a tene pinapam tomo nam o Pol ma numur i wanpat ara mugumugu na lotu tong o Epeses.

O Pol i tasmani lena milau mo in mat, ra i tumas a pas ri. I nemi sur in udekdek a nurnur anun o Timoti. I inansi kai lena, gong i mana gusun a warawai nama Wakak na Wasiso.

A inawan ina Manru na Pas Timoti:

A turturkibin ina pas ri (1:1-2)

O Pol i gas un o Timoti ma i nemi sur in dekdek una pinapam (1:3-2:13)

A magiran a lingmulus na tene pinapam (2:14-26)

A magiran a taro una kum ururop na bung (3:1-9)

O Pol i udekdek o Timoti (3:10-4:5)

O Pol i wasiso uni ut (4:6-18)

A ururop na wasiso anun o Pol torom o Timoti (4:19-22)

¹ Iau o Pol, a aposel anun o Karisito Iesu una nemnem anun o God, sur an wasiso talapor una nilaun ra i sa uliliman tari torom dat un o Karisito Iesu. ² A tumus a pas ri torom ui Timoti, a wakak na nutunglik una nurnur. A marmaris ma a wakak na petutna ma a malmal, tan o God a Tamandat ma o Karisito Iesu anundat a Labino, in kis tomo nam ui.

O Pol i udekdek a nurnur anun o Timoti

³ Una kum mirum ma a waspi, a ser wararing sur ui, ma a ser watung wakak torom o God. I ra a papam toromi nama tokodos na ninunuk, elar nama kum tum-tubung tagun numugu. ⁴ A nuk melet pasi ra u tangis iau, ma a nem doko i sur an tama ui sur an bukus nama gasgas. ⁵ A nuk pas anum a lingmulus na nurnur, ra i elar nama nurnur anun aru ino ri, o tubum o Lois ma o nam o Unis. A tasmani lena a ngas na nurnur ra, kura kai un ui. ⁶ I mo ra a inanos ui melet sur un ukatutur melet anum a etabor, elar nama sungun ra di wupi ra i kunabor. A etabor ra, o God i tabor ui nami una bung ra a ubek aru lamang netes un ui. ⁷ Uni o God ke tabor dat nama nion na nginara, awu. I tabor dat nama Tokodos na Nion ra i pitar a dekdek torom dat, ma a marmaris ma a petutna ra

ara taktakai in tamtamabat wakak anun a nilaun.

⁸ Gong u maimai sur un wasiso talapor una nundat a Labino, ma gong u maimai un iau, ra uniri a kis una karabus una risano. Ikut, un waninar sur ui kai, un taramo a ngunungut una Wakak na Wasiso tomo nam iau. Ra un taramo a ngunungut, o God ut in pitar a dekdek torom ui. ⁹ I ut i sa ulaun pas dat, ma i kabo pas dat sur a nilaun ra katu dur uni. Awu sur i kibino una nundat a kum wakak na pinapam, awu. I kibino ut una nun a nemnem, ma anun a marmaris, ra i pitar tari torom dat un o Karisito Iesu. Numugu utmakai, ra ke ukisi utmakai a rakrakon bual, i maris mugu dat. ¹⁰ Ra uniri, dat sa tama a marmaris anun o God torom dat, una inawan pat anun anundat a Tene Ulaun, o Karisito Iesu, i ra i urop ru a minat. Ma una Wakak na Wasiso, i upuaso a nilaun tukum sur in nanpat talapor.

¹¹ O God i sa pilok pas iau sur an tene warawai nama Wakak na Wasiso, an aposel ma an tene ususer kai uni. ¹² Iri a kibino ra a taramo a ngunungut lenri. Ikut, ka maimai, uni a tasman o naro ra a nurnur uni, ma a tasman mulusi lena, in pet lar pasi sur in tamtamabat a pinapam, ra i sa pitar tari tang, tuk una bung na warkurai.

¹³ A tokodos na etowo ra a sa ususer tar ui nami, i elar nama wakak na malalar sur un muri. Un muri tomo nama nurnur ma a marmaris. A nurnur ma a marmaris anundat, ra kura dat un o Karisito Iesu. ¹⁴ Una dekdekin a Tokodos na Nion ra i kis un dat, un tamtamabat wakak a Wakak na Wasiso ra o God i sa pitar tari tam.

¹⁵ U tasmani lena a taro rop, ra det kis una papor Asia, det sa wan pas gusun iau. O Pigelus ma o Emogenes aru tagun det. ¹⁶ A wararing sur o God in maris o Onesiporus det tamtamano, uni i ser ugargas iau, ma ke maimai un iau ra a kis una karabus. ¹⁷ Ra i wanpat tong o Rom i sisio nanan ut sur iau, tuk i sio pas iau. ¹⁸ A wararing sur a Labino in maris o Onesiporus una bung na warkurai. U sa tasman wakak a kum pinapam na warut ra i sa pam tari torom iau tiro o Epeses.

2

A wakak na tene inaim anun o Karisito Iesu

¹ Timoti, o nutunglik una nurnur, un tur dekdek una marmaris anun o God, ra dat losi tan o Karisito Iesu. ² A kum etowo ra u sa longoro pasi tang umatan a susut na

taro, un ususer lako taro nami. A taro ra u nurnur un det lena det in pet lar pasi sur det in ususer lako taro kai nami. ³ Un tur tomo nam met una kum mamaut, elar nama wakak na tene inain anun o Karisito Iesu. ⁴ A wakak na tene inain ken balon una kum pinapam anun a taro oros kut, awu. In pami ut anun a pinapam sur in ugargas anun a mugumugu. ⁵ Lenkutkai ra, a tene kinalabor ra i kalabor una ililu, ken los tu ikul ra ke mur a kum warkurai ina ililu. ⁶ A tene minarut ra i papam dekdek, i ut in pasong mugu a win ana kinobot ra in taka. ⁷ Un ser nuk ukai a kum wasiso ri a tumusi torom ui, uni a Labino ut in utalapor a kukuraino torom ui.

⁸ Un nuk pas o Iesu Karisito, i ra tagun a kabotaro anun o Dewid, ra i katutur melet gusun a minat. Iri a Wakak na Wasiso ra a warawai nami. ⁹ Ma a taramo a ngunungut, ma di ker iau elar nama tene sakino, uni a warawai nama Wakak na Wasiso. Ikut, a wasiso anun o God ka din turbat lar pasi. ¹⁰ I mo ra a taramo a kum ngunungut, ikut a tur dekdek ut, sur det ra o God i sa pilok pas det, det kai det in nurnur un o Karisito Iesu ma in ulaun pas det, ma det in los a minamar tukum. ¹¹ A wasiso ri an watungi tam, i lingmulus sakit:

Ra dat in mat tomo nam o Karisito Iesu,
dat in laun tomo kai nami.

¹² Ra dat in taramo a ngunungut tomo nami,
dat in warkurai tomo utkai nami una nun a matanitu.

Ra dat in ipul ru i,
i kai in ipul ru dat kut.

¹³ Ra ka dat in pam sot pas anundat a liliman sur dat in mur o Karisito Iesu,
i ut in tur dekdek una nun a liliman,
uni ken pet lari sur in kutus anun a liliman.

A lingmulus na tene pinapam

¹⁴ Gong u mana nama wasiso torom anum a taro nama kum etowo ri. Un utumarong det umatan o God lena, gong det engaras una kum wasiso, uni ke gas un tu utna, ma in ban laulau det ra det longoro i.

¹⁵ Un pitar tar ui ut torom o God ma un dekdek sur ui a lingmulus na tene pinapam, ra o God in gas nami. A tene pinapam ra ke ser maimai una nun a pinapam, ma i palos kodos a lingmulus na wasiso. ¹⁶ Un nan gisen gusun a kum wasiso ra ke sot nama nemnem anun o God, uni a taro

ra det balon una ngas na wasiso lenra, det in nan bakbak ma det in bakbak doko gusun o God. ¹⁷ Anundet a etowo in nan sarara elar nama laulau na inangon ra i tangangos nanan. O Emeneus ma o Piletus aru tagun det, ¹⁸ ra der sa wan raro gusun a lingmulus. Der watungi lena, dat sa katutur melet gusun a minat. A wasiso ri anunder, i ban laulau a nurnur anun a ramano taro.

¹⁹ Ikut, o God i sa ubek tar a kibin a nurnur ra ken tugunu, ma di sa tumus tar a wasiso uni lena, "A Labino i tasman det ra anunu."

Nam 16:5
Ma di sa tumus tari kai lena, "I ra i watungi lena i anun a Labino, in nan gisen gusun a sakino petutna."

²⁰ Un ara labino rumu, a kum ngas na dis kura det kis. A ramano di pam det nama silwa ma nama gol, ma a ramano kai di pam det nama duwai ma nama piopap. A ramano kum dis sur a kum lamlabino bung kut ma a ramano kai sur a kum dur na utna kut. ²¹ Ra taio in utalapor pas anun a nilaun gusun a kum dur na petutna, in elar nama dis tagun a kum lamlabino bung. Uni, i, anun a Labino, ra a Labino in papam una nun a nilaun sur in pam a pinapam anun a Labino, ma i sa kis waninar sur in pam a kum wakak na pinapam.

²² Un nan gisen gusun a kum nuknuk na barman, ma un mur a tokodos na petutna, ma a nurnur, ma a marmaris ma a malmal, tomo nam det ra det ser wararing torom a Labino nama tokodos na nuknukin det.

²³ Un nan gisen gusun a kum wasiso ororos ra katu kukuraino, uni det in ukatutur a kum wasiso na engaras. ²⁴ A tultul anun a Labino gong i ser engaras, ikut in wakak na tene ususer, in pam a wakakino torom a taro rop, ma in ese anun a wowowon na petutna torom a taro ra i ukodos det. ²⁵ Det ra ka det nem anun a etowo, in ukodos wowowon det, sako o God in mulaot pas det sur det in nukpukus, ma det in tasman a lingmulusino. ²⁶ Numur det in nuknuk wakak, ra det in pirsu gusun in nukun anun o Satan, ra det sa iru taru uni, ma det ser muri.

3

A magiran a taro una kum ururop na bung

¹ Un nuk ukai a kum wasiso ri: Una kum ururop na bung, a kum dekdek na mamaut in nanpat. ² A taro det in nuk pas det ut, ma det in nemnem sur a mani, ma det in

warango pas det, ma det in ulabo pas det ut, ma det in emang, ma det in pitarngat torom a kum tamtaman det ma a kum nanan det, ma ka det in lason sur det in watung wakak torom o God ma torom a taro kai, ma det dur umatan o God. ³ Ma ka det in tasman a marmaris, ma ka det in nuk dumano a sakino anun ara, ma det in ban laulau a risan ara, ma ka det in tamtamabat wakak anundet a nilaun, ma det in waim ma det in ban laulau a taro, ma ka det in nem a wakakino. ⁴ Det in usobor a kum paspasan det, det in pam a kum tuptup na petutna, det in ulabo pas det ut, det in nem doko a gasgas tagun a rakrakon bual, ma ka det in nem o God. ⁵ Det in mur a petutna ra i wakak umatan o God una pinindet kut, ikut ka det in nem a dekdekino. Un nan gisen gusun a ngas na taro ra.

⁶ A kum ngas na musano lenra, det in ruk oros kut una kum rumu, ma det in ungonos oros pas a wardain sur det in mur det. A wardain ra, katu wakak na nuknukin det, ra det pot na marmaris una nundet a kum sakino petutna, ma anundet a kum sakino nemnem i ben raro det. ⁷ A wardain ri det ser etowo a kum bung rop, ikut ka det tasman lar pas a lingmulusino.

⁸ A kum ngas na musano lenra, det turbat a lingmulus na etowo, elar nam o Janes ma o Jambres der turbat o Moses. A nuknukin det i laulau doko ma anundet a nurnur awu sur i lingmulus. ⁹ Ikut anundet a pinapam ken lubang, uni anundet a tuptup na petutna in talapor umatan a taro rop, elar nami ra a taro numugu, det tama lele pas a tuptup na petutna anun o Janes ma o Jambres.

O Pol i udekdek o Timoti una nun a nurnur ma anun a pinapam

¹⁰ Ui Timoti, u sa tasman rop anung a kum etowo, a magirang, a kum utna ra a ngara suri, anung a nurnur, anung a kink-inis wowowon, anung a marmaris, anung a tuntunur dekdek una kum ngunungut, ¹¹ anung a kum mamaut, ma a kum ngu-nungut ra a taramo i. U tasman rop a kum lamlabino ngunungut ra a taramo i tong una tulu tamon ri: o Antiok, Aikoniam ma o Listra. Ikut a Labino ut i ulaun pas iau gusun a kum utna ri. ¹² Ma i lingmulus, det rop ra det laun un o Karisito Iesu ma det nem na mur a nilaun elar nama nemnem anun o God, a taro det in ban laulau det ut. ¹³ A sakino taro ma a kum tene torotoro det in laulau, ma det in laulau sakit. Det in toro a taro, ma det in toro pas det utkai.

¹⁴ Ikut ui, Timoti, un tur dekdek una etowo ra di sa ususer tar ui nami, ma u sa nurnur dekdek uni, uni u tasman wakak anum a kum tene ususer, ¹⁵ ma u tasman a Buk Tabu turpasi ra u natlik utmakai. A Buk Tabu i utalapor a nuknukim, sur un nurnur un o Karisito Iesu, ra o God in ulaun pas ui. ¹⁶ A kum du wasiso rop una Buk Tabu i kimkibino ut tan o God, ma i wakak sur in ususer a taro, ma sur in upuaso a sakino anun taio toromi ut, ma in ukodos a kum niraro, ma in ususer a taro una tokodos na petutna. ¹⁷ A Buk Tabu i waninar a taro anun o God sur det in pam a kum ngas na wakak na pinapam rop.

4

¹ O Karisito Iesu in nanpat urin nama nun a matanitu, ra in warkurai elar nama king. In warkurai det ra det laun, ma det ra det sa mat. I mo ra, a saring ui umatan o God ma o Karisito Iesu lena: ² Un warawai nama Wakak na Wasiso. Un dekdek uni, una kum bung ra a taro det nem na longoro ui, ma a kum bung ra ka det nemi. Un ukodos wakak a taro, un upuaso anundet a kum niraro torom det ma un uragot det. Un pam a kum utna ri nama wowowon na petutna torom det ma un ususer wakak det. ³ Uni, a bung in nanpat, ra a taro ka det in nemi mo a tokodos na etowo. Ma una nundet a kum nemnem, det in ben tomo a susut na tene ususer torom det, sur det in ususer det un asau ra det nem na longoro i. ⁴ Ka det in longoro a lingmulusino mo, det in longoro i mukut a kum wasiso ororos kut. ⁵ Un nuknuk wakak una kum bung rop. Ra un taramo a kum mamaut, un tur dekdek ut. Un dekdek nama warawai una Wakak na Wasiso, ma un pam sot pas anum a kum pinapam rop, ra o God i sa pitar tari tam.

⁶ Uni i sa milau mo sur an mat ma a gaping in tilingis. In elar nama wain ra di lingisi una utna ra di tuni sur a etabor torom o God. ⁷ A sa pam sot pas anung a wakak na inaim ma anung a kinalabor una ililu, ma a sa mur sot pas a lingmulus na nurnur. ⁸ O God i sa ubek tar anung a ikul, uni anung a nilaun i tokodos umatano. A Labino, a tokodos na Tene Warkurai in pitari tang una bung na warkurai. Ma awu sur torom iau kut, in pitari kai torom det rop ra det kis langlang nama labino nemnem sur anun a inawan pat melet.

O Pol i itula sur o Timoti ra i wasiso una nun a nilaun

⁹ Un dekdek sur un nan lakit urin torom iau, ¹⁰ uni o Demas i sa wan pas gusun iau, uni i nem a kum utna tagun a rakrakon bual, ra i sa wan utong o Tesalonaika. O Kresens i wan utong una papor Galesia ma o Taitus i wan utong una papor Dalmatia. ¹¹ O Luk mukut kuri nisang. Un ben pas o Mak ra mur in nan urin, uni in warut iau una nung a pinapam. ¹² A sa tulu ru o Tikikus utiro o Epeses. ¹³ Ra un nan urin, un los anung a saket, kura a wan gusun tari nisan o Karpus tong o Troas. Un losi utkai anung a kum buk, ma gong u dumano a ramano ra di pami nama pinin a wewegua. ¹⁴ O Aleksanda, a tene pam ututna nama aen, i pam a susut na sakino petutna torom iau. A Labino ut in balu i toromi. ¹⁵ Un tumarong ui gusuni, uni i turbat dekdek anundat a etowo.

¹⁶ A mugano du bung ra a tur una warkurai ma a wasiso bat iau, kataio i tur warut iau, det wan rop pas kut gusun iau. A wararing lena o God gong i balu anundet a petutna. ¹⁷ Ikut a Labino i warut iau, ma i udekdek iau sur an pam sot pas a warawai nama Wakak na Wasiso, ma a taro rop ra awu sur a taro Juda det in longoro i. Det nem na um doko iau, ikut a Labino i ulaun pas iau. ¹⁸ A Labino in ulaun iau gusun a kum sakino utna rop ra det nem na pami un iau, ma in ukis iau una nun a matanitu sapat una langit. Dat in watung ulabo pasi, ken rop ma ken rop. Amen.

A ururop na wasiso na marmaris

¹⁹ Un pitar anung a marmaris torom o Prisila ma o Akuila, ma det ra kura det kis tomo una rumu anun o Onesiporus. ²⁰ O Erastus munung i kis sikot tong o Korin, ra a wan pas bulung gusun o Tropimus tong o Miletus, uni i misait. ²¹ Un dekdek sur un nan urin ra ken kalang na kotokoto utnakai.

O Iubulus, o Pudens, o Linus, o Kaludia ma a kum tistisin dat rop una nurnur, det pitar anundet a marmaris torom ui.

²² A Labino in kis una niom. A marmaris anun o God in kis torom mot.

A Pas anun o Pol torom o Taitus

A wasiso talapor mugu

A buk ri o Pol i tumusi torom o Taitus. O Taitus awu sur a te Juda. I longoro a warawai anun o Pol, ra i nukpukus, ma i nurnur un o Iesu Karisito. O Taitus i wan tomo nam o Pol usapat o Jerusalem, ma a kum aposel rop det kis tomo (tama Ap 15:2). O Pol i tulu ru o Taitus utong o Korin aru dino (tama 2 Kor 7:6-7 ma 8:17). Numur o Pol i pilok pas o Taitus sur in tene tamtamabat una lotu tong una ailan Krit (tama o Taitus 1:5).

Una buk ri o Pol i inanos o Taitus un asi na ngas na taro din pilok pas det, sur det a kum tene pinapam na lotu. Ma i inanos kai lena, in tamtamabat a lotu gusun a kum torotoro na tene ususer, ma in ususer wakak a kum taro na lotu nama wakak na petutna.

A inawan ina Pas Taitus:

A turturkibin ina buk ri (1:1-4)

A kum mugumugu na lotu (1:5-16)

A etowo torom a taro na lotu (2:1-15)

A wakak na petutna sur dat in muri (3:1-11)

A ururop na wasiso anun o Pol torom o Taitus (3:12-15)

¹ Iau o Pol, a tultul anun o God ma a aposel anun o Iesu Karisito, sur an warut a nurnur anun a taro na pipilok anun o God, ma an ususer det sur det in tasman a lingmulusino. A lingmulusino ra in ben det sur det in mur a petutna ra i wakak umatan o God. ² A nurnur ra, ma a tastasman ra, i wanpat tagun a kinkinis langlang nama nurnur sur a nilaun tukum. A nilaun tukum ra o God i uliliman taru nami, ra ke ukisi utmakai a rakrakon bual. Ma o God ke ser toro. ³ Ra a du bung i sa sot, i upuaso anun a wasiso ra met warawai nami. O God a Tene Ulaun anundat, i pitar tar a pinapam na warawai tang elar ut nami ra i sa watung tari.

⁴ A tumtumus torom ui Taitus, a nutunglik ra anundar a nurnur i elar. A marmaris ma a malmal tan o God a Tamandat, ma o Karisito Iesu anundat a Tene Ulaun, in kis tomo nam ui.

A kum mugumugu na lotu

⁵ A wan gusun ui tiro una ailan Krit, sur ui mo un urop a kum pinapam ra ke rop utmakai, ma un pilok pas lako kum mugumugu na lotu, una kum tamon rop,

elar nami ra a sa watung tari tam. ⁶ Ra un pipilok, un pilok pas taio ra katu etakun kura uni, i nolin kut nam ara ino, ma a kum nutnutunu det a kum tene nurnur, ma katu wasiso i los det un tu petutna, ma ka det ser pitarngat. ⁷ I wakak ra a mugumugu na lotu, i a ngas na musano ra katu etakun kura uni, uni i ut a tene tamtamabat una kum pinapam anun o God. Gong i ulabo pasi, gong i ser kankan lakit, gong i tene ininum, gong i tene inaim, ma gong i nemnem sur a susut na mani. ⁸ In ser gas pas a taro una nun a rumu, ma in nemnem sur a wakak na petutna, in tamtamabat wakak anun a nilaun, in tene tokodos, in tokodos umatan o God, ma in warkurai wakak anun a nilaun. ⁹ In pam ukai a lingmulus na wasiso ra di sa ususer tari nami, sur in uragot a taro una tokodos na etowo, ma in watung puaso a niraro anundet ra det turbat a Wakak na Wasiso.

A wasiso na warut torom o Taitus una nun a pinapam

¹⁰ Un pilok pas lako kum mugumugu na lotu, uni a susut na taro a kum tene pitarngat. Det ser wasiso una kum utna oros kut, ma det ben raro a nuknukin a taro. Ara taro tandet ra an utumarong ui un det, det ra det watungi lena, din tok talilis a pinin a taro ra awu sur a taro Juda. ¹¹ Un turbat anundet a kum wasiso, uni det ser ban laulau a nurnur anun a susut na kamkabo tamano nama kum etowo, ra ke wakak sur din ususer det nami. Det ser ususer det kut lenri sur det in toro pas a mani gusun det. ¹² Ara poropet tagun a taro Krit ut, i watungi lenri, "A taro Krit, a kum tene torotoro mulus, a kum laulau na kuabor, a kum tabalamat na taro ra tagun a inangon kut." ¹³ A wasiso ri un det i lingmulus ut. I mo ra un wasiso dekkekk torom det una nundet a kum niraro, sur det in pam ukai a tokodos na nurnur, ¹⁴ ma gong mo det mur a kum etowo oros kut anun a taro Juda, ma a kum warkurai anun a taro ra ka det nem a lingmulusino. ¹⁵ A kum utna rop i tokodos torom det ra det tokodos, ikut torom det ra ka det tokodos ma ka det nurnur, a kum utna rop kai ken tokodos. A balandet i laulau doko, ma katu tokodosino tiro una nuknukin det. ¹⁶ Det watungi lena, det tasman o God, ikut anundet a kum pinapam ut i upuaso i lena, ka det tasmani. Det a kum sakino taro doko, a kum tene pitarngat, ma ka det in pam lar pas tu wakak na pinapam.

2

A tokodos na etowo

¹ Ikut ui, un ususer det nama sau ra i mur wakak a tokodos na etowo. ² Un ususer a kum musano ra a kum mugano tam, sur det in tumarong a magirandet, det in los a ngas na nilaun ra a taro det in ru det uni, det in tamtamabat wakak anundet a nilaun, det in lingmulus una nundet a nurnur, anundet a marmaris ma anundet a tuntunur dekdek ra det etorom a mamaut.

³ Lenkutkai ra, un ususer a kum wardain ra a kum mugano tam, sur det in lason una kisapi na urur una nundet a nilaun, gong det emang, gong det tene ininum, ikut det in ususer a taro nama sau ra i wakak. ⁴ Det in pami lenra sur det in ususer a kum wardain numur tandet, sur det in nem anundet a kum musano ma a kum nutnutun det, ⁵ det in tamtamabat wakak anundet a nilaun, det in mur a tokodos na petutna, det in lason una pam a kum pinapam tiro una rumu, det in lason sur det in pam a wakakino torom a taro, ma det in ru anundet a kum musano, sur gong taio i watung laulau a wasiso anun o God.

⁶ Lenkutkai ra, un uragot a kum barman, sur det in tamtamabat wakak anundet a nilaun. ⁷ Una kum utna rop ra u pami, un pam a wakakino, sur a wakak na etowo torom det. Ra u ususer det, un papam nama lingmulus, ma a urur. ⁸ Un watung a tokodos na wasiso ra kataio in pukus ui uni, sur det ra det turbat ui det in maimai, uni ka dat pam tu sakino sur det in watung laulau dat uni.

⁹ Un inanos a kum tene ititula sur det in taromlu anundet a kum mugumugu una kum utna rop, ma det in ugargas det nama kum pinapam rop ra det in pami, ma gong det balu wasiso. ¹⁰ Gong det wolong anundet a kum mugumugu. Det in upuaso anundet a wakak na petutna, sur anundet a kum mugumugu det in nurnur un det, sur in upuaso i lena, a etowo un o God a Tene Ulaun anundat i wakak.

¹¹ Uni a marmaris anun o God i sa wanpat puaso. Una marmaris ra, o God i papos a kisapi sur in ulaun pas a taro rop. ¹² A marmaris ri i ususer dat, sur dat in nan gisen gusun a kum petutna ra ke sot nama nuknukin o God, ma gusun a kum nemnem sur a kum utna tagun a rakrakon bual, ma dat in tamtamabat wakak anundat a nilaun, dat in tokodos, ma dat in laun murmur a nuknukin o God una nilaun ri, ¹³ ra dat kis langlang nama nurnur sur a

bung na gasgas ra in nanpat. A bung ra anundat a Labino o God, o Iesu Karisito, a Tene Ulaun anundat in nanpat nama nun a minamar. ¹⁴ I pitar tar anun a nilaun sur dat, sur in kul langolango pas dat gusun anundat a kum sakino petutna rop, ma in gos talapor pas dat, sur dat anun a taro mulus ut, ra dat nem doko i sur dat in pam a kum wakak na pinapam.

¹⁵ Un ususer det nama kum wasiso ri. Un uragot a taro, ma un watung puaso anundet a niraro umatandet. Un pami nama dekdek ra kura torom ui. Ma gong u madek tar taio sur in tama pisopiso ui.

3

A ngas na nilaun, ra a te Karisito in muri

¹ Un inanos melet anum a taro sur det in urur torom a kum mugumugu tagun a gapman, ma torom det rop ra a warkurai kura un det. Det in mur anundet a kum wasiso, ma det in kis na waninar sur det in pam a kum wakak na pinapam. ² Gong det emang, det in balano molmol, det in pam a wakakino torom a taro, ma det in unatino pas det torom a taro rop.

³ Uni dat kai numugu, ka dat mananos, dat a kum tene pitarngat, dat wan raro, dat karabus una nundat a kum laulau na nemnem, ma a wur ngas na utna rop ra dat gas suri. Una nundat a kinkinis na nilaun dat pam a kum sakino, ma dat nuknuk laulau sur a utna anun taio, ma dat nget etetalai dat.

⁴ Ikut, ra a wakak na petutna ma a marmaris anun o God, a Tene Ulaun anundat i wanpat, ⁵ i ulaun dat. Awu sur un lako kum tokodos na pinapam ra dat sa pam tari, awu. I ulaun dat uni i maris dat. I ulaun dat ma i rus talapor dat. A utalapor ra, a Tokodos na Nion i pami una nundat a nilaun, ra i usus matok dat, ma anundat a nilaun i wanpat matok uni. ⁶ O God i tabor dat nama Tokodos na Nion, ra i lingis orosi kut sapat netes un dat, kibino una pinapam anun o Iesu Karisito, anundat a Tene Ulaun. ⁷ I ulaun dat, sur dat in rakon a nilaun tukum, ra dat kis langlang suri nama nurnur. Ra i ulaun dat, i watung dat lena dat tokodos umatano, kibino una nun a marmaris. ⁸ A kum wasiso ri i lingmulus sakit. Ma a nemi sur un papam dekdek nami, sur a taro ra det nurnur un o God, det in pitar mulus tar det una wakak na pinapam una nundet a kum bung na nilaun. A kum wasiso ri i wakak ma i warut a taro rop.

2:3: 1 Tim 3:11 2:5: Ep 5:22 2:7: 1 Tim 4:12

2:14: Gal 1:4; Kis 19:5; Lo 4:20; 7:6; Ese 37:23; 1 Pit 2:9
1 Kor 6:11; Ep 2:2; 5:8 3:4: 2 Tim 1:9; Ep 5:26 3:6:

2:8: 1 Pit 2:15

2:9: 1 Tim 6:1

2:12: 1 Jon 2:16

2:15: 1 Tim 4:12 3:1: Rom 13:1-7; 1 Pit 2:13-14 3:3:
Ap 2:17-18 3:9: 2 Tim 2:14, 16

⁹ Un nan gisen gusun a kum tuptup na wasiso, ma a kum utatos, ma a engaras, ma a inaim na wasiso una Warkurai anun o Moses, uni ka det gas un tu utna, ra ken warut ui. ¹⁰ Ra taio in ser pagol a taro na nurnur, un wasiso na utumarong toromi sur in mana. Ra ken longoro ui, un wasiso na utumarong melet toromi. Ra ken longoro mo, un nan gisen gusuni. ¹¹ Ra taio i pami lenra, un tasmani kut lena, i sa raro, ma i sa bukus nama sakino petutna. Anun a sakino petutna ut ra, i beni utiro una iniru tukum.

A sasaring anun o Pol torom o Taitus

¹² Ra an tulu ru o Artemas o, o Tikikus torom ui, un dekdek sur un nan torom iau tong o Nikopolis, uni an kis ru a kum kalang na kotokoto tong. ¹³ Un tulu ru o Apolos ma o Senas, i ra a tene mananos tagun a kum warkurai, ma un warut der sur gong der sibo sur tu utna. ¹⁴ Anundat a taro, det in lason sur det in pitar mulus tar det una wakak na pinapam, sur det in wu a wakak na windet una anundet a nilaun, ma det in warut a sibo na taro.

¹⁵ Det rop ra det kis tomo nam iau, det pitar anundet a marmaris torom ui. Un pitar anumet a marmaris torom a kum paspasa met una nurnur.

A marmaris anun o God in kis torom mot rop.

A Pas anum o Pol torom o Pilimon

A wasiso talapor mugu

O Pol i tumus a pas ri torom o Pilimon. O Pilimon i ara labino musano tagun a tamon Kolosi, ma a tene nurnur kai. Anun ara tene ititula, a risano o Onesimus, i kalabor pas gusuni. Numur di ukarabusi, ra i etorom pas o Pol una karabus. O Pol i warawai toromi ra i nukpukus. Ra di palos ru o Onesimus, o Pol i nemi sur in millet melet torom anum a mugumugu o Pilimon, ra i tumus a pas ri torom o Pilimon sur o Onesimus in losi. I inanosi lena, gong i kankan torom o Onesimus, in gas pasi kut, uni i sa nukpukus, ma i nurnur un o Iesu elar nam o Pilimon.

A inawan ina Pas Pilimon:

A turturkibin ina buk ri (1-3)

A wakak na petutna anum o Pilimon (4-7)

O Pol i nemi sur o Pilimon in gas pas o Onesimus (8-22)

A ururop na wasiso anum o Pol torom o Pilimon (23-25)

¹ Iau, o Pol, a karabus, uni a nurnur un o Karisito Iesu. Mir nam o Timoti a tisindat, mir tumus a pas ri torom ui Pilimon, a wakak na pasamet una pinapam, ² ma torom o Apia a tisindat a ino, ma torom o Arkipus a pasandat una inaim nama Wakak na Wasiso, ma torom a taro na lotu ra mot ser wan tomo una num a rumu. ³ A marmaris ma a malmal anum o God a Tamandat, ma a Labino o Iesu Karisito in kis tomo nam mot.

A marmaris ma a nurnur anum o Pilimon

⁴ Ra a wararing, a ser nuk pas ui, ma a watung wakak torom o God un ui. ⁵ Uni a longoro i lena, u nem a taro rop anum o God, ma u nurnur una Labino o Iesu. ⁶ A wararing lena, un upuaso anum a nurnur un o Karisito torom a taro ma un ususer det uni. Ra un pami lenri, in warut ui sur un mananos una kum wakak na utna rop anundat ra i kis un o Karisito. ⁷ Tisinglik, anum a marmaris torom a taro anum o God i sa pitar tar a labino gasgas tang, ma i uragot iau, uni u ugasgas a nilaun anundet.

O Pol i saring o Pilimon sur o Onesimus

⁸ Ara utna a nem doko i sur un pami. I topas iau sur an wasiso dekdek torom ui uni, uni dar tar tisino un o Karisito. ⁹ Ikut, a saring wakak ui, uni a nem ui. Iau, o

Pol, a sa takano, ma uniri a kis na karabus, uni a nurnur un o Karisito Iesu, ¹⁰ a saring pas anum a nimulaot un o Onesimus, a nutunglik una nurnur. I wanpat torom iau ra a kis una karabus, ma i nukpukus. Ra uniri, i elar nama nutunglik mulus ut una nurnur. ¹¹ Numugu ke gas matano sur in papam torom ui, ikut uniri, i a wakak na tene pinapam mo, torom ui ma iau.*

¹² Uniri a tulu ru i millet mo torom ui. Ra i wan gusun iau, i elar nam ara kukur tagun anung a nilaun i wan tomo nami. ¹³ A nemi sur in kis mukut tomo nam iau, sur in keles ui Pilimon, ma in warut iau, ra a kis una karabus uni a warawai nama Wakak na Wasiso. ¹⁴ Ikut ka nemi sur an ungongos pas ui sur un warut iau, ui ut un pami elar nama num a gasgas. Kan pam tu utna, kut ui ut un mulaot. ¹⁵ Kutiro o Onesimus i kis gisen lilik pas kut gusun ui, sur i mo ri, in kis tukum tomo nam ui. ¹⁶ Uniri ken elar melet mo nama tene ititula, in elar nama tisinglik mulus una nurnur. A nem doko i, ikut a tasmani lena, anum a marmaris toromi i labo taun a marmaris ra a marisi nami, uni, i anum a tene pinapam ma a tisinglik kai una Labino.

¹⁷ Ra u nuki lena dar pasano, un gas melet pas o Onesimus, elar nami ra un gas pas iau ut. ¹⁸ Ra i sa pam tar tu sakino torom ui, o i sa los pas anum tu utna, iau mukut an balu i. ¹⁹ Iau o Pol, iau ut a tumus a wasiso ri nama lamang: an balu asau ra torom ui. Kan watung tu utna tam, ui ut u sa tasman tari lena, a matok na nilaun ra u sa los pasi, i kibino ut un iau, ma i elar nama dinau torom ui. ²⁰ A lingmulus, tisinglik, una risan a Labino, a nemi sur un gas melet pas o Onesimus. Ui a tisinglik un o Karisito, un ugasgas anung a nilaun. ²¹ Ra a tumus a pas ri, a tasman mulusi lena, un muri ut anung a sasaring torom ui, ma a tasmani kai lena un pam a utna in labo taun asau ra a saring ui suri.

²² Ara utna kai: A saring ui sur un waninar tu kukur rumu sur iau, uni a nurnur lena, o God in upirso ru iau gusun a karabus sur an millet melet torom mot. Iri a win anumot a kum niaring.

A ururop na wasiso na marmaris

²³ O Epapras, i ra i karabus tomo nam iau, uni i nurnur un o Karisito Iesu, i pitar ru anum a marmaris torom ui. ²⁴ Ma det kai ri, o Mak, o Aristakus, o Demas ma o Luk. Met paspasano tomo una pinapam.

²⁵ A marmaris anum a Labino o Iesu Karisito in kis una niomot.

1:2: Kol 4:17; 2 Tim 2:3 **1:7:** 2 Kor 7:4 **1:10:** Kol 4:9; 1 Kor 4:15 * **1:11:** A rising Onesimus a kukuraino lena, "i topasi ut a pinapam." **1:16:** 1 Tim 6:2 **1:22:** Pil 1:25; 2:24 **1:23:** Kol 1:7 **1:24:** Kol 4:10-12, 14; 1 Tim 4:10-11

A Pas torom a taro Ibru

A wasiso talapor mugu

A pas ri di tumusi torom a taro Juda, ra det sa nukpukus ma det nurnur un o Iesu. Di watung det kai nama taro Ibru, uni det wasiso nama wasiso Ibru. Katutaio i tasman osi ra i tumus a pas ri.

A kum tene nurnur ra di tumus a pas ri torom det, det los a kum lamlabino mamaut tan a taro ra ka det nurnur. Ara taro det nem na millet melet sur a lotu Juda.

A pas ri i udekdek det sur gong det millet melet. Ra tu maut in los det, det in tur dekdek una nurnur tuk una bung ra det in mat. Una nurnur kut un o Iesu det in tokodos umatan o God, katu kisapi melet. Det in tamtama sur o Iesu ma det in mur a magirano ma det in winim pas a kum maut.

A pas ri i wasiso una tulu lamlabino utna.

1. O Iesu i labo sakit, i a Nutun o God ma i labo taun a kum ensel, a kum poropet ma o Moses kai. Ra o Iesu i kis nin una rakrakon bual, i los a labino maut ma a kum ngunungut. Una kisapi ra, i wanpat anundat a Tene Ulaun.
2. O God ut i pilok pas o Iesu sur i a mugumugu na tene etabor tukum torom o God. Ma i labo taun a kum tene etabor rop anun a taro Juda.
3. O Iesu i a mugumugu na tene etabor mulus ra i kis sapat netes una langit. Ma i ser ulaun pas a taro ra det nurnur uni. A kum pinapam na lotu, ra a kum Warkurai anun o Moses det wasiso uni, det elar kut nama malalar ina labino pinapam mulus ra o Iesu i pami. I etabor nama gapino ut. Ma a matok na kunubus ra o Iesu i pami, i keles ru a mugano kunubus.

A inawan ina Pas Ibru:

- O Iesu a Nutun o God, ma i ese o God torom dat (1:1-4)
- O Iesu i labo taun a kum ensel, ma i a Tene Ulaun (1:5-2:18)
- O Iesu i labo taun o Moses ma o Josua (3:1-4:13)
- O Iesu anundat a labino mugumugu na tene etabor torom o God (4:14-7:28)
- A matok na kunubus (8:1-9:28)
- A gapin o Iesu i unus ru anundat a kum sakino petutna (10:1-39)
- A nurnur (11:1-40)
- Dat in nurnur un o Iesu ma dat in muri (12:1-13:19)
- A ururop na wasiso (13:20-25)

A Nutun o God i labo sakit taun a kum ensel

¹ Numugu utmakai o God i wasiso torom a kum tumtubun dat nama wan a kum poropet. I wasiso una susut na dino ma una wur ngas na kisapi. ² Ikut una kum ururop na bung ri, i wasiso torom dat nama wan o Nutunu. O Nutunu ra i pilok pasi sur in los a kum utna rop anun o God. Ma una laman o Nutunu, o God i ukis a rakrakon bual rop. ³ O Nutunu i talapor doko nama minamar anun o God, ma i elar mulus ut nam o God. I pam ukai a kum utna rop nama nun a dekdek na wasiso sur det in papam tomo wakak. I pitar tar anun a nilaun, sur in rus talapor dat gusun a kum sakino petutna rop. Ra i sa pam rop tar a pinapam ra, i kis una papor sot na laman a labino King sakit, sapat netes una langit. ⁴ I mo ra, o God i ulabo pas o Nutunu sur in labo sakit taun a kum ensel. I labo sakit, lar ut a risano i labo sakit taun a risan a kum ensel. A risano ra o Tamano i pitar tari tano.

⁵ Uni o God awu sur i watungi torom tu ensel lenri,

“Ui a Nutung,

ma uniri a sa wanpat o Tamam.” Sng

2:7

ma awu sur i watungi kai un tu ensel lena, “Iau o Tamano,

ma i a Nutung.”

2 Sml 7:14

⁶ Ikut, ra o God i tulu ru a mugano Nutunu urin una rakrakon bual, i watungi uni lenri,

“I wakak ra a kum ensel rop anun o God det in lotu toromi.” Lo 32:43

⁷ Ma i watungi una nun a kum ensel lenri, “I pukus anun a kum ensel sur det in elar

nama wuwu,

a kum ensel ra det anun a kum tultul,

i pukus det sur det in elar kai nama kunabor ina sungun.” Sng 104:4

⁸ Ikut o God i watungi un o Nutunu lenri,

“God, anum a kiskis na king in kis tukum ma ken rop.

U ser warkurai sur a taro tagun anum a matanitu nama tokodos na petutna.

⁹ U nem doko a tokodos na petutna,

ma u nget a sakino petutna.

I mo ra o God, anum a God, i pilok pas ui,

ma i pitar tar a gasgas ma a urur tam,

ra i labo sakit taun a gasgas ma a urur ra i pitari torom a kum paspasam.”

Sng 45:6-7

¹⁰ Ma o God i watungi kai torom o Nutunu lenri,

“Labino, una turturkibino, ui u ukis tar a kibin a rakrakon bual,

ma u ukis a bakut nama lamam.

¹¹ Der in rop kut, ikut ui un kis tukum.

Der in turai elar namin namalu.

¹² Un pul der elar namin namalu na rakrakup, un keles der elar nam ara ra i keles ru in turai na malu.

Ikut ui, kon keles, un kis lenutra, ma anum a kum kilalo ken rop.” *Sng 102:25-27*

¹³ O God awu sur i watungi kai torom tu ensel lenri,

“Un kis una papor sot na lamang, tuk ra an winim pas anum a kum ebar sur det in kis utuntudu in anum a warkurai.” *Sng 110:1*

¹⁴ A kum ensel rop det a kum nion, ra det papam torom o God, niko? I tulu ru det sur det in warut a taro, det ra in ulaun det.

2

A pinapam na ulaun a taro ra o Iesu i pami

¹ I mo ra i wakak sur dat in mur a kum etowo ra dat sa longoro tari. Dat in mur a kum etowo ra, sur gong dat wan gisen gusuni. ² A kum wasiso ra numugu a kum ensel det wasiso talapor nami i tur sikot*. Ra taio ke muri o i pitarngat kut, din pitar tar a warkurai na minabalu toromi, ra i elar nam anum a pitarngat. ³ Ra i lenra, in pepetlai torom dat, ra dat rosumur gusun a labino pinapam na ulaun a taro ra o God i sa pam tari? Ka dat in kalabor eno lar pas gusun anum a warkurai na minabalu. A pinapam na ulaun a taro, a Labino ut i sa wasiso puaso mugu taru uni. Ma det ra det longoro in nalngano, det upuaso i torom dat lena i lingmulus sikit. ⁴ O God i pam a kum ukinalong ma a kum utna na ukisin, ma a kum dekdek na pinapam, ma i tibo susuaro a kum etabor anum a Tokodos na Nion elar ut nam anum a nemnem. Una nun a kum pinapam ra, i ese i lena anum a pinapam na ulaun a taro i lingmulus.

O Iesu i wanpat a mulusino sur in ulaun pas a taro

⁵ A matok na rakrakon bual ra numur in nanpat, ra uniri dat wasiso uni, o God ke ubek tari utuntudu ina warkurai anum a kum ensel. ⁶ Ikut, un ara dino una Buk Tabu, ara i watungi torom o God lenri, “Met a taro, osi mulus met ra u nuk pas met?

Sur asau ra u tamtamabat met?

⁷ U sa ukis tar met sur met in kis utuntudu ina kum ensel, a nat na du bung kut.

U ukukup tar met nama minamar ma a urur,

⁸ ma u sa ubek tar a kum utna rop utuntudu ina numet a warkurai.” *Sng 8:4-6*

O God i sa ubek tar dat a taro sur dat in warkurai sur a kum utna rop. I talapor lena, katu utna melet mo ra ke kis utuntudu indat. Ikut, una kum kilalo ri, ka dat tama i utmakai lena a kum utna rop det kis utuntudu indat. ⁹ Ikut dat tama o Iesu, i ra o God i unatino pasi sur in natino tan a kum ensel, a nat na du bung kut, sur in mat sur a taro rop. I mat uni o God i maris det. Ikut uniri, dat tama i lena o God i sa ukukup tari nama minamar ma a urur, uni i taramo a ngunungut ma i mat.

¹⁰ O God i ukis tar a kum utna rop suri ut, ma i nemi sur in ben pas a susut na nutnutunu sur det in rakon pas a minamar. I mo ra i tokodos sur in mulaot tar o Iesu sur in taramo a ngunungut, sur in papos a kisapi sur o God in ulaun pas det. ¹¹ O Iesu tomo nama taro ra i rus talapor pas det gusun anundet a kum sakino petutna, det ara Tamandet kut. Iri a kibino ra o Iesu ke maimai sur in watung det, a kum tistisino. ¹² Ma i watungi torom o God lenri,

“An wasiso talapor un ui torom a kum tistising, ma an kelekele na watung ulabo pas ui epotor tan a taro na lotu.” *Sng 22:22*

¹³ Ma i watungi kai lena,

“An nurur ut un o God.” *Ais 8:17*

Ma i watungi utkai lenri,

“Tama i, iau kuri, iau nama kum nat liklik ra o God i sa pitar tar det tang.” *Ais 8:18*

¹⁴ A kukurai ina kum nat liklik ra, a kum mulusino ut. Ma o Iesu kai i wanpat a mulusino, a pinino ma a gapino ut. I pami lenra sur una nun a minat in ban laulau ru o Satan, i ra i utur ukai a dekdekin a minat.

¹⁵ O Iesu i mat sur in ulangolango det ra a nginara na minat i ker det una nundet a kum bung na nilaun rop. ¹⁶ I lingmulus sikit, o Iesu ke pam a pinapam ri sur in warut a kum ensel, awu. I pami sur in warut a kum tumtubun o Abaram. ¹⁷ Iri a kibino ra o Iesu i wanpat elar ut nama kum tistisino una kum utna rop, sur in mugumugu na tene etabor torom o God ma una nun a pinapam ra torom o God, in ese a marmaris torom a taro, ma a lingmulus na petutna. In pitar anum a nilaun sur in mat, ma o God in unus ru a kum sakino petutna anum a taro, ma in urop ru anum a kankan ma ken kankan melet mo torom det. ¹⁸ O Iesu i pet lari sur in warut det ra di lar det, uni o Iesu kai di lari ma i taramo a ngunungut uni.

1:14: Sng 34:7; 91:11 **2:2:** Gal 3:19 * **2:2:** A wasiso ra a kum ensel det wasiso talapor nami a kum warkurai anum o Moses. **2:3:** Ibr 10:29; 12:25 **2:4:** Mk 16:20; 1 Kor 12:4, 11 **2:9:** Pil 2:8-9 **2:11:** Mt 25:40
2:14: 1 Jon 3:8; Tam 12:10

3

O Iesu i labo taun o Moses

¹ I mo ra a kum tistinging ra o God i sa pilok pas mot sur mot anun a taro, a nuknuki mot in kis dekdek un o Iesu. I ra a Aposel ma a mugumugu na tene etabor torom o God, ra dat nurnur uni ma dat wasiso puaso uni. ² I lingmulus una pinapam ri, ra o God i sa pilok tari suri, elar kutkai nam o Moses ra i lingmulus una nun a pinapam ra i mugu a taro rop anun o God. ³ A urur ra di pitari torom a musano ra i pam a rumu, i labo taun a urur ra di pitari una rumu ra i pami. I lenkutkai ra, a urur ra di pitari torom o Iesu i labo sakit taun a urur ra di pitari torom o Moses. ⁴ A kum rumu rop taktakai, arara musano i pami, ikut o God i pam a kum utna rop. ⁵ O Moses, i a tultul anun o God, ma i lingmulus una nun a pinapam una rumu anun o God. I wasiso mugu taru una kum utna ra o God in wasiso puaso uni numur. ⁶ Ikut o Karisito, i a Nutun o God ma i lingmulus una nun a pinapam ra i tamtabat a taro anun o God. Ra dat tur dekdek una nurnur, ma ka dat ngara, ma dat kis langlang sur a kum utna ra o God in pami, dat a taro anun o God.

Det ra ka det nurnur ka det in ruk una tamon na mana

⁷ I mo ra dat a taro anun o God, dat in mur a wasiso anun a Tokodos na Nion ra i watungi lena,

“Uniri, ra mot longoro in nalngano,

⁸ gong mot udekdek bat a balamot, elar nama kum tumtubu mot numugu det pami,

ra ka det mur anung a wasiso, una kum kilalo ra det kis una nubual kalako taro uni ma det lar iau.

⁹ Tiro iai det lar iau,

ma det tama i ut anung a kum pinapam una wat na noino kilalo.

¹⁰ Iri a kibino ra a kankan torom a taro tagun a kum kilalo ra,

ma a watungi lena,

‘A nuknukin det i wan raro bolbolos, ma ka det tasman anung a kum kisapi.’

¹¹ I mo ra a kankan ma a liliman lena,

‘Ka det in ruk una nung a tamon na mana.’” *Sng 95:7-11*

¹² A kum tistinging, mot in tumarong, sako taio tagun mot a nuknukino in mur a sakino petutna ma ken nurnur, ma in nan gisen gusun o God, ra i laun. ¹³ Mot in uragot etetalai mot una kum bung rop, ra di watungi utmakai lena “uniri.” Mot in pami lenra, sako a sakino petutna in toro pas taio

tagun mot, ma in udekdek bat in balano. ¹⁴ Ra dat turpas a mur o Karisito, dat tur dekdek una nurnur. Ra dat in tur dekdek una nurnur tuk una ururopino, elar nami ra dat pami numugu, dat tagun o Karisito. ¹⁵ Elar nami ra di sa watung tari una Buk Tabu lena,

“Uniri ra mot longoro in nalngano, gong mot udekdek bat a balamot, elar nama kum tumtubu mot numugu det pami, ra ka det mur anung a wasiso.” *Sng 95:7-8*

¹⁶ Osi det ra det longoro in nalngan o God, ikut ka det mur anun a wasiso? Det rop ra o Moses i ben piroso pas det tagitong o Ijip, niko? ¹⁷ Osi det ra o God i kankan torom det a wat na noino kilalo? Det ra det pam a sakino petutna ma det mat una nubual kalako taro uni, niko? ¹⁸ Osi det ra o God i liliman lena ka det in ruk una nun a tamon na mana? Det ra ka det mur anun a wasiso, niko? ¹⁹ I mo ra dat tama i lena ka det pet lar pasi sur det in ruk una nun a tamon na mana, uni ka det nurnur.

4

A tamon na mana anun a taro anun o God

¹ A liliman ra o God i uliliman taru nami kuri utmakai, sur dat in ruk una nun a tamon na mana. I mo ra dat in tumarong, sako tu pasamot ken ruk lar pas uni. ² Uni dat kai dat sa longoro tar a Wakak na Wasiso elar nama kum tumtubun dat tagun numugu. Det longoro tari ut, ikut ke warut det, uni ka det nurnur uni. ³ Dat ra dat sa nurnur, dat in ruk una tamon na mana. Ikut a kum tumtubun dat tagun numugu, ra ka det nurnur*, o God i sa watung tari un det lena,

“A kankan ma a liliman lena,

‘Ka det in ruk una nung a tamon na mana.’” *Sng 95:11*

I watungi lenra, ikut i lingmulus, numugu utmakai o God i urop anun a pinapam ra i ukis a rakrakon bual, ra i mana. ⁴ I sa talapor lenri, uni un ara dino una Buk Tabu i watungi una ururop na bung tagun a wik lena, “A womon na bung o God i papam, ma una bung numur tano, i mana gusun anun a kum pinapam rop.” *Stat 2:2*

⁵ Ma una Buk Tabu ra dat sa luk tari munung, o God i watungi lena, “Ka det in ruk una nung a tamon na mana.” *Sng 95:11*

⁶ Det ra det sa longoro tar a Wakak na Wasiso numugu, ka det ruk una nun a

3:1: Ibr 4:14; 7:26; Nam 12:7 3:5: Nam 12:7 3:8: Kis 17:7; Nam 20:2-5 3:11: Nam 14:21-23 3:15: Ibr 3:7-8 3:16: Nam 14:1-35 3:17: 1 Kor 10:10 4:3: Ibr 3:11 * 4:3: A wasiso ri, i wasiso un asau ra i wanpat una kum kilalo anun o Moses.

tamon na mana, uni ka det mur a wasiso anunu. Ikut a kisapi i papos utmakai, sur lako taro gisen det in ruk una nun a tamon na mana. ⁷ I talapor lenri, uni a susut na kilalo numur tandet ra ka det mur a wasiso anun o God, o God i wasiso utmakai una nun a tamon na mana. I wasiso una wan o Dewid lena,

“Uniri, ra mot longoro in nalngano, gong mot udekdek bat a balamat.” *Sng 95:7-8*

Ra o God i watungi lena “uniri,” i kukuraino lena i sa kubus tar ara bung melet sur a taro det in ruk una nun a tamon na mana. ⁸ Ra gunuk o Josua i sa pitar tar a mana torom a kum tumtubun dat, ra det ruk una tamon Kenan, o God ken wasiso melet taru un tu bung gisen sur a taro det in ruk una nun a tamon na mana. ⁹ Lenra, a taro anun o God anundet a mana kura utmakai, elar nama bung na mana anun o God. ¹⁰ Uni osi ra in ruk una tamon na mana anun o God, i sa mana gusun anun a kum pinapam, elar nam o God i mana gusun anun a kum pinapam. ¹¹ I mo ra dat in dekdek sur dat in ruk una tamon na mana ra, sur gong taio tandat i puku elar nama taro ra ka det mur a wasiso anun o God.

¹² Uni a wasiso anun o God i laun ma i papam. I wangon doko taun in totok na inaim ra aru paporino der wangon. I ruk ra i totok tuk una nubual ra a niondat ma a balandat der etorom iai, ma tuk una nubual ra a kum sur det tugus tomo iai. Ma i kuro a kum nuknuk ma a kum nemnem nin ubalandat. ¹³ Ra katu utna ra o God i sa ukis tari i parau umatano. A kum utna rop i tur talapor umatano ma katu utna i bakit. Ma numur dat in tur umatano ma dat in watung puaso a kum utna rop ra dat sa pam tatari.

O Iesu anundat a labino mugumugu na tene etabor torom o God

¹⁴ Dat in tur dekdek una kum etowo ra dat nurnur uni ma dat ser wasiso puaso uni. Uni anundat a labino mugumugu na tene etabor torom o God, ra i wan usapat una langit, i ra o Iesu, a Nutun o God. ¹⁵ I tasmani lena katu dekdekin dat sur dat in winim pas a sakino, ma i maris pas dat. Uni di sa lar mugu tari nama wur ngas na ululam rop lenkutkai ra di ser lar dat nami, ikut ke pam tu sakino petutna. ¹⁶ I mo ra dat in nan torom o God, anundat a King, a tene marmaris, ma gong dat ngara. Dat in nan toromi sur dat in utur ukai anun a marmaris, ra in warut dat una nundat a kum mamaut.

5

¹ A kum mugumugu na tene etabor rop torom o God, o God i pilok pas det tagun a taro, ma i ubek tar det sur det in tur ukinalong a taro umatano. Det in pitar a kum etabor ma det in tun a kum wewegua sur o God in unus ru a kum sakino petutna anun a taro. ² A mugumugu na tene etabor torom o God i pet lar pasi sur in papam nama marmaris torom a taro ra ka det mananos ma det wan raro, uni i kai, kalako dekdekino sur in winim pas a sakino. ³ Iri a kibino ra i ser tun a kum etabor torom o God. Awu sur i pami sur in unus ru i kut a kum sakino petutna anun a taro, awu. Sur in unus ru i kai anun a kum sakino petutna.

⁴ Di ser pitar a labino urur una pinapam na mugumugu na tene etabor torom o God, ma katutaio in los a tinibo ra, una nun a nemnem ut, awu. In losi kut una kakabo ut anun o God, elar nami ra i pami un o Aron. ⁵ Lenkutkai ra, o Karisito ke ulabo pasi sur in mugumugu na tene etabor torom o God. Ikut o God i watungi toromi lena,

“Ui a Nutung, ma uniri a sa wanpat o Tamam.” *Sng 2:7*

⁶ Ma un ara dino kura una Buk Tabu, o God i watungi kai lena,

“Ui a tene etabor torom o God, elar nam o Melkisedek, ma anum a pinapam in tur tukum.” *Sng 110:4*

⁷ Ra o Iesu i laun nin una rakrakon bual, i kukukuk nam anun a kum niaring nama lurlur na matano torom o God, i ra i pet lar pasi sur in ulaun pasi gusun a minat. Ma o God i longoro i, uni i unatino pasi utuntudu ino. ⁸ I lingmulus o Iesu a Nutun o God, ikut i taramo i ut a ngunungut. Ma a ngunungut ra, i ususeri sur in mur a nemnem anun o God. ⁹ O God i pam sot pas a pinapam ra un o Nutunu, ra o Nutunu i wanpat a kibin a pinapam na ulaun tukum a taro, torom det rop ra det ser mur anun a wasiso. ¹⁰ Ra o God i ubek tar o Iesu sur i a mugumugu na tene etabor, elar nam o Melkisedek.

A utumarong sur gong taio i wan gisen gusun a nurnur

¹¹ A susut na utna utmakai ra met in wasiso uni una utna ri. Ikut i ngangitin sur met in palosi torom mot, uni ka mot los lakiti. ¹² Mot sa nurnur suano mot, ra uniri i sot mo sur mot a kum tene ususer. Ikut, mot sibo utmakai sur taio in ususer mot melet una kum mugano ususer una wasiso anun o God. Ka mot nan lar pas a dekdek na utna, mot sus kut. ¹³ Osi ra i

sus utmakai, i a nat miso, ma ke lason una etowo una tokodos na petutna. ¹⁴ Det ra det sa labo, det wan a dekdek na utna na inangon, uni det sa ulason det sur det in tama lele a wakak na petutna ma a sakino.

6

¹ I mo ra dat in nan usa numugu sur a kum etowo bulung ra in sot sur a taro ra det sa labo una nurnur. Gong dat ususer melet una kum mugano etowo un o Karisito ra dat sa ususer pas uni. A kum etowo lenri: a nukpukus gusun a kum petutna ra in ben dat sur a minat, a nurnur un o God, ² a etowa una wur ngas na kisapi tagun a baptais, a etowa una ubek lamandi netes una taro, a katkatatur melet gusun a minat ma a warkurai na minabalu tukum. ³ Ra o God in mulaot, dat in nan usa numugu.

⁴ Katutaio in ben pukus lar pas a taro sur det in nukpukus torom o God ra det sa wan gisen gusuni. Det sa tasman tar a talapor anun o God, det sa wan tama tar a etabor tagisapat una langit, det sa los pas a Tokodos na Nion, ⁵ det sa tasman tar a wakakino tagun a wasiso anun o God ma det sa taramo tar a dekdekin o God ra numur in nanpat puaso. ⁶ Ra det in rosumur gusun o God, katutaio in ben pukus lar pas det, sur det in nukpukus. Uni i elar nami ra det sak wat melet a Nutun o God unin nanai kutus, ma det ban umaimai i umatan a taro.

⁷ A piso ra i inum pas a polono bato ra i ser puku, ma i pitar a utna na inangon ra i warut det ra det marut tari, a piso ra o God i udani. ⁸ Ikut a piso ra i pitari kut a kum laulau na wuliso ma a kum suksuk, katu utna i gas uni. Ken suano i kut, ra o God in pitar a warkurai na minabalu toromi, ma numur in tun ru i una sungun.

⁹ A kum wakak na paspasa met, met sa watung tar a kum dekdek na wasiso ri torom mot. Ikut met nurnur lena, mot mur a wakak na petutna ra i sot una taro ra o God i sa ulaun pas det. ¹⁰ O God ke ser pam tu utna ra ke tokodos. Ken dumano anumot a pinapam ma anumot a marmaris ra mot ese i toromi una numot a warut torom anun a taro ra mot sa pam tari ma mot pami utmakai. ¹¹ Anumet a labino nem-nem sur mot rop taktakai mot in dekdek una marmaris lenutra mot ser pami, tuk una ururopino. Mot in pami lenra, sur a kum utna ra mot kis langlang nama nurnur suri, in nanpat mulus ut torom mot. ¹² Ka met nemi sur mot in tabalamat, awu. Met nemi sur mot in mur a magirandet ra det nurnur ma det kis langlang ma pinindet ke

ngoro, ra det in utur ukai asau ra o God i sa uliliman taru nami.

A liliman mulus anun o God

¹³ Ra o God i uliliman tar o Abaram, i udekdek anun a liliman nama risano ut, uni katu risan taio melet i labo tauni. ¹⁴ I uliliman tari lena, "A lingmulus an udan ui, ma an pitar tar lako susut na nutnutum." *Stat 22:17*

¹⁵ Ra o Abaram i kis langlang ma a piniso ke ngoro, ra numur i utur ukai asau ra o God i sa uliliman tari nami.

¹⁶ Ra a taro det liliman, det udekdek anundet a liliman nama risan taio ra i labo taun det. Ra det pami lenra, a liliman ra, in tur dekdek, ma katutaio in engaras melet mo uni. ¹⁷ Ma o God kai, i udekdek anun a liliman nama risano ut, sur in upuaso i torom anun a taro, det ra i uliliman tar det, lena ken pukusi melet a nuknukino. ¹⁸ Aru utna ri, a liliman, ma a risano ra i udekdek anun a liliman nami, ka din keles lar pasi, ma o God ken toro lar pas nami. O God i pami lenra sur in uragot dat, ra dat sa kalabor bakit taru uni, sur dat in tur dekdek una nundat a kinkinis langlang nama nurnur sur a liliman anun o God, ra kura numur in nanpat. ¹⁹ Anundet a nurnur ra dat kis langlang nami sur a liliman anun o God, i elar nama ega ra i pam ukai a niondat, ra ken karai. I ruk una rumu na etabor una nubual ra i Tabu Sakit numur tan in namalu na minabat kutus sapat una langit. ²⁰ O Iesu i sa ruk mugu taru una nubual ra, sur in warut dat. I anundet a mugumugu na tene etabor torom o God, elar nam o Melkisedek, ma anun a pinapam ra in tur tukum.

7

O Melkisedek a tene etabor torom o God

¹ O Melkisedek i a king tagitong o Salem, ma a tene etabor torom o God, ra i Labo Sakit. Ra o Abaram i sa winim pas a wat na king una inaim, ra i millet melet, o Melkisedek i etoromi, ra i udan o Abaram. ² Ma o Abaram kai i pitar tar in tektekene tagun a nonoino tan o Melkisedek tagun a kum utna rop ra i winim pasi tagun a inaim. A risan o Melkisedek, a kukuraino, a king anun a tokodos na petutna. Ma a king tagitong o Salem, a kukuraino a king na malmal. ³ Katutaio i tasman o tamano ma o nano, ma anun a kobotaro. Katu turturkibin ina nun a nilaun, ma katu ururopino kai. O Melkisedek i elar nama Nutun o God, i kai a tene etabor torom o God, ma anun a pinapam in tur tukum.

4 Tama i, o Melkisedek i labo sakit. O Abaram, i a tubundat ra i labo sakit, ikut i pitar tar in tektekene tagun a nonoino torom o Melkisedek tagun a kum utna rop ra i winim pasi tagun a inaim. 5 A Warkurai anun o Moses i watungi lena, a kum tumtubun o Liwai, det ra a kum tene etabor torom o God, det in los pas in tektekene tagun a nonoino tagun a kum utna rop anun a taro Israel. A taro ra, det a kum tistisin a kum tumtubun o Liwai. A lingmulus ra det kai a kum tumtubun o Abaram, ikut det pitari ut in tektekene tagun a nonoino tagun anundet a kum utna rop. 6 O Melkisedek, awu sur i tagun a kabotaro Liwai, ikut i los pas in tektekene tagun a nonoino tagun a kum utna rop anun o Abaram. I udan o Abaram, i ra o God i sa pitar tar a kum liliman tano. 7 I talapor lena, osi ra i labo in udan o naro ra i natino tano.

8 A kum tene etabor torom o God, det ra det ser los in tektekene tagun a nonoino tagun a kum utna rop anun a taro Israel, det in mat kut. Itka a Buk Tabu i watungi lena, o Melkisedek, i ra i los in tektekene tagun a nonoino tagun a kum utna rop anun o Abaram, i laun ut.

9 Lingmulus, a kum tumtubun o Liwai det ser los in tektekene tagun a nonoino tagun a kum utna rop anun a taro Israel. Ikut dat in watungi lena, o Liwai kai i pitar in tektekene tagun a nonoino torom o Melkisedek, una bung ra o Abaram i etabor, uni o Liwai a tubun o Abaram. 10 Ra o Melkisedek i etorom pas o Abaram, ka di usus o Liwai utmakai. Ikut i elar nami ra o Liwai i kis ut una gapin o Abaram, uni numur in nanpat taguni.

O Iesu a tene etabor torom o God elar nam o Melkisedek

11 A pinapam anun a kum tene etabor torom o God, ra a kum tumtubun o Liwai, det ser pami, i ra a kibin a Warkurai anun o Moses ra o God i pitar tari torom a taro Israel. Ra gunuk a pinapam anundet in pet lari sur in unus ru a sakino petutna anun a taro, ka din sibo melet mo sur tu ngas na tene etabor gisen, elar nam o Melkisedek, ra awu sur i elar nam o Aron. * 12 Ra din keles ru a kum tene etabor torom o God, din keles ru i utkai a Warkurai. 13 A kum wasiso ri di watungi una nundat a Labino, i ra tagun a se kabotaro ut. Ma kataio tagun anun a kabotaro i los a pinapam na tene etabor torom o God. 14 I talapor lenri, anundat a Labino i wanpat tagun a kabotaro Juda. Ikut ra o Moses i wasiso una

kum tene etabor torom o God, ke watung a kabotaro Juda.

15 Ara tene etabor gisen i sa wanpat, i ra i elar nam o Melkisedek. A inawan pat anunu i utalapor a kum wasiso ra a sa wasiso taru uni. 16 Awu sur i los a pinapam na tene etabor torom o God uni i tagun a kabotaro Liwai elar nama wasiso na Warkurai, awu. I los a pinapam kibino una dekdekin a nilaun anunu ra ken rop. 17 Uni a Buk Tabu i sa watung tari uni lenri, "Ui a tene etabor torom o God, elar nam o Melkisedek, ma anum a pinapam in tur tukum." Sng 110:4

18 I mo ra, di sa rakon ru a mugano warkurai ra i wasiso una kum tene etabor, uni a warkurai ra, kalako dekdekin ma katu utna i gas uni. 19 Uni a warkurai ra, ke utokodos pas a taro sur det in nan milau o God, awu. Ikut o God i sa pam tar a kisapi sur dat in nan milau i. A kisapi ra i wakak sakit taun a Warkurai. Ra uniri dat pet lar pasi sur dat in kis langlang nama nurnur suri.

20 Ra o God i pitar tar a pinapam na tene etabor torom o Iesu, i uliliman tari ma i udekdek anun a liliman nama risano. Ikut ke pami lenra torom a kabotaro Liwai ra i pitar tar a pinapam na tene etabor torom det. 21 Ikut ra o Iesu i los a pinapam na tene etabor, o God i uliliman tari lena, "A Labino i sa liliman taru, ma ken pukus a nuknukino. 'Ui a tene etabor torom o God, ma anum a pinapam in tur tukum.'" Sng 110:4

22 I mo ra, o Iesu i ulingmulus a kunubus ra i wakak taun a kunubus ra o God i pitar tari torom o Moses.

23 A susut na tene etabor, uni a minat i turbat det sur gong det papam tukum. 24 Ikut o Iesu, i a tene etabor ra anun a pinapam in tur tukum, uni i laun tukum. 25 I mo ra, o Iesu i pet lari sur in ulaun a taro ra det wan torom o God una risan o Iesu. In ulaun det ra det in laun tukum, uni i laun tukum sur in wararing sur det.

26 O Iesu i a mugumugu na tene etabor, ra i sot sur in warut dat. Uni i tasur umatan o God, ma ka din takun lar pasi un tu sakino petutna, ma katu dur umatan o God. O God i ulabo gisen pasi sapat netes una langit, gusun a sakino taro. 27 Ke elar nama kum mugumugu na tene etabor, ra det ser tun etabor una kum bung rop, una nundat a kum sakino petutna mugu, ra numur anun a taro kai. O Iesu ke pami lenra. I pitar tari kut ara etabor una sakino petutna anun a

7:5: Nam 18:21 * 7:11: O Aron i a tene etabor torom o God, ma i tagun a kabotaro Liwai. 7:14: Ais 11:1;
Mt 2:6; Tam 5:5 7:19: Ibr 9:9 7:21: Ibr 5:6 7:22: Ibr 8:6; 12:24 7:25: Rom 8:34 7:27: Ibr 5:3

taro. I etabor nami ut. I pam tari ara dino kut, ma ken pam meleti mo, uni a etabor ra in kis tukum. ²⁸ A kum mugumugu na tene etabor torom o God, ra di ubek tar det elar nama Warkurai anun o Moses, kalako dekdekin det. Ikut, numur tan a Warkurai anun o Moses, o God i liliman, ra i ubek tar o Nutunu sur in mugumugu na tene etabor, ra i tokodos sakit ma in kis tukum.

8

O Iesu anundat a mugumugu na tene etabor una matok na kunubus

¹ Iri a labino utna ra met sa wasiso pas uni: Anundat a mugumugu na tene etabor torom o God i sa kis una papor sot na laman a kiskis anun o God, a labino King sakit sapat netes una langit. ² I papam torom o God sapat netes una langit una rumu anun o God. I ra, a rumu mulus anun o God, ra a Labino ut i pami ma awu sur a taro det pami.

³ A kum mugumugu na tene etabor rop torom o God, o God i ubek tar det sur det in pitar tar a kum etabor ma det in tun a kum wewegua sur a etabor toromi. Lenkutkai ra, o Iesu anundat a mugumugu na tene etabor in etabor nam tu utna sur in pam sot pas anun a pinapam na etabor torom o God. ⁴ Ra gunuk in kis nin upiso, ken tene etabor torom o God, uni a ramano kum tene etabor kuri ut det upiso, ra det ser pitar a etabor elar nama Warkurai anun o Moses. ⁵ A pinapam na etabor det ser pami una rumu na etabor, ra i elar kut nama malalar ina rumu kusapat una langit. Iri a kibino ra o God i utumarong o Moses, ra i waninar sur in pam a rumu na sel sur det in ser tun etabor uni. I watungi tano lena, “Tamtama wakak taru ut! Un pam a kum utna rop, elar ut nama malalar ina rumu ra a sa ese tar ui uni sapat netes una tangai.” *Kis 25:40*

⁶ Ikut o Iesu i sa los pas a pinapam na tene etabor ra i labo sakit taun a pinapam na etabor anun a kum tene etabor. Lenkutkai ra a kunubus ra o Iesu i sa pam sot pasi sur in dat tomo a taro nam o God, i labo sakit taun a mugano kunubus. A kibin a matok na kunubus i a kum liliman, ra det wakak sakit taun a kum mugano liliman.

⁷ Ra gunuk a mugano kunubus in tokodos sakit, katutaio in tamtama melet mo sur tu kunubus. ⁸ Ikut o God i upuaso a niraro anun a taro ra i watungi lena, “A Labino i watungi lena: Tama i, a kum bung in nanpat, ra an pam a matok na kunubus

tomo nama taro Israel
ma a taro Juda.

⁹ Ken elar nama kunubus
ra a pami tomo nama kum tumtubun
det
una bung ra a ben pirso pas det tagitong o
Ijip,
uni ka det mur anung a kunubus,
ra a rosumur gusun det.

¹⁰ A Labino i watungi lena: Iri a kunubus
ra an pami tomo nama taro Israel,
una kum bung numur.
An ubek tar anung a kum warkurai una
nuknukin det,
ma an tumus tari unin balandet.

Ma iau a God anundet,
ma det anung a taro.

¹¹ Ma det ra det paspasano,
ma det ra det tar tistisino,
ka det in ususer det etalai melet mo
lenri,
‘Un tasman a Labino,’

uni det rop det sa tasman tar iau,
a kum lamlabino ma det ra ka di ulabo
pas det.

¹² Uni an unus ru anundet a kum niraro,
ma kan nuk melet pasi mo anundet a
kum sakino petutna.” *Jer 31:31-34*

¹³ Ra o God i watung a kunubus ri “a matok na kunubus,” i talapor lena a mugano kunubus i sa turai. Ma asau ra i turai ma i sa suano i, milau sur in rorom.

9

A kisapi na lotu ra i mur a mugano kunubus

¹ Una mugano kunubus, a kum warkurai na lotu ma a rumu na sel ra di lotu uni nin upiso. ² Di utur a rumu na sel ra. A mugano kukur rumu di watungi a nubual ra i Tabu. Kura uni, a turtur ina lam, ma a kabulu, ma a beret ra di etabor nami torom o God. ³ Ma numur tan a manru nin namalu na minabat kutus, ara kukur rumu bulung ra di watungi a nubual ra i Tabu Sakit. ⁴ Kura una kukur rumu ra, a kabulu ra di pami nama gol, ra di ser tun a paura ra a misino i sangnain wakak, ra di watungi nama insens. Kura kai una kukur rumu ra, a boks na kunubus ra di sa upitapo tar a gol una kum papaporino rop. Ma kura ubalan a boks ra, a kap di pami nama gol, ra a mana i kis tiro ubalano, ma in nubuku anun o Aron ra i sa sibul pat*, ma aru wat ra o God i tumus tar a kum Warkurai uni. ⁵ A wopop bat ina boks ra, a kum tene etabor torom o God det ser lamir a gap sapat uni, sur o God in unus ru

8:5: Kol 2:17; Ibr 9:23

8:6: Ibr 7:22

8:8: Jer 31:31-34

9:1: Kis 26:1-30; 25:23-40

9:3: Kis 26:31-33

9:4: Kis 16:33; 25:10-16; 30:1-6; Nam 17:8-11; Lo 10:3-5

* 9:4: Tama Namba 17:7-8, ra i wasiso unin nubuku anun

o Aron ra i sibul pat.

9:5: Kis 25:18-22

a sakino petutna anun a taro. Aru toktok ina ru ukukis kura der netes una boks ra, ra der upuaso a minamarin o God. A kum mebender i rakup bat a boks ra. Ikut uniri awu sur a du bung sur din papalos una kum utna rop ri.

⁶ Ra di sa waninar rop tar a kum utna una rumu na sel, a kum tene etabor det rukruk ma det pirpirso una kum bung rop una mugano kukur rumu, sur det in pam anundet a pinapam. ⁷ Ikut ara dino kut una arara kilalo, a mugumugu na tene etabor torom o God, i sot kut, i ser ruk una manru na kukur rumu ra kura urumu. Ken ruk oros, in losi ut a gap, sur in etabor nami torom o God, sur o God in unus ru anun a kum sakino petutna, ma a kum sakino petutna kai anun a taro ra det sa pampam tari ma ka det tasmani. ⁸ Una kum utna ri a Tokodos na Nion i upuaso i lena, ra a mugano rumu na sel i tur utmakai, a kisapi na rukruk una nubual ra i Tabu Sakit ke papos utmakai. ⁹ Iri a malalar sur a kum kilalo ri. I kukuraino lena a kum etabor ra ka di tuni ma a kum etabor kai ra di ser tuni, ra di etabor torom o God nami, ka det in gos lar pas in balan taio ra i etabor nami sur in talapor umatan o God. ¹⁰ A kum warkurai ri tagun a inangon ma a ininum ma a kum pinapam na gos talapor a taro umatan o God. Det a kum warkurai kut tagun a pinindat. Det tur kut, tuk una bung ra o God i umatok a kum utna.

A gapin o Karisito i gos talapor a taro

¹¹ Ikut o Karisito i sa wanpat. I a mugumugu na tene etabor torom o God ra i warkurai sur a kum wakak na utna ra kuri det mo. I ruk una rumu na sel ra i wakak sakit taun a mugano rumu na sel. Awu sur a taro det pami, ra i talapor lena awu sur tagun a kum ukukis ri una rakrakon bual. ¹² Ara dino kut o Iesu i ruk una nubual ra i Tabu Sakit ma ken pam meleti mo. Awu sur i ruk nama gapin a kum meme ma a kum barman na bulumakau sur in etabor nami. I ruk nama gapino ut, ra i kul langolango pas dat. Ma anun a pinapam na kunukul ra, in tur tukum. ¹³ Di ser lamir a taro nama gapin a meme ma a bulumakau ma a kubus ina toraro na bulumakau, ra di sa tun tari. Di lamir det ra det dur umatan o God, sur det in talapor. A pinapam ra, i elar nama Warkurai anun o Moses, ikut i utalapor a pinindet kut, ma awu sur anundet a nilaun. ¹⁴ Ra i lingmulus lena di gos talapor a taro lenra, i lingmulus sakit ra a gapin o Karisito i gos talapor dat! Una dekdekin a Tokodos na Nion ra i kis tukum, o Karisito i pitar tar

anun a nilaun torom o God. Anun a nilaun katu dur uni. Ra a gapino i gos talapor anundat a nilaun gusun a kum minat na pinapam ra dat in iru uni, sur dat in papam torom o God ra i laun.

¹⁵ I mo ra o Karisito i tur epotor tan o God ma a taro, ra i pam tar a matok na kunubus, sur in dat tomo tar det. I pami sur det, ra o God i sa kabo pas det, det in dan tukum elar nam anun a liliman. O Karisito i mat ra i kul pas det nama gapino. Anun a minat i ulangolango pas det gusun anundet a kum sakino petutna ra det ser pami utuntudu ina mugano kunubus.

¹⁶ Ra taio i nemi sur in inanos puaso un osi ra in rakon pas anun a kum ututna ra in mat, in tumus tari un tu dono pepa. Ikut a dono pepa ra, ken gas un tu utna, tuk ra din upuaso i lena a musano ra i sa mat. ¹⁷ Katutaio in papam nami ra a musano ra i laun utmakai. Ikut, ra i sa mat, taio in pet lar pasi maragom sur in rakon a kum utna kura una kunubus una dono pepa ra.

¹⁸ Lenutra una mugano kunubus di etabor nama gap sur din upuaso i lena a wewegua i mat. ¹⁹ Ra o Moses i sa watung rop tar a kum Warkurai tan a taro rop, i los pas a gapin a kum barman na bulumakau ma a kum meme, ra i ubek tomo pasi nama danim. I los pas a kano duwai lik ra di watungi namin isop, ra di sa ker wat tari nama merek na iwu ina sipsip. I puk pasi una gap, ra i lamir a buk na Warkurai ma a taro rop nami. ²⁰ Ma i watungi lena, "Iri a gap, a kunubus ra i dat tomo a taro nam o God, ra o God i kuro tari lena mot in muri." *Kis 24:8*

²¹ Lenkutkai ra, i lamir a rumu na sel nama gap. Ma i lamiri kai a kum utna rop ra det ser papam nami una lotu. ²² A lingmulus, a Warkurai anun o Moses i watungi lena, milau a kum utna rop, din gos talapori nama gap. Ra a gap ken tilingis, o God ken unus ru a kum sakino petutna.

A etabor anun o Iesu i unus ru anundat a kum sakino petutna

²³ Din pam soti ut sur din gos talapor a rumu na sel ma a kum utna kura uni, nama gapin a kum wewegua, uni det a malalarin a kum utna kusapat una langit. Ikut a kum utna kusapat una langit, din gos talapor det nama etabor ra i wakak sakit taun a kum etabor taginin upiso. ²⁴ Uni o Karisito ke ruk una nubual ra i Tabu Sakit, ra a taro det pami, awu. A nubual ra, a malalar kut tagun a nubual mulus ra i Tabu Sakit. I ruk usapat ut una langit ma uniri i ser tur umatan o God sur in warut dat.

²⁵ I ruk usapat una langit sur in pitar tari ut sur i a etabor torom o God ara dino kut. Awu sur i ruk lako susut na dino, elar nama mugumugu na tene etabor, ra i ser ruk una nubual ra i Tabu Sakit una kum kilalo rop nama gap ra awu sur a gapino, a gapin a wewegua kut. ²⁶ Ra gunuk o Karisito in pitar tari ut sur i a etabor torom o God una kum kilalo rop, in iru a susut na dino, turpasi ut una turturkibin ina rakrakon bual. Ikut una kum ururop na bung i wanpat ara dino kut. I pitar tari ut sur i a etabor torom o God sur in kamar ru a kum sakino petutna, ma ken pam meleti mo.

²⁷ A taro rop det in mat ara dino kut, ra numur det in tur una warkurai anun o God. ²⁸ Lenkutkai ra o Karisito i pitar tari ut sur i a etabor torom o God ara dino kut, sur in los gisen ru a kum sakino petutna anun a susut na taro. Ma in nanpat melet a manru na dino. Awu mo sur in los gisen ru a kum sakino petutna, awu. In nanpat sur in ulaun pas det ra det kis langlang suri.

10

A kum etabor ka det in unus ru a kum sakino petutna

¹ A Warkurai anun o Moses i elar kut nama malalarin a kum wakak na utna ra numur in nanpat, awu sur det a kum utna mulus. I mo ra, a Warkurai anun o Moses ra i watungi lena det in ser etabor una kum kilalo rop, ken utokodos lar pas a taro ra det wan milau o God sur det in lotu toromi. ² Ra gunuk in utokodos det, ka det in pitari mo a kum etabor. Uni a kum etabor ra, in gos talapor pas a kum tene lotu ara dino kut, ma a nuknukin det ken takun det melet mo una nundet a kum sakino petutna. ³ Ikut, ra det etabor, det nuk melet pas anundet a kum sakino petutna una kum kilalo rop. ⁴ Uni a gapin a kum bulumakau ma a kum meme ka det pet lar pasi sur det in unus ru a kum sakino petutna.

⁵ I mo ra o Karisito i wanpat urin una rakrakon bual ra i watungi torom o God lena,

“A kum etabor, ra ka di tuni, ma a kum etabor ra di ser tuni ko nemi, ikut u sa waninar a pining sur an etabor nami torom ui.

⁶ A kum etabor ra di tun rop ru i, ma a kum etabor kai una sakino petutna ko gas nami.

⁷ Ra a watungi lena, ‘God, tama i, a sa wanpat, sur an pam sot pas anum a nemnem,

elar nami ra di sa tumus tari un iau una num a buk.’” *Sng 40:6-8*

⁸ A mugano wasiso anun o Karisito i lena, “A kum etabor ra ka di tuni ma a kum etabor ra di ser tuni, ma a kum etabor di tun rop ru i ma a kum etabor una sakino petutna ko nemi, ma ko gas nam det.” Ikut a kum etabor ri, di pitar tari elar nama Warkurai anun o Moses. ⁹ Numur o Karisito i watungi lena, “Tama i, a sa wanpat sur an pam sot pas anum a nemnem.” I sa rakon ru a kum mugano etabor sur in utur dekdek a manru na etabor. ¹⁰ O Iesu Karisito i mur sot pas a nemnem anun o God ra i pitar tar a pinino ut, sur a etabor torom o God. I pitar tari ara dino kut ma ken pam meleti mo. Ra anun a etabor ra i gos talapor pas dat umatan o God.

A etabor anun o Karisito i unus ru a kum sakino petutna

¹¹ A kum bung rop a kum tene etabor rop det tur ma det pam anundet a pinapam na lotu, ra det ser tun a kum takano etabor kut torom o God. Ikut, a kum etabor ri, ka det unus lar pas a kum sakino petutna. ¹² Ikut o Karisito, anundat a mugumugu na tene etabor i pitar tari ut sur a etabor torom o God una kum sakino petutna anun a taro. Ara dino kut i pami. Anun a pinapam ra in tur tukum, ma ken pam meleti mo. Ra i sa pam tari, i kis taru una papor sot na laman o God. ¹³ Ra uniri kusapat netes i kis langlang a bung ra o God in winim pas anun a kum ebar sur det in kis utuntudu in anun a warkurai. ¹⁴ Uni, una ra etabor takai kut, i sa utokodos tukum pas a taro anun o God, det ra i ser gos talapor det.

¹⁵ Ma a Tokodos na Nion kai i wasiso talapor taru uni torom dat. Anun a mugano wasiso i lena,

¹⁶ “A Labino i watungi lena: Iri a kunubus ra an pami tomo nam det, una kum bung numur.

An ubek tar anung a kum warkurai unin balandet,

ma an tumus tari una nuknukin det.”

Jer 31:33

¹⁷ Ma i watungi kai lena,

“Anundet a kum sakino petutna ma anundet a kum pitarnat una warkurai kan nuk melet pasi mo.” *Jer 31:34*

¹⁸ Ra o God i sa unus ru a kum sakino petutna ma a kum pitarnat una warkurai, katu etabor melet mo sur in unus ru a kum sakino petutna.

A minatin o Iesu i papos a kisapi sur dat in nan milau o God

¹⁹ A kum tistising, o God i sa unus ru anundat a kum sakino petutna, ra dat langolango, ma ka dat in ngara sur dat in ruk una nubual ra i Tabu Sakit, kibino una gapin o Iesu. ²⁰ A gapin o Iesu i papos a matok na kisapi ra i wan sur a nilaun, sur dat in muri. A kisapi ra i ruk unin namalu na minabat kutus sur a nubual ra i Tabu Sakit. In namalu ra, a pinin o Iesu ut. ²¹ O Iesu anundat a labino tene etabor torom o God ra i tamtamabat a taro anun o God. ²² I mo ra, dat in nan milau o God nama lingmulus unin balandat ma a nurnur mulus, ma a nuknukin dat ra i langolango gusun a kum etakun una kum sakino petutna, uni o Iesu i sa lamir talapor tari nama gapino. Dat in nan milau i nama pinindat ra i sa gos tari nama danim ra i talapor.

²³ Dat in tur dekdek una nundat a kinkinis langlang nama nurnur sur asau ra o God in pami, ra dat ser wasiso puaso uni. Dat in tur dekdek, ma gong dat wan gisen gusuni, uni o God in pam soti ut asau ra i sa uliliman taru uni. ²⁴ Dat in nuknuk sur lako kum kisapi sur dat in wangun etalai a nuknukin dat sur dat in nem a taro ma dat in pam a kum wakak na pinapam. ²⁵ Gong dat mana gusun anundat a kum kinkinis tomo una lotu, elar nama ramano taro det ser pami. Dat in uragot etalai dat, ma dat in dekdek uni, uni mot tama i lena a bung na inawan pat anun a Labino i sa milau.

Gong dat rosumur gusun a Nutun o God

²⁶ Ra dat sa tasman mulus a lingmulusino, ikut dat muri ut a nemnem anundat sur dat in pam a sakino petutna, katu etabor melet mo sur in unus ru a kum sakino petutna. ²⁷ Dat in kis langlang mukut nama nginara sur a warkurai ra in nanpat, ma a karangop na sungun ra in tun rop ru a kum ebar anun o God. ²⁸ Ra lako ru o lako tul detul in mulaot tomo un tu etakun un taio ra i rosumur gusun a Warkurai anun o Moses, ka din marisi, din um doko i. ²⁹ Ikut a warkurai na minabalu in dekdek sakit taun a minabalu ra, torom taio ra in pas tataun a Nutun o God, ma i nuki lena a gapin a kunubus, ra di sa rus talapor tari nami, i a utna oros kut, ma i watung laulau a Tokodos na Nion ra i pitar a marmaris. ³⁰ Uni dat tasman o God, i ra i watungi lena, "Anungi kut a warkurai na minabalu. Iau an mabalu." *Lo 32:35*
Ma i watungi kai lena, "A Labino in warkurai anun a taro." *Lo 32:36*

³¹ In dekdek doko a nginara anun taio, ra o God ra i laun, in pitar a dekdek na warkurai na minabalu toromi.

Dat in tur dekdek una nurnur

³² Mot in nuk pas a kum bung numugu ra mot sa los pas a talapor una numot a nilaun, ra di pitar a kum labino mamaut ma a kum ngunungut torom mot, ikut mot tur dekdek ut. ³³ A ramano kum bung a taro det urongan laulau un mot, ma det ukadik mot umatan a taro. Ma a ramano kum bung kai mot tur tomo nam ara taro ra di pami lenra un det. ³⁴ Mot maris doko det ra det kis una karabus ra mot warut det. Ma mot gas kut ra a taro det ras pas anumot a kum ututna, uni mot tasmani lena anumot a kum ututna gisen, det in tur tukum, ma det wakak sakit taun a kum utna ra det ras pasi gusun mot.

³⁵ I mo ra gong mot wan gisen gusun anumot a dekdek na nurnur, uni in labo sakit anumot a ikul uni. ³⁶ Gong a pinimot i ngoro, mot in tur dekdek sur mot in mur a nemnem anun o God, ma numur mot in los pas a kum utna ra i sa uliliman taru uni. ³⁷ Uni, milau mukut,

"O naro ra in nanpat, in nanpat ut, ma ken balbalon.

³⁸ Ikut osi ra i nurnur, an watungi anung a tene tokodos ma in laun.

Ma ra in sabut sikot gusun a nurnur, kan gas nami." *Hab 2:3-4*

³⁹ Ikut dat, awu sur dat tagun det ra det ser sabut sikot gusun a nurnur ra det iru. Dat tagun a taro na nurnur, ra o God i sa ulaun pas dat.

11

Asau a nurnur?

¹ Asau a nurnur? I lenri: Ra taio i nurnur, i sa tasman mulusi lena, asau ra i kis langlang suri nama nurnur, in rakon pasi ut. Ke tama i utmakai, ikut i tasmani lena i lingmulus ut. ² A kum lamlabino tagun numugu det nurnur lenra, ra o God i gas nam det ra i wasiso puaso un det lena det wakak, kibino una nundet a nurnur.

³ Una nundat a nurnur, dat tasmani lena o God i ukis a rakrakon bual nam anun a wasiso. Ra asau ra dat tama i, o God i pami tagun asau ra ka di tama i.

⁴ Una nun a nurnur, o Abel i pitar tar a etabor torom o God ra i wakak sakit taun a etabor anun o Kain. Kibino una nun a nurnur, o God i nem anun a etabor, ra i wasiso puaso un o Abel lena i a tene tokodos. A lingmulus o Abel i sa mat, ikut,

kibino una nun a nurnur, kuri utmakai i wasiso torom dat.

⁵ Una nurnur anun o Enok, o God i los ru i sur gong i taramo a minat. Ka di tama meleti mo, uni o God i sa rakon pasi. Ra o God ke rakon pasi utmakai, i gas doko nam o Enok ra i wasiso puaso uni lena i wakak. ⁶ Ra taio ke nurnur, o God ken gas lar pas nami. Uni taio ra i nem na wan torom o God, in nurnur lena o God i kis, ma in nurnur kai lena, o God in pitar a ikul tandet ra det sisio mulus suri.

⁷ O Noa i longoro a utumarong anun o God toromi una kum utna ra in nanpat ra ka di tama i utmakai. Ra una nun a nurnur, i ru pas o God ma i mur anun a wasiso, ma i pam a sip, ra i ulaun pas det tamtamano uni. A nurnur anun o Noa i upuaso a kum sakino petutna anun a taro una rakrakon bual, ra o God i kuro det uni. Ma o God i watung o Noa a tene tokodos, kibino una nun a nurnur.

⁸ Una nun a nurnur, o Abaram i mur a wasiso ra o God i kabo pasi sur in nan sur a tamon ra o God i sa uliliman tari sur numur anunu. I wan, ikut ke tasman a tamon ra i wan suri. ⁹ Una nun a nurnur i kis kut elar nama usiro una tamon ra o God i sa uliliman tari nami. A liliman ra o God i uliliman tari nami, numur i kis utkai torom o Aisak ma o Jekop. O Abaram det, det laun kut una kum rumu na sel. Lenkutkai ra o Aisak ma o Jekop. ¹⁰ O Abaram i kis kut elar nama usiro una tamon ra, uni i kis langlang pas a tamon ra in tur tukum. A tamon ra o God ut i sa nuk tari sur in pami pepetlai, ma i sa pam tari.

¹¹ O Abaram, der nam o Sara der sa takano ma o Sara i pobo. Ikut, una nun a nurnur, o Abaram i pet lar pasi sur in ulabo pas tu nutunu, uni i tasmani lena, o God in pam sot pas anun a liliman, ra i sa uliliman tari. ¹² I mo ra, anun a kabotaro det susut elar nama kum nangnang sapat netes una maino, ma elar kai nama woio taginago una usalin, ra ka din luk lar pasi. Det wanpat kut tagun ara musano ra i takano laulau.

¹³ A taro rop ri det nurnur tuk ra det mat. Ra det laun nin upiso, ka det utur ukai a kum utna ra o God i sa uliliman tar det nami. Det tama i kut tagitiro bakbak, ma det gas pasi. Ma det watungi un det ut lena, det kis na usiro kut, ma det in laun lilik pas kut nin upiso. ¹⁴ Ra a taro det watungi lenri, i talapor lena, det sisio sur anundet tu tamon. ¹⁵ Ra gunuk det in nuk melet pas

a tamon ra det sa wan gusuni, det in pet lari sur det in millet melet. ¹⁶ Ikut, anundet a nemnem ut sur a tamon sapat netes una langit, a tamon ra i wakak taun a tamon ra det sa wan pas gusuni. I mo ra o God ke maimai sur det in watungi lena, i anundet a God, uni i sa waninar tar a tamon sur det.

¹⁷⁻¹⁸ Una nun a nurnur, o Abaram i pitar tar o nutunu, o Aisak torom o God elar nama etabor, una du bung ra o God i lari. A lingmulus, o God i sa uliliman tari lena, "A kum tumtubum det in nanpat tagun o Aisak." *Stat 21:12*

Ikut, ra o God i inanosi sur in um doko o nutunu, i ara sot kut, elar nama etabor, o Abaram i mulaot ma i waninar sur in pam soti. ¹⁹ O Abaram i tasmani lena o God in pet lar pasi sur in ukatutur melet pas a kum minat. Ra o Abaram i rakon sikot pas o Aisak melet, i lenutra o God i ukatutur melet pasi gusun a minat.

²⁰ Una nun a nurnur, o Aisak i wasiso udan tar o Jekop ma o Iso una kum utna ra kura numur in nanpat.

²¹ Una nun a nurnur, o Jekop, ra milau mo sur in mat, i wasiso udan tar aru nutnutun o Josep. I sukul ukai pasi nam anun in nubuku ma i lotu torom o God.

²² Una nun a nurnur, o Josep, ra milau mo sur in mat, i wasiso una inawan pirso anun a taro Israel tagitong o Ijip, ma i inanos tar det sur det in los a kum sursurino ra det in nan.

²³ Una nunder a nurnur, o taman o Moses ma o nano der munu i a tulu kalang numur tan anun a usus, uni der tama i lena a wakak na nat, ra ka der ngaran a warkurai anun a king.

²⁴ Una nun a nurnur, o Moses, ra i sa barman, ke mulaot sur din watungi lena, der ano nama nutun o Pero. ²⁵ I pilok pasi sur in taramo a ngunungut tomo nama taro anun o God, ma ke nemi sur in mur a gasgas tagun a kum sakino petutna ra ken suano i. ²⁶ I nuki lena, a maimai ra in taramo i una risan o Karisito, i wakak doko taun a kum ululeng tong o Ijip, ra a matano i ka doko, uni i tamtama sur anun a ikul numur. ²⁷ Una nun a nurnur, o Moses i katutur tagitong o Ijip, ma ke ngaran a kankan anun a king. I tur dekdek, uni i tama tar o God, i ra ka di tama tari. ²⁸ Una nun a nurnur, o Moses i pam a labino bung na lotu na Wanlakai, ra i itula sur din lamir a kum papor matansako nama gap, sur a ensel tagun a um doko a kum mugano nat

na musano, gong i um doko a kum mugano nat musano anun a taro Israel.

²⁹ Una nundet a nurnur, a taro Israel det wan kutus una Merek na Tasi lenlari ra i sa mamaso. Ikut, ra a taro Ijip det lari sur det in nan lenra, det kongo rop ra det mat.

³⁰ Una nurnur anun a taro Israel, in noworo na wat ra i tur talilis a tamon Jeriko i terege pirso, numur tan a wonom mawit na bung ra det talilis in noworo.

³¹ Una nun a nurnur, o Reap, a pamuk na ino ke iru tomo nama taro Jeriko ra det pitarngat torom o God, uni i gas pas aru tene tamtama eno anun a taro Israel.

³² Ra asau melet mo an watungi? In suano doko i ra an saksakutna un o Gidion, o Barak, o Samson, o Jepta, o Dewid, o Samuel, ma a kum poropet kai. ³³ Una nundet a nurnur, a taro ri det waim tomo nama kum king ma det winim rop pas det, det papam nama tokodos na petutna, det los pas a kum utna ra o God i uliliman tar det nami, ra det pam bat a wan a kum laion. ³⁴ Det um doko a karangop na sungun, ma det laun sikot gusun a kum totok na inaim. Ka det dekdek, ikut o God i udekdek det, det los a dekdek una inaim ra det lu a kum taro na inaim anun a kum king.

³⁵ Una nundet a nurnur, a kum wardain det gas pas a kum kukundet ra det sa laun melet gusun a minat. A ramano taro kai di ukadik laulau det, tuk ra det mat, uni ka det nemi sur det in ipul ru o God sur din palos ru det. Det pami lenra sur det in los a nilaun melet gusun a minat ra i wakak sakit taun a nilaun nin upiso. ³⁶ A ramano taro di urongon laulau un det ma di miras det. A ramano taro kai di ker det nama kum sen ma di uruk det una karabus. ³⁷ Di duku doko det nama kum watat, di tok kutus det sur a ru kukur, di so doko det nama kum totok na inaim. A ramano taro det emar kut nama pino sipsip ma a pino meme, det dardar doko, di ukadik det ma di ban laulau det. ³⁸ A petutna anundet ra det nurnur i wakak taun a petutna anun a taro taginin una rakakon bual, ra ke sot sur det in laun epotor tandet. Det laun tuptupukus una kum nubual kalako taro uni, ma a kum tangai, ma a kum mato na wat ma a kum tungtung kura una piso.

³⁹ Det rop ri, o God i gas nam det ra i wasiso puaso un det lena det wakak, kibino una nundet a nurnur. Ikut, ka det utur ukai asau ra o God i sa uliliman tar det nami, ⁴⁰ uni o God i sa waninar tar ara kisapi sur dat rop, ra i wakak sakit taun a kisapi

numugu. Ke nemi sur in utokodos mugu pas det kut sur det in tokodos sakit, awu. I nemi sur in utokodos tomo pas det ma dat.

12

O God i ser ukodos a kum nutnutunu

¹ A susut na tene nurnur tagun numugu det tur talilis pas dat ma det upuaso a petutna na nurnur. I mo ra, i wakak sur dat in lakro ru a kum sau rop ra i ser turbat dat una nundet a inawan, ma a kum sakino petutna kai ra i ser ker ukai dat. Ma dat in kalabor, ma gong a pinindat i ngoro una kalkalabor una nundet a kinalabor, ra o God i sa waninar tari sur dat. ² Dat in tamtama tokodos sur o Iesu, i ra a kibin anundet a nurnur, ma i ra in ulabo pas anundet a nurnur tuk in kudulano. O Iesu i mat netes unin nanai kutus, a utna na maimai mulus. Ikut ke nuk pas a maimai ra, i pitar tari ut sur in taramo a ngunungut ma in mat unin nanai kutus, uni i tasmani lena, numur in los a labino gasgas. Ra uniri i sa kis una papor sot na laman a kiskis na king anun o God.

³ Mot in nuk pas o Iesu, i ra i taramo a kum mamaut, ra a kum tene sakino det pami uni, sur gong a pinimot i ngoro ma gong mot tusako. ⁴ Mot waim tomo nama kum sakino petutna, ikut ka di um doko mot utmakai. ⁵ Mot sa dumanu ru a kum wasiso na ururagot ra o God i watung tari torom mot a kum nutnutunu lena, “Nutunglik, ra a Labino i ukodos ui,

gong u nuki lena a utna oros kut,

ma gong u tusako, ra i watung puaso anum a kum sakino petutna torom ui.

⁶ Uni a Labino i ukodos det ra i maris det, ma i takalo det ra i watung det a kum nutnutunu.” *Snd 3:11-12*

⁷ Mot in tur dekdek una kum mamaut, uni i ra, a kisapi ra o God i ukodos mot uni. Anun a pinapam ra, i elar nama pinapam ra a musano i ser pami torom a kum nutnutunu. Uni, osi na nat ra o tamano ken ukodosi? ⁸ O God i ser ukodos a kum nutnutunu rop. Ma ra ke ukodos mot, i talapor lena awu sur mot a kum nutnutunu mulus, di usus oros tar mot kut una kisapi. ⁹ A kum tamtaman dat taginin upiso det ukodos dat, ma dat ru det una nundet a kum etowo torom dat. Ra dat pami lenra, i lingmulus sakit sur dat in mur a etowo ra a Taman a kum niondat i ukodos dat nami, ma dat in laun. ¹⁰ A kum tamtaman dat taginin upiso det ukodos dat

11:29: Kis 14:21-31 **11:30:** Jos 6:12-21 **11:31:** Jos 2:1-21; 6:21-25; Jem 2:25 **11:32:** Het 6:11-8:32; 4:6-5:31; 13:2-16:31; 11:1-12:7; 1 Sml 16:1-1 Kin 2:11 **11:33:** Dan 6:1-2 **11:34:** Dan 3:23-27 **11:35:** 1 Kin 17:17-24; 2 Kin 4:25-37 **11:36:** 1 Kin 22:26-27; 2 Sto 18:25-26; Jer 20:2; 37:15; 38:6 **11:37:** 2 Sto 24:21 **12:1:** 1 Kor 9:24-25 **12:5:** Jop 5:17; Tam 3:19 **12:7:** Lo 8:5

a nat na du bung kut, elar nama kisapi ra det nuki lena i wakak. Ikut, o God i ukodos dat sur dat in wakak, sur dat in talapor elar nami. ¹¹ Una du bung ra o God i ser ukodos dat, ka dat gasgas, dat taramo a ngunungut kut. Ikut det ra o God i ukodos det ma det mur anun a etowo, numur det in wu a malmal ma a tokodosino una nundet a nilaun.

¹² I mo ra mot in udekdek a kum lamamot ra ke dekdek ma a kum kikumot kai. ¹³ Ma “mot in nanan una tokodos na kisapi,” *Snd* 4:26

sur a kikumot ra ke dekdek gong i tikiras, in wakak melet kut.

Gong dat rosumur gusun o God

¹⁴ Mot in dekdek sur mot in kis na malmal tomo nama taro rop, ma mot in madek o God sur in gos talapor anumot a nilaun. Ra o God ke gos talapor a nilaun anun taio, ken tama a Labino. ¹⁵ Mot in tumarong, sako taio ken los a marmaris anun o God. Ma mot in tumarong, sako taio in elar namin mapak na wakakor na duwai ra in lubang pat ma in pitar a marnaut torom mot, ma in ban udur pas lako susut. ¹⁶ Mot in tumarong, sur gong taio i pam a pamuk na petutna, ma gong taio i rosumur gusun o God, elar nam o Iso. Ra i milau sur o Iso in los a susut na ululeng tan o tamano, uni i a mugano nutunu, o Iso i siuru ru a kum ululeng ra, sur ara pelet na utna kut. ¹⁷ Mot sa tasmani lena, numur, ra i nemi sur in los melet pas a wasiso na udan tan o tamano, o tamano i ipul ru i mukut. A lingmulus, i tangis sur in los melet pas a wasiso na udan ra, ikut ke sio melet pas tu kisapi sur in pukus asau ra i sa pam tari.

¹⁸ Ka mot wanpat una tangai Sainai elar nama taro Israel. A tangai ra, di pet lari sur din tulani. Tiro iai a sungun i kunkunabor, ma det tama a dumirum ma a mirum na bakut ma a labino wuwu. ¹⁹ Det longoro a tinangis nin tuwuru, ma in nalngan ara ra i wasiso. Ra det longoro i, det saringi sur gong mo i wasiso torom det, ²⁰ uni det ngara doko una warkurai lena, “Ra tu musano in tulan tar a tangai ra, o tu weweguno in tulani, din duku doko i.” *Kis* 19:12-13

²¹ A kum utna ra, ra det tama i, i ungara doko det, ra o Moses i watungi lena, “A ngara, ma a neneder.” *Lo* 9:19

²² Ikut, mot sa wanpat una tangai Saion, i o Jerusalem kusapat una langit, a tamon anun o God, ra i laun. Mot sa wanpat torom a kum ariparip na ensel ra ka din luk lar

pas det, ra det kis tomo nama gasgas. ²³ Mot sa wanpat una kinkinis tomo anun a kum mugano nutnutun o God, det ra di sa tumus tar a kum risandet sapat netes una langit. Mot sa wanpat torom o God, i ra a Tene Warkurai anun a taro rop, ma torom a nion a kum tene tokodos, ra o God i sa utokodos sakit pas det, ²⁴ ma torom o Iesu, i ra i tur epotor tan o God ma a taro, ra i pam tar a matok na kunubus, sur i dat tomo tar det. Mot sa wanpat torom a gapino, ra di sa lamlamir taru nami. A gap ri i wasiso puaso una kum utna ra i wakak sakit taun asau ra a gapin o Abel i wasiso uni.

²⁵ Mot in tumarong, sur gong mot rosumur gusun o God ra i wasiso. Det ra ka det mur anun a wasiso ra i utumarong det tong una tangai Sainai, ka det kalabor eno lar pas gusun a warkurai na minabalu. I lingmulus sakit, ka dat in kalabor eno lar pas, ra dat rosumur gusun o naro ra i utumarong dat tagisapat una langit. ²⁶ Ra o God i wasiso tong una tangai Sainai in nalngano i tang a rakrakon bual. Ikut uniri, i sa liliman taru lena, “Ara dino melet an tang a rakrakon bual, ma awu sur a rakrakon bual kut, a langit utkai.” *Hag* 2:6 ²⁷ Ra o God i watungi lena, “Ara dino melet,” a kukuraino lena in los ru a kum utna ra i tugunu kut, a kum utna ra i sa ukis tar det. In los ru det sur a kum utna ra ka din gunu lar pas det, det in kis ut.

²⁸ Dat in watung wakak torom o God, uni dat sa utur ukai a matanitu ra ken tugunu. Dat in lotu torom o God nama urur ma a nginara ra i elar nam anun a nemnem, ²⁹ uni anundat a God i elar nama karangop na sungun, ra in tun rop ru a kum ututna rop.

13

A petutna ra o God in gas nami

¹ Gong mot mana nama marmaris eteta-lai torom mot, lar a kabo tistisino. ² Gong mot dumano i sur mot in gas pas a kum usiro. Uni ara taro ra det pam a ngasino ra, det sa gas pas a kum ensel, ikut ka det tasmani. ³ Mot in nuk pas det ra det kis una karabus, elar nami ra mot karabus tomo utkai nam det. Mot in nuk pas det kai ra di ban laulau det, elar nami ra di ban laulau mot utkai.

⁴ I wakak ra mot rop, mot in ru a kinkinis na nolin, ma gong tu dur na petutna in kis uni. Uni o God in kuro taio ra i pam a sakino nam tu ino anun taio o tu musano

anun taio, ma taio kai ra i pam a kum pamuk na petutna.

⁵ Mot in tamtamabat mot sur mot in langolango gusun a nemnem sur a mani. Mot in gas kut nama sau ra kura tamot. Uni o God i sa watung tari lena,

“Kan madek ru ui,
ma kan nan gusun ui.” *Lo 31:6*

⁶ I mo ra ka dat in ngara, dat in watungi kut lena,

“A Labino anung a tene warut,
ma kan ngara.

Asau ra a taro det in pami un iau?” *Sng 118:6-7*

⁷ Mot in nuk pas anumot a kum mugumu, ra numugu det sa ususer tar mot una wasiso anun o God. Mot in nuk pas anundet a ngas na nilaun, ma mot in mur anundet a nurnur. ⁸ O Iesu Karisito ken senene. Numugu, ma uniri, ma numur ma ken rop, o Iesu Karisito i elar kut.

⁹ Gong mot mur a kum wur ngas na etowo ra i ben raro mot. I wakak ra a marmaris anun o God in udekdek a niondat. Ra dat mur a kum warkurai una utna na inangon, ken udekdek a niondat, ma ken warut det ra det ser mur a kum warkurai ra.

¹⁰ Ikut anundat a kabulu na tuntun etabor i kis, ma ka di mulaot a kum tene etabor torom o God ra kura det papam tiro na rumu na sel, sur det in nangon taguni. ¹¹ A mugumu na tene etabor torom o God i ser los ruk a gapin a kum wewegua una nubual ra i Tabu Sakit, sur a etabor ra in unus ru a kum sakino petutna. Ikut, a kudulano pinin a kum wewegua di tun ru det nago piso utamon. ¹² Lenkaira o Iesu i taramo a ngunungut ma i mat nago upiso tan a matansako ina labino tamon, sur in gos talapor a taro nama gapino ut, sur det a taro anun o God. ¹³ I wakak sur dat in nan toromi kunago upiso utamon, ma dat in taramo a maimai tomo nami. ¹⁴ Uni awu sur anundat a tamon ri in kis tukum. Dat tamtama sur a tamon ra kura numur in nanpat.

¹⁵ I mo ra, una kum bung rop dat in watung ulabo pas o God, una risan o Iesu. A wasiso na ulabo ra, in elar nama etabor ra dat pitari torom o God, ra a wandat i upuaso a risano. ¹⁶ Gong mot dumano i sur mot in pam a kum wakak na pinapam ma mot in tabor a taro. Uni a pinapam ra, i elar nama etabor torom o God ra in gas uni.

¹⁷ Mot in mur a wasiso anun anumot a kum mugumu, ma mot in kis utuntudu

ina anundet a warkurai, uni det tamtamabat mot, ma numur det in wasiso talapor umatan o God una nundet a kum pinapam torom mot. Ra mot in mur anundet a wasiso, det in gas una nundet a kum pinapam. Ikut, ra awu, det in papam nama tupunuk, ra ken warut mot.

¹⁸ Mot in wararing sur met. Met tasman mulusi lena a nuknuki met ke takun met un tu utna, ma met nemi sur anumet a petutna in tokodos una kum utna rop. ¹⁹ Ma a saring dekdek mot, sur mot in wararing, sur o God in tulu lakit melet iau torom mot.

A niaring sur o God in warut dat

²⁰ A wararing torom o God ra i ser pitar a malmal. I ra i ukatutur melet pas anundat a Labino o Iesu gusun a minat. O Iesu, i a labino tene tamtamabat anun a kum sipsip ra i mat ma i pitar tar a gapino ut sur in pam a kunubus ra in tur tukum. I mo ra o God i ukatutur melet pasi gusun a minat. ²¹ A wararing torom o God sur in tabor mot nama kum wakak na petutna rop, sur mot in mur anun a nemnem. A wararing kai un dat, lena, una pinapam anun o Iesu Karisito, o God in papam una nilaun anundat sur asau ra in gas nami. Dat in watung ulabo pas o Iesu Karisito, ken rop ma ken rop. Amen.

A wasiso na marmaris

²² A kum tistising, a saring pas mot sur mot in longoro wakak a wasiso na warut ri, uni a pas ri a tumusi torom mot awu sur i walos. ²³ An inanos mot, una tisindat o Timoti, di sa upirso ru i gusun a karabus. Ra in nanpat lakit nin, mir rop mir in nanpat torom mot.

²⁴ Mot in pitar anumet a marmaris torom anumot a kum mugumu rop, ma torom a taro rop anun o God. Det kai tagitong o Itali det pitar anundet a marmaris torom mot.

²⁵ A marmaris anun o God in kis torom mot rop.

A Pas anun o Jems

A wasiso talapor mugu

O Jems i tumus a buk ri. A susut na tene mananos det nuki lena o Jems ri, a tisin o Iesu (tama Mt 13:55). O Jems i ara labino mugumugu anun a taro na lotu sapat o Jerusalem (tama Ap 15:13; 21:18).

I tumus a pas ri torom a kum tene nurnur, ra det etorom a susut na maut tan a taro ra ka det nurnur. Det lu ru a kum tene nurnur. Ra numur det kis na usiro una kum tamon.

Una pas ri, i wasiso una wakak na petutna ra a kum tene nurnur det in muri. I inanos dat kai lena, anundat a wakak na petutna i ulingmulus anundat a nurnur.

A inawan ina Pas Jems:

A turturkibin ina buk ri (1:1)

A nurnur ma a mananos (1:2-8)

A kum sibo na taro ma a kum tene gongon (1:9-11)

Dat in tur dekdek una kum ululam ra in nanpat (1:12-18)

Dat in longoro a wasiso anun o God ma dat in muri (1:19-27)

Dat in ru a taro rop (2:1-13)

A wakak na pinapam in nan tomo nama nurnur (2:14-26)

In karmendat (3:1-18)

A utumarong torom det ra det nem a ngasino tagun a rakrakon bual (4:1-5:6)

Dat in tur dekdek una nurnur (5:7-20)

¹ Iau o Jems a tultul anun o God ma anun a Labino o Iesu Karisito, a tumus a pas ri torom mot a noino ma aru kabotaro Israel. Mot kis sarara una kum tamon una rakrakon bual, uni det nem na um doko mot. A marmaris torom mot.

A nurnur ma a mananos

² A kum tistising, ra lako kum ngas na maut in nanpat torom mot, mot in gas, ³ uni mot tasmani lena, a kum maut, ra di lar anumot a nurnur nami, in ulabo anumot a tuntunur dekdek. ⁴ Ra mot in tur dekdek, mot in tokodos sakit una numot a nilaun rop, ma ka mot in sibo sur tu wakak na petutna.

⁵ Ra taio tagun mot i sibo sur a mananos, in saring o God suri. Ra o God in tabori nami, uni i ser tabor dat rop, ma ke ser bitan tu utna. Ma ke ser kankan torom taio ra i sasaring. ⁶ Ikut ra in wararing, in wararing nama nurnur, ma gong i wur nuknuk. Uni osi ra i wur nuknuk, i elar kut

nama top, ra a wuwu i wup tuptupukusi. ⁷ A musano ra i wur nuknuk, gong i nuki lena, in rakon tu utna tan a Labino. ⁸ Uni aru nuknukino, ra ken tur dekdek una nun a kum pinapam rop.

A sibo na musano ma a tene gongon

⁹ Ra tu tisindat una nurnur i sibo, i wakak ra in gas kut, uni o God ut i sa ulabo pasi.

¹⁰ Ra taio a tene gongon, in gas kut ra o God in unatino pasi. Uni, anun a nilaun i elar kut nama puspupus na duwai, in rop oros kut.

¹¹ Uni in matanas in pusu pat nama labino mararongino, ra in rang in nanai, ma a puspupusino in puku, ra a wakak na tamtama ino in rop. Lenkutkai lar a tene gongon in rop tomo nam anun a kum ululeng.

A kum ululam

¹² O naro ra i tur dekdek una kum larlar, i dan. Uni, ra i winim pas a kum larlar ra di lar anun a nurnur nami, in rakon a kukup na nilaun tukum, ra o God i sa liliman taru sur in pitari tandet ra det nemi.

¹³ Ra a ululam in nanpat torom taio, gong i watungi lena o God i pitari. Uni a sakino ken ulam lar pas o God, ma o God ut ken ulam taio. ¹⁴ A taro rop, taktakai, anundet a kum laulau na nemnem ut i ulam pas det, ma i dat pas det, sur det in pam a sakino.

¹⁵ Numur, ra anundet a laulau na nemnem in labo, in usus pat pas a sakino petutna. Ra a sakino petutna in labo, in usus pat pas a minat.

¹⁶ A kum wakak na tistising, gong mot madek tar taio sur in toro pas mot. ¹⁷ A kum wakak na etabor rop, ra det tokodos sakit, det wan pirso tagisapat una langit. Det wanpat tan o Tita, i ra i ukis in matanas, a kalang ma a kum nangnang. Ikut o Tita ke ser keles, ma ke pukpukus anun a ngasino elar namin matanas, ra in sisio pas una waspi ma una mirum awu. ¹⁸ Una nun a nemnem ut, o God i usus matok dat nam anun a lingmulus na wasiso. I pilok pas dat gusun a kum utna na ukukis rop, sur dat in elar nama kum mugano wino duwai ra di ser etabor nami torom o God.

Dat in longoro ma dat in muri

¹⁹ A kum wakak na tistising, mot in tasman a utna ri: I wakak ra mot rop, mot in longoro lakit, ikut gong mot wasiso lakit, ma gong mot kankan lakit. ²⁰ Uni a kankan anun taio ken waruti, sur in pam a tokodos na petutna ra o God i nemi. ²¹ I mo ra mot in mana gusun a kum dur na petutna, ma a kum sakino, ra kuri i bukus una rakrakon bual. Ra mot in unatino pas mot, ma mot in mur a wasiso ra di sa marut tari una

balbala mot, a wasiso anun o God ra in ulaun mot.

²² Mot in mur a wasiso anun o God, ra gong mot longoro oros tari kut, sako mot in toro pas mot melet ut. ²³ Osi ra i longoro oros tari kut a wasiso anun o God, ma ke muri, i elar nama musano ra i tama in masarino una galas. ²⁴ Ra in nan gisen, uniutra in dumano ru in masarino ra i tamtama pepetlai. ²⁵ Ikut, ra taio in longoro wakak a tokodos na warkurai anun o God, ma in ser muri, ma ke dumano i, a musano ra, in dan una nun a kum pinapam. A warkurai ri, ra in longoro i, i ser ulangolango a taro.

²⁶ Ra taio in nuki lena, i sa lingmulus na tene lotu, ikut, ra ke tumarong in karmene, i toro pasi ut, ma anun a lotu in utna oros kut. ²⁷ Ikut, ra dat warut a kum nat na soi, ma a kum ula, ra det pot na marmaris, ma dat tumarong dat kai gusun a kum dur na petutna tagun a rakrakon bual, iri a lingmulus na lotu, ra i tokodos, ma katu utna i raro uni umatan o God a Tamandat.

2

Dat in pam a takano petutna kut torom a taro rop

¹ A kum tistising, mot ra mot nurnur una nundat a Labino o Iesu Karisito, ra i bukus nama minamar, un pam a takano petutna kut torom a taro rop, ma gong u tur takano papor. ² Ra lako ru musano der in ruk una numot a kiwung na lotu, ra ara pasander i ubek a ring na gol, ma i emar nama kum wakak namalu, ma ara kai, a sibo na musano i emar kut namin turai na malu. ³ Ikut, ra mot urur kut torom i ra i emar nama wakak na malu ma mot watungi tano lena, “Un kis nin una wakak na kiskis,” ma mot watungi kut torom a sibo na musano lena, “Un tur ut tiro iai,” o “Un kis kut nin upiso nisan aru kiking,” ⁴ ke takai anumot a ngasino torom a taro rop, ma mot warkurai kut nama sakino nuknuki mot.

⁵ A kum wakak na tistising, mot in longoro iau: Pepetlai, ka mot tasmani lena, o God i pilok pas a kum sibo na taro nin upiso, sur det in tene gongon una nurnur? Det in rakon pas a matanitu ra o God i sa uliliman tari, sur in pitari tandet ra det nemi. ⁶ Ikut mot, mot ban umaimai i kut a kum sibo na taro. A kum tene gongon, det ser ukis laulau mot nama dekdek ra det utur ukai i, niko? Ra det dat pas mot sur mot in tur una warkurai. ⁷ O God i pitar tar a wakak na rising anun o Karisito torom

mot. Ma osi ra i ser watung laulau a rising ri? A kum tene gongon kut.

⁸ Mot in pam sot pas a warkurai ra i labo sakit una Buk Tabu. I lenri, “Un nem o pasam elar nami ra u nem ui ut.”

Wkp 19:18

Ra mot pami lenra, mot pam a tokodos na petutna. ⁹ Ikut, ra mot pam a wakakino torom ara taro kut, ma ara taro awu, mot pam a sakino petutna. Ra a kum Warkurai anun o God i takun sot pas mot lena, mot a kum tene lakai warkurai. ¹⁰ Uni osi ra i mur a kum Warkurai rop, ikut i kutus ara tagun a kum Warkurai, din warkurai i elar nam o naro ra i lakai a kum Warkurai rop. ¹¹ O God i watungi lena, “Gong u pam a sakino nam tu ino anun taio o nam tu musano anun taio,” ma i watungi kai lenri, “Gong u um doko taio.” Ra ko pam a sakino nam tu ino o tu musano, ikut u um doko taio, ui a tene lakai warkurai.

¹² Mot in wasiso ma mot in papam elar nam det ra o God in kuro det nama warkurai ra i ser ulangolango pas a taro nami. ¹³ Uni, osi ra ke lason una marmaris, o God kai ken marisi una bung na warkurai. Ikut, o naro ra i lason una marmaris, o God in marisi una bung na warkurai.

A nurnur ra i wan tomo nama wakak na pinapam

¹⁴ A kum tistising, in wakak pepetlai ra taio in watungi lena i nurnur, ikut ke pam tu wakak na pinapam? Pepetlai, a ngas na nurnur ra, in ulauni o awu? ¹⁵ Ra taio tagun a kum tistisin dat, tu ino o tu musano, ka tin namalu anunu, ma kalako utna na inangon, ¹⁶ ra taio tagun mot in watungi tano lena, “Un nan nama malmal, un emar ma un masur,” ikut, ra ken tabori nam tu utna ra i sibo suri, anun a wasiso ra in warut petlan o naro ra i sibo? ¹⁷ Lenkutkai lar a nurnur, ra ke wan tomo nam tu wakak na pinapam, a nurnur ra, a minatino kut.

¹⁸ Ra taio kai in watungi lena, “Ui u nurnur, ma iau, a pam a kum wakak na pinapam.” Un upuaso anum a nurnur torom iau, ra ke wan tomo nama wakak na pinapam. Ra iau, an upuaso anung a nurnur tam, nam anung a kum wakak na pinapam. ¹⁹ U nurnur lena o God i ara kut. I wakak. A kum laulau na nion kai det nurnur lenra, ma det ngara suri, ra det neneder.

²⁰ Ui a longlong ui! A nurnur ra katu wakak na pinapam tomo nami, i utna oros kut. Pepetlai, u nemi sur an upuaso a wasiso ra tam? ²¹ A tamandat o Abaram

1:22: Mt 7:26; Rom 2:13 1:25: Rom 8:2; Jem 2:12
1:26-28 2:8: Mt 19:19; Gal 5:14 2:9: Lo 1:17
Gal 6:2; Jem 1:25; 1 Pit 2:16 2:13: Mt 5:7; 18:32-35

1:26: Sng 141:3 2:1: Ap 10:34; Jem 2:9 2:5: 1 Kor
2:10: Mt 5:19 2:11: Kis 20:13-14; Rom 13:9 2:12:
2:15: 1 Jon 3:17 2:18: Gal 5:6 2:21: Stat 22:9-12

i pitar tar o nutunu, o Aisak, elar nama etabor torom o God netes una kabulu na tuntun etabor, ra i pami nama kum watat. Una nun a pinapam ra, di watungi lena, i a tene tokodos umatan o God. ²² Un tama i, anun a nurnur i wan tomo nam anun a kum wakak na pinapam. Anun a nurnur ra i wan tomo nama pinapam, i pam sot pas anun a nurnur, sur in kudulano. ²³ Ra di pam sot pas a wasiso una Buk Tabu ra i watungi lenri, "O Abaram i nurnur un o God, i mo ra o God i watungi a tene tokodos."

Stat 15:6
Ra o God i watungi kai lena der pasano. ²⁴ Mot tama i, o God i watung taio a tene tokodos, kibino una nun a kum wakak na pinapam, ra awu sur una nun a nurnur kut. ²⁵ Ra lenkutkai lar o Reap, a pamuk na ino. O God i watungi lena i tokodos umatano, kibino una nun a wakak na pinapam ra i tamtamabat aru tene tamtama eno anun a taro Israel, ra i tulu eno ru der melet una ara kisapi gisen.

²⁶ Taio ra a niono i wan gusuni, i a minatino. Lenkutkai lar a nurnur, ra ke wan tomo nam lako wakak na pinapam, a nurnur ra, a minatino kut.

3

In karmendat

¹ A kum tistising, gong lako susut tagun mot det wanpat a kum tene ususer tagun a lotu, uni mot tasmani lena, a warkurai anun o God torom met, a kum tene ususer, in dekdek sakit tan a warkurai torom a taro gisen. ² Dat rop dat raro una susut na utna. Ikut, ra taio ke raro un tu utna una nun a wasiso, i ra i tokodos sakit, ma in pet lar pasi sur in ukodos pas anun a nilaun rop.

³ Ra dat in ubek a nat na du aen una wan a os sur in tarom tandat, dat in pet lari sur dat in dat pukus pas a kudulano os nami. ⁴ Mot in tama i kai a sip sel. I labo doko, ma a kum dekdek na wuwu det ukalabori, ikut din ukodosi kut nama nat na stia ino, sur in mur a nemnem anun a kiapten.

⁵ Lenkutkai lar in karmendat, i ara nat na du pinindat, ikut i ulabo pasi nama kum lamlabino utna ra i ser pami. Mot tama i, tin na nat na lakit ina sungun kut in pet lari sur in tun rop ru tu labino lokor. ⁶ In karmendat i elar nama sungun. I ara du pinindat, ra i bukus nama laulau ino, ra i ban udur a kudulano pinindat rop. I ungangon anundat a kudulano nilaun nama sungun tagun a labino sungun, ra ke ser mat. ⁷ A taro det sa umarom pas a kum wewegua, a kum piko, ma a kum utna ra det kaukwar una piso, ma a kum utna

ra det laun sa utasi. ⁸ Ikut in karmendat, kataio in ulason lar pasi, ma katutaio kai in ukodos lar pasi. I laulau sakit, ma i bukus nama sangsagor.

⁹ Dat watung ulabo pas a Labino a Tamandat nam in karmendat, ma dat watung laulau i kai a taro nami, det ra o God i ukis tar det elar nama malalarino. ¹⁰ A wasiso na watung ulabo a Labino, ma a wasiso ra i ban laulau taio, der rop, der ser pirso kut gusun a wandat. A kum tistising, ke tokodos lenra. ¹¹ A danim ra i mapak, ma a danim ra i wakak, der in sal tomo pepetlai gusun in teken matmatano danim kut? ¹² A kum tistising, in nanai na fig ken wu lako wino oliw, ma in nanai na wain kai ken wu lako wino fig. Lenkutkai lar a wakak na danim ken nanpat tagun a mapak na danim.

A mananos tagisapat una langit

¹³ Osi na pasamot i mananos, ma i tastasman? I wakak ra in upuaso i una nun a wakak na nilaun, una nun a kum wakak na pinapam, tomo nama ngasino ra i unatino pasi ut. A ngasino ra i unatino pasi ut, i wanpat tagun a mananos mulus. ¹⁴ Ikut, ra mot nuknuk laulau sur tu utna anun taio, ma mot nuknuk sur tu kisapi sur mot in ulabo pas mot nami, gong mot watung ulabo pas mot uni, ma gong mot toro bat pas a lingmulusino. ¹⁵ A mananos ra, awu sur tagisapat netes una langit, a mananos kut taginin upiso. I wanpat kut tan o Satan, ma awu sur tagun a Tokodos na Nion. ¹⁶ Uni, osi ra i nuknuk laulau sur tu utna anun taio, ma i nuknuk sur tu kisapi sur in ulabo pasi nami, anun a nilaun in lokolokor ma i bukus nama wur sakino petutna.

¹⁷ Ikut osi ra i utur ukai a mananos tagisapat una langit, a mugano utna in tokodos, ma in tene malmal, ma in ser nuk pas a taro gisen, ma in ser unatino pasi, in bukus nama marmaris, ma in wu a wakak na wino una nun a nilaun, ma in pam ara ngas na petutna kut torom a taro rop, ma katu torotoro tiro una nun a nilaun. ¹⁸ A tene malmal ra i ser papam nama malmal, i elar nama tene minarut. Ma a utna ra i pasong pasi, i a tokodos na petutna.

4

Det ra det nem a ngasino tagun a rakrakon bual det ebar nam o God

¹ Asau a kibino ra mot waim ma mot engaras etetalai? I kibino una numot a kum laulau na nemnem ra det waim una numot a nilaun. ² Mot nem a kum utna, ikut ka mot utur ukai i. Mot um doko a taro,

ma mot nuknuk laulau sur a utna anundet, ikut ka mot pam ukai a utna ra mot nemi. Mot engaras ma mot waim. Ka mot pam ukai a kum utna ra mot nemi, uni ka mot saring o God suri. ³ Ra mot wararing, ka mot utur ukai a utna ra mot sasaring suri, uni a nuknuki mot ke tokodos. Mot sasaring kut sur a utna ra in ugargas mot ut.

⁴ Mot sa wan gusun o God, elar nama ino ra i wan pas gusun anun a musano, ra i nolin tomo nama ara musano bulung. Ka mot tasmani lena, ra mot nem a petutna tagun a rakrakon bual, mot a kum ebar anun o God? Osi ra i pilok pas a rakrakon bual sur der pasano, i a ebar anun o God. ⁵ Pepeulai, mot nuki lena a Buk Tabu i wasio oros kut? I watungi lena, "A Nion o God, ra o God i pitar tari tandat, i nem dat sur dat anunu ut." ⁶ Ra a marmaris ra o God i pitar tari tandat i labo sakit. A Buk Tabu i watungi lenri,

"O God i nget det ra det ser ulabo pas det, ikut i maris det ra det ser unatino pas det." *Snd 3:34*

⁷ Mot in unatino pas mot, ma mot in mur o God. Mot in turbat ru o Satan, sur in nan gusun mot. ⁸ Mot in nan milau o God, ra o God in nan milau mot. Ma mot a kum tene sakino, mot in gos a kum lamamot, ma mot ra aru nuknuki mot, mot in utalapor a balbala mot. ⁹ Mot in tupunuk, mot in domos, ma mot in tangis una numot a kum sakino petutna. Mot in pukus anumot a ninongan sur a tinangis, ma mot in pukus anumot a gasgas sur a tupunuk. ¹⁰ Mot in unatino pas mot umatan a Labino, ra in labo pas mot.

Gong u mang a pasam

¹¹ A kum tistising, gong mot mang etalai mot. Osi ra i mang tu tisinio, o i kuro i, i watung laulau a Warkurai anun o God ma i kuro a Warkurai ra. Ma ra un kuro a Warkurai, awu sur u muri, u nuki kut lena ui ut u labo tauni. ¹² O God kut i pitar a Warkurai, ma i sot kut a Tene Warkurai. O God kut i topasi sur in warkurai a taro sur a nilaun, o sur a iniru. Ra ui osi, sur un warkurai o pasam?

A utumarong torom a taro ra det ulabo pas det

¹³ Mot longoro, mot ra mot ser watungi lena, "Uniri o markan met in nan sur tu tamon, ma met in kis iai ara kilalo. Met in kukul ma met in siuru sur met in pam pat lako mani." ¹⁴ Ikut ka mot tasman asau

ra in nanpat torom mot markan. Anumot a nilaun i elar nama sau? Mot elar kut namin nawal, ra i wanpat pas kut, ma i rorom melet. ¹⁵ Ikut, i wakak sur mot in watungi lenri, "Ra a Labino i nemi, met in laun ma met in pami lenri o lenra." ¹⁶ Ikut uniri, mot sa warango pas mot melet nam anumot a kum wasiso. A ngasino lenra ke wakak. ¹⁷ O naro ra i tasman a wakakino sur in pami, ikut ke pami, i pam a sakino petutna.

5

A utumarong torom a kum tene gongon

¹ Mot a kum tene gongon, mot in longoro: Mot in tangtangis, ma mot in kukukuk, uni a kum ngunungut in nanpat torom mot. ² Anumot a kum ululeng det sa moroto, ma a koropos i sa ban laulau ru anumot a kum malu. ³ Anumot a gol ma a silwa der sa ros, ma a rosinder in takun mot, ma in nan a pinimot elar nama sungun. Una kum ururop na bung ri, mot sa ubek tomo pas anumot a kum ululeng. ⁴ Tama i, ka mot tokom tar a taro ra det papam una numot a kum kinobot, ra a ikul anundet i takun mot. Ra o God a Dekdek na Labino i sa longoro tar a tinangis anundet ra det pasong.

⁵ Una numot a nilaun nin a rakrakon bual, mot ukio a labino mani, una kum lukaro sur mot ut, ma un asau ra i ugargas mot. Mot tabor butbut a pinimot, ra milau mo mot in iru, elar nama kum wewegua, ra di tabor butbut det sur din um doko det. ⁶ Mot ben tar a kum tene tokodos una warkurai, ra mot um doko det, ikut ka det balu mot.

Dat in tur dekdek una nurnur ma gong a pinindat i ngoro

⁷ A kum tistising, gong a pinimot i ngoro lakit, ra mot kis langlang sur a inawan pat melet anun a Labino. Mot tama a tene minarut, a pinino ke ngoro lakit, ra i kiskis langlang sur a bato in puk a piso, ma sur a wakak na makus tagun ana kinobot. ⁸ Mot kai, gong a pinimot i ngoro lakit, mot in tur dekdek una nurnur, uni a inawan pat melet anun a Labino i sa milau. ⁹ A kum tistising, gong mot ururai etetalai, surko o God in warkurai mot. Tama i, a Tene Warkurai i sa tur nisan a matansako.

¹⁰ A kum tistising, mot in nuk pas a kum poropet tagun numugu, ra det ser wasiso nama risan a Labino. Det etorom a kum ngunungut, ikut a pinindet ke ngoro, det tur dekdek una nurnur. Ra det ese anundet

a nilaun, ra i wakak sur mot kai mot in muri. ¹¹ Tama i, ara taro tagun numugu det etorom a kum mamaut, ikut det tur dekdek una nurnur. Dat watung det lena det dan. Mot tasman a nilaun anun o Jop, i etorom a kum mamaut, ikut i tur dekdek una nurnur. Ra numur, a Labino i udan meleti. A Labino i bukus nama marmaris ma i a tene warut.

A wasiso talapor una liliman

¹² A kum tistising, iri a utna ra i labo sakit, gong mot udekdek anumot a kum liliman nam tu ngas na wasiso kai. Gong mot liliman nama langit, o a rakrakon bual, o tu utna gisen kai. Ra mot mulaot, mot in lena “ma”. Ra mot ipul mot in lena “awu,” i kut ra, sur gong mot iru una warkurai anun o God.

Dat in wararing nama nurnur

¹³ Ra taio tagun mot i taramo a maut, i wakak sur in wararing. Ra taio i gasgas, i wakak sur in kele a kum kelekele na ulabo torom o God. ¹⁴ Ra taio tagun mot i misait, in itula sur a kum mugumugu na lotu, sur det in wararing uni, ma una risan a Labino, det in talusi nama wel. ¹⁵ A niaring ra i wan tomo nama nurnur, in ulangolango o nara ra i misait, ma a Labino ut, in ulangolango melet pasi. Ma ra i sa pam tar a sakino petutna, a Labino in unus ru i gusuni. ¹⁶ I mo ra mot in wasiso puaso etetalai torom mot una numot a kum sakino petutna, ra mot in wararing un mot etetalai, sur a Labino in ulangolango pas mot. A niaring anun a tene tokodos i dekdek sakit, ma i wu pat a wino.

¹⁷ O Elaija, a poropet, i a musano i elar kut nam dat. I wararing sur gong i bato, ra a tulu kilalo ma wonom na kalang ke bato. ¹⁸ Numur i wararing melet sur in bato, ra in nabato i puku, ma a kum utna i lubang melet, ma det wu.

¹⁹ A kum tistising, ra taio tagun mot in nan raro gusun a lingmulusino, mot in ben pukus melet pasi. ²⁰ A watungi tamot, ra taio in ben pukus pas a tene sakino gusun anun a kum niraro, i sa ulaun pas a nion a musano ra gusun a minat, ra a Labino in unus ru anun a susut na sakino petutna.

A Mugano Pas anun o Pita

A wasiso talapor mugu

A buk ri a mugano pas ra o Pita i tumusi. O Pita i ara tagun a noino ma ru nat na ususer anun o Iesu. I tumus a pas ri torom a taro na nurnur ra det kis na usiro una kum tamon. I kis tong o Rom ra i tumus a buk ri. I watung o Rom o Babilon, a wasiso elelar una ngasino anun a rakrakon bual ra i bukus una tamon ra.

A kum tene nurnur det barato a susut na mamaut tagun a gapman, uni det nurnur un o Iesu. O Pita i nem na udekdek anundet a nurnur nama pas ri. I inanos det una nundet a matok na nilaun un o Karisito, ma una ngasino anun o Iesu, uni o Iesu kai i barato a kum mamaut. I inanos det kai una wakak na petutna ra det in muri.

A inawan ina Mugano Buk anun o Pita:

A turturkibin ina buk ri (1:1-2)

Dat kis langlang nama nurnur sur a nilaun tukum (1:3-12)

A tokodos na nilaun (1:13-2:12)

A wakak na petutna ra dat in muri (2:13-3:7)

A kum te Karisito det in taramo a ngunungut (3:8-4:19)

Dat in unatino pas dat (5:1-11)

A ururop na wasiso anun o Pita (5:12-14)

¹ Iau o Pita, a aposel anun o Iesu Karisito, a tumtumus torom mot ra o God i sa pilok pas mot, ma mot kis sarara elar nama kum usiro una kum papor Pontus, Galesia, Kapadosia, Asia ma o Bitinia. ² O God a Tamandat i sa pilok pas mot ra i sa tasman mugu tar mot, ma a Tokodos na Nion i umatok pas mot sur mot a taro anun o God, sur mot in mur a wasiso anun o Iesu Karisito, ma in rus mot nama gapino.

A marmaris ma a malmal in kis torom mot, ma in labo sakit.

Dat kis langlang nama nurnur sur a nilaun tukum

³ Dat in watung ulabo pas o God, a Taman anundat a Labino o Iesu Karisito. Una nun a labino marmaris, i sa usus matok tar dat. I mo ra uniri, dat kis langlang nama nurnur sur a nilaun tukum, uni o Iesu Karisito i katutur melet gusun a minat, ⁴ ma dat in rakon pas a utna ra o God i sa ubek tari sapat una langit. A utna ra ken mereseng,

ken laulau ma ken rorom. O God i sa ubek tari sur mot.

⁵ Ra i tamtamabat mot nama dekdekino, uni mot nurnur uni. In tamtamabat mot tuk una ururop na bung ra in ulaun mot. Ma anun a pinapam na ulaun a taro, i sa waninar tari sur in upuaso i. ⁶ A utna ri in ugassgas doko mot. I lingmulus ut, uniri mot in taramo a wur ngas na mamaut, ikut ken suano i. ⁷ A kum mamaut ri det wanpat sur in talapor lena, anumot a nurnur i lingmulus. Di lar anumot a nurnur nama kum mamaut elar nami ra di tun talapor a gol una sungun. Ikut anumot a nurnur i labo doko taun a gol ra in rop kut. Ra anumot a nurnur i tur dekdek, o Iesu Karisito in rakon lekeleke pas mot, ma in ulabo pas mot, ma in pitar a urur torom mot una bung ra in nanpat puaso. ⁸ Ka mot tama o Iesu utmakai, ikut mot nem doko i. Uniri ka mot tama i, ikut mot nurnur uni. Ma mot bukus nama labino gasgas ra ka din palos sot pasi nam tu wasiso, ma a gasgas ra, a minamarino i labo sakit. ⁹ Uni o God i sa ulaun pas a niomot, i a ikul una numot a nurnur.

¹⁰ A kum poropet tagun numugu det wasiso na poropet una pinapam anun o God ra in ulaun mot, elar nama etabor ra in tabor mot nami. Det sisio ma det tiktikin wakak suri. ¹¹ A Nion o Karisito i kis un det, ma i inanos mugu tar det una kum ngunungut ra o Karisito in taramo i, ma una nun a minamar numur. Det tiktikin sur nangisin mulus, ma osi ra a kum utna ri in nanpat uni. ¹² O God i upuaso i torom a kum poropet lena, a kum utna ri, awu sur in nanpat una anundet a kum kilalo na nilaun, awu, o God in pami ut torom mot. Ra uniri, mot sa longoro tari tan a taro ra det warawai nama Wakak na Wasiso torom mot, nama dekdekin a Tokodos na Nion, i ra di tulu pirso ru i tagisapat una langit. Ma a kum ensel kai, det nem doko i, sur det in tama a kum utna ri.

O God i kabo pas mot sur mot in tokodos

¹³ I mo ra, mot in waninar a nuknuki mot sur a pinapam ra mot in pami, mot in tamtamabat wakak anumot a nilaun, ma mot in kis langlang nama nurnur mulus sur a utna ra o God in tabor mot nami, ra o Iesu Karisito in nanpat puaso. ¹⁴ Mot a kum nutnutun o God, ra mot ser mur anun a wasiso, gong mot mur a kum sakino nemnem ra numugu mot ser pami ra ka mot mananos utmakai. ¹⁵ Mot in tokodos una numot a kum ngasino rop, elar nam o

naro ra i kabo pas mot i tokodos. ¹⁶ Uni di sa tumus tari una Buk Tabu lena, “Mot in tokodos, uni iau, a tokodos.” *Wkp 11:45*

¹⁷ Ra mot ser wararing, mot watung o God, a Tamamot. I wakak ra mot in laun nama nginara umatano, una anumot a kinkinis na usiro nin una rakrakon bual, uni i ra, in warkurai a taro rop nama tokodos na warkurai, una kum utna rop ra det sa pam tari. ¹⁸ Mot sa tasmani lena o God i kul langolango pas mot gusun a kum ngasino oros kut, ra mot losi gusun a kum tamtama mot. Awu sur i kul langolango pas mot nama utna ra in rorom kut, elar nama silwa ma a gol. ¹⁹ I kul langolango pas mot nama gapin o Karisito ra a matano i ka, i ra i elar nama barman na sipsip, ra kalako dur uni ma katu misait uni. ²⁰ O God i sa pilok pasi numugu utmakai ra ke ukisi utmakai a rakrakon bual, ma uniri, una kum ururop na bung, i sa wanpat sur in warut mot. ²¹ Ma mot nurnur un o God i kibino ut un o Karisito. Ra o God ut i ukatatur melet pas o Karisito gusun a minat, ra i pitar tar a minamar toromi. I mo ra, mot nurnur un o God ma mot kis langlang nama nurnur sur a utna ra in pami nurnur.

²² Ma uniri, mot sa rus talapor mot, uni mot sa mur a lingmulus na wasiso, sur mot in nem mulus a kum tistisi mot una nurnur. I mo ra, mot in nem etetalai mot nama marmaris mulus una balamot. ²³ Uni anumot a matok na nilaun ke kibino un taio taginin upiso, uni taio taginin upiso in rop kut. Di usus matok mot nama utna ra ken rop. Ma a utna ra, a wasiso anun o God, ra i laun ma in tur tukum. ²⁴ I elar nami ra di sa tumus tari una Buk Tabu lenri,

“A taro rop det elar kut nama wuliso, ma anundet a ememar i elar kut nama purpur ra i puspup.

A wuliso in marang, ma a puspup ina purpur in puku,

²⁵ ikut a wasiso anun a Labino in tur tukum.” *Ais 40:6-8*

Ma a wasiso ri, i a Wakak na Wasiso, ra di sa warawai taru nami torom mot.

2

O Iesu i a wat ra i laun

¹ I mo ra mot in lakro ru a kum sakino petutna rop, a wasiso torotoro ma a nilaun na torotoro, a nuknuk laulau sur a utna anun taio, ma a wur ngas na wasiso laulau un taio. ² Mot in nem doko a utna na nion ra

katu dur uni, sur mot in lubung nami, tuk ra mot in dekdek una matok na nilaun. Mot in nem doko a utna na nion, elar nama kum nat miso det nem doko a polono sus. ³ Uni mot sa lar tama tar a ngas na nilaun anun a Labino, ma mot tasmani lena a Labino i wakak doko.

⁴ Mot in nan torom a Labino, i a wat ra i laun. A taro det lakro ru tari, ikut o God i pilok pasi, ma i wakak doko umatano. ⁵ Ra mot kai, mot elar nama kum watat ra det laun, ma o God i pam mot sur mot, a rumu anun a Tokodos na Nion. Mot in nanpat a kum tene tuntun etabor anun o God, sur mot in pitar a kum etabor ra i nion, ra i wakak umatano, i kibino un o Iesu Karisito. ⁶ Uni di sa tumus tari una Buk Tabu lenri,

“Tama i, a ubek tar a wat sapat o Saion. A wakak na wat ra a sa pilok pasi sur in udekdek a rumu.

Ma osi ra in nurnur uni, ken maimai.” *Ais 28:16*

⁷ Torom mot ra mot nurnur, a wat ra i wakak, ikut torom det ra ka det nurnur, “A wat ra a kum tene pam rumu det lakro ru tari,

i ut ra, i wanpat a wakak na wat ra i udekdek a rumu.” *Sng 118:22*

⁸ “A wat ra, a taro det in tutuka uni, ma det in puku.” *Ais 8:14*

Det tutuka uni, uni det pitarngat una wasiso anun o God. Ra det pami lenra, anun a wasiso ra i watung tari numugu un det, i sot un det.

⁹ Ikut mot a taro na pipilok, a kum tene tuntun etabor anun a King, a tokodos na kabotaro, ma a taro anun o God. O God i sa kabo pas mot gusun a dumirum sur anun a talapor ra i wakak doko, sur mot in wasiso puaso una anun a kum wakak na pinapam.

¹⁰ Numugu, awu sur mot a taro anun o God, ikut uniri mot anun a taro. Numugu ka mot rakon a marmaris anun o God, ikut uniri mot sa rakoni.

¹¹ A kum wakak na paspasang, mot kis na usiro nin una rakrakon bual, awu sur anumot a tamon ri. I mo ra a saring mot, sur gong mot mur a kum sakino nemnem ina pinimot, ra det inaim nama niomot.

¹² Mot in pam a wakak na petutna epotor tan a taro ra ka det nurnur, sur det ra det takun mot lena mot a kum tene pam sakino, det in tama anumot a kum wakak na pinapam, ma det in watung ulabo pas o God una bung ra in nanpat uni.

1:17: Rom 2:11; Tam 2:23 **1:19:** Ap 20:28; Ibr 9:12-14

barman na sipsip ra katu dur ma katu misait uni, sur o God in unus ru anundet a kum sakino petutna. Tama Wok Pris 22:17-25. **1:20:** Ep 1:4 **1:21:** Jn 14:6; Rom 5:1-2

2:3: Sng 34:8 **2:5:** Ep 2:21-22; Tam 1:6 **2:6:** Ep 2:20 **2:8:** Ais 8:14-15 **2:9:** Lo 7:6; 14:2; Ais 9:2; Tai 2:14; Ap 26:18; Ep 5:8 **2:10:** Os 2:23 **2:11:** Gal 5:17, 24

*

1:19: A taro Israel det ser etabor torom o God nama

Mot in unatino pas mot torom a kum mugumugu tagun a gapman

¹³ I wakak sur mot in unatino pas mot torom det rop ra det pam ukai a warkurai nin upiso. Mot in pami uni a Labino i nemi lenra. Mot in unatino pas mot torom a king, i ra a labino mugumugu tagun a gapman. ¹⁴ Ma mot in unatino pas mot kai torom a kum mugumugu ra a king i ser tulu ru det, sur det in warkurai a taro ra det pam a sakino, ma det in watung ulabo pas a taro ra det pam a wakakino. ¹⁵ Uni o God i nemi sur mot in pam a kum wakak na pinapam, sur mot in sakbat ru a kum wasiso oros kut anun a taro ra ka det mananos. ¹⁶ Mot sa langolango, ikut gong mot langolango sur mot in pam a sakino. Mot in laun elar nami ra mot a kum tultul anun o God. ¹⁷ Mot in urur torom a taro rop. Mot in nem a kum tistisi mot una nurnur, mot in ngara sur o God, ma mot in urur torom a king.

Dat in mur a magiran o Iesu

¹⁸ Mot a kum tene ititula, mot in unatino pas mot torom anumot a kum mugumugu nama urur. Gong mot unatino pas mot kut torom det ra det ser wakak mot ma det ser maris mot, mot in unatino pas mot kai torom det ra a magirandet ke tokodos torom mot. ¹⁹ Ra ka mot pam tu sakino petutna, ikut mot taramo a kum maut tan a taro, o God in gas nam mot, ra mot mur a nuknukino, ma mot tur dekdek. ²⁰ Ra mot pam a sakino petutna ra di um mot, ra mot taramo a ngunungut uni, o God ken watung ulabo pas mot. Ikut ra mot pam a tokodos na petutna, ra di ukadik mot uni, o God in gas nam mot ra mot tur dekdek.

²¹ O God i sa kabo pas mot sur mot in tur dekdek, ra mot taramo a ngunungut. Uni o Karisito i taramo a ngunungut un mot, ma i ese tar mot una magirano ra, sur mot in mur a kiwino.

²² "Ke pam tar tu sakino petutna, ma ke watung tar tu torotoro na wasiso." Ais 53:9

²³ Ra a taro det watung laulau i, ke balu det. Ra det ukadiki, ke kankan ma ke watung tari lena, in ban laulau det, awu. I madek tari ut una laman o God, i ra i ser warkurai nama tokodos na warkurai. ²⁴ O Karisito ut i los pas anundat a kum sakino petutna una pinino ra i mat unin nanai kutus, sur dat in mat gusun a sakino petutna, ma dat in laun sur a tokodos na petutna. Ma una kum iniru una pinino, i ulangolango pas mot. ²⁵ Uni numugu mot elar nama kum sipsip

ra det wan raro, ikut uniri mot sa millet melet torom anumot a Tene Tamtamabat anun a kum sipsip, a Tene Tamtamabat una niomot.

3

A kinkinis na nolin

¹ Lenkutkai ra, mot a kum nolin na wardain, mot in unatino pas mot torom anumot a kum musano. Ra a ramano tagun det ka det nurnur una wasiso anun o God, a wakak na magiramot kut in wasiso torom det. A magiramot in ben pas det torom o God, ² ra det tama lele anumot a tokodos na petutna ma a urur ra mot ser pami. ³ Gong mot nuknuk doko sur a wakak na ememar una pinimot, lenri a iris lorimot, ma a kum kamkabaran di pami nama gol, ma a kum wakak na malu na emar. ⁴ Anumot a ememar mulus ra ken rop, in nanpat ut tagun a balamot, lenri a wowowon na petutna ma a kinkinis na malmal. A ememar ri, a labino utna doko umatan o God. ⁵ A kum wardain tagun numugu, ra det tokodos ma det nurnur un o God, det ser emar lenri. Det ser unatino pas det torom anundet a kum musano, ⁶ elar nam o Sara ra i ser longoro o Abaram, ma i watungi lena anun a labino. Ma mot a kum nutnutun o Sara, ra mot pam asau ra i tokodos, ma ka mot ngara.

⁷ Lenkutkai ra, mot a kum nolin na musano, mot in nem anumot a kum wardain una numot a kinkinis na nolin. Mot in pitar a urur torom det, uni a dekdekin det ke elar nama dekdeki mot. Det kai det in rakan a nilaun ra o God in pitari tamot. Mot in pami lenra, sur gong tu utna i turbat anumot a kum niaring.

A ngunungut ra din taramo i una tokodos na petutna

⁸ Anung a kum ururop na wasiso torom mot rop i lenri, i wakak sur a nuknuki mot in takai kut. Ra taio tagun mot in los a maut, mot kai mot in losi tomo nami. Mot in nem etetalai mot elar ut ra mot nisnisino. Mot in lason una marmaris, ma mot in unatino pas mot. ⁹ Gong mot balu a laulau ino nama laulau ino, ma gong mot balu a sakino wasiso nama sakino wasiso. Mot in watung udan det ra det pam a laulau ino torom mot, uni o God i kabo pas mot sur mot in pami lenra, ra in watung udan mot. ¹⁰ Uni a Buk Tabu i watungi lenri, "Ra taio i nem a wakak na nilaun, ma i nemi sur in tama a kum wakak na bung na gasgas,

in tamtamabat a wano gusun a kum sakino wasiso,
ma gong i toro.

¹¹ In tupukus gusun a sakino ma in pam a wakak na petutna.

In sisiso sur a kisapi na malmal ma in dekdek pasi sur in muri.

¹² Uni a Labino i tamtama taru una kum tene tokodos,

ma i longoro anundet a kum niaring.

Ikut i rosumur gusun det ra det pam a laulau ino.” *Sng 34:12-16*

¹³ Ra mot dekdek sur mot in pam a utna ra i wakak, osi ra in ban laulau mot? ¹⁴ Ikut, ra din ukadik mot kibino una numot a tokodos na petutna, mot dan.

“Gong mot ngaran a kum utna ra det in ungaran mot nami,

ma gong mot neder.” *Ais 8:12-13*

¹⁵ Ikut mot in utur ukai o Karisito sur in nanpat a Labino una nilaun anumot. A kum bung rop, mot in kis na waninar sur mot in balu taio ra in ting mot lena, asau a kibino ra mot kis langlang nama nurnur. Ikut, ra mot balu i, mot in balu i nama wowowon na petutna ma a urur. ¹⁶ Ma mot in ser mur a ngasino ra mot tasmani lena i tokodos, sur det ra det watung laulau a kum wakak na petutna mot pami ra mot mur o Karisito, det in maimai una wasiso ra det watung laulau mot nami. ¹⁷ Ra mot in taramo a ngunungut, uni mot pam a laulau ino, i wakak kut. Ikut ra o God i nemi sur mot in taramo a ngunungut una wakak na pinapam ra mot pami, i wakak doko.

¹⁸ Uni o Karisito kai i taramo a ngunungut ra i mat ara dino kut, una nundat a kum sakino petutna. A Tene Tokodos i mat sur det ra ka det tokodos, sur in ben pas mot torom o God. Det um doko ru a pinino, ikut di ulaun pasi una nion. ¹⁹ Ma i wan ra i warawai torom a kum nion ra det kis na karabus. ²⁰ A kum nion ra, a nion a taro tagun numugu utmakai una kum kilalo anumot o Noa. O God i kiskis langlang pas det sur det in nukpukus, ra o Noa i pam a sip. Ikut det pitarngat. Ra o God i ulaun pasi mukut a tiwal det gusun in nolomom.

²¹ In nolomom i tur ukinalong a baptais ra i ulaun mot uniri. Ka di baptaiso mot sur din rus ru a dur tagun a pinimot, awu. A baptais i elar nami ra mot pitar tar mot torom o God ma mot tasmani lena mot tokodos umatan o God. Ra i ulaun mot kibino una katuttur melet anumot o Iesu Karisito gusun a minat. ²² I ra i wan tito usapat una langit, ra uniri i kis una papor sot na laman o God. Ma a kum ensel, ma a kum nion ra det utur ukai a warkurai, ma

a kum nion kai ra det utur ukai a dekdek, det kis utuntudu ino.

4

Mot in mana gusun a pam sakino

¹ O Karisito i taramo a ngunungut una pinino. I mo ra, mot kai, mot in waninar sur mot in taramo a ngunungut elar nami. Uni osi ra i taramo a ngunungut una pinino, i sa mana gusun a pam a sakino petutna. ² Ra ke pitar tari mo anumot a nilaun una kum laulau na nemnem. I pitar tari mukut sur in mur a nemnem anumot o God. ³ Numugu mot pam a kum sakino petutna, ma i sa suano mot ra mot kis ubalan a kum sakino petutna ra. A kum sakino petutna ra, a kum taro ra ka det nurnur, det gas sur det in pami. Det pam a kum petutna na pamuk, det mur a kum laulau na nemnem, det sipak, det pam a kum labino lukaro ra det wangon dokodoko det, det wan tomo sur det in gas nama ininum, ma det lotu torom a kum torotoro na god, ra a warkurai anumot o God i turbat dat gusuni. ⁴ Ra uniri, a kum paspasa mot det kisin doko, ra ka mot nemi melet mo sur mot in pam a kum laulau na petutna ra, tomo nama det, ra det watung laulau mot. ⁵ Ikut numur det in tur umatan o God, ra det in wasiso talapor un asau ra det sa pam tari. Uni o God a Tene Warkurai anumot a taro rop, det ra det laun, ma det ra det sa mat. ⁶ Iri a kibino ra di sa warawai taru nama Wakak na Wasiso torom a taro ra uniri det sa mat. Ra det mat det los a warkurai una pinindet, elar nama taro rop, ikut di warawai torom det sur a niondet in laun elar nam o God i laun.

Dat in papam nama kum etabor ra o God i pitar tari tandat

⁷ A ururop ina kum utna rop i sa milau. I mo ra mot in nuknuk wakak ma mot in tamtamabat wakak anumot a nilaun, sur mot in pet lari sur mot in wararing. ⁸ Iri a utna ra i labo sakit taun a kum utna rop, mot in nem etetalai mot nama lingmulus, uni a marmaris i pulus bat a susut na sakino petutna. ⁹ Mot in gas etetalai pas mot una anumot a kum rumu, ma gong mot pami nama wasiso na ururai.

¹⁰ O God i sa pitar tar a kum etabor torom mot taktakai tagun anumot a kum wur ngas na etabor. Ra in wakak sur mot in papam wakak nami, sur mot in warut etetalai mot. ¹¹ Ra taio i los a etabor sur in tene warawai, i wakak sur in warawai ut elar nama wasiso anumot o God. Ra taio i los a etabor sur in tene warut, i wakak ra in warut nama dekdek ra o God i pitar

tari tano, sur a taro det in watung ulabo pas o God una kum utna rop, kibino un o Iesu Karisito. Anunu kut a minamar ma a dekdek, ken rop ma ken rop. Amen.

A kum te Karisito det in taramo a ngunungut

¹² A kum wakak na paspasang, gong mot kisin ra di lar mot nama kum dekdek na maut, elar nama sungun i tun mot, ma gong mot nuki lena tu matok na utna i wanpat torom mot. ¹³ Ikut mot in gas ra mot in taramo a ngunungut elar nam o Karisito i taramo i, sur mot in buku nama gasgas ra o Karisito in nanpat nam anun a minamar. ¹⁴ Ra di watung laulau mot uni mot tagun o Karisito, mot dan. Uni a Nion o God, a Nion na minamar, i kis tomo nam mot. ¹⁵ Gong taio tagun mot i los a ngunungut, uni i a tene um doko a taro, o a tene wolong, o a tene sakino, o a tene uruk lorino una utna ra awu sur anunu. ¹⁶ Ikut ra taio i los a ngunungut, uni i a te Karisito, gong i maimai uni. In watung wakak torom o God, uni i los a risan o Karisito. ¹⁷ A bung na warkurai i sa wanpat sur din warkurai mugu dat a taro anun o God. Ra a warkurai in turpasi un dat, in pepetlai torom det ra kura, ra det pitarngat una Wakak na Wasiso anun o God? ¹⁸ A Buk Tabu i watungi lenri, "In ngangitin ut torom a tokodos na taro sur din ulaun pas det.

Ra in pepetlai torom a kum sakino taro ma det ra det rosumur gusun o God?"
Snd 11:31

¹⁹ I mo ra, det ra det los a ngunungut una nemnem anun o God, det in pitar tar det torom anundet a Tene Ukukis, ra i ser pam sot rop pas anun a kum wasiso, ma gong det mana nama pam a wakak na petutna.

5

A kum sipsip anun o God

¹ Uniri an wasiso torom mot a kum mugu-mugu na lotu, uni iau kai a mugumugu elar kut nam mot. Ra o Karisito i taramo a kum ngunungut, a tama tari, ma numur ra in nanpat, an rarakan una nun a minamar.

² Mot in tamtamabat a kum sipsip anun o God, ra di pitar tari torom mot sur mot in tamtamabat det. Gong mot papam, uni a taro det ungongos tar mot uni, mot in papam, uni mot ut mot nemi, elar nama nemnem anun o God. Mot in papam, uni mot ut mot nem doko i, ma gong mot papam kut nama nemnem sur a mani. ³ Gong mot

ulabo pas mot, ma mot warkurai dekdek det, ra di sa pitar tar det una numot a tamtamabat. A magiramot in wakak sur a kum sipsip det in tama i ma det in muri. ⁴ Ra a Labino Tene Tamtamabat anun a kum sipsip in nanpat, mot in rakan a kukup na minamar ra a minamarino ken rop.

⁵ Lenkutkai ra, mot a kum barman ma a kum toraro, mot rop mot in ser unatino pas mot torom det a kum mugano tamot. Mot in unatino pas mot epotor tamot etetalai, i ra anumot a wakak na ememar. Uni a Buk Tabu i watungi lena,

"O God i nget det ra det ser ulabo pas det, ikut i maris det ra det ser unatino pas det."
Snd 3:34

⁶ I mo ra, mot in unatino pas mot utuntudu ina dekdek na laman o God, sur in ulabo pas mot una du bung ra i nemi. ⁷ Mot in pitar rop tar anumot a kum mamaut torom o God, uni i ser tamtamabat mot.

⁸ Mot in tumarong, ma mot in tamtamabat wakak anumot a nilaun, uni anumot a ebar, o Satan, i wan tuptupukus elar nama laion. I kukukuk tuptupukus, ma i sisio sur lako taro sur in nan det. ⁹ Mot in tur dekdek una nurnur ma mot in turbati, uni mot tasmani lena, a kum tistisi mot una rakrakan bual rop det taramo a kum ngunungut, elar nami ra mot taramo i.

¹⁰ Ikut o God, i a God na marmaris, ma un o Karisito i kabo pas mot sur mot in kis tomo nami una nun a minamar ra ken rop. Ra mot sa taramo tar a ngunungut un tu nat na du bung kut, numur i ut in uwakak pas mot melet, in udekdek mot ma in warut mot sur mot in tur dekdek. ¹¹ Anunu kut a dekdek ma ken rop. Amen.

A kum ururop na wasiso

¹² O Sailas i warut iau ra a tumus a nat na pas ri torom mot. O Sailas a tising una nurnur, ra a nurnur doko uni. Una pas ri, a nemi sur an udekdek mot ma an wasiso talapor una marmaris mulus anun o God. Mot in tur dekdek uni.

¹³ A taro na lotu ra det kis nin o Babilon*, det pitar anundet a marmaris torom mot. Det a taro na pipilok anun o God elar kutkai nam mot. O Mak, a nutung una nurnur, i kai i pitar anun a marmaris torom mot. ¹⁴ Ra mot etorom, mot in nem etetalai mot nama egom na marmaris.

A malmal torom mot rop ra mot tagun o Karisito.

4:13: Ap 5:41; Jem 1:2; 1 Pit 1:6-7 4:14: 1 Pit 2:20 5:1: Jn 21:15-17; Ap 20:28 5:3: 2 Kor 1:24; Pil 3:17; Tai 2:7 5:5: Ep 5:21; Jem 4:6 5:6: Mt 23:12; Lk 14:11; Jem 4:10 5:7: Mt 6:25-30 5:8: 1 Tes 5:6 5:9: Ep 6:11-13; Jem 4:7 5:12: Ap 15:22, 37-40; 12:2, 25; 13:13 5:13: 2 Tim 4:11 * 5:13: O Babilon i tur ukinalong o Rom, ma i wasiso elelar una ngasino anun a rakrakan bual ra i buku una tamon ra.

A Manru na Pas anun o Pita

A wasiso talapor mugu

A pas ri a manru na pas anun o Pita torom a taro na nurnur, ra det kis una kum tamon. I tumus a pas ri, sur in utumarong det gusun a kum torotoro na tene ususer. A kum tene torotoro ri det ben raro a taro na nurnur. Det watungi lena, i wakak kut ra det in pam a sakino petutna, ra det watungi kai lena, o Iesu ken nanpat melet mo.

O Pita i inanos det melet un o Iesu sur det in tur dekdek una nurnur. O Iesu ke wanpat utmakai, uni i nemi sur a taro rop det in nukpukus.

A inawan ina Manru na Pas anun o Pita:

A turturkibin ina buk ri (1:1-2)

Dat in laun elar nama taro anun o God (1:3-15)

A wasiso un o Iesu Karisito i lingmulus (1:16-21)

A utumarong una kum torotoro na tene ususer (2:1-22)

A inawan pat melet anun a Labino (3:1-18)

¹ Iau o Saimon Pita, a tultul ma aposel anun o Iesu Karisito. A tumtumus torom mot, ra o God i sa tabor tar mot nama wakak na nurnur, elar nami ra i tabor met kai nami, kibino una tokodos na petutna anun o Iesu Karisito, i ra a God anundat, ma anundat a Tene Ulaun. ² A marmaris ma a malmal in bukus un mot, uni mot tasman o God ma o Iesu anundat a Labino.

Dat in laun elar nama taro anun o God

³ Una dekdekin o God, i tabor dat nama kum utna rop ra dat sibo suri, sur dat in laun wakak, ma dat in mur a petutna ra i wakak umatan o God, uni dat tasman o God, i ra i kabo pas dat, sur dat in los anun a minamar ma a wakak na magirano. ⁴ I tabor dat nama kum liliman ra i wakak doko ma i labo doko, kibino una nun a minamar ma a wakak na magirano. I sa liliman taru sur mot in pet lar pasi, sur mot in rakon a magiran o God ma anun a nilaun kai, ma sur mot in walip gusun a utna tagun a rakrakon bual ra in ban laulau mot, ra i ser wanpat tagun a kum laulau na nemnem.

⁵ Iri a kibino ra mot in dekdek sur mot in palataun anumot a nurnur nama wakak na petutna. Ma mot in palataun a wakak na petutna nama mananos un o God. ⁶ Ma mot in palataun a mananos un o God nama

petutna ra mot tamtamabat wakak anumot a nilaun. Ma mot in palataun a petutna ra, nama tuntunur dekdek. Ma mot in palataun a tuntunur dekdek nama petutna ra i wakak umatan o God. ⁷ Ma mot in palataun a petutna ra i wakak umatan o God, nama marmaris torom a kum tistisi mot una nurnur. Ma mot in palataun a marmaris ra, nama marmaris kai torom a taro rop. ⁸ Ra a kum petutna ri kura un mot, ma det lubang una numot a nilaun, anumot a mananos un anundat a Labino o Iesu Karisito ken utna oros, ma in wu a wino. ⁹ Ikut, osi ra a kum ngasino ri ke kis uni, i sa gawul in matano ma i sa pulu, ma i sa dumano ru i lena o God i sa gos talapor tari gusun a kum sakino petutna ra i pam tari.

¹⁰ I mo ra a kum tistising, mot in papam dekdek sur mot in ese i una numot a nilaun lena, o God i sa kabo pas mot ma i pilok pas mot. Ra mot in pami lenra, ka mot in puku, ¹¹ ma o Iesu Karisito, anundat a Labino ma anundat a Tene Ulaun in ben ruk mot nama gagsas una nun a matanitu ra ken rop.

¹² Mot sa tasman a kum utna ri, ma mot sa tur dekdek una lingmulus na etowo ra mot sa los pasi, ikut i wakak ra an unuk tar mot melet nami. ¹³ Ra a laun utmakai una pining, a nuki lena, i tokodos sur an wangun melet tar a nuknuki mot una kum utna ri. ¹⁴ Uni a tasmani lena, i sa milau sur an nan gusun a pining ri, elar nami ra anundat a Labino o Iesu Karisito i sa upuaso tari tang. ¹⁵ A lingmulus, an dekdek sur an unuk tar mot una kum utna ri, sur mot in nuk ukai det ra a sa mat.

Met sa tama tar a minamar anun o Karisito

¹⁶ Ra met inanos mot una dekdek in anundat a Labino o Iesu Karisito, ma anun a inawan pat melet, awu sur met saksakutna oros kut nama kum saksakutna ra met nuk pas det kut, awu. Met ut met sa tama tar anun a minamar nama matmata met. ¹⁷ O God o Tamano i ulabo pas a risano ma i pitar a minamar tano, ra i wasiso namin walngano tagisapat una nun a labino minamar. I watungi lenri, "Iri a Nutunglik, a nat na wakak, a gas doko nami." ¹⁸ Ma metul ut, metul sa longoro tar in nalngano ri, ra i wan tagisapat una langit una bung ra met kis tomo nami sapat una tangai anun o God.

¹⁹ A kum utna ra met tama i, i ulingmulus pas a wasiso anun a kum poropet torom dat, ma i wakak sur mot in longoro i. Uni a wasiso anun a kum poropet i elar nama lam ra i kunabor una dumirum, tuk una

lar, ra in borodo in utalapor anumot a nilaun. ²⁰ Ara labino utna ri mot in tasmani lena, katu wasiso na poropet una Buk Tabu i wanpat tagun a nuknukin tu poropet. ²¹ Uni katu wasiso na poropet i wanpat kut tagun a nuknukin tu musano, awu. A Tokodos na Nion ut, i mugu a taro ra det wasiso nama wasiso tan o God.

2

A kum torotoro na tene ususer

¹ Numugu a kum torotoro na poropet det kis epotor tan a taro Israel. Lenkutkai ra a kum torotoro na tene ususer det in nanpat epotor ut tagun mot. Det in uruk eno anundet a kum torotoro na etowo ra in ban laulau a nurnur, ra det in ipul ru a Labino ra i sa kul pas det. I mo ra aiapiap kut, det in los a iniru. ² A susut na taro det in mur a kum petutna na pamuk anun a kum torotoro na tene ususer, ra a taro gisen det in watung laulau a lingmulus na nurnur, i kibino una kum ngasino anun a kum torotoro na tene ususer. ³ Una nundet a labino nemnem sur a mani, det in usobor pas mot nama kum torotoro na wasiso, sur det in los anumot a mani. Ikut tagitiro numugu utmakai, o God i sa waninar tar anundet a warkurai na minabalu, ra milau mukut in nanpat un det.

⁴ O God ke maris bat a kum ensel ra det pam a sakino petutna. I woro pirso ru det unin labino tung ra i dumirum doko, ma di ker ukai tar det, ma det kis langlang pas a bung na warkurai. ⁵ Ma o God ke maris bati kai a rakrakon bual numugu, ra i tulu in nolomom, ra a taro ra det rosumur gusun o God det iru uni. Ikut i ulaun pasi kut o Noa, a tene warawai una tokodos na petutna. Ma i ulaun pasi kai a wonom mawit det. ⁶ Ma i pitar a warkurai na minabalu una aru tamon, o Sodom ma o Gomora ra i tun ru der, ra der a kabo kubus mukut. I pami lenra sur a malalar ina sau ra kura numur in nanpat torom a taro ra det rosumur gusun o God. ⁷ Ikut, i ulaun pas o Lot. I a tene tokodos, ra i los a labino maut una kum petutna na pamuk anun a taro na lakai warkurai. ⁸ A tene tokodos ri, i kis epotor tan a laulau na taro ra. Ma una kum bung rop, i taramo a labino maut una nundet a kum petutna na lakai warkurai, ra i tama i ma i longoro i. ⁹ Ra a Labino i tasman a kisapi ra in ulaun pas a taro ra det ru i, gusun a kum larlar ra in barato det. Ma i tasmani kai a kisapi ra in ukadik a taro ra det rosumur gusuni, ma det kis langlang sur anundet a warkurai na

minabalu, una bung na warkurai. ¹⁰ Ma a Labino in warkurai dekdek det ra det mur a kum dur na nemnem ina pinindet, ma ka det nem na kis utuntudu in anun a warkurai.

A kum torotoro na tene ususer ra, ka det ngara, ma det ulabo pas det ut. Ka det ngara ra det watung laulau a kum ukukis ra kusapat una langit. ¹¹ A kum ensel det dekdek doko taun a kum torotoro na tene ususer ri, ikut ra det tur umatan a Labino ka det watung laulau a kum ukukis ra kusapat una langit. ¹² Ikut a kum torotoro na tene ususer ri, det elar nama kum kuabor na wewegua, ra ka det mananos, ma det muri kut a nemnem ina pinindet, ma di usus det kut sur din pam ukai det ma din um doko det. Det watung laulau i kut a kum utna ra ka det tasmani. Det in iru elar nama kum kuabor na wewegua.

¹³ O God in balu anundet a kum sakino petutna nama laulau ino. Det gas kut ra det inum ma det sipak tuptupukus una waspi. Ra det kis tomo nam mot una kum inangon, ma det gas una nundet a kum torotoro na petutna, anundet a dur na petutna i ban umaimai mot. ¹⁴ A kum bung rop, a matandet i tamtama kut sur tu ino anun taio o tu musano kai anun tu ino, sur det in pam a sakino tomo nami. Ka det mana gusun anundet a kum sakino petutna. Det ulam raro a taro ra ka det tur dekdek. Det lason doko una nemnem sur a susut na ululeng. Ikut, anundet a iniru i sa waninar. ¹⁵ Det sa wan gusun a tokodos na kisapi, ra det sa raro. Det sa mur a kisapi anun o Balam a nutun o Beor, ra i pam a sakino, uni i nem doko a mani. ¹⁶ A kum dongki ka det ser wasiso. Ikut a dongki anun o Balam a poropet, i wasiso toromi una nun a niraro namin nalngan a musano, ma i turbat anun a longlong na pinapam.

¹⁷ A kum musano ri, det elar nama kum matmatano danim ra det sa mamaso, ma det elar kai nama gawul ra a labino wuwu i wup ru i. O God i sa waninar tar a nubual sur det una labino dumirum. ¹⁸ Det ulabo pas det nama kum wasiso oros kut, ma det ulam a taro sur det in pam a pamuk na petutna ma det in mur a kum laulau na nemnem ina pinindet. Una ngasino ri, det ulam det ra ke suano det utmakai a inawan gisen gusun a kum tene sakino. ¹⁹ Det liliman torom det lena, det in langolango, ikut det ut, ka det langolango, det tene ititula torom a kum dur na magirandet. Uni taio in tene ititula torom asau ra i labo doko una nun a nilaun. ²⁰ A taro ra det

sa wan gisen gusun a kum dur na petutna tagun a rakrakon bual, uni det sa tasman o Iesu Karisito, anundat a Labino ma Tene Ulaun, ikut numur det puku unin nukun ina sakino petutna, ma a kum laulau na utna ra, i ker ukai melet det, anundet a kinkinis numur in laulau doko taun anundet a kinkinis numugu, ra ka det tasmani utmakai o Iesu Karisito. ²¹ Gunuk ra ka det in tasman a kisapi ina tokodos na petutna, in wakak torom det. Ikut uniri, in laulau doko torom det, uni det sa tasmani, ikut det rosumur melet gusun a warkurai anun o God, ra di sa pitar tari tandet. ²² A ru wasiso elelar ri i sot nam det: “A pap i milet melet sur a utna ra i muru tari.” Ma “A nano boro ra di sa rus tari, in milet melet ra in polpolos melet.”

3

A inawan pat melet anun a Labino

¹ A kum wakak na paspasang, a pas ri, i a manru na pas ra a tumusi torom mot. Ma una aru pas rop ri, a unuk melet tar mot una kum utna ra mot sa tasmani, sur an ukatatur a nuknuki mot sur in tokodos. ² A nemi sur mot in nuk pas a kum wasiso ra a kum poropet anun o God det sa wasiso mugu taru uni, ma mot in nuk pasi kai a warkurai anun anundat a Labino ma a Tene Ulaun, ra a kum aposel det sa inanos tar mot nami.

³ A labino utna sakit, mot in tasmani lena, una kum ururop na bung, a taro na urongon det in nanpat ra det in muri kut a kum sakino nemnem. Det in urongon laulau, ⁴ ma det in watungi lena, “Awai mi a inawan pat melet anun o Iesu, ra i uliliman taru uni? Turpasi una kum kilalo ra a kum tumtubun dat tagun numugu det mat, a kum utna i kis lenutra o God i ukis tari, una turturkibin a ukukis.”

⁵ Ikut, ra det watungi lenra, det nuk penpen una wasiso ri lena, numugu utmakai, o God i ukis a bakut ma a rakrakon bual nam anun a wasiso ut. I ukis a rakrakon bual nama danim, ma i mamaso pat tagun a danim. ⁶ I tulu in nolomom, ra i ban laulau i utkai a rakrakon bual nama danim. ⁷ O God i pam ukai a bakut ma a rakrakon bual ri dat tama der. I pam ukai der sur der in kis langlang sur a bung na warkurai, ra a sungun in ban laulau der, tomo nama taro ra ka det mur a petutna ra i wakak umatan o God.

⁸ A kum wakak na paspasang, gong mot dumano ara utna ri: Umatan a Labino, ara bung i elar nam ara arip na kilalo, ma ara arip na kilalo i elar kut nam ara bung umatano. ⁹ A Labino ke wowowon sur in pam sot pas anun a liliman lena in milet melet, elar nam ara taro det nuki. Awu, i kis langlang pas mot, uni ke nemi sur taio in iru. I nemi sur a taro rop det in nukpukus.

¹⁰ Ikut a bung anun a Labino in nanpat kisin elar nama tene wolong. A bakut in rorom nama labino rurung, ma a kum ukukis kusapat uni, det in laulau rop tan a labino sungun, ma a rakrakon bual ma a kum utna rop ra det kis uni, det in rorom rop*. ¹¹ Ra a kum utna rop ri det in laulau lenri, osi na ngas na nilaun ra mot in muri? I wakak ra anumot a nilaun in tokodos, ma mot in pam a petutna ra i wakak umatan o God. ¹² Ma mot in kis langlang sur a bung anun o God, ma mot in urarak a bung sur in nanpat lakit. Una bung ra, o God in tun ru a bakut, ma a kum utna sapat una bakut in polo tan a labino mararong ina sungun, ma in rorom. ¹³ Ikut, dat kis langlang sur a utna ra o God i uliliman taru uni: a matok na langit ma a matok na rakrakon bual kai, ra a tokodos na petutna in kis uni.

Dat in tumarong dat una taro ra det palos raro a Buk Tabu

¹⁴ A kum wakak na paspasang, ra mot kis langlang sur a bung ra, mot in dekdek sur gong tu dur una numot a nilaun, ma katu etakun in los mot un tu utna, ma mot in kis na malmal tomo nam o God. ¹⁵ Mot in nuk pasi, a Labino ke wanpat utmakai, uni i kis langlang sur a taro det in nukpukus ma in ulaun pas det. A wasiso ri, a wakak na tisindat o Pol kai, i sa tumus tari munung torom mot. I tumusi nama mananos ra o God i pitar tari tano. ¹⁶ Una nun a kum pas rop, ra i wasiso una kum utna ri, anun a wasiso i elar nami ra a sa wasiso taru nami. A ramano kum wasiso ra i tumusi i ngangitin sur din tasman a kukuraino. Ma ara taro ra ka det talapor wakak uni, ma anundet a nurnur ke dekdek, anundet a papalos uni i raro kut, elar nama nundet a papalos una ramano kum du Buk Tabu. Ma det ut det in iru uni.

¹⁷ Ikut mot, a kum wakak na paspasang, mot sa tasman tar a kum utna ri. I mo ra mot in tumarong, sur gong a taro na lakai warkurai det ben raro mot nama nundet a kum etowo, sako mot in puku

2:21: Lk 12:47-48 2:22: Snd 26:11 3:2: Jud 1:17 3:3: 1 Tim 4:1; Jud 1:18 3:4: Mt 24:48 3:5: Stat 1:6-9
 3:6: Stat 7:11; 2 Pit 2:5 3:8: Sng 90:4 3:9: Hab 2:3; 1 Tim 2:4 3:10: Lk 12:39; 1 Tes 5:2; Mt 24:29,
 35 * 3:10: Una ramano kum du buk una wasiso Grik, di tumusi lenri, “in nangon rop una sungun.” 3:13: Ais 65:17; 66:22; Tam 21:1, 27 3:15: Rom 2:4 3:17: Mk 13:33; 1 Kor 10:12

tagun a wakak na kinkinis ra uniri mot sa tur dekdek uni. ¹⁸ I wakak ra mot in lubung una marmaris anun o Iesu Karisito anundat a Labino ma a Tene Ulaun, ma mot in lubung kai una numot a mananos uni. Anunu ut a minamar, uniri ma ken rop! Amen.

A Mugano Pas anun o Jon

A wasiso talapor mugu

A pas ri, o Jon i tumusi. O Jon i ara tagun a noino ma aru nat na ususer anun o Iesu. I tumus a pas ri ra i sa takano, ra i kis tong o Epeses. I tumusi torom a taro na lotu una papor Asia.

O Jon i inanos det lena det in tur dekdek una nurnur un o God o Tamano ma o Nutunu o Iesu Karisito. Ra det nem o God, det in nemi kai a kum paspasan det. A marmaris, i a labino utna.

Ra i utumarong det gusun a kum torotoro na tene ususer. A kum tene torotoro ri det watungi lena, o Iesu ke wanpat a mulusino elar nam dat, uni det nuki lena a pinindat i a laulau na utna.

A kum tene torotoro det watungi kai lena, a mananos i a labino utna, ikut a marmaris ma a wakak na petutna der utna oros kut. A taro ra det watungi lenri, det a kum ebar anun o Karisito, ra o Jon i nemi sur dat in tama lele det.

A inawan ina Mugano Pas anun o Jon:

O Iesu i a Wasiso na nilaun (1:1-4)

A talapor ma a dumirum (1:5-2:29)

A kum nutnutun o God ma a kum nutnutun o Satan (3:1-4:6)

A marmaris (4:7-21)

A nurnur i winim pas a rakrakon bual (5:1-21)

A Wasiso na nilaun

¹ Met wasiso talapor un o naro ra i a Wasiso na nilaun, i laun tagun numugu ut, ra kabaut di ukis a rakrakon bual. Met sa longoro tari, met sa tama tari nama matmata met, ma met sa pam tari ut a pinino. ² A nilaun i sa wanpat puaso, ra met sa tama tari. Ma uniri met wasiso talapor torom mot uni lena, i ra a nilaun tukum. Numugu i kis tomo nam o Tamano, ra uniri i wanpat puaso torom dat. ³ Met inanos mot un o naro ra met sa tama tari ma met sa longoro tari, sur dat in lason tomo, elar nam met, met lason tomo nama Tamandat, ma o Nutunu o Iesu Karisito. ⁴ Ra met tumus a kum utna ri, sur anundat a gasgas in kudulano.

O God i a talapor

⁵ A wasiso ri, met longoro i gusun o Iesu Karisito, ma met upuaso i torom mot lena, o God i a talapor mulus, ma kalako dumirum tiro uni. ⁶ Ra dat watungi lena, dat lason tomo nam o God, ikut dat kis kut una dumirum, dat a kum tene torotoro, ma a lingmulusino ke kis un dat. ⁷ Ra dat laun una talapor, elar nam o God i kis una talapor, dat lason etetalai torom dat, ma a gapin o Iesu, a Nutunu, i rus talapor dat gusun a kum sakino petutna rop.

⁸ Ra dat watungi lena, ka dat pam tar tu sakino petutna, dat toro melet pas dat ut, ma a lingmulusino ke kis un dat. ⁹ Ra dat watung puaso anundat a kum sakino petutna, o God ut i tokodos, ma in pam sot pas anun a liliman, ma in unus ru anundat a kum sakino petutna, ma in utalapor dat gusun a kum petutna ra ke tokodos. ¹⁰ Ra dat watungi lena, ka dat pam tar tu sakino petutna, dat watungi lena o God a tene torotoro*, ma anun a wasiso ke kis ubalandat.

2

O Karisito anundat a tene warut

¹ A kum nutnutung liklik, a tumus a kum utna ri torom mot sur gong mot pam a sakino. Ikut ra taio in pam a sakino, anundat a tene warut, o Iesu Karisito a Tene Tokodos, in wasiso anun o naro ra, torom o Tamano. ² I ut i mat sur in kul langolango pas dat gusun anundat a kum sakino petutna, ma in urop ra a kankan anun o God gusun dat. Ma ke mat sur dat kut, i mat sur a taro rop una rakrakon bual.

³ Ra dat mur anun a kum warkurai, dat talapor lena dat tasmani ut o God. ⁴ Ra taio i watungi lena, "A sa tasman o God," ikut, ke mur anun a kum warkurai, i a tene torotoro, ma a lingmulusino ke kis uni. ⁵ Ra taio i mur a wasiso anun o God, a marmaris anun o God in kis mulus uni. A ukinalong ra dat tasmani lena dat anun o God i lenri: ⁶ Osi ra i watungi uni lena, i anun o God, in laun elar nama nilaun anun o Iesu.

A matok na warkurai

⁷ A kum wakak na paspasang, awu sur a matok na warkurai ri a tumusi torom mot, a turaino, a warkurai kut ra mot sa longoro tari tagun numugu utmakai. ⁸ Ikut a warkurai ra, tuk uniri i matok utmakai. A lingmulus ina warkurai ri, di tama i un o Karisito, ma di tama i kai un mot, uni a dumirum i rop nanan, ma a talapor mulus i sa wanpat.

1:1: Jn 1:1 1:2: Jn 1:14 1:4: Jn 16:24 1:5: 1 Tim 6:16; Jem 1:17 1:6: 1 Jon 2:4 1:8: Sng 32:5; Snd 28:13 * 1:10: O God i watungi lena dat rop dat pam a sakino petutna. Tama Rom 3:23. Ra dat watungi lena ka dat pam a sakino petutna, dat nuki lena o God a tene torotoro. 2:1: Ibr 9:24 2:2: Jn 1:29; Kol 1:20; 1 Jon 4:10 2:5: Jn 14:21, 23 2:7: Jn 13:34; 2 Jon 1:5-6 2:8: Rom 13:12; Jn 1:9 2:9: 1 Jon 4:20 2:10: Rom 14:13

⁹ Osi ra i watungi lena i kis una talapor, ikut i nget o tisinio, i kis utmakai una dumirum. ¹⁰ Ikut osi ra i nem o tisinio, i kis una talapor, ma katu utna una nun a nilaun in ban lingi sur in puku. ¹¹ Ikut osi ra i nget o tisinio, i kis utmakai una dumirum, ma i wanan utmakai una dumirum, ma ke tasmani lena i wanan urai, uni a dumirum i sa upulu pas in matano.

¹² A tumtumus torom mot a kum nutnutung liklik, uni di sa unus ru anumot a kum sakino petutna una minatin o Karisito.

¹³ A tumtumus torom mot a kum lam-labino, uni mot sa tasman o naro ra i laun tagun numnumugu utmakai.

A tumtumus torom mot a kum barman, uni mot sa winim pas o Satan.

A tumtumus torom mot a kum nutnutung liklik, uni mot sa tasman a Tamandat.

¹⁴ A tumtumus torom mot a kum lam-labino, uni mot sa tasman o naro ra i laun tagun numnumugu utmakai.

A tumtumus torom mot a kum barman, uni mot sa dekdek, ma a wasiso anun o God i sa kis una balamot, ma mot sa winim pas o Satan.

¹⁵ Gong mot nem a rakrakon bual, ma a kum ututna kai ra det kis uni. Ra taio i nem a rakrakon bual, ke nem a Tamandat.

¹⁶ A kum utna ra kuri una rakrakon bual i lenri: a kum laulau na nemnem tagun a balandat, a kum laulau na nemnem tagun a matandat, ma a umuman labino nama kum utna anundat ma a kum pinapam ra dat pami. A kum utna ri awu sur tagisapat tan a Tamandat, taginin ut una rakrakon bual. ¹⁷ A rakrakon bual ma a kum laulau na nemnem ra det wanpat taguni, det in rop kut, ikut osi ra i mur a nemnem anun o God, in laun tukum.

A kum ebar anun o Karisito

¹⁸ A kum nutnutung, uniri dat kis una kum ururup na bung. Mot sa longoro tari lena a ebar anun o Karisito in nanpat, ma uniri a susut na ebar ra, det sa wanpat. Iri dat sa tasmani lena a ururup na bung i sa milau. ¹⁹ A kum ebar anun o Karisito, numugu det kis tomo nam dat, ikut det sa pirso pas gusun dat, uni awu sur det mulus tagun dat. Ra gunuk det mulus ut tagun dat, det in kis tukum nisan dat. Ikut, ra det sa wan gusun dat, i ese i lena, awu sur det tagun dat.

²⁰ Ikut mot, o Karisito i pitar tar a Tokodos na Nion torom mot. Ma mot rop, mot sa

tasman a lingmulusino, uni a Tokodos na Nion i sa towo tar mot nami. ²¹ Awu sur a tumtumus torom mot uni ka mot tasman a lingmulusino, awu. A tumtumus torom mot uni mot sa tasman a lingmulusino, ma katu torotoro i ser wanpat taguni. ²² Osi ra a tene torotoro? O naro ra i ipul kut lena, o Iesu awu sur a Karisito. O naro ra i watungi lenri, i a ebar anun o Karisito, uni i ipul ru o Tamano ma o Nutunu kai. ²³ Osi ra i ipul ru a Nutun o God, o Tamano kai ke kis tomo nami. Ma osi ra i mulaot pas o Nutunu, o Tamano kai i kis tomo nami.

²⁴ I wakak ra a kum etowo rop ra mot sa longoro tari numugu in laun un mot. Ra in laun un mot, mot kai mot in laun un o Nutunu ma o Tamano. ²⁵ Ma asau ra i uliliman tari sur in pitari tandat, i a nilaun tukum.

²⁶ A tumus tar a kum utna ri torom mot, sur an utumarong mot un det ra det nem na ben raro mot. ²⁷ A Tokodos na Nion, ra o Karisito i pitar tari torom mot, kura ut un mot, ra ka mot sibo sur taio in ususer mot. Uni a Tokodos na Nion i ususer mot una kum utna rop. Ma a utna ra i ususer mot uni i lingmulus, ma awu sur a torotoro. Mot in nuk ukai a etowo ri, sur mot in kis tukum un o Karisito.

A kum nutnutun o God

²⁸ A kum nutnutung liklik, mot in kis tukum un o Karisito, sur gong dat ngara ma gong dat maimai una nun a bung na inawan pat. ²⁹ Mot tasmani lena, o God a tene tokodos, ma mot tasmani kai lena, det rop ra det pam a tokodos na petutna, det a kum nutnutun o God.

3

¹ Tama i! A Tamandat, una labino mar-marisanunu torom dat, i watung dat a kum nutnutunu. I lingmulus ut, dat a kum nutnutun o God. A taro tagun a rakrakon bual ka det tasman o God, lenkutkai ra ka det tasman dat lena dat a kum nutnutunu. ² A kum wakak na paspasang, uniri dat a kum nutnutun o God, ma ke puaso utmakai lena, numur, dat in nanpat pepetlai. Ikut dat tasmani lena, numur ra o Iesu in nanpat, dat in elar ut nami, uni dat in tama mulusi maragom. ³ Osi ra i kis langlang nama nurnur sur o Karisito, in waninar anun a nilaun ma in utalapor i elar nam o Karisito ra i talapor.

⁴ Osi ra i pam a sakino petutna, i lakai a warkurai anun o God, uni a sakino petutna, i a petutna na lakai warkurai. ⁵ Ma mot

tasmani lena o Karisito i wanpat sur in los ru anundat a kum sakino petutna, ma i ut, katu sakino petutna uni. ⁶ Osi ra i laun un o Karisito, ken ser pam a sakino petutna. Ma osi ra i ser pam a kum sakino petutna, ke tama i utmakai o Karisito, ma ke tasmani kai.

⁷ A kum nutnutung liklik, gong mot madek tar taio sur in ben raro mot. Osi ra i pam a tokodos na magirano, i tokodos elar nam o Karisito. ⁸ Ma osi ra i pam a sakino petutna, i anun o Satan, uni o Satan a tene pam a sakino turpasi ut una turturkibino. Ikut, a Nutun o God i wanpat sur in kamar ru a pinapam anun o Satan. ⁹ Det rop ra a kum nutnutun o God, ka det ser pami mo a kum sakino petutna, uni a nilaun anun o God i kis un det. Ka det in ser pam a sakino petutna, uni det a kum nutnutun o God. ¹⁰ Dat in tama lele a kum nutnutun o God ma a kum nutnutun o Satan lenri: Osi ra ke pam a tokodos na petutna, i awu sur a nutun o God, lenkutkai ra torom osi ra ke nem o tisino.

Dat in nem etetalai dat

¹¹ A wasiso ri mot longoro i tagun numugu lena, dat in nem etetalai dat. ¹² Ma gong dat elar nam o Kain, i ra anun o Satan, ra i um doko ru o tisinolik o Abel. Asau a kibino ra i um doko i? Uni a magirano i laulau, ma a magiran o tisinolik i tokodos.

¹³ A kum tistising, gong mot kisin ra a taro tagun a rakrakon bual det in nget mot. ¹⁴ Dat tasmani lena, dat sa wan gusun a minat, sur a nilaun, uni dat nem a kum tistisin dat. Ma osi ra kalako marmaris, i kis utmakai una minat. ¹⁵ Osi ra i nget o tisino, i a tene um doko a taro, ra mot tasmani lena a nilaun tukum ke kis un det a kum tene um doko a taro.

¹⁶ Dat in tasman a marmaris mulus lenri: O Iesu Karisito i pitar anun a nilaun ma i mat sur dat. I wakak sur dat kai, dat in pitar anundat a nilaun ma dat in mat sur a kum tistisin dat. ¹⁷ Ra taio anun a susut na utna, ma i tama o tisino i sibo, ikut ke marisi nam tu utnalik, a marmaris anun o God ke kis uni. ¹⁸ A kum nutnutung liklik, gong dat marmaris nama wasiso, o nama wandat kut. Dat in marmaris nama wakak na pinapam ma a lingmulusino.

¹⁹ Ra dat in marmaris lenra, dat in tasmani lena, dat tagun a lingmulusino, ma dat in balano molmol umatan o God. ²⁰ Ra a nuknukin dat in takun dat, a mananos anun o God i labo taun a nuknukin dat,

ma i tasman a kum utna rop. ²¹ A kum wakak na paspasang, ra a nuknukin dat ke takun dat, dat in balano molmol umatan o God. ²² Ma asau rop ra dat saringi suri, in pitari ut tandat, uni dat mur anun a kum warkurai, ma dat pam asau ra i ugasasi. ²³ A warkurai anun o God i lenri: Dat in nurnur una risan o Nutunu, o Iesu Karisito, ma dat in nem etetalai dat, elar nam anun a warkurai torom dat. ²⁴ Osi ra i mur anun a kum warkurai, i laun un o God, ma o God kai i laun uni. Ma dat tasmani lena o God i laun un dat, uni a Tokodos na Nion ra i tabor dat nami, kuri ut un dat.

4

A utumarong una kum torotoro na poropet

¹ A kum wakak na paspasang, gong mot nurnur oros un taio ra i watungi lena a Tokodos na Nion i pitar tar a wasiso toromi. I wakak sur mot in lari munung a kum nion, ra det tagun o God o awu. Uni, a susut na torotoro na poropet kuri det una rakrakon bual. ² Mot in tasman lele a Nion o God lenri: Det ra det watungi lena o Iesu Karisito i wanpat a musano mulus, det tagun o God. ³ Ikut det ra det ipul lena, awu sur o Iesu Karisito i wanpat a mulusino, awu sur det tagun o God. A nion ra, tagun a ebar anun o Karisito, ra mot sa longoro tari lena in nanpat, ma uniri i sa wanpat nin una rakrakon bual.

⁴ A kum nutnutung liklik, mot anun o God, ma mot sa winim pas a kum torotoro na poropet, uni a Tokodos na Nion ra i kis un mot, i dektek taun a nion ra i kis una taro tagun a rakrakon bual. ⁵ A kum torotoro na poropet det tagun a rakrakon bual, ma a wasiso anundet tagun a rakrakon bual, ma a taro tagun a rakrakon bual det longoro det. ⁶ Dat anun o God, ma osi ra i tasman o God i longoro dat. Ikut osi ra awu sur tagun o God, ken longoro dat. Lenra dat in tasman lele a Nion ra i lingmulus, ma a nion ra i torotoro.

O God, i a kimkibin a marmaris

⁷ A kum wakak na paspasang, dat in nem etetalai dat, uni a marmaris i wan tagisapat tan o God. Det rop ra det tastasman a marmaris, det a kum nutnutun o God, ma det tasman o God. ⁸ Osi ra ke tasman a marmaris, ke tasman o God, uni o God, i a kimkibin a marmaris. ⁹ O God i ese anun a marmaris torom dat, ra i tulu ru o Nutunu, ara sot kut, urin una rakrakon

bual, sur in pitar a nilaun torom dat. ¹⁰ A marmaris i lenri: O God ut i maris mugu dat. Awu sur dat, dat maris mugu o God, awu. O God i maris dat, ra i pitar ru o Nutunu sur in mat ra in ulangolango pas dat gusun anundat a kum sakino petutna ma in urop ru a kankan anun o God gusun dat. ¹¹ A kum wakak na paspasang, o God i maris doko dat lenri, i wakak sur dat kai, dat in nem etetalai dat. ¹² Katutaio utmakai i tama tar o God. Ikut ra dat nem etetalai dat, o God kuri un dat, ma anun a marmaris i bukus un dat.

¹³ Dat tasmani lena dat laun un o God, ma o God i laun un dat, uni i sa pitar tar a Niono tandat. ¹⁴ O Tamano i pitar ru o Nutunu sur in Tene Ulaun anun a rakrakon bual, ra met, met sa tama tari, ma met wasiso talapor uni. ¹⁵ Ra taio i wasiso puaso lena, o Iesu a Nutun o God, o God i laun uni, ma i kai i laun un o God. ¹⁶ I mo ra dat ut, dat tasman a marmaris anun o God torom dat ma dat nurnur uni.

O God, i a kimkibin a marmaris. Osi ra i tasman a marmaris, i laun un o God, ma o God i laun uni. ¹⁷ Una kisapi ri, anun a marmaris i bukus un dat, ma ka dat in ngara una bung na warkurai, uni nin una rakrakon bual, dat laun elar nam o Karisito. ¹⁸ Katu nginara i kis una marmaris. Ra a marmaris in bukus un taio, in lakro ra a nginara. Ikut, ra taio i ngara, i ese i lena, anun a marmaris ke bukus, ma i nuki lena in iru una warkurai na minabalu.

¹⁹ Dat nem etetalai dat, uni o God ut i nem mugu dat. ²⁰ Ra taio i watungi lena, "A nem o God," ikut i nget o tisino, i a tene torotoro. Uni osi ra ke nem o tisino ra i tama i, ken nem lar pasi kai o God ra ke tama i. ²¹ I pitar tar a warkurai ri tandat, lenri: Ra taio i nem o God, in nemi kai o tisino.

5

A nurnur i winim pas a rakrakon bual

¹ Det rop ra det nurnur un o Iesu lena i a Karisito, det a kum nutnutun o God. Ma det rop ra det nem o Tamano, det nemi utkai a kum nutnutunu. ² Ra dat nem o God, ma dat mur anun a kum warkurai, dat tasmani lena, dat nem a kum nutnutunu. ³ Ra dat nem o God, dat in mur anun a kum warkurai. Ma anun a kum warkurai, ke ngangitin sur dat in muri. ⁴ Uni det ra a kum nutnutun o God, det sa winim pas a rakrakon bual. A dekkek ra dat winim pas

a rakrakon bual nami i lenri: anundat a nurnur. ⁵ Osi ra i winim pas a rakrakon bual? Det kut ra det nurnur un o Iesu lena, i a Nutun o God.

A wasiso talapor un o Iesu Karisito

⁶ O Iesu Karisito i wanpat nama danim ma a gap*. Awu sur i wanpat kut nama danim, i wanpat nama danim ma a gap. A Tokodos na Nion i wasiso talapor un o Iesu Karisito, uni a Tokodos na Nion i a lingmulus. ⁷ Detul ri, detul wasiso talapor uni: ⁸ A Nion, a danim, ma a gap. Anundetul a wasiso talapor i takai kut. ⁹ Dat ser nurnur una wasiso talapor anun a taro, ikut a wasiso talapor anun o God i labo tauni. Uni, una tulu utna ri, o God ut i wasiso talapor un o Iesu lena, o Nutunu. ¹⁰ Osi ra i nurnur una Nutun o God, i sa utur ukai a wasiso talapor anun o God unin balano. Ikut osi ra ke nurnur una wasiso talapor anun o God, i nuki lena o God a tene torotoro, uni ke nurnur una wasiso talapor anun o God un o Nutunu. ¹¹ Anun a wasiso talapor i lenri: O God i sa pitar tar a nilaun tukum torom dat, ma a nilaun ra, kura un o Nutunu. ¹² O naro ra o Nutun o God i laun uni, i utur ukai a nilaun tukum. Ikut o naro ra o Nutun o God ke laun uni, ke utur ukai a nilaun tukum.

O Iesu i a nilaun tukum

¹³ A kum utna ri a tumusi torom mot, ra mot nurnur una risan a Nutun o God, sur mot in tasmani lena, mot sa utur ukai a nilaun tukum. ¹⁴ Ra dat wararing torom o God sur tu utna elar nam anun a nemnem, dat sa tasman mulusi lena, in longoro dat. Ra ka dat in ngara sur dat in saringi sur tu utna. ¹⁵ Ra dat tasmani lena, i longoro dat una kum utna rop ra dat sasaringi suri, dat tasmani kai lena, in pitar asau ra dat saringi suri.

¹⁶ Ra taio in tama o tisino ra i pam a sakino petutna ra ke wan sur a minat, in wararing torom o God, ma o God in pitar a nilaun tano. A niaring ri in warut det ra anundet a sakino petutna ke wan sur a minat. Ikut ka watungi sur mot in wararing sur det ra anundet a sakino petutna i wan sur a minat.† ¹⁷ A kum petutna rop ra ke tokodos, a kum sakino petutna. Ikut a ramano kum sakino petutna ke wan sur a minat.

¹⁸ Dat tasmani lena det rop ra a kum nutnutun o God, ka det ser pam meleti

4:12: Jn 1:18 4:13: 2 Kor 1:22; 1 Jon 3:24 4:21: Mk 12:29-31 5:1: 1 Jon 4:15 5:3: Jn 14:15, 23-24
5:6: Jn 1:29-34 * 5:6: A ramano kum tene mananos una Buk Tabu det nuki lena a danim i ukinalong a baptais ma a gap i ukinalong a minat. 5:7: Jn 15:26 5:9: Jn 5:32-37 5:10: Gal 4:6 5:12: Jn 3:36 5:13: Jn 20:31 5:14: Jn 14:13; 1 Jon 3:21-22 5:16: Mt 12:31 † 5:16: A ramano kum tene mananos una Buk Tabu det nuki lena a sakino petutna ra taio in mat tukum uni, ra i ipul ru o Iesu. 5:18: 1 Jon 3:9

mo a kum sakino petutna. Uni a Nutun o God i tamtamabat det ut, ra o Satan ke pet lar pasi sur in ban laulau det. ¹⁹ Dat sa tasmani lena, dat a kum nutnutun o God, ma a rakrakon bual rop i kis utuntudu ina warkurai anun o Satan. ²⁰ Dat sa tasmani kai lena, a Nutun o God i sa wanpat, ra i tabor tar dat nama mananos, sur dat in tasman o God ra i lingmulus. Dat laun un o God ra i lingmulus, uni dat laun un o Nutunu, o Iesu Karisito. Ma i, a God ra i lingmulus, ma a nilaun tukum.

²¹ A kum nutnutung liklik, mot in tamtamabat mot gusun a kum torotoro na god.

A Manru na Pas anun o Jon

A wasiso talapor mugu

A pas ri o Jon i tumusi. I tumusi torom ara ino, ikut a susut na tene mananos det nuki lena, a ino ma a kum nutnutunu a wasiso elelar una lotu ma a kum tene nurnur.

Una pas ri, i inanos det lena, det in nem etetalai det, ra det in tamtamabat det gusun a kum torotoro na tene ususer.

A inawan ina Manru na Pas anun o Jon:

A turturkibin ina buk ri (1-3)

A marmaris (4-6)

A utumarong una kum tene torotoro (7-11)

A ururop na wasiso (12-13)

¹ Iau o Jon, ara mugumugu, a tumtumus torom ui, a ino ra o God i sa pilok pas ui, tomo nama kum nutnutum, ra a nem mulus mot. Awu sur iau kut, met rop kai ra met tasman a lingmulusino met nem mot.

² Met nem mot kibino una lingmulusino ra kuri un dat, ma in kis tukum un dat.

³ A marmaris, a wakak na petutna ma a malmal tan o God a Tamandat ma o Iesu Karisito o Nutunu, in kis torom dat ra dat kis una lingmulusino ma dat nem etetalai dat.

Dat in nem etetalai dat

⁴ A gas doko ra a longoro i lena, a ramano kum nutnutum, det mur a lingmulusino, elar nama warkurai ra a Tamandat i sa pitar tari torom dat. ⁵ A wakak na ino, uniri a saring ui, sur dat in nem etetalai dat. Awu sur a tumus tu matok na warkurai torom ui, awu. A warkurai kut ra dat sa longoro tari tagun numugu. ⁶ Ra dat nem a taro dat in ese i lenri: Dat in mur a kum warkurai anun o God. Anun a warkurai, ra tagun numugu mot sa longoro tari i lenri, mot in mur a petutna na marmaris.

Mot in tumarong mot gusun a kum tene torotoro

⁷ A susut na tene torotoro det sa wan sarara nin una rakrakon bual. Det ipul kut lena, o Iesu Karisito awu sur i wanpat a musano mulus. A ngas na musano ra, i a tene torotoro, ma a ebar anun o Karisito. ⁸ Mot in tumarong mot sur gong mot ubek ru asau ra mot sa dekdek pasi. Mot in tur dekdek sur mot in los pas anumot a kudulano ikul. ⁹ Osi ra i wan gisen pas gusun a kum etowo anun o Karisito ma ke muri, o God awu sur kura uni. Ikut osi

ra i mur a kum etowo ri, a Tamandat ma o Nutunu kura der uni. ¹⁰ Ra taio in nan torom mot nam tu ngas na etowo gisen, gong mot gas pasi ma gong mot ben ruki una numot a kum rumu. ¹¹ Osi ra i gas pasi, i ara pasano una nun a kum sakino pinapam.

A ururop na wasiso

¹² A susut na utna ra an tumusi torom mot, ikut ka nemi sur an tumtumus una dono pepa namin nepen. A nuki sur an nan ut torom mot, ma dat ut dat in wasiso tomo, sur anundat a gasgas in buku.

¹³ A kum nutnutun o tisim ino, ra o God i sa pilok pasi, det pitar anundet a marmaris torom ui.

A Mantul na Pas anun o Jon

A wasiso talapor mugu

A pas ri o Jon i tumusi torom ara tene nurnur a risano o Gaius. I watung wakak toromi uni i warut a kum tene pinapam ra det wan nama Wakak na Wasiso. I wasiso kai un ara musano a risano o Diotrepes, ra anun a petutna ke wakak.

A inawan ina Mantul na Pas anun o Jon:

A turturkibin ina buk ri (1-4)

O Jon i gas nam o Gaius (5-8)

A petutna anun o Diotrepes ke wakak (9-10)

A petutna anun o Dimitrius i wakak (11-12)

A ururop na wasiso (13-15)

¹ Iau, o Jon, a mugumugu, a tumtumus torom ui, a wakak na pasang o Gaius, ra a nem mulus ui.

² A wakak na pasang, a wararing sur ui, sur anum a wakak na nilaun ma anum a wakak na kinkinis, elar nama niom ra i laun wakak. ³ A gas doko ra a ramano kum tistisin dat det wanpat, ma det wasiso puaso un ui lena, u mur a lingmulusino, ma anum a nilaun i elar nami. ⁴ Ra a longoro i lena a kum nutnutung, anundet a nilaun i mur a lingmulusino, a gas doko, ma katu utna melet mo ra in ulabo anung a gasgas.

A warut torom a kum tistisin dat ra det wan nama Wakak na Wasiso

⁵ A wakak na pasang, u lingmulus una pinapam ra u pami torom a kum tistisin dat, ra det usiro pat torom ui. ⁶ Ma ara taro tagun det, det wanpat nin, det wasiso puaso torom a taro na lotu una num a marmaris. I wakak ra un warut det nam lako kum utna una nundet a inawan. A petutna ra, o God i gas uni. ⁷ Det wan nama risan o Karisito, ra ka det los tu warut tan a taro ra ka det nurnur. ⁸ Lenra, i wakak sur dat in warut a ngas na taro ra, sur dat in papam tomo nam det sur a lingmulusino in nan sarara.

A nilaun anun o Diotrepes ma o Dimitrius

⁹ A sa tumus tar a pas torom a taro na lotu una num a tamon, ikut o Diotrepes i ra i nem doko i sur in mugumugu anumot, ke ser longoro met. ¹⁰ Ra an nanpat, an inanos mot una kum petutna ra i ser pami, a kum sakino wasiso eno i sa watung tari un met. Ma awu sur i kut ra, i kai ri, ke ser gas pas a kum tistisin dat ra det wanpat nama Wakak

na Wasiso, ma i turbat det ra det nem na gas pas det. Ra taio i nem na gas pas det, o Diotrepes in umana ru i gusun a lotu.

¹¹ A wakak na pasang, gong u tamtama ususer una sakino petutna, un muri kut a wakakino. Osi ra i pam a wakakino, i anun o God, ma osi ra i pam a sakino, ke tasman o God.

¹² A taro rop det watungi un o Dimitrius lena, i ara wakak na musano. A magirano ra i mur a lingmulusino i ese i kai lena i ara wakak na musano. Met kai met wasiso talapor uni, ma u tasmani lena, anumet a kum wasiso i lingmulus.

A ururop na wasiso

¹³ A susut na utna ra an tumusi torom ui, ikut ka nemi sur an tumtumus torom ui namin nepen. ¹⁴ Ikut a nuki lena, milau dar in tamtama tomo, sur dar ut dar in wasiso tomo.

¹⁵ A malmal torom ui. A kum paspasan taginin, det pitar anundet a marmaris torom ui. Ra ui kai, un pitar anung a marmaris torom a kum paspasan dar rop ra det kis tiro iai.

A Pas anun o Jud

A wasiso talapor mugu

O Jud i tumus a buk ri. A susut na tene mananos det nuki lena, o Jud i a tisin o Iesu ma o Jems. Tama Matiu 13:55 ma tama i kai a wasiso talapor una buk anun o Jems.

I tumus a buk ri torom a kum tene nurnur. Ra i longoro i lena a kum torotoro na tene ususer det ben raro det, i tumtumus sur in utumarong det. Ma i watungi lena, a Labino in warkurai a kum tene sakino. I inanos det kai lena, det in mur a Wakak na Wasiso, ma det in tur dekdek una nurnur.

A inawan ina Pas anun o Jud:

A turturkibin ina buk ri (1-2)

A ngasino anun a kum torotoro na tene ususer (3-16)

Dat in tur dekdek una nurnur (17-23)

A wasiso na ulabo torom o God (24-25)

¹ Iau o Jud, a tultul anun o Iesu Karisito ma a tisin o Jems. A tumus a pas ri torom mot ra o God a Tamandat i sa kabo pas mot, ma i maris mot, ma mot kis una tamtamabat anun o Iesu Karisito.

² O God in ubukus anumot a nilaun nama marmaris, a malmal ma a wakak na tamtamabat.

Mot in tumarong mot gusun a kum torotoro na tene ususer

³ A kum wakak na paspasang, a nem doko i sur an tumtumus torom mot una pinapam anun o God ra i ulaun pas dat. Ikut uniri, a nuki lena an tumtumus sur an udekdek mot, sur mot in dekdek sur mot in tamtamabat wakak a Wakak na Wasiso gusun a kum ebar. A Wakak na Wasiso ra di sa pitar tari torom a taro anun o God, ra kataio in pukus lar pasi. ⁴ A tumus a utna ri, uni ara taro det sa ruk eno taru torom mot. Ka det mur a nemnem anun o God, ma det in iru una warkurai anun o God, elar nami ra di sa tumus tari numugu utmakai una Buk Tabu. Det pukus laulau pas a marmaris anun o God, ra det watungi lena, "I wakak kut ra dat in pam a kum petutna na pamuk." Ma det ipul ru i kut anundat a Mugumugu ma anundat a Labino o Iesu Karisito, i ara sot kut.

⁵ Mot sa tasman tar a kum utna ri, ikut a nemi sur an inanos melet mot lena: A Labino i ulaun pas a taro Israel tagitong o Ijip, ikut numur, i um doko ru det ra ka

det nurnur. ⁶ Ma a kum ensel kai, ra ka det gas una kum pinapam ra o God i sa tibo tar det nami, det wan gisen gusun a kinkinis anundet. Ra o God i sa ker ukai tar det nama kum sen, ra in kis tukum. Ma det sa kis una dumirum ra det kis langlang pas a labino bung ra din warkurai det. ⁷ Lenkutkai ra torom o Sodom ma o Gomora, ma a kum tamon milau der. A taro tagitiro iai, det pam a petutna na pamuk, ma det pam a sakino petutna melet torom det ut a kum musano. Ra a kum tamon ra, det iru rop una sungun. Ma anundet a iniru i utumarong dat sur dat in tasmani lena, a labino sungun ra ken mat, i kis sur a kum tene sakino sur din tun det uni.

⁸ A taro ra det sa ruk taru torom mot, det kai det sakino elar nam det ra. Det nurnur un asau ra det tama i una kum ririon. Una nurnur ra, det ban udur a pinindet melet ut nama kum sakino petutna, ka det nemi sur det in kis utuntudu ina warkurai anun o God, ma det watung laulau a kum ensel tagisapat netes. ⁹ Ikut o Maikel, a mugumugu anun a kum ensel, ra der engaras nam o Satan una minatin o Moses, ke watung tar tu laulau na wasiso un o Satan. I watungi kut lena, "A Labino ut in balu i torom ui." ¹⁰ Ikut a taro ri det wasiso laulau una kum utna ra ka det talapor uni. Ma anundet a mananos i elar kut nama mananos anun a kum wewegua, ra det muri kut a nemnem ina pinindet. A utna ra, det in iru uni.

¹¹ In laulau doko torom det! Det mur a petutna anun o Kain*. Ma det raro elar nam o Balam†, uni det pam a kum laulau na utna sur det in los a mani uni. Det in iru elar nam o Kora‡, ra i mugu pas a taro ra det rosumur gusun o God, ra det iru rop.

¹² Ra a taro ri det wangon tomo nam mot una anumot a kum inangon na marmaris, det elar kut nama dur na utna. Det tabor masmasur pas det ut, ma ka det urur sur a taro gisen. Det elar nama bakut ra a wuwu i wup tuptupukusi, ra katu utna i ubatbati. Det elar kai nama kum duwai ra ka det wu una kalang ra det ser wu uni, det sa mat. Ra di sa gat ru det, anundet a manru na minat mo ra. ¹³ Det elar nama labino top ra i tapak, ma nundet a kum sakino petutna na maimai ra ka det maimai uni, i wanpat talapor elar nama busu na top. Ma det elar kai nama kum nangnang ra ka det kis una kinandet, det wan tuptupukus kut, ra o God i sa waninar tar a labino dumirum sur det, ma ken rop.

1:1: Mt 13:55 1:4: Gal 2:4; 2 Pit 2:1 1:5: Kis 12:51; Nam 14:29-30 1:6: 2 Pit 2:4 1:7: Stat 19:1-25; 2 Pit 2:6, 10 1:9: Dan 10:13, 21; 12:1; 2 Pit 2:11; Tam 12:7; Sek 3:2 1:10: 2 Pit 2:12 1:11: Stat 4:7-8; 1 Jon 3:12; 2 Pit 2:15; Nam 16:1-35 * 1:11: Tama Stat 4:3-8 † 1:11: Tama Namba 22-24 ‡ 1:11: Tama Namba 16
1:12: 2 Pit 2:13, 17 1:14: Stat 5:18, 21-24

¹⁴ Ma o Enok kai, a wonom mawit na kabotaro tagun o Adam, i sa watung tar a wasiso na poropet un det lena, “Tama i, a Labino in nanpat nam anun a ariparip na tasur na ensel,¹⁵ sur in warkurai a taro rop. Ma det rop ra ka det mur a nemnem anun o God, det in iru una warkurai, una nundet a kum sakino pinapam ra det sa pam tari, ma una kum laulau na wasiso ra a sakino taro det sa watung tatari una Labino.”

¹⁶ A taro ri, det a kum tene ururai ma a kum tene pukpukus. Det mur a kum laulau na nemnem anundet, ra det ulabo pas det ut. Det ugargas pasi kut a taro nama nundet a kum namnamin na wasiso, sur det in los tu utna gusun det.

Mot in udekdek mot una nurnur

¹⁷ Ikut mot, a kum wakak na paspasang, mot in nuk pas a kum wasiso anun a kum aposel anun a Labino anundat o Iesu Karisito, ra det sa inanos mugu tar mot nami. ¹⁸ Det sa inanos tar mot lena, “Una kum ururop na bung, lako taro det in watung laulau o God, ra det in mur anundet a kum nemnem, ra ke elar nama nemnem anun o God.” ¹⁹ Mot a kum tene nurnur mot tapagol, kibino una taro ri. Det mur a nemnem kut anun a rakrakon bual, ma a Tokodos na Nion ke kis un det.

²⁰ Ikut mot, a kum wakak na paspasang, in wakak ra mot in udekdek mot una nurnur a tokodos na nurnur sur in lubang, ma mot in wararing nama dekdekin a Tokodos na Nion. ²¹ Mot in kis epotor una marmaris anun o God, ra mot kiskis langlang sur anundat a Labino o Iesu Karisito in tabor mot nama nilaun tukum. In tabor mot nami, uni i maris mot.

²² Mot in ese a marmaris torom det ra i talara anundet a nurnur. ²³ Ma mot in dat ulaun lakit pas ara taro ra kura mo una sungun. Ma torom ara taro kai, mot in ese a marmaris, ikut mot in ngara utkai, sako mot in mur a ngasino anundet. Ma mot in ngaran anundet a kum malu ra i dur nama nundet a kum sakino petutna.

Dat in watung ulabo pas o God

²⁴ Dat in watung ulabo pas o God, ra i pet lar pasi sur in tamtamabat mot sur gong mot puku, ma in utur mot umatan anun a minamar, nama labino gasgas ma katu etakun torom mot. ²⁵ I ara sot kut anundat a God, ra i ulaun pas dat una minatin o Iesu Karisito anundat a Labino. Anunu ut a minamar, a kinkinis na king, a dekdek ma a warkurai, tagun numnumugu utmakai, uniri, ma ken rop. Amen.

A Tamtama anun o Jon

A wasiso talapor mugu

O Jon i tumus a buk ri. I ara tagun a noino ma aru nat na ususer anun o Iesu. I tumusi ra i kis na karabus una ailan Patmos, a wonom na noino ma limo na kilalo numur tan a inawan anun o Iesu usapat una langit. Una kum kilalo ra, a taro na lotu det etorom a susut na mamaut, ma a taro det ban laulau det ma di um doko a susut tagun det kai. O Jon i tumus a buk ri uni i nemi sur det in tur dekdek ma det in nuk pas o Iesu.

I inanos dat lena o God i tasman a kum utna rop ra in nanpat, ma in winim pas o Satan. Ma una ururop ina rakrakon bual, o God in warkurai a taro ra ka det nurnur, ma in ulaun pas det ra det nurnur. In pitar a ikul torom det ra det tur dekdek una nurnur. A kum mamaut ra det etoromi nin upiso, in rop, ma det in kis tomo nam o God una wakak na tamon ra i sa waninar tari sur det ra anunu.

A susut na utna una buk ri i elar nama wasiso elelar.

A inawan ina Buk Tamtama:

A turturkibin ina buk ri (1:1-8)

A kum pas torom a taro na lotu una wonom mawit na tamon (1:9-3:22)

A Labino i palos a buk ra di sa pul tari (4:1-8:1)

A wonom mawit na ensel det wup a wonom mawit nin tuwuru (8:2-11:19)

In labino sui ma aru kuabor na wewegua (12:1-13:18)

A kum tamtama (14:1-15:8)

A wonom mawit na dis na kankan anun o God (16:1-21)

O Babilon i puku ma o God i winim pas o Satan (17:1-20:10)

A bung na warkurai (20:11-15)

A matok na langit ma a matok na rakrakon bual (21:1-22:6)

A ururop na wasiso (22:7-21)

¹ A buk ri, a wasiso puaso anun o Iesu Karisito, ra o God i pitar tari tano, sur in ese tar anun a kum tultul una kum utna ra milau in nanpat. O Iesu i tulu ru anun a ensel torom anun a tultul o Jon, sur in wasiso puaso una kum utna ri tano. ² O Jon i wasiso talapor una kum utna rop ra i sa tama tari. Iri a kum utna ra: a wasiso anun o God, ma a wasiso talapor anun o Iesu

Karisito. ³ Osi ra in luk a kum wasiso na poropet ri, in dan. Ma det ra det in longoro a kum wasiso ri, ra di sa tumus tari, ma det in muri, det kai det in dan, uni i sa milau sur a kum utna ri in nanpat.

O Jon i tumtumus torom a taro na lotu una wonom mawit na tamon

⁴ Iau o Jon, a tumtumus torom mot a taro na lotu una wonom mawit na tamon tong una papor Asia.

A marmaris ma a malmal torom mot tan o naro ra i laun numugu, i laun uniri ma numur in nanpat, ma tan a wonom mawit na nion kai ra det tur numugu tan anun a kiskis na king, ⁵ ma tan o Iesu Karisito, i a lingmulus na tene wasiso talapor un o God, ma a mugano tandet ra det in laun melet gusun a minat, ma a mugumugu anun a kum king una rakrakon bual.

I maris dat, ma i ulangolango pas dat gusun anundat a kum sakino petutna nama gapino, ⁶ ma i ubek taro det sur dat in warkurai tomo nami una nun a matanitu ma sur dat a kum tene etabor torom o Tamano, i ra o God anunu. Dat a kum tene etabor sur dat in papam torom o God. A minamar ma a dekdek rop i kis un o Iesu Karisito, ken rop ma ken rop. Amen.

⁷ Tama i, i wan pirso nama kum du bakut, ma a matan a taro rop det in tama i, ma det utkai ra det so tari nama bele.

Ma a kum kamkabo taro rop una rakrakon bual det in tangis, kibino uni.

In nanpat ut lenra. Amen.

⁸ A Labino o God i watungi lena, "Iau a Alpa ma a Omega*, ra a laun numugu, a laun uniri ma numur an nanpat, ma a dekdek sakit."

O Jon i tama ara i elar nama Nutun a Musano

⁹ Iau o Jon, a tisimot ma a pasamot ra dat tur tomo una kum ngunungut, ma una matanitu anun o God ma una tuntunur dekdek ra dat taramo a ngunungut, uni dat anun o Iesu. A kis na karabus una ailan Patmos, uni a warawai nama wasiso anun o God ma nama wasiso talapor anun o Iesu.

¹⁰ Una bung anun a Labino†, a bukus nama Tokodos na Nion, ma tong numur tang, a longoro in labino walngan ara, i elar namin tuwuru. ¹¹ I watungi lena, "Asau ra u tama i, un tumus ukai i una buk ra di puli ma un pitar ru i utong torom a kum tene lotu una wonom mawit na tamon ri: o Epeses, o

1:1: Tam 22:6 **1:3:** Tam 22:7, 10 **1:4:** Kis 3:14-15; Tam 3:1; 4:5 **1:5:** Kol 1:18; Sng 89:27 **1:6:** 1 Pit 2:9; Tam 5:10; 20:6 **1:7:** Dan 7:13; Sek 12:10; Mt 24:30; Jn 19:34-37; 1 Tes 4:17 **1:8:** Tam 21:6; 22:13 * **1:8:**

Alpa i a mugano matano buk una wasiso Griek, ma Omega i a ururop na matano buk. † **1:10:** A bung anun a Labino a kukuraino lena, a mugano bung una wik, ra di ukinalong a katkatutur melet anun o Iesu.

Smerna, o Pergamum, o Taiataira, o Sardis, o Piladelpia ma o Laodisia.”

¹² A tur tupukus sur an tama o naro ra i wasiso torom iau. Ra a tupukus, a tama a wonom mawit na turtur na lam na gol. ¹³ Ma epotor tan a kum turtur na lam, a tama ara i “elar nama Nutun a Musano,” i emar namin walos na malu i walos pirso tuk ut una aru kikino, ma i ker a rom-robono namin narus na gol. ¹⁴ In lorino ma a iwu na lorino der kabang doko elar nama iwu na sipsip, ma i elar kai nama busu na top, ma arin nikiok na matano der elar nama kunabor ina sungun. ¹⁵ Aru kikino der talapor elar nama bras ra di sa tun talapor tari una sungun, ma in nalngano i elar nama wungu ina danim ra i noro. ¹⁶ I pam pas a wonom mawit nin nangngang una sot na lamano, ma in totok na inaim ra aru paporino rop der wangon doko, kura uwano i gom pasi. Ma in masarino i pilpil elar namin matanas ra i talapor doko.

¹⁷ Ra a tama i, a puku pirso taru nisan a aru kikino elar nama minat. Numur i ubek tar a sot na lamano sapat netes un iau, ra i watungi lena, “Gong u ngara, iau a mugano ma a ururopino. ¹⁸ Iau a laun. A sa mat pas, tama i, a sa laun tukum ma a pam ukai a kum ki ina minat ma ina tamon Edes, a tamon anundet ra det mat.

¹⁹ “I mo ra un tumus a kum utna ra u sa tama tari, a kum utna ri i wanpat ma a kum utna ra in nanpat numur. ²⁰ Iri a kukurai ina utna na pidik tagun a wonom mawit nin nangngang ra u sa tama tari una sot na lamang, ma a wonom mawit na turtur na lam na gol: A wonom mawit nin nangngang ra, i tur ukinalong a kum ensel anun a taro na lotu una wonom mawit na tamon, ma a wonom mawit na turtur na lam ra, i tur ukinalong a taro na lotu una wonom mawit na tamon.

2

A wasiso torom a taro na lotu tong o Epeses

¹ “Un tumtumus torom a ensel anun a taro na lotu tong o Epeses lena:

O naro ra i pam a wonom mawit nin nangngang una sot na lamano, ma i wan epotor una wonom mawit na turtur na lam na gol, i watung wasiso ri:

² A tasman anumot a kum pinapam ma anumot a kum dekdek na pinapam, ma anumot a tuntunur dekdek ra mot taramo a ngunungut. A tasmani lena ka mot maked tar a kum sakino taro. Ma

mot sa lar tar det ra det warango det lena, det a kum aposel, ikut awu sur det a kum aposel mulus, ma mot sa tama lele tar det lena, a kum tene torotoro. ³ Mot sa taramo a ngunungut, uni mot mur iau, ma a pinimot ke ngoro, mot tur dekdek ut.

⁴ Ikut a takun mot una utna ri: Ka mot nem iau mo elar nami ra numugu mot nem iau. ⁵ Mot in nuk pas anumot a wakak na kinkinis sakit ra mot sa puku taru gusunil! Mot in nukpukus, ma mot in pam melet a kum pinapam ra numugu mot ser pami. Ra ka mot in nukpukus, an nanpat torom mot, ma an rakon ru anumot a turtur na lam gusun a kinano. ⁶ Ikut ara utna ri mot pami, i wakak: Mot nget a kum pinapam anun a taro ra det mur a etowo anun o Nikolas, ra iau kai a ngeti.

⁷ Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu. Osi ra i winim pas a inaim, an mulaot pasi sur in nangon tagun in nanai na nilaun, ra kusapat una Paradais anun o God.

A wasiso torom a taro na lotu tong o Smerna

⁸ “Un tumtumus torom a ensel anun a taro na lotu tong o Smerna lena:

O naro ra a mugano ma a ururopino, i ra i mat pas, ma i sa laun melet, i watung a wasiso ri:

⁹ A tasman a kum ngunungut ra i monong mot, ma anumot a kinkinis na pot na marmaris, ikut mot a kum tene gongon mot! A tasman a kum du emang ra ara taro det watungi un mot. Det ra, det watungi lena, det a kum te Juda, ikut awu, det tagun o Satan. ¹⁰ Gong mot ngaran a kum ngunungut ra milau mo in monong mot. Tama i, o Satan in uruk tar a ramano taro tagun mot una karabus sur in lar mot, ma mot in taramo a ngunungut una noino bung. Ra a taro det nem na um doko mot, mot in tur dekdek ut una anumot a nurun; ra an pitar tar a nilaun torom mot elar nami ra di pitar a ikul torom taio ra i winim pas a kinalabor.

¹¹ Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu. Osi ra i winim pas a inaim, a manru na minat ken ban laulau i.

A wasiso torom a taro na lotu tong o Pergamum

¹² “Un tumtumus torom a ensel anun a taro na lotu tong o Pergamum lena:

O naro ra anun in totok na inaim aru paporino rop der wangon doko, i watung a wasiso ri:

¹³ A tasman a tamon ra mot kis iai, a tamon ra o Satan i sa kis na king iai. Ikut mot tur dekdek un iau, ma anumot a nurnur ke wan gisen gusun iau. Mot pami utkai lenra una kilalo ra di um doko o Antipas. I ra anung a lingmulus na tene wasiso talapor, ra di um doko i una numot a tamon, ra o Satan i kis iai.

¹⁴ Ikut a takun mot una kum utna ri: Ara taro ra kura det epotor tamot, det sa mur a etowo anun o Balam, i ra i ususer o Balak sur in usobor a taro Israel ma det pam a sakino petutna, ra det wan a utna na inangon di etabor nami torom a kum torotoro na god, ma det pam a kum petutna na pamuk. ¹⁵ Lenutkai ra ara taro tagun mot det sa mur a etowo anun o Nikolas. ¹⁶ I mo ra mot in nukpukus! Ra awu, an nanpat lakit torom mot, ma an waim nama taro ra det mur a etowo anun o Nikolas, namin totok na inaim ra kuri uwang a gom pasi.

¹⁷ Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu. Osi ra i winim pas a inaim, an tabori nam lako mana ra i kis eno. Ma an tabori kai nama kabang na wat, ra di sa tumus tar a matok na rising uni, ra katutaio i tasmani. O naro sot kut, ra an pitari tano, in tasmani.

A wasiso torom a taro na lotu tong o Taiataira

¹⁸ “Un tumtumus torom a ensel anun a taro na lotu tong o Taiataira lena:

A Nutun o God, ra arin nikiok na matano der elar nama kunabor ina sungun, ma aru kikino der talapor elar nama bras ra di sa tun talapor tari una sungun, i watung a wasiso ri:

¹⁹ A tasman anumot a kum pinapam, anumot a marmaris, anumot a nurnur, anumot a pinapam na warut a taro, ma anumot a tuntunur dekdek ra mot taramo a ngunungut. A tasmani lena anumot a kum pinapam uniri, det labo taun a kum pinapam ra mot pami numugu.

²⁰ Ikut, a takun mot una utna ri: Ka mot lu ru o Jesabel, a ino ra i watungi lena i a poropet. I ususer raro anung a kum tultul, sur det in pam a kum pamuk na petutna ma sur det in nan a utna ra di sa etabor taru nami torom a kum torotoro na god. ²¹ A sa pitar tar a du bung tano sur in nukpukus uni gusun anun a kum pamuk na petutna, ikut ke nemi. ²² An pitar a labino misait tano, ra in ser inep kut una bano. Ma det kai ra det pam a pamuk na petutna tomo nami, ma ka det nukpukus gusun a petutna ra anun o Jesabel, an pitar a dekdek na ngunungut torom det. ²³ Ma an um doko a kum nutnutun o Jesabel, sur a taro na lotu rop det in tasmani lena, a tasman a balan a taro ma a nuknukin det rop, ma an balu i torom mot taktakai elar ut nam anumot a kum pinapam.

²⁴ Ikut ara taro kai tagun mot tiro o Taiataira ka det mur a kum etowo anun o Jesabel, ma ka det mur a kum utna ra ara taro det watungi nama ‘kum utna na pidik anun o Satan ra i madu doko.’ A watungi tamot lena, kan ubek melet tar tu maut netes un det. ²⁵ A kum sau rop ra mot sa utur ukai i, mot in tur dekdek uni tuk ra an nanpat.

²⁶⁻²⁷ Osi ra i winim pas a inaim ma i pam sot pas anung a nemnem tuk una ururopino, an pitar tar a warkurai tano, lenutra o Tita i pitar tar a warkurai tang. An pitar tar a warkurai tano, sur in warkurai sur a taro tagun a kum gapman rop.

‘In warkurai dekdek det namin nubuku na aen,

ma in gino det elar nami ra di pagol ginogino a kuro ra di pami nama piopap.’ *Sng 2:9*

²⁸ Ma an tabori kai namin borodo.

²⁹ Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu.

3

A wasiso torom a taro na lotu tong o Sardis

¹ “Un tumtumus torom a ensel anun a taro na lotu tong o Sardis lenri:

O naro ra i bukus nama wonom mawit na Nion o God ma i pam pas a wonom mawit nin nangnang, i watung a wasiso ri:

A tasman anumot a kum pinapam. A taro det watungi lena mot laun, ikut

mot sa mat. ² Mot in tuangun, ma mot in udekdek anumot a kum wakak na petutna ra i ling na mat mo, uni a tama i lena anumot a kum pinapam ke kudulano umatan anung a God. ³ I mo ra, mot in nuk pas a etowo ra di sa pitar tari tamot ma mot sa longoro tari, mot in muri ma mot in nukpukus. Ikut, ra ka mot in tuangun, an nanpat torom mot elar nama tene wolong ma ka mot in tasman a du bung ra an nanpat uni.

⁴ Ikut ara taro kut tagun mot tiro o Sardis, ka det ban durdur anundet a kum malu. Det in nan tomo nama iau, det in emar namin kabang na malu, uni anundet a nilaun i tokodos. ⁵ Osi ra i winim pas a inaim, in emar elar nam det namin kabang na malu. Ma kan unus ru a risano gusun a buk na nilaun, ma an watung puaso i umatan o Tita ma anun a kum ensel.

⁶ Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu.

A wasiso torom a taro na lotu tong o Piladelpia

⁷ “Un tumtumus torom a ensel anun a taro na lotu tong o Piladelpia lenri:

O naro ra i tasur, ma i lingmulus, ma i pam a ki anun o Dewid, i papos a matansako, ra kataio in tagar lar pasi, ma i tagari, ra kataio in papos lar pasi. I watung a wasiso ri:

⁸ A tasman anumot a kum pinapam. Tama i, a matansako i sa papos taru sa numugu tamot, ma katutaio in tagar lar pasi. A tasmani lena a dekdeki mot ke labo, ikut mot muri ut anung a wasiso, ma ka mot ipul ru a risang. ⁹ Det ra tagun o Satan det watungi lena det a kum te Juda, ikut awu, det a kum tene torotoro. An warkurai det sur det in nan torom mot ma det in puku nisan a kum kikimot, ma det in watung puaso i lena iau a maris mot. ¹⁰ Ra a labino larlar in nanpat a rakrakon bual rop, sur in lar det ra det kis nin upiso, an tamtamabat mot gusun a du bung ra, uni mot mur anung a wasiso sur mot in tur dekdek ra mot taramo a ngunungut.

¹¹ Milau mukut an nanpat. Mot in pam ukai dekdek a kum sau ra mot sa utur ukai i, sako taio in los pas anumot a ikul, ra o God in pitari torom mot, len lari ra di pitar a ikul tan taio ra i winim pas a kinalabor. ¹² Osi ra i winim pas a inaim,

an uturi sur a pos ina rumu na etabor anun a God anungi, ma ken pirso melet gusuni. Ma an tumus a risan anung a God uni, ma a risan a tamon anun a God anungi, a matok na Jerusalem, a tamon ra in nan pirso tagisapat una langit gusun anung a God. Ma an tumus tari kai a matok na risang uni.

¹³ Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu.

A wasiso torom a taro na lotu tong o Laodisia

¹⁴ “Un tumtumus torom a ensel anun a taro na lotu tong o Laodisia lenri:

O naro ra di watungi nama Amen, a lingmulus na tene wasiso talapor anun o God ra i lingmulus sakit, i ra a kimkibin a kum ukukis anun o God, i watung a wasiso ri:

¹⁵ A tasman anumot a kum pinapam. Ka mot kotokoto ma ka mot mararong kai. A nemi sur mot in kotokoto o mot in mararong, ka nemi sur mot in kis pitor kut. ¹⁶ An muru ru mot gusun a wang, uni mot kis pitor kut, ma ka mot mararong mulus, ma ka mot kotokoto mulus. ¹⁷ Uni mot watungi lena, ‘Lingmulus, iau a tene gongon. A ubek tomo a susut na ululeng ma ka sibo sur tu utna.’ Ikut ka mot tama lele i lena, anumot a kinkinis ke wakak, mot pot na marmaris, mot sibo, mot pulu ma mot mengere. ¹⁸ A warut mot nama kum nuknuk ri: Mot in kul a gol tang, ra di sa tun talapor tari una sungun, sur mot in tene ululeng. Ma mot in kuli kai in kabang na malu ma mot in pipisi, sur mot in pipis bat a mengere ra mot ser maimai nami. Ma mot in kul a marasin, ma mot in ubeki umatamot, sur mot in tamtama.

¹⁹ Det ra a maris det, a ser pitar a dekdek na wasiso torom det, ma a ser ukodos det. I mo ra, mot in tuangun, ma mot in nukpukus. ²⁰ Tama i, a tur nisan a matansako ma a pinpidik. Ra taio in longoro in nalngang ma in papos a matansako, an ruk toromi, ma an nangun tomo nama, ma i, in nangun tomo nam iau.

²¹ Osi ra i winim pas a inaim, an mulaot pasi sur mir in kis tomo una nung a kiskis na king, elar nam iau a winim pas a inaim, ma a kis tomo nam o Tita una nun a kiskis na king.

²² Osi ra arin talngano kura, i wakak sur in longoro a wasiso ra a Tokodos na Nion i watungi torom a kum lotu.”

4

A lotu sapat netes una langit

¹ Numur, a tamtama, ra a tama pas a matansako i sa papos taru sapat una langit. Ra in nalngan o naro ra a sa longoro mugu tari, ra i wasiso torom iau elar namin tuwuru, i watungi lena, “Wan toto urin, an ese tar ui un asau ra in nanpat numur.”

² Uniutra, a bukus nama Tokodos na Nion. Ma sa numugu tang, a tama a kiskis na king sapat una langit, ma ara kura i kis taru uni. ³ Ma o naro ra i kis taru una kiskis na king ra, i talapor elar nam aru wat ra a matander i ka doko, di watung der nama jasper ma a konilian. Ma in nongogol i tur talilis pas a kiskis na king, i talapor elar nama emeral, a grin na wat ra a matano i ka doko. ⁴ Ma aru noino ma wat na kiskis na king det tur talilis a kiskis na king, ma a ru noino ma wat na mugumugu kura det kis taru un det. Det emar nama kum kabang na malu, ma una kum lorindet, det ubek a kum kukup na king ra di pami nama gol. ⁵ Ma in nememe, a pungpugur, ma a rurung, detul wanpat tagun a kiskis na king. Ma sa numugu nisan a kiskis na king, a wonom mawit na lam kura det kunabor. Det ra, a wonom mawit na nion o God. ⁶ Tiro kai sa numugu nisan a kiskis na king, ara utna i tamtama elar nama tasi ra di pami nama galas, ma i talapor doko.

Tiro epotor na kiskis na king, a wat na utna ra det laun, det tur talilis a kiskis na king, a pinpinin det i bukus nama kum kiok na matandet, sa numugu ma nago numur tandet. ⁷ A mugano utna ra i laun, i elar nama laion, i ra i murmur pasi i elar nama bulumakau, a mantul nami in masarino i elar ut nam in masarin a musano, ma a manwat nami i elar nama manigulai ra i ro. ⁸ A wat na utna ra det laun, arara tagun det a wonom na mebene, ma a kum kiok na matmatan det i bukus una pinpinin det, ma ututudu ina kum mebendef utkai. Una kum mirum ma a waspi, ka det mana nama watung a wasiso lena, “A Labino o God, o naro ra i dekdek sakit, i tasur, i tasur, i tasur; o naro ra i laun numugu, i laun uniri ma numur in nanpat.”

⁹ O naro ra i kis una kiskis na king, ra in laun tukum, ken rop ma ken rop, a wat na utna ra det laun det ulabo pasi, det ru

i ma det watung wakak toromi. A kum bung rop ra det pami lenri, ¹⁰ aru noino ma wat na mugumugu kai det puku na urur sa numugu tan o naro ra i kis una kiskis na king, o naro ra i laun tukum, ken rop ma ken rop, ma det lotu toromi. Det rakon ru anundet a kum kukup na king, ma det ubek tari sa numugu tan a kiskis na king ma det watungi lena,

¹¹ “Anumet a Labino ma anumet a God, i tokodos sakit sur din ulabo pas ui ma din ru ui, ma i tokodos sakit sur un utur ukai a dekdek.

Uni ui, u ukis a kum utna rop. U ukis det una num a nemnem ut, ma det laun kut tagun ui.”

5

A Barman na Sipsip i palos a buk ra di sa pul tari

¹ A tama a buk una sot na laman o naro ra i kis una kiskis na king. A buk ra di sa pul tari, di sa tumtumus rop taru una aru paporino, ma di sa bulit bat tari nama wonom mawit na bulit. ² Ma a tama a dekdek na ensel i iting namin labino walngano lena, “Osi mo ra i tokodos sur in papok ru a wonom mawit na bulit ri gusun a buk, ma in palosi?” ³ Katutaio sapat netes una langit, ma nin upiso, ma nago ubalan a piso in pet lari sur in palos a buk ra, o in tama i. ⁴ Ra a tangis doko iau, uni ka di sio pas taio ra i tokodos sur in palos a buk ra, o in tama a tumtumus kura ubalano. ⁵ Ara mugumugu i watungi tang lena, “Gong u tangis! Tama i, a laion anun a kabotaro Juda, i ra in wakakorin o Dewid, i sa winim pas a inaim. I pet lari sur in papok ru a wonom mawit na bulit ma in palos a buk ra.”

⁶ Numur a tama a Barman na Sipsip, i tamtama lari ra di sa um doko tari, i tur nisan a kiskis na king, ma a wat na utna ra det laun, ma a kum mugumugu det tur talilis pasi. A Barman na Sipsip ra, a wonom mawit na komino, ma a wonom mawit nin niok na matano. Det a wonom mawit na nion o God, ra di tulu ru det una rakrakon bual rop. ⁷ A Barman na Sipsip i wan ma i los pas a buk gusun a sot na laman o naro ra i kis una kiskis na king. ⁸ Ra i los pas a buk ra, a wat na utna ra det laun ma aru noino ma wat na mugumugu, det puku na urur taru sa numugu tan a Barman na Sipsip. Det rop det pam arara gita ma arara dis ra di pami nama gol. A kum dis ra,

det bukus nama paura di watungi nama insens, ra di tuni ra a misino i sangnain wakak. Det ra, a kum niaring anun a taro anun o God. ⁹ Ma det kele a matok na kelekele lenri,

“Ui ut u tokodos sur un los pas a buk ma un papok ru a kum bulit gusuni, uni di um doko ui, ma u kul pukus pas a taro torom o God nama gapim, a taro tagun a kum kamkabo taro rop, tagun a wur ngas na wasiso rop, tagun a kum tamon rop ma tagun a kum gapman rop.

¹⁰ U ubek tar det sur det in warkurai tomo nam ui una num a matanitu, ma sur det a kum tene etabor torom anundat a God, ma det in warkurai nin una rakrakon bual.”

¹¹ Numur a tamtama ma a longoro a kum walngan a susut na ensel ra det tur talilis pas a kiskis na king ma a wat na utna ra det laun, ma a kum mugumugu. A kum ensel det susut doko, katutaio in luk lar pas det. ¹² Det kelekele namin labino walngandet lenri,

“I tokodos sakit sur a Barman na Sipsip ra di sa um doko tari in utur ukai a dekdek, a labino ululeng, a mananos ma a dekdek sur in warkurai.

Ma i tokodos sakit sur din ru i, din ulabo pasi ma din watung ulabo pasi!”

¹³ Ma a longoro a kum walngan a kum ukukis rop sapat netes una langit, ma una rakrakon bual, ma nago ubalan a piso ma nago ubalan a tasi, ma a kum utna rop ra kura ubalandet, det kelekele lenri,

“Torom o naro ra i kis una kiskis na king, ma torom a Barman na Sipsip, din watung ulabo pas der ma din ru der. Ma der utur ukai a minamar ma dekdek, ken rop ma ken rop.”

¹⁴ Ma a wat na utna ra det laun, det watungi lena, “Amen,” ma a kum mugumugu det puku pirso nama urur ma det lotu.

6

A Barman na Sipsip i papok ru a kum bulit

¹ A tama i ra a Barman na Sipsip i papok ru a mugano bulit tagun a wonom mawit na bulit kura una buk. A longoro ara tagun a wat na utna ra det laun, i kakabo namin nalngano ra i elar nama pungpugur lena,

“Wan urin!” ² Ra a tamtama, a tama pas a kabang na os kusa numugu tang. Ma o naro ra i kis netes uni, i pam pas in bonara na inaim, ma di pitar a kukup na king tano. I wan elar nam o naro ra i sa winim pas a inaim, ma i wan sur in winim melet pas a inaim.

³ Ra a Barman na Sipsip i papok ru a manru na bulit, a longoro a manru na utna ra i laun, i watungi lena, “Wan urin!” ⁴ Ara os bulung i wanpat i merek doko. Ma o naro ra i kis netes uni, di pitar a dekdek tano sur in rakon ru a malmal tagun a rakrakon bual, ma sur a taro det in um doko etetalai det. Ma di pitar in labino totok na inaim tano.

⁵ Ra a Barman na Sipsip i papok ru a mantul na bulit, a longoro a mantul na utna ra i laun, i watungi lena, “Wan urin!” Ra a tamtama, a tama pas a mirum na os sa numugu tang. Ma o naro ra i kis netes uni, i pam pas a sikel una lamano. ⁶ A longoro ara utna i elar namin nalngan ara, epotor nisan a wat na utna ra det laun, i watungi lena, “A matan a utna in ka doko. Din kul ara kilogrem na wit nam ara denaria,* ma din kul a tulu kilogrem na bali† kai nam ara denaria. Ikut gong u ban laulau a kum duwai na oliw ma a wain, sako a mander kai in ka doko.”

⁷ Ra a Barman na Sipsip i papok ru a manwat na bulit, a longoro in nalngan a manwat na utna ra i laun, i watungi lena, “Wan urin!” ⁸ Ra a tamtama, a tama pas a kubus na os sa numugu tang. Ma o naro ra i kis netes uni, a risano A Minat. O Edes, a tamon anundet ra det mat, i mur milau nanan tano. Di pitar tar a dekdek tander, sur der in um doko ara kukur tagun a wat na dino tagun a taro nin una rakrakon bual. Der in um doko det namin totok na inaim, ma una munurak, ma una kum laulau na misait, ma kum lomlom na wewegua kai tagun a rakrakon bual.

⁹ Ra a Barman na Sipsip i papok ru a manlimo na bulit, a tama a nion a taro ra di sa um doko tar det, uni det mur sot pas a wasiso anun o God ma det wasiso talapor nami. A tama det utuntudu ina kabulu na tuntun etabor. ¹⁰ Det kukukuk nama kum labino walngandet lena, “A Labino Tadaru, ui u tasur ma u lingmulus. Nangisin mo un warkurai det ra det kis una rakrakon bual, ma un balu det uni det um doko me?” ¹¹ Ra di pitar tar a kum kabang na malu tandet taktakai. Ma di inanos det lena, det in kis

5:9: Sng 33:3; 40:3; 96:1; 98:1 5:10: Kis 19:6; Ais 61:6; Tam 1:6; 20:6 5:11: Dan 7:10; Ibr 12:22 6:1: Tam 4:6; 5:1 6:2: Sek 1:8; 6:1-6 * 6:6: Ara denaria i elar nama ikul anun ara musano una ara bung na pinapam.

† 6:6: A wit ma a bali der lubang elar namin nere. Di pam a palawa tagun a winder. A wit i wakak taun a bali.

6:8: Jer 15:1-3; Ese 5:12, 17; 14:21 6:11: Tam 7:9, 13; 19:14

lilik melet pas, tuk ra din um doko det kai, ra det papam tomo nam det una Wakak na Wasiso, ma a kum tistisin det una nurnur. Din um doko det elar nami ra di sa um doko mugu tar det, tuk a nilulukin det in sot.

¹² A tama a Barman na Sipsip i papok ru a manwonom na bulit. A labino guri i gunugunu dekdek doko, in matanas i dumirum mukut elar namin mirum na malu na tobo ra di pami nama iwu na meme, ma a kalang i merek elar nama gap. ¹³ Ma a kum nangnang sapat netes una maino det puku pirso una rakrakon bual, elar nama kum golono wino fig ra det puku pirso una dekdek na wuwu ra i wup ru det tagun in nanai ino. ¹⁴ Ma a bakut kai i rorom kut elar nama bat ra di puli. Ma a kum tangai ma a kum ailan det karkarai gusun a kum kinandet.

¹⁵ Ra a kum king tagun a rakrakon bual ma a kum lamlabino mugumugu, a kum mugumugu anun a kum tene inaim, a kum tene ululeng, a kum tene dekdek, a kum tene ititula ma det ra awu sur a kum tene ititula, det rop det parau una kum mato na wat, ma epotor tan a kum lamlabino watat una kum tangai. ¹⁶ Ma det kukukuk torom a kum lamlabino watat ma a kum tangai lena, “Mot in puku sapat netes un met, ma mot in munu met gusun in masarin o naro ra i kis una kiskis na king, ma gusun a kankan anun a Barman na Sipsip! ¹⁷ Uni anunder a labino bung na kankan i sa wanpat, ra osi mo in tur lar pas sa numugu tander?”

7

Di ukinalong ara mar ma wat na noino ma wat na arip na taro

¹ Numur tan a kum utna ri, a tama pas a wat na ensel det tur una wat na matmatano wuwu una rakrakon bual. Det pam bat pas a wat na matmatano wuwu sur gong det wup a bual, a tasi, ma a kum duwai. ² A tama pas ara ensel bulung i wanpat tagun a matmatano tobar, i pam pas a ukinalong anun o God, ra i laun. I kakabo namin labino walngano torom a wat na ensel ra di sa pitar tar a dekdek tandet sur det in ban laulau a bual ma a tasi. ³ I watungi lena, “Gong mot ban laulau a bual, a tasi ma a kum duwai, tuk ra met sa ubek tar a ukinalong una kum masarin a kum tultul anun anundat a God.” ⁴ A longoro a nilulukin det ra di sa ukinalong tar det. Det ara mar ma wat na noino ma wat na arip tagun a kum kamkabo taro Israel rop.

- ⁵ Di sa ukinalong tar a noino ma aru arip tagun a kabotaro anun o Juda, a noino ma aru arip tagun a kabotaro anun o Ruben, a noino ma aru arip tagun a kabotaro anun o Gat,
- ⁶ a noino ma aru arip tagun a kabotaro anun o Aser, a noino ma aru arip tagun a kabotaro anun o Naptali,
- a noino ma aru arip tagun a kabotaro anun o Manase,
- ⁷ a noino ma aru arip tagun a kabotaro anun o Simion, a noino ma aru arip tagun a kabotaro anun o Liwai,
- a noino ma aru arip tagun a kabotaro anun o Isakar,
- ⁸ a noino ma aru arip tagun a kabotaro anun o Sebulon, a noino ma aru arip tagun a kabotaro anun o Josep,
- a noino ma aru arip tagun a kabotaro anun o Benjamin.

A kunur na taro det lotu torom o God

⁹ Numur tan a kum utna ri, a tamtama, ma a tama pas a labino kunur na taro, ra katao in luk lar pas det. A taro tagun a kum gapman rop, tagun a kum kamkabo taro rop, tagun a kum tamon rop ma tagun a wur ngas na wasiso rop, det tur sa numugu tan a kiskis na king ma a Barman na Sipsip. Det emar nama kum kabang na malu, ma det pam a kum dono baibai. ¹⁰ Det kukukuk nama kum labino walngandet lena, “Anundat a God, ra i kis una kiskis na king, ma a Barman na Sipsip, der pam ukai a dekdek sur der in ulaun a taro.”

¹¹ Ra kum ensel rop det tur talilis pas a kiskis na king ma a kum mugumugu ma a wat na utna ra det laun. Det puku na urur nama matandet unago upiso numugu tan a kiskis na king, ma det lotu torom o God, ¹² det watungi lena, “Amen!

Din watung ulabo pas anundat a God, din watung wakak toromi, ma din ru i. I utur ukai a minamar, a mananos, ma a dekdek, ken rop, ma ken rop. Amen!”

¹³ Ra ara tagun a kum mugumugu i ting iau lena, “Osi det ri det emar nama kum kabang na malu, ma det wan tagai?” ¹⁴ A balu i lena, “Labino, ui ut u tasmani.” Ra

6:12: Mt 24:29; Ap 2:20; Tam 8:12; 11:13; 16:18 6:13: Ais 34:4 6:14: Tam 16:20 6:15: Ais 2:10, 19, 21
 6:16: Lk 23:30 6:17: Jol 2:11; Mal 3:2 7:1: Jer 49:36; Dan 7:2 7:3: Ese 9:4, 6; Tam 9:4 7:4: Tam 14:1,
 3 7:10: Tam 4:10 7:12: Tam 5:12 7:14: Dan 12:1; Mt 24:21

i watungi tang lena, “Det ri, a taro ra det sa laun sikot tagun a labino ngunungut ra i monong det, ma det sa gos kamkabang pas anundet a kum malu nama gapin a Barman na Sipsip. ¹⁵ I mo ra,

det ser tur sa numugu tan a kiskis na king anun o God,
det papam toromi una nun a rumu na etabor

una kum mirum ma a waspi.

Ma o naro ra i kis una kiskis na king in pulus bat det nam anun a rumu na sel sur det in kis tomo nami.

¹⁶ Ka det in murak,
ma ka det in muruk melet mo.

In matanas ken sa det,
ma katu utna ra i mararong doko kai in tun det.

¹⁷ Uni a Barman na Sipsip ra i kis epotor una kiskis na king, i anundet a tene tamtamabat.

In mugu det sur a kum matmatano danim na nilaun.

Ma o God in wus ru a kum lurlur na matandet rop.”

8

A ururop na bulit

¹ A Barman na Sipsip i papok ru a ururop na bulit tagun a wonom mawit na bulit, ra sapat una langit kalako ugaia elar nama tulu noino minit. ² Ra a tama a wonom mawit na ensel ra det ser tur numugu tan o God, ma di pitar tar a wonom mawit nin tuwuru tandet. ³ Ara ensel bulung i wanpat i tur taru nisan a kabulu na tuntun etabor. I pam pas a kap na gol, ra di ser tun a insens uni, a paura ra a misino i sangnain wakak. Di pitar a labino insens tano, ma i tuni sur a etabor. I ubek tomo i nama kum niaring anun a taro rop anun o God una kabulu na tuntun etabor, ra di pami nama gol, sa numugu tan a kiskis na king. ⁴ In nimis ina insens tomo nama kum niaring anun a taro anun o God i wan gusun a laman a ensel usapat umatan o God. ⁵ Numur a ensel i ubukus melet pas a kap nama sungun tagun a kabulu na tuntun etabor, ra i woro pirso tari netes una rakrakon bual. A pungpugur, a rurung, in nememe ma a guri det wanpat.

A kum ensel det wup a kum tuwuru

⁶ Numur a wonom mawit na ensel ra det pam a wonom mawit nin tuwuru det waninar sur det in wup det. ⁷ A mugano ensel i wup anun in tuwuru, ra a bato na ais i wanpat tomo nama sungun ra di sa

pam tomo tari nama gap, ma di woro pirso tari netes una rakrakon bual. Ara kukur tagun a tulu dino tagun a rakrakon bual i kunabor rop. Ara kukur tagun a tulu dino tagun a kum duwai i kunabor rop, ma a kum wuliso rop kai ra i lubung, i kunabor rop.

⁸ A manru na ensel i wup anun in tuwuru, ra ara utna i elar nama labino tangai ra i kunabor, di woro i usa utasi. Ara kukur tagun a tulu dino tagun a tasi i keles sur a gap. ⁹ Ara kukur tagun a tulu dino tagun a kum utna ra det laun sa utasi det mat, ma ara kukur tagun a tulu dino tagun a kum sip det iru.

¹⁰ A mantul na ensel i wup anun in tuwuru ra in labino nangngang ra i kunabor elar namin nusulu, i puku tagisapat una bakut. I puku netes un ara kukur tagun a tulu dino tagun a kum danim ma a kum matmatano danim. ¹¹ A risan in nangngang ra i Mapak Laulau. Ma ara kukur tagun a tulu dino tagun a kum danim i mapak laulau. Ra a susut na taro ra det inum tagun a kum danim ra, det mat, uni a kum danim ra i mapak laulau.

¹² A manwat na ensel i wup anun in tuwuru, ra di rapus ara kukur tagun a tulu dino tagun in matanas, a kalang ma a kum nangngang. Ra ara kukur tagun a tulu dino tagun det i dumirum. Ra kalako talapor un ara kukur tagun a tulu dino tagun arara bung na mirum ma arara bung na waspi kai.

¹³ Ra a tamtama, a longoro a manigulai ra i ro sapat una maino i kakabo namin labino walngano lena, “In laulau! In laulau! In laulau torom det ra det kis una rakrakon bual, kibino un asau ra milau in nanpat, ra a tulu ensel detul in wup anundetul a tulin tuwuru.”

9

¹ A limo nami, a ensel ra i wup anun in tuwuru, ra a tama in nangngang ra i sa puku pirso taru tagisapat una bakut ma i sa puku taru netes una rakrakon bual. Di pitar tar a ki tano tagun in labino tung ra katu tuktukino. ² Ra i papos in labino tung ra, in nimis i tur pat taguni, elar namin nimis tagun a labino sungun ra i karangop doko. Ma in matanas ma a bakut i dumirum namin nimis tagun in labino tung ra. ³ A kum ko det wan pirso tagun in nimis ra, ma det kis una rakrakon bual, ma di pitar tar a dekdek tandet, elar nama dekdekin a kum bukalo. ⁴ Di len tandet lena gong det ban laulau a wuliso una rakrakon bual, ma

7:16: Ais 49:10 7:17: Sng 23:2; Ais 25:8; Tam 21:4
Tam 11:19; 16:18 8:7: Kis 9:23-26; Ese 38:22; Jol 2:30
Tam 9:12; 11:14 9:1: Tam 20:1 9:2: Stat 19:28; Jol 2:2, 10; Kis 10:12-15

8:3: Tam 5:8; Kis 30:1-3 8:5: Wkp 16:12; Kis 19:16-19;
8:11: Jer 9:15 8:12: Ese 32:7; Tam 6:12-13 8:13:
9:4: Tam 7:3

a kum duwai kai. Det in ban laulau det kut ra katu ukinalong anun o God una kum masarindet. ⁵ Awu sur di pitar tar a dekdek tandet sur det in um doko det, awu, sur det in ukadik det kut a limo na kalang. Ma anundet a ukadik in elar nama ngunungut ina bukalo ra i bir a taro. ⁶ Una kum bung ra, a susut na taro det in sisio sur a minat in nanpat un det, ikut ka det in mat. Det in nemi sur det in mat, ikut a minat in walip det kut.

⁷ A kum ko ra, det tamtama elar nama kum os ra di sa waninar tar det sur a inaim. Una lorindet, a kum utna i elar nama kum kukup na king ra i tamtama elar nami ra di pami nama gol, ma a kum masarindet i elar nama masarin a kum mulusino. ⁸ A iwu na lorindet i walos elar nama iwu na lorin a wardain, ma a kum loklokong det i elar nama kum loklokong a kum laion. ⁹ Di ubek bat a kum romrobon det nama kum utna ra i tamtama elar nama du pino aen ra a tene inaim i ubek bat a romrobono nami. A wungu ina kum mebendet i elar nama wungu ina susut na karis ma a susut na os ra det kalabor lakit sur a inaim. ¹⁰ A kum kurundet i elar nama kurun a kum bukalo ma a minibirin det i elar nama minibirin a kum bukalo. Ma a dekdek i kis una kurundet sur det in ban laulau a taro nami una limo na kalang. ¹¹ A ensel tagun in labino tung ra katu tuktukino, i ra anundet a king. Di watungi o Abadon una wasiso Ibru, ma o Apolion una wasiso Grik. * ¹² I sa rop a mugano ukadik. Aru ukadik mukut kura utmakai.

¹³ A wonom nami, a ensel ra, i wup anun in tuwuru, ra a longoro in nalngan ara i wanpat tagun a wat na utna, ra i tamtama elar nama wat na kom, ra i tur netes una wat na tuktuk ina kabulu na tuntun etabor. A kabulu ra, di pami nama gol, ma i tur numugu tan o God. ¹⁴ In nalngan ara i watungi tan a ensel ra lena, "Un palos ru a wat na ensel ra di sa ker ukai tar det, una labino danim Iupretis." ¹⁵ A wat na ensel ra, di sa waninar tar det sur a du bung ri, a bung, a kalang ma a kilalo ri. Di palos ru det, sur det in um doko ara kukur tagun a tulu dino tagun a taro rop.

¹⁶ A niluluk ina taro na inaim ra det kis una kum os det elar nam aru mar na milien rop. A longoro i lenra. ¹⁷ Una nung a tamtama, a kum os ma det ra det kis netes un det, det tamtama lenri: A kum utna ra det ubek bat a kum romrobon det nami, i merek elar nama sungun, i bulu ma i lupu elar nama salfa. A lorin a kum os det

elar nama lorin a kum laion. A sungun, in nimis ma a salfa detul pirsu tagun a kum wandet. ¹⁸ Ara kukur tagun a tulu dino tagun a taro rop det iru una tulu laulau na ukadik ri, a sungun, in nimis ma a salfa ra detul pirsu tagun a kum wandet. ¹⁹ A dekdekin a kum os i kis una kum wandet ma a kum kurundet. A kum kurundet i elar nama kum sui, ma a kum lorin a kum sui det in ukadik a taro.

²⁰ Ma a taro ra a laulau na ukadik ri ke um doko det, ka det nukpukus gusun a kum toktok ra det pami nama lamandet. Ka det mana gusun a lotu torom a kum laulau na nion ma a kum torotoro na god ra di pam a malalarindet nama gol, a silwa, a bras, a wat, o a nuduwai. A kum malalar ra ka det tamtama, ka det longoro ma ka det wanan. ²¹ Ma ka det nukpukus kai gusun a um doko a taro, a sangsagor, a kum pamuk na petutna ma a wolong.

10

A ensel ma a nat na buk ra di ser puli

¹ Numur a tama ara dekdek na ensel bulung i wan pirsu nanan tagisapat una langit. I emar nama bakut, ma in nongogol i kis lao taru netes unin lorino. In masarino i elar namin matanas, ma aru kikino i elar nama sungun ra i kunabor toto elar nama ru pos. ² I pam pas a nat na buk ra di ser puli, kura i papos una lamano. I utur tar a sot na kikino netes una tasi, ma a kair na kikino una piso. ³ Ra i kukukuk namin labino walngano, i elar namin nalngan a laion. Ra i kakabo, a walngan a wonom mawit na pungpugur det wasiso. ⁴ Ra a wonom mawit na pungpugur det sa wasiso rop pas, a ling na tumtumus, ikut a longoro in nalngan ara tagisapat una langit i watungi lena, "Gong u tumus ukai a kum wasiso ra a wonom mawit na pungpugur det sa watung tari, un pidik bati kut."

⁵ Ra a ensel ra a tama tari ra i tur taru netes una tasi ma una piso, i tulsu toto a sot na lamano usapat una langit. ⁶ Ma i liliman nam o naro ra i laun tukum, ken rop ma ken rop, ra i ukis a bakut ma a kum utna rop ra det kis uni, a rakrakon bual ma a kum utna rop ra det kis uni, ma a tasi ma a kum utna rop ra det kis uni, ma i watungi lena, "Ka din balbalon melet mo. ⁷ Una bung ra a ururop na ensel tagun a wonom mawit in ling sur in wup anun in tuwuru, din pam sot pas a utna na pidik anun o God, elar nami ra i sa watung tari tan anun a kum tultul, a kum poropet."

9:6: Jop 3:21; Jer 8:3 9:7: Jol 2:4 9:8: Jol 1:6 9:9: Jol 2:5 * 9:11: O Abadon ma o Apolion a kukurai inder lena a "Tene ban laulau a taro." 9:15: Tam 8:7-12 9:20: Tam 16:9, 11; Sng 115:4-7; 135:15-17; Dan 5:23
10:4: Dan 12:4, 9 10:5: Lo 32:40; Dan 12:7 10:7: Amo 3:7

⁸ Numur in nalngan ara, ra a sa longoro tari tagisapat una langit i wasiso melet torom iau, i watungi lena, “Un nan ma un los pas a buk, ra kura i papos taru una laman a ensel ra i tur taru netes una tasi ma una piso.”

⁹ Ra a wan torom a ensel, ra a saringi sur in pitar tar a nat na buk tang, ra di ser puli. Ma i watungi tang lena, “Los pasi, ra un nani. In mapak tiro ubalam, ikut una wam in namnamin elar nama polono tatos.” ¹⁰ Ra a los pas a nat na buk gusun a laman a ensel, ra a wani. Una wang i namnamin elar nama polono tatos, ikut, ra a konomi, i mapak nin ubalang. ¹¹ Ma di watungi tang lena, “Un wasiso na poropet melet una susut na taro tagun a kum tamon, tagun a kum gapman, ma tagun a wur ngas na wasiso, ma a susut na king.”

11

Aru tene wasiso puaso

¹ Di pitar tar in kakaul tang, elar namin nanai ra di ser mak nami, ma di inanos iau lena, “Un nan ma un mak a rumu na etabor anun o God, ma a kabulu na tuntun etabor, ma un luk det ra det ser lotu tiro iai. ² Ikut un madek ru a dino nago upiso nisan a rumu na etabor, gong u maki. Uni di sa pitar tari torom a taro ra awu sur a taro anun o God, ra det in pas tataun a tamon anun o God elar nama wat na noino ma aru kalang. ³ Ma an pitar tar a dekdek tan anung aru tene wasiso puaso un iau. Der in emar namin namalu na tobo, ma der in wasiso na poropet pas ara arip ma aru mar ma wonom na noino bung.”

⁴ Aru tene wasiso puaso ri, der arin nanai na oliw ma aru turtur na lam, ra der tur umatan a Labino anun a rakrakon bual. ⁵ Ra taio i nemi sur in ban laulau der, a sungun in nanpat tagun a wander ma in tun ru anunder a kum ebar. Ra taio i nem na ban laulau der in iru lenra. ⁶ Aru musano ri der utur ukai a dekdek, sur der in turbat a bakut, sur der gong a bato i puku una du bung ra der wasiso na poropet. Der utur ukai a dekdek, sur der in keles a kum danim sur a gap, ma der in rapus a rakrakon bual nama wur ngas na ukadik rop, una iso du bung ra der nemi.

⁷ Ra der sa urop ru anunder a wasiso puaso, a kuabor na wewegua ra in nan toto gusun in labino tung ra katu tuktukino, in waim tomo nam der. In winim pas der

ma in um doko ru der. ⁸ Ma a minatinder in inep kut una kisapi ina labino tamon di watung larlari nam o Sodom ma o Ijip, a tamon ra di sak wati kai anunder a Labino iai. ⁹ Ma a taro tagun a kum tamon rop, tagun a kum kamkabo taro rop, tagun a wur ngas na wasiso rop, ma tagun a kum gapman rop, det in tama a minatin der a tulu bung ma a kukur, ma ka det in mulaot sur din por der. ¹⁰ Ma a taro tagun a rakrakon bual det in gas kut un asau ra di pami un der, det in ese anundet a gasgas nama etabor etetalai torom det, uni aru poropet ri der ukadik a taro una rakrakon bual.

¹¹ Ikut numur tan a tulu bung ma a kukur, o God i wup tar a wuwu na nilaun un der. Ra der laun ma der tur, ma a labino ngingara i los det ra det tama der. ¹² Ra der longoro in labino walngan ara tagisapat una langit i watungi lena, “Mur in nan toto urin.” Ma der wan toto una bakut usapat una langit, ma anunder a kum ebar det tama der.

¹³ Una du bung ut ra, a labino guri i wanpat. Ma ara kukur tagun ara noino dino tagun a labino tamon ra i terege. A wonom mawit na arip na taro det mat, ma det ra det laun sikot det ngara doko, ma det watung ulabo pas o God ra i kis sapat una langit.

¹⁴ A manru na ukadik i sa rop. A mantul na ukadik milau in nanpat.

A ururop nin tuwuru

¹⁵ A ururop tagun a wonom mawit na ensel i wup anun in tuwuru, ra a susut na labino walngan a taro sapat una langit det watungi lena,

“A gapman tagun a rakrakon bual i sa tupukus sur a matanitu mo anun anundat a Labino ma anun o Karisito. O Karisito anun a Labino.

Ma anundat a Labino in kis na king tukum, ken rop ma ken rop.”

¹⁶ Aru noino ma wat na mugumugu ra det kis una anundet a kum kiskis na king sa numugu tan o God, det puku nama urur, a masarindet unago upiso, ma det lotu torom o God. ¹⁷ Det watungi lena, “Labino o God u dekdek sakit, u laun numugu ma u laun uniri. Met watung wakak torom ui, uni, una labino dekdekim, u sa turpasi sur un kis una num a kinkinis na king.

¹⁸ A kum gapman gisen det kankan,

ma anum a kankan kai i sa wanpat.
 A du bung i sa wanpat sur un warkurai det
 ra det sa mat,
 ma sur un pitar a ikul torom anum a kum
 tultul a kum poropet,
 ma anum a taro, det ra det urur una
 risam,
 a kum lamlabino ma det ra ka di ulabo
 pas det,
 ma un kamar ru det ra det ban laulau a
 rakrakon bual.”

¹⁹ Ra a rumu na etabor anun o God sapat
 una langit i papos, ma ubalan anun a rumu
 na etabor di tama anun a boks na kunubus.
 Ma in nememe, a rurung, a pungpugur, a
 guri, ma a labino bato na ais det wanpat.

12

A ino ma in labino sui

¹ A labino ukinalong i wanpat sapat una
 langit. Ara ino i emar pas namin matanas,
 ma a kalang kura i kis utuntudu ina aru
 kikino, ma a kukup na king, ra di pami
 nama noino ma arin nangnang, i kis netes
 unin lorino. ² A ino ri i tianan, ma i
 kukukuk nama labino ngunungut, uni mi-
 lau mo in usus.

³ Sapat una langit, ara ukinalong bulung
 i wanpat. In labino sui, a pinino i merek, a
 wonom mawit nin lorino, a noino komino,
 ma a wonom mawit na kukup na king kura
 una wonom mawit nin lorino. ⁴ In kurunu
 i surupu pirso ru ara kukur tagun a tulu
 dino tagun a kum nangnang tagisapat una
 bakut, ma i woro pirso ru det urin upiso.
 Ma in labino sui i tur taru sa numugu tan
 a ino ra i leser na usus, sur in konom pas
 o nutunulik una du bung ut ra in usus ru i.
⁵ I usus pas a nat musano, i ra in warkurai
 dekkek sur a taro tagun a kum gapman
 rop namin nubuku na aen. Ma di los tito
 lakit pasi usapat torom o God, ma i wan sur
 anun a kiskis na king. ⁶ Ma a ino i kalabor
 song usa una nubual kalako taro uni, una
 nubual ra o God i sa waninar tari, sur din
 tamtamabati tiro iai elar nam ara arip ma
 ara mar ma wonom na noino bung.

⁷ A labino inaim i wanpat sapat una
 langit. O Maikel ma nun a kum ensel det
 waim namin labino sui, ra in labino sui
 ma a kum ensel anunu, det ebalu nama
 inaim. ⁸ Det winim pas in labino sui, ma
 katu nubual melet mo anun in labino sui
 ma a kum ensel anunu sapat una langit.
⁹ Di woro pirso ru in labino sui, in nusui
 tagun narap, ra di watungi a tene etakun, o
 Satan, i ra i ben raro a rakrakon bual rop.

Di woro pirso ru i tomo nam anum a kum
 ensel urin upiso.

¹⁰ Ra a longoro in labino walngan ara
 sapat una langit i watungi lena,
 “Uniri anundat a God i sa ulaun pas a
 taro, i sa ese a dekkekino, ma anum
 a matanitu i sa wanpat,
 ma a warkurai anun o Karisito i sa
 wanpat. O Karisito anun o God.

Uni di sa woro pirso ru
 a tene etakun ra i ser takun a kum
 tistisin dat,
 i ra i ser takun det umatan o God una
 kum mirum ma a waspi.

¹¹ A kum tistisin dat det sa winim pasi
 nama gapin a Barman na Sipsip,
 ma nama nundet a wasiso puaso.
 Ma ka det maris bat anundet a nilaun
 gusun a minat.

¹² I mo ra a langit ma mot ra mot kis uni,
 mot in gas.
 Ikut in laulau torom a rakrakon bual ma a
 tasi kai,
 uni a tene etakun i sa wan pirso torom
 mur!

Anun a kankan i karangop doko,
 uni i tasmani lena ke suano i mo anun
 a du bung.”

¹³ Ra in labino sui i tama i lena di sa woro
 pirso ru i urin una rakrakon bual, i lu a ino
 ra i sa usus pas a nat musano. ¹⁴ Di pitar tar
 aru meben a labino manigulai tan a ino ra,
 sur in ro nami utiro una nubual ra o God i
 sa waninar tari una nubual kalako taro uni,
 sur din tamtamabati tiro iai gusun in nusui,
 elar nama tulu kilalo ma a kukur. ¹⁵ In
 nusui i muru ru a danim gusun a wano elar
 nama labino danim, sur in siliro ru a ino ra.
¹⁶ Ikut a piso i warut a ino ra, i pangango ra
 i konom pas a danim ra in labino sui i muru
 ru i. ¹⁷ In labino sui i kankan doko torom a
 ino ra, ma i wan sur in waim nama ramano
 kum nutnutun a ino kai ra. Det ra det ser
 mur a kum Warkurai anun o God, ma det
 nurnur una wasiso puaso un o Iesu. ¹⁸ Ra
 in labino sui i tur taru mukut nago usalin.

13

A kuabor na wewegua i burak pat sa utasi

¹ Numur a tama pas a kuabor na
 wewegua i burak pat sa utasi. A noino
 komino ma a wonom mawit nin lorino, ma
 a noino kukup na king det kis netes una
 kum komino. Ma unin tekteken lorino di sa
 tumus tar a kum rising ra i watung laulau
 o God nami. ² A kuabor na wewegua, ra a

11:19: Ibr 9:4; Tam 8:5; 15:5; 16:21

12:2: Mai 4:10

12:3: Dan 7:7

12:4: Dan 8:10

12:5: Ais 7:14;

66:7; Sng 2:9; Tam 19:15

12:7: Jud 1:9

12:9: Stat 3:1, 14; Lk 10:18; 22:31; Tam 20:2

12:10: Jop 1:11; Sek 3:1

12:12: Ais 44:23; 49:13

12:14: Dan 7:25; 12:7

12:17: Tam 11:7

13:1: Tam 12:3; 17:3, 7-12

13:2: Dan

tama i, i elar nama lepat, * ikut aru kikino i elar nama ru kikin a bea, † ma a wano i elar nama wana laion. In labino sui i pitar tar a tulu utna torom a kuabor na wewegua. A tulu utna ri: a dekdekino, ma anun a kiskis na king, ma a labino dekdek sur in warkurai nami. ³ Teken lor na kuabor na wewegua i tamtama elar nami ra di sa so doko tari, ikut a inangon ra, i sa maus melet. A rakrakon bual rop det kisin ma det mur a kuabor na wewegua. ⁴ A taro det lotu torom in labino sui, uni i sa pitar tar a dekdek sur in warkurai nami, torom a kuabor na wewegua. Ma det lotu kai torom a kuabor na wewegua, ma det watungi lena, “Osi mo ra i elar nama kuabor na wewegua? Kataio. Osi mo ra i pet lar pasi sur in umi? Kataio.”

⁵ Di mulaot tar a kuabor na wewegua sur in watung a kum wasiso na uman labino ma a kum wasiso ra in watung laulau o God nami, ma in papam nam anun a warkurai a wat na noino ma aru kalang. ⁶ I papos a wano sur in watung laulau o God, ma a risano, a nubual ra i kis iai ma det ra det kis sapat una langit. ⁷ Di pitar tar a dekdek tano sur in wain nama taro anun o God, ma in winim pas det. Di pitar tar a dekdek tano sur in warkurai a taro tagun a kum kamkabo taro rop, tagun a kum tamon rop, tagun a wur ngas na wasiso rop, ma tagun a kum gapman rop. ⁸ Ma det rop ra det kis una rakrakon bual, ra a risandek ke kis una buk na nilaun, ra di sa tumus tari numugu ra o God ke ukisi utmakai a rakrakon bual, det in lotu torom a kuabor na wewegua. A buk na nilaun ra, anun a Barman na Sipsip, ra di um doko ru i. ⁹ Osi ra arin talngano kura, i wakak sur in longoro nami.

¹⁰ Ra o God i sa mulaot tar taio sur in karabus,
in karabus ut.

Ra i sa mulaot tar taio sur din tau doko i namin totok na inaim,
din um doko i ut nami.

Ra i lenra, i wakak sur a taro anun o God det in tur dekdek ma det in nurnur.

A kuabor na wewegua i burak pat una piso

¹¹ Numur a tama ara kuabor na wewegua bulung i burak pat una piso. Aru komino i elar nama kom ina barman na sipsip, ikut i wasiso elar namin labino sui. ¹² I papam nama dekdek rop tan a mugano kuabor na wewegua, sur in warut a mugano kuabor na wewegua nami. I ungongos a rakrakon

bual ma det ra det kis uni, sur det in lotu torom a mugano kuabor na wewegua, i ra a inangon kura uni i sa maus melet. ¹³ A kuabor na wewegua ra i burak pat una piso, i pam a kum ukinalong. Ara ukinalong ra i pami, i kabo piroso pas a sungun tagisapat netes una langit urin, una rakrakon bual umatan a taro. ¹⁴ I toro a taro ra det kis nin una rakrakon bual, kibino una kum ukinalong ra i pami nama dekdek, ra di pitar tari tano sur in warut a mugano kuabor na wewegua nami. I inanos det sur det in pam a malalar ina mugano kuabor na wewegua sur det in urur uni. A mugano kuabor na wewegua ra numugu di so tari namin totok na inaim, ikut i laun ut. ¹⁵ Di pitar tar a dekdek tano sur in tabor a malalar ina mugano kuabor na wewegua nama wuwu na nilaun, sur in wasiso ma in itula sur din um doko det, ra ka det nem na lotu toromi.

¹⁶ A manru na kuabor na wewegua i ungongos pas a taro rop, sur din ubek a ukinalong una sot na lamandek o una masarindet. I ungongos pas a kum lamlabino ma det ra ka di ulabo pas det, a kum tene ululeng ma a kum sibo na taro, a kum tene ititula, ma det ra awu sur a kum tene ititula. ¹⁷ Osi ra katu ukinalong kura uni, ken kukul lar pas ma ken siuru kai. A ukinalong ra, a risan a kuabor na wewegua ma a namba ina risano.

¹⁸ Osi ra i mananos in talapor wakak sur a utna ri. Osi ra i mananos, in pam pat pas a kukurai ina namba anun a kuabor na wewegua, uni a namba i tur ukinalong ara musano. Anun a namba a wonom na mar ma wonom na noino ma a wonom (666).

14

A Barman na Sipsip ma ara mar ma wat na noino ma wat na arip na taro

¹ Numur a tamtama, ra a tama pas a Barman na Sipsip i tur taru una Tangai Saion tomo nam ara mar ma wat na noino ma wat na arip na taro, det ra di sa tumus tar a risan a Barman na Sipsip ma a risan o Tamano kai una kum masarindet. ² Ma a longoro a labino rurung tagisapat una langit i elar nama wungu ina danim ra i noro, ma i elar namin nememe ra i pugur dekdek. A rurung ra a longoro i, i elar nama taro ra det um anundet a kum gita. ³ Det kele a matok na kekeleke sa numugu tan a kiskis na king, ma a wat na utna ra det laun ma a kum mugumugu. Kataio

* **13:2:** A lepat i ara ngas na kuabor na wewegua elar nama taiga. A iwu na pinino i tuktuk. † **13:2:** A bea i ara labino kuabor na wewegua. **13:3:** Tam 17:8 **13:5:** Dan 7:8, 25; 11:36; Tam 11:2 **13:7:** Tam 11:7 **13:8:** Sng 69:28; Tam 17:8; 20:12, 15; 21:27 **13:10:** Jer 15:2; 43:11; Tam 14:12 **13:13:** Mt 24:24; 1 Kin 18:24-39; Tam 19:20 **13:16:** Tam 14:9-11; 16:2; 20:4 **14:2:** Tam 1:15; 19:6 **14:3:** Ais 42:10; Tam 5:9; 7:4

in pet lar pasi sur in ususer una kekelele ri. Ara mar ma wat na noino ma wat na arip ra o God i sa kul langolango pas det taginin una rakrakon bual, det kut det in pet lar pasi. ⁴ Det ri, katu dur un det, uni ka det inep tomo nama wardain. Det ser mur a Barman na Sipsip una kum nubual ra i ser wan iai. O God i kul langolango pas det taginin epotor tan a taro una rakrakon bual, sur det in elar nama mugano wino ra di ser tabor o God ma a Barman na Sipsip nami. ⁵ Katu torotoro i pirso gusun a wandet, ma katu utna ra din takun det uni.

A tulu ensel detul wasiso talapor una warkurai

⁶ Numur a tama pas ara ensel bulung i ro una maino, ra i los a Wakak na Wasiso ra in kis tukum, sur in upuaso i torom a taro ra det kis una rakrakon bual, a taro tagun a kum gapman rop, tagun a kum kamkabo taro rop, tagun a wur ngas na wasiso rop, ma tagun a kum tamon rop. ⁷ I wasiso namin labino walngano lena, “Mot in ngara sur o God, ma mot in watung ulabo pasi, uni anun a du bung na warkurai i sa wanpat. Mot in lotu torom o God, i ra i ukis a bakut, a rakrakon bual, a tasi ma a kum matmatano danim.”

⁸ A manru na ensel i mur ma i watungi lena, “A labino tamon Babilon i sa puku! I sa puku! I ra i pitar a dekdek na wain torom a taro tagun a kum gapman rop, sur det in inum uni. A wain ra, a wain ina nun a pamuk na petutna.”

⁹ A mantul na ensel i mur der, ma i wasiso namin labino walngano lena, “Ra taio in lotu torom a kuabor na wewegua ma a malalarino, ma din ubek tar anun a ukinalong unin masarino o una lamano, ¹⁰ i kai in inum tagun a wain na kankan anun o God. A wain ri di sa waninar tari, a inaimino i dekdek doko, ma di lingisi una kap na kankan anun o God. Din ukadiki nama sungun ma a salfa, numugu tan a Barman na Sipsip ma a kum ensel anun o God. ¹¹ Ma in nimis ina nundet a ukadik in mis tito, ken rop ma ken rop. Det ra det ser lotu torom a kuabor na wewegua ma a malalarino, ma det ra a ukinalong ina risano kura un det, ka det in mana una kum mirum ma a waspi.” ¹² Ra i lenra, i wakak sur a taro anun o God det in tur dekdek, det ra det ser mur a kum Warkurai anun o God, ma anundet a nurnur i tur dekdek un o Iesu.

¹³ Numur a longoro in nalngan ara tagisapat una langit i watungi lena, “Un tumus a wasiso ri: Det ra det mat nama nurnur

una Labino, turpasi uniri ma tuk numur, det dan.” A Tokodos na Nion i watungi lena, “Lingmulus, det in mana gusun anundet a kum pinapam, uni anundet a kum pinapam ra det sa pam tari in nan tomo nam det.”

Din pasong a rakrakon bual uni i sa taka

¹⁴ Ra a tamtama, a tama pas a du bakut ra i kabang, ma sapat netes uni, ara i “elar nama Nutun a Musano” i kis taru uni. I ubek pas a kukup na king ra di pami nama gol unin lorino, ma una lamano i pam pas in totok ra i wangon doko. ¹⁵ Ara ensel bulung i wan pirso gusun a rumu na etabor, ra i kakabo namin labino walngano torom o naro ra i kis netes una du bakut lena, “Los pas anum in totok ma un pasong. A du bung na pasong i sa wanpat, uni a kum utna una rakrakon bual i sa taka rop.”

¹⁶ Numur o naro ra i kis netes una du bakut, i pirat nam anun in totok una rakrakon bual, ra i pasong a rakrakon bual.

¹⁷ Ara ensel bulung i pirso gusun a rumu na etabor sapat una langit. I kai i pam in totok ra i wangon doko. ¹⁸ Ara ensel bulung, i pirso gusun a kabulu na tuntun etabor. A ensel ra i warkurai sur a sungun, ma i kakabo namin labino walngano torom o naro ra i pam pas in totok ra i wangon doko. I kakabo lena, “Un tau a kum kurkur wain tagun a rakrakon bual, uni det sa taka rop.” ¹⁹ Ra a ensel i tautau nam anun in totok nin a rakrakon bual, ma i tau kutus a kum kurkur wain. Ma i woro tari ubalan in labino tung na wat, ra di ser pas reseng a wino wain iai sur in polo. In nutung ra, i tur ukinalong a kankan anun o God. ²⁰ Ma di paspas reseng a kum wino wain unin nutung na wat ra, ra kura upiso tan in noworo ina labino tamon. Ma a gap i sal pat tagun in nutung na wat ra. I walos elar nama tulu mar na kilomita, ma i lubu tito usapat netes tuk una du aen ra i kis una wan a os.

15

A wonom mawit na ensel ma a wonom mawit na ukadik

¹ A tama ara labino ukinalong melet sapat una langit, ma a kisin doko uni. A wonom mawit na ensel det pam pas a wonom mawit na ukadik. A kum ukadik ra, a kum ururopino, uni a kankan anun o God i sot maragom.

² Ra a tama ara utna i tamtama elar nama tasi di pami nama galas ma di pam tomo i nama sungun. A taro ra det sa winim pas a kuabor na wewegua, ma a malalarino, ma

a namba ina risano, det tur nisan a papor tasi ra, ma det pam a kum gita ra o God i sa pitar tari tandet. ³ Det kekele a kekelekele anun o Moses, a tultul anun o God, ma a kekelekele anun a Barman na Sipsip lena,

“Labino o God u dekdek sakit,
anum a kum pinapam det labo ma di kisin doko un det.

Ui a King anun a taro tagun a kum gapman rop,

anum a kum petutna det tokodos ma det lingmulus.

⁴ Labino, osi ra ken ngara sur ui?

Ma osi ra ken watung ulabo pas a risam?

Uni ui kut u tasur.

A taro tagun a kum gapman rop det in nanpat,

ma det in lotu torom ui,

uni anum a kum tokodos na pinapam i talapor rop torom a taro.”

⁵ Numur a tamtama, ra a tama pas a rumu na etabor sapat una langit i sa papos taru. A rumu ra, i a rumu na sel ra i upuaso i lena o God i kis tomo nam anun a taro. ⁶ A wonom mawit na ensel ra det pam pas a wonom mawit na ukadik det pirso gusun a rumu na etabor ra. Det emar nama kum wakak na malu ra det talapor ma det pilpil doko, ma det ker a kum romrobon det nama kum warus na gol. ⁷ Numur ara tagun a wat na utna ra det laun i pitar tar a wonom mawit na dis di pami nama gol torom a wonom mawit na ensel ra. A wonom mawit na dis na gol ri det bukus nama kankan anun o God, o naro ra i laun tukum, ken rop ma ken rop. ⁸ Ma a rumu na etabor i bukus nama mis tagun a minamar anun o God ma tagun a dekdekino. Ma kataio i pet lar pasi sur in ruk una rumu, tuk ra din pam sot pas a wonom mawit na ukadik anun a wonom mawit na ensel ra.

16

A wonom mawit na dis na kankan anun o God

¹ Numur a longoro in labino walngan ara tagisapat una rumu na etabor i watungi torom a wonom mawit na ensel ra lenri, “Mot in nan ma mot in lingis a wonom mawit na dis na kankan anun o God una rakrakon bual.”

² A mugano ensel i wan ma i lingis anun a dis na kankan netes una piso. Ma a kum laulau na inangon sakit, ra det tamtama

sursurin, det wanpat una taro ra a ukinalong anun a kuabor na wewegua kura un det, ma det ser lotu torom a malalarino.

³ A manru na ensel i lingis anun a dis netes una tasi, ra a tasi i keles sur a gap, elar nama gapin a musano ra i mat. Ma a kum utna rop ra det laun sa utasi det mat.

⁴ A mantul na ensel i lingis anun a dis netes una kum danim, ma una kum matmatano danim, ra det keles sur a gap. ⁵ Ma a longoro a ensel ra i tamtamabat a tasi ma a kum danim, i watungi lena,

“God, ui u laun numugu ma u laun uniri, a Tasur na Musano ui,

ui u tokodos, uni u warkurai lenri.

⁶ Det sa um doko ru anum a taro ma anum a kum poropet, ma a gapindet i tilingis.

I mo ra u sa pitar tar a gap torom det sur det in inum uni.

I elar nama warkurai na minabalu torom det una anundet a sakino pinapam.”

⁷ Ma a longoro in nalngan ara tagisapat una kabulu na tuntun etabor i watungi lena,

“A lingmulus, Labino o God, u dekdek sakit, anum a kum warkurai det lingmulus ma det tokodos.”

⁸ A manwat na ensel i lingis anun a dis netes unin matanas, ma di pitar tar a dekdek tan in matanas sur in tun a taro nama sungunino. ⁹ Ma a labino mararongino, i tun a taro, ma det watung laulau a risan o God, i ra i pitar tar a kum ukadik ri, ikut ka det nukpukus ma ka det watung ulabo pasi.

¹⁰ A manlimo na ensel i lingis anun a dis netes una kiskis na king anun a kuabor na wewegua, ra anum a matanitu i dumirum rop. Ma a taro det karot a kum karmendet una labino ngunungut ra, ¹¹ ma det watung laulau o God ra i kis sapat una langit, i kibino una labino ngunungut ma a kum laulau na inangon ra i kis un det, ikut ka det nukpukus gusun anundet a kum sakino petutna.

¹² A manwonom na ensel i lingis anun a dis netes una labino danim Iupretis, ma a danim i mamaso rop sur in waninar a kisapi sur a kum king tagitong una matmatano tobar. ¹³ Numur a tama tulu laulau na nion detul tamtama elar nama tulin rokrok. Detul pirso tagun a wan in labino sui, a wan a kuabor na wewegua ma a wan a torotoro na poropet. ¹⁴ Detul a tulu laulau na nion ma detul pam a kum ukinalong ma detul wan tuptupukus sur a kum king

tagun a rakrakon bual rop, sur detul in ben tomo det sur a inaim una labino bung anun o God, i ra i dekdek sakit.

¹⁵ “Tama i, an nanpat elar nama tene wolong. Osi ra i kis na tamtamabat ma i waninar anun a kum malu, i dan, sur gong i mengere ma i maimai.”

¹⁶ Ma a tulu laulau na nion detul ben tomo tar a kum king una nubual di watungi nama wasiso Ibru Amagedon.

¹⁷ A ururop na ensel i lingis anun a dis una maino, ma in labino walngan ara i pirso tagun a kiskis na king sapat una rumu na etabor, ma i watungi lena, “I sa rop!” ¹⁸ Numur in nememe, a pungpugur, a rurung ma a labino guri sakit det wanpat. Turpasi ra o God i ukis tar a taro, katu guri utmakai lenri i wanpat taru una rakrakon bual. A labino guri ra, i dekdek doko. ¹⁹ A labino tamon Babilon i terege sur a tulu nubual, ma a kum lamlabino tamon anun a taro tagun a kum gapman rop det terege rop. O God i nuk pas a labino tamon Babilon ma i pitar a kap na wain toromi sur in inumi. A kap ra i bukus nama karangop ina nun a kankan. ²⁰ A kum ailan rop det sa rorom ma a kum tangai kai, kataio mo i tama det. ²¹ A labino bato na ais, tekteken nututu ino, a mautino i elar nama limo na noino kilogram, i puku netes una taro. Ma a taro det watung laulau o God una ukadik na bato na ais ri, uni a ukadik ri i laulau doko.

17

A pamuk na ino ra i tur ukinalong a labino tamon Babilon

¹ Ara tagun a wonom mawit na ensel ra det pam a wonom mawit na dis, i wan torom iau ma i watungi tang lena, “Wan urin, an ese tar ui una warkurai na minabalu torom a pamuk na ino ra a risano i wan sarara una nun a sakino petutna. Kura i kis netes una kum danim. ² A kum king tagun a rakrakon bual det pam a laulau ino tomo nami. Ma a taro tagun a rakrakon bual det sipak nama wain ina nun a pamuk na petutna.”

³ A bukus nama Tokodos na Nion ma a ensel ra, i los pas iau usapat una nubual kalako taro uni. Tiro iai, a tama pas ara ino i kis taru netes una merek na kuabor na wewegua. A wewegua ra, a wonom mawit nin lorino ma a noino komino, ma a pinino i bukus nama kum rising ra i watung laulau o God nami. ⁴ A ino ra i emar namin namalu i pepol ma i merek kai, ma di mari

nama gol ma a kum wat ra matandet i ka doko, ma a kum wakak na kamkabaran. I pam pas a kap na gol nama lamano, i bukus nama kum sakino utna ma a kum dur na petutna tagun anun a pamuk na petutna. ⁵ Di tumus tar a risano unin masarino, a utna na pidik lenri,

A LABINO TAMON BABILON, A NAN A KUM PAMUK NA INO MA A KUM SAKINO PETUTNA SAKIT ANUN A RAKRAKON BUAL.

⁶ A tama a ino ra i inum pas a gapin a taro anun o God, a gapindet ra det wasiso talapor un o Iesu. Ra i sipak nami.

Ra a tama i, a kisin doko. ⁷ Ma a ensel i watungi tang lena, “Ilai ra u kisin? An palos a kukurai ina utna na pidik ina ino, ma a kuabor na wewegua ra i kis taru netes uni, ra a wonom mawit nin lorino ma a noino komino. ⁸ A kuabor na wewegua ra u tama tari, i laun pas numugu, ma ke laun uniri, ma numur in nanpat melet tagun in labino tung ra katu tuktukino, ma in nan sur in iru. Ma a taro una rakrakon bual ra ka di tumus a risandet una buk na nilaun, turpasi ra o God i ukis a rakrakon bual, det in kisin ra det in tama a kuabor na wewegua ri. Uni i laun pas numugu, ma ke laun uniri, ma numur in nanpat melet.

⁹ “Osi ra i mananos in talapor wakak sur a utna ri. A wonom mawit na lorino a kukuraino lena, a wonom mawit na tangai ra a ino i kis taru netes un det. ¹⁰ Ma ara kukuraino kai, a wonom mawit na king. A limo det sa mat, ara mukut i kis ma ara kai tagun det ke wanpat utmakai. Ra in nanpat in kis lilik pas kut. ¹¹ Ma a kuabor na wewegua ra i sa laun pas numugu ma ke laun uniri, i ra a mantiwal na king tagun a wonom mawit na king ra, ma in nan sur in iru.

¹² “A noino komino ra u tama i, det ra, a noino king, ra ka det losi utmakai tu warkurai na king. Ikut una wonom na noino minit kut, det in warkurai tomo nama kuabor na wewegua, elar nama kum king. ¹³ A nuknukin det i takai kut, ma det in pitar tar a dekdekin det ma anundet a warkurai torom a kuabor na wewegua. ¹⁴ Det in waim nama Barman na Sipsip, ma a Barman na Sipsip in winim pas det, uni i a Labino anun a kum lamlabino, ma a King anun a kum king. Ma det ra i sa pilok pas det, ma i kabo pas det, ma det nurnur mulus uni, det in win tomo nami.”

¹⁵ A ensel i watungi tang lena, “A kum danim ra u tama i, ra a pamuk na ino i kis

16:16: Sek 12:11 16:18: Tam 4:5; 8:5 16:19: Tam 14:10 16:20: Tam 6:14 16:21: Kis 9:23-24; Tam 11:19 17:1: Jer 51:12-13 17:2: Ais 23:17; Jer 51:7; Tam 14:8 17:3: Tam 13:1 17:4: Jer 51:7; Tam 18:16
17:6: Tam 18:24; 19:2 17:7: Tam 13:1 17:8: Dan 12:1; Tam 11:7; 13:7 17:12: Dan 7:7, 24 17:16:

iai, det tur ukinalong a kum taro tagun a kum tamon, a susut na taro, a taro tagun a kum gapman ma det tagun a wur ngas na wasiso. ¹⁶ A kuabor na wewegua ma a noino kom ra u tama det, det in nget a pamuk na ino. Det in ban laulau i ma det in rakon ru anun a ememar ma in mengere mukut. Det in nan a komonongino, ma det in tun ru i nama sungun. ¹⁷ Uni o God ut i sa unuk tari una nuknukin det sur det in pam sot pas a nuknukino lenri: Det in pitar tar a dekdekin det ra det ser warkurai nami, torom a kuabor na wewegua, tuk ra din pam sot pas a kum wasiso anun o God. ¹⁸ A ino ra u tama i, i a labino tamon sakit ra i warkurai sur a kum king una rakrakon bual.”

18

O Babilon i sa puku

¹ Numur tan a kum utna ri, a tama ara en-sel bulung i wan pirso tagisapat una langit. I pam ukai a dekdek na warkurai, ma anun a minamar i utalapor a rakrakon bual. ² Ma i woiwoi namin labino walngano lena, “A labino tamon Babilon i sa puku! I sa puku!

Uniri i sa wanpat a nubual anun a kum laulau na nion
 ma a nubual na parparau anun a kum laulau na nion
 ma a nubual na parparau anun a kum piko ra det dur,
 ma a nubual na parparau anun a kum wewegua ra det dur ma det milmiluon.

³ I sa puku, uni a taro tagun a kum gapman rop det sa inum pas a dekdek na wain ina nun a pamuk na petutna.

A kum king tagun a rakrakon bual det pam a pamuk na petutna tomo nami.

Ma a kum tene siuru tagun a rakrakon bual det tene ululeng nama susut na ululeng tagun anun a kinkinis na tene ululeng.”

⁴ A longoro in nalngan ara bulung tagis-apat una langit i watungi lenri,

“Anung a taro, mot in pirso gusuni,
 sur gong mot lason tomo nami una nun a kum sakino petutna,
 ma sur gong kai mot taramo a kum ukadik tomo nami.

⁵ Uni anun a kum sakino petutna i palataun tuk sapat una langit,
 ma o God i sa nuk ukai anun a kum sakino petutna.

⁶ A petutna ra i pam tari un mot, mot in balu meleti toromi,

anun a kum pinapam ra i pam tari un mot, mot in balu i elar ut nam aru dino toromi.

A kap ra i pitari torom mot sur mot in inum uni,

mot in ubukusi aru dino sur mot in pitari toromi sur in inum melet uni.

⁷ Mot in pitar a labino ngunungut ma a labino tupunuk tano,

ra in labo elar nama a ngas na petutna ra i ser ulabo pasi ut, ma i ser ugasa-gasi una kinkinis na tene ululeng,

I nuki uni lena,

‘Tau a kwin, ma a kis una nung a kiskis na kwin.

Awu sur iau a ula,

kan tupunuk lar pas.’

⁸ I mo ra a kum ukadik ri, a minat, a tupunuk ma a munurak

det in nanpat toromi un ara bung sot kut.

Ma din tun ru i nama sungun,

uni a Labino o God i dekdek sakit,

i ra, in pitar tar a warkurai na minabalu toromi.

⁹ “A kum king tagun a rakrakon bual, ra det pam a pamuk na petutna tomo nama ino ra, ma det rarakon tomo una nun a kum ululeng tagun anun a kinkinis na tene ululeng, ra det in tama in nimis tagun a sungun ra di tun a ino ra uni, det in tupunuk ma det in domos. ¹⁰ Det in tur bakbak taru mukut gusuni, uni det ngaran a ngunungut ra din ukadiki nami. Ma det in watungi lena,

‘A labino tamon i sa laulau. I sa laulau!

O Babilon, a dekdek na tamon!

Una womon na noino minit sot kut, ama warkurai na minabalu i sa wanpat.’

¹¹ “A kum tene siuru tagun a rakrakon bual det in domos ma det in tupunuk suri, uni kataio mo in kul anundet a kum utna na siuru. ¹² A utna na siuru lenri: a gol, a silwa, a kum watat ra matandet i ka doko, ma a kum wakak na kamkabaran, ma a kum wakak na malu, a kum pepol na malu, a kum malu i silika ma a kum merek na malu, ma a kum duwai ra i sangnain wakak, ma a wur ngas na utna ra di pami nama komin a elepan, ma a kum duwai ra matandet i ka doko, ma a bras, a aen ma ara ngas na wat ra matano i ka doko, ra di watungi nama mabel, ¹³ ma a ramano kum utna i sangnain wakak, ma aru utna kai ra der sangnain wakak ra di watung der nama kinamon, ma a mira, ma a paura di tuni ra a misino i sangnain wakak ra di watungi nama insens, ma a wain, a wel na oliw, a

palawa ma a wit, ma a kum bulumakau ma a kum sipsip, a kum os ma a kum karis, ma a kum tene ititula, det a kum mulusino ut.

¹⁴“A kum tene siuru det in watungi lena, ‘A kum utna ra u nem doko i, det sa rorom. Anum a kum ululeng ma anum a kum minamar det kai det sa rorom, ma ka din tama det melet mo.’ ¹⁵A kum tene siuru ra det ser siuru a kum utna ri, ma o Babilon i udan tar det nama susut na ululeng, det in tur bakbak taru mukut gusuni, uni det ngaran a ngunungut ra di ukadiki nami. Det in tupunuk, det in domos, ¹⁶ma det in woiwoi lena,

‘A labino tamon o Babilon i sa laulau! I sa laulau!

I ra i emar nama kum wakak na malu ra i pepol ma i merek, ma di mari nama gol, ma a kum watat ra matandet i ka doko, ma a kum wakak na kamkabarani.

¹⁷Una wonom na noino minit kut di sa ban laulau rop ru anum a susut na ululeng doko!’

“Ma a kum kipten rop ma det ra det wan tuptupukus nama sip, a kum tene pinapam tagun a kum sip, ma det ra det los a mani tagun anundet a pinapam una kum sip, det in tur bakbak taru mukut gusuni. ¹⁸Ra det in tama in nimisin o Babilon det in woiwoi lena, ‘Osi na tamon i elar nama wakak na tamon ri?’ ¹⁹Det in sapro a kubus una kum lorindet ma det in tupunuk, det in tangis ma det in woiwoi lena,

‘A labino tamon Babilon i sa laulau! I sa laulau!

Det ra det los a mani tagun a kum sip, det wanpat a kum tene ululeng tagun anum a susut na ululeng!

A wonom na noino minit sot kut ra i sa laulau rop!

²⁰Mot sapat una langit, mot in gas uni!

A taro anum o God ma a kum aposel ma a kum poropet, mot in gas!

O God i sa pitar tar a warkurai na minabalu toromi una kum petutna ra i pam tari un mot.’”

²¹Ma ara dekdek na ensel i los pas a labino wat, i labo elar nama wat na gino wit, ma i woro losop ru i ra i padung sa utasi ra i watungi lena,

“Din woro tustusano ru a labino tamon Babilon elar nama wat ri, ma ka din tama meleti mo.

²²In nalngan a kum tene pam kelekele ma a kum tene wup kaur ma a kum tene wup tuwuru ma a tinangis ina kum gita,

katutaio melet mo in longoro tari nisam.

Katu tene pinapam na lamandi melet mo in kis nisam.

Ma katutaio melet mo in longoro tar a tinangis ina wat na gino wit nisam.

²³Katu talapor na lam melet mo in lalom pat nisam.

Katutaio melet mo in longoro tar in nalngan tu matok na nolin nisam, a barman ma a toraro.

Numugu anum a kum tene siuru det a kum lamlabino tene ululeng una rakrakon bual.

U ben raro pas a taro tagun a kum gapman rop nam anum a miliro.

²⁴A gapin a kum poropet ma a kum taro anum o God,

ma det rop kai ra di um doko det una rakrakon bual,

di tama barato a gapindet tong o Babilon.”

19

Det watung ulabo pas o God sapat netes una langit

¹Numur tan a kum utna ri, a longoro a labino ugaia elar nama walngan ara labino kunur na taro sapat netes una langit, det kukukuk lena,

“Aleluia!

Anundat a God i sa ulaun pas dat, ma a minamar ma a dekdek anunu kut,

²uni anum a kum warkurai i lingmulus ma i tokodos.

I sa warkurai tar a pamuk na ino ra a risano i rereng una nun a sakino petutna, i ra i ban laulau a rakrakon bual nama nun a kum pamuk na petutna.

O God i sa pitar tar a warkurai na minabalu toromi,

i kibino una gapin anum a kum tultul, ra i um doko ru det.”

³Ma det kukukuk melet lena,

“Aleluia!

In nimis ina ino ra i wan tito usapat netes ken rop ma ken rop.”

⁴A ru noino ma a wat na mugumugu ma a wat na utna ra det laun det puku pirso nama urur, ma det lotu torom o God, i ra i kis una nun a kiskis na king ma det watungi lena,

“Amen, Aleluia!”

⁵Ra in nalngan ara i wanpat tagun a kiskis na king, i watungi lenri,

“Mot in watung ulabo pas anundat a God, mot anum a kum tultul,

a kum lamlabino ma mot ra ka di ulabo pas mot,
mot ra mot ser urur toromi!”

⁶ Ma a longoro a ugaia ra i elar nama walngan ara labino kunur na taro, a wungu ina danim, ra i noro, ma a pungpugur, i kukukuk lena,

“Aleluia!

Uni anundat a Labino o God,
ra i dekdek sakit, i kis na king.

⁷ Dat in gas,
ma dat in watung ulabo pasi!

Uni a bung na unolin anun a Barman na Sipsip, i sa wanpat,
ma nun a ino i sa waninar.

⁸ Di sa pitar tar in wakak na malu, tan a ino sur in emar nami.

In namalu ra i matok ma i talapor.”

In wakak na malu ra, i tur ukinalong a kum tokodos na pinapam anun a taro anun o God.

⁹ Numur a ensel i watungi tang lena, “Un tumusi lenri: Det ra di sa inanos tar det sur a lukaro na unolin anun a Barman na Sipsip, det dan!” Ma i watungi kai lena, “A kum wasiso ri a kum lingmulus na wasiso ut anun o God.”

¹⁰ Numur, a puku pirso nama urur nisan a ru kikino sur an lotu toromi. Ikut i watungi tang lena, “Gong! Iau kai, a tultul kut elar nam ui ma a kum tistisim ra det pam ukai a wasiso puaso anun o Iesu. Un lotu torom o God! Uni a wasiso puaso anun o Iesu, i ut ra i ukatutur a taro sur det in wasiso na poropet.”

O naro ra i kas una kabang na os

¹¹ A tama a langit i sa papos ma a tama a kabang na os i tur sa numugu tang. Ma i ra i kis netes uni di watungi lena, “I ser pam sot anun a pinapam” ma “I lingmulus.” Ma una nun a warkurai ma anun a inaim i mur a tokodos na petutna. ¹² Arin nikiok na matano i elar namin kunabor ina sungun, ma a susut na kukup na king i kis unin lorino. Ma di tumus tar a rising uni, ra kataio i tasmani, i sot kut i tasmani. ¹³ I emar namin namalu ra di umurungi una gap. Ma a risano, “A Wasiso anun o God.” ¹⁴ A kunur na taro na inaim tagisapat una langit det kas una kum kabang na os ma det muri. Det emar nama kum wakak na malu ra i matok ma i kabang. ¹⁵ Ma in totok na inaim ra i wangon doko, kura uwano i gom pasi, sur in ban laulau a taro tagun a kum gapman rop nami, ma in warkurai dekdek det namin nubuku na aen. I pas ginogino

a kum wino wain unin nutung na wat ra i tur ukinalong a karangop ina kankan anun o God, i ra i dekdek sakit. ¹⁶ Ma una nun in namalu ma una balangot na kikino di sa tumus tar a risano lenri,

A KING ANUN A KUM KING MA A LABINO ANUN A KUM LAMLABINO.

¹⁷ Numur a tama ara ensel i tur taru unin matanas, ma i kakabo namin labino walngano torom a kum piko rop ra det ro una maino lena, “Mot ro urin, mot in nan tomo una labino lukaro anun o God. ¹⁸ Ma mot in nan a komonong ina kum king, a kum mugumugu anun a taro na inaim, a kum taro na inaim, a kum os ma det kai ra det kas un det, ma a komonong ina taro rop, a kum tene ititula ma det ra awu sur a kum tene ititula, a kum lamlabino ma det ra ka di ulabo pas det.”

¹⁹ Numur a tama a kuabor na wewegua ma a kum king tagun a rakrakon bual, ma anundet a kum kunur na taro na inaim ra det wan tomo, sur det in waim nam o naro ra i kas una os tomo nama nun a kunur na taro na inaim. ²⁰ Ikut di pam sikot pas a kuabor na wewegua tomo nama torotoro na poropet, i ra i pam a kum utna na ukisin una risan a kuabor na wewegua. Ra i pam a kum utna na ukisin ra, i toro pas det ra a ukinalong anun a kuabor na wewegua kura un det, ma det lotu torom a malalar ina kuabor na wewegua. Di woro lalaun tar a torotoro na poropet ma a kuabor na wewegua unin labino tung na sungun, ra i wangon nama salfa. ²¹ Di un doko ru anunder a kunur na taro na inaim namin totok na inaim, ra o naro ra i kas una os i gom pasi. Ma a kum piko rop det wan a komonongin det ma det masur doko nami.

20

Ara arip na kilalo

¹ A tama pas ara ensel i wan pirso tagisapat una langit, i pam a ki tagun in labino tung ra katu tuktukino, ma i pam pasi kai a labino sen. ² I pam sikot pas in labino sui, in nusui tagun narap, ra di watungi a tene etakun, ma o Satan. I sen ukai tari tuk ra ara arip na kilalo in rop. ³ I woro pirso tari unin labino tung ra, i tagar ma i ukai bat tari, sur gong melet mo i toro a taro tagun a kum gapman rop tuk ra ara arip na kilalo ra, in rop. Numur tano din palos ru i sur in langolango pas kut tu du nat na bung.

⁴ A tama a kum kiskis na king ma det ra det kis netes un det, ra di sa pitar tar a

warkurai tandet sur det in warkurai. Ra a tama a nion a kum taro ra di sa tok kutus a kum kabarandet, kibino una nundet a wasiso talapor un o Iesu ma una wasiso anun o God. Ka det lotu torom a kuabor na wewegua o a malalarino, ma ka di ubek a ukinalong anun a kuabor na wewegua una kum masarindet o una kum lamandet. Det laun melet ma det warkurai tomo nam o Karisito ara arip na kilalo. ⁵ Iri a mugano katkatatur melet gusun a minat. Ikut det rop ra det sa mat ma ka det laun melet una du bung ra, ka det in laun melet tuk ra ara arip na kilalo ra, in rop, ra det in katatur maragom. ⁶ Det ra di ulaun det una mugano katkatatur melet gusun a minat, det dan ma det a kum tokodos na taro anun o God. A manru na minat kalako dekdekino sur in pam ukai det. Det a kum tene etabor torom o God ma o Karisito. Det in warkurai tomo nam o Karisito ara arip na kilalo.

Di woro pirso ru o Satan unin labino tung na sungun

⁷ Ra ara arip na kilalo ra i sa rop, din palos ru o Satan tagun anun a kinkinis na karabus. ⁸ Ra in nan sur in toro pas a taro tagun a kum gapman rop tagun a wat na matmatano wuwu, a taro ra di watung det nam o Gok ma o Magok. In ben tomo det sur a inaim. A nilulukin det in elar nama woio tagun a usalin. ⁹ Ma det in nan tagitiro una rakrakon bual, ma det in tur talilis pas a nubual ra a taro anun o God det kis iai, ma a labino tamon ra o God i maris doko i. Ikut a sungun in puku pirso tagisapat una langit ma in tun rop ru a taro na inaim. ¹⁰ O Satan, i ra i toro pas det, din woro pirso ru i unin labino tung na sungun ma salfa. In nutung, ra di sa woro pirso tari munung a kuabor na wewegua ma a torotoro na poropet iai. Tiro iai din ukadik detul una kum mirum ma a waspi, ken rop ma ken rop.

A ururop na warkurai

¹¹ Numur a tama a labino kiskis na king i kabang, ma a tama pas ara ra i kis uni. Ma a rakrakon bual ma a bakut der rorom gusun in matano, katu nubual melet mo anunder. ¹² A tama a kum minat rop, a kum lamlabino ma det ra ka di ulabo pas det, ra det tur numugu tan a kiskis na king, ra di papok a kum buk. Di papok melet ara buk, i a buk na nilaun. Ma di warkurai a kum minat, elar nama nundet a kum pinapam, ra di sa tumus ukai tari una kum buk. ¹³ A tasi i pitar pat melet ru a kum minat ra det

mat sa utasi. A minat ma o Edes, a tamon anundet ra det mat, der kai der pitar pat ru a kum minat ra kura tiro un der. Di warkurai det taktakai elar ut nama nundet a kum pinapam. ¹⁴ Numur di woro pirso ru a minat ma o Edes unin labino tung na sungun. In nutung na sungun ra, i a manru na minat. ¹⁵ Ma osi ra ka di tumus a risano una buk na nilaun, di woro pirso ru i unin labino tung na sungun.

21

A matok na langit ma a matok na rakrakon bual

¹ Numur a tama a matok na langit ma a matok na rakrakon bual, uni a mugano langit ma a mugano rakrakon bual der sa rorom, ma kalako tasi mo. ² Ma a tama a matok na Jerusalem, a tamon anun o God, i wan pirso tagisapat una langit tan o God. Di sa waninar tari elar nami ra di sa mar wakak tar a toraro na ino sur anun a musano, sur der in nolin. ³ Ma a longoro in labino walngan ara tagisapat una kiskis na king i watungi lena, "Tama i, a tamon anun o God i sa kis torom a taro, ma i ut in kis tomo nam det. Ma det anun a taro, o God in kis tomo nam det, ma i ut a God anundet. ⁴ Ma in wus ru a lurlur na matandet rop. Katu minat melet mo, kalako tupunuk, kalako tinangis ma kalako ngunungut mo, uni a kum utna tagun numugu det sa rorom."

⁵ Ma o naro ra i kis una kiskis na king i watungi lena, "Tama i, uniri a umatok a kum utna rop!" Ma i watungi kai lena, "Un tumus ukai a kum wasiso ri, uni a kum wasiso ri det lingmulus ma i topasi sur din nurnur uni." ⁶ Ma i watungi tang lena, "I sa rop! Iau a Alfa ma a Omega, a turturkibino ma a ururupino. Osi ra i muruk an inumi nama danim tagun a matmatano danim, a danim na nilaun, ra ken kuli. ⁷ Osi ra i winim pas a inaim, in rakan pas a kum utna rop ri, ma iau an God anunu, ma i o nutunglik."

⁸ "A kum tene nginara, ma det ra ka det nurnur, ma det ra anundet a petutna i dur, ma a kum tene un doko a taro, ma det ra det pam a kum petutna na pamuk, a kum tene sangsagor, a kum tene lotu torom a kum torotoro na god, ma a kum tene torotoro rop, anundet a nubual, in labino tung na sungun ma a salfa. Iri a manru na minat."

20:6: Tam 1:6 **20:8:** Ese 38:2, 9, 15-16 **20:9:** 2 Kin 1:10 **20:10:** Sng 11:6; Tam 19:20; 21:8 **20:12:** Dan 7:9-10; Mt 25:31-46; Ap 17:31; 2 Kor 5:10; Tam 13:8 **20:13:** Rom 2:6; 1 Pit 1:17; Tam 2:23; 22:12 **21:1:** Ais 65:17; 2 Pit 3:13 **21:2:** Ais 52:1; 61:10; lbr 11:16; 12:22; Tam 3:12 **21:3:** Wkp 26:11, 12; Ese 37:27; Sek 2:10; 2 Kor 6:16 **21:4:** Ais 35:10; 65:19; Tam 7:17 **21:5:** 2 Kor 5:17 **21:6:** Ais 55:1; Jer 2:13; Jn 7:37; Tam 1:8, 17; 22:17 **21:7:** 2 Sml 7:14; Sng 89:26-27 **21:8:** Mt 25:41; lbr 10:38-39; Tam 20:15; 22:15

A matok na Jerusalem

⁹ Ara tagun a wonom mawit na ensel, ra det pam a wonom mawit na dis ra i bukus nama wonom mawit na ururop na ukadik, i wanpat ma i watungi tang lena, “Wan urin, an ese tar uti una matok na nolin, a ino anun a Barman na Sipsip.”
¹⁰ A bukus nama Tokodos na Nion, ma a ensel ra, i los tito pas iau usapat una labino tangai ra i tur sakit usapat netes. Ma i ese tar iau un o Jerusalem, a tamon anun o God, i wan pirso tagisapat una langit tan o God. ¹¹ I talapor nama minamarin o God, a talaporino i pilpil elar nama wat ra matano i ka doko, di watungi nama jaspa, i talapor elar nama galas. ¹² In labino woro ino i tur sakit usapat netes, ma a noino ma aru matansako ino, ma a noino ma aru ensel det tur nisan a noino ma aru matansako. Ma una kum matansako ra, di sa tumus tar a kum risan a noino ma aru kabotaro Israel. ¹³ A tulu matansako detul tamtama sur a nubual ra in matanas i wanpat iai, a tul una matmatano lubur, a tul una matmatano tobar, ma a tul detul tamtama sur a nubual ra in matanas i sup iai. ¹⁴ In kibin noworo ina tamon ra, di pami nama noino ma aru wat. Ma una kum watat ra, di sa tumus tar a risan a noino ma aru aposel anun a Barman na Sipsip.

¹⁵ Ma ara ensel ra mir wasiso, i pam pas in nanai ra di pami nama gol, ra di ser mak a kum utna nami, sur in mak a tamon Jerusalem nami, ma in maki kai a kum matansako ino, ma in noworo ino. ¹⁶ A tamon ra, a wat na paporino, det elar rop kut. A walosino ma a perere ino der elar kut. Ra i mak a tamon nama nun in nanai, i elar nam a noino ma aru arip na stadia* a walosino, a perere ino ma a lekeleke ino, detul elar rop kut. ¹⁷ A ensel i mak a but ina in noworo, i elar nama ara mar ma a wat na noino ma wat na kubit†. I maki nama mak ra a taro det ser mak nami.

¹⁸ In noworo di pami nama jaspa, a wat ra i bulu ma i grin, ma a tamon di pami nama gol rop kut, ra i talapor doko elar nama galas. ¹⁹ Ma a kum kibin a kum papor woro ina tamon ra, di mar det nama kum ngas na watat rop ra matandet i ka doko. A mugano di pami nama jaspa, a manru nami a sapaia, a bulu na wat, a mantul nami a aget, a grin na wat, ma a manwat nami a emeral, a grin na wat, ²⁰ a manlimo nami a sadonik, a wat i kabang ma i merek, a

wonom nami a konilian, a merek na wat, a wonom mawit a krisolit, a lupu na wat, a tiwal nami a beril, a grin na wat, a lisu nami a topas, a lupu na wat, a noino nami a krisopras, a grin na wat, a noino ma ara nami a jakin, a bulu na wat, ma a noino ma aru nami a ametis, a merek na wat. ²¹ A noino ma aru matansako, det ra, a noino ma aru wat tagitiro ubalan a kabokabol, ra a matandet i ka. Ara matansako ara wat. A kisapi ina tamon, di pami nama gol rop kut, i tamtama talapor elar nama galas.

²² Ka tama tu rumu na etabor una tamon ra, uni a Labino o God, i ra i dekdek sakit, ma a Barman na Sipsip, der ut ra a rumu na etabor una tamon ra. ²³ A tamon ra ke sibo sur in matanas ma a kalang sur der in utalapori, uni a minamarin o God ut i utalapori, ma a Barman na Sipsip i ut ra a lam taguni. ²⁴ A taro tagun a kum gapman rop det in nanan una talaporino, ma a kum king anun a rakrakon bual det in los ruk anundet a kum minamar usapat uni. ²⁵ Katu bung melet mo ra a kum matansako det in tagar, uni ken mirum melet mo. ²⁶ A taro tagun a kum gapman rop det in los ruk anundet a kum utna na ululeng, ma anundet a kum minamar usapat uni. ²⁷ Katu dur na utna melet mo in ruk usapat uni, ma kataio ra i ser pam a kum utna na maimai, ma kataio kai ra i ser toro. Det ra di sa tumus tar a risandet una buk na nilaun anun a Barman na Sipsip, det kut det in ruk.

22

A danim na nilaun ma in nanai na nilaun

¹ Numur a ensel i ese tar a danim na nilaun torom iau, i talapor elar nama galas. I sal pat tagun a kiskis na king anun o God, anunder tomo nama Barman na Sipsip, ² ma i sal epotor una labino kisapi, una tamon ra. In nanai na nilaun, i tur un aru papor ina danim ra. I ser wu a noino ma aru ngas na wino. Una kum kalang rop, i ser wu, a noino ma aru dino una arara kilalo. Ma a kum dono det ser ulangolango a taro tagun a kum gapman rop gusun a kum misait. ³ Katu utna melet mo ra a kankan anun o God i kis uni. O God tomo nama Barman na Sipsip kura der una kiskis na king una tamon ra. Ma a kum tultul anun o God det in lotu toromi. ⁴ Det in tama in masarino, ma din tumus tar a risano una kum masarindet. ⁵ Katu mirum melet mo.

21:10: Ese 40:2 **21:11:** Ais 60:1-2, 19 **21:12:** Ese 48:30-35 **21:15:** Ese 40:3; Tam 11:1 * **21:16:** A noino ma aru stadia i elar nam aru arip ma aru mar na kilomita. † **21:17:** Ara mar ma a wat na noino ma wat na kubit i elar nama tulu noino ma a tulu sinanga. **21:18:** Ais 54:11-12 **21:23:** Ais 60:19-20; Tam 22:5 **21:24:** Ais 60:3, 5 **21:25:** Ais 60:11 **21:27:** Ais 52:1; Ese 44:9; 1 Kor 6:9-10 **22:1:** Ese 47:1 **22:2:** Stat 2:9; Ese 47:12; Jol 3:18; Sek 14:8 **22:4:** Mt 5:8; Tam 3:12 **22:5:** Dan 7:18, 27; Tam 5:10; 20:6; 21:23, 25

Ka det in ling melet mo sur a talapor ina lam o a talaporin in matanas, uni a Labino o God ut in pitar a talapor tandet. Ma det in warkurai elar nama kum king, ken rop ma ken rop.

⁶ A ensel i watungi tang lena, “A kum wasiso ri, i lingmulus ma i topasi sur din nurnur uni. A Labino, o God ra i mugu a nion a kum poropet sur det in upuaso anun a kum wasiso, i tulu ru anun a ensel sur in ese tar anun a kum tultul una kum utna ra milau in nanpat.”

A inawan pat melet anun o Iesu i sa milau

⁷ O Iesu i watungi lena, “Tama i, milau mo an nanpat! Osi ra i mur a kum wasiso na poropet tagun a buk ri, i dan.”

⁸ Iau o Jon, a sa longoro tar a kum utna ri, ma a sa tama tari. Ra a sa longoro tari, ma a sa tama tari, a puku pirso nama urur nisan aru kikin a ensel sur an lotu toromi, a ensel ra i ese tar a kum utna ri tang. ⁹ Ikut i watungi tang lena, “Gong! Iau kai, a tultul kut, elar nam ui ma a kum tistisim, a kum poropet ma det rop kai ra det mur a kum wasiso tagun a buk ri. Un lotu torom o God!”

¹⁰ Ma i watungi tang lena, “Gong u pidik bat a kum wasiso na poropet tagun a buk ri, uni a du bung ra a kum utna ri in nanpat, i sa milau. ¹¹ Osi ra a tene sakino din madek ru i sur in pami ut anun a kum sakino, ma osi ra i dur, din madek ru i sur in pami ut anun a kum dur na petutna, ma osi ra anun a petutna i tokodos, din madek ru i sur in pami ut anun a tokodos na petutna, ma osi kai ra anun o God, din madek ru i sur in pami ut anun a petutna ra o God i nemi.”

¹² O Iesu i watungi lena, “Tama i, milau mukut an nanpat! An nanpat tomo nama ikul, ma an pitari torom a taro rop elar

ut nama nundet a kum pinapam taktakai. ¹³ Iau a Alpa ma a Omega, a mugu sakit ma a mur sakit, a turturkibino ma a ururopino.

¹⁴ “Det ra det gos anundet a kum malu, det dan, ma i tokodos sur det in nangan tagun in nanai na nilaun, ma det in ruk una matansako ina in noworo ina tamon ra. ¹⁵ Ikut a kum pap, ma a kum tene sangsagor, ma det ra det pam a kum pamuk na petutna, a kum tene um doko a taro, a kum tene lotu torom a kum torotoro na god, ma det ra det nem a torotoro ma det pami, kura det upiso unin noworo.

¹⁶ “Iau o Iesu, a tulu ru anung a ensel sur in pitar a wasiso talapor ri torom mot a taro na lotu una kum tamon. Iau in wakakorin o Dewid ma a tubunu, ma in borodo ra i talapor doko.”

¹⁷ A Tokodos na Nion ma a matok na nolin na ino, der watungi lena, “Wan urin!” Ma osi ra in longoro i, i kai in watungi lena, “Wan urin!” Osi ra i muruk, i wakak sur in nan urin, ma osi ra i nemi, in inum tagun a danim na nilaun ra ka din kuli.

A ururopino

¹⁸ A utumarong det rop, ra det longoro a wasiso na poropet tagun a buk ri: Ra taio in tugus tari nam tu wasiso gisen, o God in tugus tari kai a kum ukadik toromi, ra di sa wasiso talapor taru uni una buk ri. ¹⁹ Ra taio in rakon ru tu wasiso na poropet tagun a buk ri, o God kai in rakon ru anun a tinibo gusuni tagun in nanai na nilaun, ma tagun a tamon anun o God, ra di sa wasiso talapor taru uni una buk ri.

²⁰ O naro ra i wasiso talapor una kum utna ri, i watungi lena, “Lingmulus, milau mo an nanpat.”

Amen. Labino o Iesu wan urin.

²¹ A marmaris anun a Labino o Iesu in kis tomo nama taro rop anun o God. Amen.